


Tuhun tsa tsa naco jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,  
San Juan Colorado)

# **Tuhun tsa a tsa naco jutu mañi yo Jesucristo tsi yo New Testament in Mixtec, San Juan Colorado (MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

## **Copyright Information**

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
c270ec54-172a-541f-83e6-7760f619c744

## Contents

San Mateo . . . . .	1
Marcos . . . . .	46
Lucas . . . . .	75
Juan . . . . .	123
Los Hechos . . . . .	158
Romanos . . . . .	203
I Corintios . . . . .	221
II Corintios . . . . .	238
Gálatas . . . . .	251
Efesios . . . . .	258
Filipenses . . . . .	264
Colosenses . . . . .	269
I Tesalonicenses . . . . .	273
II Tesalonicenses . . . . .	277
I Timoteo . . . . .	279
II Timoteo . . . . .	285
Tito . . . . .	289
Filemón . . . . .	292
Hebreos . . . . .	293
Santiago . . . . .	307
I San Pedro . . . . .	312
II San Pedro . . . . .	317
I San Juan . . . . .	320
II San Juan . . . . .	325
III San Juan . . . . .	326
San Judas . . . . .	327
El Apocalipsis . . . . .	329

## Tuhun Nyoo Tsa Tyaa Ra Mateo

*Nyivi ra Jesucristo tsa tsicoo tsa ndi cumañi ca cacu ra*  
(Lc. 3.23-38)

<sup>1</sup> Ihya nyecú tandihi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuv̄i tsi ra.

<sup>2</sup> Sehe ra Abraham cuv̄i tsi ra Isaac, tan sehe ra Isaac cuv̄i tsi ra Jacob. Tan sehe ra Jacob cuv̄i tsi ra Judá tsihin tandihi ra yañi ra.

<sup>3</sup> Tan ra Fares tsihin ra Zara sehe ra Judá tsihin ña Tamar cuv̄i tsi ra naha. Tan sehe ra Fares cuv̄i tsi ra Esrom, ra cuv̄i jutu ra Aram.

<sup>4</sup> Tan sehe ra Aram cuv̄i tsi ra Aminadab, jutu ra Naasón. Tan sehe ra Naasón cuv̄i tsi ra Salmón.

<sup>5</sup> Tan ra Booz, sehe ra Salmón tsihin ña Rahab cuv̄i tsi ra. Tan sehe ra Booz tsihin ña Rut cuv̄i tsi ra Obed, jutu ra Isaí.

<sup>6</sup> Tan ra David, ra cuv̄i rey, sehe ra Isaí cuv̄i tsi ra. Tan sehe ra rey David tsihin ñaha tsa cuv̄i ñasihi ra Urías cuv̄i tsi ra Salomón.

<sup>7</sup> Tan sehe ra Salomón cuv̄i tsi ra Roboam, ra cuv̄i jutu ra Abías. Tan sehe ra Abías cuv̄i tsi ra Aza.

<sup>8</sup> Tan sehe ra Aza cuv̄i tsi ra Josafat, ra cuv̄i jutu ra Joram. Tan sehe ra Joram cuv̄i tsi ra Uzías.

<sup>9</sup> Tan sehe ra Uzías cuv̄i tsi ra Jotam, ra cuv̄i jutu ra Acáz. Tan sehe ra Acáz cuv̄i tsi ra Ezequías.

<sup>10</sup> Tan sehe ra Ezequías cuv̄i tsi ra Manasés, ra cuv̄i jutu ra Amón. Tan sehe ra Amón cuv̄i tsi ra Josías.

<sup>11</sup> Tan sehe ra Josías cuv̄i tsi ra Jeconías tsihin tandihi ra yañi ra. Tsicoo ra naha quivi tñin ra ñuu Babilonia naha ra tsi nyivi Israel, tsa cua cahun ñi cuv̄i ñi musu ra ñuu Babilonia can naha ra.

<sup>12</sup> Tsa yaha can, tan tsicoo sehe ra Jeconías, tan ra ican cuv̄i ra Salatiel, jutu ra Zorobabel.

<sup>13</sup> Tan sehe ra Zorobabel cuv̄i tsi ra Abiud, ra cuv̄i jutu ra Eliaquim. Tan sehe ra Eliaquim cuv̄i tsi ra Azor.

<sup>14</sup> Tan sehe ra Azor cuv̄i tsi ra Sadoc, ra cuv̄i jutu ra Aquim. Tan sehe ra Aquim cuv̄i tsi ra Eliud.

<sup>15</sup> Tan sehe ra Eliud cuv̄i tsi ra Eleazar, ra cuv̄i jutu ra Matán. Tan sehe ra Matán cuv̄i tsi ra Jacob.

<sup>16</sup> Tan ra Jacob cuv̄i jutu ra José, yñi ña María. Juvin ña cuv̄i sihi ra Jesús ra cuv̄i Cristo, o cuñi tsi catyí, ra tsa jaquitsi Nyoo tyin quihí ndaha tsi yo.

<sup>17</sup> Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tñin ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

*Nu cacu ra Jesucristo*  
(Lc. 2.1-7)

<sup>18</sup> Tyehen cuv̄i tan cacu ra Jesucristo: tsa yaha cundaa tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihj sehe ña tsa cuenda Tatyí li Nyoo.

<sup>19</sup> Tan ra José, ra cua cuv̄i yñi ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa naco xeehe ra tsi ña tan ña cua tindaha ca ra tsihin ña.

<sup>20</sup> Tan tsitsi tsa tsicá iñi ra yacan, quituvi iin ángel Jutu Mañi yo nuu ra nu quixi ra. Tan nyehe ra ñumaahna, tan catyí ángel can tsihin ra:

—José, tata ra David, ña caça iñi un quihin un tsi ña María cuv̄i ña ñasihi un, tyin sehe ña tsa cua cacu, sehe Tatyí li Nyoo cuv̄i tsi.

<sup>21</sup> Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

<sup>22</sup> Tacan cuv̄i tyin tacan tan cundaa tsa cahan ra cuv̄i ndusu yuhu Jutu Mañi yo tahan tsanaha.

<sup>23</sup> Tan catyí ra tyehen:

Ñaha yoco tsa ñaha ca coo yñi, cua cahun sehe ña.

Tan cua coo iin sehe ña. Tan cua cunañi ra: Emanuel.

Tan sivi can cuñi tsi catyí: “Nyoo iyó ra tsihin yo.”

<sup>24</sup> Tan tsa ndoto ra José, javaha ra tumaa catyí ángel can tsihin ra. Quihin ra tsi ña María tyin cuv̄i ña ñasihi ra.

<sup>25</sup> Maa tyin ña quixi ra tsihin ña nda cuanda tsa yaha cacu sehe ña. Tan jacunañi ra tsi lee can: Jesús.

## 2

*Nu cuahan ra tsitó xaan, ra cuv̄i rey, cua nyehe ra naha nu cacu ra Jesús*

<sup>1</sup> Cacú ra Jesús ñuu Belén tsa canyii nu cuv̄i Judea. Tan quivi can ra cuv̄i rey Judea nañi ra Herodes. Tacan tan tsaaj juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuv̄i ra naha.

<sup>2</sup> Tsicá tuhun ra naha tsi nyivi tan catyí ra naha:

—¿Nu maa nyii ra cuv̄i rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacu ra ityi ihya. Tan vatsí ndi vatsí jacahnu ndi tsi ra —catyí ra naha.

<sup>3</sup> Quivi tsa tsito ra rey Herodes tsa cahan ra can naha ra, tuñu xaan cuñi ra cuvi. Tacan tucu tandihi nyivi ñuu Jerusalén can.

<sup>4</sup> Tacan tan cana ra Herodes tsi tandihi ra jutu tsa cuvı ityi nuu tsihin ra cuvı jutu tan tsihin tandihi ra cuvı maestro cuenda ley vehe ñuhu naha ra. Tan tsica tuhun ra tsi ra naha numaa nda taahan tsi cacu ra Cristo.

<sup>5</sup> Tan nacahan ra can naha ra tan catyi ra naha:

—Ñuu Belén tsa canyiı Judea, ndacan taahan tsi cacu ra tyin tyehen tyaa ra cuvı ndusu yuhu Nyoo nu tutu tahañ tsanaha:

<sup>6</sup> Tan yooho Belén ñavin iin ñuu luhlu ñi cuvı un tsa nuu tandihi maa ñuu tsa cayucú Judá

tyin nuu yooho cua quita ra cua quihı ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyi nu tutu Nyoo, —catyi ra can naha ra tsihin ra Herodes.

<sup>7</sup> Tacan tan cana xeehe ra Herodes tsi ra tsito xaan can naha ra, tan tsica tuhun ra tsi ra naha náa quivi tan náa hora quituvı tiñuu can.

<sup>8</sup> Tacan tan jacuhun ra tsi ra naha nda ñuu Belén, tan catyi ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyi tuhun ndo tsihin yu, tyin cuhun ndihi yu cujacahnu yu tsi ra —catyi ra Herodes tsihin ra naha.

<sup>9</sup> Tsa tsiñj ra tsa tsito xaan can naha ra tsa cahan ra Herodes, tan quihın ra naha ityi cuahan ra naha. Tan tiñuu tsa nyehę ra naha ityi nu caná ñicanyii can, cuahan tsi ityi nuu ra naha. Tan tsiuñj tsi maa maa siqui nu canyiı ra lee can.

<sup>10</sup> Tan tsa nyehę ra tsito xaan can naha ra tyin tsiuñj tiñuu can, siı xaan cuñi ra naha.

<sup>11</sup> Tan quihıvı ra naha tsitsi vehe nu canyiı lee can. Tan nyehę ra naha tsi ra tsihin ña María, sihi ra. Tan tsiuñj tsi ra naha tyin jacahnu ra naha tsi lee can. Tacan tan nuñá ra naha yuhu caja tsa ndahá ra naha. Tan tava ra naha regalo tsa cuvı xuhun cuaan, tan cutu vixi, tan ndutya tamı tsa nañi mirra. Tan tsaah ra naha tsi lee can.

<sup>12</sup> Tsa yaha tsa nyehę ra naha tsi ra Jesús tan cuanuhı ra naha. Tan tsa cuanuhı ra naha nyehę ra naha ñumaahna tan catyi tsi tyin ña taahan tsi cuhun ra naha cucatyı tuhun ra naha tsihin ra Herodes. Yacan cuenda siin ityi cuanuhı ra naha.

*Nu tsiñy xeehe ra José tan ña María tsihin lee sehe ñi nda Egipto*

<sup>13</sup> Tsa yaha cuahan ra tsa tsito xaan can naha ra, tacan tan iin ángel Jutu Mañi yo quituvı nuu ra José tsitsi ñumaahna. Tan catyi ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahñi ra tsi ra —catyi ángel can tsihin ra José.

<sup>14</sup> Tacan tan nduvita ra José tsacuaa can. Tan quihın ra tsi lee can tsihin sihi tsi. Tan cuahan ñi nda Egipto.

<sup>15</sup> Ndacan tsicoq ñi nda cuanda tsa tsihi ra Herodes. Tacan cuvı tyin cundaq tsa cahan ra cuvı ndusu yuhu Jutu Mañi yo tahañ tsanaha jaha Nyoo. Tyehen catyi ra: “Nda Egipto cana yu tsi Sehe yu”, catyi ra.

*Nu tava tyiñu ra Herodes na cahñi ra naha tsi ra nyihi*

<sup>16</sup> [Tsa ndi cumañi ca cúu ra Herodes tan ndi ndatú ra tsa quitsi nyico ra tsito xaan can naha ra] tan tsa tui ñi ra Herodes tyin ra tsito xaan can naha ra jandavı ñaha ra naha tsi ra, tan nduxaan xaan ra. Tan tava tyiñu ra na cahñi andaru tsi tandihi ra nyihi tsa iyó ñuu Belén can tan inga ñuu tsa cayucú yatın ñi, ra nyihi tsa ndi cacú nda cuanda ra nyihi tsa uvi cuiya. Tacan javaha ra tyin tsicá ñi ra tyin tacan cuiya ra Jesús tumaa catyi ra tsito xaan can naha ra tsihin ra.

<sup>17</sup> Tacan cuvı tyin cundaq tsa cahan Nyoo tan tyaa ra Jeremías, ra cuvı ndusu yuhu ra tahañ tsanaha. Tyaa ra tyehen:

<sup>18</sup> Tsiñi yo iin ndusu ñuu Ramá,

tsacú tsa nyivi, tan iyo taahan ñi.

Juvin ñi nyivi cuvı tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yaha tsihi sehe ñi, catyi tsi nu tutu Nyoo.

<sup>19</sup> Maa tyin tsa yaha tsa tsihi ra Herodes, tacan tan quituvı nyico iin ángel Jutu Mañi yo nuu ra José nu quixı ra nda Egipto. Tan catyi ra tsihin ra:

<sup>20</sup> —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducú cahñi tsi ra lee ihya.

<sup>21</sup> Tacan tan nduvita ra José, tan quihın ra tsi lee can tan tsihin sihi ra. Tan cuanuhı ñi nda Israel.

<sup>22</sup> Maa tyin quivi tsito ra José tyin ra Arquelao, sehe ra Herodes, cuvı ra rey nda Judea, nayuhvı ra tan ña cuñi ra cuhun ra ndacan. Tan cuanuhı ñi nda Galilea tyin tacan jacoto Nyoo tsi ra tsitsi ñumaahna.

<sup>23</sup> Tsa tsa ñi ican, tan cuahan ñi nda ñuu Nazaret, cua coo ñi. Tan ican tsicoq ñi. Tacan cuvı tyin cundaq tsa cahan ra cuvı ndusu yuhu Nyoo tahañ tsanaha. Tyin catyi ra naha tyin ra Jesús ra ñuu Nazaret cua cuvı ra.

## 3

*Nu caħan ra Juan tuhun Nyoo tshin nyivi*  
(Mt. 1.1-8; Lc. 3.1-9, 15-17; Jn. 1.19-28)

<sup>1</sup> Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quitsahá caahán ra tuhun Nyoo tshin nyivi tsa tsaa nu nyii ra.

<sup>2</sup> Tan catyí ra:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi yo.

<sup>3</sup> Juvin ra Juan cuví ra tsa caħan ra Isaías ra cuví ndusu yuhu Nyoo taħan tsanaha. Tan tyaá ra tsa tsahá Nyoo tsi ra tyehen:

Cua tyaá soho yo ndusu ra nu caná tsaá ra nu tsiqui tan catyí ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaá ra Isaías.

<sup>4</sup> Tan ra Juan nditsí ra jahma tsinu tshin ixi camellu. Tan cinturón ra, ñi cuví tsi. Tan tica xama tsatsí ra tan tshí ra ndutya ñuñu.

<sup>5</sup> Quitsí nyivi ñuu Jerusalén tan tandihí ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsí tyaá soho ñi tuhun caahán ra.

<sup>6</sup> Tan tsa yahá nahmá ñi cuatyí ñi, ra Juan jacoondutyá ra tsi ñi yutya cahnu Jordán ican.

<sup>7</sup> Maa tyin nyehe ra Juan tyin cuaha xaan ra fariseo, ra tsa tyaá yahvi xaan ley vehe ñuhu, tan cuaha xaan ra saduceo, quitsí ra naha tyin coondutya ra naha. Tan catyí ra tshin ra naha:

—jNyooho, tumaa tata coo xaan cuví ndo! ¿A cuñi maa ndo tyin tshin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

<sup>8</sup> Násama ndo cuhva iyó ndo, na nyehe yo tyin tsa ndu uvj iñi ndo cuatyí ndo nuu Nyoo.

<sup>9</sup> Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tshin yuu ihya, Nyoo cuví jananduvi ra nyivi ra Abraham.

<sup>10</sup> Tsa ndatú yatsa Nyoo tsi tandihí ndo tsa cuví ndo tumaa yutun tsa ña tsahá tsi vaha. Cua tyahnya tun tan cua cayu tun, tacan cua javaha Nyoo tshin ndo —catyí ra Juan—.

<sup>11</sup> Tsa nditsa tyin yuhu jacoondutyá yu tsi nyivi tshin ndutya, tan cuví tsi iin seña tyin tsa ndu uvj iñi ñi cuatyí ñi. Maa tyin tsa yaha jacoondutya yu tsi ñi tshin ndutya, vatsí inga ra cua jacoondutya tsi ñi tshin Tatyí Ii Nyoo tan tshin ñuhu ihñi. Iyó ca tunyee iñi Nyoo tsi maa ra tan ñavin ca yuhu. Tan ndi tsa cuisso yu nditsan ra tan nduve yahvi nyaá yu, tyin maa ra cahnu ca cuví ra.

<sup>12</sup> Tan ra ican ndahá ra pala tyin cua jandava ra trigu. Cua tava siin ra trigu vaha, tan cua natyihí vaha ra itsi. Tan cua cahmi

ra tsahan tsa quita tshin trigu can tshin ñuhu tsa ña cua ndahva maa —catyí ra Juan.

*Nu tsicoondutya ra Jesús*  
(Mr. 1.9-11; Lc. 3.21-22)

<sup>13</sup> Tacan tan quitá ra Jesús Galilea tan tsaá ra yutya cahnu Jordán nu nyii ra Juan, tyin cuñi ra tsa jacoondutya ra Juan tsi ra.

<sup>14</sup> Tsa jihna ñi ña cuñi ra Juan jacoondutya ra tsi ra, tan quitsahá catyí ra tshin ra:

—Cuñi un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

<sup>15</sup> Maa tyin ra Jesús catyí ra tshin ra:

—Tsa vityin, na cuví tsi cuhva catyí yu tshin un. Tyin cuñi tsi tsa javaha yo tandihí tsa vaha tsa cuñi Nyoo —catyí ra tshin ra Juan.

Tacan tan ndoo ra Juan vaha.

<sup>16</sup> Tsa yahá tsicoondutya ra Jesús tan quitá ra tsitsi ndutya. Tan nuña andivi, tan ra Jesús nyehe ra vatsí nuú Tatyí Ii Nyoo, tumaa iin paloma. Tan tsaá tsi siqui ra.

<sup>17</sup> Tacan tan caħan iin ndusu ityi andivi, tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sii xaan cuñi yu tshin ra —catyí ndusu can.

## 4

*Nu nducu cuhva nu ña vaha tsi ra Jesús*  
(Mr. 1.12-13; Lc. 4.1-13)

<sup>1</sup> Tacan tan tsindacá Tatyí Ii Nyoo tsi ra Jesús iin nu tsiqui, tyin cua nducu cuhva nu ña vaha tsi ra.

<sup>2</sup> Tsicoq nyitya ra uvi xico nduvi tan uvi xico tsacuaa. Tsa yahá can tan quitsí socó tsi ra.

<sup>3</sup> Tacan tan natuhva nu ña vaha nu nyaá ra, tyin cuñi nu nducu cuhva nu tsi ra. Tan catyí nu tshin ra:

—Tatun Sehe Nyoo cuví tsi un, caħan tshin yuu ihya, na nanduvi tsi paan —catyí nu ña vaha tshin ra Jesús.

<sup>4</sup> Maa tyin ra Jesús nacahán ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tshin tsa catsi nyivi tan coonyito ñi, tyin coonyito ñi tshin tandihí tuhun caahán Nyoo” —catyí ra Jesús tshin nu ña vaha.

<sup>5</sup> Tacan tan quihñ ra ña vaha tsi ra. Tan cuahán ra tshin nu nda ñuu ii Jerusalén. Tan jandaq nu tsi ra jifi vehe ñuhu cahnu.

<sup>6</sup> Tan catyí nu tshin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

7 Tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

8 Tacan tan quihñ nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janaha nu tandihí tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi.

9 Tan catyí nu tsihin ra:

—Yuhu cuhva yu tandihí maa tsa janaha yu tsi un, tatun yooho tan cuiñi tsiti un nuu yu tan jacahnu un tsi yu.

10 Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

11 Tacan tan cuahán nu ña vaha, tan ndoo ra Jesús. Tan tsaá ángel tan jatyinyee ra naha tsi ra.

*Nu quitsaha caahán ra Jesús tuhun Nyoo tsihin nyivi tsa iyó ñuu tsa cayucú Galilea*

(Mr. 1.14-15; Lc. 4.14-15)

12 Quivi tsa tsitó ra Jesús tyin ra Juan nyíi ra vehe caa, cuahán ra nda Galilea.

13 Maa tyin ña ndoo ra ñuu Nazaret, nu tsahnú ra. Cuahán ra cua coo ra nda ñuu Capernaum, iin ñuu tsa canyií yatyin ñi yuhu miñi, nu ñuhu ra Neftalí yatyin ñuhu ra Zabolón.

14 Tacan tan cundaá tsa cahan ra Isaías, ra cuví ndusu yuhu Nyoo, tahañ tsanaha. Tan catyí ra:

15 Ñuhu ra Zabolón tan ñuhu ra Neftalí tsa cayucú yuhu miñi inga tsiyo yutya cahnu Jordán,

tsa cuví Galilea nu iyó nyivi tsa ñavin nyivi Israel cuví.

16 Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhú nditsin tsa jandunditsin nu yucú ñi, catyí ra Isaías.

17 Nda cuanda quiivi can, tan quitsaha caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuiñi tsaá quiivi cundaca ñaha Nyoo tsi ndo —catyí ra Jesús tsihin nyivi.

*Nu cana ra Jesús tsi cumi taahan ra tsa tñin tyaca*

(Mr. 1.16-20; Lc. 5.1-11)

18 Ra Jesús tsicá ra yuhu miñi tsa nañi Ndutya Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tñin tyaca cuví ra naha. Tan cañi ra naha traya ra naha nu ndutya.

19 Tacan tan catyí ra Jesús tsihin nduvi taahan ra naha:

—Ñaha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñin ndo tyaca, tacan cua ñihi ndo nyivi tsa cuvi nyivi Nyoo —catyí ra Jesús tsihin ra naha.

20 Juvín ñi cuhva can nacoó ra naha traya can, tan cuahán ra naha tsihin ra Jesús.

21 Luxu ñi tsicá ra naha ityi nuu, tan nyehé ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cana ra Jesús tsi ra naha.

22 Juvín ñi cuhva can tan nacoó ra naha tsi jutu ra naha tan yutun ndoo can, tan cuahán ra naha tsihin ra.

*Nu cuaha xaan nyivi jacuahá ra Jesús*

(Lc. 6.17-19)

23 Cuahán ra Jesús tsicá ra tandihí ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvaha ra tsi nyivi cuuhví tsihin tandihí ñi nuu cuehe tsa yihí tsi ñi.

24 Tacan tan tsitó tandihí nyivi ñuu cuenda Siria tuhun ra Jesús. Tan tsindaca ñi tandihí nyivi cuuhví tsi ra: juhva ñi yihí tatyí ña vaha. Tan yihí ñi tsihi naaha ñi. Tan yihí ñi ndohó ñi cuehe xii. Tan janduvaha ra Jesús tsi tandihí ñi.

25 Cuaha xaan nyivi nyicún tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañi Decápolis, nyivi iyó ñuu Jerusalén tan tandihí ca ñuu tsa cayucú Judea, tan nyivi iyó inga tsiyo yutya cahnu Jordán.

## 5

*Nu cahan ra Jesús tsihin nyivi nu tsiqui*

(Lc. 6.20-23)

1 Nyehé ra Jesús tyin cuaha xaan nyivi, tan ndaa ra iin nuu yucu. Tan tsicunyaá ra ícan. Tacan tan nyivi tsicá tsihin ra, tsinunduvj ñi tsi ra.

2 Tacan tan quitsaha jacuahá ra tsi ñi tan catyí ra:

3 Nasocó Nyoo tsi tandihí nyivi tsa tsitó tyin tsiñi ñuhu ra tsi ñi, tan tsa cuenda ñi cuví nu ndacá ñaha ra.

4 Tan tandihí nyivi tsa cuihya cuiñi tsa cuenda cuatyí ñi, nasocó Nyoo tsi ñi tan ña cua coo ca ñi tucuihya ñi.

5 Tan tandihí nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyí Nyoo tyin cuhva ra tsi ñi.

6 Tan tandihí nyivi tsa cuiñi xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuvi javaha ñi cuhva cuiñi maa ra.

7 Tan tandihí nyívi tsa cundaahví iñi tsi inga nyívi, nasocó Nyoo tsi ñi, tan cua cundaahví iñi ra tsi ñi.

8 Tan tandihí nyívi tsa janduvahá Nyoo añima, nasocó ra tsi ñi, tan cua nyehe ñi tsi ra.

9 Tan nyívi tsa nducú cuhva tsa coo vaha nyívi tsihin Nyoo tan tsihin inga nyívi, nasocó ra tsi ñi tan cua catyí ra tyin sehe ra cuví tsi ñi.

10 Tan tandihí nyívi tsa javahá cuhva cuñí Nyoo tan ndasi cuñí nyívi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra.

11 Nasocó Nyoo tsi nyooho tsa caahán nyívi ndavaha ñi tsata, tan javahá ñi tsa uhví tsi ndo, tan caahán ñi cuendu tsa ña nditsa siquí ndo tsa cuenda tsa tsinú iñi ndo tsi yu.

12 Cusiñi iñi ndo tun tacan javahá nyívi tsihin ndo; siñi cuñi ndo, tyin cahnú xaan tan siñi xaan caá tsa cua ñihi ndo nda gloria. Tyin juvin ñi tacan javahá nyívi tsa ña vaha tsihin tandihí ra cuví ndusu yuhu Nyoo tahán tsanaha.

*Tatun jandihí yo tsa tsinú iñi yo tsi Nyoo cuví yo tumaa ñi tsa ndihí tsa uhva (Mr. 9.50; Lc. 14.34-35)*

13 Nyooho tsa tsinú iñi tsi yu, tumaa ñi vaha cuví ndo. Maa tyin tatun ñi, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñi can. Tacan tan javita yo can, tan cuañi nyívi tsata can.

*Tatun tyaá yahvi vaha yo tuhun caahán Nyoo, cuví yo tumaa ñuhú tsa jandunditsín nu tsicá nyívi nu naa*

14 Nyooho cuví ndo tumaa ñuhú tsa jandunditsín nu tsicá nyívi. Iin ñuu tsa canyí jiñi iin yucu, ña cua cuví quihí xeehe tsi.

15 Na tuhvá yo tyaá ñuhú tyuma, tan tyihí xeehe yo itsi tsitsi iin caja. Tyin tuhvá yo tyaá ñuhú tan tinyí yo itsi iin nu sucun tyin tacan tan jandunditsín tsi nu yucú yo tsitsi vehe yo.

16 Tan tacan taahán tsi jandunditsín tucu nyooho tsihin ñuhú Nyoo tsa iyó añima ndo nu tsicá nyívi. Tacan tan nyehe ñi tsa vaha tsa javahá ndo, tan jacahnú ñi tsi Jutu yo Nyoo, ra nyaá gloria.

*Nu jacuahá ra Jesús tyin ñiñi xaan javaha yo tandihí tuhun tsa tsahá Nyoo tsi yo tan jacuahá yo itsi tsi nyívi*

17 Ña cuñi ndo tyin yuhu vatsí janaa yu ley tsa tsahá Nyoo tsi ra Moisés tyin tyaá ra. Tan ndi ña vatsí janaa yu tuhun tsa tyaá tandihí ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaá yahvi yu tsa caahán ley can, tan catyí tuhun yu tsihin ndo náa cuñí tsi catyí ley can.

18 Tsa nditsa catyí yu tsihin ndo tyin tsitsi tsa ndi iyó ñuhu ñayívi tan andívi, ña cua naa ndi luxu ley tsa tyaá ra Moisés tyin tandihí maa tsa tyaá ra naha tan cua cundaa tsi.

19 Yacan cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyívi na javaha ñi tacan, luxu cuiñi ñi cua cuví ra nu ndacá ñaha Nyoo. Maa tyin ra tsa tyaá yahvi tandihí, tan janahá ra tsi inga nyívi, cahnú xaan cua cuví ra nu ndacá ñaha Nyoo.

20 Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuví quihvi ndo nu ndacá ñaha Nyoo.

*Nu caahán ra Jesús tsihin yo tyin ña taahán tsi cahan yo tsi nyívi*

21 Nyooho tsa cuaha tsaha tsiñi ndo tsa catyí Nyoo tsihin nyívi tsioco tahán tsanaha. Catyí ra: “Ña cahñi ndo tsi nyívi, tyin tatun cahñi ndo nyívi, taahán tsi tsa cutuñi ndo.”

22 Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyívi, vasu tsa caahán nyaá ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cahun ndo anyaya tsa cuenda cuatyí can.

23 Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un,

24 ñacoo tsa cuahán tsihin un ityi nu altar vehe ñuhu. Tan cahun jihna un ndacan un tucahnú iñi tsi yañi un. Tacan tan cahun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

25 Tatun iin ra tsicán cuatyí tsaha un, tan cuahán un tsihin ra nda nu nyaá ra cumi tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumi tyiñu, tyin ra cumi tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihí ra naha tsi un vehe caa.

26 Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihí xuhun tsa cua ndacan ra naha.

*Nu caahán ra Jesús tyin ndi tsa tsicá iñi yo tsa coo inga ñaha, o inga rayí tsi yo, tan ña vaha*

27 Nyooho tsa tsiñi ndo tyin catyí Nyoo tahán tsanaha tyin nyooho tsa iyó ñasiñi, ña cua coo inga ñaha tsi ndo, tan ndi ñaha tsa iyó yí tan ña taahán tsi coo inga rayí tsi ña.

28 Maa tyin yuhu catyí yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsioco cuatyí ndo.



<sup>29</sup> Tatum tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tshihin intuhun ñi tinuu un, tan ñavin ca tsa cuhun un anyaya tshihin nduvi taahan tsi.

<sup>30</sup> O tatum iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quihvi un nu ndacá ñaha Nyoo tshihin tsa lundu ndaha un, tan ñavin ca tsa nanii un tan cuhun un anyaya.

*Nu caahán ra Jesús tyin ña vaha tsa nacoo ihñi rayii tsi ñasiihi ra*

(Mt. 19.9; Mr. 10.11-12; Lc. 16.18)

<sup>31</sup> Tan juvin ñi catyi Nyoo tshihin nyivi tsicoq tahān tsanaha tyin yoo ra nacoo ihñi ñasiihi ra, cuñi tsi tsa cani ra tutu tsa tindaha ra tshihin ña.

<sup>32</sup> Maa tyin catyi yu tshihin ndo tyin nduve ndatu iyó tsi rayii tsa nacoo ra ñasiihi ra tatum ña quituvj ña tshihin inga rayii. Tyin tatum nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatum quihin ña inga rayii cua coo ndihi cuatyí ña. Tan tacan ra tsa cua quihin tsi ña cua coo ndihi cuatyí ra.

*Ña cahan yo “naha Nyoo maa”*

<sup>33</sup> Tan tsiñi ndihi ndo, tyin catyi tucu Nyoo tshihin nyivi tsicoq tahān tsanaha: “Tatum catyi ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.”

<sup>34</sup> Maa tyin yuhu catyi yu tshihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuví nu nyaá Nyoo.

<sup>35</sup> Tan ndi tuhun ñuhu ñayivi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca.

<sup>36</sup> Tan ndi ña cahan ndo tuhun jiñi ndo, tyin ña cuví janducuitsin ndo tan ndi tsa jandutuun ndo ndi intuhun ixi jiñi ndo.

<sup>37</sup> Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyi ndo “naha Nyoo maa” nu ña vaha jacahán tsi ndo tsa cahan ndo tacan.

*Nu caahán ra Jesús tyin tatum javahá nyivi tsa ña vaha tshihin yo, na javaha yo tsa vaha tshihin ñi*

(Lc. 6.29-30)

<sup>38</sup> Tan tsiñi tucu ndo tsa catyi Nyoo tahān tsanaha: “Tatum cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihi ra cumi tyiñu tacan tshihin ñi, tumaa tsa javahá ñi tshihin ndo.”

<sup>39</sup> Maa tyin yuhu catyi yu tshihin ndo, tyin ña javaha ndo tsa ña vaha tsa javahá nyivi

xaan cuñi nyehe tsi ndo. Tyin tun yoo cañi iin tsiyo nuu ndo, taahán tsi tsa cuhva ndihi ndo inga tsiyo na cañi ndihi ñi, tan ña cuxaan ndo tsi ñi.

<sup>40</sup> O tatum tsicán ñi cuatyí tsaaha ndo, tan cuñi ñi quihin nyaa ñi iin camisa ndo. Taahán tsi cuhva ndihi ndo chamarra ndo tsi ñi tan ña cua cuxaan ndo tsi ñi.

<sup>41</sup> O tatum yoo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro.

<sup>42</sup> Tatum yoo nyivi tsicán tumañi iñi tsi ndo, cuxhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

*Na cuñi yo tsi nyivi xaan iñi tsi yo*

(Lc. 6.27-28, 32-36)

<sup>43</sup> Tan tsiñi tucu ndo tyin catyi Nyoo tahān tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.”

<sup>44</sup> Maa tyin yuhu catyi yu tshihin ndo, cuñi ndo tsi nyivi xaan iñi tsi ndo. Tan javaha ndo tsa vaha tshihin nyivi caahán tsi ndo, tan tsi nyivi ña cuñi nyehe tsi ndo. Tan ndacan tahvi ndo tsi Nyoo tsa cuenda nyivi tsa caahán nyaa tsi ndo tan tsa cuenda ñi tsa jacuvi tsa uhvi tsi ndo.

<sup>45</sup> Tatum javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyivi vaha tan nyivi ña vaha.

<sup>46</sup> Tatum nyooho tan cuñi ndo tsi nyivi vaha iñi tsi ndo tan ndasi cuñi ndo nyehe ndo tsi nyivi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra.

<sup>47</sup> Tatum tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tshihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsitó tuhun Nyoo.

<sup>48</sup> Tumaa Jutu yo tsa nyaá gloria cuñi xaan iyó ra, tacan taahán tsi coo tucu nyooho.

## 6

*Nu caahán ra Jesús nácaa javaha yo tumañi iñi*

<sup>1</sup> Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatum javaha ndo tumañi iñi tyin nyehe nyivi, Jutu yo, ra nyaá gloria, nduve náa cua cuhva ra tsi ndo.

<sup>2</sup> Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihj ra can

naha ra, tan nduve náa cua kuhva Nyoo tsi ra naha.

<sup>3</sup> Yacan cuenda quivi javahá ndo tumañi iñi tsi nyivi ndaahvi, ña jacoto ndo ndi tsi ra tsa vaha xaan ca iñi tsi ndo.

<sup>4</sup> Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua kuhva ra tsa vaha tsi ndo.

*Nu caahán ra Jesús nácaa ndacan tahvi yo tsi Jutu yo Nyoo (Lc. 11.2-4)*

<sup>5</sup> Tatan cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyivi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyivi tyin vaha xaan ra naha. Tsa nditsa catyi yu tshin ndo tyin yacan ñi ñihí ra naha.

<sup>6</sup> Maa tyin nyoooho quivi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyivi tsi ndo. Quihvi ndo tsitsi vehe ndo tan ñacasi ndo yuvehe ndo tan ndacan tahvi ndo tshin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyivi. Tan cua kuhva ra tsa vaha tsi ndo.

<sup>7</sup> Tatan cua cahan ndo tshin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyivi tsa ña tsitó tsi Nyoo. Cuñi maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yahá cahan ñi.

<sup>8</sup> Ña javaha ndo tacan. Tyin Nyoo tsa tsitó ra náa tsiñi ñuhu tsi ndo tsa ndi cumañi ca ndacan ndo tsi ra.

<sup>9</sup> Yacan cuenda nyoooho, tatan cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

<sup>10</sup> Na quitsi tsa ndaca ñaha un nu ñuhu ñayivi ihya,

tan na javaha tandihí nyivi tandihí kuhva cuñi maa un, tumaa cuví nda gloria.

<sup>11</sup> Cuhva tsa catsi ndi tahan tahan quivi.

<sup>12</sup> Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

<sup>13</sup> Ña kuhva un tsa nducu kuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihí tunyee iñi tsi un. Tan taahán tsi tyin jacahnu tandihí nyivi

tsi maa ñi un tandihí maa quivi tan na ña cundihí tsi. Na cuví tsi tacan ñi.

Tyehen taahán tsi ndacan tahvi ndo tsi Nyoo.

<sup>14</sup> Tyin tatan nyoooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo.

<sup>15</sup> Maa tyin tatan ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyi ra Jesús.

*Tatan cua coo nyitya yo tyin nanducú yo tsi Nyoo, ña cua jacoto yo tsi inga ca nyivi*

<sup>16</sup> Tan catyi tucu ra Jesús tshin nyivi:

—Quivi tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyivi jahá tyin vaha xaan ñi. Tyin cahyi ñi nyaa nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyi yu tshin ndo tyin yacan ñi ñihí ñi. Nduve ca naa cua kuhva Nyoo tsi ñi.

<sup>17</sup> Maa tyin nyoooho quivi tsa iyó nyitya ndo tyin nanducú ndo tsi Nyoo, ñacatyá ndo nuu ndo. Tan tyihí ndo cuca jiñi ndo.

<sup>18</sup> Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua kuhva ra tsi ndo.

*Tsa vaha tsa iyó nda gloria*

*(Lc. 12.33-34)*

<sup>19</sup> Ña jacaya ndo tsa cuca tsa iyó nu ñuhu ñayivi ihya. Tyin coto tiví tsi jaha tiquixin o jaha cuxi. O cuví quihvi ñasuhu, tan suhu nu tandihí tsa jacaya ndo.

<sup>20</sup> Vaha ca jacaya ndo tsa cuca tsa iyó nda gloria. Tyin ña cua cundihí tsi ndacan. Tyin ña cuví tiví tsi ndacan, tan nduve quiti jativi itsi, ndi nduve ñasuhu.

<sup>21</sup> Tyin nu natyihí vaha ndo tsa cuca, ican cua cunyaa ndihí añima ndo.

*Nu caahán ra Jesús tyin na jaha yo cuenda ñuhu nditsin tsa tyihí ra añima yo*

*(Lc. 11.34-36)*

<sup>22</sup> Tinuu ndo cuví ñuhu nditsin tsi ndo. Tatan vaha tinuu ndo, taniñi cuñu ñuhu ndo tan iyó ñuhu nditsin. [Tan tuhun ihya cuñi tsi catyi tyin tatan iyó ñuhu nditsin Nyoo añima ndo cuví ndo nyivi vaha.]

<sup>23</sup> Maa tyin tatan ña vaha tinuu ndo, tandihí cuñu ñuhu ndo tan nyii tsi nu naa. Tan tacan tucu tatan nduve ñuhu Nyoo iyó añima ndo, [cuví ndo tumaa iin ra cuaa. Nu naa cuahán ndo tan ña cuví nyehe ndo ityi vaha tsa cuahán nu nyaá Nyoo].

*Nu caahán ra Jesús tyin ña cuví tyaa yahvi yo tsi Nyoo tatan cuñi xaan ca yo xuhun*

*(Lc. 16.13)*

<sup>24</sup> Iin musu ña cuvi coo uvi tsitoho ra. Tyin musu can cuñi ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñi ndo tsi Nyoo, tan cuñi tucu ndo xuhun.

*Nu caahán ra Jesús tyin ña caca xaan iñi yo nda ndihi tsa tsiñi ñuhu tsi yo*  
(Lc. 12.22-31)

<sup>25</sup> Yacan cuenda catyí yu tsihin ndo, tyin ña çaca xaan iñi ndo nácaa ñihi ndo tsa catsi ndo tan tsa coho ndo. Ndi ña çaca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yii cuhva ra inga tsa tsiñi ñuhu tsi yoj].

<sup>26</sup> Nyehe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuví nyooho tan ñavin ca saa can naha ti.

<sup>27</sup> Tan vasu ndi maa tsicá xaan iñi ndo maa tyin ña cua cuví jandusucun ca ndo ndi luxu ca tsi ndo.

<sup>28</sup> Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña taví tun yuhva.

<sup>29</sup> Maa tyin catyí yu tsihin ndo tyin ndi ra cuví rey Salomón tsihin tandihi tsa cuca ra, tan ña tsinditsi ra jahma sii ca caá tan ñavin ca tsa jacunditsi Nyoo tsi yutun ita can.

<sup>30</sup> Tatun tacan ñi jacunditsi Nyoo tsi yutun ita tsa iyó tsitsi cuhu vityin, tan tyaan cua cuví tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra.

<sup>31</sup> Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsi yo?”

<sup>32</sup> Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña çaca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñi ñuhu tsi ndo.

<sup>33</sup> Yacan cuenda, çaca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñi ñuhu tsi ndo.

<sup>34</sup> Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñi ñuhu

tsi ndo ityaan. Çaca iñi ndo tan nyehe ndo nácaa jahá ndo quivi vityin jahá Nyoo.

## 7

*Ña cahan yo tsa caá inga nyivi*  
(Lc. 6.37-38, 41-42)

<sup>1</sup> Ña cahan ndo tsa caá inga nyivi, tacan tan Nyoo ña cua cahan ra tsa caá ndo.

<sup>2</sup> Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo.

<sup>3</sup> ¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un?

<sup>4</sup> Tatun tinuu maa un nyii iin yutun cahnu, ¿nácaa cuví catyí un tsihin ra yañi un: “Ñaha, na tava yu tsahan luhlu tsa nyii tinuu un?”

<sup>5</sup> ¡Yooho tsa jahá tyin vaha xaan un! Tava jihna yutun cahnu tsa nyii tinuu un. Tyin tacan tan cuvi nyehe vaha un tsahan luhlu tsa cua tava un tinuu yañi un.

<sup>6</sup> Ña jañihi ndo cahan ndo tuhun Nyoo tsihin nyivi ña cuñi coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

*Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo*  
(Lc. 11.9-13; 6.31)

<sup>7</sup> Ndacan ndo tsa tsiñi ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña.

<sup>8</sup> Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

<sup>9</sup> Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi?

<sup>10</sup> O tatun tsicán tsi tyaca, ¿a cua cuhva ndo iin coo itsi?

<sup>11</sup> Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

<sup>12</sup> Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsahá Nyoo tsi ra Moisés tan tacan tucu nyaá nu tandihi libru tsa tyaá ra cuví ndusu yuhu Nyoo tahañ tsanaha.

*Yuvehe tihin tan ityi cuiñi tsa cuahán nu nyaá Nyoo*  
(Lc. 13.24)

<sup>13</sup> Nducu ndo cuhva quihvi ndo yuvehe tihin. Tyin quiihin yuvehe, tan quiihin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can.

<sup>14</sup> Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

*Tsihin tsa javahá nyivi, tan nacotó yo tatun nyivi vaha, a nyivi ña vaha cuví ñi*  
(Lc. 6.43-44)

<sup>15</sup> Jaha ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quití xaan cuví ra naha.

<sup>16</sup> Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua cuhva tun mangu, tan ndi iñu nduhva ña cuví cuhva tsi yucu vixi.

<sup>17</sup> Tan tacan tucu tandihi yutun vaha. Tsahá tun tsiti vaha. Tan tandihi yutun ña vaha, tsahá tun tsiti ña vaha.

<sup>18</sup> Tyin yutun vaha, ña cuví cuhva tun tsiti ña vaha. Tan ndi yutun ña vaha ña cuví cuhva tun tsiti vaha.

<sup>19</sup> Tan tandihi yutun tsa ña tsahá tsiti vaha, cahnya yo tsi tun. Tan cayu tun.

<sup>20</sup> Tan tacan tsihin tsa javahá nyivi, cuví nacoto ndo tsi ñi tatun nyivi vaha o nyivi ña vaha cuví ñi.

*Nu catyí ra Jesús tyin ña tandihi nyivi tan cua quihvi ñi nu ndacá ñaha Nyoo*  
(Lc. 13.25-27)

<sup>21</sup> Ña tandihi nyivi tsa catyí tsihin yu: “Jutu Mañi yu, Jutu Mañi yu”, cua quihvi ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juven ñi can cua quihvi nu ndacá ñaha ra.

<sup>22</sup> Quivi tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: “Jutu Mañi yu, nyuhu cañan ndi tuhun cun tsihin nyivi. Tan tsihin sivi un tava ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sivi un”, cua catyí ñi tsihin yu.

<sup>23</sup> Tacan tan yuhu cua catyí yu tsihin ñi: “Ña nacotó yu tsi nyooho. Çatsiyo nyaha ndo nu nyaá yu tandihi nyooho tsa javahá maa maa ñi tsa ña vaha”, cua catyí yu tsihin ñi.

*Nu caahán ra Jesús nácaa cua cacu nyivi tsa tyaá yahvi tuhun caahán ra, tan nyivi tsa ña tyaá yahvi tsa caahán ra, ña cua cacu ñi*  
(Lc. 6.47-49; Mr. 1.22)

<sup>24</sup> Tacan catyí yu tsihin ndo, tyin nyivi tsa tsiñi tsa caahán yu tan javahá ñi cuhva

cuiñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava.

<sup>25</sup> Tan quitsaha cuñ ñihi savi. Tan cuaha xaan ndutya ñuhu yaha tsata vehe can. Tan ñihi xaan quitsaha yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava.

<sup>26</sup> Maa tyin nyivi tsa tsiñi tuhun caahán yu, tan ña javahá ñi cuhva cuiñi yu; cuví ñi tumaa iin ra soho, ra tsa javaha vehe nu nyiti.

<sup>27</sup> Tan quitsaha cuñ ñihi savi. Tan cuaha xaan ndutya ñuhu yaha nu nyaá vehe ra. Tan ñihi xaan yihí tatyí. Tan vehe can iin yaha cuiñi ñi nduva tsi tan cunaa tsi —catyí ra Jesús tsihin ñi tsa nyicún tsi ra.

<sup>28</sup> Cuhva tsa ndihí cañan ra Jesús tsihin ñi, iyo xaan cuiñi ñi tsihin tsa caahán ra,

<sup>29</sup> Tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

## 8

*Nu janduvahá ra Jesús tsi iin ra ndohó cuehe tyaahyú*

(Mr. 1.40-45; Lc. 5.12-16)

<sup>1</sup> Cuhva tsa nuu ra Jesús yucu can, cuaha xaan nyivi nyicún tsi ra.

<sup>2</sup> Tan tsaá iin ra ndohó cuehe tyaahyú, tan tsicuiñi tsiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuiñi un, cuví janduvaha un tsi yu —catyí ra tsihin ra.

<sup>3</sup> Tacan tan tyiso ndaha ra Jesús jiñi ra cuuhvi can, tan catyí ra tsihin ra:

—Cuiñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvaha ra.

<sup>4</sup> Tacan tan catyí ra Jesús tsihin ra:

—Jihna, coto ñahñi çatyí tuhun un tsihin nyivi. Maa tyin çaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuví tsi iin tsa ndaa tsi ra jutu can tan tsi nyivi tyin tsa nduvaha un.

*Nu janduvahá ra Jesús tsi musu iin ra cuví capitán*

(Lc. 7.1-10)

<sup>5</sup> Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyii ra Jesús tan caahán ndaahvi ra tsihin ra,

<sup>6</sup> tan catyí ra:

—Jutu Mañi yu, musu yu ñihi xaan cuuhvi ra, canyí ra nu cama. Ña cuví nduvita ra tyin nduxiñ ra, tan yaha xaan cuhva cuiñi ra.

<sup>7</sup> Tan catyí ra Jesús tsihin ra:

—Cuhun maa yu tan cujanduvaha yu tsi ra —catyí ra tsihin ra.

<sup>8</sup> Nacañan ra capitán can tan catyí ra:

—Jutu Mañi yu, ña cahnu cuví yu tan cahun un yuvehe yu; tsihin tuhun caħan ñi un tan musu yu cua nduvaha ra.

<sup>9</sup>Tyin juven ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cahun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñí yu.

<sup>10</sup>Tan tsa tsiñi ra Jesús tsa caħan ra can, tan iyo xaan cuñí ra. Tan catyí ra tsihin nyívi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya.

<sup>11</sup>Tan catyí yu tsihin ndo tyin cuaha nyívi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo.

<sup>12</sup>Tan nyívi tsa taahán tsi cahun glória, ña cua cahun ñi, tyin cua cahun ñi nu naa. Tan cua vacu tsaá ñi tan catsan ña cua cuvi nuhu ñi tsa cuenda tsa xaan cuñí ñi tyin nyehe ñi tundoho —catyí ra Jesús tsihin nyívi nyicún tsi ra.

<sup>13</sup>Tacan tan catyí ra tsihin ra capitán can: —Cuaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juven ñi cuhva can nduvaha musu ra.

*Nu janduvaha ra Jesús tsi tyiso ra Pedro (Mr. 1.29-31; Lc. 4.38-39)*

<sup>14</sup>Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, canyii ña nu tsito tyin yihí cahñi tsi ña.

<sup>15</sup>Tan tjin ra ndaha ña, tan iin yaha ñi quitá cahñi tsi ña. Tan nduvita ña, tan quitsaha nanducu ña tsa catsi ra naha.

*Nu cuaha xaan nyívi cuuhvi janduvaha ra Jesús*

*(Mr. 1.32-34; Lc. 4.40-41)*

<sup>16</sup>Tan tsa cunaaha, cuaha xaan nyívi yihí tatyí ña vaha tsindaca nyívi tsi ra Jesús. Tan tsihin intuhun ñi tuhun caħan ra Jesús tan quitá tatyí ña vaha tsi ñi. Tan tandihi ñi cuuhvi iin yaha ñi nduvaha ñi.

<sup>17</sup>Tacan cuví tyin tacan tan cundaq tsa caħan Jutu Mañi yo tsihin yuhu ra Isaías, ra cuví ndusu yuhu ra tahañ tsanaha. Tan catyí ra tyehen: “Maa ra quihñin ra cuehe tsa yihí tsi yo, tan quihñin nyaa ra tsa uhvi tsi yo.”

*Nyívi tsa cuñí quihvi cuenda ra Jesús (Lc. 9.57-62)*

<sup>18</sup>Tan tsa nyehe ra Jesús tyin cuaha xaan nyívi tsinú nduvi nu nyii ra, catyí ra tsihin ra tsicá tsihin ra tyin cua yaha ra naha inga tsiyo miñi.

<sup>19</sup>Tacan tan tsaq iin ra maestro cuenda ley vehe ñuhu tan catyí ra tsihin ra:

—Maestro, cuñí yu cunyicun yu tsi un tandihi ñi ityi nu cuahán un —catyí ra.

<sup>20</sup>Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayii tsa quee nda gloria, nduve nu maa cunyanaa luxu jiñi yu iyó —catyí ra.

<sup>21</sup>Inga ra tsa tsicá tsihin ra nacahañ ra tsihin ra:

—Taa, cuhva na cahun jihna yu cucutsi yu tsi jutu yu, —catyí ra.

<sup>22</sup>Tan catyí ra Jesús tsihin ra:

—Ñaha yooho quitsi nyicun un tsi yu. Tan nyívi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

*Nu jacutaxín ra Jesús tatyí xaan nu miñi (Mr. 4.35-41; Lc. 8.22-25)*

<sup>23</sup>Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra.

<sup>24</sup>Tan ñihi xaan quitsaha yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra.

<sup>25</sup>Tan ra tsicá tsihin ra jandoto ra naha tsi ra, tan catyí ra naha:

—Jutu Mañi yu, jacacu tsi yo, tyin cuñí cunaa yo!

<sup>26</sup>Tan catyí ra Jesús tsihin ra naha:

—¿Nacuenda yuuhvi xaan ndo? ¡Nyooho tsa luxu xaan tsinú iñi tsi yu! —catyí ra Jesús.

Tacan tan nduvita ra tan caħan ra tsihin tatyí tan tsihin ndutya, tan cutaxin tsi.

<sup>27</sup>Tan iyo xaan cuñí ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

*Nu nduvaha uvi ra ñuu Gadara ra yihí tatyí ña vaha naha ra (Mr. 5.1-20; Lc. 8.26-39)*

<sup>28</sup>Tacan tan tsaq ra naha inga tsiyo miñi nda nu ñuhu Gadara. Tan tsaq uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can.

<sup>29</sup>Tan caná tsaá ra naha, tan catyí ra naha:

—¿Náa cuñí un tsihin ndi, yooho Jesús Sehe Nyoo? ¿A vatsí un vatsi janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

<sup>30</sup>Tan yatyin ñi can yucú cuaha quini tsatsi ti naha ti.

<sup>31</sup>Tan catyí nu tatyí ña vaha can tsihin ra Jesús:

—Tatun cua tava un tsi ndi, cuhva tsa quihvi ndi tsitsi quini can naha ti —catyí nu tatyí ña vaha can nahnu.

<sup>32</sup>—Vaha. Quihvi ndo —catyí ra Jesús.

Tan quitã nu tatyí ña vaha can nahnu, tan quihví nahnu tsitsi tandíhi quini tsa nyecú can. Tan tandíhi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

<sup>33</sup> Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandíhi tsa cuví tsi ra tsa yihí tatyí ña vaha can naha ra.

<sup>34</sup> Tacan tan tandíhi nyivi ñuu can, tsañan ñi tsinyehé ñi tsi ra Jesús, tan cañan ndaahvi ñi tsihin ra na quita ra ñuu can.

## 9

*Nu janduvahã ra Jesús tsi iin ra xii  
(Mr. 2.1-12; Lc. 5.17-26)*

<sup>1</sup> Tacan tan quihví ra Jesús tsitsi iin yutun ndoo tan yahã ra miñi, tan tsaã ra nda ñuu nu iyó ra.

<sup>2</sup> Nu nyii ra ican, tsindaçã nyivi tsi iin ra cuuhví tsa ña cuví nacanda tyin nduxij ra, tan canyíi ra nu tsito. Tan tsa nyehe ra Jesús tyin tsinú xaan iñi ñi tsi ra, quitsaha caahán ra tsihin ra cuuhví can:

—Jandu iin iñi un, sehe yu, tyin tsa tsicoç tucahnu iñi cuatyí un —catyí ra Jesús tsihin ra.

<sup>3</sup> Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoç cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

<sup>4</sup> Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha?

<sup>5</sup> Tyin çndáa tsa yí ca catyí yo: a yí ca catyí yo: “Cuatyí un tsa yaha ndatsi”, o yí ca catyí yo: “Nduvita tan çaca un”?

<sup>6</sup> Vityin cua janaha yu tsi ndo tyin yuhu Rayíi tsa quee nda gloria, iyó ndatu tsi yu nu ñuhu ñayívi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan çanuhu nda yuvehe un —catyí ra.

<sup>7</sup> Tacan tan nduvitã ra tan cuanuhu ra nda yuvehe ra.

<sup>8</sup> Tan nyivi tsa nyehe tsa cuví, nayuhví xaan ñi. Tan quitsaha jacahnú ñi tsi Nyoo tyin tsaã ra tunyee iñi tsi nyivi.

*Nu canã ra Jesús tsi ra Mateo  
(Mr. 2.13-17; Lc. 5.27-32)*

<sup>9</sup> Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihin ra xuhun tsa tyahvi nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvitã ra Mateo tan cuahán ra tsihin ra Jesús.

<sup>10</sup> Tacan tan cuví tsi iin tsaã, ra Jesús cuahán ra nda vehe ra Mateo, cua catsi ra

ixta. Tan cuaha xaan ra tavá xuhun cuenda ra ndaca ñaha tsaã, tan tsihin inga ca ra iyó cuatyí naha ra. Tan tsinyecú ra naha iin ñi nu mesa tsihin ra Jesús tan tsihin ra tsicá tsihin ra.

<sup>11</sup> Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicã tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsi ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

<sup>12</sup> Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi.

<sup>13</sup> Çuaahan ndo tan çutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cañi ndo quití tan cuhva cuenda ndo tsi yu.” Yuhu ña vatsí yu jatinyee yu tsi nyivi tsa tsicá iñi tyin vaha ñi, vatsí yu jatinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

*Nu tsicã tuhun nyivi tsi ra Jesús tatan  
taahán tsi tsa coo nyitya ñi*

*(Mr. 2.18-20; Lc. 5.33-35)*

<sup>14</sup> Tacan tan ra nyicún tsi ra Juan, ra ja-coondutya tsi nyivi, natuhvã ra naha nu nyaá ra Jesús tan tsicã tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvã ndi tsicoç nyitya tan ra tsicá tsihin yooho ña tuhvã ra naha coo nyitya?

<sup>15</sup> Tan nacahan ra Jesús tan catyí ra:

—¿A cuví cunyecu cuiihya nyivi yucú vico tindaha tun nyii ra cua tindaha tsihin ñi? Maa tyin coo quivi ca quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

*Nu caahán ra Jesús tyin ña nacatsí tahan  
tuhun tsañu tsa iyó nyivi tsihin tuhun tsaã  
tsa jacuahã ra tsi ñi*

*(Mr. 2.21-22; Lc. 5.36-39)*

<sup>16</sup> Ña tuhvã nyivi naquicú iin jahma tuhu tsihin iin jahma tsaã, tyin cua nandiyi nu naquicú ñi tsihin tsa tsaã can, tan cua tyahnya tsi inga tsaã.

<sup>17</sup> Tan tacan tucu, ña cuví tyihí nyivi vinu tsaã tsitsi ñi tsaahnu tyin tatun tacan javaha ñi, tan tyahnya ñi can, tan cua tiví vinu can tan cua tiví ndihí tucu ñi can. Yacan cuenda taahán tsi tyihí yo vinu tsaã tsitsi ñi tsaã. Tyin tacan tan ña tyahnya ñi can tan ndi vinu can ña tiví tsi.

*Nu nduvahã ñaha sehe ra Jairo tan ñaha  
tsa tññ jahma ra Jesús*

*(Mr. 5.21-43; Lc. 8.40-56)*

<sup>18</sup> Tsitsi tsa caahán ra Jesús tuhun ihya, tsaq iin ra cumí tyiñu cuenda vehe ñuhu nyivi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

<sup>19</sup> Nduvita ra Jesús tsihin ra tsicá tsihin ra tan cuahán ra naha tsihin ra.

<sup>20</sup> Tacan tan iin ñaha cuuhvi natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaa ña ndaha ña jahma ra,

<sup>21</sup> Tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

<sup>22</sup> Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduniñi iñi un, xihí, tsa nduvaha un tyin tsinú iñi un —catyí ra.

Tan juvin ñi cuhva can tan tsicuiñi tsa cuún niñi ña.

<sup>23</sup> Yahá can tan tsaq ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyivi tsa yucú can iyo xaan tsacú ñi.

<sup>24</sup> Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixi ña —catyí ra.

Tan tsa cahan ra tacan quitsaha tsacú naaha ñi.

<sup>25</sup> Tan ra Jesús tava ra tsi ñi ityi tsata vehe. Tacan tan quihvi ra tsitsi vehe nu canyii ñaha can, tan tijn ra ndaha ñaha luhlu can, tan nduvita ña.

<sup>26</sup> Tan tandihi nyivi iyó ityi ñuu can tsito ñi tsa nandoto ñaha luhlu can.

*Nu janduvaha ra Jesús tsi uvi taahan ra cuaa*

<sup>27</sup> Tsa quita ra Jesús ican, tan uvi taahan ra cuaa nyicún tsi ra, caná tsa ra naha tan catyí ra naha:

—jCundahvi iñi tsi ndi, yooho ra cuvú tata ra David! —catyí ra naha.

<sup>28</sup> Tan tsa yaha quihvi ra Jesús tsitsi vehe, ra cuaa can, natuhva ra naha nu nyaá ra, tan maa ra Jesús quitsaha tsicá tuhun ra tsi ra naha tan catyí ra:

—¿A tsinú iñi ndo tyin cuvú janduvaha yu tsi ndo?

Tan nacahan ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

<sup>29</sup> Tacan tan tyanaa ra Jesús ndaha ra tinuu ra naha tan catyí ra tsihin ra naha:

—Na cuvú maa tumaa cuhva tsinú iñi ndo —catyí ra.

<sup>30</sup> Tan nduvaha tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyivi.

<sup>31</sup> Maa tyin cuahán ra naha tan quitsaha catyí tuhun ra naha tsa javaha ra Jesús tsihin ra naha tsihin tandihi nyivi iyó ityi ñuu can.

*Nu janduvaha ra Jesús tsi iin ra ñiñi*

<sup>32</sup> Tsa cuahán ra naha, juhva nyivi tsin-daca ñi tsi iin ra ñiñi tsa yihí tatyí ña vaha nu nyii ra Jesús.

<sup>33</sup> Tan tsa tava ra Jesús tatyí ña vaha can, tacan tan nacahan ra can. Tan iyo xaan cuñi nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tava tatyí ña vaha tsi nyivi —catyí ñi.

<sup>34</sup> Maa tyin ra cuvú fariseo naha ra, catyí ra naha:

—Ra ihya tava ra tatyí ña vaha tsihin tun-yeey iñi nu ña vaha tsa cuvú ityi nuu tsihin nahnu —catyí ra naha.

*Nu caahán ra Jesús tyin ña cuaha maa nyivi jahá tyiñu cuenda Nyoo iyó*

<sup>35</sup> Ra Jesús tsahan ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvaha ra tandihi nuu cuehe tsa ndohó ñi.

<sup>36</sup> Tan tsa nyehe ra tsi nyivi, cundaahvi xaan iñi ra nyehe ra tsi ñi, tyin nyehe ñi tundo-cho tan iyó ñi tucuihya iñi, tumaa mbee ticatyí tsa nduve tsitoho iyó.

<sup>37</sup> Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha.

<sup>38</sup> Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

## 10

*Nu nacatsi ra Jesús tsa utsi uvi ra cua caca tyiñu ra*

(Mr. 3.13-19; Lc. 6.12-16)

<sup>1</sup> Tacan tan caná ra Jesús tsi tsa utsi uvi ra tsicá tsihin ra tan tsaha ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhvi náa ndihi ca nu cuehe tan tsa uhvi.

<sup>2</sup> Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuvú tsi ra naha;

<sup>3</sup> tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo;

<sup>4</sup> tan ra Simón ra nyii cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

*Nu tavā tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo (Mr. 6.7-13; Lc. 9.1-6)*

<sup>5</sup> Tan tavā tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyivi tsa ñavin nyivi Israel cuví, tan ndí ña quihvi ndo ñuu tsa cayucú Samaria.

<sup>6</sup> Cūaahan ndo nu yucú mbee tsa tsinaa tsa cuví nyivi Israel.

<sup>7</sup> Cūaahan ndo cua cahan ndo tyin tsa tsaa quivi tsa cua cundaca ñaha Nyoo tsi nyivi.

<sup>8</sup> Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Jānandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

<sup>9</sup> Ña cūiso ndo xuhun; ndi xuhun cuaan, ndi xuhun cuitsin, ndi xuhun cuaaha.

<sup>10</sup> Tan ña cūiso ndo ndi yunu tsa cuenda tsa caca itiyí ndo. Intuhun ñi camisa tsa ndítsin ndo cūhun tsihin ndo. Tan ña cūiso ndo inga pari nditsan. Tan ndi ña cūndaha ndo yutun. Tyin ra jahá tyiñu, iyó ndatu tsi ra tsa coo yahví ra.

<sup>11</sup> Tatun tsaa ndo iin ñuu cahnu o iin ñuu luhlu, ndyucu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can.

<sup>12</sup> Tatun cua quihvi ndo iin vehe, cūhva ndo nacumi tsi nyivi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”.

<sup>13</sup> Tan tatun nyivi iyó yuvehe can tan natotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihín nyico ndo can.

<sup>14</sup> Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi.

<sup>15</sup> Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

*Nu catyí tuhun tsi náa ndihi tundoho cua nyehe nyivi tsicá tyiñu Nyoo*

<sup>16</sup> ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti.

<sup>17</sup> Jaha ndo cuenda tsi ndo tsihin nyivi tyin cua cūhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu.

<sup>18</sup> Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví.

<sup>19</sup> Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsaa cūhva tsa cua cahan ndo, Nyoo cua cūhva ra tuhun cahan ndo.

<sup>20</sup> Tyin ñavin maa ndo cua cahan, tyin maa Tatyí Ii Jutu yo Nyoo tsa iyó añima ndo cua cūhva ra tsa cahan ndo.

<sup>21</sup> Yihí rayíi cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cūhva cuenda ñi jutu ñi tan sihi ñi tsi nyivi na cahñi nyivi can tsi ñi.

<sup>22</sup> Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo.

<sup>23</sup> Tatun nyaa ndaha ñi tsi ndo iin ñuu, cūhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cūhun ndo tandihí ñuu nu iyó nyivi Israel tan cua quitsi nyico yuhu, Rayíi tsa quee nda gloria.

<sup>24</sup> Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra.

<sup>25</sup> Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví itiyí nuu tsihin nu ña vaha, tacan tucu cua catyí ñi tsihin nyivi cuenda yu.

*¿Yóo tsii taahán tsi nayuhvi yo, a tsii nyivi o tsii Nyoo?*

*(Lc. 12.2-7)*

<sup>26</sup> Yacan cuenda ña nayuhvi ndo tsi nyivi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto nyivi.

<sup>27</sup> Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe çana tsaa ndo can, na coto tandihí nyivi.

<sup>28</sup> Ña nayuhvi ndo tsi nyivi tsahñi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

<sup>29</sup> Saa ña yahví nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cūhva maa Nyoo Jutu yo.

<sup>30</sup> Tyin nda cuanda ixí jiñi ndo tan tsitó Nyoo najava taahan tsi iyó, tyin tsa nacahví ra intuhun intuhun tsi.



<sup>31</sup> Yacan cuenda ña nayuhvi ndo. Nyooho, nyaá yahvi ca ndo nu Nyoo tan ñavin ca tsa cuaha saa.

*Ña cua nayuhvi yo cahan yo tuhun ra Jesucristo tsihin nyivi*  
(Lc. 12.8-9)

<sup>32</sup> Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi.

<sup>33</sup> Maa tyin nyivi cua tyihí xeehe tsi yu nuu inga nyivi, tacan tucu yuhu cua tyihí xeehe yu tsi ñi nuu Jutu yu ra nyaá gloria.

*Nu caahán ra Jesús tyin tsa cuenda ra tan cua cañi tahan nyivi tsihin tahan ñi*  
(Lc. 12.51-53; 14.26-27)

<sup>34</sup> Ña cuñi ndo tyin yuhu vatsí cuhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan.

<sup>35</sup> Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña.

<sup>36</sup> Tan yacan cuenda juven ñi maa nyivi vehe ndo cua cuxaan iñi tsi ndo.

<sup>37</sup> Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yihí ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu.

<sup>38</sup> Tan nyivi tsa ña cuñi nyehe tundoho tan ndi ña cuñi ñi cuhva ñi ñayivi iyó ñi tsa cuenda yu, ña taahán tsi cuví ñi nyivi cuenda yu.

<sup>39</sup> Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cuhva ñayivi iyó ñi tsa cuenda yu, cua ñihí ñi ñayivi nyito coo ñi.

*Nu caahán ra Jesús nácaa cua ñihí yo tsa vaha Nyoo*  
(Mr. 9.41)

<sup>40</sup> Nyivi tsa naquihín cuenda tsi nyooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsi tsi yu.

<sup>41</sup> Nyivi naquihín cuenda tsi iin ra cuví ndusu yuhu Nyoo tyin Nyoo jaquitsi tsi ra, cua ñihí ndihí ñi tsa vaha tsa cua ñihí ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juven ñi tsa vaha tsa cua ñihí ra vaha can cua ñihí ñi.

<sup>42</sup> Tan yóo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihí ndihí ñi tsa cua cuhva Nyoo tsi ñi tsa nyicún tsi yu —catyí ra Jesús.

## 11

*Nu jacuhun ra Juan tsi ra tsicá tsihin ra nu nyii ra Jesús*  
(Lc. 7.18-35)

<sup>1</sup> Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

<sup>2</sup> Tan ra Juan nyii ra vehe caa quivi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyii ra.

<sup>3</sup> Tan catyí ra naha tsihin ra:

—¿A juven yooho cuví ra Cristo tsa nyaa tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

<sup>4</sup> Nacahan ra Jesús tan catyí ra:

—Cuaahan ndo tan catyí tuhun ndo tsihin ra Juan tandihí tsa nyehé ndo, tan tsa tsiñí ndo.

<sup>5</sup> Tan catyí ndo tsihin ra: nyivi cuaa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacufí ñi, tan nandotó nyivi tsa tsihi, tan nyivi ndaahvi tsiñí ñi tuhun Nyoo nácaa cua cacu ñi.

<sup>6</sup> Tan catyí ndo tsihin ra tyin sii xaan cua cuví tsi nyivi tsa nyicún tsi yu tun ña ndu uvi iñi ñi —catyí ra Jesús tsihin ra naha.

<sup>7</sup> Tsa cuahán ra naha, tan quitsaha caahán ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvá tatyí?

<sup>8</sup> ¿O náa cuví tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey.

<sup>9</sup> ¿A ña tsahan ndo tsinyehé ndo tsi iin ra cuví ndusu yuhu Nyoo? Juvín. Tyin ra ican cahnu ca cuví ra tan ñavin ca tandihí ra cuví ndusu yuhu Nyoo.

<sup>10</sup> Juvín ñi tuhun ra Juan cuví tsa nyaá nuu tutu Nyoo. Tan catyí tsi tyehen: Yuhu cua jacuhun yu iin ra cahan tuhun yu tsa ndi cumañi ca cuhun yu.

Tyin natyiso vaha ra ityi nu cua cuhun un.

<sup>11</sup> Tsa nditsa catyí yu tsihin ndo, tyin tsitsi tsa tandihí nyivi tsa tsicoq tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo añima, vasu ra lihli ñi cuví ra, cahnu ca ra cuví ra tan ñavin ca ra Juan.

<sup>12</sup> Nda cuanda quivi tsa tsaq ra Juan tan nda vityin, nyivi ñihí iñi, nducú xaan ñi cuhva ñihí ñi tsa cundaca ñaha Nyoo tsi ñi.

<sup>13</sup> Ra Moisés caħan ra tuhun nácaa cua cundaca ñaha Nyoo tsi nyívi, tan tacan tucu tandihí ra cuví ndusu yuhu Nyoo. Tacan tan quítsj ra Juan jacotó ra tsi nyívi tyin tsa tsaq quívi tsa cua cundaca ñaha Nyoo.

<sup>14</sup> Tan ra Juan cuví ra Elías ra tsa nyaá tsa cua quítsi, tun nyooħo tan cuñí ndo tsinu íñi ndo tsa caahán yu.

<sup>15</sup> Nyooħo tsa iyó soħo, tyaa soħo ndo tsa caahán yu.

<sup>16</sup> ¿Náa tsihin jandu inducu yu tsi nyooħo, nyívi tsa iyó quívi ihya? Tumaa ra nyíhi cuví nyooħo. Tyin ra nyíhi jasiqui nuyahvi. Caná tsaahahan ra naha tan catyí ra naha:

<sup>17</sup> “Tívi ndi tiyoo tan ña tsañi ndo yaa. Tan tsita ndi yaa cuiihya, tan ña tsacu ndo”, catyí ra nyíhi. [Tan tacan cuví nyooħo tyin ndi intuhun cuħva ña taahán íñi ndo.]

<sup>18</sup> Tyin ra Juan, ra jacoondutyá, quítsj ra tan ña tsatsj vaha ra, tan ña tsihi ra vinu. Tan nyooħo catyí ndo tyin tatyí ña vaha yíhi tsi ra.

<sup>19</sup> Yahá can tan tsaq tucu yuhu Rayí tsa quee nda gloria. Tan tsatsj yu tan tsihi yu. Tan catyí ndo tyin tsatsj xaan yu tan tsihi xaan yu vinu, catyí ndo. Tan ña taahán íñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsihi tuñi ra tsi nyívi naquihín tuhun caahán yu tan tuhun caħan ra Juan, tan ñi ican cua janaha ñi tsi ndo tyin vaha tsa tsihi tuñi Nyoo —catyí ra Jesús.

*Nyívi ña cuñi naquihín cuenda tuhun caahán ra Jesús cua nyehe ñi tundoho (Lc. 10.13-15)*

<sup>20</sup> Tacan tan quítsahá caahán ra Jesús tsihin nyívi tandihí ñuu nu javahá ra cuaha tsa iyo, tyin ña nasama ñi cuħva iyó ñi, tan catyí ra:

<sup>21</sup> —¡Ndahvi nyooħo, nyívi ñuu Corazin! ¡Ndahvi nyooħo nyívi ñuu Betsaida! Tyin nyehe ndo tsa iyo tsa javahá yu tan ña nasama ndo cuħva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehe nyooħo vityin, numi xaan cua cunditsi ñi jahma tucuiihya íñi tan cua coso ñi nyaa nuu ñi: tyin ndu uvi íñi ñi cuatyí ñi.

<sup>22</sup> Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón.

<sup>23</sup> Tan nyooħo nyívi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyívi tsihi anyaya. Tun tsatyin tsicoq tsa iyo nyehe ñi ñuu Sodoma tumaa tsa nyehe ndo ihya, ñuu can ña tsinaq tsi tan iyó tsi nda cuanda vityin.

<sup>24</sup> Maa tyin catyí yu tsihin ndo tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi nyooħo tan ñavin ca nyívi ñuu Sodoma.

*“Cuhva ndo tsi ndo tsi yu, tan cuħva yu tsa quitatu ndo”, catyí ra Jesucristo (Lc. 10.21-22)*

<sup>25</sup> Quívi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayívi. Tyin tyíhi xeehe un tuhun ihya nuu ra tsitó xaan tan ra nyityi xaan naha ra. Tan jandunditsi un tuhun ihya nuu ra nyíhi.

<sup>26</sup> Tacan Tyaa, tyin tacan cuñi maa un —catyí ra Jesús.

<sup>27</sup> Tacan tan catyí tucu ra tsihin nyívi:

—Jutu yu nacuhva cuenda ra tandihí tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyívi tsa cuñi yu tsa nacoto tsi Jutu yu, cua janaha yu tsi ra tsi ñi.

<sup>28</sup> Tandihí nyooħo tsa tatú tyin jahá tyíhu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuħva yu tsa quitatu ndo.

<sup>29</sup> Cuhva ndo tsa cundaca ñaha yu tsi ndo tan cutuhva ndo cuħva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo.

<sup>30</sup> Ña yí tsa cuħva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

## 12

*Quívi quitatú nyívi cuví tsi tan ra tsicá tsihin ra Jesús tuhún ra naha yoco itya trigu (Mr. 2.23-28; Lc. 6.1-5)*

<sup>1</sup> Iin quívi quitatú nyívi, yahá ra Jesús mahñu nu iyó tsa tatsj nyívi. Tan tsaq socio tsi ra tsicá tsihin ra. Tan quítsahá tuhún ra naha yoco trigu can tan tsatsi ra naha.

<sup>2</sup> Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyíhu tsa ña taahán tsi javahá yo quívi quitatú yo —catyí ra naha tsihin ra.

<sup>3</sup> Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cutahan tsihin ra quívi tsa tsaq socio tsi ra naha?

<sup>4</sup> Quihví ra tsitsi vehe Nyoo, quihín ra paan ii, tan tsatsj ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can.

<sup>5</sup> ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyíhu ra naha tsitsi vehe ñuhu quívi quitatú yo? Tan ñavin cuatyí cuví can.

<sup>6</sup>Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu.

<sup>7</sup>Nyooho, ñaha ca cutuñi ñi ndo nu catyí tsi nu tuhun Nyoo tyehen: “Tsa cuñi ca yu javaha ndo cuví tsa cundaahvi ñi ndo nyehe ndo tsi nyívi tahan ndo, tan ñavin ca tsa cahñi ndo quití tan jamañi ndo nuu yu.” Tun tsatyin cutuñi ñi ndo tuhun ihya, ña cua tyaa ndo cuatyí tsata nyívi tsa nduve cuatyí.

<sup>8</sup>Yuhu, Rayí tsa quee nda gloria, iyó ndatu tsi yu tsa cahan yu tsihin intuhun intuhun ndo ná taahán tsi javaha ndo quívi quitatú yo —catyí ra Jesús.

*Nu janduvahā ra Jesús tsi iin ra na ityí ndaha*

(Mr. 3.1-6; Lc. 6.6-11)

<sup>9</sup>Tacan tan quitā ra Jesús ican, tan cuahán ra vehe ñuhu.

<sup>10</sup>Tan ican nyíi iin ra tsa na ityí ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicā tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyívi cuuhví quívi quitatú yo? —catyí ra naha tsihin ra Jesús.

<sup>11</sup>Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quívi quitatú yo, a ña cua cuhun ndo tan tava ndo tsi ti?

<sup>12</sup>Tan ¿a ña nyaá yahvi ca iin nyívi tan ñavin ca mbee? Yacan cuenda taahán tsi javaha yo tsa vaha quívi quitatú yo —catyí ra.

<sup>13</sup>Tacan tan catyí ra Jesús tsihin ra tsa na ityí ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvahā tsi tumaa inga tsiyo.

<sup>14</sup>Tacan tan quitā ra fariseo naha ra cua natuhun tahan ra naha nácaa cua cahñi ra naha tsi ra Jesús.

*Tsa cahan ra Isaías, ra cuví ndusu yuhu Nyoo, tsa cuenda ra Jesús tahan tsanaha*

<sup>15</sup>Tsa tsitō ra Jesús tyin nducú ra naha tsi ra, quitā ra ican. Tan cuaha nyívi tsinyicun tsi ra. Tan maa ra janduvahā ra tsi tandihí ñi cuuhví.

<sup>16</sup>Tan catyí ra tsihin ñi tyin na ña catyí tuhun ñi yóo ra cuví ra.

<sup>17</sup>Tacan cuví tyin tacan cahan ra Isaías, ra cuví ndusu yuhu Nyoo tahan tsanaha. Tan tyehen tyaa ra tuhun Nyoo:

<sup>18</sup>Ra ihya cuví musu yu, ra tsa nacatsj vaha yu.

Cuñi xaan yu tsi ra, tan sñi xaan cuñi yu tsihin ra.

Cua cuhva yu Tatyí lí yu tsi ra.

Tan cua jacoto ra tsi nyívi tsa ñavin nyívi Israel cuví, nácaa cua janduvaha yu tsi ñi nuu yu.

<sup>19</sup>Tan ña cua cahan yuhu ra tan ndi ña cua cana tsaá ra, tan ña cua cahan ñihi ra ityí cahnu.

<sup>20</sup>Tan ndi intuhun ndoo yacua, tan ña cua cahnu ndihí ra.

Tan ndi ña cua ndahva ndihí ra tiñuhu lihli nu caná luxu yuhma.

Nda cuanda coto tandihí nyívi tyin maa ra cuví ra ndacá ñaha tsi ñi.

<sup>21</sup>Tan tandihí nyívi, tan cua cuita ñi ñi tsi ra.

*Nu xaan ñi tsi ra Jesús catyí nahnu tyin tsihin tunyee ñi nu ña vaha javahá ra tsa iyo*  
(Mr. 3.20-30; Lc. 11.14-23; 12.10)

<sup>22</sup>Tacan tan tsindacā nyívi tsi iin ra yihí tatyí ña vaha nu nyíi ra Jesús, cuaa ra tan ñihi ra. Tan ra Jesús janduvahā ra tsi ra. Tacan tan nacahan ra, tan nanyehē ra.

<sup>23</sup>Iyo xaan cuñi tandihí nyívi, tan catyí ñi: —¿A ñavin ra ihya cuví tata ra rey David? —catyí ñi.

<sup>24</sup>Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee ñi nu Beelzebú, nu cuví ityí nuu tsihin nu ña vaha nahnu, tavá ra ihya tatyí ña vaha —catyí ra naha.

<sup>25</sup>Maa tyin ra Jesús tsitó ra tsa tsicá ñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihi tyiñu tsa ndacá ñaha ra naha. Tan tatun iin ñuu o tandihí nyívi iin vehe tan cusñin ñi, tacan tan cua tiví nu yucú ñi.

<sup>26</sup>Tan tacan tucu tatun nu ña vaha tan tava nu juvin ñi tahan maa nu, cuñi tsi catyí tyin ña iin ñi cuví nahnu, tan cundihi tunyee ñi tsa iyó tsi nahnu.

<sup>27</sup>Tan nyooho catyí ndo tyin tsihin tunyee ñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyí ndo, yóo tsahá tunyee ñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá ñi ndo.

<sup>28</sup>Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee ñi Tatyí lí Nyoo. Tan cuñi tsi catyí yacan tyin nditsa tyin tsa tsaā cuhva ndacá ñaha Nyoo nu yucú ndo.

<sup>29</sup>Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuñi jihna ra tsi ra can, tacan tan cuví quihin nyaa ra tandihí tsa iyó tsi ra.

<sup>30</sup>Nyívi tsa ña nyaá tumañi ñi tsihin yu, ñi xaan ñi tsi yu cuví ñi. Ñi tsa ña jatyinyeé tsi yu tsa caahán yu tuhun Nyoo tsihin nyívi,

cuñi tsi catyi tyin ña tsahá ñi tsa coto nyivi tuhun caahán yu.

<sup>31</sup> Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahán ñi ndavaha ñi siqui Tatyí lí Nyoo, yacan nditsa, ña cua jaha Nyoo tucahnu iñi tsi ñi.

<sup>32</sup> Tan yóo nyivi tsa caahán tsa ndavaha ñi siqui yuhu Rayí tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí lí Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

*Tsihin tsa javahá nyivi tan nacoto yo tsi ñi tatun vaha ñi a ña vaha ñi*  
(Lc. 6.43-45)

<sup>33</sup> Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun.

<sup>34</sup> ¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo.

<sup>35</sup> Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi.

<sup>36</sup> Tan yuhu catyí yu tsihin ndo tyin quivi cua tatsi tuñi Nyoo tsi tandihí nyivi, cua cuhva cuenda ñi tandihí tuhun tsa ña vaha cahán ñi.

<sup>37</sup> Tyin tsa cuenda tsa caahán ndo, tan cua catyí Nyoo tun vaha ndo o ña vaha ndo.

*Nyivi ña vaha, tsa iyo ñi cuñi ñi nyehe ñi*  
(Mr. 8.12; Lc. 11.29-32)

<sup>38</sup> Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñi ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

<sup>39</sup> Tan nacahan ra Jesús tan catyí ra:

—Nyivi ña vaha tan nyivi tsa nyicún inga nyoo cuñi ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahán tsanaha.

<sup>40</sup> Tyin tumaa tsinyij ra Jonás tsitsi tyaca cahnu uñi quivi tan uñi tsacuaa, tacan cua cunyij yuhu Rayí tsa quee nda gloria tsitsi ñuhu uñi quivi tan uñi tsacuaa.

<sup>41</sup> Tan quivi cua tatsi tuñi Nyoo tsi tandihí nyivi, cua nduvita nyivi tsicoo ñuu Nínive tahán tsanaha tan cua catyí ñi na tatsi tuñi Nyoo tsi nyooho nyivi tsa iyó vityin. Tan cua catyí ñi tyin cua cunaa ndo, tyin maa ñi tsa cuví ñi ñuu Nínive, nasamā ñi cuhva iyó ñi quivi cahán ra Jonás tuhun Nyoo tsihin ñi.

Tan ihya nyii ra cahnu ca cuví tan ñavin ca ra Jonás. [Tan ña cuñi ndo tyaa soho ndo tsa caahán yu.]

<sup>42</sup> Tan tacan tucu ñaha tsa tsindaca ñaha ityi Sur, tan nduvita ña quivi cua cutuñi nyivi tan cua catyí ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsj ña, quitsj tyaa soho ña tsa nyityi tsa cahán ra Salomón. Tan vityin cahnu ca ra caahán tsihin ndo tan ñavin ca ra Salomón.

*Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo*

(Lc. 11.24-26)

<sup>43</sup> Tatun iin nu tatyí ña vaha quitá nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu:

<sup>44</sup> “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndi xaan, tan yoñi iyó, tan sii xaan caá.

<sup>45</sup> Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihí tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyivi quini iyó —catyí ra Jesús.

*Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo*

(Mr. 3.31-35; Lc. 8.19-21)

<sup>46</sup> Ndi caahán ca ra Jesús tsihin nyivi, tan tsaa sihi ra tan yañi ra, tan nyecú ñi ityi tsata vehe, tan cuñi ñi cahán ñi tsihin ra.

<sup>47</sup> Tacan tan jacotó iin ra tsi ra Jesús, tan catyí ra:

—Sihi un tsihin ra yañi un naha ra nyecú ñi tsata vehe. Tan cuñi ñi cahán ñi tsihin un.

<sup>48</sup> Tan nacahan ra Jesús tan catyí ra tsihin ra can:

—¿Yóo cuví sihi yu tan yóo cuví yañi yu? —catyí ra.

<sup>49</sup> Tacan tan janahá ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu.

<sup>50</sup> Tyin tandihí nyivi tsa javahá cuhva cuñi Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

## 13

*Nu caahán ra Jesús tyin tumaa iin ra tatsi, tacan cuví ra caahán tuhun Nyoo*

(Mr. 4.1-9; Lc. 8.4-8)

<sup>1</sup> Quivi can quitá ra Jesús vehe nu nyii ra tan cuahán ra, tsicunyaq ra yuhu miñi.

<sup>2</sup> Tan cuaha xaan nyiví ndu iin nu nyaá ra, yacan cuenda quihví ra tsitsi iin yutun ndoo tan tsinyaá ra. Tan tandihí nyiví ndoo ñi yuhu ndutya.

<sup>3</sup> Tacan tan quitsahá jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitá iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.

<sup>4</sup> Tan cuhva tsa quití ra tsiti can, cucoyo juhva tsi yuhu ityi. Tan quitsí saa tan tsatsí ti tsiti can.

<sup>5</sup> Tan juhva ca tsiti can cucoyo tyañu yuu nu ña cuaha nyahyu yihí. Tan ican caná tsiti can tsa numi ñi tyin ña cuaha nyahyu yihí tyañu yuu can.

<sup>6</sup> Maa tyin cuhva tsa caná ñicanyii, numi ñi na ityi tsi, tyin ña cunu yihí yoho tsaha tsi.

<sup>7</sup> Juhva ca tsiti can cucoyo tyañu iñu. Tan quiví caná trigu can tsahnú tsi iin caa ñi tsihin iñu can, tan iñu can numi xaan ca tsahnú tsi tan tsahñí tsi trigu can.

<sup>8</sup> Maa tyin juhva ca tsiti can cucoyo nu ñuhu vaha. Tan quiví tsahnú tsi, vaha xaan tsahá tsi tsiti. Tyin tsa iin tsiti can, cientu tsiti quitá tsihin tsi. Tan inga tsiti can, uñi xico, tan inga tsi oco utsi tsiti tsahá tsi.

<sup>9</sup> ¡Tatun nyaá soho ndo, tyaá soho ndo tuhun caahán yu! —catyí ra Jesús.

*Nu catyí tuhun ra Jesús nacuenda jacuahá ra tsi nyiví tan ña catyí tuhun catsi ra tsihin ñi*

(Mr. 4.10-12; Lc. 8.9-10)

<sup>10</sup> Tacan tan natuhvá ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyiví, tan ña catyí tuhun catsi un tsihin ñi? —catyí ra naha.

<sup>11</sup> Tan nacahán ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyiví ihya ña cuví coto ñi tsa tsahá Nyoo tsi nyooho.

<sup>12</sup> Tyin tandihí nyiví tsa cutuñí iñi tsa caahán yu tan javahá ñi, cuaha ca cua cutuñí iñi ñi. Tan nyiví tsa ña cutuñí iñi, tan ña cuñí ñi javaha ñi, cua quihin nyaa ndihí yu tsa luxu ñi tsa tsitó ñi.

<sup>13</sup> Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñí ñi maa tyin ña cutuñí iñi ñi, tumaa tsa ña tsiñí ñi cuví can.

<sup>14</sup> Tyin tacan tan cundaa tsa cahán ra Isaías ra cuví ndusu yuhu Nyoo tahanan tsanaha, tan catyí ra:

Tsa nditsa tyin nyooho tsiñí ndo tuhun yu, maa tyin ña cutuñí iñi ndo.

Cua nyehé ndo tsa javahá yu, tan ña cua cutuñí iñi ndo.

<sup>15</sup> Tyin tsa ndundava xaan añima nyiví ihya, tan ña catsi vaha tsiñí ñi.

tan ndasí tinuu ñi,

na ña cua nyehé ñi tsihin tinuu ñi,

tan ña cua cuñí ñi tsihin soho ñi.

Tan ndi ña cua cutuñí iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

<sup>16</sup> Maa tyin sii xaan cuví tsi nyooho, tyin nyehé ndo tsihin tinuu ndo, tan tsiñí ndo tsihin soho ndo.

<sup>17</sup> Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyiví vaha, cuñí ñi nyehé ñi tsa nyehé nyooho tsa javahá yu, maa tyin ña nyehé ñi. Tan cuñí ñi tyaá soho ñi tandihí tsa tsiñí nyooho vityin, maa tyin ña tsiñí ñi.

*Nu catyí tuhun ra Jesús tsa cuñí tsi catyí cuhva tsa cahán ra tsihin nyiví tsa cuenda ra tatsi can*

(Mr. 4.13-20; Lc. 8.11-15)

<sup>18</sup> Tyaá soho ndo tsa cuñí tsi catyí cuhva tsa cahán yu tsa cuenda ra tsa tatsi tsiti trigu can:

<sup>19</sup> Nyiví tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quitsí nu ña vaha tan quihin nyaa nu tuhun Nyoo tsa iyó añima ñi.

<sup>20</sup> Tan tumaa nu cucoyo tsiti can tyañu yuu, juven ñi nyiví tsa tsiñí tuhun Nyoo cuví can. Tan sii xaan naquihin vaha ñi itsi juhva ñi quiví.

<sup>21</sup> Tyin nduve ñuhu cunu ican, yacan cuenda caná tsiti can, maa tyin ña cuví cuhuh yoho tsi. Tan tacan cuví nyiví can. Juhva ñi quiví tsinú iñi ñi. Maa tyin quiví tsa quitsahá nyehé ñi tundoho, tan caahán ndasi nyiví tsata ñi tsa cuenda tuhun Nyoo, tacan tan jandihí ñi tsa tsinú iñi ñi.

<sup>22</sup> Tan tumaa nu cucoyo tsiti can tsitsi iñu, juven ñi nyiví tsa tsiñí tuhun Nyoo cuví can. Tsiñí ñi, maa tyin ña cuñí ñi javaha ñi tumaa tsiñí ñi. Tyin tyaá xaan ca iñi ñi tundoho ñayiví tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatyañú tsi tsi ñi, tan cuví ñi tumaa yutun tsa ña tsahá tsiti.

<sup>23</sup> Tan ñuhu vaha nu cucoyo tsiti can, yacan cuví inga nyiví tsa tsiñí tuhun Nyoo, tan cutuñí iñi ñi, tan javahá ñi tandihí tuhun caahán ra. Yihí ñi cuví ñi tumaa tsiti tsa caná tan tsahá tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

*Nu caahán ra Jesús nácaa cuahán tuhun trigu tan cuhu ña vaha*

<sup>24</sup> Tan cahán tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyiví cuví tsi tumaa iin ra tsa tatsí tsiti trigu nu ñuhu ra.

<sup>25</sup> Tan cuhva tsa quixí tandihí ra jahá tyiñu naha ra, quihví iin ra xaan iñi tsi ra

jatsii can, tan quití ra tsiti cuhu ña vaha, tan cuahán ra.

<sup>26</sup> Tan quivi caná tsiti trigu can, tan caná yoco tsi, caná ndihi tucu cuhu ña vaha can.

<sup>27</sup> Tacan tan ra cuví musu can naha ra, tsaḥan ra naha tsiatyi tuhun ra naha tsihin tsitoho ra naha: “Tata, maa ñi tsiti trigu tatsi ndi, ¿tan nacuenta tyin caná cuhu ña vaha can?” catyi ra naha.

<sup>28</sup> Tan nacahán ra can tan catyi ra: “Iyó iin ra xaan iñi tsi yu javahá tsehe, tun cuví.” Tacan tan musu can, catyi ra naha tsihin tsitoho ra: “¿A cuñi un tyin cuhun ndi tan tuhun ndi cuhu ña vaha can?”

<sup>29</sup> Tan tsitoho ra naha catyi ra: “Ña tuhun ndo, tyin coto tuhun ndihi ndo trigu can.

<sup>30</sup> Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu.”

*Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo*  
(Mr. 4.30-32; Lc. 13.18-19)

<sup>31</sup> Tacan tan caḥan ra Jesús inga cuhva ihya tsihin ñi tan catyi ra:

—Tsa ndacá ñaha Nyoo tsi nyivi cuví tsi tumaa iin tsiti mostaza tsa tatsi iin ra nu ñuhu ra.

<sup>32</sup> Tyin tsiti can lihli ñi tsi tan ñavin ca tandihi ca tsiti. Maa tyin quivi tshnu tsi cuví tsi iin yutun. Tan quitsj saa, tan javahá ti taca ti soco tun —catyi ra Jesús.

*Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo*  
(Lc. 13.20-21)

<sup>33</sup> Tan caḥan ra Jesús inga cuhva ihya tsihin ñi tan catyi ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndacá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyi ra.

*Nu catyi tuhun ra Jesús nacuenta jacuahá ra tsi nyivi tsihin cuhva*  
(Mr. 4.33-34)

<sup>34</sup> Tandihi tuhun can caḥan ra Jesús tsihin nyivi tsihin cuhva. Tan tandihi tsa caḥan ra tsihin ñi ña caḥan catsi maa ra, maa ñi maa tsihin cuhva caḥan ra.

<sup>35</sup> Tacan cuví tyin tacan tan cundaa tsa caḥan Jutu Mañi yo tsihin yuhu ra cuví ndusu yuhu ra taḥan tsanaha tan tyaḡ ra tyehen:

Tsihin cuhva cua caḥan yu tsihin nyivi.

Cua caḥan yu tsihin ñi tuhun tsa yihí xeehe nda cuanda tsa javahá Nyoo ñuhu ñayivi.

*Nu caahán ra Jesús náa cuñi tsi catyi cuhu ña vaha tsa caná tsihin tsiti trigu can*

<sup>36</sup> Tacan tan jacunuḡ ra Jesús tsi nyivi, tan quihvi ra tsitsi vehe nu nyii ra. Tan natuhvā ra tsicá tsihin ra nu nyaá ra, tan catyi ra naha tsihin ra:

—Catiyi tuhun tsihin ndi náa cuñi tsi catyi tsa caḥan un tsihin nyivi tsa cuenda cuhu ña vaha tan trigu can.

<sup>37</sup> Tacan tan quitsahā catyi ra Jesús tsihin ra naha:

—Ra tsa tatsj tsiti trigu can cuví yuhu Rayii tsa quee nda gloria.

<sup>38</sup> Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan cuhu ña vaha can cuví nyivi tsa nyicún tsi nu ña vaha.

<sup>39</sup> Tan nu tsa tatsj cuhu ña vaha can, nu ican cuví nu ña vaha juven ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñi tsi catyi quivi cua cundihí ñuhu ñayivi. Tan ra tsa cua naquihin tsiti can, cuví ra ángel naha ra.

<sup>40</sup> Tumaa jatacā ra naha cuhu ña vaha can tyin cayu tsi, tacan cua cuví quivi cua cundihí ñayivi.

<sup>41</sup> Yuhu Rayii tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí.

<sup>42</sup> Tan cua tyihí ra naha tsi ñi tsitsi ono nu cayú ñuhu. Tan ican cua vacu tsa ñi tan cahyu ña cua cuví nuhu ñi.

<sup>43</sup> Nyooho tan nyivi javahá cuhva cuñi Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhū ñicanyii, nu ndacá ñaha Jutu yo. Tatun iyó soho ndo, tyaḡ soho ndo tsa caahán yu.

*Xuhun cuaan tsa yihí xeehe*

<sup>44</sup> Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaḥa, tan sñi xaan cuñi ra cuanuhu ra tan xico ra tandihi tsa iyó tsi ra. Tacan tan jatā ra ñuhu nu yihí xeehe xuhun cuaan can.

*Iin cuhva tsa caḥan ra Jesús cuenda iin yuu xiñu tsa yahvi xaan nyaá*

<sup>45</sup> Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra,

<sup>46</sup> tan tsa ñihí ra iin tsa yahvi xaan nyaá, xico ra tandihi maa tsa cumí ra, tan jatā ra yuu xiñu vaha can.

*Nu caahán ra Jesús iin cuhva cuenda traya*

47 Tan juvin ñi cuví tucu tsa ndacá ñaha Nyoo tsi nyívi tumaa iin traya tsa cañi ra naha nu ndutya ñuhu, tan ñihí ra naha tandihí nuu tyaca.

48 Tan tsa tsitú traya can tsihin tyaca, tavá ra naha traya can nu ityi. Tan ican nacatsí ra naha tsi tí, naquihín vaha ra naha quití vaha tsitsi iin tyica, tan javitá ra naha quití ña vaha can.

49 Tan tacan cua cuví quívi naa ñayívi, cua quítsi ángel, quítsi tava siin ra naha tsi nyívi vaha tan nyívi ña vaha.

50 Tan cua tyihí ra naha tsi nyívi ña vaha can anyaya nu cayú ñuhu, nu cua vacu tsaa ñi tan cahyu ña cua cuví nuhu ñi.

*Nu caahán ra Jesús tyin vaha tuhun tsahnu Nyoo tan tuhun tsaa Nyoo*

51 Tacan tan ra Jesús tsica tuhun ra tsi ra tsicá tsihin ra, tan catyí ra tsihin ra naha:

—¿A cutuñí iñi ndo tandihí tsa cahan yu?

Tan nacañan ra naha tan catyí ra naha:

—Cutuñí iñi ndi, Jutu Mañi yu.

52 Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihí ra nácaa ndacá ñaha Nyoo tsihin tandihí tuhun tsaa tsa caahán yu, cua cuví ra tumaa iin ra jatsii vehe tan cua jacuaha ra nduvi taahan tuhun vaha can tsi nyívi —catyí ra Jesús.

*Nu tsinuhú ra Jesús ñuu Nazaret nu tsahnu ra*

(Mr. 6.1-6; Lc. 4.16-30)

53 Tsa ndihí cañan ra Jesús cuhva ihya tan quitá ra cuahán ra.

54 Tan tsaa nyico ra ñuu ra. Tan quitsaha jacuahá ra tsitsi vehe ñuhu ñuu can. Tan iyo cuñí nyívi tan catyí ñi:

—¿Nu maa tahan cutuhvá ra ihya tsa tsitó xaan ra? ¿Tan nácaa cuví javaha ra tsa iyo?

55 Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas.

56 Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhvá ra tandihí tsa tsitó ra? —catyí ñi.

57 Tan yacan cuenda ña cuñí ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyívi tandihí ñi ityi jahá ñi tsa ñayívi tsi ra ndusu yuhu Nyoo, maa tyin nyívi ñuu ra ña tyaa yahvi ñi tsi ra tan ndi nyívi vehe ra —catyí ra Jesús.

58 Tan ña cuaha tsa iyo javahá ra ñuu ra tsa cuenda tyin ña tsinú iñi ñi tsi ra.

## 14

*Nu catyí tsi nácaa tsihi ra Juan, ra jacoondutyá tsi nyívi*

(Mr. 6.14-29; Lc. 9.7-9)

1 Quívi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús.

2 Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin nandoto nyico ra. Yacan cuenda iyó tunyee iñi tsi ra tsa javahá ra tsa iyo.

3-4 Tacan catyí ra tyin juvin ñi maa ra tavá tyiñu tyin tñin ra naha tsi ra Juan. Tan cuhñi ra naha tsi ra tsihin cadena, tan tyihí ra naha tsi ra vehe caa. Tacan javahá ra Herodes tyin xaan cuñi ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasiihi ra Felipe, yañi ra.

5 Yacan cuenda ra Herodes cuñí ra cahñi ra tsi ra Juan, maa tyin yuuhví ra tsi nyívi, tyin tandihí ñi tsinú iñi ñi tyin ra Juan, ndusu yuhu Nyoo cuví ra.

6 Tan iin quívi iyó vico ra Herodes, tan sehe ña Herodías quitsaha tsañi ña yaa nu yucú ñi vico can. Tan tañan xaan iñi ra Herodes.

7 Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

8 Tacan tan natyuhú sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyívi, tsi yu nu iin coho —catyí ña.

9 Tsa tsiñí ra rey Herodes tsa cahan ña, nducuihva cuñi ra. Maa tyin tsa cuenda tsa cahan ra tyin tandihí tsa cua ndacan ña tan cua cuhva ra, yacan cuenda ña cuví jandaví ñaha ra tyin tandihí nyívi yucú vico can tan tsiñí ñi tsa cahan ra. Yacan cuenda tavá tyiñu ra na cuhva ra naha jiñi ra Juan tsi ña nu iin coho.

10 Tan tavá tyiñu ra na cucahnya ra naha jucun ra Juan nu nyii ra vehe caa.

11 Tacan tan tsindaca ra naha jiñi ra Juan tsi ña, nyii tsi nu iin coho. Tan tsaha ra naha tsi ñaha tyuvaa can. Tan maa ña nacuhva cuenda ña tsi sihi ña.

12 Tacan tan tsaa ra nyicun tsi ra Juan naha ra tan naquihín ra naha cuñu ñuhu ra, tan tyihí ra naha tsitsi ñuhu. Yahá can tan tsahan ra naha tsijacoto ra naha tsi ra Jesús.

*Nu jacatsi ra Jesús tsi uhun mil rayii*

(Mr. 6.30-44; Lc. 9.10-17; Jn. 6.1-14)

13 Tsa tsito ra Jesús tsa tañan ra Juan, quihín ra iin yutun ndoo, tan cuahán in-tuhun ñi maa ra nu taxin caa. Tan tsa tsito nyívi, quitá ñi ñuu ñi, tan cuahán tsihin tsaha ñi nu nyii ra.

14 Tsa quitá ra Jesús tsitsi yutun ndoo can, tan nyehe ra tyin cuaha xaan nyívi nyicún tsi ra. Tan cundaahví iñi ra nyehe ra tsi ñi.

Tan janduvahā ra tsi nyivi cuuhví tsa tsaq tsihin ñi.

<sup>15</sup> Tan tsa cuñi cuaq, tacan tan natuhvā ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca çahan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

<sup>16</sup> Tan ra Jesús catyí ra:  
—Nduve náa nducu ñi cuhun ñi. Cuhva nyooho tsa catsi ñi.

<sup>17</sup> Tan nacahan ra naha tan catyí ra naha:  
—Nduve maa náa iyó ihya. Uhun taahan ñi paan, tan uvi taahan ñi tyaca iyó.

<sup>18</sup> Tan catyí ra Jesús:  
—Ndaca ndo can tsi yu.

<sup>19</sup> Tacan tan catyí ra tsihin nyivi tyin na cunyecu ñi nu cuhu can. Yaha tsa tsinyecu ñi tan quihñin ra uhun taahan paan can, tan nduvi tyaca can. Tan nanyehē ndaa ra ityi siqui, tan nacuhvā ra tyahvi nyoo tsi Nyoo tan tsahñu cuatyí ra paan can. Tan tsahā ra tsi ra tsicá tsihin ra, na tsatsa ra naha tsi nyivi can.

<sup>20</sup> Tan tandihi nyivi tsatsi ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyaca tsihin tsa ñahñu ican.

<sup>21</sup> Tan tsa tandihi ñi tsa tsatsi can, quita maa tumaa uhun mil tsa maa ñi maa rayi. Tan sin maa ñiñaha tan tsa nyihi.

*Nu tsicá ra Jesús nu ndutya  
(Mr. 6.45-52; Jn. 6.16-21)*

<sup>22</sup> Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi.

<sup>23</sup> Tsa yaha tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaq.

<sup>24</sup> Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihí tatyí nu cuahán ra naha.

<sup>25</sup> Tan tsa cua tuvi cuahán ndihi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya.

<sup>26</sup> Tan cuhva tsa nyehē ra naha tsi ra, tsicá ra nu ndutya can, nayuhvi xaan ra naha. Tan caná tsa ra naha, tan catyí ra naha:

—jihna ndo xin. Tatyí vatsi can!

<sup>27</sup> Maa tyin nacahan ra Jesús tsihin ra naha, tan catyí ra:

—iña nayuhvi ndo tyin maa yu cuvii —catyí ra.

<sup>28</sup> Tacan tan nacahan ra Pedro tan catyí ra:

—Jutu Mañi yu, tatun maa un vatsi juven, cuhva tsa quitsi ndihi yu nu vatsi un.

<sup>29</sup> Tan ra Jesús catyí ra tsihin ra:

—Ñaha jiin.

Tacan tan quita ra Pedro tsitsi yutun ndoo can, tan quitsahā tsicá ra nu ndutya tan cuahán ra nda nu vatsi ra Jesús.

<sup>30</sup> Maa tyin cuhva tsa tuví iñi ra tyin ñihi xaan quitsahā yihí tatyí, nayuhvi xaan ra, tacan tan quitsahā cuñi nyee ra, tan quitsahā caná tsa ra tan catyí ra:

—jācacu tsi yu, Jutu Mañi yu!

<sup>31</sup> Tan iin yaha ñi tñin ra Jesús ndaha ra, tan catyí ra tsihin ra:

—¿Nacuenda tsa nayuhvi un, yooho tsa luxu xaan tsinú iñi tsi yu? —catyí ra Jesús tsihin ra.

<sup>32</sup> Tan cuhva tsa quihvi ra naha tsitsi yutun ndoo can, cutaxin tatyí can.

<sup>33</sup> Tacan tan ra yucú tsitsi yutun ndoo can tsicuiñi tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuvii tsi yooho —catyí ra naha.

*Nu janduvahā ra Jesús tsi nyivi cuuhví tsa iyó Genesaret*

*(Mr. 6.53-56)*

<sup>34</sup> Tsa yaha sava ra naha miñi can, tsaq ra naha ñuhu Genesaret.

<sup>35</sup> Tan cuhva tsa nacotó nyivi iyó ican tsi ra Jesús tyin juven ra cuvii, jacotó ñi tsi tandihi nyivi iyó tani cahun can. Tan tsindaca ñi tandihi nyivi cuuhvi nu nyii ra.

<sup>36</sup> Tan caahán ndaahvi ñi tsihin ra, na cuhva ra tsa tñin ñi vasu luxu jahma ra. Tan tandihi ñi tsa tñin jahma ra, nduvahā ñi.

## 15

*Tsa jatíví tsi nyivi nuu Nyoo*

*(Mr. 7.1-23)*

<sup>1</sup> Tacan tan juhva ra cuvii fariseo tan ra cuvii maestro cuenda ley vehe ñuhu quee ra naha ñuu Jerusalén. Tan tsahan ra naha nu nyii ra Jesús tan tsicā tuhun ra naha tsi ra, tan catyí ra naha:

<sup>2</sup> —¿Nacuenda ña javahá ra tsicá tsihin un naha ra cuhva nacoq tsi tsaahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

<sup>3</sup> Tan tsicā tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñi ndo tyaá yahvi ndo tsa caahán Nyoo?

<sup>4</sup> Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihi nyivi



tsa caahán ndavaha ñi siqui jutu ñi o sihi ñi, cua cúu ñi”, catyí Nyoo.

<sup>5</sup> Maa tyin nyooho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsahá yu tandihí tsa iyó tsi yu tsi Nyoo.”

<sup>6</sup> Tatun tsa catyí ndo yacan, ña cuñí tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo.

<sup>7</sup> ¡Nyooho cuñí ndo tyin vaha xaan ndo, maa tyin ña nditsa ndo! Nditsa tsa cahán ra Isaiás, ra cuví ndusu yuhu Nyoo, siqui ndo jahá Nyoo. Tan catyí ra tyehen:

<sup>8</sup> Nyívi ihya, jacahnú ñi tsi yu tsihin yuhu ñi. Maa tyin ñavin tsihin tsa ñi ñi ñi.

<sup>9</sup> Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaiás tuhun ndo jahá Nyoo, catyí ra Jesús tsihin ra ican naha ra.

<sup>10</sup> Tacan tan caná ra Jesús tsi nyívi tan catyí ra tsihin ñi:

—Tyaa soho ndo tsa caahán yu, tan ndücu ndo cuhva cutuñí ñi ndo.

<sup>11</sup> Tyin nyívi tsa tiví nuu Nyoo, ñavin tsa quihví yuhu ñi jatíví tsi ñi. Tyin tiví ñi jahá tsa quitá yuhu ñi.

<sup>12</sup> Tacan tan natuhvá ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiñí ra naha tsa cahán un.

<sup>13</sup> Tan maa ra Jesús nacahan ra tan catyí ra:

—Tandihí yutun tsa ña tatsí Jutu yu, ra nyaá gloria, cua tuhun ra nda cuanda yoho tun.

<sup>14</sup> Jaña ndo tsi ra fariseo naha ra tyin ra cuaa cuví ra naha, tan janahá ra naha ityí tsi inga ra cuaa. Tan tatun iin ra cuaa tan janahá ra ityí tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

<sup>15</sup> Tacan tan quitsahá catyí ra Pedro tsihin ra Jesús:

—Catyí tuhun tsihin ndi náa cuñí tsi catyí tsa cahán un nañi.

<sup>16</sup> Tacan tan ra Jesús catyí ra tsihin ra naha:

—Ndi nyooho tan ña cutuñí ndihí ñi ndo.

<sup>17</sup> ¿A ña cutuñí ñi ndo tyin tsa tsatsí yo, tsitsí yo cuahán tsi? Yahá can tan cua quita nyico tsi.

<sup>18</sup> Maa tyin tuhun tsa quitá yuhu yo, tsitsi añima yo quee can tan nyívi tiví ñi nuu Nyoo jahá tsa caahán ñi.

<sup>19</sup> Tyin tsa caquiñí tsicá ñi ñi tsitsi añima ñi quitá can, tan cuñí ñi cahñi ñi nyívi. Cuñí ñi suhu ñi. Yihí nyívi caahán ñi cuendu, o jacuñí nyaa ñi tsi inga ca nyívi. Yihí ra cuñí ra coo inga ñaha ra, o ñiñaha iyó yí tsicá nuu ñi tsihin inga rayí. Yihí ra tsicoó ra tsihin ñaha tan ña tindaha ra tsihin ña. Tan yihí rayí quixí ra tsihin juven ñi maa rayí. Tan ñiñaha yihí ñi quixí ñi tsihin juven ñi maa ñaha. Tan tandihí ca maa tsa caquiñí tsa javahá ñi tsihin cuñu ñuhu ñi.

<sup>20</sup> Yacan cuví tsa jatíví tsi nyívi nuu Nyoo. Tyin tsa ña nacatýá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

*Nu tsinú ñi iin ñaha inga ñuu tsi ra Jesús (Mr. 7.24-30)*

<sup>21</sup> Quitá ra Jesús ñuu can tan cuahán ra ityí ñuu Tiro tan Sidón.

<sup>22</sup> Tan ityí can iyó iin ñaha Canaán. Tan tsa nyehé ña tsi ra Jesús natuhvá ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi ñi tsi yu, tyin sehe yu yihí tatyí ña vaha tsi ña, tan nyehé xaan ña tundocho jahá nu —catyí ña tsihin ra Jesús.

<sup>23</sup> Maa tyin tumaa tsa ña tsiñí ñi ra Jesús jahá ra tsi ra tan ña nacahan ra tsa iin yaha ñi. Tacan tan natuhvá ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin ut-san xaan yo tsa caná tsa ña tsata yo.

<sup>24</sup> Tacan tan catyí ra Jesús tsihin ra naha:

—Vatsí yu jahá Nyoo ñuu Israel tyin naquihin ndaahvi yu nyívi ñuu can tsa cuví ñi tumaa mbee tsa cuanaá. Tan tsa cuenda nyívi can vatsí yu.

<sup>25</sup> Tan ñaha can natuhvá ña nu nyaá ra tan tsicuñí tsi ña nuu ra, tan catyí ña tsihin ra:

—Jutu Mañi yu, ¡jatyinyee tsi yu!

<sup>26</sup> Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

<sup>27</sup> Maa tyin ña ndasi cuñí ña tsa cahán ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

<sup>28</sup> Tacan tan catyí ra Jesús tsihin ña:

—Yooho ñaha, tsinú xaan ñi un tsi yu. Na cuví maa cuhva tsicá ñi un.

Tan juven ñi cuhva can tan nduvahá sehe ña.

*Nu cuaha xaan nyívi cuhvi janduvahá ra Jesús*

<sup>29</sup> Tsa yahá yacan tan ra Jesús cuahán ra ityí yuhu miñi Galilea, tan ndaq ra iin jiñi yucu tan ican tsinyaa ra.

<sup>30</sup>Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñhi ñi, lundu ñi. Tan yihí ñi yihí inga ca nu cuehe tsi ñi. Tan tsaquín nyecu ñi tsi tandihi ñi cuuhví can nu nyaá ra Jesús. Tan janduvaha ra tsi ñi.

<sup>31</sup>Tan iyo xaan cuñí nyivi can nyehé ñi tyin nacahan ñi ñiñhi tan nduvaha ñi lundu, tan nacacá ñi coxo, tan nanyehé ñi cuaa. Tan quitsaha jacahnu xaan ñi tsi Nyoo ñi, tsa cuví ñi nyivi Israel.

*Nu tsahá ra Jesús tsa catsi cumi mil rayii (Mr. 8.1-10)*

<sup>32</sup>Tacan tan cana ra Jesús tsi ra tsicá tshin ra, tan catyí ra tshin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú ñi ihya tshin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

<sup>33</sup>Tacan tan ra tsicá tshin ra catyí ra naha tshin ra:

—¿Tan numaa cua ñiñhi yo tsa catsi nyivi cuaha ihya, tyin ihya nduve nyivi iyó?

<sup>34</sup>Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihí.

<sup>35</sup>Tan catyí ra tshin nyivi na cunyecú ñi nu ñuhu.

<sup>36</sup>Tacan tan quihín ra tsa utsa paan can tan tyaca can, tan nacuhva ra tyahvi nyoo tsi Nyoo. Tan quitsaha tsahnú cuatyí ra paan tshin tyaca, tan tsaha ra tsi ra tsicá tshin ra tyin na tsatsa ra naha tsi nyivi.

<sup>37</sup>Tandihí ñi tsatsí ñi, tan ndaha vaha iñi ñi. Tan tsa ndihí tsatsí ñi tan naquihín ra naha tsa ñahñu tsa ndoo can tan quita utsa tyica cuví tsi.

<sup>38</sup>Tan ra tsa tsatsí can naha ra quita maa cumi mil ra naha tan siñ maa ñiñaha tan tsa nyihí.

<sup>39</sup>Yaha can tan jacunuhva ra tsi ñi, tan quihví ra tsitsi yutun ndoo, tan cuahán ra ityi Magdala.

## 16

*Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo*

*(Mr. 8.11-13; Lc. 12.54-56)*

<sup>1</sup>Tacan tan ra fariseo naha ra tan ra saduceo naha ra tsahan ra naha nu nyii ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tshin tunyee iñi Nyoo.

<sup>2</sup>Maa tyin nacahan ra Jesús tan catyí ra tshin ra naha:

—Tsa cueñi, tuhvá ndo catyí: “Siñ xaan caa ityaan cua cuví tyin cuaaha xaan nu vico”.

<sup>3</sup>Tan tsa tuvi catyí tucu ndo tyin ña siñ maa caa cua cuví, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha?

<sup>4</sup>Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñí ñi nyehé ñi. Maa tyin yuhu ña cua javaha yu tsa iyo nyehé ñi, tyin tumaa tsa cuví tsi ra Jonás, yacan ña cua nyehé ñi —catyí ra Jesús tshin ra naha; tsahan cuahán ra.

*Tuhun caahán ra fariseo naha ra cuví tsi tumaa yutsan iya*

*(Mr. 8.14-21)*

<sup>5</sup>Cuhva tsa yaha ra tsicá tshin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha.

<sup>6</sup>Tacan tan catyí ra Jesús tshin ra naha:

—Jaha ndo cuenda tsi ndo tshin yutsan iya ra fariseo tan ra saduceo naha ra —catyí ra tshin ra naha.

<sup>7</sup>Tacan tan quitsaha natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tshin yo? —catyí ra naha.

<sup>8</sup>Tan tsa tuví iñi ra Jesús tsa tsicá iñi ra naha, catyí ra tshin ra naha:

—Nyooho tsa luxu ñi tsinú iñi tsi yu, ¿nacuenta tyin tsicá xaan iñi ndo tyin nduve tsa catsi ndo ndahá ndo?

<sup>9</sup>¿A ñaha ca cutuñi iñi ndo? ¿A ña nducuhún iñi ndo quivi tsa jacatsi yu tsi uhun mil rayii tshin uhun taahan ñi paan, tan najava taahan tyica jacutu ndo tshin tsa ñahñu tsa ndoo can?

<sup>10</sup>¿A tsa naá ndihí tucu iñi ndo quivi tsa jacatsi yu cumi mil rayii, tan najava taahan tyica jacutu ndo tshin tsa ndoo tsa utsa taahan ñi paan?

<sup>11</sup>¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tshin yutsan iya ra fariseo tan ra saduceo naha ra? —catyí ra Jesús tshin ra naha.

<sup>12</sup>Tacan tan cutuñí iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tshin tsa jacuahá ra fariseo tan ra saduceo naha ra.

*Nu catyí ra Pedro tyin ra Jesús cuví ra Cristo, rajacacú tsi yo*

*(Mr. 8.27-30; Lc. 9.18-21)*

<sup>13</sup>Cuhva tsa tsaq ra Jesús ityi ñuu Cesarea Filipino, tsicá tuhun ra tsi ra tsicá tshin ra tan catyí ra:

—¿Náa catyí nyivi? ¿Yóo ra cuví yu, Rayí tsa quee nda gloria? —catyí ra.

<sup>14</sup> Tan nacahan ra naha tan catyí ra naha: —Yihí nyivi catyí ñi tyin ra Juan ra jacoondutyá tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

<sup>15</sup> Tacan tan catyí ra tsihin ra naha: —Tan nyooho, ¿yóo ra cuví yu, catyí ndo? <sup>16</sup> Tacan tan nacahan ra Simón Pedro tan catyí ra: —Yooho cuví ra Cristo, Sehe Nyoo nyitó —catyí ra.

<sup>17</sup> Tan nacahan ra Jesús tan catyí ra: —Sii xaan cuví tsi yooho, Simón, sehe ra Jonás, tyin ñavin nyivi janaha tuhun ihya tsi un, tyin maa Jutu yu, ra nyaá gloria janaha tsi un.

<sup>18</sup> Tan yuhu catyí yu tsihin un tyin yooho cuví ra Pedro. Tan siquí cava ihya, cua javaha yu vehe ñuhu yu. Tan ña cua tani tsi jaha tuhun tsihi.

<sup>19</sup> Yuhu cua kuhva yu ndaha tucu tsa cuenda nu ndacá ñaha Nyoo tsi un. Tan tandihi tsa kuhñi un ihya nu ñuhu ñayivi, tsa nuuhñi jaha Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

<sup>20</sup> Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tun juvin ra cuví ra Cristo ra tsa quee nu nyaá Nyoo.

*Nu caahán ra Jesús tyin cua cahñi nyivi tsi ra*

(Mr. 8.31—9.1; Lc. 9.22-27)

<sup>21</sup> Nda quivi can quitsaha catyí ra Jesús tsihin ra tsicá tsihin ra, tyin cuñi tsi tsa cahun ra ñuu Jerusalén. Tan ra cuví mandoñi naha ra, tan ra jutu tsa cuví ityí nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha.

<sup>22</sup> Tacan tan quihñ ra Pedro tsi ra tan quitá siin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña kuhva Nyoo tsa tahan un tacan, Jutu Mañi yu —catyí ra.

<sup>23</sup> Tan nanyico coo ra Jesús, tan quitsaha caahán ra tsihin ra Pedro:

—¡jatsiyo nyaha tsi un, cuihna! Tyin cuñi un casi un tsi yu. Tyin yooho ña tsicá iñi un kuhva cuñi Nyoo, tyin kuhva cuñi nyivi tsicá iñi un —catyí ra.

<sup>24</sup> Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñi cunyicun tsi yu, cahnya iñi ndo tsa cuñi maa ndo javaha

ndo, tacan tan cuvi javaha ndo tsa cuñi Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu.

<sup>25</sup> Tan nyooho tsa ña cuñi nyehe tundoho, tan ña cuñi ndo kuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua kuhva ñayivi ndo tsa cuenda yu, cua cacu ndo.

<sup>26</sup> Tyin nduve yahvi nyaá tsa cua ñihí ndo tandihi tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuví tyahvi ndo tan ña cua cunaa añima ndo.

<sup>27</sup> Tyin yuhu, Rayí tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo.

<sup>28</sup> Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsi yu tsa cua cundaca ñaha yu, tsa ndi cumañi ca cúu ndo —catyí ra Jesús.

## 17

*Nu nyehe uñi taahán ra tsicá tsihin ra Jesús nácaa tsa sñ caá xiñu ra Jesús nu ndacá ñaha ra nda gloria*

(Mr. 9.2-13; Lc. 9.28-36)

<sup>1</sup> Tan tsa yaha iñu quivi, tan quihñ ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha.

<sup>2</sup> Tan ican nasama kuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu.

<sup>3</sup> Tacan tan nyehe ra naha tsi ra Moisés tan ra Elías, natuhún ra naha tsihin ra Jesús.

<sup>4</sup> Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

<sup>5</sup> Tsitsi tsa caahán ra Pedro, quitsi iin vico tsa xiñu xaan siquí ra naha. Tan tyasí tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sii xaan cuñi yu tsihin ra. Tyaa yahvi ndo tsa caahán ra —catyí ndusu can.

<sup>6</sup> Tsa tsiñi ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhvi xaan ra naha.

<sup>7</sup> Tacan tan natuhva ra Jesús nu cayucú ra naha, tan tñ ra tsi ra naha, tan catyí ra:

—Nduvita ndo, tan ña ñayuhvi ndo.

<sup>8</sup>Tan cuhva tsa nanyehę ra naha, intuhun ña ra Jesús nyaá, tan nduve inga uvi ca ra naha.

<sup>9</sup>Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehę ndo ihya tsihin nyivi. Tsa yaha tsa cúu Rayíi tsa queę nda gloria tan nandoto ra, tacan tan cua cahan ndo can —catyí ra.

<sup>10</sup>Tacan tan tsicá tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

<sup>11</sup>Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi.

<sup>12</sup>Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyivi tsi ra, tan javaha ñi tsihin ra tandihi cuhva cuñi maa ñi. Tan tacan tucu yuhu, Rayíi tsa queę nda gloria, cua janyehę ñi tundoho tsi yu —catyí ra tsihin ra naha.

<sup>13</sup>Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

*Nu janduvaha ra Jesús tsi iin ra luhlu tsa tsihi naaha jahá tatyí ña vaha*

(Mr. 9.14-29; Lc. 9.37-43)

<sup>14</sup>Cuhva tsa tsaą ra naha nu yucú nyivi, natuhva iin ra tan tsicuiñi tsiiti ra nuu ra Jesús, tan catyí ra tsihin ra:

<sup>15</sup>—Tata, cundaahvi iñi tsi sehe yu, tyin yihí cuehe tsihi naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuhų tan cayú ra, tan nduvá tucu ra nu yihí ndutya.

<sup>16</sup>Tan tsindacá yu tsi ra tsi ra tsicá tsihin un, maa tyin ña cuvı janduvaha ra naha tsi ra —catyí ra.

<sup>17</sup>Tan nacahan ra Jesús tan catyí ra:

—¡Nyooho, nyivi tsa ña tsinú iñi cuvı ndo! ¡Tan caquiñi ndo! ¿Ndáa nda quivi cua cunyii yu tsihin ndo? ¿Tan ndáa nda quivi cua cunyeę iñi yu tsihin ndo, tyin nyooho ña tsinú vaha maa iñi ndo tsi yu? Tindaca ndo tsi ra luhlu tsi yu —catyí ra.

<sup>18</sup>Tacan tan tava ra Jesús tsi nu tatyí ña vaha can, tan quitá nu tsi ra luhlu can. Tan juvin ñi cuhva can nduvaha ra.

<sup>19</sup>Tsa yaha can tan tsicá tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuvı tava ndi tatyí ña vaha can?

<sup>20</sup>Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuvı catyí ndo tsihin yucu ihya na catsiyo tsi tan cuhun tsi inga ityí, tan yucu ihya cuhun tsi

inga ityí. Tan nduve tsa ña cua cuvı javaha ndo tatun nditsa tsa tsinú iñi ndo tsi yu.

<sup>21</sup>Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

*Inga tsaha cahan ra Jesús tsa cua cahñi nyivi tsi ra*

(Mr. 9.30-32; Lc. 9.43-45)

<sup>22</sup>Yucú ra naha Galilea can, tan ra Jesús catyí ra tsihin ra naha:

—Yuhu, Rayíi tsa queę nda gloria, iin ra cua nacuhva cuenda ra tsi yu tsi ra xaan iñi tsi yu naha ra.

<sup>23</sup>Tan cua cahñi ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñi ra naha tuhun ihya, cuiihya xaan cuñi ra naha cuvı.

*Nu tyahvi ra naha cuenda tsa nduvaha vehe ñuhu cahnu*

<sup>24</sup>Cuhva tsa tsaą ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahan ra naha tsinyehę ra naha nu nyii ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahvi xuhun tsa cuenda vehe ñuhu cahnu? —catyí ra naha tsihin ra Pedro.

<sup>25</sup>Tan nacahan ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahan tan catyí ra:

—¿Nacaa cuñi yooho, Simón? ¿Yóo tsi quihin ra cuvı rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

<sup>26</sup>Nacahan ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi.

<sup>27</sup>Maa tyin ña cuñi yo tsa cahan ra naha siqui yo, yacan cuenda vaha ca tsa cuhun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

## 18

*Nu janaha ra Jesús yóo ra cahnu ca cuvı nu tandihi nyivi tsa ndacá ñaha Nyoo*

(Mr. 9.33-37; Lc. 9.46-48)

<sup>1</sup>Quivi can natuhva ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuvı nu ndacá ñaha Nyoo?

<sup>2</sup>Tacan tan ra Jesús cana ra tsi iin ra luhlu, tan tyaa ra tsi ra mahñu ra naha.

<sup>3</sup>Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuví quihvi ndo nu ndacá ñaha Nyoo.

<sup>4</sup>Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihya.

<sup>5</sup>Nyivi tsa naquihñi tsi iin nyivi tumaa ra luhlu ihya, tyin tsinú ñi tsi yu, yuhu naquihñi cuenda ñi.

*Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha (Mt. 5.29-30; Mr. 9.42-48; Lc. 17.1-2)*

<sup>6</sup>Tatun yóo nyivi natyuhú tsi iin nyivi tsa ñaha ca tsinú vaha ñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujanehñi nyivi tsi ñi nu cunu ndutya ñuhu.

<sup>7</sup>¡Ndahvi nyivi ñuu ñayivi, tyin tacan iyó tsa jativí tsi ñi! ¡Tan ndahvi tucu ra ndaahvi tsa jativí tsi ñi!

<sup>8</sup>Yacan cuenda tatun ndaha un o tsaha un javahá tsa ña vaha, cañnya can tan javita un. Tyin vaha ca quihvi un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanii un tan jacuhun Nyoo tsi un nu cayú ñuhu tsa ña cua ndahva maa.

<sup>9</sup>Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

*Nu cahan ra Jesús tyin tumaa mbee tsa cunaq, tacan cuví yo (Lc. 15.3-7)*

<sup>10</sup>Ña caca ñi ndo tyin ra nyihi cuenda ya ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria.

<sup>11</sup>Tyin yuhu, Rayi tsa quee nda gloria, vatsi jacacu yu tsi nyivi tsa cuanaa.

<sup>12</sup>¿Nacaa cuñi nyooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quiti tsa cuanaa can?

<sup>13</sup>Tan tatun nañihi ra tsi ti, tsa nditsa tyin si ca cua cuñi ra tsihin quiti can, tan ñavin ca tsihin tsa cumi xico tsahun cumi quiti tsa ña tsinaa.

<sup>14</sup>Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

*Nacaa taahán tsi jahá tahan yo tucahnu ñi tsi yo*

*(Lc. 17.3)*

<sup>15</sup>Tatun ra yañi un tan javaha ra tsa ña vaha tsi un, cahan tsihin intuhun ñi maa ra tan catyí un tsihin ra tyin ña vaha cuhva javaha ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can.

<sup>16</sup>Maa tyin tatun ña tyaa yahvi ra tsi un, tacan tan caña un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can.

<sup>17</sup>Tatun ña tyaa yahvi ra ndi maa tsi ra tsa tsahan tsihin un naha ra, tacan tan cahan tsihin tandihi nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tava xuhun cuenda ra ndacá ñaha nda ñuu Roma.

<sup>18</sup>Tsa nditsa catyí yu tsihin ndo, tyin tandihi tsa cuhñi ndo ihya nu ñuhu ñayivi, tsa nuuhñi tsi jahá maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

<sup>19</sup>Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo.

<sup>20</sup>Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

<sup>21</sup>Tacan tan tsahan ra Pedro tsindaca tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu ñi tsi ra? ¿A utsa taahan tsaha?

<sup>22</sup>Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu ñi.

*Nu cahan ra Jesús iin cuhva cuenda iin ra tsa ña cuñi jaha tucahnu ñi*

<sup>23</sup>Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihi musu ra tyin cua nyehe ra nácaa nyaá cuenda ra naha tsi ra.

<sup>24</sup>Tan cuhva tsa quitsaha natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra.

<sup>25</sup>Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasihí ra, tan tsihin sehe ra tan tandihi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

<sup>26</sup>Tacan tan musu can tsicuiñi tsiti ra nuu tsitoho ra, tan cahan ndaahvi ra tsihin ra,

tan catyí ra: “Tata, jaha tumañi iñi, cūatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra.

<sup>27</sup> Tan cundahvi iñi tsitoho ra tsi ra, tan jahā ra tucahnu iñi tsi ra, tan janaā ra tandihi tsa nyaá cuenda ra, tan jandoo nuña ra tsi ra.

<sup>28</sup> Maa tyin cuhva tsa quita musu can, nañihí ra tsi iin ra vaha iñi tsi ra tsa cuvi musu tumaa maa ra. Tan ra vaha iñi can nyaá cuenda ra luxu ñi tsi ra. Tan tñn ra tsi ra can, tan quitsaha tñn ra jucun ra, tan catyí ra tsihin ra: “Tyahvi tsa nyaá cuenda un tsi yu.”

<sup>29</sup> Tacan tan tsicuiñi tsiti ra can nuu ra, tan cahān ndaahvi ra tsihin ra tan catyí ra: “Cūatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.

<sup>30</sup> Maa tyin maa ra ña cuñi ra cuatu ra, tan tsahān ra tsityihí ra tsi ra can vehe caa nda cuanda tsa tyahvi ra tsa nyaá cuenda ra tsi ra.

<sup>31</sup> Tsa nyehe inga ca musu tsa javahā ra, cuihya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javahā ra can.

<sup>32</sup> Tacan tan tsitoho ra can tava tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuvi un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu.

<sup>33</sup> Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.

<sup>34</sup> Tan cuxaān xaan tsitoho ra, tan tava tyiñu ra na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

<sup>35</sup> Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

## 19

*Nu caahán ra Jesús tyin ña vaha tsa nacoo ihñi rayii tsi ñasihi ra*

(Mr. 10.1-12; Lc. 16.18)

<sup>1</sup> Tsa yahā tsa cahān ra Jesús tuhun ihya, tan quita ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii.

<sup>2</sup> Cuaha xaan nyivi tsinyicun tsi ra, tan janduvahā ra tsi nyivi cuuhvi.

<sup>3</sup> Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra.

Tan tsicā tuhun ra naha tsi ra tan catyí ra naha:

—¿A vaha tsa nacoo rayii tsi ñasihi ra tsa cuenda náa ñi tsihi tsañā ña tsi ra?

<sup>4</sup> Tan nacahān ra tan catyí ra:

—¿A ña tuhva ndo cahvi nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayii tan ñaha?

<sup>5</sup> Tan catyí tsi tyehen: “Taahán tsi nacoo rayii tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.”

<sup>6</sup> Yacan cuenda, ñavin ca uvi taahan ñi, maa tyin nduvi ñi intuhun ña nyivi cuvi ñi. Yacan cuenda, ña taahán tsi tsa nacoo taahan ñi tsi ñi tyin maa Nyoo tsa jandu iin tsi ñi —catyí ra.

<sup>7</sup> Tacan tan tsicā tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuvi can iin rayii tutu cuenda ley ra tan nacoo ra ñasihi ra?

<sup>8</sup> Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsahā ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoo nyivi.

<sup>9</sup> Yuhu catyí yu tsihin ndo tyehen: Ra tsa nacoo ñasihi, tan ñavin tsa cuenda tsa quituví ña tsihin inga rayii, tan tindahā ra tsihin inga ñaha, tsicoo cuatyí ra nuu Nyoo. Tan ra tsa tindahā tsihin ñaha tsa nacoo rayii can, juvin ñi tsicoo tucu cuatyí ra can —catyí ra.

<sup>10</sup> Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayii tsihin ñasihi ra, vaha ca ña tindaha yo.

<sup>11</sup> Tan ra Jesús catyí ra tsihin ra naha:

—Ña tandihi nyivi cuvi naquihin cuenda tuhun ihya. Maa tyin nyivi tsa tsahā Nyoo cuvi naquihin cuenda ñi can.

<sup>12</sup> Tsa ña tindaha nyivi, cuaha ñi cuenda cuvi tsi. Yihí ñi ña cuñi ñi tindaha ñi tyin iin cuhva caa maa ñi nda cacu ñi. Tan inga ñi ña cuñi ñi tindaha ñi tyin tsa nducapun ñi jahā nyivi. Tan yihí ñi ña tindaha ñi tsa cuenda tsa cuñi ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyivi tsa cuvi javaha yacan na javaha ñi —catyí ra Jesús.

*Nu nasocó ra Jesús tsi tsa nyihi*  
(Mr. 10.13-16; Lc. 18.15-17)

<sup>13</sup> Tacan tan quitsi ndaca nyivi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsahā caahán ra naha tsi nyivi tsa cuahán tsihin tsa nyihi can.

<sup>14</sup> Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndacá ñaha Nyoo cuví ñi tumaa tsa nyihi ihya —catyí ra.

<sup>15</sup> Tacan tan tyiso ndaha ra jiñi tsi naha tsi. Yahá can tan cuahán ra.

*Nu tsahá ra Jesús cuhva tyin yií xaan nacuhva cuenda iin ra cuca tsi ra tsi Nyoo (Mr. 10.17-31; Lc. 18.18-30)*

<sup>16</sup> Iin ra tyuvaa tsahan ra tsindacá tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayivi nyito tsa ña cua naa maa?

<sup>17</sup> Tan ra Jesús catyí ra tsihin ra:

—¿Nacuenda catyí un tyin ra vaha cuví yu? Intuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñí un coo un ñayivi tsa ña cua naa maa, javaha tandihí tuhun tsa tsahá Nyoo tyin javaha yo —catyí ra tsihin ra.

<sup>18</sup> Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña çahñi un nyivi. Ña ço inga ñaha tsi un. Ña sùhu un tsa tsi nyivi. Ña çahan un cuendu siqui nyivi.

<sup>19</sup> Tyaa yahvi tsi jutu un tan tsi sihi un. Tan cuñi tsi nyivi, tumaa tsa cuñi un tsi maa un.

<sup>20</sup> Tan ra tyuvaa can, catyí ra tsihin ra:

—Tandihí maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañi tsi yu?

<sup>21</sup> Tan ra Jesús catyí ra tsihin ra:

—Tatun cuñi un tsa iin ndaha ñi cuví un iin ra cuiti nuu Nyoo, cuahan tan xico un tsa iyó tsi un, tan cuhva un tsi nyivi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

<sup>22</sup> Maa tyin cuhva tsa tsiñi ra tyuvaa can tsa çahan ra Jesús tsihin ra, cuihva xaan cuñi ra cuví tan cuanuhu ra tyin cuca xaan ra.

<sup>23</sup> Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yií xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

<sup>24</sup> Catyí yu tsihin ndo inga tsaha, tyin vasu yií xaan yaha iin camellu xuu iin yiqui tucu, maa tyin yií xaan ca tsa quihvi iin nyivi cuca nu ndacá ñaha Nyoo —catyí ra Jesús.

<sup>25</sup> Tsa tsiñi ra tsicá tsihin ra Jesús tsa çahan ra, iyo xaan cuñi ra naha, tan quit-sahá tsicá tuhun tahan ra naha, tan catyí ra naha:

—Tun tacan, yoñi cua cuví cacu

<sup>26</sup> Tacan tan nanyehé ra Jesús nu nyecú ra naha tan catyí ra:

—Nyivi ña cuví javaha ñi yacan, maa tyin Nyoo cuví javaha ra tandihí.

<sup>27</sup> Tacan tan quitsahá çaahán ra Pedro tsihin ra:

—Jutu Mañi yu, nyuhu tandihí maa tsa iyó tsi ndi nacoq ndi tan nyicun ndi tsi un. ¿Náa cua ñihi ndi? —catyí ra tsihin ra.

<sup>28</sup> Tan nacahan ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihí tsa iyó, yacan cuví quivi cua cunyaa yuhu Rayií tsa quee nda gloria nu tyayu sii xaan caá tan cua cundaca ñaha yu. Tan nyooho tsa nyicun tsi yu, cua cunyecu ndihí ndo nu utsi uvi taahan tyayu sii caá. Tan cua cundaca ñaha ndo tsi tandihí nyivi cuví tata tsa utsi uvi taahan sehe ra Israel.

<sup>29</sup> Tan tandihí nyooho tan tandihí inga nyivi tsa nacoq vehe, o yafiñi ñi, o cuhva ñi, o jutu ñi, o sihi ñi, o ñasihí ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayivi nyito tsa ña cua naa maa coo ñi.

<sup>30</sup> Cuaha xaan nyivi cuahán ityi nuu vityin, ñi ican cua cuhun nu ndihí ña. Tan cuaha xaan nyivi cuahán nu ndihí vityin, ñi ican cua cuhun ityi nuu.

## 20

*Nu jacuahá ra Jesús iin cuhva cuenda ra jahá tyiñu*

<sup>1</sup> Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quitá ra cuahán ra cuanducú ra musu jaha tyiñu nu tyiñu jahá ra.

<sup>2</sup> Tan ndooq ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra.

<sup>3</sup> Yahá can tan cuahán ra inga tsaha cuhva caa iin tsa tuvi. Tan nyehé ra tsi juhva ca ra yucú taxin nuyahvi can.

<sup>4</sup> Tan catyí ra tsihin ra naha: “Cuahan ndihí tucu nyooho jaha tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihí tucu ra can naha ra.

<sup>5</sup> Tan tsitoho cora can quitá ra inga tsaha tsa ora. Tan juvin ñi musu nducú ra. Tan caa uñi tsa tseñi, quitá ra inga tsaha nducú ra musu.

<sup>6</sup> Yahá can tan quitá nyico ra caa uhun tsa tseñi tan nyehé ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.”

<sup>7</sup> Tan nacahan ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuahan ndihí ndo jaha tyiñu ndo nu tyiñu jahá yu. Tan

tyahvi maa yu tsi ndo nácaa taahán tsi tsi ndo”, catyí ra.

<sup>8</sup>Tan cuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvî nu ndihi naha ra, tan nu cua ndihi tan tyahvi un tsi ra tsa quihvî tsa jihna ñi naha ra”, catyí ra.

<sup>9</sup>Tacan tan tsaq ra tsa quihvî caa uhun tsa tseñi can naha ra. Tan intuhun intuhun ra naha quihñ ra naha yahvi nanhi iin quivi.

<sup>10</sup>Yahā can, tan cuhva tsa tahān tsi tsi ra tsa quihvî tsa jihna ñi can naha ra, cuñi maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihñ ra naha.

<sup>11</sup>Tan cuhva tsa quihñ ra naha, quitsaha caahán ra naha tsi tsitoho tyiñu can.

<sup>12</sup>Tan catyí ra naha: “Ra tsa tsaq nu ndihi ihya naha ra, intuhun ñi hora jahā tyiñu ra naha. Tan iin ñi yahvi tyahvî un tsi ra naha tsihin tucu nyuhu tan nduvi nduvi jahā tyiñu ndi nu ihñi”, catyí ra naha.

<sup>13</sup>Maa tyin nacahan tsitoho tyiñu can, tan catyí ra tsihin iin ra can: “¡Tsaal, nduve tsa ña vaha javahā yu tsihin un. ¿A ñavin yahvi tsa iin quivi ndoo yo tuhun tyin cua tyahvi yu tsi un?”

<sup>14</sup>Quihin yahvi un, tan cūanuhu. ¿A nduve ndatu iyó tsi yu tsa tyahvi yu tsi ra tsa quihvî nu ndihi iin ñi cuhva tsa tyahvî yu tsi yooho?

<sup>15</sup>¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra.

<sup>16</sup>Tacan nyivi quihvî nu ndihi, cuhun ñi ityi nuu. Tan nyivi cuahán ityi nuu, nda nu ndihi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

*Inga tsaha jacotó ra Jesús cuhva cua cahñi nyivi tsi ra*

(Mr. 10.32-34; Lc. 18.31-34)

<sup>17</sup>Cuhva tsa cuñi cuhun ra Jesús nda ñuu Jerusalén, canā sñn ra tsi tsa utsi uvi ra tsicá tsihin ra tan catyí ra tsihin ra naha:

<sup>18</sup>—Nyehe ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyí ra naha tyin taahán tsi cúu yu.

<sup>19</sup>Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyí ra Jesús tsihin ra naha.

*Nu tsicán sihi ra Jacobo tan ra Juan iin tumañi iñi tsi ra Jesús*

(Mr. 10.35-45)

<sup>20</sup>Tacan tan ñasihi ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra.

<sup>21</sup>Tan tsicā tuhun ra Jesús tsi ña tan catyí ra:

—¿Náa cuñi un?

Tan catyí ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin ra.

<sup>22</sup>Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsihi tuma cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

<sup>23</sup>Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tuma cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yoo cua cuhva ra can —catyí ra Jesús tsihin ra naha.

<sup>24</sup>Tan tsa tsiiñ tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra.

<sup>25</sup>Maa tyin canā ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha.

<sup>26</sup>Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihi nyooho.

<sup>27</sup>Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha.

<sup>28</sup>Tumaa yuhu, Rayi tsa quee nda gloria, ña vatsi yu tyin jatynyee nyivi tsi yu. Maa tyin yuhu vatsi yu vatsi jatynyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihi ñi.

*Nu janduvahā ra Jesús tsi uvi taahan ra cuaa*

(Mr. 10.46-52; Lc. 18.35-43)

<sup>29</sup>Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha.

<sup>30</sup>Tan yuhu ityi can nyecú uvi taahan ra cuaa. Tan cuhva tsa tsiiñ ra naha tyin cua



yaha ra Jesús, quitsahá caná tsaá ra naha. Tan catyí ra naha:

—¡Jutu Mañi yu, tata ra David, cundaahvi ñi tsi ndi! —catyí ra naha.

<sup>31</sup> Tan nyívi quitsahá caahán ñi tsihin ra naha na casi ra naha yuhu ra naha. Maa tyin ñihi ca caná tsaá ra naha:

—¡Jutu Mañi yu, tata ra David, cundaahvi ñi tsi ndi!

<sup>32</sup> Tacan tan tsicuiñi ra Jesús tan caná ra tsi nduvi taahan ra cuaa can, tan tsicá tuhun ra tsi ra naha tan catyí ra:

—¿Náa cuñi ndo javaha yu tsi ndo?

<sup>33</sup> Tan nacahan ra naha tan catyí ra naha:

—Jutu Mañi yu, jananyehe tsi ndi.

<sup>34</sup> Tacan tan cundaahvi ñi ra Jesús tsi ra naha, tan tijn ra tinuu ra naha. Tan iin yaha ñi nanyehé ra naha, tan cuiti cuanyicún ndihi ra naha tsi ra Jesús.

## 21

*Nu cuahán ra Jesús ñuu Jerusalén  
(Mr. 11.1-11; Lc. 19.28-40; Jn. 12.12-19)*

<sup>1</sup> Tsa cua tsaá ra naha ñuu Jerusalén, tan tsaá ra naha ñuu Betfagé, yatyin ñi yucú Olivo nu iyó yutun olivo. Tacan tan tavá tyiñu ra Jesús tsi uvi ra tsicá tsihin ra.

<sup>2</sup> Tan catyí ra tsihin ra naha:

—Cuaahan ndo ñuu tsa canyí ityi nuu ihya. Tan ican cua ñihi ndo iin urru síhi, nu-uhñi ti. Tan ndacá ti iin urru luhlu. Ndátsi ndo tsi ti, tan quítsi ndaca ndo tsi ti naha ti tsi yu.

<sup>3</sup> Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quítsi ndaca nyico ndi tsi ti naha ti”, catyí ndo tsihin ñi —catyí ra.

<sup>4</sup> Tacan cuví tyin cundaa tsa cahan ra cuví ndusu yuhu Jutu Mañi yo tahan tsanaha nu catyí ra tyehen:

<sup>5</sup> Cahan ndo tsihin nyívi ñuu Sión:  
“Nyehé ndo, vatsí rey ndo nu iyó ndo. Ndaahvi ñi vatsí ra yosó ra iin urru luhlu, sehe iin quiti tsa tuhvá nyisó carga”, catyí ra cuví ndusu yuhu Nyoo can.

<sup>6</sup> Tacan tan cuahán ra tsicá tsihin ra Jesús, tan javahá ra naha tumaa tsa cahan ra tsihin ra naha.

<sup>7</sup> Quítsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti.

<sup>8</sup> Tan cuaha xaan nyívi tsaquín ñi jahma ñi nu ñuhu yu nu cuahán ra, tan inga ñi tsahnya ñi ndaha yutun tsaquín ñi tsitsi ityi.

<sup>9</sup> Tan nyívi tsa cuahán ityi nuu tan ityi tsata, quitsahá caná tsaá ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquítsi Jutu

Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

<sup>10</sup> Cuhva tsa tsaá ra Jesús ñuu Jerusalén can, tandihi maa nyívi ñuu quitsahá cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

<sup>11</sup> Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

*Nu tavá ra Jesús tsi nyívi xicó tsitsi vehe ñuhu cahnu*

*(Mr. 11.15-19; Lc. 19.45-48; Jn. 2.13-22)*

<sup>12</sup> Yahá can tan quihvi ra Jesús tsitsi vehe ñuhu cahnu Nyoo. Tan tavá ra tsi tandihi nyívi jatá tan xicó ican. Tan janduvá ra mesa nu nasamá ñi xuhun. Tan janduvá ra tyayu nu xicó ñi paloma.

<sup>13</sup> Tan catyí ra tsihin nyívi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduví ndo vehe ihya, vehe ñasuhu —catyí ra tsihin ñi.

<sup>14</sup> Tan tsa tsito juhva ra cuaa tan ra coxo naha ra tyin nyii ra Jesús tsitsi vehe ñuhu cahnu, quihvi ra naha tan janduvahá ra Jesús tsi ra naha.

<sup>15</sup> Tan nyehé ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsaá tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaán ra naha tsa tsiñi ra naha tsa caahán tsa nyihi can.

<sup>16</sup> Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahan ra Jesús tan catyí ra:

—Tsiñi yu. Maa tyin ¿a ñaha ca cahvi nyooho nu tutu Nyoo nu catyí tsi tyehen? Jutu Mañi yu, tsa nyihi tan lee tsa ndi tyaxín síi xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

<sup>17</sup> Tacan tan nacoó ra tsi ra naha, tan quita ra ñuu can cuahán ra ñuu Betania. Tan ican ndoo ra tsacuaa can.

*Nu cahan ra Jesús tsi yutun higo tsa ña tshá tsiti*

*(Mr. 11.12-14, 20-26)*

<sup>18</sup> Tan tsa tuvi cuiñi ñi inga quívi can, vatsí nyico ra Jesús nda ñuu Jerusalén, tan tsaá soco tsi ra.

<sup>19</sup> Tan nyehé ra nyaá iin yutun higo yatyin ñi yuhu ityi can. Tan natuhvá ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun.

<sup>20</sup> Tan tsa nyehe ra tsicá tsihin ra tsa javahá ra tsi tun, iyo xaan cuñi ra naha, tan tsicá tuhun ra naha tsi ra tan catyi ra naha:

—¿Nacuenda tsa numi xaan na ityi yutun higo can?

<sup>21</sup> Tan nacahan ra Jesús tan catyi ra:

—Tsa nditsa catyi yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyooho, tyin cuví ndihi tucu catyi ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi.

<sup>22</sup> Tan tandihi tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyi ra Jesús.

*Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi*

(Mr. 11.27-33; Lc. 20.1-8)

<sup>23</sup> Yahá can tan quihvi ra Jesús tsitsi vehe ñuhu cahnu, tan tsitsi tsa jacuahá ra ican, natuhvá ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyi ra naha:

—¿Yóo tava tyiñu tsi un tsa javahá un tyehen? —catyi ra naha.

<sup>24-25</sup> Tan nacahan ra Jesús tan catyi ra:

—Yuhu tucu cuñi yu ndaca tuhun yu tsi nyooho. ¿Yóo jaquitsi tsi ra Juan tyin jacondutya ra tsi nyivi? ¿A Nyoo jaquitsi tsi ra, o nyivi? Tatun catyi tuhun ndo tsihin yu, cua catyi tuhun tucu yuhu tsihin ndo yóo tava tyiñu tsi yu tsa javahá yu tyehen —catyi ra Jesús tsihin ra naha.

Tacan tan ra ican naha ra quitsaha caahán yuhu tahan ra naha, tan catyi ra naha:

—Tatun catyi yo tyin Nyoo jaquitsi tsi ra Juan, cua catyi ra tsihin yo: “Tun tacan, ¿nacuenta ña tsinú iñi ndo tsi ra?”

<sup>26</sup> Tan tatun catyi yo tyin nyivi jaquitsi tsi ra, yuuhvi yo coto cuxaan nyivi tsi yo, tyin tandihi ñi tsinú iñi ñi tyin ra Juan, cuando Nyoo cahan ra —catyi ra naha.

<sup>27</sup> Tacan tan catyi ra naha tsihin ra Jesús:

—Ña tsitó ndi.

Tacan tan ra Jesús catyi ra tsihin ra naha:

—Tan ndi yuhu, tan ña catyi tuhun yu tsihin ndo yóo tava tyiñu tsi yu.

*Nu caahán ra Jesús iin cuhva cuando uvi taahan sehe iin rayi*

<sup>28</sup> Ra Jesús catyi ra tsihin ra cumi tyiñu vehe ñuhu naha ra:

—¿Nacaa catyi ndo cuando tsa cua cahan yu ihya? Iin rayi, iyó uvi taahan sehe ra. Tan catyi ra tsihin iin sehe ra: “Cuaahan cua jaha tyiñu nu iyó tyiñu jahá yu.”

<sup>29</sup> Tan nacahan sehe ra tan catyi ra: “¿Ña cuhun yu!” Maa tyin yahá can tan nasama cuhva tsicá iñi ra tan tsahan ra tsijahá tyiñu ra.

<sup>30</sup> Yahá can tan jutu ra cahan ra tsihin inga sehe ra. Tan catyi tucu ra tsihin ra na cuhun ra cujaha tyiñu ra. Tan ra ican numi ñi quihin ra tyiñu tan catyi ra: “Vaha, tyaa, cuhun maa yu.” Maa tyin ña tsahan ra.

<sup>31</sup> Tsitsi tsa nduvi taahan ra can naha ra, ¿ndáa ra javahá tsa cahan jutu ra? —catyi ra Jesús.

Tan nacahan ra naha tan catyi ra naha:

—Ra tsa cahan ra tsihin tsa jihna ñi.

Tan catyi ra Jesús tsihin ra naha:

—Tsa nditsa catyi yu tsihin ndo, tyin nyivi caquiñi tumaa ra tsa tava xuhun cuando ra ndacá ñaha tan ñi sii iñi caca nuu, jihna ca ñi cua quihvi nu ndacá ñaha Nyoo tan ñavin ca nyooho.

<sup>32</sup> Tyin ra Juan, ra jacondutya tsi nyivi, quitsi ra jacuahá ra tsi ndo nácaa taahan tsi coo cuiti ndo, tan nyooho ña tsinú iñi ndo tsi ra. Maa tyin ra tava xuhun naha ra tan ñi sii iñi caca nuu tsinú iñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinú iñi ndo tsi ra.

*Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra*

(Mr. 12.1-12; Lc. 20.9-19)

<sup>33</sup> Tyaa soho ndo inga cuhva ihya: Tsioco iin rayi, tan iyó ñuhu ra. Tan tatsi ra yoho yucu vixi tsa nañi uvas, tan tyihí ra cora. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin cuví jaha cuando ra tandihi.

Yahá can tan tsaha nuu ra ñuhu can tsi juhva ra cua jaha tyiñu naha ra, tan cuahán ra inga ñuu.

<sup>34</sup> Tan tsa tsaá quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahan tsi tsi ra.

<sup>35</sup> Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra.

<sup>36</sup> Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javahá ra naha tsihin ra tsa tsahan jihna naha ra, tacan ñi javahá nyico ra naha tsihin ra ihya naha ra.

<sup>37</sup> Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra.

<sup>38</sup> Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyi ra naha: “Ra ihya cua ndoo tsihin tandihi tsa iyó ihya. Na cahñi yo tsi ra

tan ndoo maa yo tsihin cora ihya”, catyí ra naha.

<sup>39</sup> Tacan tan tñin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

<sup>40</sup> Tacan tan tsicá tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

<sup>41</sup> Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

<sup>42</sup> Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyehen?

Yuu tsa javita ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javaha tandihi can.

Tan iyo xaan cuñi yo nyehé yo, catyí tsi.

<sup>43</sup> Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahá cuhva cuñi ra tyin nditsa tsahá ñi tsi ñi cundaca ñaha ra.

<sup>44</sup> Tan tsa cuenda yuu can, yóo nyivi tsa nduva siqui tsi, cua tahnú cuatyí ñi. Tan tatun yuu can tan canacava tsi siqui yóo nyivi, cua taxin nyihi ñi —catyí ra Jesús.

<sup>45</sup> Cuhva tsa tuví iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahan ra Jesús cuhva ihya,

<sup>46</sup> cuñi ra naha tñin ra naha tsi ra, maa tyin yuuhví ra naha tsi nyivi tyin tsinú iñi ñi tyin ra Jesús caahán ra cuenda Nyoo.

## 22

*Nu cahan ra Jesús iin cuhva cuenda vico tindaha*

(Lc. 14.15-24)

<sup>1</sup> Quitsaha caahán ra Jesús tsihin nyivi inga tsaha tsihin cuhva, tan catyí ra:

<sup>2</sup> —Tsa ndacá ñaha Nyoo tsi nyivi cuví tsi tumaa iin rey tsa javahá iin vico tsa cuenda tsa cua tindaha sehe ra.

<sup>3</sup> Tan jacuhun ra tsi musu ra na cucana ra naha tsi nyivi tsa jacotó ra tyin cuhun ñi, maa tyin ñi ican, ña cuñi ñi cuhun ñi.

<sup>4</sup> Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra.

<sup>5</sup> Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra.

<sup>6</sup> Tan inga ra naha tñin ra naha tsi musu rey can naha ra tan cañi xaan ra naha tsi ra naha nda cuanda tsahñi ra naha tsi ra naha.

<sup>7</sup> Tacan tan ra rey can cuxaagn xaan ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha.

<sup>8</sup> Tacan tan catyí ra rey can tsihin musu ra: “Tandhi tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi.

<sup>9</sup> Cuaahan ndo ityi cahnu tan cana ndo tsi tandihi nyivi tsa nañihi ndo na quitsi ñi vico tindaha”, catyí ra rey can.

<sup>10</sup> Musu can cuahán ra naha tandihi ñi ityi, tan jandu iin ra naha tsi tandihi nyivi nañihi ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

<sup>11</sup> Tacan tan quihvi ra rey can cua nyehé ra tsi tandihi nyivi tsa yucú vico yuvehe ra. Tan nyehé ra tyin nyaá iin ra tsa nduve jahma vico tindaha nditsi.

<sup>12</sup> Tan catyí ra rey tsihin ra: “Tsa, ¿nacuenta nyii un ihya tan nduve jahma vico tindaha nditsi un?” Tan ña nacahan maa ra can.

<sup>13</sup> Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuví nuhu ra”, catyí ra.

<sup>14</sup> Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

*Nu caahán ra Jesús tsa cuenda tsa tyahví nyivi xuhun tsi ra ndacá ñaha nda ñuu Roma (Mr. 12.13-17; Lc. 20.20-26)*

<sup>15</sup> Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuví tyaa ra naha cuatyí siqui ra.

<sup>16</sup> Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehé un tsi nyivi cuca tan nyivi ndaahvi.

<sup>17</sup> ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

<sup>18</sup> Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu?

<sup>19</sup>Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañí denario tsi ra.

<sup>20</sup>Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sívi nyaá ihya?

<sup>21</sup>Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

<sup>22</sup>Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

*Nu cuñi ra cuví saduceo naha ra jandavi ñaha ra naha tsi ra Jesús*

(Mr. 12.18-27; Lc. 20.27-40)

<sup>23</sup>Juvin ñi quívi can juhva ra cuví saduceo naha ra tsahan ra naha nu nyí ra Jesús. Tan ra cuví saduceo can ña tsinú ñi ra naha tsa cua nandoto ndívi quívi tsa cua naa ñuu ñayívi. Yacan cuenda tsicá tuhun ra naha tsi ra Jesús, tan catyí ra naha:

<sup>24</sup>—Maestro, ra Moisés catyí ra tyin tatun iin ra tindaha tan tsihi ra tan ña tsicoo sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi.

<sup>25</sup>Vaha. Tun iin ra tan iyó utsa sehe yí ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi.

<sup>26</sup>Tan juvin ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvin ñi tacan tahañ ndihi ra. Tan inducu ñi tahañ tandihi tsa utsa ra naha.

<sup>27</sup>Tan nu ndihi ña tsihi ndihi maa ñaha can.

<sup>28</sup>Tatun nditsa tsa cua nandoto nyívi tsihi, ¿ndáa tsa utsa taahan ra can naha ra cua cuví yí ña? Tyin tandihi maa ra naha tindaha tsihin ña —catyí ra naha.

<sup>29</sup>Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee ñi tsa iyó tsi Nyoo.

<sup>30</sup>Tyin quívi cua nandoto nyívi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuví ñi tumaa cuví ángel tsa iyó gloria.

<sup>31</sup>Tyin tuhun Nyoo tsahá cuenda tsi nácaa cuví tuhun tsa cua nandoto nyívi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

<sup>32</sup>“Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tsihi ra naha. Tyin

Nyoo ñavin Nyoo cuenda nyívi tsihi cuví ra, tyin Nyoo cuví ra Nyoo cuenda nyívi nyito —catyí ra.

<sup>33</sup>Tan tsa tsiñi nyívi tsa caahán ra Jesús, iyo xaan cuñi ñi.

*Ley tsa ñiñi ca tsa tsaha Nyoo*

(Mr. 12.28-34)

<sup>34</sup>Tsa tsitq ra fariseo naha ra tyin ra Jesús tyasi ra yuhu ra saduceo naha ra, ndu iin ra naha.

<sup>35</sup>Tan iin ra tsa nyii tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsicá tuhun ra tsi ra, tan catyí ra:

<sup>36</sup>—Maestro, ¿ndáa ley cuví tsa ñiñi ca?

<sup>37</sup>Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa ñi ñi un tan tsihin tsa ñi ñi añima un, tan tsihin tandihi tsa tsiñi tuñi jiñi un.”

<sup>38</sup>Ley ihya cuví tsa ñiñi ca, tan tsa jihna ñi taahán tsi javaha yo.

<sup>39</sup>Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñi tsi nyívi tahan un tumaa cuñi un tsi maa un.”

<sup>40</sup>Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahá Nyoo, tan tandihi tuhun tsa jacuaha ra cuví ndusu yuhu Nyoo tahañ tsanaha.

*Ra Cristo cuví ra Sehe Nyoo tan juvin ñi cuví ra tata ra David*

(Mr. 12.35-37; Lc. 20.41-44)

<sup>41</sup>Tsitsi tsa ndi yucú ra fariseo naha ra nu ndu iin ra naha,

<sup>42</sup>ra Jesús tsicá tuhun ra tsi ra naha, tan catyí ra:

—¿Nacaa tsicá ñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahan ra naha tan catyí ra naha:

—Tata ra David cuví ra.

<sup>43</sup>Tacan tan ra Jesús catyí ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

<sup>44</sup>Nyoo cahan tsihin Jutu Mañi yu, ra Cristo, tan catyí ra tsihin ra:

“Cunya xiin cuaha yu nda cuanda caquin yu tsi ra xaan ñi tsi un naha ra tsaha un”, catyí ra David.

<sup>45</sup>¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

<sup>46</sup>Tan yofi maa cuví nacahan nu cahan ra ndi intuhun maa tuhun. Tan nda quívi can, yofi ca maa cuñi nducu tuhun tsi ra.

## 23

*Nu caahán ra Jesús tyin cuaha xaan cu-  
atyí ra maestro cuenda ley vehe ñuhu naha ra  
tan ra fariseo naha ra*

(Mr. 12.38-40; Lc. 11.37-54; 20.45-47)

<sup>1</sup> Tacan tan ra Jesús catyí ra tsihin tandihi nyívi, tan tsihin ra tsicá tsihin ra:

<sup>2</sup> —Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaa ra Moisés.

<sup>3</sup> Yacan cuenda tyaa yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha.

<sup>4</sup> Janducuahá ca ra naha ley tsa tsahá Nyoo tahán tsanaha. Tan cuñí ra naha tsa javaha nyívi tandihi can. Maa tyin ña cunyee ñi javahá ñi tandihi can, tan ndí maa ra naha tan ña cuñí ra naha javaha ra naha can.

<sup>5</sup> Tyin maa ra naha tyaa ra naha caha ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nycú tsi inga ca nyívi. Tan tsinditsi ra naha jahma nañi ca tan ñavin ca tsa iyó tsi inga ca nyívi. Javahá ra naha tandihi can tyin na nyehe nyívi tyin vaha xaan ca ra naha.

<sup>6</sup> Tan nu vaha ca, cuñí ra naha cunyecu ra naha nu iyó vico tan catsi ra naha. Tan nu vaha ca cuñí ra naha cunyecu ra naha tsitsi vehe ñuhu.

<sup>7</sup> Tan nu tsicá nuu ra naha cuñí ra naha tyin cuhva nyívi nacumi tsi ra naha tyin jahá ñi tsa ñayivi tsi ra naha. Tan cuñí tucu ra naha tsa catyí ñi “maestro” tsihin ra naha.

<sup>8</sup> Maa tyin nyoooho, ña cuhva ndo tsa cahan nyívi “maestro” tsihin ndo. Tyin intuhun ñi maa ra Cristo cuví maestro tsa nyívi tsihin ndo, tan tandihi ca maa ra naha yañi ndo cuví tsi ra naha.

<sup>9</sup> Tan ña cahan ndo Jutu ndo tsihin ndí intuhun rayi ñuu ñayivi ihya, tyin intuhun ñi ra nyaá gloria cuví Jutu ndo.

<sup>10</sup> Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo.

<sup>11</sup> Ra tsa jahá tyiñu tyiñu tandihi ca ra naha, ra ican cuví ra cahnu ca nu yucú ndo.

<sup>12</sup> Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

<sup>13</sup> Ndahvi nyoooho ra cuví maestro cuenda ley vehe ñuhu tan nyoooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyívi. Tan ndí

maa ndo ña quihvi ndo, tan ndí ña tsahá ndo tsa quihvi nyívi tsa cuñí quihvi.

<sup>14</sup> Ndahvi nyoooho ra cuví maestro cuenda ley tan nyoooho ra cuví fariseo. Jahá ndo tyin vaha xaan ndo, tan ña nditsa! Iyo ña caahán tucu ndo cua ndacan tahvi ndo tsi Nyoo nu tuvi nyívi tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahvi tsa tsihí yí tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

<sup>15</sup> Ndahvi nyoooho ra maestro cuenda ley vehe ñuhu tan nyoooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñí ndo nañihi ndo vasu intuhun nyívi cunyicun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

<sup>16</sup> Ndahvi nyoooho ra ndaahvi! Tyin cuñí ndo jaquihin ityi ndo tsi nyívi, ¡maa tyin cuaa ndo! Caahán ndo tyin yó nyívi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo.

<sup>17</sup> Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan ca, a vehe ñuhu tsa jandu íi tsi xuhun cuaan can?

<sup>18</sup> Tan juvin ñi catyí tucu ndo tyin yó nyívi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyí ndo.

<sup>19</sup> Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañi ndo nu altar can, o maa altar tsa jandu íi tsa jamañi ndo?

<sup>20</sup> Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihi tsa yosó nu altar can.

<sup>21</sup> Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

<sup>22</sup> Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

<sup>23</sup> Ndahvi nyoooho ra cuví maestro cuenda ley vehe ñuhu tan nyoooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa

iin iin utsi, tan tsahá ndo tsi Nyoo. Maa tyin ña tyaá yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandihí nyívi, tsa cundaahvi iñi yo tsi ñi, tsa tsinú iñi yo tsi Nyoo tan ña nacao yo tsi ra. Cuñi tsi javaha ndo tandihí can, tan ña cua jandihí ndo tsa kuhva ndo diezmo can.

<sup>24</sup> Nyooho ra cuaa, cuñi ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihí ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

<sup>25</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo.

<sup>26</sup> ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndo ndihí ityi tsata.

<sup>27</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihí nuu tsa caquiñi.

<sup>28</sup> Tacan cuví nyooho, tyin cuñi nyívi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihí tsa caquiñi ndo.

<sup>29</sup> ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuí ndo ñaña ra cuví ndusu yuhu Nyoo, tan nacahyi ndo ñaña nyívi vaha tsicoq̄ tahān tsanaha.

<sup>30</sup> Tacan tan catyí ndo: “Tun tsatyin tsicoq̄ yo quívi tsicoq̄ tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo.

<sup>31</sup> ¡Tsihin yacan ñi tan nacoató ndo tyin cuví ndo tata nyívi tsahñi tsi ra cuví ndusu yuhu Nyoo!

<sup>32</sup> ¡Yacan vityin nyehé maa ndo na jaha ndo, javaha ndihí ndo tsa javahá tsii tsaahnu ndo, tun cuñi ndo!

<sup>33</sup> ¡Nyooho nyívi caquiñi cuví ndo, tan nyívi cuví tata coo! ¿Nacaa cua cacu ndo tan ña cua cuhun ndo anyaya? Ña cua cuví.

<sup>34</sup> Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyooho cua

cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu.

<sup>35</sup> Yacan cuenda, tsata nyooho cua cunyaa cuatyí tsa cuenda tandihí ra vaha tsa tsahñi tsii tsaahnu ndo nda cuanda tsihi ra Abel tan nda cuanda quívi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo.

<sup>36</sup> Tsa nditsa catyí yu tsihin ndo, tyin tandihí cuatyí can cua coso siqui nyooho, nyívi tsa iyó vityin —catyí ra Jesús tsihin ra naha.

*Nu nducuihyá cuñi ra Jesús nyehé ra tsi nyívi ñuu Jerusalén*

(Lc. 13.34-35)

<sup>37</sup> ¡Ñuu Jerusalén! ¡Ndahvi nyooho nyívi ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndívi siihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo.

<sup>38</sup> Nyehé ndo vityin, tyin tsa nacoq̄ ihñi Nyoo tsi ndo.

<sup>39</sup> Tan catyí yu tsihin ndo, tyin ña cua nyehé ca ndo tsi yu nda cuanda quita quívi tsa cua catyí ndo tyin cahnu xaan cuví ra vatsí tsihin sivi Nyoo Jutu yo —catyí ra Jesús.

## 24

*Nu caahán ra Jesús tyin cua tani vehe ñuhu cahnu*

(Mr. 13.1-2; Lc. 21.5-6)

<sup>1</sup> Quitá ra Jesús tsitsi vehe ñuhu cahnu can, tan tsa cuñi cuhun ra, tan natuhvā ra tsicá tsihin ra nu nyaá ra, tan quitsahā caahán ra naha cuhva caá vehe ñuhu can tsihin ra.

<sup>2</sup> Maa tyin nacahān ra Jesús tan catyí ra:

—¿A nyehé ndo tandihí tsa iyó ihya? Tsa nditsa catyí yu tsihin ndo, tyin ihya ndi intuhun ca yuu tan ña cua coso tsata inga tsi. Tandihí maa can tan cua tani —catyí ra.

*Nu caahán ra Jesús náa cua cuví tsa ndi cumañi ca naa ñuhu ñayivi*

(Mr. 13.3-23; Lc. 21.7-24; 17.22-24)

<sup>3</sup> Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahān ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñi ndi tsa catyí tuhun un tsihin ndi, ama cua cuví tandihí tsa cahān un. ¿Nacaa tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

<sup>4</sup> Tacan tan nacahān ra Jesús:

—Jaha vaha ndo cuenda coto jandavi ñaha nyivi tsi ndo.

<sup>5</sup> Tyin cuaha xaan ra cua quitsi, tan cua cutyiñu ra naha sivi yu, tan cua catyi ra naha: “Yuhu cuvi ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha.

<sup>6</sup> Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi.

<sup>7</sup> Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi.

<sup>8</sup> Tandihí yacan cua cuvi nu ndi cua quit-saha nyehe nyivi tundoho.

<sup>9</sup> Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

<sup>10</sup> Quivi can cuaha xaan nyivi cua jaña ñi tsa tsinú ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi.

<sup>11</sup> Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha.

<sup>12</sup> Tan cuaha xaan tsa caquiñi cua coo. Yacan cuenda cua jandihí ñi tsa cuñi tahan ñi tsi ñi.

<sup>13</sup> Maa tyin nyivi tsa tsinú ñi tsi yu nda cuanda nu ndihí, tan ña cua ndu uvi ñi ñi, cua cacu ñi.

<sup>14</sup> Tan tanií cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

<sup>15</sup> Ra Daniel, ra cuvi ndusu yuhu Nyoo, tyag ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu li, (nyooho tsa cahvi, na cutuñi ñi ndo).

<sup>16</sup> Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu.

<sup>17</sup> Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi.

<sup>18</sup> Tan nyivi yucú tsitsi cuhu ña cua cunuhu jihna ñi cunaquiñin ñi jahma ñi.

<sup>19</sup> Jndahvi ñiñaha tsa ñuhú sehe quivi can! O tatun iyó sehe ñi tsa tyaxín, jndahvi ñi can!

<sup>20</sup> Ndagan ndo tsi Nyoo na ña tahan tsi cunu ndo quivi vitsin, tan ndi quivi quitatú yo.

<sup>21</sup> Tyin tundoho tsa cua nyehe nyivi quivi can, ñaha ca maa coo can nda quivi tsa tsinú

ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha.

<sup>22</sup> Tyin tatun ña cua janducuiti Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñi ra tsi nyivi nacatsi maa ra.

<sup>23</sup> Tatun yóo cua cahan tsihin ndo: “Jihna ndo, ihya nyaá ra Cristo” o “Nyehe ndo, ndacan nyaá ra Cristo”, ña tsinu ñi ndo.

<sup>24</sup> Tyin cua quitsi ra jandavi ñaha naha ra tan cua catyi ra naha tyin ra Cristo cuvi ra naha. Cua catyi ra naha tyin ndusu yuhu Nyoo cuvi ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyin cuvi jaha ra naha.

<sup>25</sup> Vaha tyin tsa tsitó ndo vityin ihya, jaha ndo cuenda tsi ndo quivi can.

<sup>26</sup> Yacan cuenda tatun catyi nyivi tsihin ndo: “Nyehe ndo, va ra Cristo nyii nu tsiqui can”, Ña cuhun ndo. O tatun catyi ñi tsihin ndo: “Nyehe ndo, nyii ra tsitsi cuarto ihya”, ña tsinu ñi ndo.

<sup>27</sup> Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayii tsa quee nda gloria.

<sup>28</sup> Tumaa nataká nditsii nu cayucú tsa ñi, tacan cua nataka nyivi yihí cuenda yu quivi quitsi yu inga tsaha.

*Nacaa cua quitsi Rayii tsa quee nda gloria inga tsaha*

(Mr. 13.24-37; Lc. 21.25-33; 17.26-30, 34-36)

<sup>29</sup> Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihí tsa iyó andivi cua nacanda.

<sup>30</sup> Tacan tan cua quituvi seña ityi andivi tyin vatsi yuhu Rayii tsa quee nda gloria. Cua quitsi yu nu vico ityi andivi tsihin tunyee ñi cahnu tan tsihin tsa cahnu cuvi Nyoo. Tan tandihí nyivi iyó nu ñuhu ñayivi, cua vacu tsaa xaan ñi tsa cua nyehe ñi tsi yu.

<sup>31</sup> Tan cuaha ángel cuenda yu cua jaquitsi yu tyin ñihi cua tiví ra naha cutu tan cua jandu iin ra naha tsi nyivi nacatsi maa Nyoo. Cua quita ñi tanií cahnu nu ñuhu ñayivi, nda cuanda nu ndihí ñuhu ñayivi tan nda cuanda nu ndihí andivi.

<sup>32</sup> Cutuñi ñi ndo iin cuhva yutun tsa nañi higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun.

<sup>33</sup> Tan juvin ñi tacan, tatun tsa cuvi tandihí yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehé cuvi tsi.

<sup>34</sup> Tsa nditsa catyi yu tsihin ndo tyin tandihí yacan cua cuvi jihna, tsa ndi cumañi ca cúu nyivi iyó nu ñuhu ñayivi.

<sup>35</sup> Tan coo quivi cua cunaa andivi tan tsihin ñuhu ñayivi, maa tyin tuhun caahán yuhu, ña cua cundihi tsi tyin cua cundaa tandihi tsi.

<sup>36</sup> Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

<sup>37</sup> Tumaa cuvı quivi tsa tsicoo ra Noé, tacan cua cuvi quivi tsa cua quitsi nyico yuhu Rayı tsa quee nda gloria.

<sup>38</sup> Quivi tsa ndi cumañi ca cuun savi xaan, nyivi can, tsatsı ñi, tsihi ñi, tindahá ñi, tan tsahá ñi tsi sehe sıhi ñi tindaha nda cuanda quivi quihvi ra Noé tsitsi yutun ndoo.

<sup>39</sup> Tan sana iñi ñi tan tsaq savi tan tañı tandihi ñi. Tan tacan sana iñi ñi tan cua tahan tsi quivi quitsi nyico yuhu Rayı tsa quee nda gloria.

<sup>40</sup> Tan tatun yucú uvi taahan rayı tsitsi cuhu quivi can, intuhun ñi ra cua quihin yu, tan cua nacoo yu tsi inga ra.

<sup>41</sup> Tan quivi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña.

<sup>42</sup> Cıatu vaha ndo tyin ña tsitó ndo náa hora cua quitsi ra ndacá ñaha tsi ndo.

<sup>43</sup> Tan coto ndo tuhun ihya tyin tatun iin tsitoho vehe tan tsitó ra náa cuhva cua quihvi ñasuhu tsitsi vehe ra, cua cıatu vaha ra tan ña cua cuhva ra tsa quihvi ñasuhu can.

<sup>44</sup> Yacan cuenda nyooho, cıatu vaha ndo. Tyin sana iñi ndo, tan cua quitsi nyico yuhu Rayı tsa quee nda gloria.

*Musu vaha tan musu ña vaha  
(Lc. 12.41-48)*

<sup>45</sup> Musu tsa tyaá soho tsa caahán tsitoho ra, juvin ra cuvi musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihi ca musu.

<sup>46</sup> Tan sıi xaan cuñi ra cuvi musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihi tsa taahán tsi ica ra.

<sup>47</sup> Tan tsa nditsa catyı yu tsihin ndo, tyin tsitoho ra cua nacuhva ra tandihi cuii tsa cumı ra, cua quihvı ndaha ra, tyin vaha tyaá yahvi ra tsihin tyiñu jahá ra.

<sup>48</sup> Maa tyin iin musu ña vaha tsicá iñi ra tyin cua cucuee tsitoho ra.

<sup>49</sup> Tacan tan quitsaha cañi ra tsi inga musu, tan tsatsı ra tan tsihi ra nyixi tsihin ra tsiñi naha ra.

<sup>50</sup> Tacan tan sana iñi ra tan cua tsa tsitoho ra quivi tsa ña ndatú ra tsi ra, tan hora tsa ña tsitó ra.

<sup>51</sup> Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyivi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuvi musu

ñi vaha can tan cahyu ña cua cuvi nuhu ra tsa nyehé ra tundoho.

## 25

*Nu cahan ra Jesús iin cuhva cuenda utsi taahan ñaha yoco*

<sup>1</sup> Tsa ndacá ñaha Nyoo tsi nyivi cuvi tsi tumaa utsi taahan ñaha yoco tsa quihın lámpara tsa yihı acetye tan cuahán ñi iin vico tindaha tyin cua jatahan ñi tsi ra tsa cua tindaha.

<sup>2</sup> Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi.

<sup>3</sup> Ñi tsa soho ñuhú iñi can, nyisó ñi lámpara ñi maa tyin ña quihın ñi juhva ca acetye tsa natyihı ñi tsitsi lámpara ñi tatun ndihi tsi.

<sup>4</sup> Tan ñi tsa catsi tsicá iñi can, nyisó sıin ñi inga yutyı acetye tsa cua natyihı ñi tsitsi lámpara can tatun ndihi acetye tsa yihı tsitsi lámpara can.

<sup>5</sup> Tan ra tsa cua tindaha can cucuee xaan ra, tacan tan tıjn ñumaahna tsi tandihi ñi, tan quixı ñi.

<sup>6</sup> Tacan tan maa ñuu tsiñı ñi iin ndusu tsa catyı tyehen: “ıTsa vatsı ra tsa cua tindaha! ıQuita ndo, jatahan ndo tsi ra!”

<sup>7</sup> Tandihı ñi can nduvıtá ñi tan quitsahá janduvahá ñi lámpara ñi.

<sup>8</sup> Tacan tan quitsahá caahán tsa uhun ñi soho ñuhú iñi can tsihin inga uhun ñi can tan catyı ñi: “Cuhva ndo juhva acetye ndahá ndo tsi ndi, tyin cuñı ndahva lámpara ndi”, catyı ñi.

<sup>9</sup> Maa tyin ñi yoco tsa catsi tsicá iñi can nacahan ñi tyehen: “Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo cıjata ndo nu cuyahvı tsi.”

<sup>10</sup> Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaq ra tsa cua tindaha can. Tan ñi yoco tsa ndatú vaha can, quihvı ñi tsihin ra tsitsi vehe nu cua coo vico tindaha. Tan tsicundası yu-vehe can.

<sup>11</sup> Yahá can tan tsaq nyico ñi soho ñuhú iñi can, tan catyı ñi: “ıYooho tata! ıNuña yuvehe na quihvı ndi!”, catyı ñi.

<sup>12</sup> Maa tyin maa ra nacahan ra, tan catyı ra: “Tsa nditsa catyı yu tsihin ndo tyin ña nacotó yu tsi ndo.”

<sup>13</sup> Tacan tan quitsahá caahán ra Jesús:  
—Cıatu vaha ndo, tyin ña tsitó ndo ndaa quivi tan náa hora cua quitsi nyico yuhu Rayı tsa quee nda gloria.

*Nu caahán ra Jesús tsihin yo na jaha tyiñu yo tsihin tsa tsahá Nyoo tsi yo  
(Lc. 19.11-27)*

<sup>14</sup> Tsa ndacá ñaha Nyoo tsi nyivi cuvi tsi tumaa iin rayı tsa nyaá cua quita cuhun



inga ñuu nu cañi. Tan cana ra tsi musu ra, tan tsaha cuenda ra xuhun ra tsi ra naha tyin jaha cuenda ra naha.

<sup>15</sup> Iin ra tsaha ra uhun mil xuhun, tan inga ra tsaha ra uvi mil xuhun, tan inga ra tsaha ra iin mil. Tsaha ra tsi intuhun intuhun ra naca cuhva tsito ra jaha tyiñu ra naha tan cua nandaa siqui xuhun can. Tacan tan cuahan ra.

<sup>16</sup> Musu tsa quihin uhun mil xuhun can, ñihi jaha tyiñu ra tsihin xuhun can, tan jaha canaa ra inga uhun mil ca siqui tsi.

<sup>17</sup> Tan juvin ñi tacan tucu ra tsa quihin uvi mil can, jaha canaa ra uvi mil ca tsihin xuhun can.

<sup>18</sup> Maa tyin ra tsa quihin intuhun ñi mil can, tsahan ra tan tsatyā ra iin yavi tsitsi ñuhu tan tyihj xeehe ra xuhun tsitoho ra.

<sup>19</sup> Cuaha quivi yaha tan tsaā nyico tsitoho musu can. Tan quitsaha natavá cuenda ra tsihin intuhun intuhun ra naha.

<sup>20</sup> Jihna ca ra tsa quihin uhun mil xuhun can tsaā, tan nacuhva cuenda ra uhun mil ca siqui can, tan catyí ra: “Taa, uhun mil tsaha un tsi yu, juhun inga uhun mil ihya tsa jaha canaa yu siqui tsi.”

<sup>21</sup> Tan tsitoho ra catyí ra tsihin ra: “Vaha. Iin musu vaha xaan cuví un. Tan javaha un tandihi tsa cahān yu tsihin un. Luxu ñi xuhun tsaha yu tsi un tan vaha xaan tsatyñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan sii cuñi un tsihin yu.”

<sup>22</sup> Yaha can tan tsaā musu tsa quihin uvi mil xuhun can, tan catyí ra: “Taa, uvi mil ñi tsaha un tsi yu, juhun uvi mil ca ihya tsa jaha canaa yu siqui tsi.”

<sup>23</sup> Tan catyí tsitoho ra tsihin ra: “Vaha. Iin musu vaha xaan cuví un, tan javaha un tandihi tsa cahān yu tsihin un. Luxu ñi xuhun tsaha yu tsi un tan vaha xaan tsatyñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan sii cuñi un tsihin yu”, catyí ra.

<sup>24</sup> Tan cuhva tsa tsaā musu tsa quihin intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihin un xuhun nu ña jahá tyiñu un, tan cuñi un naquihin un cosecha nu ña tatsj un.

<sup>25</sup> Yacan cuenda nayuhvi yu tan tsahan yu tan tyihj xeehe yu xuhun un tsitsi ñuhu. Juhun xuhun ihya tsa tsaha un tsi yu”, catyí ra.

<sup>26</sup> Tacan tan nacahan tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihin yu nu ña jahá tyiñu yu, tan quihín yu cosecha nu ña tatsj yu,

<sup>27</sup> ¿Náca tyin ña tsityihj un xuhun yu nu banco? Tun tsatyin tacan javaha un, tsa cua quitsi nyico yu cuví naquihin yu xuhun can

tsihin xuhun siqui tsa jahā canaa tsi”, catyí ra.

<sup>28</sup> Tacan tan quitsaha caahan ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cūhva ndo tsi ra tsa ndahá utsi mil.

<sup>29</sup> Tyin nyivi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuenda ndoo ca. Maa tyin nyivi tsa ña cuñi jaha tyiñu tsihin tsa tsahá yu, nda cuenda tsa luxu tsa cumí ñi, cua quihin nyaa ndihi yu.

<sup>30</sup> Tan musu tsa ña tsiñi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaa ra, tan cahyu ña cua cuví nuhu ra tsihin tsa nyehé ra tundoho.”

*Nu cahān ra Jesús tyin cua cutuñi tandihi tyivi*

<sup>31</sup> Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu sii caá tan cua cundaca ñaha yu.

<sup>32</sup> Tandihí cuí nyivi iyó nanií cahnu nu ñuhu ñayivi cua nataka ñi nuu yu. Tan cua natava siin yu tsi intuhun intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo.

<sup>33</sup> Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu.

<sup>34</sup> Tacan tan yuhu tsa cuví yu Rey cua catyí yu tsihin nyivi nyecú tsiyo cuaha yu: “Ñaha nyooho nyivi tsa nasoco Jutu yu. Na quihin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javaha ra ihya quivi javaha ra ñuhu ñayivi.

<sup>35</sup> Tyin quivi tsiyoco yu, nyooho tsaha ndo tsa tsatsj yu. Quivi na ityi ñi yu, tsaha ndo ndutya tsih yu. Tan quivi tsicā nuu yu cuví yu ra inga ñuu, tsaha ndo nu quixj yu.

<sup>36</sup> Quivi cumañi jahma yu, tsaha ndo jahma tsinditsj yu. Quivi cuhvj yu, tsinyehé ndo nu canyij yu. Tan quivi tsinyij yu vehe caa, tsinyehé ndo nu nyii yu”. Tacan cua cahān yu tsihin ñi.

<sup>37</sup> Tan ñi tsa vaha ñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehé ndi tsisoco un, tan tsahā ndi tsa tsatsj un? ¿Ama nyehé ndi na ityi ñi un tan tsahā ndi tsa tsih un?

<sup>38</sup> ¿Ama nyehé ndi tsi un tsicā nuu un cuví un ra inga ñuu tan tsahā ndi vehe nu quixj un? ¿Ama cumañi jahma un, tan tsahā ndi jahma tsinditsj un?

<sup>39</sup> ¿Ama nyehé ndi cuhvj un, o tsinyij un vehe caa, tan tsahan ndi tsinyehé ndi tsi un?” cua catyí ñi.

<sup>40</sup> Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandihí tumañi ñi tsa javaha ndo tsi

ra ndaahvi, ra yañi yu, tsi yuhu javahā ndo tumañi iñi”, cua catyi yu tsihin ñi.

<sup>41</sup> Tacan tan yuhu tsa cuví Rey cua cahan yu tsihin nyívi tsa yucú tsiyo satyin yu tyehen: “Çatsiyo ndo nuu yu, nyooho, nyívi taahán tsi cuhun anyaya. Çuaahan ndo nu ñuhü tsa ña cua ndahva maa. Tsinü anyaya can tyin ican cua coo nu ña vaha tan tatyí ña vaha cuenda nu.

<sup>42</sup> Tsin tsisoco yu tan nyooho ña tsahā ndo tsa catsi yu. Na ityi iñi yu tan ña tsahā ndo ndutya coho yu.

<sup>43</sup> Tsicā nuu yu cuví yu iin ra inga ñuu, tan ña tsahā ndo nu cusu yu. Cumañi jahma yu tan ña tsahā ndo jahma cunditsi yu. Nacuhvi yu tan tsinyi yu vehe caa, maa tyin ña tsahā ndo tsinyehē ndo tsi yu nu tsinyi yu”, cua catyi yu tsihin ñi.

<sup>44</sup> Tacan tan cua catyi ñi tsihin yu: “Jutu Mañi yu, çama nyehē ndi tsisoco un, o na ityi iñi un, o tsicá nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatinyee ndi tsi un?” cua catyi ñi.

<sup>45</sup> Tan yuhu tsa cuví yu Rey cua catyi yu tsihin ñi: “Tsa nditsa caahán yu tsihin ndo tyin tandihí maa tsa ña javahā ndo tsihin nyívi ndaahvi ihya, ña javahā ndihí ndo tsihin yu, cuví can”, cua catyi yu tsihin ñi.

<sup>46</sup> Tacan tan ñi can cua cuhun ñi nu cayú ñuhü tsa ña cua ndahva maa. Tan nyívi vaha can cua cuhun ñi coo ñi ñayivi nyito tsa ña cua naa maa.

## 26

*Nu nducú ra mandoñi naha ra cuhva nácaa tan tñin ra naha tsi ra Jesús*

(Mr. 14.1-2; Lc. 22.1-2; Jn. 11.45-53)

<sup>1</sup> Cuhva tsa ndihí cahan ra Jesús tandihí tuhun can, tan quitsahā catyi ra tsihin ra tsicá tsihin ra:

<sup>2</sup> —Nyooho tsitó ndo tyin ndi cumañi uvi ca quívi tan tahan tsi vico pascua. Tan yuhu, Rayí tsa quee nda gloria, cua cuhva cuenda nyívi tsi yu na tyaa ra cumi tyiñu tsi yu nu cruu —catyi ra.

<sup>3</sup> Quívi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsahnu tsa cuví ityi nuu.

<sup>4</sup> Tan jandaq ra naha tyiñu nácaa cua jandavi ñaha ra naha tsi ra Jesús tan tñin ra naha tsi ra tan cahñi ra naha tsi ra.

<sup>5</sup> Tan catyi ra naha:

—Ña cua cahñi yo tsi ra quívi maa vico, coto nduvaa xaan nyívi —catyi ra naha.

*Nu tyosó iin ñaha ndutya tami jiñi ra Jesús*  
(Mr. 14.3-9; Jn. 12.1-8)

<sup>6</sup> Ra Jesús nyíi ra ñuu Betania, vehe ra Simón, ra tsa yihí cuehe tyaaahu.

<sup>7</sup> Tan natuhvā iin ñaha nu nyaá ra Jesús, ndahā ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra.

<sup>8</sup> Tsa nyehē ra tsicá tsihin ra, nduxaan ra naha tan catyi ra naha:

—¿Nacuenda jativi ña ndutya tami can?

<sup>9</sup> Vaha ca tun tsatyin xico ña can, tan ñihi cuaha ña xuhun tsihin can. Tan cuví jatinyee ña tsi nyívi ndaahvi tsihin xuhun can —catyi ra naha.

<sup>10</sup> Tan tsa tsiñi ra Jesús tsa caahán ra naha, tacan tan catyi ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahā ña tsihin yu, tsa vaha cuví tsi.

<sup>11</sup> Tyin nyívi ndaahvi tandihí ñi quívi cua coo ñi tsihin ndo, maa tyin yuhu, ña naha ca cua cunyi yu tsihin ndo.

<sup>12</sup> Tyoso ña ndutya tami siqui cuñu ñuhu yu, tyin janduvahā ña itsi tyin cua cuhun tsi tsitsi ñuhu.

<sup>13</sup> Tsa nditsa catyi yu tsihin ndo, tyin tandihí ñi nu cua cahan nyívi tuhun Nyoo tanñi cahnu ñuhu ñayivi, cua nacatyí tuhun tucu ñi tsa javahā ñaha ihya, ra nducuhun iñi nyívi tsi ña —catyi ra Jesús.

*Nu xico ra Judas Iscariote tsi ra Jesús*

(Mr. 14.10-11; Lc. 22.3-6)

<sup>14</sup> Tacan tan iin ra tsicá tsihin ra Jesús, ra tsa nañi Judas Iscariote, tsahān ra tsicahan ra tsihin ra jutu tsa cuví ityi nuu naha ra.

<sup>15</sup> Tan catyi ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsahā ra naha oco utsi xuhun cuitsin tsi ra.

<sup>16</sup> Tan nda quívi can tan quitsahā nducú ra Judas cuhva cua nacuhva cuenda ra tsi ra Jesús tsi ra jutu can naha ra.

*Nu cuxiñi ra Jesús tsihin ra tsicá tsihin ra*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Quívi jihna ñi tsa quitsahā vico nu tsatsi nyívi paan tsa nduve yutsan iya yihí, ra tsicá tsihin ra Jesús natuhvā ra naha nu nyaá ra tan quitsahā tsicá tuhun ra naha tsi ra tan catyi ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

<sup>18</sup> Tan catyi ra Jesús tsihin ra naha:

—Çuaahan ndo tsitsi ñuu nda vehe rayí ihya. Tan catyi ndo tsihin ra: “Ra Maestro catyi ra tyin tsa yatyin cua cúu ra, tan vehe maa un cua jacahnu ndi vico pascua”, catyi ndo tsihin ra —catyi ra Jesús.

<sup>19</sup> Tacan tan javahā ra naha cuhva cahan ra Jesús tsihin ra naha. Tan janduvahā ra naha tsa cuxiñi ra naha vico pascua can.

<sup>20</sup> Tsa cunaaha tan tsicunyaꝯ ra Jesús nu mesa tsihin tandihí utsi uvi ra tsicá tsihin ra.

<sup>21</sup> Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

<sup>22</sup> Tan nducuihya xaan cuñí ra naha, tan quitsahꝯ tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

<sup>23</sup> Tan nacahan ra Jesús tan catyí ra:

—Ra tsa tsatsí iin ñi coho tsihin yu, ra ican ca xico tsi yu.

<sup>24</sup> Yuhu, Rayi tsa queꝯ nda gloria, cua tahan yu tumaa tsa caahan nu tutu Nyoo. Maa tyin ndahví ra ndaahví tsa cua xico tsi yu. Vaha vihi ca tun tsatyin ña cacu ra —catyí ra Jesús.

<sup>25</sup> Tacan tan nacahan ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahan ra Jesús, tan catyí ra:

—Juvín un.

<sup>26</sup> Tsitsi tsa tsatsí ra naha, ra Jesús quihín ra paan tan nacuhvꝯ ra tyahví nyoo tsi Nyoo, tan tsahnú sava ra, tan tsahꝯ ra tsi ra tsicá tsihin ra, tan catyí ra tsihin ra naha:

—Catsi ndo. Paan ihya cuví tumaa cuñu ñuhu yu.

<sup>27</sup> Yahꝯ can tan quihín tucu ra vasu vinu, tan nacuhvꝯ ra tyahví nyoo tsi Nyoo, tan jayahꝯ ra tsi tandihí ra naha tan catyí ra:

—Cꝯho tandihí ndo vinu ihya.

<sup>28</sup> Tyin cuví tsi tumaa niñi yu. Tan tsihin niñi yu cua cundaa tyiñu tsa ndoꝯ Nyoo tsihin ndo, tyin cua cati niñi yu tsa cuenda tsa vaha tsi nyivi cuaha, tyin tsihin niñi yu cua coo tucahnu iñi cuatyí ñi.

<sup>29</sup> Tan catyí yu tsihin ndo, tyin ña cua coho ca yu tahan vinu tsa cuví ndutya uvas ihya, nda cuanda tsa coho yu vinu tsa tsihin ndo nda nu ndacá ñaha Jutu yu gloria —catyí ra.

*Nu cahan ra Jesús tyin cua cahan ra Pedro tyin ña nacotó ra tsi ra*

(Mr. 14.26-31; Lc. 22.31-34; Jn. 13.36-38)

<sup>30</sup> Tsa yahꝯ tsa tsatꝯ ra naha iin yaa Nyoo, tan cuahán ra naha yucu Olivo.

<sup>31</sup> Tacan tan quitsahꝯ caahan ra Jesús tsihin ra naha:

—Tandihí nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

<sup>32</sup> Maa tyin tsa yahꝯ nandoto yu, jihna ca yu cua cahun Galilea, tsa ndi cumañi ca cahun nyooho.

<sup>33</sup> Tacan tan nacahan ra Pedro tan catyí ra:

—Vasu ndi maa tandihí ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

<sup>34</sup> Tacan tan catyí ra Jesús tsihin ra:

—Tsa nditsa catyí yu tsihin un tyin juvín ñi maa tsacuaa vityin, tsa ndi cumañi ca vacu tsitooho, uñi tsaha cua cahan un tyin ña nacotó un tsi yu —catyí ra Jesús.

<sup>35</sup> Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvín ñi tacan catyí tandihí ca ra tsicá tsihin ra.

*Nu tsicꝯn tahvi ra Jesús tsi Nyoo nda Getsemani*

(Mr. 14.32-42; Lc. 22.39-46)

<sup>36</sup> Tacan tan tsaꝯ ra Jesús tsihin ra tsicá tsihin ra iin nu iyó cuaha yutun nu nañi Getsemani, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

<sup>37</sup> Tan quihín ra tsi ra Pedro tan nduvi sehe ra Zebedeo cuahán tsihin ra. Tan quitsꝯ tucuihya iñi cahnu tsi ra, tan tsa tuñu cuñí ra.

<sup>38</sup> Tacan tan catyí ra tsihin ra naha:

—Cahnu xaan tucuihya iñi nyaá añima yu, nda cuanda cuñi cahñi ña can tsi yu. Ndoꝯ ndo ihya tan cꝯo nyito ndo tsihin yu —catyí ra.

<sup>39</sup> Tacan tan cuahán ra Jesús luxu ca ityi nuu tan tsicuiñi tsi ti ra tan tsaquín ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuví jatsiyo nyaha un tundoho ihya siqui yu, vaha xaan. Maa tyin na ña cuví cuhva cuñi maa yu, tan na cuví cuhva cuñi maa un —catyí ra.

<sup>40</sup> Tacan tan tsaꝯ ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora?

<sup>41</sup> Cꝯo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús.

<sup>42</sup> Tan tsa tsahan ra tsa tsinu uvi tsaha, tsicꝯn tahvi ra tyehen:

—Tyaa, tatun ña cuví tsa jatsiyo nyaha un tundoho ihya siqui yu, na cuví cuhva cuñi maa un —catyí ra.

<sup>43</sup> Tacan tan tsaꝯ ra inga tsaha tan nyehe ra tyin quixí nyico ra tsicá tsihin ra, tyin tsicundasꝯ maa tinuu ra naha tsihin tsa cuñi xaan ra naha cusu ra naha.

<sup>44</sup> Tacan tan nacoꝯ ra tsi ra naha, tan cuahán ra tsa tsinu uñi tsaha cua ndacan

tahvi ra. Tan tsicān tahvi ra tsi Nyoo juvin ñi maa tsihin tuhun tsa tsa yaha caḥan ra.

<sup>45</sup> Tacan tan tsaā nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaā cuhva tsa cua nacuhva cuenda ra can tsi Rayii tsa quee nda gloria tsi ra iyó cuatyí naha ra.

<sup>46</sup> Nduvita ndo, cohon ndo. Tyin tsa vatsí ra tsa xico tsi yu —catyí ra Jesús.

*Nu tsaḥa cuenda ra Judas tsi ra Jesús tsi nu xaan iñi tsi ra nahnu*

(Mr. 14.43-50; Lc. 22.47-53; Jn. 18.2-11)

<sup>47</sup> Ndi caahán ca ra Jesús yacan, tan tsaā ra Judas, ra tsa cuví iin ra tsicá tsihin ra Jesús. Tan tsihin ra Judas tsaā tucu cuaha xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra.

<sup>48</sup> Tan ra Judas, ra tsa tsahá cuenda tsi ra Jesús, tsa yaha tsahá ra iin seña tsi ra can naha ra, tyin coto ra naha yóo cua tñin ra naha. Tyin tsa yaha caḥan ra tsihin ra naha:

—Ra tsa cua tyayuhu yu, ra ican cuví ra tsa cua tñin ndo.

<sup>49</sup> Tacan tan natuhvā ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

<sup>50</sup> Tacan tan nacahān ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhvā ra can naha ra tan tñin ra naha tsi ra Jesús.

<sup>51</sup> Tacan tan iin ra cutahán tsihin ra Jesús, tavā ra mityi tan tsahnyā ra soho musu jutu tsaahnu tsa cuví ityi nuu.

<sup>52</sup> Tan catyí ra Jesús tsihin ra:

—Natyihí mityi un tsitsi vena un. Tyin tandihí nyivi tsa cañi tahan tsihin mityi, juvin ñi tsihin mityi cua cúu ñi.

<sup>53</sup> ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

<sup>54</sup> Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

<sup>55</sup> Tacan tan catyí ra Jesús tsihin tandihí nyivi:

—¿A vatsí tñin ndo tsi yu tumaa cua tñin ndo iin ñasuhu? tyin ndahá ndo mityi tan yutun. Tandihí quivi tsinyi yu jacuahā yu tsi ndo tsitsi vehe ñuhu cahnu, tan ña tñin ndo tsi yu.

<sup>56</sup> Tandihí yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo taḥan tsanaha.

Tacan tan tandihí ra tsicá tsihin ra, tsinu ra naha. Tan ndoḡ intuhun ña maa ra.

*Nu tsicā tuhun ra mandoñi naha ra tsi ra Jesús tatun Sehe Nyoo cuví tsi ra*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Tan ra tsa tñin tsi ra Jesús, tsindaca ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra.

<sup>58</sup> Tan ra Pedro cuahán ra tsata ra naha, tan tsaā ra nda nuquehe vehe ra Caifás can. Tan quihvi ra tan ndoḡ ra nyii ra tsihin vitya can naha ra, tyin cua nyehe ra nácaa cua quita tuhun can.

<sup>59</sup> Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducú ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra.

<sup>60</sup> Maa tyin ña ñihí maa ra naha cuatyí tyaa ra naha siqui ra, vasu ndi maa cuaha nyivi tsahan ñi tsicahān ñi cuendu siqui ra. Tan nu ndihí tuhun, tsaā uví ca tsa ndaa tsa caahán cuendu.

<sup>61</sup> Tan catyí ra naha:

—Ra ihya, catyí ra tyin cuví caní ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

<sup>62</sup> Tacan tan ra jutu tsa cuví ityi nuu can, nduvita ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

<sup>63</sup> Maa tyin ra Jesús ña nacahān ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

<sup>64</sup> Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayii tsa quee nda gloria, cunyata yu xiin cuaha Nyoo ra iyó tandihí tunyee iñi, tan cua nyehe ndo nu cua quitsi yu nu vico ityi andiví inga tsaha —catyí ra.

<sup>65</sup> Tacan tan ra jutu tsaahnu tsa cuví ityi nuu can tsahnyā ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandihí ca ra naha:

—Ra ihya tsicoḡ cuatyí ra nuu Nyoo tsihin tsa caahán ra. ¡Nyehe ndo vityin! Ná cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa caḥan ra.

<sup>66</sup> ¿Náa catyí ndo vityin?

Tan nacahān ra naha tan catyí ra naha:

—Iyó cuatyí ra, yacan taahán tsi tsa cúu ra.

<sup>67</sup> Tacan tan tiví sii ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui.

<sup>68</sup> Tan catyí ra naha tsihin ra:

—Tatun nditsa tyin ra Cristo cuví un, ñacoto yóo cañi tsi un!

*Nu caħan ra Pedro tyin ña nacotó ra tsi ra Jesús*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Tsitsi tsa ndi nyíi ra Pedro nuquehe ityi tsata vehe can, tan iin ñaha tsa cuví musu jutu can, natuhvá ña nu nyaá ra tan catyí ña tsihin ra:

—Yooho tucu tsica un tsihin ra Jesús, ra Galilea can.

<sup>70</sup> Tan ra Pedro catyí ra nuu tandihi nyívi yucú can:

—Ña tsica yu tsihin ra can. Ña tsitó yu náa caahán un.

<sup>71</sup> Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsica ndihi tucu ra ihya tsihin ra Jesús, ra ñuu Nazaret —catyí ña.

<sup>72</sup> Tan inga tsaha tyihí xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

<sup>73</sup> Tañi cuii ca, tan ra yucú can natuhvá ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

<sup>74</sup> Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacú tsitooho.

<sup>75</sup> Tacan tan nducuhun iñi ra Pedro tsa caħan ra Jesús tsihin ra: “Tsa ndi cumañi ca vacu tsitooho, yooho tsa yahá caħan un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quitá ra ícan, tan tsacú xaan ra tsa cuihaya cuñi ra tsa javahá ra tacan.

## 27

*Nu nacuhvá cuenda ra naha tsi ra Jesús tsi ra Pilato*

(Mr. 15.1; Lc. 23.1-2; Jn. 18.28-32)

<sup>1</sup> Tan tsa tuví inga quiví, tandihi ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús.

<sup>2</sup> Tan nuuhñi ra jahá ra naha. Tan tsahan ra naha tsinacuhvá cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

*Nu tsihi ra Judas*

<sup>3</sup> Tsa nyehe ra Judas, ra tsa xicó tsi ra Jesús, tyin cua cúu ra, tan ndu uví iñi ra tsa javahá ra, tan nacuhvá ra tsa oco utsi xuhun

cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra.

<sup>4</sup> Tan catyí ra:

—Tsicoo cuatyí yu, tyin tsahá cuenda yu tsi iin ra nduve cuatyí na cúu ra.

Tan nacahán ra naha tan catyí ra naha:

—¿Nacuenda nyuhu? ¡Nyehe maa yooho!

<sup>5</sup> Tacan tan tyosó ihñi ra Judas xuhun can tsitsi vehe ñuhu cahnu, tan quitá ra cuahán ra tsityihí ra yoho jucun ra tan ticaá ra tsi ra iin nu yutun, tan tsihi ra.

<sup>6</sup> Ra cuví ityi nuu tsihin jutu can naha ra naquihín ra naha xuhun can tan catyí ra naha:

—Ña cuví tyihi yo xuhun ihya tsitsi aja nu yihí xuhun tsa tsahá nyívi tsi Nyoo tyin xuhun tsa cuyahví ra tsa cua cati ñiñi cuví can.

<sup>7</sup> Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyívi inga ñuu tun tsilhi ñi ñuu can.

<sup>8</sup> Yacan cuenda nañi ñuhu can nda cuanda vityin “Ñuhu Cuenda Tsa Tsañi Ñiñi Nyívi”.

<sup>9</sup> Tacan cuví tyin cundaá tsa tyaá ra Jeremías, ra cuví ndusu yuhu Nyoo tahañ tsanaha nu catyí tsi tyehen: “Juvín ñi maa ra naha quihín nyico tsa oco utsi xuhun cuitsin, tsá jatá ra naha tsi ra Cristo.

<sup>10</sup> Tan tsihin can, jatá ra naha ñuhu tsa nañi ‘Ñuhu Ra Javahá Quisi’, tacan catyí Jutu Mañi yo tsihin yu”, catyí tsi.

*Nu nyehe ra Pilato tyin nduve cuatyí ra Jesús*

(Mr. 15.2-5; Lc. 23.3-5; Jn. 18.33-38)

<sup>11</sup> Tsindacá ra mandoñi can naha ra tsi ra Jesús nuu ra ndacá ñaha, tan ra can tsica tuhun ra tsi ra, tan catyí ra:

—¿A yooho cuví rey cuenda nyívi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

<sup>12</sup> Tan cuhva tsa tyaá ra jutu can naha ra tan ra mandoñi naha ra cuatyí siqui ra, ña nacahán maa ra.

<sup>13</sup> Tacan tan catyí ra Pilato tsihin ra:

—¿A ña tsíñi un tandihi tsa caahán ra naha siqui un?

<sup>14</sup> Maa tyin ra Jesús ña nacahán maa ra. Tan iyo xaan cuñi ra ndacá ñaha can tyin ña nacahán ra.

*Nu caħan ra cumí tyiñu tyin taahán tsi cúu ra Jesús*

(Mr. 15.6-20; Lc. 23.13-25; Jn. 18.38—19.16)

<sup>15</sup> Tan vico pascua tuhvá ra ndacá ñaha jañá intuhun ra yucú vehe caa. Ndáa ra tsa nacatsi maa nyívi, juvín ra cua quita nuña.

16 Tan quiví can nyíi iin ra tsa nañí Barrabás vehe caa. Tan tandihí nyívi tsitó tuhun ra.

17 Tan cuhva tsa ndu iin nyívi, ra Pilato tsicā tuhun ra tsi ñi, tan catyí ra:

—¿Ndáa ra cuñí ndo tsa tava nuña yu? ¿A ra Barrabás, o ra Jesús, ra tsa nañí Cristo? —catyí ra.

18 Tyin tsitó ra tyin tsa cuenda tsa ndasi cuñí ra jutu can naha ra nyehe ra naha tsi ra Jesús, yacan cuenda tsahā cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihí un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvī xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihí ra naha natyuhú ra naha tsi nyívi na ndacan ñi tsa jaña ra Pilato tsi ra Barrabás, tan na cúu ra Jesús.

21 Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñí ndo tsa jaña yu?

Tan nacahan ñi, tan catyí ñi:

—Jaña tsi ra Barrabás.

22 Tan ra Pilato tsicā tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañí Cristo ihya?

Tandihí ñi nacahan ñi tan catyí ñi:

—iTyā tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javahā ra?

Maa tyin maa ñi canā tsaa ñi inga tsaha tan catyí ñi:

—iTyā tsi ra nu cruu na cúu ra!

24 Tsa nyehe ra Pilato tyin ña cuvī jaha ra tsi nyívi, tyin ñihi xaan cuvaá jahá ñi. Tacan tan tsicān ra ndutya, tan nacatyā ra ndaha ra nuu nyívi can, tan catyí ra:

—Ña cua ndoo cuatyí tsa cua cúu ra vaha ihya siquí yuhu, tyin siquí nyoocho cua ndoo cuatyí can.

25 Tan tandihí nyívi nacahan ñi, tan catyí ñi:

—Na ndoo maa tsi siquí ndi tan siquí sehe ndi.

26 Tacan tan ra Pilato jañā ra tsi ra Barrabás, tan tavā tyiñu ra na ndoho ra Jesús, tan nacuhvā cuenda ra tsi ra tsi ra andaru naha ra na cúu ra nu cruu.

27 Tacan tan ra andaru cuenda ra Pilato, ra ndacá ñaha can tsindacā ra naha tsi ra Jesús nda vehe tyiñu ra Pilato, tan jandu iin ra naha tsi tandihí ca andaru nu nyaá ra.

28 Tacan tan tavā ra naha jahma ra tan jacunditsj ra naha iin jahma cuaaha tsi ra.

29 Tan tyihí ra naha iin corona tsa tsinu tsihin iñu jiñi ra. Tan tsahā ra naha iin yutun tatun na cundaha ra tsihin ndaha cuaha ra. Tacan tan tsicuiñi tsiti ra naha nuu ra, tan tsacū nducu ra naha tsi ra tan catyí ra naha:

—iNacumi tsi un, yooho Rey cuenda nyívi Israel!

30 Tan tiví sii ra naha tsi ra. Tan quihñ ra naha yutun tatun can tan cañi ra naha jiñi ra.

31 Tsa yahā tsa tsacū nducu ra naha tsi ra tan tavā ra naha jahma cuaaha tsa nditsi ra, tan jacunditsj nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

*Nu tyaa ra naha tsi ra Jesús nu cruu*

(Mr. 15.21-32; Lc. 23.26-43; Jn. 19.17-27)

32 Tsa quitā ra naha ican, tahān ra naha tsi iin ra ñuu Cirene, tsa nañí Simón. Tan jafiñi ra naha tsi ra na cuiso ra cruu ra Jesús.

33 Tan tsaa ra naha iin nu nañí Gólgota, tan cuñi tsi catyí “Yiqui Jiñi Ndiyí”.

34 Tan ican tsahā ra naha vinu nasacā tsihin ndutya uva xaan coho ra Jesús. Tan tsa yahā tsa tsihí ra luxu can, ña cuñi ca ra coho ra.

35 Tan tsa yahā tsa tyaa ra naha tsi ra nu cruu, tacan tan ra andaru can quihñ ra naha jahma ra tan tavā cuenda ra naha tyin cua nyehe ra naha ndáa ra jaha canaa intuhun intuhun jahma ra. Tacan cuvī tyin cundaq tuhun tsa tyaa iin ra cuvī ndusu yuhu Nyoo tahān tsanaha nu catyí tsi tye-hen: “Tavā cuenda ra naha tan tsatsā ra naha jahma yu”, catyí tsi.

36 Tacan tan tsinyecu ra naha ican tyin jaha cuenda ra naha tsi ra.

37 Tan ityí jiñi ra tyaa ra naha letra tsa catyí nacuenda cua cúu ra. Tan catyí tsi tye-hen: “Ra ihya cuvī ra Jesús, rey cuenda nyívi ñuu Israel.”

38 Tan tyaa tucu ra naha uvi taahan ra suhu tsihin ra nu uvi taahan ca cruu. Iin ra tyaa ra naha xiin cuaha ra, tan inga ra xiin satyín ra.

39 Tan nyívi tsa yahá ican, caahán ñi tsi ra, tan javicó ñi jiñi ñi tsa tsacū nducu ñi tsi ra.

40 Tan catyí ñi tsihin ra:

—iYooho tsa cahān un tyin cua caní un vehe ñuhu cahnu, tan tsitsi tsa uñi quiví tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuvī tsi un! —catyí ñi tsihin ra.

41 Tan juvin ñi tacan tsacū nducu ra jutu tsa cuvī ityí nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

<sup>42</sup> —Jacacu ra tsi inga nyivi, maa tyin ña cuví jacacu ra tsi maa ra. Tun nditsa tyin Rey cuenda nyivi Israel cuví ra, na nuu ra nu cruu can, tan cua tsinu iñi yo tsi ra.

<sup>43</sup> Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñí ra tsi ra. Tyin catyí ra tsihin yo tyin Sehe Nyoo cuví tsi ra.

<sup>44</sup> Tan nda cuanda nu ñasuhu nahnu tsa nyaá nu cruu xiin ra tan tsacu nducu ndihi nahnu tsi ra.

*Nu tsihi ra Jesús*

(Mr. 15.33-41; Lc. 23.44-49; Jn. 19.28-30)

<sup>45</sup> Tacan tan ndunaq tanií cahnu ñuhu ñayivi tsa ora tan nda cuanda caa uñi tsa tseñi.

<sup>46</sup> Tan juven ñi cuhva can, ñihi xaan canaq tsaa ra Jesús. Tan catyí ra:

—Elí, Elí, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenta nacoq ihñi un tsi yu?

<sup>47</sup> Juhva ra yucú can naha ra, tsiñi ra naha tsa cahñ ra, tan catyí ra naha:

—Ra Elías, caná tsaa ra.

<sup>48</sup> Tan juven ñi cuhva can, cuahán iin ra cua quihin ra iin yahma cuhva caá catyí, tan jatyií ra tsihin vinu iya, tan tyaq ra nu yutun, tan jatuhva ra yuhu ra Jesús tyin na coho ra.

<sup>49</sup> Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

<sup>50</sup> Inga tsaha canaq tsaa ñihi ra Jesús, tacan tan tsihi ra.

<sup>51</sup> Tan juven ñi cuhva can ndatá sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taqñ. Tan tahvi cuatyí cava nahnu.

<sup>52</sup> Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi.

<sup>53</sup> Tan tsa yaha nandoto ra Jesús quitá ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi.

<sup>54</sup> Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taqñ, tan tsa nyehe ra naha inga ca tsa cuví. Tan catyí ra naha:

—Nditsa nditsa cuii, tyin Sehe Nyoo cuví tsi ra ihya.

<sup>55</sup> Cuaha ñiñaha tsa tsinyicun tsi ra Jesús nda Galilea tan jatyinyee ñi tsi ra, yucú ñi nyehe ñi ndasava.

<sup>56</sup> Tan juhva ñi ican cuví ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

*Nu tsicutsi ra naha tsi ra Jesús*

(Mr. 15.42-47; Lc. 23.50-56; Jn. 19.38-42)

<sup>57</sup> Cuhva tsa cuñí cuaa, quitsi iin ra cua tsa nañi José, ra ñuu Arimatea. Tan tsinú iñi ra tsi ra Jesús.

<sup>58</sup> Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra.

<sup>59</sup> Tacan tan quihin ra José cuñu ñuhu ra, tan cava nuu ra iin jahma cuitsin vaha tsi ra.

<sup>60</sup> Tan tyihí ra cuñu ñuhu ra Jesús tsitsi iin ñaña tsaa tsa cuví iin yavi yuu tsa tava tyiñu ra tsatyá ra naha. Tan tsa yaha tsa nacasi ra yuhu ñaña can tsihin iin yuu cahnu, tan cuahán ra.

<sup>61</sup> Tan ña María tsa quee Magdala, tan inga ña María, ndoq ñi yucú ñi yuhu ñaña can.

*Nu jahá cuenda ra andaru ñaña ra Jesús*

<sup>62</sup> Tan tsa inga quivi, quivi quitatú nyivi cuví can, tan ra jutu tsa cuví ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato.

<sup>63</sup> Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahañ nyito ra tyin tsa yaha tsa uñi quivi tsa cua cúu ra tan cua nandoto ra.

<sup>64</sup> Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cuhun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuví, yaha ca cuhva cua cuví tan ñavin ca tsa jihna ñi —catyí ra naha.

<sup>65</sup> Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

<sup>66</sup> Tacan tan cuahán ra naha, tan jahá cuenda vaha ra naha ñaña can, tan tyaq ra naha iin tsa tyaq ra naha tsata yuu tsa ndasi can tyin tatun nacanda yuu can coto ra naha. Tan nacoq ra naha tsi ra andaru jahá cuenda ra naha ican.

## 28

*Nu nandoto ra Jesús*

(Mr. 16.1-8; Lc. 24.1-12; Jn. 20.1-10)

<sup>1</sup> Tsa yaha quivi tsa quitatú nyivi, cuhva tsa cuñi cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña.

<sup>2</sup> Tan ñihi xaan taqñ tyin quitsi iin ángel Jutu Mañi yo quee ra andivi, tan tsaq ra nu ñaña can. Tan jatsiyo ra yuu tsa ndasi yuhu can, tan tsicunyaq ra tsata can.

<sup>3</sup> Tan xiñu xaan ra, tumaa tsa cañi tatsa. Tan cuitsin xaan jahma ra.

<sup>4</sup> Cuhva tsa nyehe ra andaru can naha ra tsi ra, nayuhvi xaan ra naha tan quitsaha

nihí ra naha, tan nda cuanda tsihí naaha ra naha tsihin tsa yuuhví ra naha.

<sup>5</sup> Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihí nu cruu nanducú ndo.

<sup>6</sup> Yoñi ca ra nyí ihya, tyin tsa nandotó ra, tumaa catyí ra. Naha ndo tan nyehe ndo nu tinyí ra naha tsi ra.

<sup>7</sup> Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandotó ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

<sup>8</sup> Tacan tan numi ñi quitá ñi nu ñaña can. Yuuhví ñi, tan si xaan cuñi tucu ñi. Tan tsinú xaan ñi cuahán ñi cua catyí tuhun ñi tsihin ra tsicá tsihin ra Jesús.

<sup>9</sup> Tan cuhva can quituví ra Jesús nuu ñi tan tsaha ra nacumi tsi ñi. Tacan tan natuhvá ñi nu nyaá ra tan tsicuiñi tsiti ñi nuu ra tan jacahnú ñi tsi ra, tan tsicunumí nyaá ñi tsaha ra.

<sup>10</sup> Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

*Tuhun tsa nacatyí tuhun ra andaru naha ra*

<sup>11</sup> Tsitsi tsa cuahán ñi can, juhva andaru tsa jahá cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra.

<sup>12</sup> Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra.

<sup>13</sup> Tan catyí ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsicá tsihin ra Jesús tan quihñ ra naha cuñu ñuhu ra.

<sup>14</sup> Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo.

<sup>15</sup> Tacan tan quihñ ra andaru can xuhun can, tan cuahán ra naha cuajavahá ra naha cuhva catyí ra naha tsihin ra naha. Tan nda quivi vityin tan tacan caahán nyivi ñuu Israel.

*Nu tava tyiñu ra Jesús tsi ra tsicá tyiñu ra (Mr. 16.14-18; Lc. 24.36-49; Jn. 20.19-23)*

<sup>16</sup> Tan tacan, tandihí tsa utsi iin ra tsicá tsihin ra, cuahán ra naha nda Galilea nda yucu nu catyí maa ra Jesús tsihin ra naha tyin cuhun ra naha.

<sup>17</sup> Tan cuhva tsa nyehe ra naha tsi ra Jesús, jacahnú ra naha tsi ra, maa tyin juhva ra naha uvi ñi tsicá iñi ra naha.

<sup>18</sup> Tacan tan natuhvá ra Jesús nu nyecú ra naha tan catyí ra tsihin ra naha:

—Nyoo tsaha ra tsa cundaca ñaha yuhu tandihí andivi tan nu ñuhu ñayivi ihya.

<sup>19</sup> Yacan cuenda, cuaahan ndo tandihí nu iyó nyivi, tandihí ñi ñuu, tan catyí ndo tsihin ñi na cunyicun ñi tsi yu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyí Ii ra.

<sup>20</sup> Tan jacuaaha ndo tsi ñi na tyaa yahvi ñi tandihí tsa catyí yu tyin javaha ndo. Tan coto ndo tyin yuhu cunyaa yu tsihin ndo tandihí quivi nda cuanda naa ñayivi —catyí ra Jesucristo tsihin ra tava tyiñu ra.

Tan na cuví tsi tacan ñi.



## Tuhun Nyoo Tsa Tyaa ra Marcos

*Nu caahán ra Juan, ra jacoondutyá tsi nyívi, tuhun Nyoo*

(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Tyehen quitsahá tuhun ra Jesucristo, Sehe Nyoo.

<sup>2</sup> Tسانaha ra Isaías, ra cuví ndusu yuhu Nyoo, tyaa ra nácaa cua quítsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyívi na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

<sup>3</sup> Cua tyaa soho yo ndusu ra nu cana tsa ra nu tsiquí, tan catyí ra:

“Nuña ndo iin ityí cuii

tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaa ra Isaías.

<sup>4</sup> Tacan cuví; quítsi ra Juan nu tsiquí, tan javahá ra cuhva tyaa ra Isaías. Catyí ra tsihin nyívi tyehen: “Ndu uvi iñi ndo cuatyí ndo tan çõndutyá ndo tyin tacan tan jaha Nyoo tucahnu iñi tsi ndo tsa cuenda cuatyí ndo.”

<sup>5</sup> Tan tandihí nyívi iyó ñuu tsa cayucú Judea tumaa ñuu Jerusalén tan inga ca ñuu tsañá ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uví iñi ñi cuhva iyó ñi tan nahmá ñi cuatyí ñi nu Nyoo. Tacan tan tsicoondutyá ñi yutya Jordán.

<sup>6</sup> Tan jahma ra Juan tsinu tsi tsihin ixi camellu. Tan cinturón ra cuví ñi. Tan maa ñi tica xama tsatsí ra, tan tsihí ra ndutyá ñuñu tsa iyó tsitsi cuhu.

<sup>7</sup> Caahán ra tuhun Nyoo tsihin nyívi tan catyí ra:

—Tsa yatyin cuii quítsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuví maa ra tan ñavin ca yuhu.

<sup>8</sup> Yuhu jacoondutyá yu tsi ndo tsihin ndutyá ñi. Maa tyin maa ra cua jacoondutyá ra tsi ndo tsihin Tatyí Ii Nyoo—catyí ra Juan.

*Nu tsicoondutyá ra Jesús*

(Mt. 3.13-17; Lc. 3.21-22)

<sup>9</sup> Quívi can quita ra Jesús ñuu Nazaret, tsa canyí Galilea, tan cuahán ra nu nyí ra Juan yutya Jordán tyin jacoondutyá ra tsi ra.

<sup>10</sup> Tsa quita ra Jesús tsitsi ndutyá tsa yaha tsicoondutyá ra, nuña andívi tan nyehe ra vatsí nuú Tatyí Ii Nyoo síquí ra tan caá tsi tumaa caá iin paloma.

<sup>11</sup> Tan nacahan iin ndusu ityí andívi tan catyí tsi tsihin ra tyehen:

—Yooho cuví Sehe yu tan cuñí xaan yu tsi un. Tan sñi xaan cuñí yu nyehé yu tsi un —catyí ndusu can.

*Nu nducú cuhva nu ña vaha tsi ra Jesús*

(Mt. 4.1-11; Lc. 4.1-13)

<sup>12</sup> Tsa yaha tsa tsicoondutyá ra Jesús tan tsindaca Tatyí Ii Nyoo tsi ra nu tsiquí.

<sup>13</sup> Tan tsinyí ra ican uvi xico quívi nu nduve nyívi iyó, maa ñi quíti xaan iyó. Tan nducú cuhva nu ña vaha tsi ra. Yaha can tan tsaá ángel Nyoo tan jatinyee ra naha tsi ra.

*Nu quitsahá caahán ra Jesús tuhun Nyoo tsihin nyívi iyó Galilea*

(Mt. 4.12-17; Lc. 4.14-15)

<sup>14</sup> Tsa yaha tsa tyihí nyívi tsi ra Juan vehe caa, tan tsinuhá ra Jesús Galilea tan caahán ra tsihin nyívi nácaa ndacá ñaha Nyoo.

<sup>15</sup> Tan catyí ra:

—Tsa tsaá quívi tsa cua cundaca ñaha Nyoo tsi nyívi iyó nu ñuhu ñayívi ihya. Yacan cuenda ndu uvi iñi ndo cuatyí ndo, tan tsinu iñi ndo tuhun tsa jacacú Nyoo tsi nyívi —catyí ra Jesús.

*Nu caná ra Jesús cumi taahan ra tñin tyaca*

(Mt. 4.18-22; Lc. 5.1-11)

<sup>16</sup> Iin quívi cuahán ra Jesús tsicá ra yuhu miñi tsa nañi Nduya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutyá, tyin ra tñin tyaca cuví ra naha.

<sup>17</sup> Tan catyí ra Jesús tsihin ra naha:

—Ñaha ndo, quítsi nyicun ndo tsi yu, tan yuhu cua jatinyee yu tsi ndo tyin tumaa tsa tñin ndo tyaca ihya, tacan cua ñihi ndo nyívi cua cuví nyívi Nyoo —catyí ra Jesús tsihin ra Simón tan tsihin ra Andrés.

<sup>18</sup> Juvín ñi cuhva can tan nacoq ra naha traya can, tan cuahán ra naha cuanyicún ra naha tsi ra.

<sup>19</sup> Ña cuaha ñi tsicá ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya.

<sup>20</sup> Caná ra tsi nduvi taahan ra naha. Tan nacoq ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

*Nu quita tatyí ña vaha tsi iin rayí*

(Lc. 4.31-37)

<sup>21</sup> Tsa tsaá ra Jesús ñuu Capernaum tsihin ra tsicá tsihin ra, quíhví ra Jesús tsitsi vehe ñuhu quívi quitatú nyívi. Tacan tan quitsahá jacuahá ra tuhun Nyoo tsi nyívi.

<sup>22</sup> Tan iyo xaan cuñí ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra.

<sup>23</sup> Tan tsitsi vehe ñuhu can nyii iin ra yihí tatyí ña vaha. Tan cana tsa ra tan catyí ra:

<sup>24</sup> —¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsi un vatsi janaa un tsi ndi? Yuhu nacotó vaha yu tsi un, tan tsitó yu tyin Sehe li Nyoo cuví un —catyí ra can tsihin ra Jesús jahá nu tatyí ña vaha can.

<sup>25</sup> Tacan tan nduxaḡn ra Jesús tsi nu tan catyí ra tsihin nu:

—¡Ña caḡan ca un! ¡Quita tsi ra ihya! —catyí ra tsihin nu.

<sup>26</sup> Tacan tan quítsaha ñihi rayii can jahá nu. Tan ñihi xaan cana tsa ra jahá nu, tan quita nu tsi ra.

<sup>27</sup> Tandihí nyivi iyo xaan cuñí ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsa jacuahá ra ihya? ¡Tyin iyó vaha tunyee iñi tsi ra, nda cuanda tatyí ña vaha tan tyaá yahvi tsi ra! —catyí ñi.

<sup>28</sup> Tan numi ñi tsitó nyivi iyó tandihí ñuu tsa cayucú Galilea tuhun ra Jesús.

*Nu nduvaha tyiso ra Simón Pedro (Mt. 8.14-15; Lc. 4.38-39)*

<sup>29</sup> Tsa ndihí jacuahá ra Jesús tsi nyivi tsitsi vehe ñuhu, quita ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra.

<sup>30</sup> Tan ña tyiso ra Simón cuuhví ña tsihin cahñi canyii ña nu tsito. Tan catyí tuhun nyivi ña tsihin ra Jesús tyin cuuhví ña.

<sup>31</sup> Tacan tan natuhva ra Jesús yuhu tsito nu canyii ña, tiḡn ra ndaha ña, tan cañihí ra tsi ña. Juvín ñi cuhva can, quita cahñi tsi ña, tan quítsaha nanducú ña tsa catsi ra naha.

*Nu cuaha xaan nyivi cuuhví janduvaha ra Jesús (Mt. 8.16-17; Lc. 4.40-41)*

<sup>32</sup> Tsa tsa cuñí cuaa tsa tsa yaha tyiso ñicanyii, tandihí nyivi cuuhví tan nyivi yihí tatyí ña vaha tsindaca nyivi tsi ñi nu nyii ra Jesús.

<sup>33</sup> Tan ndu iḡn tandihí nyivi ñuu can nu yucú ra naha.

<sup>34</sup> Tan janduvaha ra tsi tandihí ñi tsa yihí siin siin cuehe, tan cuaha tatyí ña vaha tava ra. Maa tyin ña tsaḡa ra tsa cahan tatyí ña vaha can, tyin tsitó nahnu yóo ra cuví ra.

*Nu tsicá ra Jesús caahán ra tuhun Nyoo tandihí ñuu tsa cayucú Galilea (Lc. 4.42-44)*

<sup>35</sup> Ra Jesús nduvita ra tsa ndi naa ca inga quivi, quita ra ñuu can tan cuahán ra iin nu taxin caá cuandacán tahvi ra tsi Nyoo.

<sup>36</sup> Tsa nyehé ra Simón tyin nduve ra, tacan tan cuahán ra tsihin tandihí ca ra naha cuanducú ra naha tsi ra.

<sup>37</sup> Tan tsa nañihí ra naha tsi ra, catyí ra naha tsihin ra:

—Tandihí nyivi tan nanducú ñi tsi un —catyí ra naha.

<sup>38</sup> Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihí yu tuhun Nyoo ican, tyin yacan tyiñu vatsi yu —catyí ra Jesús tsihin ra naha.

<sup>39</sup> Tan tacan tsica ra Jesús caahán ra tuhun Nyoo tsihin nyivi tsitsi vehe ñuhu tan iin tan iin ñuu tsa cayucú Galilea. Tan tava ra tatyí ña vaha tsi nyivi.

*Nu janduvaha ra Jesús tsi ra ndohó cuehe tyahyú*

*(Mt. 8.1-4; Lc. 5.12-16)*

<sup>40</sup> Tsa ndi cuahán ra Jesús tsicá ra tan quita iin ra ndohó cuehe tyahyú tsicuiñi tsiti ra nuu ra, tan catyí ra tsihin ra:

—Tun yooho tan cuñí un, cuví janduvaha un tsi yu —catyí ra.

<sup>41</sup> Tan cundaahví iñi ra Jesús nyehé ra tsi ra, tan tyiso ndaha ra jiñi ra, tan catyí ra tsihin ra:

—Cuñi yu janduvaha yu tsi un. Tan vityin tsa nduvaha un —catyí ra tsihin ra.

<sup>42</sup> Tsa caḡan ra Jesús tacan tsihin ra, juvín ñi cuhva can tan nduvaha ra.

<sup>43</sup> Tacan tan catyí ra Jesús tyin tsa cuví cunuhu ra, maa tyin caḡan vaha xaan ra tsihin ra na javaha ra tyehen:

<sup>44</sup> —Coto caḡyí tuhun un tsihin nyivi yóo janduvaha tsi un. Maa tyin cuahaan nu nyaá ra cuví jutu, tan janaha un tsi un tsi ra. Tan cuhva tsa catyí ra Moisés tyin cuhva ndo tsa cuenda tsa nduvaha ndo tun cuhvi ndo. Yacan cua cuví tsa ndaa tsi ra jutu tan tsi nyivi tyin tsa nduvaha un —catyí ra Jesús tsihin ra.

<sup>45</sup> Maa tyin ra ican cuahán ra, tan quítsaha catyí tuhun ra tsihin tandihí nyivi nácaa nduvaha ra. Yacan cuenda ña cuví ca quihvi nditsin ra Jesús tsitsi ndi intuhun maa ñuu. Tan tsicá ra ityi tsata ñuu ñi nu nduve nyivi iyó, maa tyin tandihí ñi ityi tan quita nyivi, tan tsinyehé ñi tsi ra.

## 2

*Nu janduvaha ra Jesús tsi iin ra xii (Mt. 9.1-8; Lc. 5.17-26)*

<sup>1</sup> Tsa yaha juhva quivi tan cuahán ra Jesús ñuu Capernaum inga tsaha. Tan tsa tsito nyivi tyin tsaḡ nuhu ra yuvehe ra,

<sup>2</sup> iin yaha ñi ndu cuaha ñi yuvehe ra tan ña tsitahḡn maa ñi tsitsi vehe tan ndi yuvehe. Tan caahán ra tuhun Nyoo tsihin ñi.

<sup>3</sup> Tacan tan tsaḡ cumi taahan rayii nyisó ra naha iin ra xii. Cuñi ra naha cuhun ra naha tsihin ra nda nu nyaá ra Jesús.

<sup>4</sup> Maa tyin ña cuví yaha ra naha yuvehe tan cuhun ra naha nu nyaá ra Jesús tyin cuaha xaan nyivi nyecú yuvehe can. Yacan cuenda ndaa ra naha jiñi vehe, tan jatsiyó ra

naha juhva tyiyo ndihi cuhva nu nyaá ñi ra Jesús. Tacan tan januu ra naha tsi ra cuuhví can nu nyaá ra Jesús tsihin iin tsito.

<sup>5</sup> Tsa nyehe ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jahá yu tucahnu iñi tsi un tsa cuenda tandihi cuatyí un —catyí ra Jesús tsihin ra.

<sup>6</sup> Tan nyecú juhva ra cuví maestro cuenda ley vehé ñuhu naha ra ican, tacan tan quitsahá tsicá iñi ra naha tuhun ihya:

<sup>7</sup> “¿Nacuenda tyin caná iñi ra ihya caahán ra tyehe? Tan intuhun ñi maa Nyoo cuví ra jahá tucahnu iñi tsi yo. Tsicoo cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha.

<sup>8</sup> Maa tyin ra Jesús iin yaha ñi tuvj iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

<sup>9</sup> ¿Náa yii ca cahan yo; “Cuatyí un tsa yaha ndatsi”, o catyí yo: “Nduvita, naquihin tsito un tan caca”?

<sup>10</sup> Vaha. Cua janaha yu tsi ndo tyin yuhu, tsa cuví yu Rayii quee nda gloria, iyó ndatu tsi yu nu ñuhu ñayivi ihya tsa jaha yu tucahnu iñi tsi nyivi tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

<sup>11</sup> —Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

<sup>12</sup> Tan iin yaha ñi nduvitá ra cuuhví can, naquihin ra tsito ra, tan cuanuhú ra. Tan iyo xaan cuñí tandihi maa nyivi tsa nyehe can, tan quitsahá jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

*Nu cana ra Jesús tsi ra Leví  
(Mt. 9.9-13; Lc. 5.27-32)*

<sup>13</sup> Tsa yaha yacan tan cuahán ra Jesús yuhu miñi inga tsaha. Tacan tan tsaá cuaha nyivi nu nyii ra, tan quitsahá jacuahá ra tsi ñi.

<sup>14</sup> Tsa ndihi jacuahá ra tsi ñi, tan cuanuhú ra. Tan tsa cuahán ra yahá ra nu nyaá vehé nu tyahvi nyivi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Cohon tsihin yu.

Tacan tan nduvitá ra Leví, tan cuahán ra tsihin ra.

<sup>15</sup> Yahá can tan cuahán ra Jesús cuacatsi ra yuvehe ra Leví tsihin ra tsicá tsihin ra. Tsinyaá ra nu mesa tan tsinyecú ndihi tucu ra tavá xuhun cuenda ra ndacá ñaha tan inga ca nyivi iyó cuatyí. Tyin cuaha xaan nyivi nyicún tsi ra.

<sup>16</sup> Maa tyin tsa nyehe ra cuví maestro cuenda ley vehé ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsi tan tsihi ra maestro ndo tsihin ra tavá xuhun tan ra iyó cuatyí?

<sup>17</sup> Tsa tsiñi ra Jesús tsa cahán ra naha tan catyí ra:

—Yuhu ña vatsi yu vatsi jatyinyee yu tsi nyivi cuñi tyin vaha iyó ñi; vatsi yu vatsi jatyinyee yu tsi nyivi tsitó tyin iyó cuatyí ñi tumaa nyivi cuuhví, tyin nyivi cuuhví tsiñi ñuhu doctor tsi ñi. Maa tyin nyivi vaha cuñí, ña tsiñi ñuhu doctor tsi ñi —catyí ra Jesús tsihin ra naha.

*Nu tsicá tuhun nyivi tsi ra Jesús tun taahán tsi coo nyitya ñi*

*(Mt. 9.14-15; Lc. 5.33-35)*

<sup>18</sup> Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivi nu nyii ra Jesús, tan tsicá tuhun ñi tsi ra, tan catyí ñi:

—¿Nacuenda tyin tsicoo nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoo nyitya ra naha? —catyí ñi.

<sup>19</sup> Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun ndi nyii ra cua tindaha tsihin ñi? Ña cuví coo nyitya ñi tun ndi nyii ra tsihin ñi.

<sup>20</sup> Maa tyin coo quivi ña cua cunyi ca ra tsihin ñi. Tacan tan cua coo nyitya ñi —catyí ra Jesús tsihin ñi.

*Nu caahán ra Jesús tyin ña nacatsi tahan tuhun tsahnú tsa iyó nyivi tsihin tuhun tsaá tsa jacuahá ra tsi ñi*

*(Mt. 9.16-17; Lc. 5.36-39)*

<sup>21</sup> Tan catyí ra Jesús:

—Ña tuhvá nyivi natyaa jahma tsaá iin jahma tuuhu, tyin jahma tsaá can can cua nandiyi can tan cua nducahnu ca nu ndata jahma tuuhu can jaha can.

<sup>22</sup> Tacan tucu ñi ñii yihí vinu tun tyihí yo vinu tsaá tsitsi ñii tsaahnu cua ndata ñii can, tan cua cati vinu can tan cua tiví can. Yacan cuenda cuñí tsi tsa tyihí yo vinu tsaá tsitsi ñii tsaá —catyí ra Jesús.

*Nu jocón ra tsicá tsihin ra Jesús yoco trigu quivi quitatú nyivi*

*(Mt. 12.1-8; Lc. 6.1-5)*

<sup>23</sup> Iin tsaha yahá ra Jesús tsitsi tsa tatsi nyivi tan cuví tsi quivi quitatú ñi. Tan tsa yahá ra tsicá tsihin ra quitsahá tuhún ra naha yoco trigu.

<sup>24</sup> Tacan tan tsa nyehe ra fariseo naha ra can quitsahá caahán ra naha tsihin ra Jesús:

—¡Nyehe tsa javahá ra tsicá tsihin un naha ra! Jahá tyíñu ra naha tan ña taahán tsi jahá tyíñu yo quívi ihya —catyí ra naha.

<sup>25</sup> Tan nacahan ra Jesús tsihin ra naha:

—¿A ñaha ca cahví ndo nu tutu nu tsahá cuenda tsi tsa javahá ra David tan ra cutahán tsihin ra quívi tsisocq ra naha?

<sup>26</sup> Ra David quihví ra tsitsi vehe Nyoo quívi cuví ra Abiatar jutu tsaahnu cuví ityí nuu. Tan quihñ ra paan ii, tsa taahán tsi catsi maa ñi maa ra jutu naha ra. Maa ra tan tandihí ra cutahán tsihin ra tsatsj ra naha paan can —catyí ra Jesús.

<sup>27</sup> Tacan tan catyí ra Jesús tsihin ra naha:

—Nyoo javahá ra quívi quitatú yo tyin tacan tan cuví quitatu cuñu ñuhu yo; tan ñavin maa yo tsinú tsa cuenda quívi quitatú yo.

<sup>28</sup> Yacan cuenda yuhu tsa cuví yu Rayii quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quívi quitatú yo —catyí ra Jesús.

### 3

*Nu nduvaha ra na ityí iin ndaha*

(Mt. 12.9-14; Lc. 6.6-11)

<sup>1</sup> Tsa quihví ra Jesús inga tsaha tsitsi vehe ñuhu, nyíi iin ra na ityí iin ndaha ican.

<sup>2</sup> Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityí ndaha can tyin cuví tsi quívi quitatú nyívi. Tyin tun cua janduvaha ra tsi ra can, tacan tan cua cuví tyaa ra naha cuatyí siquí ra.

<sup>3</sup> Tacan tan catyí ra Jesús tsihin ra na ityí ndaha can:

—Ndúvita nyityi tan cunyaa un mahñu ihya.

<sup>4</sup> Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quívi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyívi, o cahñi yo tsi ñi? —catyí ra Jesús.

Maa tyin ña nacahan ra naha.

<sup>5</sup> Tacan tan nanyehé xaan ra Jesús nuu ra naha, tan nducuiihya cuñí ra tyin ña cuñí ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvaha ndaha ra.

<sup>6</sup> Tacan tan quitá ra fariseo naha ra, tan quitsahá natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

*Nu cuaha xaan nyívi cuahán cuanyehé nu nyíi ra Jesús yuhu miñi*

<sup>7</sup> Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyívi iyó Galilea cuahán cuanyicún tsi ra naha.

<sup>8</sup> Tsa tsito nyívi tyin nahnu xaan tsa iyo javahá ra, cuaha ñi tsañan nu nyíi ra tyin cuñí ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihí ca ñuu tsa cayucú yatyin nu cayucú nduvi ñuu can.

<sup>9</sup> Tsa nyehé ra Jesús tsaá nyívi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuví ca nyívi, cuví quihví ra tsitsi yutun ndoo can tyin tacan tan ña cua tindahñi ñi tsi ra.

<sup>10</sup> Tsa cuaha xaan nyívi janduvaha ra, yacan cuenda tsañan cuaha ca nyívi cuuhví nu nyíi ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi.

<sup>11</sup> Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi caná tsaa nu tan catyí nu tsihin ra:

—¡Yoocho cuví Sehe Nyoo!

<sup>12</sup> Tan tandihí ñi cuhva tsa caahán tatyí ña vaha yóo ra cuví ra, tyasí ra nu cahan nu.

*Nu nacatsj ra Jesús tsi utsi uvi ra caca tyíñu ra*

(Mt. 10.1-4; Lc. 6.12-16)

<sup>13</sup> Tsa yaha yacan tan ndaa ra Jesús iin yucu tan caná ra tsi ra tsa cuñi maa ra cana ra. Tacan tan cuahán ra naha nu nyíi ra.

<sup>14</sup> Tan tsitsi tsa tandihí ra tsa caná ra, nacatsj ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo.

<sup>15</sup> Tan tsaha ra ndatu tsi ra naha tsa janduvaha ra naha tsi nyívi cuuhví, tan tava ra naha tatyí ña vaha yihí tsi nyívi.

<sup>16</sup> Ihya nyecú sivi ra naha: ra Simón, tsa jacunañi tucu ra Jesús Pedro;

<sup>17</sup> tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”.

<sup>18</sup> Tan tandihí ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cuhun cuatyí siquí ñuu Roma tsa ndacá ñaha tsi ñi;

<sup>19</sup> tan ra Judas Iscariote, tsa xicq tsi ra Jesús.

Tsa yaha yacan tan cuahán ra Jesús tsitsi iin vehe tsihin ra tsicá tsihin ra.

*Nu xaan iñi tsi ra Jesús catyi nahnu tyin tsihin tunyee iñi nu ña vaha javahá ra tsa iyo (Mt. 12.22-32; Lc. 11.14-23; 12.10)*

<sup>20</sup> Tan nducuahá nyivi nu yucú ra naha inga tsaha, tan nda cuanda ña cuyatyí ca ra naha catsi ra naha.

<sup>21</sup> Tsa tsitö nyivi ra Jesús tyin nyii ra ican, tsahan ñi tsiquihñ ñi tsi ra tyin cunuhu ra tsihin ñi, tyin catyi nyivi tsihin ñi tyin ndusaná iñi ra.

<sup>22</sup> Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaá ra naha nu nyii ra Jesús tan catyi ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihí tatyí ña vaha —catyi ra naha.

<sup>23</sup> Tsa tuví iñi ra Jesús tyin tacan caahán ra naha, caná ra tsi ra naha tan tsahá ra iin cuhva tsi ra naha, tan catyi ra tsihin ra naha:

—¿A cuví tavá nu ña vaha juvin ñi maa tahan nu? Ña cuví.

<sup>24</sup> Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundihi tsa ndacá ñaha ra naha.

<sup>25</sup> Tacan tucu ñi tun nyivi iyó iin caa ñi iin vehe tan cañi tahan ñi, cua cusñin ñi tan ña cua cuví coo vaha ñi.

<sup>26</sup> Tan tun nu ña vaha tan ndusñin nu tan nduvita iin nu siqui inga nu, ¿náa cua tahan nahnu? Cua ndusñin nahnu tan cua cundihi nahnu.

<sup>27</sup> Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñí tsi cuhñi jihna ra tsi ra jatsii vehe can tan cuví quihvi ra suhu ra tsa tsii ra.

<sup>28</sup> Tsa nditsa catyi yu tsihin ndo tyin cuví coo tucahnu iñi tsi nyivi tsa cuenda tandihí nuu cuatyí javahá ñi, tan tsa cuenda tucu tsa caahán ñi tsa ña vaha.

<sup>29</sup> Maa tyin tun cahan ñi ndavaha ñi siqui Tatyí li Nyoo, ña cua jaha maa Nyoo tuc-ahnu iñi tsi ñi; cua coo cuatyí ñi yoso cuahan quivi —catyi ra Jesús.

<sup>30</sup> Tacan cahan ra Jesús tsihin ra maestro cuenda ley vehe ñuhu naha ra, tyin catyi ra naha tyin tatyí ña vaha yihí tsi ra.

*Nu catyi ra Jesús tyin nyivi tyaa yahvi tuhun Nyoo, juvin ñi cuví yañi ra, tan sihi ra (Mt. 12.46-50; Lc. 8.19-21)*

<sup>31</sup> Tacan tan tsaá sihi ra Jesús tan yañi ra nu nyii ra, maa tyin ndoo ñi ityi tsata vehe, tan catyi ñi tsihin ra nyecú ican naha ra tyin cana ra naha tsi ra Jesús.

<sup>32</sup> Tan catyi nyivi nyecú nanñi canduvi xiin ra Jesús tsihin ra:

—Sihi un, yañi un tan cuhva un nanducú ñi tsi un nyecú ñi tsata vehe can —catyi ñi tsihin ra.

<sup>33</sup> Maa tyin catyi ra:

—¿Yóo cuví sihi yu tan yañi yu?

<sup>34</sup> Tacan tan nanyehé ra nanñi canduvi nu nyaá ra, tan catyi ra:

—Nyivi nyecú ihya cuví sihi yu, yañi yu tan cuhva yu.

<sup>35</sup> Tyin tandihí nyivi javahá cuhva cuñí Nyoo, juvin ñi cuví yañi yu, cuhva yu tan sihi yu —catyi ra Jesús.

## 4

*Nu caahán ra Jesús tyin ra caahán tuhun Nyoo cuví ra tumaa iin ra tatsí (Mt. 13.1-9; Lc. 8.4-8)*

<sup>1</sup> Quitsahá jacuahá ra Jesús inga tsaha yuhu miñi. Tan cuaha xaan nyivi ndu iin nu nyii ra. Tan tsa cuenda tsa cuaha xaan ñi cuví, quihvi ra tsitsi yutun ndoo tsa canyii nu ndutya yuhu miñi can, tan tsinyaa ra tsitsi can. Tan ndoo tandihí maa nyivi nu nyiti.

<sup>2</sup> Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyi ra tsihin ñi:

<sup>3</sup> —Tyaa soho ndo tsa cua cahan yu. Iin ra quita ra yuvehe ra. Tan cuahán ra cua tatsi ra trigu nu ñuhu ra.

<sup>4</sup> Tan cuhva tsa quiti ra tsiti trigu can, cucoyo juhva tsi yuhu ityi. Maa tyin quitsi saa tan tsatsj ti naha ti itsi.

<sup>5</sup> Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi caná tsiti can tyin ña cuaha nyahyu yihí tyañu yuu can.

<sup>6</sup> Maa tyin tsa caná ñicanyii, iin yaha ñi na ityi tsi tyin ña cunu cuahán yoho tsi.

<sup>7</sup> Tan juhva ca tsiti can cucoyo tsi tyañu iñu. Quivi caná tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahñi can trigu can. Yacan cuenda ña tsahá trigu can tsiti.

<sup>8</sup> Maa tyin juhva ca tsiti can cucoyo tsi nu ñuhu vaha. Caná tsi tan tsahnú tsi, tan cuaha tsiti tsahá tsi. Tyin tsa intuhun tsiti can, tsahá tsi oco utsi tsiti tsitsi yoco tsi. Tan inga tsiti can tsahá tsi uñi xico, tan inga tsi tsahá tsi iin cientu —catyi ra Jesús tsihin ñi.

<sup>9</sup> Tan catyi nyico ra tsihin ñi:

—Nyooho tsa iyó soho, tyaa soho ndo tsa caahán yu.

*Nu tsahá cuenda ra Jesús nacuenda jacuahá ra tsi nyivi tsihin cuhva (Mt. 13.10-17; Lc. 8.9-10)*

<sup>10</sup> Tsa yahá yacan tan ndoo maa ña ra Jesús tsihin ra tsicá tsihin ra tan nyivi nyicún tsi ra. Tan tsicá tuhun ñi:

—¿Náa cuñí tsi catyi tsa cahan un nañi?

<sup>11</sup> Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyívi jacotó yu can tsi ñi tsihin cuhva ñi tyin ña cuñi ñi cunyicun vaha ñi tsi yu.

<sup>12</sup> Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñi ñi, ña cua cutuñi iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tuc-ahnu iñi tsi ñi tsa cuenda cuatyí ñi —catyí ra Jesús tsihin ñi.

*Nu tsahá cuenda ra Jesús tsa cuñi tsi catyí tuhun ra tatsí*

(Mt. 13.18-23; Lc. 8.11-15)

<sup>13</sup> Tan catyí ndihí ra tsihin ñi:

—Tun ña cutuñi iñi ndo tuhun cahán yu nañi, ndi ña cua cutuñi iñi ndo tandihí ca tsa cua jacuahá yu tsi ndo tsihin cuhva ñi.

<sup>14</sup> Ra tatsí trigu can cuví ra caahán tuhun Nyoo.

<sup>15</sup> Yihí nyívi cuví ñi tumaa nu cucoyo tsiti trigu yuhu ityí tyin tsiñi ñi tuhun Nyoo, maa tyin yahá can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi.

<sup>16</sup> Tan juhva nyívi cuví ñi tumaa nu cucoyo tsiti trigu tsata yuu tyin sii xaan cuñi ñi tsiñi ñi tuhun Nyoo juhva ñi quívi.

<sup>17</sup> Maa tyin ña ndoó tsi añima ñi tan ña cuví cuahnú ñi tan juhva ñi quívi tsinú iñi ñi, yacan cuenda cuví ñi tumaa nu cucoyo tsiti tsata yuu tyin tsata yuu can luxu cuñi ñi nyahyu yihí. Yacan cuenda ña tsahnú tsi tyin ña ñihí tsi nu cuhun yoho tsi. Tacan cuví nyívi can, tyin quívi vatsi tundoho síqui ñi, tan caahán nyívi tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo.

<sup>18</sup> Tan juhva nyívi cuví ñi tumaa nu cucoyo tsiti tyañu iñu tyin tsiñi ñi tuhun Nyoo,

<sup>19</sup> maa tyin tsicá xaan iñi ñi tundoho ñayívi ihya tan ña tsicá iñi ñi tuhun Nyoo. Nyíyo iñi ñi tsa cuca, tan cuñi ñi coo tandihí tsa iyó nu ñuhu ñayívi ihya tsi ñi. Tan tandihí yacan jatyañú can tsi ñi, tan cuví ñi tumaa cuví yutun tsa ña tsahá tsiti.

<sup>20</sup> Maa tyin nyívi tsa tsiñi tuhun Nyoo tan naquihín vaha ñi itsi, tan javahá ñi tandihí tsa caahán tsi, juvin ñi cuví tumaa ñuhu vaha nu cucoyo tsiti can tyin tsiti tsa cucoyo can caná vaha tsi, tsahnú tsi, tan yihí tsi tsahá tsi oco utsi tsiti. Inga tsi tsahá tsi uñi xico tsiti, tan inga tsi tsahá tsi cientu tsiti.

*Nu cahán ra Jesús tyin ña taahán tsi tyihí xeehe yo ñuhú Nyoo tsa jandunditsín añima yo coto quihin nyaa ra itsi*

(Lc. 8.16-18)

<sup>21</sup> Tan catyí tucu ra tyehen tsihin ñi:

—¿A tsicán yo ñuhú tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can naní tsitsi vehe.

<sup>22</sup> Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyívi. Tyin tandihí maa tan cua quita nu nditsin tan coto yo can.

<sup>23</sup> Nyoocho tsa iyó soho, tyaa soho ndo tsa caahán yu —catyí ra Jesús tsihin ñi.

<sup>24</sup> Tan catyí tucu ra:

—Tyaa soho vaha ndo tsa caahán yu tyin tun tyaá yahvi ndo tuhun tsiñi ndo, cuaha ca tsa cua cuhva Nyoo tsi ndo.

<sup>25</sup> Tyin nyívi tyaá soho tsa caahán yu, cuaha ca cua cuhva Nyoo tsi ñi. Maa tyin nyívi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yahá ñihí ñi.

*Nu tsahá ra Jesús iin cuhva nácaa tsahnú iin tsiti*

<sup>26</sup> Tan catyí tucu ra Jesús:

—Tsa ndacá ñaha Nyoo tsi nyívi cuví tsi tumaa tsiti tsa tatsí nyívi.

<sup>27</sup> Tyin nyívi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quívi tsa tatsí ñi, tacan tan cuahán ñi cuanyehé ñi inga tsaha. Tsa tsaa ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi,

<sup>28</sup> tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsiti.

<sup>29</sup> Tan tatun tsa tsitsa tsiti tsi, tacan tan jocón ñi itsi tyin tsa tahán maa tsi quívi coyo tsi —catyí ra Jesús.

*Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo*

(Mt. 13.31-32; Lc. 13.18-19)

<sup>30</sup> Tan catyí tucu ra Jesús:

—¿Nacaa cuví tsa ndacá ñaha Nyoo tsi nyívi? ¿A cuví jandu inducu yo itsi tsihin náa tsihin? Cuví.

<sup>31</sup> Tyin cuví tsi tumaa iin tsiti mostaza tsa tatsí nyívi. Tsiti can cuví tsa nyihí ca tan ñavin ca tandihí ca tsiti tsa iyó nu ñuhu ñayívi.

<sup>32</sup> Maa tyin tsa yaha tatsí tsi, caná tsi tan ndunahnú tsi, tan cuví tsi yutun tumaa nducuaya. Nduahnú soco tun, tan cuahán saa cua quitatu ti naha ti nuu tun.

*Nu tsahá cuenda ra Jesús nacuenda jacuahá ra tsi nyívi tsihin cuhva ñi*

(Mt. 13.34-35)

<sup>33</sup> Tacan jacuahá ra Jesús tsi nyívi, tsihin cuaha cuhva, ndihí cuhva cuví cutuñi iñi ñi.

<sup>34</sup> Tan tandihí tsaha tsa cahán ra tsihin ñi maa ñi maa tsihin cuhva cahán ra. Maa tyin cahán catsi ra tsihin ra tsicá tsihin ra.

*Nu jacutaxín ra Jesús tatyí xaan nu miñi*  
(Mt. 8.23-27; Lc. 8.22-25)

<sup>35</sup> Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

<sup>36</sup> Tacan tan ra Jesús tan ra tsicá tsihin ra nacoꝝ ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha.

<sup>37</sup> Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñí cutu yutun ndoo can.

<sup>38</sup> Tan ra Jesús canyí ra quixí ra tsa yatyin xuu yutun ndoo can, tan nyanaá iin jahma jiñi ra. Jandotoꝝ ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñí nyee yo?

<sup>39</sup> Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuñí ñi cuví.

<sup>40</sup> Tacan tan catyí ra Jesús tsihin ra tsicá tsihin ra:

—¿Nacuenda yuuhvi xaan ndo? ¿A ña tsinu iñi ndo? —catyí ra tsihin ra naha.

<sup>41</sup> Maa tyin iyo xaan cuñí ra naha tsa nyeheꝝ ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuenda tatyí tan ndutya tyaá yahvi tsi naha tsi tsi ra —catyí ra naha.

## 5

*Nu caahán ra Jesús tyin ra caahán tuhun Nyoo cuví ra tumaa iin ra tatsi Nu nduvahaq iin ra Gadara tsa yihí tatyí ña vaha*  
(Mt. 8.28-34; Lc. 8.26-39)

<sup>1</sup> Tsaá ra naha inga tsiyo miñi nda nu ñuhu cuenda Gadara.

<sup>2</sup> Tsa quitá ra Jesús tsitsi yutun ndoo, tan quitá iin ra yihí tatyí ña vaha nu ndaa cumi santu, tan tsaá ra nu nyaá ra.

<sup>3</sup> Tan nu ndaa can iyó maa ra can. Tsaahñí ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñí ra.

<sup>4</sup> Cuaha xaan tsaha tsahñí nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunyeet tsi ra.

<sup>5</sup> Tan tsicá nuu maa ra caná tsaá ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu.

<sup>6</sup> Maa tyin ndi cañi ca quitá ra Jesús, tan nyeheꝝ ra can tsi ra, tan tsinú xaan ra tsahan ra, tsicuiñí tsiti ra nuu ra.

<sup>7</sup> Tan caná tsaá ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

<sup>8</sup> Tacan catyí nu tatyí ña vaha can tsihin ra Jesús tyin tsa yahá cahan ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

<sup>9</sup> Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

<sup>10</sup> Tan caahán ndaahvi nu tsihin ra Jesús na ña jacuhun cañi ra tsi nahnu.

<sup>11</sup> Yatyin ñi yucu can yucú cuaha quini tsatsi ti naha ti.

<sup>12</sup> Tacan tan catyí tandihí nahnu tsihin ra Jesús:

—¡Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

<sup>13</sup> Tacan tan tsaá ra Jesús ndatu tsi nahnu, tan quihvi nahnu tsitsi quini can. Quitá nahnu tsi ra can tan quitá tumaa uvi mil quini yucú can. Tsa quihvi nahnu tsitsi ti naha ti, quitsahá tsinú ti naha ti, tan yahá ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

<sup>14</sup> Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhí ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihí nyivi tsa cahan ra naha tsihin, tsahan ñi tsinyehe ñi tsa cuví can.

<sup>15</sup> Cuhva tsa tsaá ñi nu nyii ra Jesús, nayuhvi xaan ñi tsa nyeheꝝ ñi tsi ra tsa yihí tatyí ña vaha can. Nyaá taxin ra, nditsi ra jahma, tan vaha cuñi ra.

<sup>16</sup> Tan tandihí maa nyivi tsa nyeheꝝ tsa tahan ra can tan tsa tahan quini can, catyí tuhun ñi can tsihin inga ca nyivi.

<sup>17</sup> Tacan tan quitsahá caahán ndaahvi ñi tsihin ra Jesús, na ña ndoo ra nu ñuhu ñi.

<sup>18</sup> Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra.

<sup>19</sup> Maa tyin ña tsaá ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyí tuhun tsihin ñi tandihí tsa javaha Jutu Mañi yo Nyoo tsihin un, tan nácaa cundaahvi iñi ra tsi un.

<sup>20</sup> Tacan tan cuanuhú ra tan quitsahá catyí tuhun ra tsihin nyivi iyó tandihí ñuu tsa

cayucú Decápolis tandihí tsa javahá ra Jesús tsihin ra. Tan iyo xaan cuñí ñi.

*Nu nduvahá sehe ra Jairo tan ñaha tsa tññ jahma ra Jesús*

(Mt. 9.18-26; Lc. 8.40-56)

<sup>21</sup> Tsa tsaá ra Jesús tsihin yutun ndoo nda inga tsiyo miñi can, tsaá cuaha nyivi nu tsaá ra. Tan ndoo ra yuhu miñi ican.

<sup>22</sup> Tacan tan tsaá iin ra nyisó tyiñu vehe ñuhu, nañi ra Jairo. Cuhva tsa nyehe ra tsi ra Jesús, tsicuiñi tsiiti ra nuu ra.

<sup>23</sup> Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyjso ndaha un jiñi ñaha sehe yu, na nduvaha ña tyin tsa cuñí cúu cuii ña ña.

<sup>24</sup> Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahan ña maa ñi.

<sup>25</sup> Tsihin nyivi can cuahán ndihí iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña.

<sup>26</sup> Tan cuaha xaan tundoho nyehe ña tsihin tsa cuaha doctor. Tandihí xuhun ña janaá ña tsihin ra naha, maa tyin nduve maa náa catyí janaá ña xuhun ña tyin vihi ca nduñihí cuuhvi ña.

<sup>27</sup> Tsa tsiñi ña caahán nyivi tyin tsaá ra Jesús, natuhvá ña ityi tsata ra tan tññ ña jahma ra.

<sup>28</sup> Tyin tsicá iñi maa ña: “Tatun tññ yu vasu tan jahma ra, cua nduvaha yu”.

<sup>29</sup> Tsa tññ ña jahma ra iin yaha ñi cutaxin tsa cuún niñi ña. Tan tuvji iñi cuñu ñuhu ña tyin tsa janduvahá ra tsi ña.

<sup>30</sup> Tsa tuvji iñi ra Jesús tyin nduvahá iin nyivi tsihin tunyee iñi tsa iyó tsi ra. Tacan tan nanyicó coo ra ityi tsata ra tan tsicá tuhun ra tan catyí ra:

—¿Yóo tññ jahma yu?

<sup>31</sup> Tacan tan catyí ra tsicá tsihin ra:

—¿Nacuenda tsicá tuhun ca un: yóo tññ jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

<sup>32</sup> Maa tyin ra Jesús nanyehe ra nanii ñi tyin cuñí ra coto ra yóo tññ jahma ra.

<sup>33</sup> Tacan tan ñaha can tsahán ña tsicuiñi tsiiti ña nuu ra Jesús tyin tsitó vaha ña tyin tsa nduvahá ña. Yuuhví ña tan nihí ña tsahan ña tsicatyi tuhun ña tandihí tsa nditsa tsihin ra.

<sup>34</sup> Tan catyí ra Jesús tsihin ña:

—Nduvahá un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

<sup>35</sup> Ndi caahán ca ra Jesús tan tsaá nyivi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña cahan yuhu ca un tan ña jatyañu ca un tsi ra Maestro ihya —catyí ñi tsihin ra.

<sup>36</sup> Maa tyin ra Jesús ña tyaá yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsjnu iñi yooho —catyí ra tsihin ra.

<sup>37</sup> Tan ña tsahá ra cuhun cuaha nyivi tsihin ra. Tan quihñ ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra.

<sup>38</sup> Tsa tsaá ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsaá ñi.

<sup>39</sup> Quihvi ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi ña —catyí ra tsihin ñi.

<sup>40</sup> Maa tyin ña tsinú iñi ñi tan tsacú naaha ñi nyehé ñi tsi ra. Tacan tan tava ra tsi tandihí ñi nuquehe, tan quihñ ra tsi jutu ñaha luhlu tsa tsihi can tan sihi ña tan ra tsa tsaá tsihin ra, tan quihvi tandihí ñi nu canyií ña.

<sup>41</sup> Tan tññ ra ndaha ña, tan catyí ra tsihin ña:

—Talita cumi —tan cuñí tsi catyí tsi tye-hen: Catyí yu tsihin yooho ñaha luhlu, jnduvita!

<sup>42</sup> Juvñ ñi cuhva can tan nduvitá ña, tan nacacá ña. Utsi uvi cuiya ña. Tan tsa nyehe nyivi tsa iyo tsa javahá ra Jesús, iyo xaan cuñí ñi cuvji.

<sup>43</sup> Maa tyin ra Jesús ñihi tsahá cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

## 6

*Nu tsinuhú ra Jesús ñuu Nazaret nu tsahnú ra*

(Mt. 13.53-58; Lc. 4.16-30)

<sup>1</sup> Tacan tan quitá ra Jesús ican, tan cuanuhú ra nda ñuu ra. Tan ra tsicá tsihin ra cuahán ndihí ra naha tsihin ra.

<sup>2</sup> Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsahá jacuahá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñí ñi tsa tsiñi ñi tsa caahán ra, tan catyí ñi:

—¿Numaa tahan cutuhvá ra ihya tandihí tsa tsitó ra? ¿Yóo tsahá tsa tsiñi tuñi iñi ra? ¿Tan nácaa cutuhvá ra javahá ra tsa iyo?

<sup>3</sup> Tan ra tahví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñi ñi tyaá yahvi ñi tsi ra.

<sup>4</sup> Maa tyin catyí ra tsihin ñi:



—Tandihí ñi ityi tan jahá tandihí nyívi tsa ñayívi tsi ra cuví ndusu yuhu Nyoo, maa tyin nyívi ñuu ra, tan nyívi ra, tan nyívi vehe ra ña tyaá yahvi ñi tsi ra —catyí ra Jesús.

<sup>5</sup> Tan tyisó ndaha ra jiñi juhva nyívi cuhvi, tan janduvahá ra tsi ñi, maa tyin ña cuví javahá ra inga ca tsa iyo.

<sup>6</sup> Tan iyo cuñí ra tyin ña tsinú iñi ñi tsi ra. Tacan tan cuahán ra cuajacuahá ra tsi nyívi iyó tandihí ñi ñuu nyihi tsa cayucú yatyin ñi ñuu can.

*Nu jacuhun ra Jesús tsi ra tsicá tsihin ra cucahan ra naha tuhun Nyoo*

(Mt. 10.5-15; Lc. 9.1-6)

<sup>7</sup> Tsa yahá yacan tan caná ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quítsahá jacuhún ra uvi uvi ra naha. Tan tsahá ra ndatu tsi ra naha tsa tava ra naha tatyí ña vaha tsi nyívi.

<sup>8</sup> Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi.

<sup>9</sup> Tan cunyaa ndítsan tsaha ra naha. Tan ña cundaha ra naha inga ndítsi jahma, na cuhun ra naha tsihin cuhva ndítsi ñi maa ra naha.

<sup>10</sup> Tan catyí ra tsihin ra naha:

—Cuhva tsa tsaa ndo iin ñuu, quihvi ndo iin vehe, tan ndoo ndo ican nda cuanda quíta ndo ñuu can.

<sup>11</sup> Tan tatun tsaa ndo iin ñuu tan ña naquihin cuenda nyívi iyó ñuu can tsi ndo, tan ña cuñi ñi tyaá soho ñi tsa cua cahan ndo, quíta ndo ican tan naquisi ndo nyaca tsaha ndo tan yacan janaha tyin ndoo cuatyí ñi siqui ñi. Tsa ndítsa catyí yu tsihin ndo, tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi ñi can tan ñavin ca nyívi ñuu Sodoma tan ñuu Gomorra —catyí ra Jesús tsihin ra naha.

<sup>12</sup> Tacan tan cuahán ra naha cuacahán ra naha tuhun Nyoo tsihin nyívi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo.

<sup>13</sup> Tan cuaha ñi nyívi tava ra naha tatyí ña vaha. Tan tyihí ra naha acetye tsi nyívi cuhvi tan nduvahá ñi.

*Nu tsahá cuenda tsi náca tsihi ra Juan, ra jacoondutyá tsi nyívi*

(Mt. 14.1-12; Lc. 9.7-9)

<sup>14</sup> Ra rey Herodes tsitó ra tsa javahá ra Jesús tyin tandihí nyívi tan caahán ñi tsa javahá ra, tan tsicá iñi ra tyehen:

—Ra ihya cuví ra Juan, ra jacoondutyá tsi nyívi, ra tsa tsihi. Vityin nandoto ra. Juvín ra cuví can, yacan cuenda iyó tunyee iñi tsi ra —cuñí ra Herodes, tsicá iñi ra.

<sup>15</sup> Yihí nyivi catyí ñi:

—Ra Elías, ra cuví ndusu yuhu Nyoo tahán tsanaha, cuví ra.

Tan catyí tucu inga ñi:

—Nduyu yuhu Nyoo cuví ra, tumaa ra tsicoo tahán tsanaha naha ra —catyí ñi.

<sup>16</sup> Tsa tsiñi ra Herodes tandihí tsa caahán nyívi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

<sup>17</sup> Tacan catyí ra tyin juvin ñi maa ra tava tyiñu na tyihi ra naha tsi ra Juan vehe caa tan cuhñi ra naha tsi ra tsihin carena. Tacan javahá ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihín ra tsi ña Herodías tyin cuví ña ñasihi ra

<sup>18</sup> Tan tsa tacan javahá ra, catyí ra Juan tsihin ra tyin ña vaha tsa quihín ra tsi ña Herodías tyin ñasihi yañi ra cuví ña.

<sup>19</sup> Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví,

<sup>20</sup> tyin ña tsahá ra Herodes tyin tsitó ra tyin ra vaha cuví ra Juan tan cuíti iyó ra nuu Nyoo, tan yuuhvi ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñi iñi ra Herodes tandihí tsa caahán ra Juan, maa tyin vaha cuñi ra tyaá soho ra tsa caahán ra.

<sup>21</sup> Maa tyin tsa tahán tsi quívi cacú ra Herodes javahá ra iin vico. Tan caná ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quívi ihya tsican ña Herodías tsa cuñi ña tsi ra Herodes.

<sup>22</sup> Tyin ñaha sehe ña tsahan ña tsicuañi ña yaa nu iyó vico ra Herodes. Tan tahán xaan iñi ra Herodes tan ra nyecú cuxiñi tsihin ra cuhva tsañi ña. Tacan tan catyí ra Herodes tsihin ña:

—Ndácan tsi yu náa cuñi maa un. Náa tahan ñi maa tsi cua ndacan un tsi yu cua cuhva maa yu can tsi un.

<sup>23</sup> Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

<sup>24</sup> Tacan tan quita ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndácan jiñi ra Juan, ra jacoondutyá tsi nyívi tsi ra —catyí ña.

<sup>25</sup> Tacan tan numi ñi quihvi nyico ñaha tyuvaa can nu nyii ra rey Herodes, tan catyí ña tsihin ra:

—Cuñi yu jiñi ra Juan, ra jacoondutyá tsi nyívi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

<sup>26</sup> Tacan tan cuihya xaan cuñí ra rey can cuví. Maa tyin tsa cuenda tsa caḥan ra tyin cua cuhva maa ra tsa cua ndacan ña, ña cuñí ra jandaví ñaha ra tsi ña tyin tandihí maa nyívi yucú vico can tan tsiñí ñi tsa caḥan ra, yacan cuenda tsaḥa ra tsa tsicān ña.

<sup>27</sup> Numi ñi tavaḥ tyiñu ra rey can tsi iin andaru na cuquihin ra jiñi ra Juan.

<sup>28</sup> Tsaḥan andaru can tsitsi vehe caa, tan tsaḥnya ra jucun ra Juan. Tan tsindaca ra jiñi ra Juan tsi ñaha tyuvaa can, nyí tsi nu iin coho. Tan nacuhva cuenda ña can tsi sihi ña.

<sup>29</sup> Tsa tsitō ra nyicún tsi ra Juan tsa cuví, tsaḥan ra naha tsiquihin ra naha cuñu ñuhu ra, tan tsicutsj ra naha can.

*Nu jacatsj ra Jesús uhun mil rayii  
(Mt. 14.13-21; Lc. 9.10-17; Jn. 6.1-14)*

<sup>30</sup> Tsa yahaḥ yacan tan ndu iin ra tsicá tyiñu ra Jesús tsihin ra, tan catyí tuhun ra naha tsihin ra tandihí tsa javaha ra naha, tan tsa jacuahā ra naha nu tsaḥan ra naha tsicahān ra naha tuhun Nyoo tsihin nyívi.

<sup>31</sup> Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyívi cuahán tan vatsí, tan ndi ña cuyatyí ra naha catsi ra naha jahá ñi.

<sup>32</sup> Tacan tan quihví ra Jesús tsihin ra naha tsitsi iin yutun ndoo tan cuahán ra naha iin nu taxin caa.

<sup>33</sup> Maa tyin cuaha xaan nyívi nyeḥe ñi cuahán ra naha. Tan nacotó ñi tsi ra Jesús. Tacan tan cuahán ñi tsihin tsaḥa ñi, quitā ñi tandihí ñi ñuu tan jihna ca ñi tsaā nu cua tsaā ra Jesús.

<sup>34</sup> Cuhva tsa tsaā ra naha, quitā ra Jesús tsitsi yutun ndoo tan nyeḥe ra tyin cuaha xaan nyívi yucú ican. Tan cundaahví iñi ra nyeḥe ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsahā jacuahá ra cuaha xaan tuhun vaha tsi ñi.

<sup>35</sup> Tsa tsa cua cuiso ñicanyii, tan natuhva ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyívi iyó yatyin ñi ihya.

<sup>36</sup> Vaha ca jacunuhu un tsi nyívi tyin ihya nduve tsa catsi ñi. Tan na kujata ñi paan catsi ñi vehe tsa iyó tsitsi huhu ihya tan ñuu tsa cayucú yatyin ñi —catyí ra naha tsihin ra.

<sup>37</sup> Maa tyin nacahān ra Jesús, tan catyí ra:

—Cuhva nyooḥo tsa catsi ñi.

Tacan tan nacahān ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihí nyívi ihya.

<sup>38</sup> Tan catyí ra Jesús tsihin ra naha:

—Nyeḥe jihna ndo najava paan ndahá ndo —catyí ra.

Cuhva tsa tsitō ra naha najava paan ndahá ra naha, tacan tan tsicahān ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

<sup>39</sup> Tacan tan catyí ra tsihin nyívi na cunyecú ñi nu huhu can.

<sup>40</sup> Tan tsinyecú cuenda cientu tan cuenda uvi xico utsi ñi tsa iin huhu tsinyecú ñi.

<sup>41</sup> Tacan tan quihin ra Jesús tsa uhun paan can tan nduvi tyaca can. Tan nanyeḥe ndaa ra ityi siqui, tan nacuhvaḥ ra tyahví nyoo tsi Nyoo, tsa yahaḥ tan tsaḥnu cuatyí ra paan can, tan tsaḥa ra can tsi ra tsicá tsihin ra tyin tsatsa ra naha can tsi nyívi. Tsa ndihí tsatsa ra naha paan can, tan tsatsa ndihí ra naha tyaca.

<sup>42</sup> Tsatsj tandihí ñi tan ndahā iñi ñi.

<sup>43</sup> Tan jacutuḥ ra naha utsi uvi tyica tsihin paan tan tyaca tsa ndoo.

<sup>44</sup> Tan uhun mil rayii tsaḥj paan can.

*Nu tsicá ra Jesús nu ndutya  
(Mt. 14.22-27; Jn. 6.16-21)*

<sup>45</sup> Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cahun cuee ñi ra naha nda ñuu Betsaida tsitsi tsa ndi jacunuhu ra tsi nyívi yuveḥe ñi.

<sup>46</sup> Tsa yahaḥ cuanuhuḥ nyívi, tacan tan cuahán ra Jesús cuandacán tahvi ra tsi Nyoo iin jiñi yucu.

<sup>47</sup> Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyíi ra yuhu miñi can.

<sup>48</sup> Tan tsa nyeḥe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaḥa ra nu ndutya nu cuahán ra naha tsa tsa cuñi tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha.

<sup>49</sup> Maa tyin tsa nyeḥe ra naha tsicá ra nu ndutya, tsicá iñi ra naha tyin tatyí cuví ra, tacan tan quitsahā caná tsaā ra naha

<sup>50</sup> tyin tandihí ra naha nyeḥe ra naha tsi ra tan nayuhví ra naha. Maa tyin nacahān ra tan catyí ra tsihin ra naha:

—Ña nayuhví ndo tyin maa yu cuví!

<sup>51</sup> Tacan tan quihví ra tsitsi yutun ndoo nu yucú ra naha, tan tsa yahaḥ quihví ra, iin yaha ñi cutaxin tatyí can. Tan iyo xaan cuñí ra naha cuví

<sup>52</sup> tyin ñaha ca cutuñi iñi ra naha tsa iyo tsa javahaḥ ra tsihin paan, tyin ndi ndava añima ra naha.

*Nu janduvahaḥ ra Jesús nyívi cuuhví tsa iyó nduhva tsa nañi Genesaret  
(Mt. 14.34-36)*

<sup>53</sup> Yahā sava ra naha nu miñi can tan tsaq ra naha Genesaret inga tsiyo yuhu miñi can, tan tsaññi ra naha yutun ndoo can yatyin ñi yuhu ndutya.

<sup>54</sup> Cuhva tsa quitā ñi ra naha tsitsi yutun ndoo can, tan nacoto nyivi tsi ra Jesús.

<sup>55</sup> Tacan tan tsinú xaan ñi cuahán ñi cuajacotó ñi tsi nyivi iyó nanñi cahnu ityi can tyin tsaq ra Jesús. Tan tsaq cuaha nyivi quee tandihí ñi ñuu nu nyii ra, tan yucú nyivi cuuhví nu tsitó tsaq tsihin ñi.

<sup>56</sup> Tan tandihí ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyivi nyivi cuuhví yuhu ityi. Tan caahán ndaahví ñi tsihin ra na cuhva ra tñin ñi cuuhví can vasu tan yuhu jahma ra tan nduvaha ñi. Tan tandihí maa nyivi tsa tñin jahma ra nduvahā ñi.

**7**

*Tsa jatívi tsi nyívi nu Nyoo (Mt. 15.1-20)*

<sup>1</sup> Tacan tan tsaq juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús.

<sup>2</sup> Ra ihya naha ra nyehe ra naha tyin juhva ra tsicá tsihin ra Jesús ña nacatyā ra naha ndaha ra naha tan tsatsi ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahā ra can naha ra.

<sup>3</sup> Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyá ñi ndaha ñi cuaha tsaaha tumaa iyó maa ñi.

<sup>4</sup> Tan tatun ña nacatyā ñi ndaha ñi tsa tsaá ñi quee ñi nuyahví, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatyá ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi.

<sup>5</sup> Tacan tan tsicā tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoq tsii tsaahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsi ra naha —catyí ra naha tsihin ra.

<sup>6</sup> Tan nacahān ra Jesús, tan catyí ra:

—Nditsa tsa cahān ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi. Maa tyin ñavin tsihin tsa nñi iñi añima ñi.

<sup>7</sup> Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí

ra Isaías tuhun ndo jahā Nyoo, catyí ra Jesús tsihin ra naha.

<sup>8</sup> Tyin nyooho nacoq ndo cuhva caahán Nyoo, tan nyicún ndo cuhva caahán nyivi ñi, tumaa tuhvá ndo nacatyā ndaha tyiñu ndo, tan inga ca tsa tuhvá ndo javahá.

<sup>9</sup> Nyooho tyaq tsiyo ndo tuhun caahán Nyoo, tacan tan javahá ndo tuhun tsañnu tsa nacoq tsii tsaahnu ndo.

<sup>10</sup> Tyin catyí ley Nyoo tsa tyaq ra Moisés: “Tyaq yahvi ndo tsi jutu ndo tan tsi sihi ndo, tyin tandihí nyivi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaq ra Moisés.

<sup>11</sup> Maa tyin nyooho catyí ndo tyin cuví catyí iin nyivi tsihin jutu ñi o sihi ñi tyehen: “Ña cuví jatyinyee yu tsi un tyin tandihí tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihí can tsañā cuenda yu tsi Nyoo.”)

<sup>12</sup> Tan tatun catyí nyivi tacan, ña cuñí ca tsi jatyinyee ñi tsi jutu ñi o tsi sihi ñi, catyí ndo.

<sup>13</sup> Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsañnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

<sup>14</sup> Tacan tan canā nyico ra Jesús tsi nyivi tan catyí ra tsihin ñi:

—Tyaq soho vaha tandihí ndo tsa cua cahan yu, tan nducú ndo cuhva cutuñi iñi ndo.

<sup>15</sup> Tsa quihví yuhu nyivi, ña cuví jatívi tsi tsi ñi. Tsa jatívi tsi ñi cuví tsa quitá añima ñi.

<sup>16</sup> Nyooho tsa iyó soho, tyaq soho ndo tsa caahán yu —catyí ra Jesús tsihin ñi.

<sup>17</sup> Tsa yahā nacoq ra Jesús tsi nyivi, tan quihví ra tsitsi vehe, tacan tan tsicā tuhun ra tsicá tsihin ra náa cuñí tsi catyí tsa cahān ra.

<sup>18</sup> Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo?

<sup>19</sup> Tyin tsitsi yo quihví tsi tan ñavin añima yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janahā ra tyin tandihí nyayu tan vaha catsi yo itsi.

<sup>20</sup> Tan catyí tucu ra:

—Tsa quitá añima nyivi, yacan jatívi tsi ñi.

<sup>21</sup> Tyin tsa caquñi tsa tsicá iñi ñi tsitsi añima ñi quitá can, tacan tan rayñi cuñí ra coo inga ñaha tsi ra, o ñiñaha cuñí ñi coo inga rayñi tsi ñi. Yihí ra tsicoó ra tsihin inga ñaha tan ña tindahā ra tsihin ña. Yihí rayñi tsicoó ra tsihin ra ndusihí. Tan yihí ñiñaha tsicoó ñi tsihin ñi nduyi. Tan yihí ñi cuñí ñi cahñi ñi nyivi,

<sup>22</sup> o cuñí ñi suhu ñi. Yihí ñi cuñí ñi coo tsa tsii inga nyivi tsi ñi; yihí ñi javahá ñi tsa

caquiñi; yihí ñi jandaví ñaha ñi; yihí ñi iyó inga vicuú tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi.

<sup>23</sup> Tandihí tsa ña vaha ihya, quitá can tsitsi añima nyivi, tan jatívi can tsi ñi —catyí ra Jesús tsihin ra naha.

*Nu tsinú iñi iin ñaha inga ñuu tsi ra Jesús (Mt. 15.21-28)*

<sup>24</sup> Tsa yaha yacan tan quitá ra Jesús ñuu can, tan cuahán ra ñuhu nu canyíi ñuu Tiro tan ñuu Sidón. Tsa tsaá ra ican, quihví xeehe ra tsitsi iin vehe tyin ña cuñí ra coto nyivi numaa nyíi ra. Maa tyin ña cuví cunyíi xeehe ra

<sup>25</sup> tyin yatyi xaan tsitó sihi iin ñaha tyuvaa tsa yihí tatyí ña vaha nu nyíi ra. Tacan tan cuahán ña nu nyíi ra. Tsa tsaá ña tan tsicuiñi tsiti ña nuu ra.

<sup>26</sup> Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaá ña nu nyíi ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña.

<sup>27</sup> Maa tyin catyí ra Jesús tsihin ña:

—Ña çahan yuhu ca un; na catsi jihna nyivi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

<sup>28</sup> Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú ti tan tsatsí ti titsehe tsa cucoyó xuu mesa jahá sehe tsitoho ti —catyí ña tsihin ra.

<sup>29</sup> Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yaha quitá tatyí ña vaha tsi sehe un. Çuanuhu vityin —catyí ra tsihin ña.

<sup>30</sup> Tan cuhva tsa tsaá ña yuvehe ña, canyíi taxin sehe ña nu cama, tyin tsa yaha quitá tatyí ña vaha tsi ña.

*Nu janduvahá ra Jesús tsi ra soho tan ñiñhi*

<sup>31</sup> Quitá nyico ra Jesús ñuhu nu canyíi ñuu Tiro, tan yaha ra ñuu Sidón, tan cuahán ra inga ca ñuu tsa cayucú Decápolis. Yaha ra ican tan tsaá ra miñi Galilea.

<sup>32</sup> Tsa tsaá ra Jesús ican, tsaçan nyivi tsindacá ñi iin ra soho tsa ña cuví çahan nu nyíi ra. Çahan ndaahvi ñi tsihin ra na tyiso ra ndaha ra jiñi ra can.

<sup>33</sup> Tacan tan quihñin ra tsi ra can cuahán tsiyo tsihin ra nu nduve nyivi. Tan tyaxin ra nundaha ra tsitsi soho ra can, tan tiví sñi ra, tan tñin ra nu yaa ra can.

<sup>34</sup> Tacan tan nanyehé ndaa ra ityi andívi. Tan ixta tatyí ra, tan catyí ra:

—¡Efata! —tan tuhun ihya cuñí tsi catyí: ¡Nuñña!

<sup>35</sup> Tan tsihin can nuñña soho ra can, tan nduvahá yaa ra, tan cuví nacahan ra.

<sup>36</sup> Tan catyí ra Jesús tsihin ñi tyin ña çahan ñi can tsihin nyivi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javahá ra.

<sup>37</sup> Iyo cuñí ñi tan catyí ñi:

—Tandihí tsa javahá ra tan vaha javahá ra itsi. Nyivi soho nacuñí ñi jahá ra tan nyivi ñiñhi nacahan ñi.

## 8

*Nu tsaçá ra Jesús tsa catsi cumi mil nyivi (Mt. 15.32-39)*

<sup>1</sup> Quivi can nataca çaha nyico nyivi nu nyíi ra Jesús. Tan nduve maa tsa catsi ñi iyó. Tacan tan caná ra Jesús tsi ra tsicá tsihin ra, tan catyí ra tsihin ra naha:

<sup>2</sup> —Ndaahvi xaan cuñí yu nyehé yu nyivi ihya, tyin tsa uñi quívi yucú ñi tsihin yo, tan nduve ca tsa catsi ñi.

<sup>3</sup> Tyin tun jacuhun yu tsi ñi yuvehe ñi tsa ndi cumaña ca catsi ñi, cua cúu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

<sup>4</sup> Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

<sup>5</sup> Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Útsa taahan ñi.

<sup>6</sup> Tacan tan catyí ra tsihin nyivi na cunyecú ñi nu ñuhu. Tsa yaha çahan ra yacan, tacan tan quihñin ra tsa utsa paan can, tan nacuhvá ra tyahvi nyoo tsi Nyoo tsa cuenda can. Tsaçan tsañu cuatyí ra can tan tsaçá ra can tsi ra tsicá tsihin ra, tyin tsatsa ra naha can tsi nyivi.

<sup>7</sup> Tan ndahá tucu ra naha juhva tyaca nyihí. Tsaçá ndihí ra Jesús tyahvi nyoo tsi Nyoo tsa cuenda can, tacan tan tsaçá ra can tsi ra naha tyin tsatsa ra naha tsi nyivi.

<sup>8</sup> Tandihí ñi tsatsí ñi, tan ndahá vaha iñi ñi. Tsa ndihí tsatsí ñi tan jacutu ra naha utsa tyica tsihin tsa ndoo.

<sup>9</sup> Tan quitá maa cumi mil nyivi jacatsí ra. Yaha can tan jacunuhu ra tsi ñi.

<sup>10</sup> Tsa yaha çuanuhu ñi, tacan tan quihví ra tsihin ra tsicá tsihin ra tsitsi iin yutun ndoo. Tan cuahán ra naha ityi Dalmanuta.

*Nu tsicán ra fariseo naha ra tsi ra Jesús tyin javaha ra iin tsa iyo*

*(Mt. 16.1-4; Lc. 12.54-56)*

<sup>11</sup> Tsaá ra fariseo naha ra nu nyíi ra Jesús, tan quitsaça caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsí tsi ra, yacan

cuenda catyí ra naha tsihin ra tyin javaha ra iin tsa iyo nyehé ra naha.

<sup>12</sup> Tacan tan ra Jesús ñihi xaan ixtá tatyí ra, tan catyí ra:

—¿Nacuenda tyin tsicán nyívi iyó vityin tsa iyo? Tsa nditsa catyí yu tsihin ndo tyin ña cua nyehé ndo ndi intuhun tsa iyo —catyí ra tsihin ra naha.

<sup>13</sup> Tacan tan nacoó ra tsi ra naha, tan quihví nyico ra tsitsi yutun ndoo tan cuahán ra inga tsiyo miñi.

*Nu catyí ra Jesús tyin tsa jacuahá ra fariseo naha ra cuví can tumaa yutsan iya (Mt. 16.5-12)*

<sup>14</sup> Ra tsicá tsihin ra Jesús naá iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can.

<sup>15</sup> Tacan tan catyí ra Jesús tsihin ra naha: —Jaha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

<sup>16</sup> Tan ra tsicá tsihin ra quitsahá natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

<sup>17</sup> Tsa tuví iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añima ndo?

<sup>18</sup> Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A ña nducuhún iñi ndo tsa javahá yu

<sup>19</sup> quívi tsa jacatsj yu uhun mil rayii tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndoo? —catyí ra Jesús, tsicá tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

<sup>20</sup> Tan catyí nyico ra Jesús tsihin ra naha:

—Tan quívi jacatsj yu cumi mil nyívi tsihin utsa taahan ñi paan, ¿najava tyica jacutu ndo tsihin tsa ndoo?

Nacahan ra naha tan catyí ra naha:

—Utsa taahan tyica.

<sup>21</sup> Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

*Nu janduvahá ra Jesús iin ra cuaa nda ñuu Betsaida*

<sup>22</sup> Tsa yahá yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaá ra naha ican, tsindacá nyívi ñuu can iin ra cuaa nu yucú ra naha. Tan cahán ndaahví ñi tsihin ra Jesús tyin tñin ra tsi ra cuaa can tan janduvaha ra tsi ra.

<sup>23</sup> Tacan tan tñin ra ndaha ra cuaa can, tan quihñin ra tsi ra cuahán tsihin ra ityi tsata

ñuu. Tyaá sii ra nu ndaha ra tan tñin ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu.

<sup>24</sup> Ra cuaa can nanyehé ra tan catyí ra:

—Nyahé yu juhva nyívi, tan caá ñi tumaa caá yutun, maa tyin tsicá ñi —catyí ra.

<sup>25</sup> Tacan tan tñin nyico ra Jesús tinuu ra inga tsaha, tan nanyehé vaha ra tan nduvahá ra. Nanyehé catsi vaha ra tandihi tsa iyó.

<sup>26</sup> Tacan tan jacunuhú ra Jesús tsi ra yuvehé ra, tan catyí ra tsihin ra:

—Ña quihví un tsitsi ñuu ihya tan ña nacatyí tuhun tsehe tsihin nyívi —catyí ra Jesús tsihin ra.

*Nu cahán ra Pedro tyin ra Jesús cuví Cristo, ra jacacú tsiyo*

*(Mt. 16.13-20; Lc. 9.18-21)*

<sup>27</sup> Yahá can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javahá ra Felipe. Tsitsi tsa cuahán ra naha, tan tsicá tuhun ra Jesús tsi ra naha, tan catyí ra:

—¿Náa caahán nyívi tuhun yu? ¿Yóo ra cuví yu catyí ñi? —catyí ra tsihin ra naha.

<sup>28</sup> Nacahan ra naha tan catyí ra naha:

—Yihí nyívi catyí ñi tyin ra Juan, ra jacoondutyá tsi nyívi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

<sup>29</sup> Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñi ndo?

Tan nacahan ra Pedro tsihin ra:

—Yooho cuví ra Cristo, ra jacacú tsi nyívi.

<sup>30</sup> Maa tyin cahán ra Jesús tsihin tandihi ra naha tyin ña cahán ra naha can tsihin ndi intuhun maa nyívi.

*Nu cahán ra Jesús tyin cua cúu ra*

*(Mt. 16.21-28; Lc. 9.22-27)*

<sup>31</sup> Tacan tan quitsahá jacuahá ra tyin Rayii tsa queé nda gloria cua nyehé xaan ra tundoho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyívi tsi ra maa tyin cua nandoto ra tsa tsinu uñi quívi.

<sup>32</sup> Tacan cahán catsi ra tsihin ra naha. Tacan tan quihñin ra Pedro tsi ra cuahán tsihin ra tsata vehe tan quitsahá caahán ra tsihin ra Jesús tyin ña vaha tsa cahán ra.

<sup>33</sup> Maa tyin ra Jesús nanyico coo ra, tan nanyehé ra nu nyecú inga ra tsicá tsihin ra. Tan quitsahá caahán ra tsihin ra Pedro, tan catyí ra:

—¿Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyivi —catyí ra Jesús tsihin ra Pedro.

<sup>34</sup> Tacan tan cana ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyooho cuñí cunyicun tsi yu, cañhya iñi ndo nacoo ndo tsa cuñí maa ndo javaha ndo, tyin tacan tan cuvi javaha ndo cuhva cuñí Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihí quivi nyehé ndo tundoho tsa cuenda yu. Tyin yacan cuvi cruu tsa taahán tsi cuiiso ndo tun cunyicun ndo tsi yu.

<sup>35</sup> Tyin nyooho tsa ña cuñí nyehé tundoho tan cuhva ndo ñayivi ndo tsa cuenda yu, cua nyehé ndo tundoho anyaya. Maa tyin nyooho tsa cua cuhva ñayivi tsa cuenda yu tan tsa cuenda tuhun Nyoo, cua cacu ndo.

<sup>36</sup> Tyin nduve yahvi nyaá cua ñihí ndo tandihí tsa iyó nu ñuhu ñayivi ihya tun ña cua cacu añima ndo.

<sup>37</sup> Tyin nduve maa náa tsihin tyahvi ndo tan cuvi cacu añima ndo tan ña cunaa tsi.

<sup>38</sup> Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayi# tsa quee nda gloria cua nducahan nuu yu nyehé yu tsi ñi quivi quitsi yu tsihin ángel cuenda Nyoo Jutu yu tan tsihin tsa sii caá ra.

## 9

<sup>1</sup> Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehé ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

*Nu nyehé uñi ra tsicá tsihin ra Jesús nu nasama cuhva caá ra*

(Mt. 17.1-13; Lc. 9.28-36)

<sup>2</sup> Tsa yaha iñu quivi, tacan tan quihñ ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasama cuhva caá ra tan nyehé ra yucú tsihin ra can.

<sup>3</sup> Xiñu xaan tan cuitsin xaan jahma ra cuvi tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuvi janducuitsin ñi jahma tumaa cuitsin jahma ra.

<sup>4</sup> Tan nyehé ra naha tyin nyaá ra Elías tan ra Moisés tsihin ra, natuhún ra naha tsihin ra.

<sup>5</sup> Tacan tan catyí ra Pedro tsihin ra Jesús:

—Maestro, javaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro.

<sup>6</sup> Cahñ ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

<sup>7</sup> Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahan iin ndusu tan catyí tsi:

—Ra ihya cuvi Sehe yu, tan cuñí xaan yu tsi ra. Tyga yahvi ndo tsa caahán ra —catyí ndusu can.

<sup>8</sup> Tan cuhva tsa nanyehé ra naha, nduve ca ra Elías tan ra Moisés nyaá, intuhun ña maa ra Jesús nyaá.

<sup>9</sup> Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehé ra naha. Cuví cahan maa ra naha can nda yaha nandoto Rayi# quee nda gloria, tan rayi# can cuvi maa ra.

<sup>10</sup> Yacan cuenda ña cahan maa ra naha tuhun can, tan natuhún tahan ra naha náa cuñí tsi catyí tuhun tsa cua nandoto ra.

<sup>11</sup> Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuvi maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

<sup>12</sup> Tan nacahan ra, tan catyí ra:

—Ndítsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihí. ¿Tan náa catyí tuhun Nyoo cuenda yuhu Rayi# quee nda gloria? Catyí tsi tyin cua nyehé yu tundoho, tan ña cua cuñí nyivi nyehé ñi tsi yu.

<sup>13</sup> Maa tyin yuhu catyí yu tsihin ndo tyin tsa yaha quitsi ra Elías. Tan nyivi javaha ñi tsihin ra cuhva cuñí maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

*Nu janduvaha ra Jesús iin ra tyuvaa tsa yihí tatyí ña vaha*

(Mt. 17.14-21; Lc. 9.37-43)

<sup>14</sup> Tsa yaha yacan tan cuahán ra naha nu yucú tandihí ca ra tsicá tsihin ra naha. Tsa tsaá ra naha ican, nyehé ra naha tyin yucú cuaha nyivi nan# canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús.

<sup>15</sup> Tsa nyehé nyivi can tsi ra Jesús, iyo xaan cuñí tandihí ñi cuvi. Tacan tan tsahan ñi nu nyaá ra tsicuhva ñi nacumi tsi ra.

<sup>16</sup> Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

<sup>17</sup> Tacan tan nacahan iin ra tsa nyaá tyañu tandihí nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahá nu.

<sup>18</sup> Tyin tandihí ñi nu tññ tatyí can tsi ra, janduvá nu tsi ra, tan quita tiñuu yuhu ra, tan jacañyú ra nuhu ra, tan janduyuttún nu

tsi ra. Tsa yahā cahan yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

<sup>19</sup> Nacahan ra Jesús tan catyí ra:

—jNyooho nyivi ña tsinú iñi tan caquiñi! ¿Ndáa nda quiivi cua cunyi yu tsihin ndo? ¿Tan najava ca quiivi cua cunyeé iñi yu nyehe yu tsi ndo tyin ña tsinú vaha iñi ndo tsi yu? Ndaca ndo tsi ra luhlu can tsi yu ihya —catyí ra.

<sup>20</sup> Tacan tan tsindacá jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quitsahā tsicó tuvi ra nu ñuhu jahá nu. Tan quitá tiñuu yuhu ra.

<sup>21</sup> Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsahā taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra.

<sup>22</sup> Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñi nu cahñi nu tsi ra. Maa tyin tun cuví javaha un náa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

<sup>23</sup> Tan catyí ra Jesús tsihin ra:

—Tun tsinú iñi un, tandihí tan cua cuví tyin tsa cuenda ra tsa tsinú iñi tandihí tan cuví —catyí ra Jesús.

<sup>24</sup> Tacan tan caná tsaa jutu ra tan catyí ra tsihin ra Jesús:

—jTsinú iñi yu! jatyinyee tsi yu na tsinu ca iñi yu! —catyí ra tsihin ra.

<sup>25</sup> Cuhva tsa nyehe ra Jesús tyin cuaha nyivi ndu iñ nu nyaá ra, tacan tan tavá ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

<sup>26</sup> Tacan tan quiñi xaan caná tsaa nu tatyí can tan janduvá nu tsi ra inga tsaha, tan quitá nu tsi ra. Tan jacúu naaha nu tsi ra. Tan cuñi maa nyivi tyin tsa tsihi ra.

<sup>27</sup> Maa tyin ra Jesús tiñ ra ndaha ra luhlu can, tan cañihí ra tsi ra, tan tsinyaá nyityi ra.

<sup>28</sup> Tacan tan quihvi ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

<sup>29</sup> Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

*Nu cahan ra Jesús inga tsaha tyin cua cahñi nyivi tsi ra*

(Mt. 17.22-23; Lc. 9.43-45)

<sup>30</sup> Quivi tsa quitá ra Jesús ican, tan ra tsicá tsihin ra yahā ra naha ñuhú Galilea. Tan ña cuñi ra Jesús tsa coto nyivi iyó ican tyin nyii ra nu iyó ñi.

<sup>31</sup> Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayii tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quiivi.

<sup>32</sup> Maa tyin ra ican naha ra ña cutuñi iñi ra naha tsa caahán ra tsihin ra naha. Tan ña cuñi ra naha ndaca tuhun ra naha tsi ra tyin yuuhvi ra naha.

*Nu janahá ra Jesús yoo ra cahnu ca cuví tsitsi tsa tandihí nyivi tsa ndacá ñaha Nyoo*

(Mt. 18.1-5; Lc. 9.46-48)

<sup>33</sup> Tan tsa tsaa ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsi yo? —catyí ra tsicá tuhun ra.

<sup>34</sup> Tsa cahan ra Jesús tacan, taxin ña cuví ra naha, tyin ityi vatsi ra naha natuhun ra naha yoo ra cahnu ca cuví tsa nuu tandihí ra naha.

<sup>35</sup> Tacan tan tsinyaá ra Jesús tan caná ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñi cuví ityi nuu, cuñi tsi cuví ndo nda nu ndihí ña tsa nuu tandihí ndo, tan jatyinyee ndo tsi tandihí nyivi —catyí ra Jesús tsihin ra naha.

<sup>36</sup> Tacan tan quihñ ra iin ra luhlu tyaá ra mahñu ra naha. Tan tyihí jucun ndaha ra tsi ra luhlu can, tan catyí ra:

<sup>37</sup> —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñi ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsi tsi yu tan ñavin maa ñi maa yu naquihin cuenda ñi.

*Nyivi tsa ña cuxaán tsi yo, juvin ñi ican jatyinyee tsi yo*

(Mt. 10.42; Lc. 9.49-50)

<sup>38</sup> Tacan tan catyí ra Juan tsihin ra Jesús:

—Maestro, nyehe ndi iin ra tavá tatyí ña vaha tsi nyivi tsihin sivi un. Maa tyin tyasí ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

<sup>39</sup> Maa tyin catyí ra Jesús tsihin ra:

—Ña çasi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana iñi ñi cahan ñi ndavaha ñi tsi yu.

40 Tyin nyivi tsa ña xaan ifi tsi yo, tsihin yo cutahán ñi.

41 Tan nyivi tsa cua cuhva vasu tan iin yatsin ndutya coho ndo tyin tsinú ifi ndo tsi yu, cua cuhva Nyoo tsa cua cuhva ra tsi ñi.

*Nu tsahá cuendará Jesús tsi yo nácaa jaha cuenda yo tsi yo tan ña javaha yo tsa ña vaha (Mt. 18.6-9; Lc. 17.1-2)*

42 Nyivi cua natyuhu tsi iin nyivi tsa ñaha ca tsinú vaha ifi tsi yu tyin javaha ñi tsa caquiñi, vaha ca cuhñi nyivi yuu yoso vee jucun ñi tan cujanehñi ñi tsi ñi tsitsi nu cunu ndutya ñuhu.

43 Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un.

44 Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

45 Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu.

46 Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

47 Tun tinuu un javahá tsa ña vaha, çasi nu javahá can tacan. Tatun ña cuví, çava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un.

48 Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

49 Maa tyin tandihi nyivi nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi.

50 Vaha xaan ñi. Maa tyin tun ndihi tsa uhva tsi, ña jandu uhva ca tsi tan ña cuví ca cuatyifnu nyivi itsi. Yacan cuenda nyoocho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuví coo taxin ndo tsihin tahan ndo.

**10**

*Nu caahán ra Jesús tyin ña vaha nacoo rayii ñasihi ra (Mt. 19.1-12; Lc. 16.18)*

1 Quitá ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyivi nu

nyii ra, tacan tan quitsahá jacuahá ra tsi ñi tumaa tuhvá maa ra javahá.

2 Tacan tan natuhvā juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicā tuhun ra naha tsi ra tatun vaha nacoo rayii ñasihi ra.

3 Tacan tan nacahān ra Jesús tan catyí ra: —¿Náa catyí ra Moisés tyin javahá ndo?

4 Tan nacahān ra naha tan catyí ra naha: —Ra Moisés catyí ra tyin cuví canindi tutu cuenda ley ndi, tacan tan cuví nacoo ndi ñasihi ndi —catyí ra naha tsihin ra.

5 Tacan tan catyí ra Jesús tsihin ra naha: —Catyí ra Moisés tyin cuví javaha ndo tacan tsa cuenda tsa ndava añima ndo.

6 Maa tyin quivi jihna ñi, quivi javahā Nyoo tandihi maa tsa iyó, catyí nu tutu ra tyin javahā ra rayii tan ñaha.

7 “Yacan cuenda taahán tsi nacoo rayii jutu ra tan sihi ra tan ndu iin ra tsihin ñasihi ra.

8 Tan nduvi ñi cua cuví ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuví ñi.

9 Yacan cuenda, ña cuví jasiin nyivi tsa jandu iin Nyoo —catyí ra Jesús tsihin ra naha.

10 Yahā can tan cuanuhū ra nda yuvehe, tan quitsahā nducú tuhun nyico ra tsicá tsihin ra siquí tuhun can.

11 Tan catyí ra Jesús tsihin ra naha: —Ra tsa cua nacoo ñasihi tan quihin ra inga ñaha, cua coo cuatyí ra nu Nyoo.

12 Tacan tucu ñi ñaha: Tun nacoo ña tsi yii ña tan tindaha ña tsihin inga rayii, juyin ñi cua coo tucu cuatyí ña —catyí ra Jesús.

*Nu nasoco ra Jesús tsi tsa nyihi (Mt. 19.13-15; Lc. 18.15-17)*

13 Tacan tan tsindacā nyivi juhva tsa nyihi tsi ra Jesús tyin tyiso ra ndaha ra jifi tsi naha tsi tan nasoco ra tsi naha tsi. Maa tyin ra tsicá tsihin ra quitsahā cuxaán ra naha tsi nyivi cuahán cuandacá tsa nyihi.

14 Maa tyin tsa nyehē ra Jesús tsa javahá ra naha tacan, cuxaān ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña çasi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú ifi ñi tsi Nyoo.

15 Tan tsa nditsa catyí yu tsihin ndo tun ña cuita ifi nyivi tsi Nyoo tumaa nyitá ifi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

16 Tacan tan quihin ra intuhun intuhun tsa nyihi can tan tyiso ndaha ra jifi tsi naha tsi, tan tsicān tahvi ra tsi Nyoo na nasoco ra itsi naha tsi.



*Nu tsaḥa cuenda ra Jesús tyin yíi xaan nacuhva cuenda iin ra cuca tsi ra tsi Nyoo (Mt. 19.16-30; Lc. 18.18-30)*

<sup>17</sup> Yaha yacan tan cuahán ra Jesús. Tan tsinú xaan iin rayii cuahán ra cuanyicún ra tsi ra. Tsa tahañ ra tsi ra, tsicuiñi tsiñi ra nuu ra, tan tsicá tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa? —catyí ra tsihin ra Jesús.

<sup>18</sup> Tan catyí ra Jesús tsihin ra:  
—¿Nacuenda catyí un tyin ra vaha cuvi yu? Tan intuhun ñi ra vaha iyó tan ra ican cuvi Nyoo. Tan tsa catyí un tyin vaha yu, nacotó un tyin Nyoo cuvi yu.

<sup>19</sup> Yooho tsitó un tsa catyí Nyoo tyin javaha yo: “Na coo inga ñaha tsi un. Na cahñi un nyivi. Na suhu un. Na cahan un cuendu. Na jandavi ñaha un tsi nyivi. Tyaa yahvi tsi jutu un tan tsi sihi un” —catyí ra Jesús tsihin ra.

<sup>20</sup> Nacahañ ra tan catyí ra:  
—Maestro, tandihi tuhun ihya tan tyaa yahvi yu itsi nda ndi luhlu yu tan nda cuanda vityin —catyí ra.

<sup>21</sup> Tacan tan sii cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

<sup>22</sup> Tsa tsiñi ra tyuvaa can tsa cahañ ra Jesús tacan, cuiihya xaan cuñi ra cuvi, tan tsihin tucuihya iñi cuanuhu ra yuvehe ra tyin cuca xaan ra.

<sup>23</sup> Tacan tan nanyehe ra Jesús naniñi canduvi nu nyaá ra, tan catyí ra tsihin ra tsicá tsihin ra:

—¡Yii xaan tan cuvi nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

<sup>24</sup> Tsa tsiñi ra tsicá tsihin ra tsa caahán ra, iyo xaan cuñi ra naha cuvi. Maa tyin catyí tucu ra tsihin ra naha inga tsaha:

—¡Sehe yu, nyivi tyaa xaan jiñi tandihi tsa cuca, yii xaan tan quihvi ñi nu ndacá ñaha Nyoo!

<sup>25</sup> Yatyí ca cuvi yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

<sup>26</sup> Tsa tsiñi ra naha tuhun ihya, iyo xaan cuñi ra naha cuvi, tan quitsaha tsicá tuhun tahañ ra naha, tan catyí ra naha:

—Tun tacan, ¿yóo cua cacu? —catyí ra naha.

<sup>27</sup> Tacan tan nanyehe ra Jesús tsi ra naha tan catyí ra tsihin ra naha:

—Nyivi ña cuvi javaha ñi tsehe, maa tyin Nyoo cuvi javaha ra tyin tsa cuenda Nyoo nduve maa tsa yii.

<sup>28</sup> Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoñ ndi can tan nyicún ndi tsi un.

<sup>29</sup> Nacahañ ra Jesús tan catyí ra:

—Tsa nditsa catyí yu tsihin ndo tyin tandihi nyooho tan tandihi inga ca nyivi tsa cua nacoo vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñi Nyoo jacacu ra tsi ñi,

<sup>30</sup> cua ñihi ñi cientu ca tsaha siqui tsa nacoñ ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuvi yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsaa tsa vatsi, cua ñihi ñi ñayivi nyito tsa ña cua naa maa coo ñi.

<sup>31</sup> Cuaha ñi nyivi cuahán ityi nuu vityin, cua cuhun ñi nda nu ndihi ña. Tan nyivi cuahán nu ndihi ña vityin, cuaha ñi cua cuhun ityi nuu —catyí ra Jesús.

*Nu jacotó nyico ra Jesús nácaa cua cahñi nyivi tsi ra*

*(Mt. 20.17-19; Lc. 18.31-34)*

<sup>32</sup> Tsa tsa cuñi cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyivi tsa cuahán cuanyicún tsi ra. Iyo xaan cuñi ñi tan tsihin tsa yuuhvi ñi cuahán ñi. Tacan tan tava sijn ra tsi tsa utsi uvi ra tsicá maa tsihin ra. Tan quitsaha catyí tuhun ra tsihin ra naha tsa cua tahañ ra.

<sup>33</sup> Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyivi tsi yuhu, Rayii queeñ nda gloria. Cua cuhva cuenda ñi tsi yu tsi ra jutu cuvi ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra.

<sup>34</sup> Cua vacu nducu ra naha tsi yu, cua cañi ra naha tsi yu, cua tivi sii ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

*Nu tsicán ra Jacobo tan ra Juan iin tumañi iñi tsi ra Jesús*

*(Mt. 20.20-28)*

<sup>35</sup> Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

<sup>36</sup> Tacan tan tsicá tuhun ra Jesús tsi ra naha tan catyí ra:

—¿Náa cuñi ndo javaha yu?

<sup>37</sup> Tan nacahañ ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

<sup>38</sup> Tacan tan catyí ra Jesús tsihin ra naha: —Nyooho ña tsító ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

<sup>39</sup> Tan nacahan ra naha: —Cuví maa.

Tan catyí ra Jesús  
—Nditsa tyin cua nyehe ndo tundoho tan cua cúu ndo tumaa cua tahan yuhu.

<sup>40</sup> Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús tsihin ra naha.

<sup>41</sup> Tsa tsíñi tsa utsi ca ra tsicá tsihin ra Jesús yacan, cuxaḡan ra naha tsi ra Jacobo tan ra Juan.

<sup>42</sup> Maa tyin canḡ ra Jesús tsi ra naha tan catyí ra tsihin ra naha: —Tsa tsító ndo tyin ra ndacá ñaha tsi nyivi iyó nu ñuhu ñayivi ihya, ñihi xaax ndacá ñaha ra naha tsi ñi.

<sup>43</sup> Maa tyin ñavin tacan taahán tsi javaha nyooho tyin ra tsa cuñí cuví ra cahnu ityi nuu Nyoo, cuñí tsi cuví ra musu tandihí ndo.

<sup>44</sup> Tan nyooho tsa cuñí cuví ityi nuu, cuñí tsi ndo musu tandihí ca ndo.

<sup>45</sup> Tyin yuhu, Rayi tsa quee nda gloria, ña vatsí yu tyin cuñí yu jatyinyee nyivi tsi yu. Yuhu vatsí yu vatsí jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

*Nu jananyehḡ ra Jesús tsi ra Bartimeo*  
(Mt. 20.29-34; Lc. 18.35-43)

<sup>46</sup> Tacan tan tsaḡ ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yahḡ ra naha nyaá iin ra cuaa nañí Bartimeo, sehe ra Timeo, tsicán ra caridaa.

<sup>47</sup> Tan cuhva tsa tsító ra cuaa can tyin tsa cua cuyatyn yaha ra Jesús, ra ñuu Nazaret, nu nyaá ra, quitsahḡ caná tsa ra, tan catyí ra:

—¡Jesús, tata ra David, cundaahvi iñi tsi yu! —catyí ra caná tsa ra.

<sup>48</sup> Tacan tan quitsahḡ cuxaan nyivi tsi ra tan catyí ñi tsihin ra na cutaxin ra, maa tyin cuñihí ca ra caná tsa ra tan catyí ra:

—¡Tata ra David, cundaahvi iñi tsi yu! —catyí ra.

<sup>49</sup> Tacan tan tsicuiñi ra Jesús tan catyí ra: —Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, cohon tyin caná ra tsi un —catyí ra naha tsihin ra.

<sup>50</sup> Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús.

<sup>51</sup> Tacan tan tsicḡ tuhun ra Jesús tsi ra: —¿Náa cuñí un javaha yu?

Tan nacahan ra cuaa can tan catyí ra: —Maestro, cuñí yu janduvaha un tinuu yu na nanyehe nyico yu —catyí ra.

<sup>52</sup> Tan catyí ra Jesús tsihin ra: —Cuaunu. Tsa nduvahḡ un tyin tsinú iñi un tsi yu.

Juvin ñi cuhva can tan nanyehe ra can. Tan cueta cuahán ra cuanyicún ra tsi ra Jesús.

## 11

*Nu quihvi ra Jesús ñuu Jerusalén*  
(Mt. 21.1-11; Lc. 19.28-40; Jn. 12.12-19)

<sup>1</sup> Tsa tsa cuñi tsa ra Jesús tan nyivi nyicún tsi ra nda ñuu Jerusalén, yatyn nu canyií ñuu Betfagé tan ñuu Betania, tan yatyn ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

<sup>2</sup> —Cuaahan ndo ñuu tsa canyií ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñí ti, tan ñaha ca quihí tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

<sup>3</sup> Tatun cusana ndaca tuhun nyivi tsi ndo: “¿Nacuu ndo urru ihya?” Tacan tan catyí ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyí ndo tsihin ñi —catyí ra Jesús tsihin ra naha.

<sup>4</sup> Tacan tan cuahán ra naha, tan tsa tsaḡ ra naha, nañihí ra naha urru can nuuhñí ti tsitsi ityi tsata yuhu iin cora. Tan ndatsj ra naha tsi ti.

<sup>5</sup> Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsí ndo urru can? —catyí ra naha tsihin ra naha.

<sup>6</sup> Tacan tan nacahan ra naha tumaa cahan ra Jesús tsihin ra naha. Tan tsaḡ ra can naha ra quihin ra naha urru can.

<sup>7</sup> Tacan tan tsindacḡ ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti.

<sup>8</sup> Tan tsaquín cuaha nyivi jahma ñi tsitsi ityi nu yahḡ ra, tan inga ñi tsahnyḡ ñi ndaha yutun tan tsaquín ñi tsitsi ityi.

<sup>9</sup> Tacan tan nyivi tsa cuahán ityi nuu ra tan ityi tsata ra, quitsahḡ caná tsa ñi tan catyí ñi:

—¡Cahnu xaax cuví Nyoo! ¡Na jacahnu yo tsi Jutu Mañi yo, ra tsa jaquitsj Nyoo!

<sup>10</sup> ¡Na jacahnu yo tsi ra vatsí cundaca ñaha tumaa tsindacḡ ñaha ra David, tsii tsaahnu

yo! ¡Cahnu xaan cuví ra nyaá gloria! —catyí ñi.

<sup>11</sup> Tacan tan quihví ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yaha nyehe ra tandihí tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

*Nu cahán ra Jesús tsi yutun higo tsa ña tsahá tsiti*

(Mt. 21.18-19)

<sup>12</sup> Tsa tuvi inga quivi tsa quitá ra Jesús tan ra tsicá tsihin ra ñuu Betania, tsaá soco tsi ra Jesús.

<sup>13</sup> Tsa quitá ra naha ndasava nyehe ra Jesús nu nyaá iin yutun higo tsa iyó numa. Tsahán ra tsinyehé ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti.

<sup>14</sup> Tacan tan cahán ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tsihin tun.

Tan tsiñí ra tsicá tsihin ra tsa caahán ra.

*Nu jacunú ra Jesús nyivi xicó nuquehe vehe ñuhu cahnu*

(Mt. 21.12-17; Lc. 19.45-48; Jn. 2.13-22)

<sup>15</sup> Tsa tsaá ra naha ñuu Jerusalén, cuahán nyico ra Jesús vehe ñuhu cahnu tan quitsahá jacunú ra nyivi xicó tan jatá tsa yucú nuquehe yuvehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma.

<sup>16</sup> Tan ña tsahá ca ra yaha sava ñi nuquehe vehe ñuhu can tsihin ndaha tyiñu.

<sup>17</sup> Tan quitsahá jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nanii nu ñuhu ñayivi tsi Nyoo”? Tan nyooho janduvj ndo itsi vehe ñasuhu —catyí ra tsihin ñi.

<sup>18</sup> Tsa tsiñí ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahá nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra.

<sup>19</sup> Maa tyin tsa tsa cuñi cuaa, quitá ra Jesús ñuu can tsihin ra tsicá tsihin ra.

*Nu na ityi yutun higo*

(Mt. 21.20-22)

<sup>20</sup> Tsa tuvi inga quivi, yaha nyico ra naha nu nyaá yutun higo tsa cahán ra Jesús. Tan nyehe ra naha tyin na ityi tun tan nda cuanda yoho tun na ityi.

<sup>21</sup> Tacan tan tsa nyehe ra Pedro yutun higo can, nducuhun iñi ra tsa javahá ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahán un —catyí ra.

<sup>22</sup> Nacahán ra Jesús, tan catyí ra:

—Tsjnu iñi ndo tsi Nyoo.

<sup>23</sup> Tyin tsa nditsa catyí yu tsihin ndo tyin nyivi cua cahán tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú iñi ñi tyin cua cundaa tsa cahán ñi tan ña uvi tsicá iñi ñi, cua cundaa tsi.

<sup>24</sup> Yacan cuenda catyí yu tsihin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihjñ cuenda ndo can, cua naquihñ ndo can.

<sup>25</sup> Tan tsa cua ndacan tahvi ndo tsi Nyoo, tun nducuhun iñi ndo tyin xaan cuñi ndo tsihin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo.

<sup>26</sup> Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

*Nu tsicá tuhun ra cumí tyiñu vehe ñuhu naha ra tsi ra Jesús yóo tavá tyiñu tsi ra tsa cahán ra tsihin nyivi*

(Mt. 21.23-27; Lc. 20.1-8)

<sup>27</sup> Tacan tan tsaá nyico ra naha ñuu Jerusalén. Tsa nyii ra Jesús tsicá nuu ra nuquehe vehe ñuhu cahnu, natuhvá ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra.

<sup>28</sup> Tan tsicá tuhun ra naha tsi ra tan catyí ra naha:

—¿Yóo tavá tyiñu tsi un tsa javahá un tyehen? —catyí ra naha.

<sup>29-30</sup> Tan nacahán ra Jesús, tan catyí ra:

—Cuñi tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsj tsi ra Juan tyin jacoondutya ra tsi nyivi? ¿A Nyoo o nyivi? Tatun catyí tuhun ndo tsihin yu yóo jaquitsj tsi ra, cua catyí tuhun tucu yuhu tsihin nyooho yóo tavá tyiñu tsi yu javahá yu tyehen —catyí ra Jesús tsihin ra naha.

<sup>31</sup> Tacan tan quitsahá caahán yuhu tahan ra naha, tan catyí ra naha:

—Tun catyí yo tyin Nyoo jaquitsj tsi ra Juan, cua catyí ra tsihin yo tyehen: “Tun Nyoo jaquitsj tsi ra, ¿nacuencia ña tsinú iñi ndo tsa cahán ra?”

<sup>32</sup> ¿A vaha tun catyí yo tyin nyivi jaquitsj tsi ra? Ña cuví —catyí ra naha, tyin yuuhví ra naha tsi nyivi, tyin tandihí ñi tan tsinú iñi ñi tyin ndusu yuhu Nyoo cuví ra.

<sup>33</sup> Tacan tan catyí ra naha tsihin ra Jesús:

—Ñá tsitó ndi.

Tacan tan catyí ra Jesús tshin ra naha:

—Tun ña tsító ndo, ndi yuhu tucu, tan ña cua catyí tuhun yu tshin ndo yóo tava tyiñu tsi yu tsa javahá yu tyehen —catyí ra Jesús tshin ra naha.

## 12

*Nu caahán ra Jesús tuhun ra ña vaha jaha tyiñu*

(Mt. 21.33-46; Lc. 20.9-19)

<sup>1</sup> Tacan tan quitsahá caahán ra Jesús tshin ra naha tshin cuhva ihya, tan catyí ra:

—Tsicoo iin rayii tsa tatsj yoho yucu vixi tsa nañi uva, ra ícan tyasi ra iin cora nani canduvi nu tatsj ra yucu vixi can. Tan javahá ra iin nu cua tava ra ndutya uvac can. Tan javahá tucu ra iin vehe sucun tyin tacan tan cuví jaha cuenda ra nani cahnun nu ndaha tyiñu ra.

“Tsa yahá yacan tan tsaahá nuu ra ñuhu can tsi juhva rayii tyin jaha tyiñu ra naha tshin tsi. Tacan tan cuahán ra inga ñuu.

<sup>2</sup> Tsa tahán tsi quivi iyó uvac can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra.

<sup>3</sup> Maa tyin ra ícan naha ra tijn ra naha tsi ra. Tan cañi ra naha tsi ra. Tan jacunuhu ra naha tsi ra tshin ndaha ndii ra.

<sup>4</sup> Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tshin yuu, tan tahvi ra naha jiñi ra, tan cahán nyaa ra naha tsi ra.

<sup>5</sup> Tsitoho ñuhu can jacuhun nyico ra inga musu. Tan tsañi ra naha tsi ra. Yahá yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsañi ra naha juhva ca ra naha.

<sup>6</sup> Tan cumañi intuhun ña ra tsa cuví jacuhun ra. Tan ra ícan cuví sehe ra tsa cuñi xaan ra. Nu ndihi tuhun jacuhun ra sehe ra tyin cuñi maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñi ra.

<sup>7</sup> Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tshin can”, catyí ra naha.

<sup>8</sup> Tacan tan tijn ra naha tsi ra tan tsañi ra naha tsi ra. Tan tava ra naha cuñu ñuhu ra ityi tsata cora can —catyí ra Jesús.

<sup>9</sup> Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cahun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tshin can.

<sup>10</sup> ¿A ñaha ca cahvi ndo nu tutu Nyoo nu catyí tsi tyehen?

Yuu tsa javitá ra javahá vehe naha ra,

yacan cuví yuu tsa tsiñi ñuhu ca.

<sup>11</sup> Maa Nyoo Jutu yo jahá tsa cahnun ca cuví yuu ihya. Tan iyo xaan cuñi yo nyehé yo can, catyí tsi —catyí ra Jesús tshin ra naha.

<sup>12</sup> Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsító ra naha tyin tuhun maa ra naha caahán ra tsa tsatyíñu ra cuhva can. Maa tyin ña tijn ra naha tsi ra tyin yuuhvi ra naha nyehe ra naha tsi nyivi. Nacoo ra naha tsi ra, tan cuahán ra naha.

*Nu caahán ra Jesús siqui tuhun tsa tyahvi nyivi xuhun tsi ra ñuu Roma tsa ndacá ñaha tsi nyivi Israel*

(Mt. 22.15-22; Lc. 20.20-26)

<sup>13</sup> Tacan tan jacuhun ra naha juhva ra yihi cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin tsa ña vaha tyin tacan tan cuví tyaa ra naha cuatyí tsi ra.

<sup>14</sup> Tsa tsaq ra can naha ra tan quitsahá caahán ra naha tshin ra Jesús tan catyí ra naha:

—Maestro, tsító ndi tyin tsa nditsa caahán un. Tan inducu ñi cuñi un nyehe un nyivi cua tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tshin ra Jesús.

<sup>15</sup> Tan tsító ra Jesús tyin ñavin tsa vaha tsicá iñi ra naha, yacan cuenda catyí ra tshin ra naha:

—¿Nacuvi tyin nducú cuhva ndo tsi yu? Ndaca ndo iin xuhun tsi yu ihya, na nyehe yu —catyí ra.

<sup>16</sup> Tsindacá ra naha xuhun can tsi ra. Tsa nyehe ra can tan tsicá tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tshin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

<sup>17</sup> Tacan tan catyí ra Jesús tshin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tshin ra naha.

Tan iyo xaan cuñi ra naha tshin tsa nacahan ra.

*Nu cuñi ra saduceo naha ra jandavi ñaha ra naha tsi ra Jesús*

(Mt. 22.23-33; Lc. 20.27-40)

<sup>18</sup> Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto

nyivi. Yacan cuenda caḥan ra naha tyehen tan catyí ra naha tsihin ra Jesús:

<sup>19</sup> —Maestro, ra Moisés tyaḡ ra nácaa taahán tsi javaha yo tatun iin rayii tsihi tan ndoḡ ñasihi ra tan nduve sehe ña tsicoḡ tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi.

<sup>20</sup> Iin tsaaha iin rayii tsicoḡ utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoḡ tsihin ña, tan tsihi ra.

<sup>21</sup> Tacan tan tindaha ra yañi ra tsa tsinu uvi tsihin ñaha tsa ndoḡ can. Maa tyin juvin ñi ña tsicoḡ sehe ra tsihin ña tan tsihi ra. Juvin ñi tacan taḥan tucu ra tsa tsinu uñi.

<sup>22</sup> Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoḡ sehe ra naha tsihin ña. Tan nu ndihí tuhun, tsihi ndihí maa ña.

<sup>23</sup> Tan vityin, tun nditsa tsa cua nandoto nyivi, ¿ndáa tsa utsa taahan ra can naha ra cua cuvi yí ña quivi cua nandoto ñi? Tyin tandihí maa ra naha tan tindaha ra naha tsihin ña —catyí ra naha tsihin ra Jesús.

<sup>24</sup> Tacan tan nacahaḥan ra Jesús tan catyí ra tsihin ra naha:

—Caahán soho ñi maa nyooho, tyin ña tsitó ndo tsa catyí tuhun Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo.

<sup>25</sup> Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria.

<sup>26</sup> Tan tuhun tsa cua nandoto nyivi, ¿a ñaha ca cahvi ndo nu libru tsa tyaḡ ra Moisés nu catyí tsi nácaa caḥan Nyoo tsihin ra nu cayú yutun iñu? Tyin catyí ra tsihin ra tyehen: “Yuhu cuvi Nyoo ra Abraham, ra Isaac, tan ra Jacob”, catyí Nyoo tsihin ra Moisés.

<sup>27</sup> Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuvi ra, tyin Nyoo cuvi ra Nyoo nyivi nyito. Yacan cuenda catyí yu tyin nyooho caahán soho ñi maa ndo —catyí ra Jesús tsihin ra naha.

*Ley tsa ñiñi ca tsa tsaha Nyoo*  
(Mt. 22.34-40)

<sup>28</sup> Ña naha ñi tan tsaḡ iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsitó ra tyin ra Jesús vaha nacahaḥan ra tsihin ra naha, tsicḡ tuhun ra tsi ra tan catyí ra:

—Tsitsi tsa tandihí ley, ¿ndáa tsa ñiñi ca cuñi tsi javaha yo? —catyí ra.

<sup>29</sup> Tan nacahaḥan ra Jesús tan catyí ra:  
—Ley tsa jihna ñi tan ñiñi ca cuñi tsi javaha yo tsa nuu tandihí ley, cuvi ley ihya:

“Nyooho nyivi Israel, tyaḡ soho ndo: intuhun ñi maa Nyoo Jutu yo iyó.

<sup>30</sup> Cuñi ndo tsi Jutu Mañi yo Nyoo tsihin tsa ñi iñi ndo, tan tsihin tsa ñi iñi añima ndo, tan tsihin tandihí tsa tsiñi tuñi jiñi ndo, tan tsihin tandihí tunyee iñi tsa iyó tsi ndo.” Ley ihya cuvi tsa ñiñi ca tan tsa jihna ñi taahán tsi javaha yo.

<sup>31</sup> Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

<sup>32</sup> Tacan tan ra maestro cuenda ley can catyí ra tsihin ra:

—Vaha xaan nacahaḥan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó.

<sup>33</sup> Tan tsa cuñi yo tsi Nyoo tsihin tsa ñi iñi yo, tan tsihin tandihí tsa tsiñi tuñi jiñi yo, tan tsihin tsa ñi iñi añima yo, tan tsihin tandihí tunyee iñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandihí yacan tan cahnu ca cuvi can tan ñavin ca tsa jamañi yo tsi Nyoo, tsa tsahñi yo quiti tan tsahmí yo can nu altar —catyí ra maestro cuenda ley can tsihin ra Jesús.

<sup>34</sup> Tsa nyehé ra Jesús tyin vaha nacahaḥan ra tsihin tsa catsi jiñi ra, tan catyí ra tsihin ra:

—Luxu cuii ña tan ñihi un cuhva nácaa nacuhva cuenda un añima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña canḡ ca iñi ñi ndaca tuhun ñi náa ndaca tuhun ñi tsi ra Jesús.

*Ra Cristo Sehe Nyoo tsi ra tan juvin ñi cuvi tucu ra tata ra David*  
(Mt. 22.41-46; Lc. 20.41-44)

<sup>35</sup> Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuvi ra Cristo?

<sup>36</sup> Tan juvin ñi maa ra David catyí tuhun ra Cristo tyehen:  
Nyoo caḥan ra tsihin Jutu Mañi yu, tan catyí ra:

“Cunya xaan cuaha yu ihya nda cuanda caquin yu tsi ra xaan iñi tsi un naha ra tsaha un”, catyí ra David taḥan tsanaha jahḡ Tatyí Ii Nyoo.

<sup>37</sup> ¿Nacaa cuvi cuú tucu ra Cristo tata ra David, tan juvin ñi maa ra David catyí tyin ra Cristo cuvi Jutu Mañi ra? —catyí ra Jesús.

Tan cuaha nyivi yucú tyaá soho tsa caahán ra tan sii xaan cuñi ñi.

*Nu caahán ra Jesús tyin iyó cuaha cuatyí ra maestro cuenda ley vehe ñuhu naha ra*  
(Mt. 23.1-36; Lc. 11.37-54; 20.45-47)

<sup>38</sup> Quitsahā jacuahá ra Jesús tan catyí ra tyehen:

—Jaha ndo cuenda tsi ndo tshin ra mae-stro cuenda ley vehe ñuhu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha.

<sup>39</sup> Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha.

<sup>40</sup> Tan quihín nyaá ra naha vehe ñi ndaahvi tsa tsihi yí tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tuvi nyivi. Maa tyin nduve náa catyi javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

*Tsa tsahā ñaha ndaahvi tsihi yí*  
(Lc. 21.1-4)

<sup>41</sup> Iin tsaha nyí ra Jesús tsitsi vehe ñuhu cahnu tan nyaá ra yatyin ñi nu nyí tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun.

<sup>42</sup> Tsitsi tsa nyaá ra ican tsaā iin ñaha ndaahvi tsihi yí, tan tyihí ña uvi taahan ñi xuhun nyihi tsa caaha xaan nyaá.

<sup>43</sup> Tacan tan canā ra Jesús tsi ra tsicá tshin ra, tan catyí ra tshin ra naha:

—Tsa nditsa catyí yu tshin ndo tyin nuu Nyoo cuaha ca xuhun tsahā ñaha ndaahvi ihya tan ñavin ca inga nyivi.

<sup>44</sup> Tyin tsahá ñi tsa ndoo siqui xuhun ñi. Maa tyin ñaha ihya tyihí ña tandihi tsa iyó tsi ña —catyí ra Jesús.

### 13

*Nu caahán ra Jesús tyin cua tani vehe ñuhu cahnu*

(Mt. 24.1-2; Lc. 21.5-6)

<sup>1</sup> Cuhva tsa cua quita ra Jesús tsitsi vehe ñuhu cahnu can, iin ra tsicá tshin ra catyí ra tshin ra:

—¡Maestro, nyehe jihna tsa si caá yuu yihí vehe ihya! ¡Nyehe tsa nahnu vehe ihya! —catyí ra tshin ra Jesús.

<sup>2</sup> Maa tyin nacahan ra Jesús, tan catyí ra tshin ra:

—Nditsa nahnu vehe ihya tan si caá tsi nyehé yo vityin. Maa tyin catyí yu tshin un tyin coo quivi nduve ca maa náa cua ndoo ihya. Ndi intuhun yuu tan ña cua coso tahan tsi tshin inga tsi, tyin tandihi maa tsi tan cua tani tsi —catyí ra Jesús.

*Nu tsahá cuenda ra Jesús náa cua cuví tsa ndi cumañi ca naa ñuhu ñayivi*  
(Mt. 24.3-28; Lc. 21.7-24; 17.22-24)

<sup>3</sup> Tacan tan cuahán ra Jesús tshin ra tsicá tshin ra yucu yutun Olivo tsa canyii inga tsiyo nu nditsin nyehé tsi vehe ñuhu cahnu. Tsa tsinyaā ra Jesús ican, ra Pedro, ra Jacobo, ra Juan, tan ra Andrés tsicā tuhun xeehe ra naha tsi ra tan catyí ra naha:

<sup>4</sup> —Cuñí ndi tsa catyi tuhun un tshin ndi ama cua cuví tandihi tsa cahan un. ¿Nacaā tan coto ndi tatun tsa cuyatyin cun-daa tandihi can? —catyí ra naha.

<sup>5</sup> Nacahan ra Jesús tan catyí ra:

—Jaha ndo cuenda tsi ndo coto jandavi ñaha nyivi tsi ndo.

<sup>6</sup> Tyin cuaha xaan nyivi cua quitsi, tan cua cuatyí ñi sivi yu, tan cua catyi ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyivi cua jandavi ñaha ñi.

<sup>7</sup> Maa tyin tun ñihi tuhun ndo tyin iyó cuatyí tan cañi tahan nyivi ityi can tan ityi ihya, ña nayuhvi ndo tyin tacan taahán maa tsi cuví tsa ndi cumañi ca naa ñuhu ñayivi.

<sup>8</sup> Tyin nyivi iin ñuu cua cañi tahan ñi tshin nyivi inga ñuu, tan cua coo cuatyí iin ñuu tshin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyivi. Vasu ndi maa nyehe nyivi tundoho ihya, ña cua naa naha ñuhu ñayivi tyin ndi nyaā ca cua nyehe ñi tundoho.

<sup>9</sup> Maa tyin jaha ndo cuenda tsi ndo tyin cua cuhva cuenda nyivi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumí tyiñu tan tsi ra cuví rey tsacatyí yuhu. Tyin tacan tan cuví cahan ndo tuhun yu nuu ra naha.

<sup>10</sup> Tyin tsa ndi cumañi ca naa ñuhu ñayivi, cuñí tsi coto tandihi nyivi inga ñuu tyin Nyoo jacacú ra tsi nyivi.

<sup>11</sup> Tan cuhva tsa cua cundaca ñi tsi ndo nuu ra cumí tyiñu naha ra, ña caca iñi ndo náa cua cahan ndo. Tyin juvin ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyí Ii Nyoo cua cahan.

<sup>12</sup> Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cúu ra can naha ra. Yihí nyivi cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi.

<sup>13</sup> Tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsacatyí yuhu. Maa tyin nyooho tsa cua cunyeē iñi tsinú iñi tsi yu nda nu ndihi, cua cacu ndo.

<sup>14</sup> Tandihí nyooho tsa cahví nu tutu Nyoo nu tyaañ ra Daniel, ra cuví ndusu yuhu Nyoo tsa tsicoo tahan tsanaha, cūtuñi iñi ndo tyin iyó tsa janducaquiñi tan tsa jativi. Quivi tsa nyehe ndo tyin tsa nyii yacan nu ña taahán tsi cunyii can, nyooho nyivi iyó Judea, quita ndo ñuu ndo tan cuhun ndo ityi yucu.

<sup>15</sup> Nyooho tsa cua cuyucu jiñi vehe quivi can, cua nuu ndo, maa tyin ña cua nuu ndo tsa quihvi ndo tsitsi vehe ndo tan tava ndo tsa iyó tsi ndo.

<sup>16</sup> Nyooho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo.

<sup>17</sup> ¡Ndahvi ñifaha tsa ñuhú sehe quivi can! ¡Tan ndahvi ñi iyó sehe lee tsa ndi tyaxín! ¡Ndahvi ñi!

<sup>18</sup> Ndacan tahvi ndo tsi Nyoo na ña tahan tsi cunu ndo quivi vitsin.

<sup>19</sup> Tyin tundoho tsa cua nyehe nyivi quivi can, ñaha ca maa coo can ndaha tsinu maa ñuhu ñayivi nda cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha.

<sup>20</sup> Tun tsatyin Jutu Mañi yo tan ña jandihí ra tsa cua nyehe yo tundoho quivi can, yoñi maa cua cacu. Maa tyin cua jandihí ra can tsa cuenda tsa cuñi ra tsi nyivi yihí cuenda ra, nyivi nacatsj vaha maa ra.

<sup>21</sup> Tatun catyi nyivi tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu iñi ndo.

<sup>22</sup> Tyin cua quitsi nyivi jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyivi nacatsj maa Nyoo, tatun cunyeey ñi javaha ñi tacan.

<sup>23</sup> Maa tyin nyooho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quivi can —catyi ra Jesús.

*Nu jacoto ra Jesús nácaa cua quitsi nyico ra inga tsaha*

(Mt. 24.29-35, 42-44; Lc. 21.25-36)

<sup>24</sup> Tan catyi nyico ra Jesús tyehen:

—Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi,

<sup>25</sup> tan cua cucoyo tiñuu. Tan tandihí tsa iyó andivi tan cua nacanda tsi naha tsi.

<sup>26</sup> Tacan tan cua nyehe ndo tsi yuhu, Rayii tsa quee nda gloria, vatsi yu nu vico tsihin tunyee iñi cahnu tan tsihin tsa cahnu cuví Nyoo.

<sup>27</sup> Tan cuaha ángel cuenda yu cua jaquitsi yu tyin jandu iin ra naha nyivi nacatsj maa Nyoo. Cua quita ñi nanii cahnu nu ñuhu ñayivi, nda nu ndihí ñuhu ñayivi tan nda nu ndihí andivi.

<sup>28</sup> Cutuñi iñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun.

<sup>29</sup> Tan juvin ñi tacan, tatun tsa cuví tandihí tsa iyo tsa caahán yu tuhun tsihin

ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi.

<sup>30</sup> Tsa nditsa catyi yu tsihin ndo tyin tsa ndi cumañi ca cúu nyivi iyó nu ñuhu ñayivi ihya tan cua cuví tandihí tsa caahán yu tuhun tsihin ndo.

<sup>31</sup> Tan coo quivi cua cundihí andivi tan cua cundihí ñuhu ñayivi, maa tyin tuhun caahán yuhu, ña cua cundihí maa tsi tyin tandihí tsi tan cua cundaa tsi.

<sup>32</sup> Maa tyin quivi tan hora tsa cua cuví tandihí yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihí.

<sup>33</sup> Yacan cuenda cõo nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quivi tan náa cuhva cua quitsi nyico yu.

<sup>34</sup> Tumaa iin rayii tsa cua cuhun nu cañi. Ra ican tsa ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jaha cuenda yuvehe na jaha cuenda vaha ra.

<sup>35</sup> Yacan cuenda nyooho cõo nyito ndo tyin ña tsitó ndo náa cuhva cua quitsi yu tsa cuví yu tumaa tsitoho vehe can, tyin cuví quitsi yu tsa cua cunaaha, maa ñuu, o cuhva tsacú tsitooho, o tsa cua cana ñicanyii.

<sup>36</sup> Yacan cuenda cõonyito vaha ndo tan ña cusu ndo tyin sana iñi ndo tan cua quitsi yu.

<sup>37</sup> Tsa caahán yu tsihin nyooho, caahán tucu yu tsihin tandihí ca nyivi: Cõo nyito ndo.

## 14

*Nu nducu ra jutu cuví ityi nuu naha ra cuhva tñin ra naha tsi ra Jesús*

(Mt. 26.1-5; Lc. 22.1-2; Jn. 11.45-53)

<sup>1</sup> Tsa ndi cumañi uvi quivi ca tan tahan tsi vico pascua tan vico nu tuhvá nyivi tsatsi paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva tñin xeehe ra naha tsi ra Jesús tan cahñi ra naha tsi ra.

<sup>2</sup> Maa tyin natuhun tahan ra naha tan catyi ra naha:

—Ña cua tñin naha yo tsi ra quivi maa vico tyin coto nduvaa xaan nyivi —catyi ra naha.

*Nu tyihí iin ñaha ndutya tami jiñi ra Jesús*  
(Mt. 26.6-13; Jn. 12.1-8)

<sup>3</sup> Tsa ndi cumañi ca tahan tsi vico can, nyii ra Jesús ñuu Betania, vehe ra Simón, ra tsa tsindoho cuehe tyaahyu. Tsitsi tsa nyaá ra Jesús tsatsi ra, tsaq iin ñaha ndahá ña iin yutyi tsa tsinu tsihin yuu tsa nañi alabastro. Tsitu can yihí ndutya tami tsa nañi nardo. Tan yahvi xaan nyaá ndutya tami can. Nuñá

ña yuhu yutyi can tan tavaña ña ndutya tami can tan tyihñi ña can jiñi ra Jesús.

<sup>4</sup> Maa tyin juhva ra tsa yucú ican naha ra nduxaän ra naha tan catyí ra naha:

—¿Nacuenda tyin jativi ñaha ihya ndutya tami can?

<sup>5</sup> Tun tsatyin xico ña can, cuaha xaan xuhun cua ñihi ña tsihin can, tan cuvi jatyinyee ña tsi nyivi ndaahvi tsihin xuhun can —catyí ra naha.

Tan cuxaän ra naha tsi ña.

<sup>6</sup> Maa tyin ra Jesús catyí ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu.

<sup>7</sup> Tyin nyivi ndaahvi tandihi ñi quivi cua cuyucu ñi tsihin ndo, maa tyin yuhu, ña naha ca cunyi yu tsihin ndo.

<sup>8</sup> Ñaha ihya javahá ña ndihi cuhva cuvi ñi javahá ña. Tyihñi ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi.

<sup>9</sup> Tsa nditsa catyí yu tsihin ndo, tyin tandihi ityi nu cua cahan nyivi tuhun Nyoo nanii cahnu nu ñuhu ñayivi, cua cahan ñi tuhun ñaha ihya tan tsa javahá ña, tyin tacan tan ña naa iñi nyivi tsi ña —catyí ra Jesús.

*Nu xico ra Judas tsi ra Jesús  
(Mt. 26.14-16; Lc. 22.3-6)*

<sup>10</sup> Tsa yahá yacan tan quitá iin ra tsitsi tsa utsi uvi ra tsicá tsihin ra Jesús. Ra ihya cuvi ra Judas Iscariote. Tsañan ra tsicahan ra tsihin ra jutu cuvi ityi nuu naha ra, tan jandañ ra tyiñu tsihin ra naha tyin cua cuhva cuenda ra tsi ra Jesús tsi ra naha.

<sup>11</sup> Cuhva tsa tsiñi ra naha tsa caahan ra, sii xaan cuñi ra naha cuvi, tan catyí ra naha tsihin ra tyin cuhva ra naha xuhun tsi ra. Tacan tan quitsaha nducú ra Judas cuhva cuhva cuenda ra tsi ra Jesús tsi ra naha.

*Nu cuxiñi ra Jesús tsihin ra tsicá tsihin ra  
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Quivi jihna ñi tsa quitsaha vico nu tsatsi nyivi paan tsa nduve yutsan iya yihí tan quivi tuhvá ñi tsañi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhnu ndi janduvaha ndi tsa cuxiñi un cuenda vico pascua ihya?

<sup>13</sup> Tacan tan tavañ tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañihi ndo iin rayi yosó soco iin quivi ndutya. Tsa nyehe ndo tsi ra, cüanyicun ndo tsi ra.

<sup>14</sup> Tsa tsaa ndo yuvehe nu cua quihvi ra, catyí ndo tyehen tsihin tsitoho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo.

<sup>15</sup> Tan cua janaha ra iin cuarto cahnu nu tsinu uvi pisu tsi ndo. Tsa nduvaha maa tsitsi tsi jahá ra, Javaha ndo tsa cuxiñi yo tsitsi vehe can—catyí ra Jesús tsihin ra naha.

<sup>16</sup> Tacan tan cuahán ra naha. Tsa tsaq ra naha tsitsi ñuu can, nañihi ra naha tandihi maa cuhva catyí ra Jesús tsihin ra naha. Tan javahá ra naha tsa cua cuxiñi ra naha cuenda vico pascua.

<sup>17</sup> Tsa ndihñi javahá ra naha tsa cua cuxiñi ra naha, tacan tan cuahán nyico ra naha nu nyii ra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra.

<sup>18</sup> Tan cuhva tsa nyecú ra naha tsatsi ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyooho tsa tsatsi tsihin yu cua xico tsi yu tsi ra xaan iñi tsi yu.

<sup>19</sup> Tacan tan nducuihya xaan cuñi ra naha, tan quitsaha tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

Tan cacahan ra Jesús tan catyí ra:

—Ña tandihi ndo. Intuhun ñi ra tsitsi tsa utsi uvi ndo. Tan ra ican cuvi ra tsa jatyií paan iin ñi tsitsi coho tsihin yu.

<sup>21</sup> Tyin yuhu, Rayi tsa quee nda gloria, cua tahan yu tumaa caahan maa nu tutu Nyoo tyin cua tahan yu. Maa tyin ndahvi ra ndaahvi tsa cua xico tsi yu! Vaha ca tun tsatyin ña cacú ra —catyí ra Jesús.

<sup>22</sup> Tan tsitsi tsa tsatsi ra naha, tacan tan quihñi ra Jesús iin paan tan nacuhva ra tyahvi nyoo tsi Nyoo tsa cuenda can, tan tsañu sava ra can, tan tsañá ra can tsi ra tsicá tsihin ra, tan catyí ra:

—Çatsi ndo paan ihya tyin tsehe cuvi tumaa cuñu ñuhu yu —catyí ra tsihin ra naha.

<sup>23</sup> Tsa yahá yacan quihñi ndihi ra vasu nu yihí vinu. Tsa yahá tsañá ra tyahvi nyoo tsi Nyoo, tacan tan tsañá ra can tsi ra naha. Tandihñi ra naha tan tsiñi ra naha vinu tsa yihí tsitsi vasu can.

<sup>24</sup> Tan catyí ra tsihin ra naha:

—Vinu ihya cuvi tumaa ñiñi yu tyin tsihin ñiñi yu cua ndoo Nyoo tuhun tsa tsihin ndo tyin cua cati ñiñi yu tsa cuenda tsa vaha tsi nyooho tan tsa vaha tsi cuaha nyivi.

<sup>25</sup> Tsa nditsa catyí yu tsihin ndo tyin ña cua coho ca yu vinu tsa cuvi ndutya yucu vixi uva, nda cuenda coho yu vinu tsaa nda nu ndacá ñaha Nyoo quivi tsaa yu ndacan —catyí ra Jesús tsihin ra naha.

*Nu jacotó ra Jesús tyin cua cahan ra Pedro tyin ña nacotó ra tsi ra  
(Mt. 26.30-35; Lc. 22.31-34; Jn. 13.36-38)*



<sup>26</sup> Tsa ndihí tsitá ra naha yaa Nyoo, tan cuahán ra naha yucu yutun Olivo.

<sup>27</sup> Tacan tan catyí ra Jesús tsihin tandihi ra naha:

—Tandihí maa ndo tan cua nacoo ihñi ndo tsi yu tsa cuaa vityin tyin catyí nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyí tsi.

<sup>28</sup> Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyooho —catyí ra Jesús tsihin ra naha.

<sup>29</sup> Tacan tan catyí ra Pedro tsihin ra:

—Vasu ndi maa nacoo ihñi tandihí ra naha tsi un, maa tyin yuhu ña cua nacoo ihñi maa yu tsi un —catyí ra tsihin ra Jesús.

<sup>30</sup> Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

<sup>31</sup> Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandihí ca ra naha.

*Nu nyii ra Jesús Getsemaní tsicán tahvi ra tsi Nyoo*

(Mt. 26.36-46; Lc. 22.39-46)

<sup>32</sup> Tacan tan tsaq ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndqo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

<sup>33</sup> Tan quihñ ra tsi ra Pedro, ra Jacobo tan ra Juan cuahán tsihin ra. Tan tsaq tucuiihya iñi cahnu tsi ra tan tuñu cuñi ra.

<sup>34</sup> Tan catyí ra tsihin ra naha:

—Cuiihya xaan cuñi yu; cahñi ña maa tucuiihya iñi ihya tsi yu, cuñi yu. Ndqo ndo ihya, tan ña cusu ndo —catyí ra.

<sup>35</sup> Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaquñ ra nuu ra nda nu ñuhu. Tan tsicān tahvi ra tsi Nyoo tan catyí ra:

—Tun tsatyin cuví ña cuhva un nyehe yu tundoho tsa cua nyehe yu —catyí ra tsicān tahvi ra.

<sup>36</sup> Tan tsa tsicān tahvi ra, catyí ra:

—Jutu Mañi yu, tsa cuenda yooho nduve tsa ña cuví javaha un. Tun yooho tan cuñi un cuví jatsiyo un tundoho ihya siqui yu. Maa tyin na cuví maa cuhva cuñi maa un, tan ñavin cuhva cuñi maa yu —catyí ra Jesús tsicān tahvi ra.

<sup>37</sup> Tacan tan cuahán ra nu nacoq ra tsi uñi ra tsicá tsihin ra. Tsa tsaq ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cun-yeē iñi un coo nyito un tsihin yu ndi intuhun hora?

<sup>38</sup> Ña cusu ndo; ndācan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin añima ndo cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús tsihin ra naha.

<sup>39</sup> Tacan tan cuahán nyico ra inga tsaha. Tan tsicān tahvi ra tsi Nyoo juvin ñi tsihin tuhun tsa cahān ra tsa jihna ñi.

<sup>40</sup> Tacan tan tsaq nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasí maa tinuu ra naha jahā ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cahān ca ra.

<sup>41</sup> Tan cuahán nyico ra. Tsa tsaq ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaq tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahañ tsi hora tsa cua cuhva cuenda ra tsi yuhu, Rayi tsa quee nda gloria.

<sup>42</sup> Nduvita ndo, cohon ndo tyin tsa vatsí ra tsa xico tsi yu —catyí ra Jesús tsihin ra naha.

*Nu tsaq cuenda ra Judas tsi ra Jesús tsi nu xaan iñi tsi ra nahnu*

(Mt. 26.47-56; Lc. 22.47-53; Jn. 18.2-11)

<sup>43</sup> Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandofñ nyivi Israeli naha ra; cuaha xaan nyivi jacuhñ ra naha tsihin ra Judas, iin ra tsicá tsihin ra Jesús, tyin tiin ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaq ra Judas tsihin nyivi cuaha can.

<sup>44</sup> Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuví ra Jesús. Tan cahān ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jahā cuenda vaha ndo coto cunu ra —catyí ra nu quitsi tsi.

<sup>45</sup> Tsa tsaq ra Judas nu nyii ra Jesús natuhva ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra.

<sup>46</sup> Tacan tan quihñ ra naha tsi ra Jesús cuahán tsihin ra naha.

<sup>47</sup> Maa tyin iin ra nyii tsihin ra Jesús, tava ra mityi ra tan tsahnyā ra soho musu ra jutu tsaahnu cuví ityi nuu.

48 Tacan tan catyí ra Jesús tsihin ra quihín tsi ra:

—¿A ñasuhu cuví yuhu? tyin vatsí ndo vatsí quihín ndo tsi yu tsihin mityi tan yun.

49 Ndihi quívi tsinyí yu jacuahá yu tsi ndo tsitsi vehe ñuhu cahnu, tan ña quihín ndo tsi yu. Tandihí tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

50 Tacan tan tsinú tandihí ra tsicá tsihin ra, tan ndoo intuhun ña maa ra jahá ra naha.

51 Maa tyin ndoo intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tñin ndihí ra naha tsi ra.

52 Maa tyin nacoó ihñi ra ticatyí can tan tsinú tandihí ra.

*Nu tsicá tuhun ra mandoñi naha ra tsi ra Jesús tun juvin Sehe Nyoo tsi ra*

(Mt. 26.57-68; Lc. 22.54-55, 63-71; Jn. 18.12-14, 19-24)

53 Tacan tan tsindacá ra naha tsi ra Jesús tsi ra jutu tsaahnu cuví ityi nuu tan ndu iin tucu tandihí ra jutu cuví ityi nuu naha ra tan ra cuví mandoñi nyívi Israel naha ra, tan ra maestro cuenda ley vehe ñuhu naha ra.

54 Ra Pedro nyicún tsica nyicún tsica ñi ra tsi ra naha cuahán ra. Tan tsaq ra nda nuquehe yuvehe ra jutu tsaahnu cuví ityi nuu can. Tan ndoo ra tuñú ra ñuhu tsihin ra vitya naha ra.

55 Ra cuví jutu ityi nuu naha ra, tan tandihí ca ra cumí tyiñu naha ra nducú ra naha cuatyí tyaa ra naha síqui ra Jesús, tyin tacan tan cuví cahñi ra naha tsi ra. Maa tyin ña ñihj maa ra naha cuatyí tyaa ra naha tsi ra.

56 Cuaha xaan nyívi cahan cuendu síqui ra, maa tyin ña nacatsi tahan maa tuhun caahán ndi intuhun ñi.

57 Yihí ñi nduvitá ñi tan cahan ñi maa ñi maa cuendu síqui ra, tan catyí ñi:

58 —Nyuhu tsiñj ndi tsa cahan ra tan catyí ra tyehen: “Yuhu cua caní yu vehe ñuhu cahnu tsa javahá nyívi. Tan cua janduvita yu inga vehe ñuhu tsitsi tsa uñi quívi ñi. Maa tyin ñavin tahan vehe ñuhu tsa javahá nyívi” catyí ra —catyí ñi.

59 Vasu ndi maa tacan caahán ñi, maa tyin ña nacatsi tahan maa tsa cahan ñi.

60 Tacan tan nduvitá ra jutu tsaahnu cuví ityi nuu mahñu tandihí ra yucú ican naha ra, tan tsicá tuhun ra tsi ra Jesús, tan catyí ra:

—¿A ña cua nacahan un nu caahán nyívi ihya? ¿A nditsa tsa caahán ñi, o ña nditsa? —catyí ra

61 Maa tyin ña nacahan maa ra Jesús tan nduve maa náa cahan ra. Tacan tan ra jutu tsaahnu cuví ityi nuu tsicá tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

62 Tan ra Jesús catyí ra tsihin ra:

—Juvín. Nyooho cua nyehe ndo tsi yuhu, Rayíi tsa quee nda gloria, nyaá yu xiin cuaha Nyoo, ra iyó tandihí tunyee iñi, tan cua nyehe tucu ndo nu quítsi yu nu vico ityi andiví —catyí ra tsihin ra.

63 Tacan tan tsahnyá ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñí maa ra tyin ña vaha tsa caahán ra, tan catyí ra:

—Ña tsiñi ñuhu ca tsa nducu yo tsi ra cuví tsa ndaa.

64 Tyin tsa tsiñi maa ndo tsa cahan ra. Tsi-coq cuatyí ra nuu Nyoo tsihin tuhun cahan ra. ¿Náa catyí ndo vityin? —catyí ra.

Tacan tan nacahan tandihí ra naha tan catyí ra naha tyin taahán tsi cúu ra.

65 Tacan tan quítsahá tiví síi juhva ra naha tsi ra. Tyasj ra naha nuu ra, tan cañi ra naha tsi ra tsihin tsiqui tan catyí ra naha tsihin ra:

—¡Cahan tsihin ndi yoo cañi tsi un! —catyí ra naha tsihin ra.

Tan cañi tucu ra vitya naha ra nuu ra.

*Nu cahan ra Pedro tyin ña nacotó ra tsi ra Jesús*

(Mt. 26.69-75; Lc. 22.56-62; Jn. 18.15-18, 25-27)

66 Tsitsi tsa ndi nyíi ra Pedro nuquehe tsata vehe ra jutu tsaahnu cuví ityi nuu, tsaq iin ñaha cuví musu ra jutu can.

67 Cuhva tsa nyehe ñaha can tsi ra Pedro nyaá ra tuñú ra ñuhu, quítsahá nyehé xaan ña tsi ra, tan catyí ña tsihin ra:

—Tsicá tucu yooho tsihin ra Jesús, ra ñuu Nazaret can —catyí ña tsihin ra.

68 Maa tyin ra Pedro tyihj xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quitá ra ityi yuhu cora. Tan tsacú ñi tsitooho.

69 Tacan tan ñaha can nanyehé nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

70 Maa tyin tyihj xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooho, tyin ra Galilea cuví un, tan caahán un tumaa caahán nyívi Galilea —catyí ra naha tsihin ra.

71 Tacan tan iyo xaan caahán ra Pedro, tan catyí ra:

—¡Tsitó vaha maa Nyoo tyin ña nacotó yu tsi ra tsa caahán ndo tuhun! ¡Na cahñi maa

Nyoo tsi yu tun ña nditsa yu tsa caahán yu! —catyí ra.

<sup>72</sup> Juvín ñi cuhva can navacū tsitooho tsa tsinu uvi tsaha. Tacan tan nducuhun iñi ra Pedro tsa cahān ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yahā cahān un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsahā ra tsacú ra.

## 15

*Nu jaqueé yuhu ra Pilato tsi ra Jesús*

(Mt. 27.1-2, 11-14; Lc. 23.1-5; Jn. 18.28-38)

<sup>1</sup> Tan tsa tuví inga quiví ndu iñ ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihí ca ra cumí tyiñu tsa yihí ndaha tsi nyiví Israel. Nuuhñi ñi maa ra Jesús tan tsindacā ra naha tsi ra nuu ra Pilato.

<sup>2</sup> Tan tsicā tuhun ra Pilato tsi ra, tan catyí ra:

—¿A juvin un cuví rey nyiví Israel?

Nacahān ra Jesús tan catyí ra:

—Juvín yu, tumaa caahán maa un.

<sup>3</sup> Tan cuaha xaan cuendu cahān ra cuví jutu ityi nuu naha ra siquí ra Jesús.

<sup>4</sup> Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyēhe, cuaha xaan cuatyí tyaá ra naha siquí un —catyí ra.

<sup>5</sup> Maa tyin ra Jesús ña nacahān maa ra. Yacan cuenda ña ñihí ra Pilato náa cahan ra.

*Nu tsahá ra Pilato ndatu tsa cúu ra Jesús*

(Mt. 27.15-31; Lc. 23.13-25; Jn. 18.38—19.16)

<sup>6</sup> Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñí maa nyiví tyin tava ra.

<sup>7</sup> Quiví can nyii iin ra nañí Barrabás vehe caa, tsihin inga ca ra tsahñí nyiví nu cuvāq nyiví siquí ra ndacá ñaha.

<sup>8</sup> Tan tsahan nyiví tsicahān ñi tsihin ra Pilato na jaña ra iin ra yucú vehe can tumaa tuhvá maa ra javahá.

<sup>9</sup> Tan nacahān ra Pilato, tan catyí ra:

—¿A cuñí ndo tsa jaña yu tsi ra cuví Rey ndo?

<sup>10</sup> Tacan cahān ra tyin tuví iñi ra tyin tsahā cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñí ra naha nyēhe ra naha tsi ra tyin cuaha nyiví nysicún tsi ra.

<sup>11</sup> Maa tyin ra jutu cuví ityi nuu can naha ra natyuhū ra naha tsi nyiví tsa cahan ñi na tava ra Pilato tsi ra Barrabás vehe caa.

<sup>12</sup> Tacan tan tsicā tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

<sup>13</sup> Tacan tan canā tsa ñi, tan catyí ñi:

—¡Tyaā tsi ra nu cruu na cúu ra! —catyí ñi.

<sup>14</sup> Tan catyí ra Pilato tsihin ñi:

—Maa tyin, ¿náa tsa ña vaha javahā ra? —catyí ra.

Ñi ican quitsahā canā tsa nyico ñi tan catyí ñi:

—¡Tyaā tsi ra nu cruu na cúu ra! —catyí ñi.

<sup>15</sup> Tacan tan tsa cuñí ra Pilato ndoo vaha ra nuu nyiví, tavā ra tsi ra Barrabás vehe caa. Tsa yahā tavā ra tsi ra can, tavā tyiñu ra na ndoho ra Jesús. Tsa yahā ndohō ra Jesús, tan tsahā cuenda ra tsi ra tsi andaru na ticaa ra naha tsi ra nu cruu.

<sup>16</sup> Tacan tan tsindacā ra andaru can naha ra tsi ra nuquehe vehe tyiñu. Tan jandu iñ ra naha tandihí ca andaru.

<sup>17</sup> Tan jacunditsí ra naha iin jahma cuaaha tuun tsi ra. Tan javahā ra naha iin corona iñu. Tan tyihí ra naha can jiñi ra.

<sup>18</sup> Tsa yahā yacan tan quitsahā canā tsa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yooho Rey nyiví Israel! —catyí ra naha.

<sup>19</sup> Tan cañi ra naha jiñi ra tsihin yutun, tan tiví sñi ra naha tsi ra. Tan tsicuiñí tsi ra naha nuu ra jahá ra naha tyin jacahnú ra naha tsi ra.

<sup>20</sup> Tsa yahā tsacū nducu ra naha tsi ra, tavā ra naha jahma cuaaha tuun tsa jacunditsí ra naha tsi ra. Tacan tan jacunditsí nyico ra naha jahma maa ra tsi ra. Tan cuahán ra naha tsihin ra cuaticaa ra naha tsi ra nu cruu.

*Nu tyaq ra naha tsi ra Jesús nu cruu*

(Mt. 27.32-44; Lc. 23.26-43; Jn. 19.17-27)

<sup>21</sup> Ityi cuahán ra naha tahañ ra naha iin ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra queē ra cuhu. Cuhva tsa cua yaha ra, jañiñí ra andaru naha ra tsi ra na cuiso ra cruu ra Jesús.

<sup>22</sup> Tan tsindacā ra naha tsi ra Jesús iin nu nañí Gólgota, tan cuñí tsi catyí Yiquí Jiñí Ndiyí.

<sup>23</sup> Tan ican jachōq ra naha vinu sacā nuu tsihin numeri tsa nañí mirra tsi ra. Maa tyin ra Jesús ña cuñí ra coho ra can.

<sup>24</sup> Tsa yahā tyaq ra andaru naha ra tsi ra nu cruu, quihín ra naha jahma ra tan tavā cuenda ra naha tyin cuñi ra naha coto ra naha yóo cua jaha canaa intuhun intuhun jahma can.

<sup>25</sup> Tyaq ra naha tsi ra nu cruu caa ñn tsa tuvi.

<sup>26</sup> Tan letra tsa tyaq̄ ra naha jiñi cruu ra, catyí tsi nacuenda cua cúu ra. Tan catyí tsi tyehen: “Ra ihya cuví Rey nyivi Israel.”

<sup>27</sup> Tan tyaq̄ ndihi ra naha uvi taahan ñasuhu tshin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra.

<sup>28</sup> Tacan cuví tan cundaq̄ cuhva catyí nu tutu Nyoo tyehen: “Javaha nyivi tshin ra tumaa javahá ñi tshin ra caquiñi.”

<sup>29</sup> Tan nyivi yahá ican jacuñi nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡Jaan! ¡Yooho tsa cahan tyin cua cani un vehe ñuhu cahnu, tan tsitsi tsa uñi quivi cua janduvaha nyico un itsi,

<sup>30</sup> jacacu tsi un vityin tan nuu nu cruu juvin! —catyí ñi.

<sup>31</sup> Tan juvin ñi tacan tsacú nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacu ra tsi inga ca nyivi, maa tyin ña cuví jacacu ra tsi maa ra!

<sup>32</sup> Tun nuu ra nu cruu vityin nyehe yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyivi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacu nducu ndihi nahnu tsi ra.

*Nu tsihi ra Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Cuhva tsa cua tahan hora, ndunaq̄ naniñi cahnu nda cuanda caa uñi tsa tseñi.

<sup>34</sup> Tan juvin ñi cuhva can cana tsa ra Jesús tshin tandihi tunyee iñi ra, tan catyí ra:

—Eloi, Eloi, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq̄ ihñi un tsi yu? —catyí ra.

<sup>35</sup> Juhva ra yucú ican naha ra tsiñi ra naha tsa cahan ra tan catyí ra naha:

—¡Ihna ndo! Caná tsa ra tsi ra Elías, ra cuví ndusu yuhu Nyoo tahan tsanaha —catyí ra naha.

<sup>36</sup> Tacan tan tsinú xaan iin ra tsiquihin ra iin jahma tsa caá tumaa caá catyí, tan jatyiñi ra can tshin vinu iya. Tan tyaq̄ ra can iin nu yutun tan jatuhvā ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

<sup>37</sup> Tacan tan ñihi xaan cana tsa ra Jesús, tan tsihi ra.

<sup>38</sup> Tan jahma tsa ticaá tsitsi vehe ñuhu cahnu ndatq̄ sava tsi, nda siqui tan nda cuanda ityi tsaha.

<sup>39</sup> Tan ra capitán tsa yihí ndaha andaru tsa nyaá jatyin ñi nu ticaá ra Jesús nyehe ra

nácaa cana tsa ra, tan nácaa tsihi ra, tacan tan catyí ra:

—Nditsa nditsa cui tyin Sehe Nyoo tsi ra ihya —catyí ra.

<sup>40</sup> Tan ndasava ñi nyecú tucu juhva ñiñaha nyehé ñi. Tan mahñu ñi can nyiiñi María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyii tucu ña Salomé.

<sup>41</sup> Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsicq̄ nuu ra ityi Galilea. Tan yucú cuaha tucu ñiñaha inga ñuu tsa tsaq̄ tshin ra ñuu Jerusalén ican.

*Nu tsicutsi ra naha tsi ra Jesús*

(Mt. 27.57-61; Lc. 23.50-56; Jn. 19.38-42)

<sup>42</sup> Quivi tsa tuhvā nyivi janduvaha tsa catsi ñi cuenda inga quivi tuhvā ñi quitatu, juvin ñi tseñi can

<sup>43</sup> tsaq̄ ra José ra ñuu Arimatea nu nyii ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jacuitsi Nyoo tyin cundaca ñaha nu ñuhu ñayivi. Ña nayuhvi ra tan tsahan ra tsindacañ ra cuñu ñuhu ra Jesús tsi ra Pilato.

<sup>44</sup> Tsa tsito ra Pilato tyin tsa yaha tsihi ra Jesús, iyo xaan cuñi ra. Tacan tan cana ra tsi iin capitán tan tsicq̄ tunun ra tsi ra tun nditsa tyin tsa tsihi ra Jesús.

<sup>45</sup> Tan tsa tsito vaha ra Pilato tyin tsa yaha tsihi ra Jesús, tava tyiñu ra na cuhva ra andaru naha ra cuñu ñuhu ra tsi ra José.

<sup>46</sup> Tacan tan tsijatq̄ ra José iin jahma cuitsin tsa tsinu tshin jahma vaha tsa nañi linu, tan januu ra cuñu ñuhu ra Jesús nu cruu. Yaha can tan cavā nuu ra jahma can cuñu ñuhu ra. Tacan tan tyihñi ra cuñu ñuhu ra tsitsi iin ñaña tsa nyaá nduvaha tsitsi iin cava. Tan tyasñi ra yuhu ñaña can tshin iin yuu cahnu.

<sup>47</sup> Tan ña María, tsa quee ñuu Magdala, tan ña María, sihi ra José, tsahan ñi, tsinyehé ñi nu tinyiñi ra José can cuñu ñuhu ra Jesús.

**16**

*Nu nandoto ra Jesús*

(Mt. 28.1-10; Lc. 24.1-12; Jn. 20.1-10)

<sup>1</sup> Tsa yaha quivi quitatú nyivi, ña María ñuu Magdala, tan ña María sihi ra Jacobo, tan ña Salomé jatq̄ ñi ndutya tami tyin cuñi ñi cahun ñi cutyihñi ñi can cuñu ñuhu ra Jesús.

<sup>2</sup> Tacan tan cuahán ñi nu nyaá ñaña ra tsa cunditsin cui ñi quivi quitsaha vitya. Tan tsaq̄ ñi ican cuhva tsa cua cana cui ñi ñicanyii.

<sup>3</sup> Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

<sup>4</sup> Maa tyin cuhva tsa tsaq̄ ñi nyehe ñi tyin tsa catsiyo yuu cahnu tsa ndasí yuhu ñaña can.

<sup>5</sup> Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Ndisí ra jahma cuitsin cañi. Tan nayuhvi xaan ñi.

<sup>6</sup> Maa tyin catyi ra tsihin ñi:

—Ña ngyuhvi ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyii ihya vityin tyin tsa nandoto ra. Nyehé ndo nu tinyij ra naha tsi ra.

<sup>7</sup> Cuaahan ndo tan jacoto ndo tsi ra Pedro tan tsi inga ca ra tsicá tsihin ra Jesús. Tan catyi ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyi maa ra tsihin ra naha tsa ndi cumañi ca cúu ra —catyi ángel can tsihin ñi.

<sup>8</sup> Tacan tan tsinú xaan ñi cuahán ñi, tyin nihí ñi jahá tsa yuuhvi ñi. Tan ña cahan maa ñi tsa cahan ñi tsihin ndi intuhun maa nyivi tyin yuuhvi xaan ñi.

*Nu quituvi ra Jesús nuu ña María quee ñuu Magdala*

(Jn. 20.11-18)

<sup>9</sup> Ra Jesús nandoto ra quivi quitsahá vitya. Tan quituvi ra jihna cuui ca nuu ña María ñuu Magdala. Juvín ña cuví ña tsa tavá ra utsa tatyí ña vaha.

<sup>10</sup> Tsañan ña tsijacoto ña tsi ra tsicá tsihin ra, tyin yucú ra naha tsihin tucuihya iñi tan tsacú ra naha.

<sup>11</sup> Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

*Nu quituvi ra Jesús nuu uvi ra tsicá tsihin ra*

(Lc. 24.13-35)

<sup>12</sup> Tsa yahá yacan, tan quituvi ra Jesús nuu uvi ra tsa cuahán ityi cuhu naha ra. Maa tyin siin cuhva caá ra nyehe ra naha.

<sup>13</sup> Tan tsinuhú ra naha tsijacoto ra naha tsi tandihi ca ra naha. Maa tyin juvín ñi ña tsinu iñi ra naha tsa cahan ra can naha ra.

*Nu tsahá ra Jesús tyiñu tsi ra tsa tsicá tsihin ra*

(Mt. 28.16-20; Lc. 24.36-49; Jn. 20.19-23)

<sup>14</sup> Yaha yacan tan quituvi ra Jesús nuu tandihi tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaán ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahan nyivi tsa nyehe tsi ra tsa yahá nandoto ra.

<sup>15</sup> Tan catyi ra tsihin ra naha:

—Cuaahan ndo nani# cahnu nu ñuhu ñayivi, tan cahan ndo tuhun Nyoo tsihin tandihi nyivi, tan catyi ndo tsihin ñi nácaa jacacú Nyoo tsi ñi.

<sup>16</sup> Tan nyivi tsa cua tsinu iñi tan coon-dutya ñi, cua cacu ñi. Maa tyin ñi tsa ña cua

tsinu iñi cua ndoo cuatyí ñi siqui ñi tan cua cunaa ñi.

<sup>17</sup> Tan tandihi tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhvá ñi cahan.

<sup>18</sup> Cua tñin ñi coo, tan tatun coho ñi o catsi ñi tsa yihi venenu, ña cua jacuehe can tsi ñi. Cua tyiso ndaha ñi jiñi nyivi cuuhvi, tan cua nduvaha nyivi.

*Nu ndaa ra Jesús andivi*  
(Lc. 24.50-53)

<sup>19</sup> Tsa ndihí cahan Jutu Mañi yo Jesús tsihin ra naha, tacan tan ndaa ra andivi, tan tsinyaá ra xiin cuaha Nyoo.

<sup>20</sup> Tacan tan ra tsicá tsihin ra quitá ra naha tan tsañan ra naha tandihi ñi ityi tsicahán ra naha tuhun Nyoo nácaa jacacú ra tsi yo. Juvín ñi maa Jutu Mañi yo jatyinyee tsi ra naha tyin tsañá ra tsa javaha ra naha cuaha tsa iyo. Tan tsihin yacan nyehe nyivi tyin nditsa tsa caahán ra naha.

Tan na cuvi tsi tacan ñi.

## Tuhun Nyoo Tsa Tyaa Ra Lucas

*Nu quitsahq jacotó ra Lucas tuhun ra Cristo tsi ra Teófilo*

<sup>1</sup> Cuaha ñi nyívi nducú ñi cuhva tyaa ñi nuu tutu tandihi tsa cuví nu yucú ndi ihya. Tyaa ñi cuhva

<sup>2</sup> nacatyí tuhun nyívi tsihin yo, ñi tsa nyehe tan cahān tuhun ra Jesús nda quívi jihna ñi.

<sup>3</sup> Tan yuhu tucu tsa yahā cahví yu tan nducú tuhun vaha yu tandihi tsa cuví nda nu quitsahq. Yacan cuenda cuñi yu tyaa yu tuhun ihya tsa cuenda un, yooho Teófilo, nda nu quitsahq tan nda nu ndihí.

<sup>4</sup> Tyin tacan tan coto un tyin nditsa tsa jacuahā nyívi tsi un.

*Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyívi*

<sup>5</sup> Quívi tsa cuví ra Herodes rey taníi cahnu cuenda Judea, tsicoq iin ra cuví jutu, nañi ra Zacarías. Tan yihí ra cuenda ra cuví jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuví jutu tahān tsanaha, cuví ña.

<sup>6</sup> Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahán Nyoo Jutu yo. Tan yoñi maa cuví tyaa cuatyí tsi ñi.

<sup>7</sup> Tan nduve maa sehe ñi tsicoq. Tyin ña Elisabet, ña cuví coo sehe ña. Tan tsa tsahnu xaan nduvi taahan ñi.

<sup>8</sup> Iin quívi taahán tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo.

<sup>9</sup> Tan cuhva iyó maa ra cuví jutu naha ra, tava ra naha suerte, ndáa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quívi can tahān tsi tsi ra Zacarías.

<sup>10</sup> Tan cuaha nyívi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmi ra cutu can.

<sup>11</sup> Tan tsitsi tsa ndi nyíi ra ican tan quituví iin ángel Jutu Nyoo nu nyíi ra. Tan nyaá nyityi ángel can ityi xiin cuaha nu nyaá altar nu tsahmi ra cutu.

<sup>12</sup> Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra.

<sup>13</sup> Tan ángel ican catyí ra tsihin ra:  
—Zacarías, ña nayuhvi un. Tyin Nyoo tsiñi ra tsa cahān un tsihin ra. Tan cua coo iin sehe ña Elisabet ñasihi un. Tan cua cunañi ra Juan.

<sup>14</sup> Sií xaan cua cuñi un. Tan cuaha xaan nyívi cua cusí ndihí iñi quívi cua cacu ra.

<sup>15</sup> Tyin sehe un, cahnu xaan cua cuví ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihí Tatyí Ii

Nyoo tsi ra tsa ndi cumañi ca cacu ra tan tandihi tyembu tsa cua coo ra.

<sup>16</sup> Tan cuaha xaan nyívi Israel cua cunyi-cun ñi tsi Jutu yo Nyoo jaha ra.

<sup>17</sup> Juvín ra cua kuhun ityi nuu Jutu Mañi yo. Tan cua coo tunyee iñi Nyoo tsi ra. Tyin cua cuví ra tumaa ra Elías, ra cuví ndusu yuhu Nyoo tahān tsanaha. Tan cua cuhva cuenda ra nácaa coo vaha nyívi iyó sehe tsihin sehe ñi. Tan cua janaha ra tsi nyívi caquiñi, na tyaa yahvi ñi tuhun caahán Nyoo. Tacan cua janduvaha ra tsi nyívi tan cua cuatu vaha ñi tsi Nyoo —catyí ángel tsihin ra Zacarías.

<sup>18</sup> Tan tsicá tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

<sup>19</sup> Tan ángel can nacahān ra tan catyí ra:

—Yuhu Gabriel nañi yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un.

<sup>20</sup> Tan vityin cua nduñihi un. Tyin ña tsinú iñi un tsa caahán yu tsihin un. Tan ña cua cuví cahan un nda cuenda tsa yaha cacu sehe ñasihi un. Tan nda quívi cundaa tandihi tsa cahān yu tsihin un —catyí ángel ican tsihin ra.

<sup>21</sup> Tan nyívi tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can.

<sup>22</sup> Tan cuhva tsa quitā ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsahq caahán ra tsihin ñi tsihin ndaha ra. Tyin ña cuví cahan ra.

<sup>23</sup> Tan quívi ndihí tyiñu jahá ra Zacarías vehe ñuhu can, tan canuhvú ra yuvehe ra.

<sup>24</sup> Tsa yahā quívi can tan tsicuhun sehe ñasihi ra, ña Elisabet. Tan ña quitā maa ña tsata vehe tsa tandihi tsa uhun yoo. Tan tsicá iñi ña:

<sup>25</sup> “Tyehen javahā Jutu Mañi yu tsihin yu, tyin tacan tan ña cahan nyaa ca nyívi tsi yu”, cuñi ña tsicá iñi ña.

*Nu jacotó iin ángel tsi ña María tyin cua cacu ra Jesús*

<sup>26</sup> Tsa quitā iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea.

<sup>27</sup> Tyin cahan ra tsihin iin ñaha yoco tsa nañi María. Tan tsa nyaá maa tsa cua tindaha ña tsihin ra nañi José, ra cuví tata ra rey David.

<sup>28</sup> Tan quihví ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó

xaan ca ra tsi un tan ñavin ca tandihí ca ñaha —catyí ángel ican tsihin ña.

<sup>29</sup> Tan tsa tsiñí ña tsa cañan ra, iyo xaan cuñí ña tsa cañan ra. Tan tsicá iñi ña: “¿Nacuenda tacan caahán ra ihya nacumi tsi yo?” tsicá iñi ña.

<sup>30</sup> Tan catyí ángel ican:

—Ña ngayuhví un, María, tyin ñihí un tumañi iñi Nyoo.

<sup>31</sup> Vityin cua cuhun sehe un. Tan cua cunañi ra Jesús.

<sup>32</sup> Cahnu xaan ra cua cuví ra. Tan Sehe Nyoo cahnu cua cuví ra. Tan cua cuví ra rey jaha Nyoo Jutu yo, tumaa cuví ra David, tsii tsaahnu ra.

<sup>33</sup> Tyin cua cundaca ñaha ra tsi nyívi Israel tandihí maa tyembu. Tan ña cua ndihí maa tsa cundaca ñaha ra —catyí ángel can tsihin ña.

<sup>34</sup> Tacan tan tsicá tuhun ña María tsi ángel, tan catyí ña:

—¿Nacaa cua cuví can? Tyin yuhu, ñaha ca coo yíi yu.

<sup>35</sup> Tan nacahan ángel tan catyí ra:

—Maa Tatyí li Nyoo cua quítsi síqui un. Tan tunyee iñi Nyoo, ra nyaá gloria, cua quítsi tan cua casi tsi síqui un tumaa iin vico. Yacan cuenda Ra li tsa cua cacu cua cunañi ra Sehe Nyoo.

<sup>36</sup> Tacan tucu ña Elisabet ña tsatsin un cua cacu iin sehe ña vasu tsa tsaahnu ña. Tan catyí nyívi tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña.

<sup>37</sup> Tyin Nyoo nduve tsa ña cuví jaha ra —catyí ángel tsihin ña.

<sup>38</sup> Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

*Nu cuahán ña María cuanyehé ña nu nyíi ña Elisabet*

<sup>39</sup> Tan iin quívi can, numi ñi cuahán ña María iin ñuu tsa canyíi Judea nu maa ñi maa yucu iyó.

<sup>40</sup> Tan quihví ña tsitsi vehe ra Zacarías. Tan nacuhvá ña nacumi tsi ña Elisabet.

<sup>41</sup> Tan tsa tsiñí ña Elisabet tsa cañan ña María, tan natuñu sehe ña tsitsi ña. Tan ñihí nyaá Tatyí li Nyoo tsihin ña.

<sup>42</sup> Tan ñihí xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihí ca ñiháha. Tan nasocó ra tsi sehe un.

<sup>43</sup> ¿Tan yóo cuví yuhu? Tyin quítsi síhi Jutu Mañi yu quítsi nyehe ña nu nyaá yu.

<sup>44</sup> Cuhva tsa tsiñí yu tsa cañan un, tan natuñu sehe yu tsitsi yu. Tyin síi xaan cuñí ra.

<sup>45</sup> Tan síi xaan cuñí tucu maa añima un tyin tsinú iñi un. Tyin cua cuví cuhva tsa cañan Nyoo tsihin un —catyí ña Elisabet.

<sup>46</sup> Tan catyí ña María:

—Jacahnú yu tsi Nyoo tsihin tandihí añima yu.

<sup>47</sup> Tan síi xaan cuñí añima yu tsihin Nyoo ra jacacú tsi yu.

<sup>48</sup> Tyin cuví yuhu iin ñaha ndaahví tan Nyoo nyehe ndaahví ra tsi yu.

Tan vityin tandihí quívi cua cañan nyívi tyin cahnu xaan tumañi iñi ñihí yu.

<sup>49</sup> Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sívi ra.

<sup>50</sup> Tan ndaahví cuñí ra tsihin tandihí nyívi tsa cua coo tan tyaa yahví ñi tsi ra.

<sup>51</sup> Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyívi tsa cahnu xaan tsicá iñi ñi.

<sup>52</sup> Quinyaa ra tunyee iñi iyó tsi nu cuví rey. Tan cua janducahnu ra tsi nyívi ndaahví.

<sup>53</sup> Tсахá Nyoo tsa vaha tsi nyívi cuñí coto tsa vaha.

Tan nyívi cuca tsa cuñí tyin nduve tsa tsiñí ñuhu tsi ñi, tsihin ndaha ndi ñi, jacuhún ra tsi ñi.

<sup>54</sup> Jatyinyeé ra tsi nyívi Israel tsa cuví ñi musu ra.

Tan ña naá iñi ra tsi ñi. Nyehé ndaahví ra tsi ñi.

<sup>55</sup> Tumaa cuhva catyí Nyoo tsihin ra Abraham, tsii tsaahnu yo, tan tsihin sehe ra, tacan ñi javahá maa Nyoo —catyí ña María.

<sup>56</sup> Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhú ña nda yuvehe ña.

*Quívi cacú ra Juan, ra tsa jacoondutyá tsi nyívi*

<sup>57</sup> Tsa tsaá quívi tsa cacú sehe ña Elisabet, jacacú ña iin rayíi.

<sup>58</sup> Tan nyívi vehe ña tsihin nyívi tsa iyó yatyin ñi yuvehe ña, síi xaan cuñí ñi. Tacan tucu maa ña. Tyin vaha xaan tsa javahá Nyoo tsihin ña.

<sup>59</sup> Tan tsa quítá una quívi tsa cacú ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñí ra naha tsa cunañi ra Zacarías tumaa nañi maa jutu ra.

<sup>60</sup> Maa tyin síhi ra catyí ña:

—Ña cuví. Tyin Juan cua cunañi ra.

<sup>61</sup> Tan catyí ra naha:

—¿Nacuenda jacunañi un Juan tsi ra? Tan yoñi nyívi ndo nañi tacan —catyí ra naha.

<sup>62</sup> Tan quítsahá tsicá tuhun ra naha tsihin ndaha ra naha tsi jutu ra. Tyin coto ra naha náa sívi cuñí ra tsa cunañi ra.

<sup>63</sup> Tan tsican jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihí maa ra ican naha ra iyo xaan cuñí ra naha tsa tacan.

<sup>64</sup> Juvín ñi maa hora can nacahan ra Zacarías. Tan quítsaha jacahnú ra tsi Nyoo.

<sup>65</sup> Tan tandihí maa nyívi iyó yatýin yuvehe ñi, iyo xaan cuñí ñi cuví. Tan tandihí maa nyívi tsa iyó yucu iyó Judea ican nacatýi tuhun tahan ñi tsa cuví can.

<sup>66</sup> Tan tandihí maa nyívi tsa tsitó can, tsicá ñi ñi, tan tsicá tuhun tahan ñi tsi ñi:

—¿Yóo ra cua cuví ra lee ihya? —catýi ñi. Tyín nditsa, Nyoo nasocó xaan ra tsi ra.

*Nu jacahnú ra Zacarías tsi Nyoo*

<sup>67</sup> Ra Zacarías jutu ra Juan, ñihí nyaá Tatyí Ii Nyoo tsihin ra. Tan tsaha cuenda ra tsa caahán Nyoo tsihin ra, tan catýi ra:

<sup>68</sup> —Cahnu xaan ra cuví Jutu yo Nyoo cuenda yo nyívi Israel.

Tyín quítsi ra nu yucú yo, tsa cuví yo nyívi maa ra. Tan jacacú ra tsi yo.

<sup>69</sup> Tan tsaha ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuví musu Nyoo cuví ra.

<sup>70</sup> Tacan cua javaha ra, catýi Nyoo tahan tsanaha, quívi cahan ra cuví ndusu yuhu ra, tan catýi ra naha tyehen:

<sup>71</sup> Cua jacacu Nyoo tsi yo ndaha nu xaan ñi tsi yo, tan nuu tandihí nu tsa ndasi cuñí nyehe tsi yo.

<sup>72</sup> Tan cua cundaahví ñi ra nyehe ra tsi nyívi yo tsa tsicoq tahan tsanaha.

Tan cua nducuhun ñi ra tsa cahan ra tsihin ñi tahan tsanaha.

<sup>73</sup> Cahan maa Nyoo tsihin ra Abraham, tsií tsahnu yo,

<sup>74</sup> tan catýi ra tyín cua jacacu ra tsi yo ndaha nu xaan ñi tsi yo.

Tyín ña cua nayuhví ca yo jacahnu yo tsi ra.

<sup>75</sup> Tan maa ra cua janaha ra kuhva coo yo. Tan vaha cua coo yo nuu ra tan coo yo maa ñi tsa cuenda maa ra tandihí quívi tsa cua coo yo ñayívi —catýi ra Zacarías.

<sup>76</sup> Tan catýi ra Zacarías tsihin lee can: —Sehe luhlu yu, yoocho ra cuví un ndusu yuhu Nyoo, ra nyaá gloria.

Tyín cuhun un itýi nuu Jutu Mañi yo. Tan cua cahan un tuhun ra tsihin nyívi tyín tsa cuñí quítsi ra.

<sup>77</sup> Tan cua jacoto un tsi nyívi tyín cua jaha Nyoo tucahnu ñi tsi ñi.

Tacan tan cacu añima ñi.

<sup>78</sup> Tyín Jutu yo Nyoo cuñí ra tsi yo. Tan cundaahví xaan ñi ra tsi yo.

Tan cua jaquítsi ra iin ra jatýinyee tsi yo. Tan cuví ra tumaa ñuhú ñicanyii.

<sup>79</sup> Tyín cua janaha ra ñuhú nditsin nu iyó nyívi nu naa, nu ndatú tuhun tsihí tsi ñi.

Cua janaha ra itýi ra tsi yo, itýi vaha —catýi ra Zacarías.

<sup>80</sup> Tan ra luhlu can cua cuahnu ca ra. Ñihí xaan tsicoq tunyee ñi tsi ra tsihin Tatyí Ii Nyoo. Tan tsicoq ra iin tsiqui ndií nda cuanda quívi tsa nacoto nyívi Israel tsi ra.

## 2

*Quívi cacú ra Jesús*

(Mt. 1.18-25)

<sup>1</sup> Quívi ican tsicoq iin ra ndacá ñaha, ra cuví rey cahnu, nañi ra Augusto. Tava tyíñu ra tsi ra nyisó tyíñu naha ra na tyaa ra naha sivi tandihí nyívi taníi cahnu ñuu ñayívi.

<sup>2</sup> Ihya cuví tsa jihna ñi tsinyaa sivi nyívi. Tan ra Cirenio cuví ra ra ndacá ñaha tandihí ñuu nu cuví Siria.

<sup>3</sup> Tan tandihí nyívi cuanuhú ñi ñuu ñi, tyín cua ndaca ñi sivi ñi.

<sup>4</sup> Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacú ra rey David, tyín tata ra David cuví ra.

<sup>5</sup> Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña.

<sup>6</sup> Tan tsa ndi yucú ca ñi ñuu Belén ican tan quítsaha cuuhví tsitsi ña tyín tsa cua cacú sehe ña.

<sup>7</sup> Tan ican cacú sehe nuu ña. Tan cavá nuu ña jahma tsi ra. Tan nacaquin ña tsi ra tsitsi iin canuva nu tsatsi quíti itya. Tyín ña ñihí ñi iin vehe coo ñi.

*Cuhva cahan ángel tsihin ra jahá cuenda mbee*

<sup>8</sup> Yatyín ñi ñuu Belén can yucú ra jahá cuenda mbee tsa tsacuaa.

<sup>9</sup> Tan sana ñi ra naha quituví iin ángel Nyoo. Tan jandunditsin Jutu yo Nyoo taníi cahnu nu yucú ra naha. Tan nayuhví xaan ra naha.

<sup>10</sup> —Ña nayuhví ndo —catýi ángel can—. Tyín vatsi cahan yu iin tsa vaha xaan tsihin ndo. Sií xaan cua cuñí tandihí cuíi maa nyívi tsa cuenda tsi.

<sup>11</sup> Vityín nda ñuu ra David cacú iin ra cua jacacu tsi nyívi. Cuví ra Cristo, ra cuví Jutu Mañi yo.

<sup>12</sup> Tan tsihin kuhva ihya cua nacoto ndo tsi ra: cua nañihí ndo tsi ra lee ican, cavá nuu ra jahma tan canyí ra tsitsi iin canuva nu tsatsi quíti —catýi ángel can tsihin ra jahá cuenda mbee can.

<sup>13</sup> Tan juvín ñi kuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catýi ra naha:

<sup>14</sup> Cahnu xaan cuví Nyoo, ra nyaá gloria.

Tan nu ñuhu ñayívi, na coo tsa vaha añima nyívi tsa ñihí tumañi ñi Nyoo, catýi ra ángel naha ra.

<sup>15</sup> Tacan tan tsa cuanuhú ángel ican nda gloria. Tan catýi iin tan inga ra jahá cuenda mbee can naha ra:



—Cqhon ndo Belén. Cunyehe yo náa cuví. Tyin maa Jutu yo Nyoo jacotoᵗ tsi yo —catyí ra naha.

<sup>16</sup> Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyíi ra lee can tsitsi iin canuva nu tsatsi quiti itya.

<sup>17</sup> Tan cuhva tsa nyehe ra naha tsi ra, quitsahá natuhún ra naha tandihí tuhun cahán ángel tsihin ra naha tsa cuenda lee ican tsihin ñi.

<sup>18</sup> Tan tandihí nyívi tsa tsiñi tuhun caahán ra naha, iyo xaan cuñí ñi.

<sup>19</sup> Maa tyin ña María naquihín cuenda ña tuhun ican tsitsi añima ña, tan tandihí tuhun ican tsicá iñi ña.

<sup>20</sup> Tan cuanuhú ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñí ra naha. Tyin cundaᵗ cuhva tsa catyí ángel ican tsihin ra naha.

*Nu tyaa cuenda ñi tsi ra Jesús ndaha Nyoo tsitsi vehe ñuhu cahnu*

<sup>21</sup> Tsa ndu uná quívi ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacunañí ñi Jesús tsi ra. Juvín ñi maa sívi tsa catyí ángel tsihin ña María quívi tsa ndi cumañi ca cahun ra Jesús tsitsi ña.

<sup>22</sup> Tan tsa yahá quívi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacú sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

<sup>23</sup> Tacan ñi javahá ñi tyin catyí ley Nyoo tyin: “Tandihí sehe nuu ñi tsa cuví rayíi, cua tyaa cuenda ñi tsi ra ndaha Jutu yo Nyoo”, catyí ley ican.

<sup>24</sup> Tan tsahan ñi tsijamañí ñi uvi taahan quiti, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

<sup>25</sup> Tan quívi can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyívi ñuu Israel ican. Tan nyaá Tatyí Ii Nyoo tsihin ra Simeón.

<sup>26</sup> Tan jacotoᵗ Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo.

<sup>27</sup> Tan Tatyí Ii jacuhún ra tsi ra Simeón can nda vehe ñuhu. Tan juvín ñi cuhva can tsaᵗ jutu ra tan síhi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley.

<sup>28</sup> Tan cuhva tsa tsaᵗ ñi nu nyaá ra Simeón tan quihín ra Simeón tsi ra Jesús. Tan tyihí jucun ndaha ra tsi ra. Tacan tan quitsahá jacahnú ra tsi Nyoo, tan catyí ra:

<sup>29</sup> —Jutu Mañi yu, vityin tsa cundaᵗ cuhva tsa catyí maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

<sup>30</sup> Tyin tsa nyehe tsihin nuu yu tsi ra cua jacacu tsi ndi.

<sup>31</sup> Tsa iyó ra ihya ityi nuu tandihí nyívi.

<sup>32</sup> Tan cua cuví ra ñuhu tsa cua jandunditsin añima nyívi tsa ñavin nyívi Israel cuví. Tan cahnu ca cua jaha ra tsi nyívi Israel, tsa cuví ndi nyívi cuenda maa un —catyí ra Simeón.

<sup>33</sup> Tan ra José tsihin síhi ra Jesús, iyo xaan cuñí ñi tsa tsiñí ñi tsa cahán ra Simeón tsa cuenda lee ican.

<sup>34</sup> Tacan tan tsicán tahvi ra Simeón tsa cuenda ñi. Tan catyí ra tsihin ña María síhi ra Jesús:

—Nyehe tsi lee ihya. Cuaha xaan nyívi Israel ñuu Nyoo cua tsinu iñi tsi ra quívi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaᵗ ra tsi ra tan cuví ra tumaa seña tsa cuenda yo.

<sup>35</sup> Tacan tan coto tandihí yo náa tsicá iñi nyívi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

<sup>36</sup> Tan ican, tsitsi vehe ñuhu cahnu can, nyíi tucu iin ñaha tsa cuví ndusu yuhu Nyoo. Nañi ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahá ña, maa tyin utsa cuiya ñi tsicoᵗ ña tsihin yí ña tan tsihí ra.

<sup>37</sup> Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña.

<sup>38</sup> Tan juvín ñi tsa ndi nyíi ca ra José tan ña María tsihin lee ican, tan tsaᵗ ña Ana nu yucú ñi. Tan quitsahá nacuhvá ña tyahvi nyoo tsi Nyoo. Tan cahán ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

*Nu cuanuhú ñi nda ñuu Nazaret*

<sup>39</sup> Tacan tan tsa yahá tsa javahá ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhú ñi nda ñuu Nazaret tsa canyíi Galilea nu cuví ñuu maa ñi.

<sup>40</sup> Tan ra luhlu Jesús vatsí cuahnu ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

*Nu cahán ra luhlu Jesús tsihin ra maestro cuenda ley vehe ñuhu naha ra*

<sup>41</sup> Ra José tsihin síhi ra Jesús tuhvá ñi tsicá vico pascua nda ñuu Jerusalén ndihí ñi cuiya.

<sup>42</sup> Tan tsa quitā tsa utsi uvi cuiya ra Jesús, tan tsahān tandihī ſī nda ſūuu Jerusalén, cuhva tuhun tsa iyó maa ſī.

<sup>43</sup> Tan quivi ndihī vico, tan vatsi nuhu ſī, maa tyin ra luhlu Jesús ndoq ra ſūuu Jerusalén can. Tan ſā jahā jutu ra tan sihi ra cuenda.

<sup>44</sup> Tsicá iſī maa ſī tyin vatsi maa ra tyaſū tandihī nyivi ican. Tan ndihī iin quivi tsicá ityi ſī. Tacan tan quitsahā nanducú ſī tsi ra tyaſū nyivi nacotó tsi ſī.

<sup>45</sup> Maa tyin ſā naſihī ſī tsi ra. Tacan tan cuahán ſī nda ſūuu Jerusalén inga tsaha cuananducú ſī tsi ra.

<sup>46</sup> Tan tsa yahā uſī quivi tan naſihī ſī tsi ra tsitsi vehe ſūuhu cahnu ican. Nyaá ra tyaſū ra cuvī maestro cuenda ley vehe ſūuhu naha ra. Tyaá soho ra tuhun caahán ra naha. Tan tsicá tuhun ra tsi ra naha.

<sup>47</sup> Tan tandihī nyivi tsiſī tsa caahán ra, iyo xaan cuſī ſī tsihin tsa tsiſī tuſī tsa iyó tsi ra, tan tsihin tsa nacatyí tuhun ra.

<sup>48</sup> Cuhva tsa nyehē jutu ra tan sihi ra tsi ra, iyo xaan cuſī ſī, tan sihi ra catyí ſā tsihin ra: —Sehe luhlu yu. ¿Nacuvi tyin javahā un tyehen? Jutu un tan yuhu tuſū xaan cuſī ndi tan nanducú xaan ndi tsi un —catyí ſā.

<sup>49</sup> Tacan tan catyí ra Jesús:

—¿Nacuenda nanducú ndo tsi yu? ¿A ſā tsitó ndo tyin ſīſī ca cuſī tsi nyehé yu tyiſū Jutu yu? —catyí ra.

<sup>50</sup> Maa tyin ſā cutuſī iſī ſī tsa caahán ra tsihin ſī.

<sup>51</sup> Tacan tan cuanuhū ra tsihin ſī nda ſūuu Nazaret. Tan vaha javahā ra tyin tyaá yahvi ra tsi ſī. Tan sihi ra naquihīn vaha ſā tandihī tuhun ihya tsitsi aſīma ſā.

<sup>52</sup> Tan ra Jesús cua cuahnu ca ra tan tsaá ca tsa tsiſī tuſī jiſī ra. Tan sī xaan cuſī Nyoo tsihin ra, tacan tucu nyivi, sī xaan cuſī ſī tsihin ra.

### 3

*Nu cahān ra Juan, ra jacoondutya tsi nyivi, tuhun Nyoo nuu tsiqui*

(Mt. 3.1-12; Mr. 1.1-8; Jn. 1.19-28)

<sup>1</sup> Tsa quitā tsahun cuiya tsa cuvī ra Tiberio rey cahnu, tan ra Poncio Pilato ndacá ſāha Judea. Tan ra Herodes ndacá ſāha ra Galilea. Tan yaſī ra, ra Felipe ndacá ſāha ra Iturea tsihin Traconite. Tan ra Lisaniás ndacá ſāha ra Abilinia quivi can.

<sup>2</sup> Tan ra Anás tsihin ra Caifás cuvī ra naha jutu tsaahnu tsa cuvī ityi nuu. Quivi can cahān Nyoo tsihin ra Juan sehe ra Zacarías iin nu tsiqui.

<sup>3</sup> Tan ra Juan tsicá nuu ra tandihī ſūuu tsa cayucú yatyin ſī yutya cahnu Jordán, caahán ra tuhun Nyoo tsihin nyivi. Tan catyí ra tsihin ſī tyin na ndu uvi iſī ſī cuatyí ſī tan coondutya ſī. Tacan tan Nyoo cua jaha ra tucahnu iſī cuatyí ſī, catyí ra.

<sup>4</sup> Tumaa caahán tuhun tsa nyaá nu libro tsa tyaā ra Iſaiás, ra cuvī ndusu yuhu Nyoo tahān tsanaha. Tan catyí ra:

Cua tyaā soho yo ndusu ra nu caná tsaā ra nu tsiqui tan catyí ra:

“Nuſā ndo iin ityi cuiti tan natyiso vaha ndo tsi ndo tyin tsa vatsi jutu Maſī yo.

<sup>5</sup> Tumaa tsa tahví ndo yucu tan jandutú ndo xahva cunu,

jandoó ndo ityi yacua, tan janduvahá ndo nu quifī.

<sup>6</sup> Tacan tan tandihī nyivi cua nyehē ſī tsi ra tsa cua jaquitsi Nyoo tyin jacacu ra tsi yo.”

Tacan tan cahān ra Juan tsihin nyivi.

<sup>7</sup> Tan tsa cuahán nyivi tsa cuſī ſī jacoondutya ra tsi ſī, tan catyí ra tsihin ſī:

—¿Nyooho cuvī ndo tumaa tata coo! ¿A cuſī ndo tyin tsihin tsa coondutya ſī ndo tan ſā cua tatsi tuſī ca Nyoo tsi ndo? ſā cuvī.

<sup>8</sup> Yacan naſama ndo cuhva iyó ndo, na nyehē yo tyin tsa ndu uvi iſī ndo cuatyí ndo nuu Nyoo. Tan ſā nduyaa ndo cahān ndo tyin nyivi tata ra Abraham cuvī ndo. Tyin cuanda tsihin yuu ihya, Nyoo cuvī jananduvi ra iin nyivi ra Abraham.

<sup>9</sup> Tsa ndatú yatsa Nyoo tsi tandihī ndo tyin cuvī ndo tumaa yutun tsa ſā tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

<sup>10</sup> Tacan tan nducú tuhun ſī tsi ra tan catyí ſī:

—¿Tan nácaa javaha ndi? —catyí ſī.

<sup>11</sup> Tacan tan nacahān ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

<sup>12</sup> Tan tsaā tucu ra tsa tavá xuhun cuenda ra ndacá ſāha nda ſūuu Roma, tsa cuſī ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

<sup>13</sup> Tan catyí ra Juan tsihin ra naha:

—Cuhva catyí ley ſī tava ndo xuhun. Tan ſā jandaa ca ndo yahvi.

<sup>14</sup> Tacan tan tsicā tuhun tucu andarū naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahān ra Juan tan catyí ra:

—ſā quinyaa ca ndo tsa tsi nyivi. Tan ſā jayuhvi ca ndo tsi ſī. ſā tyaā ndo cuatyí tsi ſī tatun nduve cuatyí ſī. Tan ndoq ndo vaha tsihin yahvi ndo —catyí ra Juan.

<sup>15</sup> Tan quivi can tandihī nyivi ndatú ſī tsi ra Cristo. Tan tsicá iſī ſī tun juvin ra Juan cuvī Cristo.

<sup>16</sup> Maa tyin ra Juan catyí ra tsihin tandihí ñi:

—Tsa nditsa tyin jacoondutyá yu tsi ndo tsihin ndutyá. Maa tyin vatsí inga ra tsa cahnu ca cuví, tan iyó ca tunyee ñi Nyoo tsi ra tan ñavin ca yuhu. Yacan cuenda ña taahán tsi tsi yu ndí tsa cuví yu musu ra tan ndatsi yu ñi nditsan ra. Tan ra ican cua jacoondutyá ra tsi ndo tsihin Tatyí Ii Nyoo, tan tsihin ñuhú ihñi.

<sup>17</sup> Tan ra ican ndahá ra pala tyin cua jan-dava ra trigu. Cua natava siin ra trigu vaha tan cua naquihví vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

<sup>18</sup> Tan tacan cahán ra Juan tsihin nyívi can. Tan náa ndihí ca maa cuhva cahán ra tan jacotó ra tsi ñi nácaa tsa cua quitsi Sehe Nyoo.

<sup>19</sup> Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihñin ra tsi ña Herodías, ñasiihi ra Felipe, yañi ra, tsihin tsa cuenda náa ndihí tsa ña vaha javahá ra.

<sup>20</sup> Maa tyin ña tyaa yahvi maa ra Herodes tuhun cahán ra Juan. Nu ndihí tuhun tinyijí ra tsi ra Juan tsitsi vehe caa.

*Nu jacoondutyá ra Juan tsi ra Jesucristo (Mt. 3.13-17; Mr. 1.9-11)*

<sup>21</sup> Tsa ndi cumañi ca cuhun ra Juan vehe caa tan jacoondutyá ra tsi tandihí nyívi. Tan jacoondutyá ndihí ra tsi ra Jesús. Tsa yaha tsicoondutyá ra, tsicán tahví ra tsi Nyoo, tacan tan ñuñá andívi.

<sup>22</sup> Tan nuú Tatyí Ii Nyoo síqui ra tumaa iin paloma. Tan cahán iin ndusu ityi síqui andívi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

*Cuhva quitsí tata ra Jesucristo (Mt. 1.1-17)*

<sup>23</sup> Tan tsa iyó maa tan oco utsi cuiya ra Jesús tan quitsahá jahá tyiñu ra tyiñu Nyoo. Tan tandihí nyívi cuñi maa ñi tyin sehe ra José cuví tsi ra. Tan ra José, sehe ra Elí cuví tsi ra.

<sup>24</sup> Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra.

<sup>25</sup> Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra.

<sup>26</sup> Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra

Semei, sehe ra José cuví tsi ra. Tan ra José, sehe ra Judá cuví tsi ra.

<sup>27</sup> Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra.

<sup>28</sup> Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra.

<sup>29</sup> Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra.

<sup>30</sup> Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra.

<sup>31</sup> Tan ra Eliaquim, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra.

<sup>32</sup> Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra.

<sup>33</sup> Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi ra. Tan ra Fares, sehe ra Judá cuví tsi ra.

<sup>34</sup> Tan ra Judá, sehe ra Jacob cuví tsi ra. Tan ra Jacob, sehe ra Isaac cuví tsi ra. Tan ra Isaac, sehe ra Abraham cuví tsi ra. Tan ra Abraham, sehe ra Taré cuví tsi ra. Tan ra Taré, sehe ra Nacor cuví tsi ra.

<sup>35</sup> Tan ra Nacor, sehe ra Serug cuví tsi ra. Tan ra Serug, sehe ra Ragau cuví tsi ra. Tan ra Ragau, sehe ra Peleg cuví tsi ra. Tan ra Peleg, sehe ra Heber cuví tsi ra. Tan ra Heber, sehe ra Sala cuví tsi ra.

<sup>36</sup> Tan ra Sala, sehe ra Cainán cuví tsi ra. Tan ra Cainán, sehe ra Arfaxad cuví tsi ra. Tan ra Arfaxad, sehe ra Sem cuví tsi ra. Tan ra Sem, sehe ra Noé cuví tsi ra. Tan ra Noé, sehe ra Lamec cuví tsi ra.

<sup>37</sup> Tan ra Lamec, sehe ra Matusalén cuví tsi ra. Tan ra Matusalén, sehe ra Enoc cuví tsi ra. Tan ra Enoc, sehe ra Jared cuví tsi ra. Tan ra Jared, sehe ra Mahalaleel cuví tsi ra. Tan ra Mahalaleel, sehe ra Cainán cuví tsi ra.

<sup>38</sup> Tan ra Cainán, sehe ra Enós cuví tsi ra. Tan ra Enós, sehe ra Set cuví tsi ra. Tan ra Set, sehe ra Adán cuví tsi ra. Tan ra Adán, sehe Nyoo cuví tsi ra.

## 4

*Nu nducy cuhva nu ña vaha tsi ra Jesús  
(Mt. 4.1-11; Mr. 1.12-13)*

<sup>1</sup>Tan ñihi nyaá Tatyí li Nyoo tsihin ra Jesús tsa yaha tsicoondutya ra, quita ra yutya Jordán tan cuanuhu ra. Tan quihín Tatyí li Nyoo tsi ra, tan tsahan ra iin nu cuví nu tsiqui

<sup>2</sup>nu tsinyij ra uvi xico nduvi. Tan ña tsatsi maa ra tandihi quívi ican. Yaha can tan quítsi tsa tsisocó ra. Tan nducú cuhva nu ña vaha tsi ra.

<sup>3</sup>Tan catyí nu tsihin ra:

—Tatun juvin Sehe Nyoo cuví tsi un, cahan tsihin yuu ihya, na nanduvi tsi paan catsi un.

<sup>4</sup>Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyívi coonyito ñi, tyin coonyito ñi tsihin tandihi tuhun cahán Nyoo —catyí ra Jesús tsihin nu ña vaha.

<sup>5</sup>Tacan tan quihín nu ña vaha tsi ra Jesús, cuahán ra iin jiñi yucu sucun. Tan iin yaha ñi janaha nu tandihi tsa cuca nu ndacá ñaha nu ñuu ñayivi ihya tsi ra Jesús.

<sup>6</sup>Tan catyí nu tsihin ra:

—Cuhva yu tandihi tsa nyehé un tun cuñi un tyin maa Nyoo tsaha tsa cundaca ñaha yu tandihi can, tan ndáa ra cuñi yu cuhva yu can, cuví tsi ra.

<sup>7</sup>Tatun yooho tan cuiñi tsiti un nuu yu ihya tan jacahnu un tsi yu, tandihi can cua cuhva yu tsi un —catyí nu ña vaha tsihin ra.

<sup>8</sup>Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

<sup>9</sup>Tacan tan quihín nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaq nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuando nu ñuhu.

<sup>10</sup>Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

<sup>11</sup>Cua janahndi ra naha tsi un. Tan ña cua nañi tsaha un nu yuu.

<sup>12</sup>Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducy cuhva xaan un tsi Nyoo un” —catyí ra Jesús.

<sup>13</sup>Tan tsa ndihí nducy cuhva nu ña vaha tsi ra Jesús, tacan tan nacoq nuu nu tsi ra.

*Nu quitsaha cahán ra Jesús tuhun Nyoo tsihin nyívi  
(Mt. 4.12-17; Mr. 1.14-15)*

<sup>14</sup>Tan tsa yaha tsa nducy cuhva nu ña vaha tsi ra Jesús tan cuanuhu ra nda Galilea tsihin tsa tsitú tunyee iñi Tatyí li Nyoo tsi ra. Tan tsitó nyívi tuhun ra ñi cahnu Galilea can.

<sup>15</sup>Tan jacuahá ra tsi nyívi nu cuví vehe ñuhu tandihi ñi ñuu. Tan tandihi ñi jacahnu ñi tsi ra.

*Tsa tsaq nyico ra Jesús ñuu Nazaret nu tsahnura*

*(Mt. 13.53-58; Mr. 6.1-6)*

<sup>16</sup>Tacan tan tsaq nyico ra Jesús ñuu Nazaret nu tsahnura ra. Tan iin quívi quitatú nyívi, quihívi ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahvi ra tuhun Nyoo.

<sup>17</sup>Tan tsaha ra naha iin libru tsa tyaq ra Isaiás ra cuví ndusu yuhu Nyoo. Tan cuhva tsa nuñá ra, nañihí ra iin nu catyí tsi:

<sup>18</sup>Iyó Tatyí li Nyoo tsihin yu, tyin maa Nyoo tava tyiñu tsi yu

cahan yu tuhun ra tsihin nyívi ndaahvi.

Tan janduvaha yu tsi nyívi tsa uhvi añima.

Tan maa ra tava tyiñu tsi yu tyin jacoto yu tsi nyívi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua janayeye yu tsi nyívi cuaa.

Tan cua nacoq nuña yu tsi nyívi tsa iyó tundoho.

<sup>19</sup>Tan jacoto yu tsi nyívi tyin tsa quita quívi tsa nyaá Nyoo tumañi iñi tsihin ñi.

<sup>20</sup>Tacan tan ndihí cahví ra tan nacasi ra nuu libru can. Tan nacuhvá ra tsi iin ra tsa jatinyeé tsihin tyiñu vehe ñuhu can. Tan tsinyaq ra Jesús. Tacan tan tandihi nyívi tsa nycú ican, ndoo ñi tsa nyehé ñi tsi ra.

<sup>21</sup>Tacan tan catyí ra tsihin ñi:

—Vityin quívi ihya tsa cundaa cuhva catyí tuhun Nyoo tsa cahví yu tsiñi ndo —catyí ra Jesús tsihin ñi.

<sup>22</sup>Tan tandihi nyívi tsa nycú can, vaha xaan cahan ñi tuhun ra. Tan iyo xaan cuñi ñi tsihin tandihi tsa vaha tsa cahan ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

<sup>23</sup>Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyívi, janduvaha jihna tsi maa un.” Tan cuñi tucu ndo catyí ndo: “Tandihí tsa javaha un ñuu Capernaum tsitó ndi, javaha ndihí tucu can ñuu maa un ihya.”

<sup>24</sup>Tan cahan ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyívi ñuu ra naha tsi ra naha.

<sup>25</sup>Tan tsa nditsa tyin cuaaha xaan ñi ndaahvi tsa tsihi yí tsicoq Israel ihya quívi tsa tava Nyoo tyiñu tsi ra Elías, ra cuví ndusu

yuhu ra, tan ra ican cuvī iin ra Israel ihya tsicā ra cahān ra tuhun Nyoo. Tan quivī can űa cuun maa savi uñi cuiya sasava. Tan tsicoo tama cahnu xaan.

<sup>26</sup> Tan űavin tsa cuenda ndi intuhun maa űi Israel ihya tava Nyoo tyiñu tsi ra Elías cuahān ra. Maa tyin tsaħān ra jatyinyee ra tsi iin űaha ndaahvī tsiħi yī tsa tsicoo űuu Sarepta tsa canyī Sidón.

<sup>27</sup> Tacan tucu quivī tsicā inga ra cuvī ndusu yuhu Nyoo cuenda nyivī Israel, ra Eliseo. Cuaha xaan ra cuuhvī tsihin cuehe tyaahyū tsicoo Israel ihya, tan ndi intuhun ra naha tan űa nduvahā ra naha. Nduvahā intuhun űi ra Naamán ra quee űuu Siria —catyī ra Jesús.

<sup>28</sup> Tsa yahā tsiñī űi tandiħi tuhun can, tandiħi nyivī tsa yucū tsitsi vehe űuhu can xaan xaan cuñī űi cuvī.

<sup>29</sup> Tan nduvitā űi. Tan tava űi tsi ra Jesús nda jiñi yucu sucun nda yuhu űuu, tsa cuñī űi janacava űi tsi ra ican.

<sup>30</sup> Maa tyin ra Jesús yahā ra tyañu űi tan cuahān ra.

*Nu quitā tatyī űa vaha tsa yihī tsi iin rayī (Mr. 1.21-28)*

<sup>31</sup> Tan cuahān ra Jesús űuu Capernaum tsa canyī Galilea. Tan jacuahā ra tsi nyivī tsitsi vehe űuhu tandiħi sauru, quivī tuhvā nyivī quitatū.

<sup>32</sup> Tan iyo xaan cuñī űi tsihin tsa cahān ra. Tyin űiħi xaan cahān ra tumaa tuhvā ra cumī tyiñu caahān.

<sup>33</sup> Tan iin quivī nyī ra Jesús vehe űuhu tan iin ra yihī tatyī űa vaha catyī ra canā tsa ra jahā tatyī űa vaha can:

<sup>34</sup> —Yooho Jesús, ra űuu Nazaret, jaña tsi ndi. ¿Nāa nducū un tyihī un tsi un tsihin ndi? ¿A vatsī un vatsī janaa un tsi ndi? Yuhu nacotó vaha yu tsi un. Yooho cuvī Sehe Ii Nyoo.

<sup>35</sup> Tacan tan nduxaħn ra Jesús tsi tatyī űa vaha tsa yihī tsi ra can tan catyī ra:

—Taxin űi coo yooho. Quitā tsi ra ihya —catyī ra Jesús tsihin nu.

Tacan tan nyehé űi nyivī nduva ra can nu űuhu jahā tatyī űa vaha can, tan nduve ca náa javahā nu tsi ra can. Tan quitā nu cuahān nu.

<sup>36</sup> Tandihī nyivī tsa nyehē can, iyo xaan cuñī űi tan yuuhvī űi cuvī. Tan quitsahā tsicā tuhun tahan űi:

—¿Nāa tuhun cuvī tsa caahān ra ihya? Tyin nda cuanda tsihin tatyī űa vaha tan űiħi caahān ra, tan quitā tatyī űa vaha ican —catyī űi.

<sup>37</sup> Tacan tan tandihī űi ityī quitā natuhun nyivī tuhun ra Jesús.

*Nu janduvahā ra Jesús tsi űa tyiso ra Simón Pedro (Mt. 8.14-15; Mr. 1.29-31)*

<sup>38</sup> Tacan tan quitā ra Jesús tsitsi vehe űuhu can. Tan cuahān ra vehe ra Simón. Tan nu tsaħ ra can, canyī űa tyiso ra Simón cuuhvī űa tan űiħi xaan yihī cahñi tsi űa. Tacan tan caahān ndaahvī űi tsihin ra na janduvaha ra tsi űa.

<sup>39</sup> Tacan tan natuhvā ra nu canyī űa tan nacañi nuu ra jiñi ra tan cahān ra tsihin cahñi can na quita tsi. Tacan tan quitā cahñi can iin yaha űi, tan nduvitā űa can, quitsahā nanducū űa tsa catsi ra Jesús.

*Nu cuaha xaan nyivī cuuhvī janduvahā ra Jesús*

*(Mt. 8.16-17; Mr. 1.32-34)*

<sup>40</sup> Tan tsa tyiso űicanyī, tandihī nyivī tsa iyó űi cuuhvī vehe űi tsihin sīn sīn nuu cuehe, quitsj ndaca űi tsi űi can tsi ra Jesús. Tan tyiso ndaha ra jiñi intuhun intuhun űi cuuhvī can tan janduvahā ra tsi űi.

<sup>41</sup> Tan cuaha xaan nyivī quitā tatyī űa vaha tan canā tsa nahnu, tan catyī nahnu: —Yooho cuvī Sehe Nyoo.

Maa tyin ra Jesús nduxaħn ra tsi nahnu tan űa tsaħā ra tsa cahan nahnu, tyin tsitó nahnu tyin juvin ra cuvī Cristo.

*Nu tsicā ra Jesús cahān ra tuhun Nyoo tandihī űuu cayucū Galilea*

*(Mr. 1.35-39)*

<sup>42</sup> Tsa tuvi inga quivī, tan quee ra Jesús űuu can. Tan cuahān ra iin nu taxin caā. Tan nyivī nanducū űi tsi ra. Tan tsaħ űi nda nu nyī ra ican. Tan cuñī űi tsa űa cahun ca ra.

<sup>43</sup> Tacan tan catyī ra Jesús tsihin űi:

—Ndi cuñī ca tsi jacoto yu tsi nyivī tandihī ca űuu náca tan quihvī Nyoo añima űi tan cundaca űaha ra tsi űi. Tyin yacan cuenda vatsī yu nu űuhu űayivī ihya.

<sup>44</sup> Tan tacan űi tsicā ra Jesús caahān ra tuhun Nyoo vehe űuhu tandihī űi űuu tsa cayucū Galilea.

## 5

*Nu tsaħ ra Jesús ndatu tsa cuaha xaan tyaca űiħi ra naha*

*(Mt 4.18-22; Mr. 1.16-20)*

<sup>1</sup> Iin quivī nyaā ra Jesús yuhu miñi nu cuvī Genesaret. Tan tsaħ cuaha xaan nyivī, tyin cuñī űi tyaa soho űi tuhun Nyoo. Tan tihīn xaan nyī ra Jesús tyañu űi.

<sup>2</sup> Tan nyehē ra uvi taahan yutun ndoo yatyin űi yuhu miñi ican. Yoñi yucū tsitsi yutun ndoo can tyin tsa quitā ra tīn tyaca. Tan nacatyā ra naha traya.

<sup>3</sup> Tacan tan quihvī ra Jesús tsitsi iin yutun ndoo tsa cuvī tsi ra Simón. Tan catyī ra Jesús tsihin ra Simón tyin na jacuhun ra can nda mahñu miñi. Tacan tan tsinyaħ ra Jesús tsitsi yutun ndoo can. Tan quitsahā caahān ra tsihin nyivī.

<sup>4</sup> Cuhva tsa ndihí cahān ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tñin ndo tyaca.

<sup>5</sup> Tan nacahān ra Simón tan catyí ra:

—Maestro, tsa jahā tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

<sup>6</sup> Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsahā tyahnyá tsihin tsa vee tyaca can.

<sup>7</sup> Tacan tan jandahā ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaā ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca.

<sup>8</sup> Tsa nyehe ra Simón Pedro tsa cuví tacan, tan tsiçuñí tsi ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

<sup>9</sup> Tyin ra Simón tsihin tandihí ra yucú tsihin ra, nayuhví xaan ra naha tsa cuenda tsa cuaha xaan tyaca ñihí ra naha.

<sup>10</sup> Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhví un, tyin vityin tan nda nu cuahán ca tsi ityi nuu, tumaa tsa tñin ndo tyaca ihya, tacan cua ñihí un nyivi cua cuví nyivi Nyoo, tan cua tava un tsi ñi nu caquiñi, na quihví ñi cuenda Nyoo —catyí ra Jesús tsihin ra Simón.

<sup>11</sup> Tacan tan tavā ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

*Nu janduvahā ra Jesús tsi iin ra ndohó cuehe tyahyú*

(Mt 8.1-4; Mr. 1.40-45)

<sup>12</sup> Iin quivi nyíi ra Jesús iin ñuu nu iyó iin ra ndohó cuehe tyahyú. Tan tsa nyehe ra tsi ra Jesús, tan tsiçuñí tsi ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

<sup>13</sup> Tacan tan tyisoq ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvahā ra.

<sup>14</sup> Tacan tan catyí ra Jesús tsihin ra:

—Coto catyí tuhun un tsihin nyivi. Intuhun ñi tsa cua cahān yu tsihin un, cuahaan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaā ra Moisés, tan cua cuví tsi iin tsandaa tsi ra jutu can tan tsi nyivi tyin tsa nduvahā un —catyí ra Jesús tsihin ra.

<sup>15</sup> Vasu ndi maa tsa ña cuñi ra Jesús tsa coto nyivi, ñihí ca quitá tuhun ra. Tan cuaha xaan nyivi ndu iin tyin cuñi ñi tyaa soho ñi tsa caahán ra tan janduvaha ra tsi ñi.

<sup>16</sup> Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahvi ra tsi Nyoo Jutu ra.

*Nu janduvahā ra Jesús tsi iin ra xii*  
(Mt. 9.1-8; Mr. 2.1-12)

<sup>17</sup> Iin quivi jacuhā ra Jesús tsi nyivi. Tan yucú juhva ra fariseo, ra tyaá yahvi xaan ley Nyoo tsa tyaā ra Moisés tsanaha. Tan yucú tucu juhva ra maestro cuenda ley vehe ñuhu ican. Quitā ra naha ñuu Jerusalén, tan inga ñuu nyihi tanñi cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyivi cuuhví.

<sup>18</sup> Tacan tan tsaā ra naha tan nyisó ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyíi ra Jesús.

<sup>19</sup> Maa tyin ña ñihí ra naha nu quihví ra naha tyin tuvi xaan nyivi. Tacan tan ndaaq ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyíi ra Jesús tyañu nu tuvi nyivi can.

<sup>20</sup> Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsiçoq tucahnu iñi tsi un, tsa cuenda cuatyí un —catyí ra Jesús tsihin ra can.

<sup>21</sup> Tacan tan ra maestro cuenda ley vehe ñuhu tsihin ra cuví fariseo, quitsahā tsicá iñi ra naha: “¿Yóo ra cuví ra ihya? Tsiçoq cuatyí ra nuu Nyoo tsa cuenda tsa caahán ra. Tyin catyí ra tyin tsa tsiçoq tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

<sup>22</sup> Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

<sup>23</sup> ¿Náa tsa yñi ca catyí yo? ¿A yñi catyí yo: “Cuatyí un tsa yahā ndatsi”, a yñi ca catyí yo tsihin iin nyivi xii: “Nduvita tan caça un?”

<sup>24</sup> Maa tyin vityin cua janaha yu tsi ndo tyin yuhu Rayñi tsa queq nda gloria iyó ndatu tsi yu tsa jahā yu tucahnu iñi tsi ndo —catyí ra Jesús.

Tsa yahā cahān ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

<sup>25</sup> Tan nduvitā ra can, tan naquihñ ra tsito ra. Tan cuanuhū ra yuvehe ra, juvin ñi jacahnú ra tsi Nyoo.

<sup>26</sup> Tandihí nyivi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

*Nu canā ra Jesús tsi ra Leví  
(Mt. 9.9-13; Mr. 2.13-17)*

<sup>27</sup> Yahā can tan quitā ra Jesús vehe can. Tan nanyehē ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyivi. Tan catyí ra Jesús tsihin ra:

—Cohon tsihin yu —catyí ra.

<sup>28</sup> Tacan tan nduvitā ra Leví. Tan nacoō ra tandihí tsa iyó tsi ra. Tan cuahán ra tsihin ra Jesús.

<sup>29</sup> Tacan tan javahā ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyivi.

<sup>30</sup> Tan ra fariseo vehe ra tsihin ra cuví maestro cuenda ley vehe ñuhu naha ra, quit-sahā caahán nyaa ra naha tsi ra tsicá tsihin ra Jesús:

—¿Nacuví tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

<sup>31</sup> Tan ra Jesús nacahan ra, tan catyí ra:

—Ña tsiñi ñuhu doctor tsi ra tsa vaha maa. Ra cuuhví, cuví ra tsiñi ñuhu doctor.

<sup>32</sup> Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, tan cuví nasama ñi kuhva iyó ñi —catyí ra Jesús tsihin ra naha.

*Nu janahā ra Jesús tyin tatun tsa cuahán  
ra cua coo nyitya nyivi nyicún tsi ra  
(Mt. 9.14-15; Mr. 2.18-20)*

<sup>33</sup> Tacan tan tsicā tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihí quivi tsatsí ra naha tan tsihí ra naha. ¿Nacuví? —catyí ra naha.

<sup>34</sup> Tan nacahan ra Jesús, tan catyí ra:

—¿A cuví coonyitya nyivi yucú vico tindaha jaha ndo tatun nyii ra tsa cua tindaha tsihin ñi? Ña cuví. [Tyin sū cuñí ñi, tan cuñí ñi catsi ñi.]

<sup>35</sup> Maa tyin cua quita quivi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

*Nujacuahā ra Jesús tyin ña nacatsí tahan  
tuhun tsahnu tsa iyó nyivi tsihin tuhun tsaa  
tsa jacuahā ra*

*(Mt. 9.16-17; Mr. 2.21-22)*

<sup>36</sup> Tacan tan cahān tucu ra Jesús iin kuhva tsihin nyivi, tan catyí ra:

—Yoñi tsaahnyá iin jahma tsaa, tan naquicú ñi tsihin jahma tuuhu. Tyin tatun javaha ñi tacan, nandiyi jahma tsaa can. Tan ña ndoo vaha tsi tsihin jahma tuuhu can.

<sup>37</sup> Tan tacan tucu, ña cuví tyihí nyivi vinu tsaa tsitsi ñi tsaahnu. Tyin cua tyahnyá ñi can tsihin vinu tsaa can. Tan cua tiví vinu can tan tiví ndihí tucu ñi tsaahnu can.

<sup>38</sup> Yacan cuenda taahán tsi tyihí yo vinu tsaa tsitsi ñi tsaa. Tyin tacan tan nduvi taahan tsi tan cua jaha cuenda tahan tsi itsi.

<sup>39</sup> Tan yoñi tsihí vinu tsahnu, tan cuñí ñi coho ñi vinu tsaa. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi kuhva iyó maa ñi.]

## 6

*Nu tuhun ra tsicá tsihin ra Jesús yoco itya  
trigu quivi quitatú nyivi*

*(Mt. 12.1-8; Mr. 2.23-28)*

<sup>1</sup> Iin quivi quitatú nyivi, yahā ra Jesús mahñu tsa tatsí nyivi. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsí ra naha tsiti can.

<sup>2</sup> Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo?

<sup>3</sup> Tan nacahan ra Jesús, tan catyí ra:

—¿A ñaha ca cahví ndo nu tsahá cuenda tsi tsa javahā ra David tan ra cutahán tsihin ra quivi tsa tsisoco ra naha?

<sup>4</sup> Quihví ra tsitsi vehe Nyoo. Tan quihñ ra paan tsa tyiso nyivi nuu altar Nyoo. Tan tsatsí ra. Tan tsahā ndihí ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

<sup>5</sup> Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

*Nu janduvahā ra Jesús tsi iin ra na ityi  
ndaha*

*(Mt. 12.9-14; Mr. 3.1-6)*

<sup>6</sup> Inga quivi quitatú nyivi quihví ra Jesús tsitsi vehe ñuhu. Tan quitsahā jacuahā ra tsi nyivi. Tan nyehē ra tsi iin ra tsa na ityi ndaha cuaha.

<sup>7</sup> Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú kuhva ra naha tsi ra Jesús, tatun janduvaha ra tsi ra cuuhví ican quivi quitatú

nyivi, tyin tacan tan cuvi tyaa ra naha cuatyí tsi ra Jesús.

<sup>8</sup> Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinya nyityi ra mahñu ra naha.

<sup>9</sup> Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

<sup>10</sup> Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihi ra ndaha ra. Tan nduvaha ndaha ra.

<sup>11</sup> Maa tyin ra yucú ican naha ra, cuxaḡa ra naha. Tan quitsahá tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

*Nu nacatsj ra Jesús tsa utsi uvi taahan ra cua caca tyiñu ra*

(Mt. 10.1-4; Mr. 3.13-19)

<sup>12</sup> Quivi ican ndaa ra Jesús iin yucu. Tan ñiñu maa tsican tahvi ra tsi Nyoo.

<sup>13</sup> Tan tsa tuvi, caná ra tsi tandihi ra nyicún tsi ra. Tan nacatsj ra utsi uvi taahan ra naha. Tan jacunañi ra tsi ra naha apóstol, tan cuñi tsi catyí tsi “ra tsa tava tyiñu Nyoo”.

<sup>14</sup> Tan ihya nyaá sivi tandihi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé;

<sup>15</sup> ra Mateo; ra Tomás; ra Jacobo, sehe ra Alfeo; tan ra Simón ra nyanaa cuvi ra cuenda partido tsa cuñi cahun cuatyí siqui ñuu Roma tsa ndacá ñaha tsi ñi;

<sup>16</sup> tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

*Nu jacuahá ra Jesús tsi nyivi cuaha*

(Mt. 4.23-25)

<sup>17</sup> Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsaḡ cuaha tucu nyivi queḡ ñuu Jerusalén tsihin tandihi ca ñuu cayucú Judea, tsihin tucu nyivi queḡ ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaḡ ñi tyin tyaa soho ñi tuhun caahán ra Jesús. Tan tandihi nyivi cuuhvi cuñi ñi tsa janduvaha ra tsi ñi.

<sup>18</sup> Tan tandihi nyivi tsa yihí tatyí ña vaha janduvahá ra tsi ñi.

<sup>19</sup> Tan tandihi ñi cuñi ñi tñin ñi tsi ra, tyin janduvaha ra tsi ñi tsihin tunyee iñi tsa iyó tsi ra.

*Tsehe cahán ra Jesús tsihin nyivi tsa naquihñin ndaahvi ra*

(Mt. 5.1-12)

<sup>20</sup> Tacan tan nanyehé ra Jesús tsi ra tsicá tsihin ra. Tan catyí ra tsihin ra naha:

—Tandihí nyooho tsa ndaahvi, sii xaan cua cuñi ndo, tyin taahán tsi cundaca ñaha Nyoo tsi ndo.

<sup>21</sup> Tandihí nyooho tsa tsihocó vityin, sii xaan cua cuñi ndo. Tyin coo quivi ña cua cusoco ca maa ndo. Tan tandihí nyooho tsa tsacú tsa cuiihya cuñi ndo, sii xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sii cuñi ndo.

<sup>22</sup> Cusi iñi ndo, quivi ndasi cuñi nyivi nyehé ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyí ñi tyin nyivi ña vaha cuvi ndo tyin tsinú iñi ndo tsi maa yu tsa cuvi yu Rayi queḡ nda gloria.

<sup>23</sup> Sii cuñi ndo quivi can tyin tacan tucu javahá nyivi ñi tahan tsanaha. Cuxaḡa ñi tsi ra cuvñ ndusu yuhu Nyoo. Ndaḡa ndo tsihin tsa sii cuñi ndo. Tyin cahnu xaan ndatu cua ñihi ndo nda gloria.

*Tsehe cahán ra Jesús tsihin nyivi ña tsinú iñi tsi ra*

<sup>24</sup> Maa tyin ndahvi nyooho, ñi cuca. Tyin vityin sii xaan cuñi ndo tsihin tandihi tsa cuca ndo. Maa tyin cua coo quivi maa ñi maa tundoho cua nyehé ndo. Tyin nduve tsa cua ñihi ndo nu nyaá Nyoo.

<sup>25</sup> Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sii cuñi vityin, ndahvi nyooho, tyin coo quivi cua coo ndo tucuiihya iñi. Tan cua vacu xaan ndo.

<sup>26</sup> Tan ndahvi nyooho tsa vaha caahán nyivi tuhun ndo. Tyin tacan caa tucu nyivi tsihocó tsanaha, vaha xaan cahán ñi tuhun ra tsa cahán tsa ña nditsa tsihin ñi.

*Cuñi ndo tsi nyivi xaan iñi tsi ndo*

(Mt. 5.38-48; 7.12)

<sup>27</sup> Tandihí nyooho tsa tsiñi tsa caahán yu, catyí yu tsihin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tsihin nyivi tsa ndasi cuñi nyehé tsi ndo.

<sup>28</sup> Cahán ndo tsa vaha tsihin nyivi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyivi caahán nyaá tsi ndo.

<sup>29</sup> Tatun iin ra cañi iin tsiyo nuu ndo, cuhva ndihi ndo inga tsiyo, nacañi ndihi maa ra. Tatun iin ra quinyaá tsaqueta nditsi ndo, cuhva ndihi ndo camiseta ndo.



<sup>30</sup> Cuhva ndo náa ndíhi tsicán nyívi tsi ndo. Tatun quínyaá ñi náa tsa iyó tsi ndo, ña ndacan ca ndo can tsi ñi.

<sup>31</sup> Tumaa cuñí ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi.

<sup>32</sup> "Tatun cuñí ndo tsi maa ñi maa nyívi tsa cuñí tsi ndo, nduve tsa vaha javahá ndo. Tyin tacan icá tucu nyívi quíñi iyó.

<sup>33</sup> Tan tatun tsihin nyívi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyívi, nduve tsa vaha icá ndo cuví can, tyin nyívi caquiñi, tacan icá tucu ñi can.

<sup>34</sup> Tatun javahá ndo tumañi iñi tsi iin nyívi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyívi caquiñi, tacan icá ñi. Tatun náa tumañi iñi javahá ñi tsi nyívi vaha iñi tsi ñi, ndatú ñi tsa nacuhva tucu ñi can tumañi iñi tsi ñi.

<sup>35</sup> Maa tyin nyoooho, cuñi ndo tsi nyívi xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuví ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyívi tsa ña nacuhvá tyahvi nyoo tsi ra, tan tsihin nyívi caquiñi.

<sup>36</sup> Cú uhvi iñi ndo tsi nyívi, tumaa uhvi cuñí Nyoo Jutu yo nyehé ra tsi yo.

*Ña cahan nyaa yo tsi inga nyívi  
(Mr. 7.1-5)*

<sup>37</sup> Ña cahan nyaa ndo tsi nyívi, tacan tan Nyoo ña cua cahan nyaa ra tsi maa ndo. Ña catyí ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyívi. Tan Nyoo cua jaha ra tucahnu iñi tsi maa ndo.

<sup>38</sup> Cuhva ndo tsa tsiñí ñuhu tsi nyívi. Tacan tan cua cuhva tucu maa Nyoo tsa tsiñí ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyívi, tacan cuhva cua cuhva Nyoo tsi ndo —catyí ra Jesús.

<sup>39</sup> Tan tsahá ra Jesús cuhva ihya tsi ñi, tan catyí ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva.

<sup>40</sup> Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quítsahá cahví ra. Cua coto ra nda ndíhi cahvi ra.

<sup>41</sup> <sup>1</sup>¿Nacaa tyin nyehé un tsahan luhlu tsa nyíi tinuu yañi un, tan ña jahá un cuenda yutun cahnu tsa nyíi tinuu maa un?

<sup>42</sup> Tatun tinuu maa un nyíi iin yutun cahnu, ¿nácaa cua cuví catyí un tsihin ra yañi un: "Ñaha, na tava yu tsahan luhlu tsa nyíi tinuu un.?" <sup>1</sup>Yooho tsa jahá tyin vaha xaan un! Tava jihna yutun cahnu tsa nyíi tinuu maa un. Tyin tacan tan cuví nyehé vaha un tsahan luhlu tsa cua tava un tinuu yañi un.

*Tsihin tsa javahá nyívi tan nacoto yo tsi  
ñi tatun ñi vaha, a ñi ña vaha cuví ñi  
(Mt. 7.17-20; 12.34-35)*

<sup>43</sup> <sup>1</sup>Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.

<sup>44</sup> Tandíhi yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuví yucu vixi].

<sup>45</sup> Tan tacan tandíhi nyívi vaha, vaha caahán ñi, tyin yíhi tsa vaha añima ñi. Maa tyin nyívi ña vaha, maa ñi maa tsa ña vaha caahán ñi tyin yíhi tsa caquiñi añima ñi. Tyin tsihin yuhu yo caahán yo tandíhi tsa quitá tsitsi añima yo.

*Cua cacu nyívi tsa tyaá yahvi tuhun  
caahán ra Jesús, tan nyívi ña tyaá yahvi tsa  
caahán ra, ña cua cacu ñi  
(Mt. 7.24-27)*

<sup>46</sup> <sup>2</sup>¿Nacuenda catyí ndo tsihin yu, "Jutu Mañi yu, Jutu Mañi yu", tan ña javahá ndo tsa caahán yu?

<sup>47</sup> Vityin cua catyí yu tsihin ndo yóo ndacú nyoooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu.

<sup>48</sup> Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tahán ra yuu. Tan tyaá ra tyihyo tsaha vehe can tsata yuu can. Tan quívi nduñihí cuún savi, ndutyá can tsatyá xaan tsi tsaha vehe, maa tyin vehe can ña taní maa tsi tyin vaha xaan quitá tyihyo tsaha tsi.

<sup>49</sup> Maa tyin nyívi tsa tsiñí tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quívi tsaá savi, tan cuñihí cuún savi, tan yahá ndutyá cuaha tsaha vehe can. Tan vehe can, iin yaha ñi taní tsi —tacan catyí ra Jesús.

## 7

*Nu janduvahá ra Jesús musu iin ra  
capitán andarú  
(Mt. 8.5-13)*

<sup>1</sup> Ndíhi cahan ra Jesús tsihin nyívi, tacan tan cuanuhú ra inga tsaha nda ñuu Capernaum.

<sup>2</sup> Tan ñuu can iyó iin ra capitán. Tan iyó iin musu ra tsa cuñí xaan ra. Tan cuuhví ra can. Tan tsa cuñí cúu ra.

<sup>3</sup> Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra.

<sup>4-5</sup> Tacan tan tsaq ra tsahnu ican naha ra nu nyii ra Jesús. Tan quitsaha caahán ndaahví ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda javaha ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

<sup>6</sup> Tacan tan cuahán ra Jesús tsihin ra naha. Maa tyin tsa ndi cumañi ca tsa ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaq ra naha nu nyii ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra.

<sup>7</sup> Yacan ña cana iñi ra quitsi ra nu nyii un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra?

<sup>8</sup> Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsi ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

<sup>9</sup> Tsa tsiñi ra Jesús tsa cahán ra can naha ra, tan iyo xaan cuñi ra. Tan nanyehé ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi in-tuhun ra Israel tsa tsinú xaan iñi tuma ra ican —catyí ra Jesús.

<sup>10</sup> Tacan tan cuanuhú ra vaha iñi tsi ra capitán can naha ra. Tan tsa tsaq ra naha nda yuvehe, tan nyehe ra naha tyin tsa nduvaha musu ra.

*Nu janandotó ra Jesús tsi sehe iin ñaha ndaahví tsihi yii*

<sup>11</sup> Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyivi.

<sup>12</sup> Tacan tan cuhva tsa cua tsa ra yatyin ñuu ican, nyehe ra tyin cuaha xaan nyivi quitá ñi ñuu ican. Tan nyisó ra naha

iin ndiyi, cua cutsi ra naha sehe iin ñaha ndaahví tsa tsihi yii. Tan intuhun ñi maa ra cuví sehe ña, tan tsihi ra.

<sup>13</sup> Tan tsa nyehe ra Jesús tsi ña, tan cun-daahví iñi ra nyehe ra tsi ña. Tan catyí ra tsihin ña:

—Ña vacu un.

<sup>14</sup> Tsahan natuhva ra tan tñin ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

<sup>15</sup> Tacan tan nduvita ndiyi can. Tan nacyunaa ra. Tacan tan quitsaha caahán ra. Tan ra Jesús nacuhva cuenda ra tsi ra tsi sihi ra.

<sup>16</sup> Tsa nyehe ñi tsa tacan nandotó ra jahá ra Jesús tan yuhví xaan ñi, tan quitsaha jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaq nu yucú yo ihya.

Tan catyí tucu ñi:

—Maa Nyoo cuví ra vatsi nu iyó yo, vatsi jatyinyee ra tsi yo —catyí ñi.

<sup>17</sup> Tan tandihi maa nyivi tanií cahnu Judea, tsitó ñi tsa javaha ra Jesús.

*Nu jacuhun ra Juan uvi taahan ra tsa tsicá tsihin ra nu nyii ra Jesús*

(Mt. 11.2-19)

<sup>18</sup> Tan ra tsicá tsihin ra Juan naha ra nacatyí tuhun ra naha tsa javaha ra Jesús. Tacan tan cana ra Juan tsi uvi taahan ra naha.

<sup>19</sup> Tan tava tyiñu ra tsi ra naha na cuhun ra naha nu nyii ra Jesús, tan ndaca tuhun ra naha tsi ra tatun juven ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra.

<sup>20</sup> Tacan tan ra tsa jacuhun ra Juan, cuahán ra naha. Tan tsaq ra naha nu nyii ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juven un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

<sup>21</sup> Tan tsa ndi yucú ra tsa jacuhun ra Juan naha ra tan cuaha xaan nyivi cuuhví janduvaha ra Jesús. Tan tacan tucu nyivi yihí tatyí ña vaha. Tan cuaha tucu nyivi cuaa nanyehé ñi jahá ra.

<sup>22</sup> Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyí tuhun ndo tsihin ra Juan tandihi tsa nyehe ndo, tan tandihi tsa tsiñi ndo. Tan catyí ndo tsihin ra: ra cuaa nanyehé ra, ra coxo nacaca ra, ra ndoho cuehe tyaahyú nduvaha ra, ra soho nacufi ra, ndiyi nandotó, tan caahán yu tuhun Nyoo tsihin ñi ndaahví nácaa cacu ñi. Tan catyí ndo tsihin ra tyin

<sup>23</sup> Sii xaan cuñi ñi nyicún tsi yu tun ña ndu uví iñi —catyí ra Jesús tsihin ra naha.

<sup>24</sup> Cuahán ra tsa jacuhun ra Juan naha ra, tan quitsaha caahán ra Jesús tuhun ra Juan tsihin nyivi. Tan catyí ra:

—¿Náa nyehe ndo quivi tshahan ndo nuu tsiqui ndii ícan? ¿A nyehe ndo iin ndoo tsa janduvá tatyí?

<sup>25</sup> ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey.

<sup>26</sup> ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo.

<sup>27</sup> Juvín ñi tuhun ra Juan cuví tsa nyaá nuu tutu tsa tyaá ra Isaías tshah tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cahun un.

Na natyiso vaha ra ityi nu cua cahun un.

<sup>28</sup> Tan catyí yu tsihin ndo tyin tsitsí tsa tandihi ra tsa cacú jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuíi ñi cuví ra, maa tyin cahnu xaan ca cuví ra tan ñavin ca ra Juan.

<sup>29</sup> Tandihí nyivi tan ra tavá xuhun naha ra, tsa tsiicoondutyá jahá ra Juan, nacotó ñi tyin cuhva javahá Nyoo, cuiti xaan tsi.

<sup>30</sup> Maa tyin tandihí ra fariseo tsihin ra maestro cuenda ley vehe ñuhu, ña cuñi ra naha tsa jacoondutyá ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús.

<sup>31</sup> Tan catyí tucu ra:

—¿Náa cua jandu inducu yu tsihin nyooho, nyivi iyó quivi ihya? ¿Yóo caá tumaa caá ndo?

<sup>32</sup> Tumaa ra nyihi cuví nyooho. Tyin ra nyihi jasiquí nuyahvi. Tan caná tsaá tahan ra naha, tan catyí ra naha: “Tiví ndi tiyoo tan ña tsañi ndo yaa. Tan tsitá ndi yaa cuihya, tan ña tsacú ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.]

<sup>33</sup> Tyin ra Juan, ra jacoondutyá, quitsj ra tan ña tsatsí vaha ra. Tan ña tsihi ra vinu, Tan nyooho catyí ndo tyin tatyí ña vaha yihí tsi ra.

<sup>34</sup> Tan quitsj tucu yuhu tan cuví yu Rayii tsa quee nda gloria. [Tan tsatsí yu tan tsihi yu.] Tan nyooho catyí ndo tyin tsatsí xaan yu tan tsihi xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra.

<sup>35</sup> Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan.

Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

*Nu nyii ra Jesús vehe ra Simón ra cuví fariseo*

<sup>36</sup> Iin ra fariseo tsa nañi Simón jacotó ra tsi ra Jesús tyin cahun ra cucatsi ra nda yuvehe ra. Tan tsaá ra Jesús vehe ra, tan tsiacunyaa ra nu mesa.

<sup>37</sup> Tacan tan iin ñaha sii iñi ñuu ícan tsitó ña tyin nyii ra Jesús ícan. Tan tsaá ña tsihin iin yutyí yuu xiñu tsitú tsi ndutyá tami.

<sup>38</sup> Tan tsinyaa ña yatyin ñi tsaha ra. Tan quitsahá tsacú ña tyin ndu uví iñi ña cuatyí ña. Tan cuín ndutyá nuu ña. Tan tsihin ndutyá nuu ña nacatyá ña tsaha ra Jesús. Yahá can tan jana ityi ña tsaha ra tsihin ixi jiñi ña. Tan tyayuhú ña tsaha ra. Tacan tan tyoso ña ndutyá tami ícan tsata tsaha ra.

<sup>39</sup> Tsa nyehe ra fariseo can tsa tacan íca ña, tan tsicá iñi ra: “Tatun nditsa tsa Nyoo jaquitsj tsi ra ihya, cua nacoto ra yóo ñaha tñin tsaha ra, tyin ñaha ícan, ñaha iyó cuatyí cuví ña.”

<sup>40</sup> Tacan tan ra Jesús catyí ra tsihin ra fariseo ícan:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

<sup>41</sup> Tan catyí ra Jesús tyehen tsihin ra:

—Uvi taahan rayii nyaá cuenda ra xuhun tsi iin ra tsa tuhvá tsahá nuu xuhun. Tan iin ra ícan nyaá cuenda ra uhun cientu denario. Tan inga ra nyaá cuenda ra uvi xico utsi ñi denario.

<sup>42</sup> Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ícan, jahá ra tucahnu iñi tsi nduvi taahan ra naha. Tan vityin catyí tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ícan? —catyí ra Jesús.

<sup>43</sup> Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

<sup>44</sup> Tacan tan nanyehé ra Jesús tsi ñaha ícan, tan catyí ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsahá un ndutyá tsa ndoo tsaha yu tumaa cuhva tsa iyó yo. Tan ñaha ihya nacatyá ña tsaha yu tsihin ndutyá nuu ña. Tan jana ityi ña tsihin ixi jiñi ña.

<sup>45</sup> Yooho ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu.

<sup>46</sup> Tan yooho ña tyihj un acetye jiñi yu, maa tyin ñaha ihya tyihj ña ndutya tami tsaha yu.

<sup>47</sup> Tan catyí yu tshin un, yooho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñí xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñí ñi tsi yu —catyí ra Jesús.

<sup>48</sup> Tacan tan catyí ra Jesús tshin ña can: —Cuatyí un tsa yaha catsiyó, tyin tsa jahá Nyoo tucahnu iñi tsi un —catyí ra Jesús tshin ña.

<sup>49</sup> Tacan tan ra yucú tshin ra quitsaha tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyivi.”

<sup>50</sup> Tacan tan catyí ra Jesús tshin ñaha ican: —Cyaahan vityin, tsa cacú un tyin tsinu iñi un tsi yu. Cyaahan tshin tsa vaha —catyí ra tshin ña.

## 8

### *Ññaha tsa jatyinyee tsi ra Jesús*

<sup>1</sup> Tsa yaha can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tshin nyivi. Tan jacotó ra tsi ñi tuhun vaha nácaa cuñí Nyoo cundaca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tshin ra.

<sup>2</sup> Tan cuahán tucu juhva ñiñaha tsa janduvaha ra: ñi cuhvj tan ñi yihj tatyí ña vaha. Tan tshin ñi cuahán ña María tsa quee ñuu Magdala, tan juvin ña cuví ña yihj utsa tatyí ña vaha tan nduvaha ña.

<sup>3</sup> Tan cuahán tucu ña Juana, ñasiihi ra Chuza, ra cumí tyiñu cuenda ra Herodes, tan ña Susana tshin tandihí ca ñiñaha tsa jatyinyee tsi ra Jesús tshin tsa iyó tsi ñi.

*Nu caahán ra Jesús tyin tumaa iin ra tatsí tacan cuví ra caahán tuhun Nyoo*  
(Mt. 13.1-9; Mr. 4.1-9)

<sup>4</sup> Tan cuaha xaan nyivi quee ñi iin iin ñuu, tyin caa nyehé ñi nu caahán ra Jesús tuhun Nyoo. Tan tuvi xaan ñi nyecú, tan quitsaha caahán ra tshin ñi tshin iin cuhva tsaha cuenda ra, tan catyí ra:

<sup>5</sup> —Quitá iin ra vehe ra. Cuahán ra nu iyó tyiñu jahá ra, tyin caa tatsí ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsañi nyivi tsata can. Tan quitsj saa tan tsatsj ti.

<sup>6</sup> Tan juhva ca tsiti can cucoyo tyañu yuu. Caná tsiti ican. Maa tyin na ityi tsi tyin luxu cuii ñi ñuhu yihj tsaha tsi. Tan nduve catsin.

<sup>7</sup> Tan juhva ca tsiti cucoyo tyañu iñu. Maa tyin quivi caná trigu iin caa ñi tshin iñu can, iñu can tsahñi tsi trigu can.

<sup>8</sup> Maa tyin juhva ca tsiti cucoyo nu ñuhu vaha. Tan quivi tsahnú tsi, vaha xaan tsaha tsi tsiti. Tyin tsa iin ñi tsiti ican, cientu tsiti quitá tshin tsi —catyí ra Jesús.

Tan tsa yaha tsaha ra cuhva can, tan quitsaha caná tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

*Nu jacotó ra Jesús nacuenda jacuahá ra tsi nyivi tshin cuhva caahán ra tshin ñi*  
(Mt. 13.10-17; Mr. 4.10-12)

<sup>9</sup> Yaha can tan ra tsicá tshin ra, nducu tuhun ra naha tsi ra náa cuñí tsi catyí cuhva tsa cahán ra tshin nyivi.

<sup>10</sup> Tacan tan catyí ra tshin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin tandihí ca ñi ican, tshin cuhva ñi caahán yu tshin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

*Nu tsaha cuenda ra Jesús cuenda ra tsa tatsí*

(Mt. 13.18-23; Mr. 4.13-20)

<sup>11</sup> Cuhva tsa tsaha yu tsi ñi, cuñí tsi catyí tsi tyehen: tsiti can, tuhun Nyoo cuví tsi.

<sup>12</sup> Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsj nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi.

<sup>13</sup> Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Sii xaan naquihjñ vaha ñi itsi juhva ñi quivi. Maa tyin ña yihj vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihj ñi tsa tsinu iñi ñi.

<sup>14</sup> Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihj ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi sii ca cuñí ñi tshin tsa sii caá tsa iyó nu ñuhu ñayivi. Tan cuví ñi tumaa cuví yutun tsa ña tsaha tsiti.

<sup>15</sup> Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha añaima ñi tyin tsinu iñi ñi tshin taniñ añaima ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

*Nu cahán ra Jesús tyin ña cua tyihi xeehe yo ñuhu tsa jandunditsin Nyoo añaima yo coto quinyaa ra itsi*

(Mr. 4.21-25)

<sup>16</sup> Ndi intuhun yo ña tyaá yo ñuhu tyuma tan tyihj xeehe yo xuu tsito a inga nu xeehe. Tyaá yo ñuhu tyuma maa tyin tsaquín nyaa yo can iin nu sucun, tacan tan quihvi nyivi tsitsi vehe maa tyin nditsin.

<sup>17</sup> Tyin nduve iin tsa nyii xeehe, tan ña cua quituvi can. Tan ndi intuhun tsa xeehe,

tan ña cua quita tsi nu nditsin, tan tsahan nacoto yo.

<sup>18</sup> Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

*Nu tsaḥa cuenda ra Jesús tyin tumaa yañi ra, tan tumaa sihi ra, tacan cuví nyívi tyaá yahvi tuhun Nyoo*

(Mt. 12.46-50; Mr. 3.31-35)

<sup>19</sup> Tacan tan tsaḥ sihi ra Jesús tsihin yañi ra nu nyii ra. Maa tyin ña cuví tsaḥ ñi tyin tuví xaan nyívi.

<sup>20</sup> Tacan tan jacoto nyívi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

<sup>21</sup> Tacan tan nacahan ra Jesús, tan catyí ra:

—Tandihí maa nyívi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

*Nu jacutaxin ra Jesús tatyí ñihi nu miñi*

(Mt. 8.23-27; Mr. 4.35-41)

<sup>22</sup> Cuví tsi iin quívi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican.

<sup>23</sup> Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaḥ tatyí ñihi xaan. Tan quitsahá tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha xaan ndutya quihví.

<sup>24</sup> Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi.

<sup>25</sup> Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

*Nu nduwahá iin ra yihí tatyí ña vaha nda Gadara*

(Mt. 8.28-34; Mr. 5.1-20)

<sup>26</sup> Tacan tan tsaḥ ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can.

<sup>27</sup> Tan quitá ra Jesús tsitsi yutun ndoo ican. Tan ican tsaḥ iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsi ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu.

<sup>28-29</sup> Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tshá tunyee iñi tsi ra tsa cahnya ra can. Tan jacunú nu tsi ra. Tan tsinacá nu tsi ra iin nu nduve maa nyívi iyó. Ra ican tsaḥ ra nu nyii ra Jesús. Tan cuhva tsa nyehé ra can tsi ra Jesús, tsicuiñi tsiti ra nuu ra. Tan caná tsaḥ ra tan catyí ra:

—¿Nacuvi tyihí un tsi un tsihin yuhu, yoocho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahvi ican.

<sup>30</sup> Tan nducú tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.]

<sup>31</sup> Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehé nahnu tundoho tan ña cuví maa quita nahnu.

<sup>32</sup> Tan tsicán nahnu tsi ra Jesús na cuhva ra quihví nahnu tsitsi quini tsa yucú yuhu miñi ican tsatsí ti naha ti. Tacan tan tsaḥ ra Jesús ndatu tsa quihví nahnu tsitsi quini ican naha ti.

<sup>33</sup> Tan quitá nahnu tsi ra ndaahvi can. Tan quihví nahnu tsitsi quini ican naha ti. Tacan tan tsinú quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

<sup>34</sup> Tacan tan ra jahá cuenda tsi quini ican naha ra, nayuhví xaan ra naha. Tan tsinú ra naha cuahán ra naha cua nacatyí tuhun ra naha tsa cuví can tsihin nyívi nda ñuu. Tan tandihí ñi nyívi tsa nyehé ra naha, tan nacatyí tuhun ra naha tsa cuví ican.

<sup>35</sup> Tacan tan tsaḥan nyívi tsinyehé ñi náa tsa cuví, tan tsaḥ ñi nu nyii ra Jesús. Tan nañihí ñi tsi ra tsa tsa yahá quitá tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jiñi ra. Tan nayuhví xaan ñi cuví.

<sup>36</sup> Tacan tan tandihí ñi tsa nyehe tsa cuvĭ ican, nacatyĭ tuhun ñi tsihin tandihí ca nyivi nácaa quitā tatyĭ ña vaha tsi ra ndaahvi can, tan nduvahā ra.

<sup>37-39</sup> Tacan tan tandihí nyivi iyó Gadara can quitsahā caahán ñi tsihin ra Jesús na cunuhu ra ityi nu quee ra. Tyin nayuhvĭ xaan ñi tsa javahā ra tsihin nu tatyĭ ña vaha ican. Tacan tan ra tsa quitā nu tatyĭ ña vaha can nahnu, cahān ndaahvĭ ra tsihin ra Jesús, na cuhva ra cuhun ndihí ra tsihin ra. Maa tyin catyĭ ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihí tsa javahā Nyoo tsihin un —catyĭ ra.

Tacan tan ra Jesús quihvĭ ra tsitsi yutun ndoo ican. Tan cuanuhvĭ ra tsihin ra tsicá tsihin ra. Tacan tan ra ndaahvi tsa nduvahā ican, cuanuhvĭ ra nda ñuu ra. Tan ityi cuahán ra nacatyĭ tuhun ra tsihin tandihí nyivi ñuu ican nácaa janduvahā ra Jesús tsi ra.

*Nu nduvahā ña sehe ra Jairo tan ñaha tsa tĭjn jahma ra Jesús*

(Mt. 9.18-26; Mr. 5.21-43)

<sup>40</sup> Quivi tsa tsaā ra Jesús inga tsaha tsa tsaahān ra inga tsiyo miñi can, cuaha xaan nyivi ndatú tsi ra. Tan sĭi xaan cuñi ñi tyin tsaā nyico ra.

<sup>41</sup> Tacan tan tsaā iin ra tsa nañi Jairo, ra cuvĭ ityi nuu vehe ñuhu, tan tsicuiñi tsiti ra nuu ra Jesús. Tan quitsahā caahán ndaahvi ra tsihin ra na cuhun ra vehe ra.

<sup>42</sup> Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi.

<sup>43</sup> Tan tsihin nyivi ican cuahán iin ñaha cuuhvĭ. Tsa iyó utsi uvi cuiya ndohó ña cuehe tsa cuñi ñiñi ña. Tan tsa ndihí maa xuhun ña janaq ña tsihin doctor tan ña nduvahā ña.

<sup>44</sup> Maa tyin tsaā ña nu cuahán ra Jesús, ityi tsata ra. Tan tĭjn ña jahma ra. Tan iin yaha ñi, tan tsicuiñi tsa cuñi ñiñi ña.

<sup>45</sup> Tacan tan catyĭ ra Jesús:

—¿Yóo tĭjn jahma yu?

Tan tandihí ñi cuahán tsihin ra catyĭ ñi:

—Yoñi.

Tan ra Pedro tsihin ra cutahan tsihin ra, catyĭ ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tĭjn jahma yu?” —catyĭ ra naha.

<sup>46</sup> Maa tyin ra Jesús catyĭ ra:

—Tsitó maa yu tyin iyó iin nyivi tĭjn jahma yu, tyin tuvĭ iñi yu cuahán juhva tunyee iñi tsa iyó tsi yu —catyĭ ra.

<sup>47</sup> Tacan tan ñaha can nyehe ña tyin tsa tsitó ra. Tan quitsahā niñi ña tsihin tsa yuuhvĭ ña. Tan tsicuiñi tsiti ña nuu ra. Tan nacatyĭ tuhun ña tsihin ra nacuenta tĭjn ña jahma ra, tan nácaa nduvahā ña iin yaha ñi ican. Tan tsiñi tandihí nyivi tsa nacatyĭ tuhun ña.

<sup>48</sup> Tacan tan catyĭ ra Jesús tsihin ña:

—Tsa nduvahā un tyin tsinú iñi un tsi yu. Cuaahan tsihin tsa vaha —catyĭ ra.

<sup>49</sup> Ndi caahán ca ra Jesús, tan tsaā ñi iin ra quee vehe ra Jairo, ra cuvĭ ityi nuu vehe ñuhu. Tan catyĭ ra tsihin ra Jairo:

—Sehe un tsa yaha tsihi ña. Ña cuhva ca un tsihi tsi ra Maestro ihya —catyĭ ra.

<sup>50</sup> Maa tyin tsa tsiñi ra Jesús tsa cahān ra ican, tan catyĭ ra tsihin ra Jairo:

—Ña nayuhvĭ un. Tsjinu iñi. Tan ña sehe un cua nduvaha ña —catyĭ ra.

<sup>51</sup> Tan cuhva tsa tsaā ra Jesús vehe ra Jairo, ña tsahā ra quihvĭ nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvĭ ñi tsitsi vehe nu canyĭ ñaha luhlu tsa tsihi can.

<sup>52</sup> Tan tandihí ñi tsacú xaan ñi tsa cuenda tyin tsihi ña. Maa tyin ra Jesús catyĭ ra tsihin ñi:

—Ña vacu ca ndo. Tyin ña tsihi ña. Quixi ña —catyĭ ra.

<sup>53</sup> Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña.

<sup>54</sup> Tacan tan tĭjn ra Jesús ndaha ña. Tan tsaā nacahan ra tan catyĭ ra tsihin ña:

—Nduqvita, ñaha luhlu —catyĭ ra.

<sup>55</sup> Tacan tan nandoto ña. Tan iin yaha ñi nduvita ña. Tan catyĭ ra Jesús:

—Cuhva ndo tsa catsi ña.

<sup>56</sup> Tan jutu ña tsihin sihi ña, iyo xaan cuñi ñi. Maa tyin catyĭ ra Jesús tsihin ñi tyin yoñi maa tsihin cua cahan ñi tsa cuvĭ ican.

## 9

*Nu tavq ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo*

(Mt. 10.5-15; Mr. 6.7-13)

<sup>1</sup> Canā ra Jesús tsa utsi uvi taahan ra tsicá tsihin ra. Tan tsahā ra tunyee iñi cahnu tsi ra naha tyin cuvĭ tava ra naha tatyĭ ña vaha tsi nyivi, tan cuvĭ janduvaha ra naha tsi nyivi cuuhvĭ.

<sup>2</sup> Tan tavā tyiñu ra tsi ra naha na cahan ra naha nácaa ndacá ñaha Nyoo tsi nyivi. Tan tavā tucu ra tyiñu tsi ra naha na janduvaha ra naha tsi nyivi cuuhvĭ.

<sup>3</sup> Tan catyĭ ra tsihin ra naha:

—Nduve tsa cuisó ndo ityi cuhun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi

xuhun ña cundaha ndo. Tan iin nditsi ñi jahma ñuhú ndo cuhun tsihin ndo.

<sup>4</sup>Tan ndáa cuví ñi vehe tsa ndo, ndoo ndo ican nda cuanda quita quivi tsa cuhun ndo inga ñuu.

<sup>5</sup>Tan nu ña cuñi nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaahá ndo. Tan yacan janahá tyin ndoo cuatyí ñi siqui ñi —catyí ra Jesús tsihin ra naha.

<sup>6</sup>Tacan tan cuahán ra naha tandihi maa ñuu. Tan caahán ra naha tuhun Nyoo tan nácaa cuñi tsi tan cacu ñi. Tan janduvahá ra naha tyin nyivi cuuhví.

*Nu cuñi ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyivi*

(Mt. 14.1-12; Mr. 6. 14-29)

<sup>7</sup>Ra Herodes, ra cuví ra ndacá ñaha [tanii cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyivi catyí ñi tyin ra Juan nandoto.

<sup>8</sup>Tan yihí ñi catyí ñi tyin ra Elías quituvi nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto.

<sup>9</sup>Maa tyin catyí ra Herodes:  
—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyivi tuhun catyí ñi tsiñi yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

*Nu tsaahá ra Jesús tsa catsi uhun mil rayii*

(Mt. 14.13-21; Mr. 6.30-44; Jn 6.1-14)

<sup>10</sup>Tan cuhva tsa tsaá nyico ra tavá tyiñu ra Jesús, tan nacatyí tuhun ra naha tsihin ra Jesús tandihi maa tsa cuví nu tsaahán ra naha. Tacan tan tavá siin ra Jesús tsi ra naha tan cuahán ra naha yatyin ñi iin ñuu tsa nañi Betsaida.

<sup>11</sup>Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihin cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

<sup>12</sup>Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyii yatyin ñi ihya, tyin ihya nduve maa tsa catsi yo iyó —catyí ra naha.

<sup>13</sup>Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihí tsa catsi tandihi nyivi ihya. Ndi

maa cuhun ndi kujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

<sup>14</sup>Tyin vasiqui quitá maa uhun mil rayii yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

<sup>15</sup>Tacan tan tsicunyecu tandihi ñi jahá ra naha.

<sup>16</sup>Tan quihín ra Jesús uhun taahan paan ican tsihin uvi taahan tyaca ican. Tan nanyehé ndaa ra ityi andivi, tan nacuhvá ra tyahvi nyoo tsi Nyoo tsa cuenda can. Tan tsaahya sava ra paan tan tyaca ican. Tan tsaahá ra tsi ra tsicá tsihin ra, na tsatsa ra naha can tsi nyivi.

<sup>17</sup>Tacan tan tandihi ñi tsatsj ñi, tan ndaha vaha iñi ñi. Yahá can tan ndoo ca tsa ñahñu, tan jacutu ra naha utsi uvi taahan tyaca tsihin tsa ñahñu ican.

*Nu catyí ra Pedro tyin ra Jesús cuví ra Cristo, ra jacacú tsi yo*

(Mt. 16.13-19; Mr. 8.27-29)

<sup>18</sup>Iin quivi quitá siin ra Jesús tsihin ra tsicá tsihin ra. Tan tsicán tahvi ra tsi Nyoo. Tan nu ndihí tsicán tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyivi tuhun yu, yóo ra cuví yu, catyí ñi?

<sup>19</sup>Tan nacahán ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyivi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo taahan tsanaha cuví un —catyí ra naha.

<sup>20</sup>Tacan tan nducú tuhun ra Jesús tsi ra naha, tan catyí ra:

—Tan nyooho, ¿yóo ra cuví yuhu, cuñi maa ndo?

Tan nacahán ra Pedro, tan catyí ra:

—Yooho cuví ra Cristo, ra tsa quee nu nyaá Nyoo.

<sup>21</sup>Tan catyí ra Jesús tsihin ra naha tyin ña cahan ra naha can tsihin nyivi.

*Nu jacoto ra Jesús nácaa cua cahñi nyivi tsi ra*

(Mt. 16.20-28; Mr. 8.30—9.1)

<sup>22</sup>Tacan tan catyí ra tsihin ra naha inga tsaha:

—Yuhu Rayii tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyí ra Jesús.

<sup>23</sup>Tacan tan catyí ra tsihin ra naha:

—Nyooho tsa cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandihí quivi nyehé ndo tundoho. Tyin yacan cuvi tumaa cruu tsa taahán tsi cuisio ndo tatun cua cunyicun ndo tsi yu.

<sup>24</sup> Tan nyooho tsa ña cuñí nyehe tundoho tan ña cuñí ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi iyó ndo tsa cuenda yu, cua cacu ndo.

<sup>25</sup> Nduve yahvi nyaá cua ñihi ndo tandihí tsa iyó nu ñuhu ñayivi ihya, tun ña cua cacu añima ndo.

<sup>26</sup> Tyin tatun cahan nuu ndo tsa xaan cuñí nyivi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsa quivi quitsi yu inga tsaha. Tyin cua quitsi nyico yuhu Rayi tsa quee nda gloria tsihin tsa cahnu cuvi yu, tan tsa cahnu cuvi Nyoo Jutu yo, tan ángel tsa cuenda ra.

<sup>27</sup> Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuenda yaha nyehe ndo nácaa cuvi nu ndacá ñaha Nyoo.

*Nu uñi taahan ra tsicá tsihin ra Jesús nyehé ra naha nácaa cuvi nu ndacá ñaha Nyoo (Mt. 17.1-8; Mr. 9.2-8)*

<sup>28</sup> Una quivi yahá tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, tan Jacobo tan ra Juan tsihin ra.

<sup>29</sup> Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Si xaan cuitsin tsi tan xiñu tsi.

<sup>30</sup> Tacan tan quituví uvi taahan ra natuhún tsihin ra, ra Moisés tan ra Elías.

<sup>31</sup> Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra.

<sup>32</sup> Tan vasu cuñí xaan ra Pedro naha ra cusu ra naha, maa tyin ña quixj maa ra naha tyin nyehé ra naha tsa nditsin cuvi nu nyaá ra Jesús tsihin ra nyecú tsihin ra.

<sup>33</sup> Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

<sup>34</sup> Tan tsa ndi caahán ca ra tan quitsj iin vico siqui ra naha. Tan nayuhví xaan ra naha tsa quihví ra naha tsitsi vico ican.

<sup>35</sup> Tacan tan tsitsi vico ican tsifj ra naha iin ndusu tsa catyí:

—Juvín ra ihya cuvi Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

<sup>36</sup> Tan tsa yahá cahan ndusu ican, tan nanyehé ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehe ra naha.

*Nu janduvahá ra Jesús tsi iin ra luhlu tsa yihí tatyí ña vaha*

*(Mt. 17.14-21; Mr. 9.14-29)*

<sup>37</sup> Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra.

<sup>38</sup> Tacan tan caná tsa iin ra cuahán tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuvi sehe yu.

<sup>39</sup> Tan tuhvá tatyí ña vaha quihví tsi ra. Tan tuhvá ra caná tsa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra.

<sup>40</sup> Tsa cahan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuvi tavá ra naha tsi nu —catyí ra.

<sup>41</sup> Tacan tan nacahan ra Jesús tan catyí ra: —Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyeé iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

<sup>42</sup> Tan cuhva tsa natuhvá ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tavá ra tsi nu tatyí ña vaha ican. Tan janduvahá ra tsi ra. Tacan tan nacuhvá cuenda ra tsi ra tsi jutu ra.

<sup>43</sup> Tan tandihí nyivi, iyo xaan cuñí ñi tsa cahnu tsa javahá Nyoo nu yucú ñi.

Tsitsi tsa iyo cuñí nyivi tsa javahá ra Jesús, tan catyí ra tsihin ra tsicá tsihin ra:

*Nu cahan ra Jesús inga tsaha tyin cua cahñi nyivi tsi ra*

*(Mt. 17.22-23; Mr. 9.30-32)*

<sup>44</sup> —Tyaa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

<sup>45</sup> Maa tyin ra tsicá tsihin ra ña cutuñi iñi ra naha nacuenda cahan ra tacan. Tyin Nyoo ña tsaha ra tsa cutuñi iñi ra naha. Tan yuhví ra naha nducu tuhun ra naha tsi ra Jesús náa cuvi tsa caahán ra.

*Nu janahá ra Jesús yóo ra tsa cahnu ca cuvi nu ndacá ñaha Nyoo*

*(Mt. 18.1-5; Mr. 9.33-37)*

<sup>46</sup> Tacan tan ra tsicá tsihin ra quitsaha caahán yuhu tahan ra naha, ndaa ra cahnu ca cuvi tsitsi tsa utsi uvi taahan ra naha.



<sup>47</sup> Tan tsitó ra Jesús tsa tsicá iñi ra naha, tan quihñ ra iin ra luhlu.

<sup>48</sup> Tan catyí ra tsihin ra naha:

—Tatun tsihin sivi yu naquihñ cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihñ cuenda ndo cuví can. Tan tatun naquihñ cuenda ndo tsi yu, tsi maa Nyoo tsa jaquitsí tsi yu, naquihñ cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

*Nyivi tsa ña cuxaán tsi yo, juvin ñi ican jatyinyéé tsi yo*  
(Mr. 9.38-40)

<sup>49</sup> Tacan tan ra Juan catyí ra tsihin ra Jesús:

—Maestro, nyehé ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsahá ca ndi javaha ra tacan. Tyin ñavin tsihin yo tsicá ra —catyí ra.

<sup>50</sup> Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

*Nu cahñ ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha*

<sup>51</sup> Tuvj iñi ra Jesús tyin tsa nyaa naa yatyin quiví tsa cunuho ra gloria. Tan jandu iin ra iñi ra, tan quihñ ra ityi tan cuahán ra ñuu Jerusalén.

<sup>52</sup> Tan tavá tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús.

<sup>53</sup> Maa tyin nyivi Samaria ican, ña cuñí ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñí ñi nyehé ñi tsi nyivi ñuu Jerusalén.

<sup>54</sup> Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa ica ra Elías? Cua ndacan yo tsi Nyoo na jaquitsí ra ñuhú andivi tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

<sup>55</sup> Tacan tan nyehé ra Jesús nuu ra naha. Tan cuxağ ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñí iñi ndo náa tyiñu vatsí yuhu.

<sup>56</sup> Tyin Rayii tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

*Nyivi tsa cuñí quihvi cuenda ra Jesús*  
(Mt. 8.19-22)

<sup>57</sup> Tan tsitsi tsa tsicá ityi ra naha, quitá iin ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandihi ñi ityi cuhun un —catyí ra.

<sup>58</sup> Tacan tan catyí ra Jesús tsihin ra:

—¿A nditsa un? Tyin ñucui iyo vehe ti. Tan saa iyo taca ti. Maa tyin Rayii tsa quee nda gloria ndi nu cava jiñi ra tan nduve iyo —catyí ra tsihin ra ican.

<sup>59</sup> Tacan tan catyí ra Jesús tsihin inga ra:

—Çohon tsihin yu.

Tacan tan nacahñ ra ican, tan catyí ra:

—Taa, çuatu nuu tsi yu, na cuhun jihna yu cucutsi yu tsi jutu yo —catyí ra.

<sup>60</sup> Tacan tan ra Jesús nacahñ ra tan catyí ra tsihin ra:

—Ñacoo tsi nyivi ña iyo Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho çaaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

<sup>61</sup> Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin çuhva na cuhun jihna yu cucahan yu tsihin nyivi vehe yu —catyí ra.

<sup>62</sup> Tan ra Jesús catyí ra tsihin ra:

—Tumaa iin ra tahví ñuhu tsihin indiquí, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñí nyico ra tsa tsa nacoç ra, ña cuví cuhva ra tsi ra cundaca ñaha Nyoo —catyí ra Jesús tsihin ra.

## 10

*Nu tavá ra Jesús tyiñu tsi uñi xico utsi taahan ra cua cahan tuhun Nyoo tsihin nyivi*

<sup>1</sup> Tsa yaha can tan nacatsí Jutu Mañi yo Jesús tsi inga uñi xico utsi ca ra naha. Tan jacuhñ ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cuhun ra Jesús.

<sup>2</sup> Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi.

<sup>3</sup> Tan çaaahan ndo tan nyehé ndo tyin cua jacuhun yu tsi ndo tumaa mbee mahñu lobo tsa cuví quiti xaan. Tyin lobo tuhvá ti tsahñí tsi mbee. Tan tacan tucu cua cuñí nyivi cahñi ñi tsi ndo.

<sup>4</sup> Tan ña cua cuiso ndo ndi marali tan ndi nu yihi xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo çuhva ndo nacumi tsi ñi tan ña cucuñi ndo natuhun ndo tsihin ñi.

<sup>5</sup> Cuhva tsa quihvi ndo tsitsi vehe iin nyivi, cahan ndo tsihin ñi. Tan catyi ndo, na coo tsa vaha añima ñi.

<sup>6</sup> Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yofi ñi vaha añima, ña cua ndoo tsa vaha tsihin ñi.

<sup>7</sup> Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsa quivi tsa cuhun ndo inga ñuu.

<sup>8</sup> Tan nu tsa ndo iin ñuu tan vaha cahan ñi tsihin ndo, catsi ndo tandihi tsa cuhva ñi catsi ndo.

<sup>9</sup> Tan janduvaha ndo tsi ñi cuuhvi ñuu ican. Tan catyi ndo tsihin ñi: “Tsa nyanaá yatyin Nyoo, ra cuñi quihvi añima ndo cundaca ñaha ra tsi ndo.”

<sup>10</sup> Maa tyin tatun tsa ndo iin ñuu tan ña cuñi nyivi tyaa soho ñi tsa caahán ndo, quita ndo ityi cahnu. Tan catyi ndo tsihin ñi:

<sup>11</sup> “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñi tsi catyi tyin cuatyí ndo ndoo can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñi tsi tsa cundaca ñaha ra tsi ndo.” Tacan catyi ndo tsihin ñi —catyi ra Jesús tsihin ra tsa uñi xico utsi can naha ra.

<sup>12</sup> Tan catyi tucu ra tsihin ra naha:

—Quivi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundocho tan ñavin ca nyivi tsicoo tahān tsanaha ñuu Sodoma, —catyi ra Jesús.

*Nyivi ña tyaá soho tuhun caahán ra Jesús  
cua nyehe ñi tundocho*

(Mt. 11.20-24)

<sup>13</sup> Tan catyi ra Jesús:

—ñDahvi nyoocho, nyivi ñuu Corazin! Tan jndahvi nyoocho nyivi ñuu Betsaida! Tyin nyehe ndo tsa iyo javahá yu, tan ña cuñi ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehe nyoocho vityin, numi xaan cua cunditsi ñi jahma tucuihya iñi tan cunyecu ñi nu nyaa: tsa ndu uvi iñi ñi cuatyí ñi cuví can.

<sup>14</sup> Yacan cuenda, nyoocho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can.

<sup>15</sup> Tan nyoocho nyivi ñuu Capernaum, cuñi maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyi ra Jesús.

<sup>16</sup> Tan catyi ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyoocho, tsa caahán yuhu tyaá soho ñi. Tan nyivi ña tyaá soho tsa caahán nyoocho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyi ra Jesús tsihin ra naha.

*Nu tsaq nyico tsa uñi xico utsi ra tsa  
tsahan tsicahan tuhun Nyoo*

<sup>17</sup> Ihya cuví nu tsaq nyico tsa uñi xico utsi ra tsa tsahan tsicahan tuhun Nyoo tsihin nyivi. Tan sii xaan cuñi ra naha. Tan catyi ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahan ndi tsihin sivi un —catyi ra naha.

<sup>18</sup> Tacan tan catyi ra Jesús tsihin ra naha:

—Tacan tyin yuhu nyehe yu andivi nu canacava ña vaha, nu nañi Satanás. Tu-maa cañi iin tatsa savi, tacan canacava ñu.

<sup>19</sup> Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cañi ndo tsata coo tan tujuhma, tan nduve tsa cua jaha ti naha ti tsi ndo.

<sup>20</sup> Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyi ra Jesús tsihin ra naha.

*Nu jacahnú ra Jesús tsi Nyoo tsa sii cuñi  
ra tyin janahá Nyoo tsavaha tsi nyivi ndaahvi  
(Mt. 11.25-27; 13.16-17)*

<sup>21</sup> Tacan tan sii xaan cuñi ra Jesús jahá Tatyí li Nyoo, tan catyi ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyi ra Jesús.

<sup>22</sup> Tan catyi ra Jesús tsihin tandihi ra naha:

—Tandihi maa tsahá Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñi Sehe Nyoo jacoto ra tsi ñi —catyi ra Jesús.

<sup>23</sup> Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sii xaan cuñi nyoocho tan nyivi tsa iyó vityin tyin nyehe ndo tsa javahá yu.

<sup>24</sup> Tyin cuaha xaan rey tan ra cuví ndusu yuhu Nyoo tahān tsanaha, cuñi ra naha nyehe ra naha tsa nyehe nyoocho vityin. Maa tyin ña nyehe ra naha. Tan cuñi ra naha tyaá soho ra naha tsa tsiñi nyoocho vityin. Maa tyin ña tsiñi ra naha —catyi ra Jesús tsihin ra tsa tsicá tsihin ra.

*Nu jacuahā ra Jesús tsi yo tyin taahán tsi jatyinyee yo tsi tandihi ñi maa nyivi*

<sup>25</sup> Tacan tan tsaq iin ra maestro cuenda ley vehe ñuhu. Tan quitsaha tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

<sup>26</sup> Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

<sup>27</sup> Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñi añima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

<sup>28</sup> Tacan tan catyí ra Jesús tsihin ra:  
—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

<sup>29</sup> Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

<sup>30</sup> Tacan tan nacahan ra Jesús, tan catyí ra:  
—Iin ra quee ñuu Jerusalén cuahán ra nda ñuu Jericó. Tan tahañ ra tsi nu ñasuhu nahnu. Tan suhū nahnu tandihi maa tsa nyisó ra, nda cuanda jahma ra. Tan cañi nahnu tsi ra nda cuanda tsaquñ taxin ña nahnu tsi ra. Tan nacoq ihñi nahnu tsi ra ican.

<sup>31</sup> Tacan tan yaha iin ra cuví jutu ityi can. Maa tyin tsa nyehē ra tsi ra canyií ican, ndasava ñi yaha tsiyo ra.

<sup>32</sup> Tacan tan yaha tucu iin ra yihí cuenda vehe ñuhu, ra cuví tata ra Leví. Maa tyin tsa nyehē ra tsi ra canyií ican, juvin ñi ndasava yaha ra.

<sup>33</sup> Tacan tucu iin ra Samaria yaha ra juvin ñi ityi can. Tan nyehē ra tsi ra canyií ican, tan quitsi tsa ndaahvi cuñi ra nyehé ra tsi ra.

<sup>34</sup> Tan natuhva ra nu canyií ra, tan quitsaha tyaá ra numeri tsi ra, tyihū ra acetye tsihin vinu nu uhvi can. Tan tyaq ra iin jahma vita nu uhvi can. Yaha can tan jandaq ra tsi ra tsata burru jana ra, tan quihñ ra tsi ra, cuahán tsihin ra nu nyaá iin vehe. Tan jaha cuenda ra tsi ra.

<sup>35</sup> Tan tsa inga quivi tsa cuñi cuhun ra Samaria. Tan tavā ra uvi taahan xuhun. Tan tsañā ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi

xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

<sup>36</sup> Nu ndihí nacatyí tuhun ra Jesús, tan nducú tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndaa ra cuví ra vaha iñi tsi ra ndaahvi tsa tsinyaa ndaha nu ñasuhu nahnu? —catyí ra Jesús.

<sup>37</sup> Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:  
—Cuaahan tan ica tucu yooho tacan tsihin nyivi tsa nyehé tundoho —catyí ra.

*Nu tsinyaa ra Jesús vehe ña Marta tsihin ña María*

<sup>38</sup> Tan quihñ ra Jesús ityi cuahán ra. Tan tsaq ra iin ñuu. Tan ican iyó iin ñaha tsa nañi Marta. Tan tsaq ra vehe ña. Tan tsañā ña quihvi ra tsitsi vehe ña.

<sup>39</sup> Tan ña Marta, iyó iin tahan ña nañi María. Tan ña María tsicunyaq ña yatyin ñi tsaha ra Jesús, tyin tyaa soho ña tsa caahán ra.

<sup>40</sup> Tan ña Marta cuaha xaan tyiñu javahá ña. Tan tsaq ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoq ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catyí ña tsihin ra.

<sup>41</sup> Maa tyin ra Jesús catyí ra tsihin ña:  
—Marta, Marta, tsicá xaan iñi un tan tuñu xaan cuñi un tsihin tyiñu can.

<sup>42</sup> Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsj ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

## 11

*Nu jacuahā ra Jesús tsi ra tsicá tsihin ra nácaa ndacan tahvi ra naha tsi Nyoo (Mt. 6.9-15; 7.7-11)*

<sup>1</sup> Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janahā ra Juan tsi ra tsicā tsihin ra —catyí ra.

<sup>2</sup> Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tye-hen ndacan tahvi ndo, catyi ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi cuhva cuñi maa un, tumaa cuhva cuví nda gloria.

<sup>3</sup> Cuhva tsa catsi ndi tan yaha ndi iin iin quivi.

<sup>4</sup> Jaha tucahnu ifi tsi ndi tsa cuenda cuatyí ndi. Tyin nyuhu jahá tucu maa ndi tucahnu ifi tsi nyivi xaan ifi tsi ndi.

Ña cua kuhva un tsa nducu kuhva nu ña vaha tsi ndi. Tan jacacu tsi ndi tan ña cua cunyee nu ña vaha tshin ndi.

Tacan ndacan tahvi ndo —catyí ra Jesús.

<sup>5</sup> Tan catyí tucu ra:

—Na catyí yo tyin iin nyooho iyó iin ra vaha ifi tsi ndo, tan tsaá ra vehe ndo tsa tsa cuaa tan catyí ra tshin ndo: “Jaha tumañi ifi tsi, xin. Cuhva nuu uñi taahán paan tsi yu.

<sup>6</sup> Tyin iin ra vaha ifi tsi yu ndi tsaá ra yuvehe yu. Tan cañi xaan quee ra. Tan nduve tsa kuhva yu catsi ra.”

<sup>7</sup> Tan nyooho cua nacahan ndo tan catyí ndo tshin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tshin sehe yu. Tan ña cuví nduvita yu tan kuhva yu tsa kuhva yu tsi un tsa vityin.” Tacan cua catyí ndo tshin ra.

<sup>8</sup> Tan catyí yu tshin ndo. Vasu ra vaha ifi ndo cuví tsi ra can, ña cua nduvita ndo tan kuhva ndo tsa nducú ra tsa numi ñi. Maa tyin tatun caahán yuhu ra tshin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan kuhva ndo tsa nducú ra. Tacan tan ña cua jatyañu ca ra tsi ndo.

<sup>9</sup> Tan tacan tucu nyooho tshin Nyoo, ndacan ndo tsi ra. Tan cua kuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña.

<sup>10</sup> Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

<sup>11</sup> Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo kuhva iin yuu itsi tun tsicán tsi paan. Tan ña tuhvá ndo kuhva iin coo itsi tun tsicán tsi tyaca.

<sup>12</sup> Tan ña tuhvá ndo kuhva tujuhma tsi sehe ndo tatun tsicán tsi ndivi catsi tsi.

<sup>13</sup> Nyooho quiñi iyó ndo, maa tyin tsitó ndo nácaa kuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, kuhva ra Tatyí lí ra cunyaa añima ndo tun ndacan ndo tsi ra.

*Nu xaan ifi tsi ra Jesús catyí nahnu tyin tshin tunyee ifi nu ña vaha javahá ra tsa iyo (Mt. 12.22-30; Mr. 3.20-27)*

<sup>14</sup> Ra Jesús tavá ra tatyí ña vaha tsa janduñhi tsi iin rayi. Tsa quitá nu tatyí can tsi ra can, cuví nacahan ra. Tacan tan iyo xaan cuñi nyivi tsa nyehé ñi tsa cuví.

<sup>15</sup> Tan yihí ñi catyí ñi:

—Ra ihya, tavá ra tatyí ña vaha tshin tunyee ifi nu Beelzebú nu cuví ityi nuu tshin tandihi tatyí ña vaha —catyí ñi.

<sup>16</sup> Tan yihí ñi cuñi ñi nducu kuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi.

<sup>17</sup> Maa tyin ra Jesús tsitó ra tsa tsicá ifi ñi. Tan catyí ra tshin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihí tyeeñu tsa ndacá ñaha ra naha. Tan tatun iin vehe tan natahvi nyivi tshin tahan ñi, tacan tan cua tivi nu yucú ñi.

<sup>18</sup> Tan tacan tucu nu ña vaha, tatun natahvi nahnu, cua cundihí tunyee ifi tsa iyó tsi nahnu. Caahán yu tyehein tshin ndo, tyin catyí ndo tyin tshin tunyee ifi nu Beelzebú tavá yu tsi nu tatyí ña vaha nahnu.

<sup>19</sup> Maa tyin tun tsatyin tavá yu tsi nahnu tumaa kuhva catyí ndo, ndaca tuhun ndo tsi ra nyecú tshin ndo yóo tsahá tunyee ifi tsi ra naha tan tavá ra naha tsi nahnu. Maa ra naha cua cahan tsa nditsa tshin ndo tyin nyooho soho xaan tsicá ifi ndo.

<sup>20</sup> Maa tyin catyí yu tshin ndo tyin yuhu tavá yu tatyí ña vaha tshin tunyee ifi Nyoo. Tan cuñi tsi catyí yacan tyin nditsa tyin Nyoo, ra taahán tsi cundaca ñaha tsi nyivi, tsa tsaá ra nu yucú ndo.

*Nu jacuahá ra Jesús tyin ñihi ca tunyee ifi Nyoo tan ñavin ca tunyee ifi nu ña vaha*

<sup>21</sup> Tatun iin ra tan iyó xaan tunyee ifi tsi ra tan nyisó ra mityí ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu.

<sup>22</sup> Maa tyin tatun quitsi iin ra tsa cuaha ca tunyee ifi iyó, tan cañi tahan ra tshin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha ifi tsi ra.

<sup>23</sup> Nyivi ña jahá tyiñu tshin yu, jatví ñi tyiñu jahá yu. Tan tatun ña caahán ñi tuhun Nyoo tshin nyivi, tyin cunyicun ñi tsi yu; cuñi tsi catyí tsi tyin ña tsahá ñi tsa cunyicun nyivi tsi yu.

*Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa ifi yo*

<sup>24</sup> Tatun iin nu tatyí ña vaha quita nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá ifi nu: “Cunuhu nyico yu nda vehe yu nu quee yu.”

<sup>25</sup> Tacan tan tsaá nyico nu añima nu quee nu. Tan nyehé nu tyin ndi xaan tan sii xaan caá.

<sup>26</sup> Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi

tandihí nahnú añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

*Nyivi tsa nditsa iyó vaha ñi nu ñuhu ñayivi*

<sup>27</sup> Tsitsi tsa ndi caahán ca ra Jesús yacan, tan cana tsa iin ñaha tsa nyii mahñu nyivi ican. Tan catyí ña:

—¡Náa tsa sii cuñi ñaha tsa jacacu tsi un, ñaha tsa jacaxin tsi un! —catyí ña.

<sup>28</sup> Maa tyin ra Jesús catyí ra:

—Sii xaan ca cuñi nyivi tsa tsiñi tuhun caahán Nyoo tan tyaá yahvi ñi itsi —catyí ra.

*Nyivi ña vaha, maa ñi maa tsa iyo cuñi ñi nyehe ñi*

*(Mt. 12.38-42; Mr. 8.12)*

<sup>29</sup> Tacan tan tsaá ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñi ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javaha Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi.

<sup>30</sup> Tumaa tsa janaha ra Jonás tsi nyivi ñuu Nínive tahañ tsanaha tyin ii Nyoo, tacan tucu yuhu, Rayii tsa quee nda gloria, janaha yu tsi nyivi tsa iyó vityin tyin ii Nyoo.

<sup>31</sup> Quivi ña tatsi tuñi Nyoo tsi nyivi, cua nandoto ñaha cuví reina ityi sur tahañ tsanaha, tan cua catyí ña tyin cuhun ndo anyaya tyin maa ña vasu cañi ñuu ña, maa tyin quitsj ña, quitsj tyaa soho ña tsa tsiñi tuñi tsa cahán ra Salomón. Tan vityin cahnu ca cuví ra nyaá tsihin ndo tan ñavin ca ra Salomón.

<sup>32</sup> Tan quivi cua cutuñi tandihí nyivi, cua nandoto nyivi tsicoo ñuu Nínive tahañ tsanaha, tan cua catyí ñi tyin nyooho nyivi tsa iyó vityin cuhun ndo anyaya, tyin nyivi Nínive ican, nasama ñi cuhva iyó ñi quivi cahán ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

*Nu janaha ra Jesús tyin na jahayo cuenda añima yo na coo tsa nditsin jahá Nyoo*

*(Mt. 5.15; 6.22-23)*

<sup>33</sup> Ndi intuhun ndo tan ña tuhvá ndo tyaá ñuhu tyuma tan tyihí xeehe ndo can, a tinyii ndo can tsitsi iin caja. Tyin ñuhu can taahán tsi cunyii can nu sucun. Tyin tatun quihvi nyivi tsitsi vehe ndo, nditsin.

<sup>34</sup> Tinuu yo, iin ñuhu nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyivi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo.

<sup>35</sup> Yacan cuenda jahá ndo cuenda tsi ndo, na coo tsa nditsin jahá Nyoo añima ndo, tan ña coo tsa naa.

<sup>36</sup> Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsin tsi tanii cahnu ndo. Tumaa tsa nyaá iin ñuhu tyuma jandunditsin tsi tanii cahnu ndo cuví can —catyí ra Jesús.

*Nu cuxaan ra Jesús tsihin ra maestro cuenda ley vehe ñuhu naha ra tan tsihin ra fariseo naha ra*

*(Mt. 23.1-36; Mr. 12.38-40; Lc. 20.45-47)*

<sup>37</sup> Tsa ndihí cahán ra Jesús tsihin nyivi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaá ra Jesús vehe ra. Tan quihvi ra tsicunyaá ra nu mesa.

<sup>38</sup> Tacan tan ra fariseo ican iyo cuñi ra tyin ña nacatyá ra Jesús ndaha ra tsa ndi cumañi ca catsi ra, tumaa cuhva iyó maa ra naha.

<sup>39</sup> Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñi nyivi tyin vaha ndo. Maa tyin xeehe ñi suhú ndo tan javahá ndo tsa ña vaha.

<sup>40</sup> Ndava xaan iñi ndo. ¿A ña tsitó ndo tyin ra tsa javahá ityi tsata ndo, juvin ñi maa ra javahá ityi tsitsi ndo?

<sup>41</sup> Taahán tsi javaha ndo tumañi iñi tsi nyivi ndaahvi, tan jatyinyee ndo tsi ñi tsihin tanii añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

<sup>42</sup> ¡Ndahvi nyooho ra fariseo! tyin nyooho, cahvi ndo ndaha menta tan ndaha lura tan náa ndihí ca yucu tsa tsatsi ndo, tan tavá ndo intuhun tsi tsa iin iin utsi tan tshahá ndo tsi Nyoo, maa tyin ña tyaá yahvi ndo tsa vaha tsa cuñi Nyoo javaha yo tan tsa cuñi yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñi ra, tan ña jandihí ndo tsa cuhva ndo diezmo can.

<sup>43</sup> ¡Ndahvi nyooho tsa cuví ndo fariseo! tyin cuñi ndo cunyaa ndo nu tyayu vaha tsitsi vehe ñuhu. Tan cuñi ndo tsa tyaá yahvi nyivi tsi ndo nuayahvi.

<sup>44</sup> ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyii. Tyin tsañi nyivi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyii nu nyii ndiyi ican. Cuñi maa nyivi tyin vaha ndo, tan ña tsitó ñi tyin ña vaha añima ndo —catyí ra Jesús.

<sup>45</sup> Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihí un tsi ndi —catyí ra.

<sup>46</sup>Tacan tan catyí ra Jesús tsihin ra naha: —¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsaḥa Nyoo taḥan tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyivi can, tan maa ndo ndi luxu ña jatyinyeé ndo tsi ñi.

<sup>47</sup>¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsaḥñi ra cuví tsi tsaahnu ndo taḥan tsanaha.

<sup>48</sup>Yacan cuñi tsi catyí tyin ndoó ndo vaha tsa javahá tsi tsaahnu ndo naha ra. Tyin tsi tsaahnu ndo tsaḥñi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha.

<sup>49</sup>Yacan cuenda catyí Nyoo taḥan tsanaha tsihin tsa tsiñi tuñi ra tyin cua jaquitsi ra tsi ra cua cuví ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha.

<sup>50</sup>Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihí ra cuví ndusu yuhu ra tsa tsaḥñi tsi tsaahnu ndo naha ra nda cuanda tsinu ñuhu ñayivi tan nda cuanda vityin.

<sup>51</sup>Nda cuanda niñi ra Abel tsa tsatí tsa tsaḥñi ra Caín yañi ra tsi ra, tan nda cuanda niñi ra Zacarías tsa tsaḥñi nyivi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyivi tsa iyó vityin tsa catyí cuatyí nyivi tsa tsicoo taḥan tsanaha.

<sup>52</sup>¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyivi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsaḥá ndo tsa quihvi inga nyivi tsa cuñi quihvi —catyí ra Jesús.

<sup>53</sup>Ndihí caḥan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaan xaan ra naha tan quitsahá nducú tuhun xaan ra naha tsi ra Jesús.

<sup>54</sup>Tyin cuñi ra naha tsa cahan ra Jesús iin tsa ña vaha, tyin tacan tan cuví tyaa ra naha cuatyí tsi ra.

## 12

*Nu jacuahá ra Jesús tyin ña cuví tyihi xeehe yo cuatyí yo*

<sup>1</sup> Cuenda mil nyivi ndu iin nda cuanda catyihí taḥan ña ñi, tyin cuaha xaan ñi. Tacan tan ra Jesús caḥan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra.

Maa tyin ña cuví tyihi xeehe ra naha cuatyí ra naha.

<sup>2</sup> Tyin nduve iin tsa yihí xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyivi.

<sup>3</sup> Yacan cuenda, náa ndihí tsa caahán ndo nu xeehe, cua quita tsi nu nditsin. Tan náa ndihí tsa caahán ndo tsitsi vehe ndo, cua cana tsa nyivi jiñi vehe.

*¿Yóo taahán tsi nayuhvi yo, a tsi nyivi a tsi Nyoo?*

*(Mt. 10.28-31)*

<sup>4</sup> Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsaḥñi cuñu ñuhu yo. Tyin yaha can tan nduve ca tsa cuví javaha nu tsi yo.

<sup>5</sup> Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

<sup>6</sup> Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihí ñi ti, Nyoo ña naá iñi ra tsi ndi intuhun ti.

<sup>7</sup> Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixí jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

*Na ña nayuhvi yo cahan yo tuhun ra Jesucristo tsihin nyivi*

*(Mt. 10.32-33; 12.32; 10.19-20)*

<sup>8</sup> Catyí yu tsihin ndo tyin tandihí nyooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu.

<sup>9</sup> Maa tyin nyooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo.

<sup>10</sup> Tan vasu cuxaan nyivi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuenda yacan.

<sup>11</sup> Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo.

<sup>12</sup> Tyin cuhva tsa cua nacahan ndo, cua cuhva maa Tatyí Ii Nyoo náa tuhun taahán tsi cahan ndo —catyí ra Jesús.

*Nu tsaḥa cuenda ra Jesús tyin ña taahán tsi nyiyo iñi yo tsa cuca*

<sup>13</sup> Iin ra tsa nyii tsihin nyivi cuaha tsa ndu iin nu nyii ra Jesús, catyí ra tsihin ra Jesús:

—Maestro, çahan tsihin ra yañi yu na natahvi ra tsa tsi jutu ndi, cuhva ra tsa taahán tsi tsi yu.

<sup>14</sup> Tacan tan catyí ra Jesús tsihin ra:

—¿Tsaa, yóo tsaḥ tsi yu tsa cuví yu juez tan natahvi yu ndaha tyiñu ndo? —catyí ra.

<sup>15</sup> Tan yahaḥ can tan catyí ra nuu nyívi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

<sup>16</sup> Tacan tan tsaḥ cuenda ra Jesús iin cuhva tsi tandiḥi nyívi, tan catyí ra:

—Tsicoo iin ra cuca. Tan cuaha xaan ndaha tyiñu ñihi ra nu jahá tyiñu ra.

<sup>17</sup> Tacan tan tsiá iñi ra: “¿Nacaa javaha yu? Nduve nu quihi tandiḥi ndaha tyiñu ihya.”

<sup>18</sup> Tan catyí ra: “Tsa tsitó yu nácaa cua javaha yu. Cua cani yu tandiḥi yaca nyihi yu, tan cua javaha yu tsa nahnu ca, tan natyihi yu tandiḥi ndaha tyiñu can tsihin tandiḥi ca tsa iyó tsi yu tsitsi can.

<sup>19</sup> Tacan tan cua catyí yu tsihin yu: Cuaha xaan ndaha tyiñu naquihin vaha un, tan vityin cuahán maa cuiya, quitatu, çatsi vaha, çoho vaha, tan çusi iñi.”

<sup>20</sup> Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihin vaha un ¿Yóo tsi cua cuví yacan?” catyí Nyoo tsihin ra can.

<sup>21</sup> Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

*Ña caca xaan iñi yo náa ndiḥi tsa tsiñi ñuhu tsi yo*

(Mt. 6.25-34)

<sup>22</sup> Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo.

<sup>23</sup> Tyin nyaá yahvi ca ñayívi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsi yo.

<sup>24</sup> Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti, tyin Nyoo tsaḥ ra tsa catsi ti. Tan nuu Nyoo nyaá yahvi ca nyooho tan ñavin ca saa.

<sup>25</sup> Tan vasu ndi maa tsicá xaan iñi ndo maa tyin ña cuví jandusucan ndo luxu ca tsi ndo.

<sup>26</sup> Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandiḥi ca tsa tsiñi ñuhu tsi ndo?

<sup>27</sup> Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandiḥi tsa cuca ra tan

ñi sñi caá tsa tsinditsi ra tumaa tsa jacunditsi Nyoo tsi yutun ita ican.

<sup>28</sup> Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsiñu vaha iñi ndo tsi ra.

<sup>29</sup> Ña caca xaan iñi ndo tuhun tsa catsi ndo tan tsa coho ndo.

<sup>30</sup> Tyin nyívi tsa ña tsiñu iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñi ñuhu tsi ndo.

<sup>31</sup> Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandiḥi tsa tsiñi ñuhu tsi ndo.

*Tsa vaha tsa iyó gloria*

(Mt. 6.19-21)

<sup>32</sup> Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra.

<sup>33</sup> Xico ndo tsa iyó tsi ndo. Tan jatyinyee ndo tsi nyívi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndiḥi tsa vaha. Tyin yoñi yóo jatívi can ndacan, ndi nu ñasuhu, tan ndi quiḥi.

<sup>34</sup> Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndiḥi añima ndo —catyí ra.

*Nu jacuahá ra Jesús tsi yo nácaa cuatu yo tsi ra quívi quitsi ra inga tsaha*

<sup>35</sup> Cuatu vaha ndo tsi yu tsihin ñuhu nditsin Nyoo quívi quitsi ra inga tsaha.

<sup>36</sup> Tan cuví ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra.

<sup>37-38</sup> Tan sñi xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sñi xaan cua cuñi musu can naha ra.

<sup>39</sup> Tan çoto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra.

<sup>40</sup> Tan tacan cuví tucu nyooho, çuatu ndo. Tyin yuhu, Rayñi tsa quee nda gloria, sana iñi ndo tan cua quitsi yu —catyí ra Jesús.

*Musu vaha tan musu ña vaha*

(Mt. 24.45-51)

<sup>41</sup> Tacan tan quitsahā nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihi nyivi?

<sup>42</sup> Tacan tan nacahan ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican.

<sup>43</sup> Tan sii xaan cuñi musu ican tatun cuhva tsa jahá tyiñu ra, tan cua tsa tsitoho ra. Tyin tyaá yahvi ra tandihi tsa taahán tsi ica ra.

<sup>44</sup> Tan catyí yu tsihin ndo tyin tsa nditsa. Tyin tsitoho ra cua nacuhva ra tandihi tsa cumí ra, cua quihí ndaha ra. Tyin vaha tyaá yahvi ra tsihin tyiñu jahá ra.

<sup>45</sup> Maa tyin tatun tsicá iñi musu ican tyin naha xaan cuahán tsitoho ra, tan quitsahā cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsi ñi tan tyiñu tsiñi nyixi ñi iyó ra.

<sup>46</sup> Tacan tan sana iñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihí xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

<sup>47</sup> Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra.

<sup>48</sup> Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahā ra. Tatun iin musu tan cuaha tsa tsahā tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

*Nu cahān ra Jesús tyin tsacatyí ra cua cañi tahanan nyivi tsihin nyivi ñi*  
(Mt. 10.34-36)

<sup>49</sup> Tumaa tsa jatahán yu ñuhú nu ñuhu ñayivi, tacan cuví tyiñu vatsí yu. ¡Tan cuñi xaan yu tsa nacayu catyín ña ñuhú ihya!

<sup>50</sup> Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihi tyiñu jahá yu.

<sup>51</sup> Cuñi maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiñ yu tsi ndo.

<sup>52</sup> Tyin tsa vityin tan ityi nuu ca, uhun taahan nyivi iin vehe ñi cua cusin ñi. Uñi taahan ñi cua cañi tahanan tsihin uvi taahan ñi. Tan uvi taahan ñi cua cañi tahanan tsihin uñi taahan ñi.

<sup>53</sup> Tan ra iyó sehe, cua cañi tahanan ra tsihin sehe ra. Tan ra cuví sehe can cua cañi tahanan

ra tsihin jutu ra. Tan ñaha iyó sehe siihi cua cañi tahanan ña tsihin sehe siihi ña. Tan ña cuví sehe siihi can cua cañi tahanan ña tsihin siihi ña. Tan ñaha cuví tyiso cua cañi tahanan ña tsihin tsanu ña. Tan ñaha cuví tsanu can cua cañi tahanan ña tsihin tyiso ña —catyí ra Jesús.

*Nu cahān ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi*  
(Mt. 16.1-4; Mr. 8.11-13)

<sup>54</sup> Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví.

<sup>55</sup> Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo.

<sup>56</sup> Nyoooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenta tsa ña nacotó ndo náa tembu iyó ndo vityin?

*Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya*

(Mt. 5.25-26)

<sup>57</sup> ¿Nacuenta ña jahá ndo cuenda, ndáa tsa vaha tan ndáa tsa ña vaha?

<sup>58</sup> Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihí ra naha tsi ndo tsitsi vehe caa.

<sup>59</sup> Tacan tacan cua cuví, catyí yu tsihin ndo tyin ña cua quita ndo nda cuanda tyahvi ndo tandihi tsa taahán tsi tyahvi ndo —catyí ra Jesús.

## 13

*Cuñi tsi tsa nasama yo cuhva iyó yo, tun ña cuñi yo cuhun yo anyaya*

<sup>1</sup> Tacan tan juvin ñi quivi can nyecu juhva ra naha. Tan quitsahā nacatyí tuhun ra naha tsihin ra Jesús tsa javahā ra Pilato tsihin juhva ra Galilea naha ra. Tyin tavā ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra.

<sup>2</sup> Tan nacahan ra Jesús tan catyí ra tsihin ra naha:

—¿A tsicá iñi nyoooho tyin cahnu xaan ca cuatyí ra Galilea ican naha ra tan ñavin ca tandihi ca ra ñuu ra naha, tan yacan tsihí ra naha?



<sup>3</sup> Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo.

<sup>4</sup> Tan tsa tsahun uñi taahan ra tsihí can naha ra tsa canacavá torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñi maa ndo?

<sup>5</sup> Ñavin. Tyin tatun nyooho tan ña nasama ndo cuhva iyó ndo, cua cunaa ndo.

*Nu tsaḡa cuenda ra Jesús iin cuhva nácaa ndatú Nyoo tsa nasama yo cuhva iyó yo*

<sup>6</sup> Tacan tan tsaḡa cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaa tun nu ñuhu ra. Tan tsaḡan ra tsinyeḡe ra tatun iñi tsiti tun. Tan nyeḡe ra tyin nduve.

<sup>7</sup> Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsí nyeḡe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsaḡá tun”, catyí ra.

<sup>8</sup> Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú.

<sup>9</sup> Vasiquí tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

*Quiví quitatú nyivi janduvahá ra Jesús tsi iin ñaha tihí tsata*

<sup>10</sup> Iin quivi tsa quitatú nyivi, jacuahá ra Jesús tsi nyivi tsitsi vehe ñuhu.

<sup>11</sup> Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña.

<sup>12</sup> Tacan tan nyeḡe ra Jesús tsi ña. Tan caná ra tsi ña. Tan quitsahá caahán ra tsihin ña, tan catyí ra:

—Tsa nduvahá un. Nduve ca cuehe ndohó un —catyí ra tsihin ña.

<sup>13</sup> Tacan tan tyisó ra ndaha ra jiñi ña. Tan iñ yaha ñi tan ndundoo ña. Tacan tan quitsahá jacahnú ña tsi Nyoo.

<sup>14</sup> Maa tyin ra cuví ityi nuu vehe ñuhu, cuxaḡan xaaxan ra tsi ra. Tyin quivi quitatú janduvahá ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuví ndo numeri. Tan ña quitsi ndo quivi quitatú yo —catyí ra.

<sup>15</sup> Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsi tucu nyooho quiti jana ndo tan jacohó ndo ndutya tsi ti quivi quitatú yo?

<sup>16</sup> Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yofiñ ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

<sup>17</sup> Tacan tan cuhva tsa cahán ra Jesús ya-can, tandihi maa nu xaaxan iñi tsi ra nducahan nuu nahnu. Maa tyin tandihi ca maa nyivi sii xaaxan cuñi ñi tsihin tsa cahnu tsa iyo javahá ra Jesús.

*Nu cahán ra Jesús tyin tumaa iin tsiti mostaza cuví tsa ndacá ñaha Nyoo tsi yo*

<sup>18</sup> Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi?

<sup>19</sup> Tumaa iin tsiti mostaza, tacan cuví tsi. Tyin iin ra tatsí ra iin tsiti ican nu ñuhu ra, tan caná iin yutun luhlu, tan tsaḡnu tun. Tan cuví tun iin yutun cahnu xaaxan. Tacan tan tsaḡ saa naha ti nuu yutun ican. Tan javahá ti taca ti nuu tun.

*Nu cahán ra Jesús tyin tumaa yutsan iya, tacan cuví tsa ndacá ñaha Nyoo tsi yo*

(Mt. 13.33)

<sup>20</sup> Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo?

<sup>21</sup> Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tani yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

*Yuvehe tihin tan ityi cuñi tsa cuahán nu nyaá Nyoo*

(Mt. 7.13-14, 21-23)

<sup>22</sup> Ityi cuahán ra Jesús ñuu Jerusalén caahán ra tuhun Nyoo tsihin nyivi tandihi ñi ñuu nu yahá ra.

<sup>23</sup> Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahan ra Jesús, tan catyí ra:

<sup>24</sup> —Nanducu ndo cuhva quihvi ndo yuvehe tihin. Tyin tacan cuví quihvi ndo nu ndacá ñaha Nyoo. Tyin cuaha xaaxan ndo cuñi ndo quihvi ndo ndacan, tan ña cuví.

<sup>25</sup> Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yuvehe, tan cua catyí ndo: “Nuña yuvehe.” Tan ra ican cua catyí ra tsihin ndo: “Ña tsitó yu ndáa ityi quee nyooho.”

<sup>26</sup> Tacan tan nyooho cua catyí ndo: “Nyuhu tsatsí ndi tan tsihi ndi tsihin un. Maa un jacuahá un tuhun Nyoo tsi ndi ityi nu nyecú vehe ndi”, cua catyí ndo tsihin ra.

<sup>27</sup> Maa tyin ra ican cua nacahan ra tsihin ndo tan cua catyí ra: “Tsa catyí yu tsihin ndo

tyin ña tsitó yu ndáa ityi quee ndo. Çatsiyo nyaha ndo nu nyaá yu tandihí nyooho nyívi javahá tsa ña vaha”

<sup>28</sup> Tacan tan cua vacu ndo tan catsan ña cua cuvi nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihí ra cuví ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata.

<sup>29</sup> Tan cua quítsi nyívi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra.

<sup>30</sup> Tan juhva nyívi tsa cuahán ityi nuu vityin, ñi can cuhun nu ndihí. Tan juhva nyívi tsa cuahán nu ndihí ña, ñi can cua cuhun ityi nuu —catyí ra.

*Nu cuiihya xaan cuñí ra Jesús nyehé ra tsi nyívi ñuu Jerusalén (Mt. 23.37-39)*

<sup>31</sup> Juvín ñi maa quívi can tsaá juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñí ra cahñí ra tsi un —catyí ra naha.

<sup>32</sup> Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quívi tsa ndihí tyíñu jahá yu tsa tavá yu tatyí ña vaha tsi nyívi tan tsa janduvahá yu tsi nyívi cuuhví tsihin cuehe, tacan tan cundihí tyíñu jahá yu.

<sup>33</sup> Maa tyin nda cuanda tahan tsi tsa ndihí maa tyíñu jahá yu, tacan tan cuhun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

<sup>34</sup> ¡Ndahvi nyooho nyívi Jerusalén! tyin tsahñí ndo tsi ra cuví ndusu yuhu Nyoo. Tan cañí ndo yuu tsi tandihí ra tsa jaquitsí Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa jahá cuenda iin ndívi síhi sehe tí, tan naquihín vaha tí tsi tí naha tí tsitsi nditsin tí. Maa tyin maa ndo ña cuñí ndo.

<sup>35</sup> Nyehe ndo vityin tyin tsa nacoq yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quívi tsa cua catyí ndo tyin cahnu xaan ra tatyí tsihin sívi Nyoo Jutu yo —catyí ra Jesús.

## 14

*Nu janduvahá ra Jesús tsi iin ra cuuhví tsa iyó cuiñu quívi quitatú nyívi*

<sup>1</sup> Cuví tsi iin quívi quitatú nyívi. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús.

<sup>2</sup> Tacan tan yatyin ñi nuu ra Jesús nyaá iin ra cuuhví tsa iyó cuiñu.

<sup>3</sup> Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyívi cuuhví quívi quitatú yo? ¿Náa catyí ley Nyoo? —catyí ra.

<sup>4</sup> Tacan tan tandihí ra naha, taxin ña tsinyecu ra naha. Tacan tan tyisó ndaha ra Jesús jíñi ra cuuhví can. Tan janduvahá ra tsi ra. Tan catyí ra tsihin ra na cunuhu ra.

<sup>5</sup> Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quiti jana ndo, tsitsi xahva, ¿a ña cua tava ndo tsi tí tsa numi ñi, vasu ndi maa quívi quitatú yo cuví? —catyí ra.

<sup>6</sup> Tacan tan taxin ña tsinyecu ra fariseo naha ra. Tyin ña ñihí ca ra naha náa nacahan ra naha.

*Nu jacuahá ra Jesús tsi yo tyin ña vaha tsa cahnu jaha yo tsi yo*

<sup>7</sup> Nyehe ra Jesús tyin tandihí ra nyecú vico ican nacatsí ra naha tyayu vaha ca cunyecu ra naha. Tacan tan tsahá cuenda ra tyehen tsi ra naha:

<sup>8</sup> —Ndáa quívi cuhun ndo vico tindaha, ña nanducu ndo tyayu vaha ca cunyecu ndo. Tyin coto quítsi inga ra tsa cahnu ca cuví tan ñavin ca maa ndo,

<sup>9</sup> tan coto quítsi ra tsa caná tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndihí ña.

<sup>10</sup> Maa tyin catyí yu tsihin ndo, tyin ndáa quívi cana ra tsi ndo, cuaahan ndo, tan ñavin nu vaha cunyecu ndo. Tyin tacan tan cua quítsi maa ra tsa caná tsi ndo tan cua cahan ra tsihin ndo: “Amigos, naha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyívi nyecú yuhu mesa tsihin ndo.

<sup>11</sup> Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

<sup>12</sup> Tacan tan catyí tucu ra tsihin ra caná tsi ra nu iyó vico can:

—Ndáa quívi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyívi un, ndi tsi nyívi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un.

<sup>13</sup> Maa tyin catyí yu tsihin un tyin ndáa quívi coo vico vehe un, cana tsi nyívi ndaahvi, nyívi cuuhví, nyívi coxo, tan tsihin nyívi cuaa.

<sup>14</sup> Tacan tan sii' cua cuñí un, tyin ñi' ican ña' cua cuvi natyahví ñi' tsi un. Maa tyin cua natyahví Nyoo tsi un quiví' cua nandoto un tsihin nyiví' vaha.

*Nu tsaḥa' cuenda ra Jesús iin' cuhva nácaa caná' ra tsi yo na quihvi' yo nu ndacá' ñaha Nyoo*

(Mt. 22.1-10)

<sup>15</sup> Tan tsiñí' iin' ra tsa nyaá' yuhu mesa ican tsa caahán' ra Jesús. Tan catyí' ra tsihin ra:

—Sii' xaan' cua cuñi' nyiví' tsa' cua catsi' nu ndacá' ñaha Nyoo —catyí' ra.

<sup>16</sup> Tacan tan catyí' ra Jesús tsihin ra:

—Iin' ra ican jacoó' ra iin' vico' cahnu' xaan' vehe' ra. Tan cana' ra cuaha' xaan' nyiví'.

<sup>17</sup> Tacan tan tsaḥ' cuhva' tsa' cua cuxiñí' ñi', tan jacuhún' ra tsi' musu' ra na cuquihin' ra tsi' ñi', tyin' tsa' tahañ' tsi' cuhva' cuxiñí' ñi'.

<sup>18</sup> Maa tyin' tandihí' ñi' ican' quitsaha' caahán' ñi' tyin' ña' cua' cuhun' ñi'. Tan iin' ra ican' catyí' ra: “Ndi' jata' yu' iin' ñuhu. Tan cuñí' tsi' cuhun' yu' cunyehe' yu' itsi'. Yacan' tsiacán' yu' na' jaha' ra' tucahnu' iñi' tsi' yu' tyin' ña' cua' cuhun' yu.”

<sup>19</sup> Tacan tan inga' ra ican' catyí' ra: “Ndi' jata' ñi' yu' uhun' taahan' yunta. Tan' cuhun' yu' cunyehe' yu' tatun' vaha' ti' naha' ti'. Yacan' tsiacán' yu' tumañi' iñi' tsi' ra' na' jaha' ra' tucahnu' iñi' tsi' yu, tyin' ña' cua' cuvi' cuhun' yu.”

<sup>20</sup> Tacan tan inga' tucu' ra ican' catyí' ra: “Ndi' tindaḥa' cuií' ñi' yu, tan' ña' cua' cuvi' cuhun' yu”, catyí' ra.

<sup>21</sup> Tacan tan musu' ra ican' cuanuhu' ra. Tan' catyí' tuhun' ra' tandihí' tsa' cuvi' ican' tsihin' ra' tsitoho' ra. Tsa' tsiñí' tsitoho' ra' tsa' tacan, tan' cuxaḥaḥ' xaan' ra. Tan' catyí' ra' tsihin' musu' ra: “Cuaahan' vityin' tandihí' maa' ityi'. Tan' quitsi' ndaca' un' tsi' nyiví' ndaahvi', nyiví' cuuhví', nyiví' coxo, tan' tsihin' nyiví' cuaa”, catyí' ra.

<sup>22</sup> Tan tsa' yaha' tsaḥ' nyico' musu' ican' tan' catyí' ra' tsihin' ra' tsitoho' ra: “Tsa' javaha' yu' tandihí' maa' tsa' caḥaḥ' un' tsihin' yu. Tan' nuña' ca' tsitsi' vehe”, catyí' ra.

<sup>23</sup> Tacan tan tsitoho' ra' catyí' ra' tsihin' ra: “Cuaahan' cua' nducu' ca' nyiví' tandihí' maa' ityi'. Tan' jañiñi' un' tsi' ñi' na' quitsi' ñi', tyin' na' cuto' tsitsi' vehe' yu.

<sup>24</sup> Tyin' catyí' yu' tsihin' un' tyin' ndi' intuhun' ñi' tsa' cana' yu' tsa' jihna, ña' cua' catsi' ñi' tsihin' yu”, catyí' ra —catyí' ra Jesús.

*Cuaha' xaan' tundoho' nyehé' yo' tatun' cuenda' ra Jesús yihí' yo*

(Mt. 10.37-38)

<sup>25</sup> Cuaaha' xaan' nyiví' nyicún' tsi' ra' Jesús. Tacan tan nanyehé' ra' tsi' ñi', tan' catyí' ra' tsihin' ñi':

<sup>26</sup> —Tandihí' nyooḥo' tsa' nyicún' tsi' yu, tatun' cuñí' ca' ndo' tsi' nyiví' ndo' tan' ñavin' ca' tsi' yuhu, ñavin' cuenda' yu' yihí' ndo. Tan

tatun' cuñí' ca' ndo' tsi' maa' ndo' tsa' nuu' yuhu, ñavin' cuenda' yu' yihí' ndo.

<sup>27</sup> Tyin' nyooḥo' tsa' ña' cuñi' nyehe' tundoho' tsa' cunyicun' ndo' tsi' yu, ña' taahán' tsi' cuvi' ndo' nyiví' cuenda' yu, tyin' tsa' nyehé' ndo' tundoho', yacan' cuvi' cruu' tsa' taahán' tsi' cuiiso' ndo.

<sup>28</sup> Tyin' tun' cua' javaha' ndo' iin' vehe, nacañi' nuu' jihna' ndo' jiñi' ndo' tan' tyihí' tuñi' iñi' ndo' tun' quita' vehe' cahnu' can' tsihin' xuhun' tsa' nyii' tsi' ndo.

<sup>29</sup> Tyin' tatun' quitsaha' jandaá' ndo' vehe' ican, tan' ña' cuvi' jandihí' ndo' tyin' nduve' ca' xuhun' ndo, cua' vacu' nducu' nyiví' tsi' ndo.

<sup>30</sup> Tan' cua' catyí' ñi': “Ra' ican' quitsaha' javahá' ra' vehe' ra, tan' ndi' ña' cuvi' jandihí' ra' can”, cua' catyí' ñi'.

<sup>31</sup> A' tatun' iin' rey' tan' cuñí' ra' cañi' tahan' ra' tsihin' inga' rey' za' ña' cunyata' jihna' ra' tan' nyehe' ra' tatun' ñihí' tsa' utsi' mil' ñi' andaru' tsa' cuahán' tsihin' ra' cua' cañi' tahan' ra' naha' tsihin' inga' rey' tsa' vatsí' tsihin' oco' mil' andaru' ican?

<sup>32</sup> Tan' tatun' tsitó' ra' tyin' ña' cua' cuvi' jaha' canaa' ra' tsi' inga' rey' can, tacan' tan' cañi' ca' vatsí' inga' rey' ican, tan' cua' jacuhun' ra' tsi' musu' ra' tyin' na' catyí' tuhun' ra' naha' tsihin' inga' rey' ican' na' jandihí' taxin' ra' itsi'.

<sup>33</sup> Tan' tacan' cuvi' nyooḥo. Tatun' ña' cahnya' iñi' ndo' tandihí' maa' tsa' cuñí' ndo' tan' tandihí' tsa' cumí' ndo, ña' cua' cuvi' cunyicun' ndo' tsi' yu.

*Nu' jacuahá' ra' Jesús tyin' tumaa' ñi' tsa' ndihí' tsa' uhva, tacan' cuvi' yo' tatun' ndu' uvi' iñi' yo' tsa' tsinú' iñi' yo' tsi' ra*

(Mt. 5.13; Mr. 9.50)

<sup>34</sup> Vaha' ñi' tyin' jacu' uhvá' tsi' tsa' catsi' yo. Maa' tyin' tatun' ndihí' tsa' uhva' tsi, ña' vaha' ca' tsi.

<sup>35</sup> Nduve' ca' tyiñu' cuvi' javaha' tsi. Ndi' ña' cuvi' jatyinyee' tsi' tsi' ñuhu. Tan' javitá' yo' itsi' tyin' ña' vaha' ca' tsi. Nyooḥo' tsa' iyó' soho, tyaa' soho' ndo' tuhun' caahán' yu —catyí' ra' Jesús.

## 15

*Nu' jacuahá' ra' Jesús tyin' tumaa' mbee' tsa' cuanaá' tacan' cuvi' yo*

(Mt. 18.10-14)

<sup>1</sup> Tandihí' ra' tava' xuhun' cuenda' ra' ndacá' ñaha' nda' ñu' Roma, tan' ra' iyó' cuatyí' naha' ra, natuhva' ra' naha' nu' nyii' ra' Jesús, tan' tyaa' soho' ra' naha' tsa' caahán' ra.

<sup>2</sup> Tacan' tan' ra' fariseo' naha' ra' tsihin' ra' maestro' cuenda' ley' vehe' ñuhu' naha' ra' quitsaha' caahán' nyaa' ra' naha' tsi' ra' Jesús, tan' catyí' ra' naha:

—Ra' ihya, caahán' ra' tsihin' ra' iyó' cuatyí' naha' ra. Tan' tsatsí' ra' tsihin' ra' naha —catyí' ra' naha.

<sup>3</sup> Tacan' tan' ra' Jesús tsaḥa' cuenda' ra' cuhva' ihya, tan' catyí' ra:

<sup>4</sup> —Nyooho tsa iyó iin cientu mbee jana, tun cunaa intuhun ti, ¿a ña cua nacoó ndo tsi tandihí ca ti, tan cunanducu ndo tsi mbee tsa cunaa can nda cuanda tsa nañihi ndo tsi ti?

<sup>5</sup> Tan tsa yaha nañihi ndo tsi ti, tyiso soco ndo tsi ti. Tan sii xaan cua cuñi ndo.

<sup>6</sup> Tan tsa tsa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyí ndo tsihin ñi tyin na cusii ndihi iñi ñi tsihin ndo tyin nañihí ndo mbee jana ndo tsa tsinaa.

<sup>7</sup> Tan catyí yu tsihin ndo, tyin tacan tucu sii xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra kuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi kuhva iyó ñi.

*Ñaha tsa tsinaa xuhun tan nañihí ña*

<sup>8</sup> Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña tanií tsitsi vehe ña. Tan cua nanducu ña xuhun can nda cuanda tsa nañihi ña can.

<sup>9</sup> Tan tsa yaha nañihi ña, cua kuhun ña cunanducu ña tsi ñi vaha iñi tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusii ndihi iñi ndo tsihin yu tyin tsa nañihí yu xuhun yu tsa tsinaa”, cua catyí ña.

<sup>10</sup> Tan catyí yu tsihin ndo tyin tacan tucu sii cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

*Nu jacuahá ra Jesús nácaa cuñi Nyoo tsi iin ra ndu uvi iñi cuatyí*

<sup>11</sup> Tacan tan tsahá cuenda ra Jesús inga kuhva ihya tan catyí ra:

—Iin ra, iyó uvi taahan sehe ra.

<sup>12</sup> Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahví sava ra tsa tsii ra tan tsahá ra tsi nduvi taahan sehe ra.

<sup>13</sup> Tan ña cuaha ñi quivi tan ra luhlu ican xico ra tandihí maa tsa tsahá jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañi xaan. Tan ndacan tsicoo ra tan janaa ra tandihí maa xuhun ra tsihin tussí iñi. Tan quihí xaan icá ra tsicá nuu ra.

<sup>14</sup> Tacan tan tsaá tama ityi nu iyó ra. Tan quitsahá tsisocó ra tyin tandihí xuhun ra janaa ra.

<sup>15</sup> Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti.

<sup>16</sup> Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quini ican naha ti. Tan yoñi maa tsahá tsa catsi ra.

<sup>17</sup> Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco.

<sup>18</sup> Vityin cua cunuhu yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan tacan tucu nuu maa ra.

<sup>19</sup> Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuvi tsi yo” cuñi ra tsicá iñi ra.

<sup>20</sup> Tacan tan quihín ra ityi cuanuhu ra nda vehe jutu ra. Tan cañi ca vatsí ra tan nyehé jutu ra tsi ra, tan cundaahvi iñi ra nyehé ra tsi sehe ra. Tan tsinú xaan ra tsijatahan ra tsi ra. Tan tsinumí nyaa ra tsi ra.

<sup>21</sup> Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra.

<sup>22</sup> Maa tyin jutu ra tava tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihí ndo iin xehe nundaha ra. Tan tyihí ndihi ndo zapatu tsaha ra.

<sup>23</sup> Tan çahñi ndo iin becerra tsa xaahan vaha ca, tyin catsi yo tsi ti. Tyin vityin cua coo yo vico.

<sup>24</sup> Tyin ra sehe yu ihya tsa tsihí ra cuñi maa yu, tsicá iñi yu. Cuñi maa yu tyin ña cua nyehé ca yu tsi ra, tan tsaá nyico ra”, catyí jutu ra can. Tacan tan quitsahá tsicoo ñi vico. Tan sii xaan cuñi ñi tyin tsaá nuhu nyico ra.

<sup>25</sup> Tacan tan inga sehe ra, ra tsa tsitsa, nyíi ra tsicuhu. Tan tsa cua tsa nuhu ra nda yuvehe ra, tan tsiñi ra tyin iyó yaa. Tan tuví iñi ra tyin tsañi ñi yaa.

<sup>26</sup> Tacan tan tsa cuyatyin ra nda yuvehe ra tan cana ra tsi iin musu ra. Tan tsicá tuhun ra tsi ra can náa cuví xaan can.

<sup>27</sup> Tacan tan musu can catyí ra: “Ra yañi un tsaá nuhu ra. Tan yacan tava jutu un tyiñu tyin na çahñi ra naha iin becerra xaahan. Tyin vaha tsaá ra yañi un, tan nduve náa tahán ra”, catyí musu can tsihin ra.

<sup>28</sup> Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe.

<sup>29</sup> Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca kuhva un tsi yu tyin coo vico jaha yu tsihin ra vaha iñi tsi yu.

<sup>30</sup> Maa tyin vityin tsaq nuhu nu sehe un ihya, nu tsa janaa xuhun tsihin ñaha sii ñi. Tan tsaḥa un iin becerru quiti xaahan tsi nu”, catyí ra tsihin jutu ra.

<sup>31</sup> Tacan tan nacahan jutu ra tan catyí ra tsihin ra: “Sehe yu, yooḥo tsihin maa yu nyaá un tandihi quivi. Tan tandihi tsa cumi yu, tsi un cuvi can.

<sup>32</sup> Tan vityin taahan tsi tyin javaha yo vico ihya, tan cusii ñi yo. Tyin tsaq nuhu ra yañi un, ra tsa tsihi, cuñi maa yu. Tumaa tsa nandoto nyico ra cuvi can, tyin tsinaa ra, tan nañihi yo tsi ra inga tsaha”, catyí ra tsihin sehe ra —catyí ra Jesús.

## 16

*Nujacuahá ra Jesús tsi yo nácaa javaha yo tumañi ñi tsihin tsa iyó tsi yo*

<sup>1</sup> Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihi tyiñu jahá ra cuca can. Tan tsaḥan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaa ra tandihi tsa iyó tsi ra.

<sup>2</sup> Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca naçuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra.

<sup>3</sup> Tacan tan ra yihí ndaha tyiñu can tsicá ñi ra: “¿Nacaa cua javaha yu vityin? Tsi toho yu ña cuñi ca ra tsa jaha tyiñu yu tsihin ra. Tan nduve tunyee ñi iyó tsi yu tsa jaha tyiñu yu tsihin nuhu. Tan cahán xaan nuu yu caya yu tsitsi nuu.

<sup>4</sup> Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsaá yu vehe ñi”, tsicá ñi ra can.

<sup>5</sup> Tacan tan cana ra tsi intuhun intuhun ra tsa nyaá cuenda tsi tsitoho ra. Tan catyí ra tsihin iin ra ican: “¿Náa nyaá cuenda un tsi tsitoho yu?” catyí ra.

<sup>6</sup> Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahan ra.

<sup>7</sup> Tacan tan tsaq inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahan ra ican: “Nyaá cuenda yu iin mil arroba trigu”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra.

<sup>8</sup> Tacan tan tsitó tsitoho ra tsa ña vaha tsa javahá ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaa yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

<sup>9</sup> Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatyinyee ndo tsi nyivi. Tan quivi tsa cua ndihi tsa cuca, cua ñihi ndo coo ndo nu ña cua naa maa.

<sup>10</sup> Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo.

<sup>11</sup> Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo.

<sup>12</sup> Tyin tandihi tsa iyó tsi ndo, maa Nyoo tsaḥa nuu itsi tsi ndo. Tan tatun ña javahá ndo tumañi ñi tsihin tsi, ña cua cuhva ra tsa cuvi tsi ndo.

<sup>13</sup> Iin musu ña cuvi coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuvi cuñi ndo tsi Nyoo tatun cuñi tucu ndo tsa cuca —catyí ra Jesús.

<sup>14</sup> Tan tsa tsiñj ra fariseo naha ra tandihi tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun.

<sup>15</sup> Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihi tsa cahnu cuñi maa nyivi, Nyoo ña cuñi ra nyehe ra yacan.

*Ley Nyoo tsa tyaa ra Moisés, tan tsihin tsa ndacá ñaha Nyoo tsi yo*

<sup>16</sup> Ley tsa tsaḥa Nyoo tsi ra Moisés tyin tyaa ra, tan tsihin tuhun tsa tyaa ra cuvi ndusu yuhu Nyoo tahán tsanaha, yacan cuvi tsa janahá ityi tsi nyivi nda cuanda quivi tsa quitsi ra Juan. Tan ra Juan quitsaha caahan ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihi nyivi nducú xaan ñi cuhva tsa quihvi ñi nu ndacá ñaha ra.

<sup>17</sup> Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuvi ley Nyoo tsa tyaa ra Moisés, ña cua cunaa tsi tyin cua cundaa tandihi tsi.

*Nu jacuahā ra Jesús tyin ña vaha tsa nacoo ihñi rayii ñasihi ra*

(Mt. 19.1-12; Mr. 10.1-12)

<sup>18</sup> Tatun iin rayii tan iyó ñasihi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayii tsihin ñaha tsa nacoo yii, coo tucu cuatyí ra can nuu Nyoo.

*Nu jacuahā ra Jesús tsi nyivi cuenda ra cuca tsihin ra Lázaro*

<sup>19</sup> Tsiocoq iin ra cuca. Tan vaha xaan jahma tsinditsj ra. Tan tandihí quivi iyó vico jahá ra tan tsatsí vaha ra.

<sup>20</sup> Tan tsiocoq tucu iin ra ndaahvi tsa tsi-nañi Lázaro. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican.

<sup>21</sup> Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda caanda ina tan tsaa ti naha ti nu nyaá ra, tan tsacayaá ti nu uhvi ra.

<sup>22</sup> Tan iin quivi tsihi ra ndaahvi can. Tan ángel maa Nyoo na quihñ tsi ra tan tsindaca ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutstj ñi tsi ra.

<sup>23</sup> Tacan tan ra cuca ican nyehé xaan ra tundoho nu nyii ra anyaya. Tan nanyehé ra nu cañi xaan nu nyaá ra Abraham tsihin ra Lázaro.

<sup>24</sup> Tacan tan cana tsaa ra cuca can tan catyí ra: “Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhü ihya”, catyí ra.

<sup>25</sup> Tan ra Abraham catyí ra tsihin ra: “Ndqçuhun iñi tyin vaha xaan tsiocoq un nu ñuhu ñayivi. Tan ra Lázaro, tuhun ndaahvi tsiocoq ra. Tan vityin vaha iyó ra ihya, tan yooho nyehé un tundoho.

<sup>26</sup> Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehé ña cuví cahun ra naha nu nyii un. Tan ndi ra yucú nu nyii un, ña cuví quitsi ra naha nyehé”, catyí ra Abraham tsihin ra cuca can.

<sup>27</sup> Tacan tan catyí ra cuca ican: “Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu.

<sup>28</sup> Tyin iyó uhun taahan ca ra yañi yu naha ra. Tan cuñi yu tyin catyí tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihí ra naha ihya”, catyí ra.

<sup>29</sup> Tacan tan catyí ra Abraham: “Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahan tsanaha. Na tyaa yahvi ra yañi un naha ra, tun cuñi ra naha”, catyí ra Abraham.

<sup>30</sup> Tacan tan catyí ra cuca ican: “Tyatya Abraham. Ña cua tyaa yahvi ra naha. Maa

tyin tatun yóo tsa nandoto, tan cahun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican.

<sup>31</sup> Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

## 17

*Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha*  
(Mt. 18.6-7, 21-22; Mr. 9.42)

<sup>1</sup> Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jatíví tsi nyivi. Maa tyin ndahvi ra ndaahvi tsa jatíví tsi nyivi.

<sup>2</sup> Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jativi ca ra tsi nyivi ndi nasama cuhva iyó.

<sup>3</sup> Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, çahan ndo tsihin ra tyin ña vaha tsa javahā ra. Tun nasama ra cuhva iyó ra, jaha ndo tucahnu iñi tsi ra.

<sup>4</sup> Tan ndi maa javaha ra tsa ña vaha tsihin ndo utsa tsaha tsa iin quivi, tatun tandihí tsa utsa tsaha tan catyí ra tsihin ndo tyin ndu uvi iñi ra tsa javahā ra; tandihí tsa utsa taahan tsaha can, jaha ndo tucahnu iñi tsi ra.

*Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha*

<sup>5</sup> Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

<sup>6</sup> Tan catyí ra Jesús tsihin ra naha:

—Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnu tsa nañi sicómoro tsa nyaá ihya: “Na tuhun tsi un, tan cunyata un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

*Nacaa taahán tsi tyaa yahvi yo tsi Nyoo*

<sup>7</sup> Tan catyí ra Jesús:

—Tatun iin nyooho tan iyó iin musu ndo, tan tsaa ra tsa tsahan ra tsicuhu tsijahā tyiñu ra, a tsijahā cuenda ra quiti jana ndo, ja catyí ndo tsihin ra: “Cunyata tan catsi un”? Ña tuhvá ndo cahan tacan tsihin ra.

<sup>8</sup> Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyiñi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.

<sup>9</sup> Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra.

<sup>10</sup> Tacan tucu maa ndo tsihin Nyoo. Quivi ndihi javaha ndo tandihi tsa cahan ra tsihin ndo, taahan tsi catyi ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

*Nu janduvahá ra Jesús tsi utsi taahan ra ndohó cuehe tyahyú*

<sup>11</sup> Cuahán ra Jesús ityi ñuu Jerusalén tan yaha ra nu cuví xahñu Samaria tsihin Galilea.

<sup>12</sup> Tan nu tsaá ra iin ñuu, quitá utsi taahan ra cuhvi tsihin cuehe tyahyú. Tan tsicuiñi ra naha ndasava.

<sup>13</sup> Tan caná tsaá ra naha tan catyi ra naha: —Yooho, Maestro Jesús, cundaahvi iñi tsi ndi —catyi ra naha.

<sup>14</sup> Tan tsa nyehe ra Jesús tsi ra naha tan catyi ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityi cuahán ra naha tan nduvahá ra naha.

<sup>15</sup> Tacan tan tsa nyehe iin ra ican tyin tsa nduvahá ra, vatsi tsihin tsata nyico ra nu nyii ra Jesús. Tan quitsahá caná tsaá ra, jacahnú ra tsi Nyoo.

<sup>16</sup> Tan tsa tsaá ra nu nyii ra Jesús, tsicuiñi tsi ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahá ihya, ra Samaria cuví ra.

<sup>17</sup> Tacan tan catyi ra Jesús: —¿A ñavin utsi taahan ndo nduvahá? ¿Náa inga iin taahan ca ra naha?

<sup>18</sup> ¿A intuhun ñi maa ra inga ñuu ihya vatsi, vatsi jacahnú tsi Nyoo? —catyi ra Jesús.

<sup>19</sup> Tacan tan catyi ra tsihin ra tsa nduvahá ican:

—Nduvita, cuaahan. Nduvahá un tyin tsinú iñi un tsi Nyoo —catyi ra Jesús tsihin ra.

*Cuhva cua quitsi Nyoo cua cundaca ñaha ra nu iyó yo ihya*

(Mt. 24.23-28, 36-41)

<sup>20</sup> Tsicá tuhun ra fariseo naha ra tsi ra Jesús, tan catyi ra naha:

—¿Ama cua quitsi Nyoo cua cundaca ñaha ra?

Tacan tan catyi ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi.

<sup>21</sup> Ña cua cuví catyi nyivi: “Juvín ra nyii ihya, juvín ra nyii ityi ican.” Tyin Nyoo tsa tsaá ra mahñu ndo, tan ndacá ñaha ra tsi nyivi yihí cuenda ra —catyi ra tsihin ra naha.

<sup>22</sup> Yahá yacan tan catyi ra tsihin ra tsicá tsihin ra:

—Cua tsaá quivi tsa cua cuñi ndo nyehe ndo tsi yuhu Rayii quee nda gloria. Maa tyin ña cua nyehe ndo tsi yu.

<sup>23</sup> Yihí ñi cua catyi ñi tsihin ndo: “Ihya nyii ra.” Inga ñi cua catyi ñi: “Ndacan nyii ra.” Maa tyin coto cuhun ndo cunyehe ndo. Tan ña cunycun ndo tsi ra can tyin ñavin yu cuví can.

<sup>24</sup> Tyin tandihi nyivi cua nyehe tsi yuhu, Rayii tsa quee nda gloria, quivi cua quitsi nyico yu inga tsaha. Tumaa tsa nyehé tandihi nyivi nu cañi tatsa savi tan quituvi ñuhu tatsa can ñi canduvi andivi, tacan cua cuví quivi cua quitsi yu inga tsaha.

<sup>25</sup> Maa tyin cua nyehe jihna yu tundoho cahnu xaan. Tyin nyivi tsa iyó vityin, ndasi cua cuñi ñi nyehe ñi tsi yu.

<sup>26</sup> Tumaa quivi tsa tsicoo ra Noé, tacan cua cuví quivi cua quitsi nyico yuhu Rayii quee nda gloria.

<sup>27</sup> Quivi tsicoo ra Noé, tsatsi nyivi. Tsihi ñi. Tindahá ñi. Tan tsahá ñi sehe sihi ñi tindaha, nda cuanda quivi quihvi ra Noé tsitsi yutun ndoo tan cuun savi xaan. Tan tandihi ñi can tsihi ñi jahá ndutya.

<sup>28</sup> Tacan tucu cuví quivi tsicoo ra Lot. Tsatsi ñi. Tsihi ñi. Jata ñi. Xicó ñi. Tatsi ñi itu. Tan javahá ñi vehe ñi.

<sup>29</sup> Tan quivi tsa quitá ra Lot ñuu Sodoma ican, cuun ñuhu tsihin azufre tsa quee nda andivi. Tan tsahñi ñuhu can tandihi nyivi Sodoma.

<sup>30</sup> Tacan cua cuví quivi quitsi nyico yu tsa cuví yu Rayii quee nda gloria.

<sup>31</sup> Tatun nyecú ndo nuquehe quivi quitsi yu, ña quihvi ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.

<sup>32</sup> Nducuhun iñi ndo tsa tahan ñasihi ra Lot.

<sup>33</sup> Tandihí nyoooho tsa cuñi tsa iyó nu ñuhu ñayivi ihya, cua cunaa ndo. Tan tandihí nyoooho tsa ña tyaá yahvi tsa iyó nu ñuhu ñayivi ihya, cua cacu ndo.

<sup>34</sup> Tan catyi yu tsihin ndo tyin tsacuaa can, uvi taahan nyivi cua cava iin nu tsito. Iin ñi cua naquihin yu. Tan inga ñi cua ndoo ñi.

<sup>35</sup> Tan uvi taahan ñiñaha, iin caa ñi cua nyico ñi quivi can. Intuhun ña cua naquihin yu. Tan inga ña cua ndoo ña.

<sup>36</sup> Tan catyi yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyi ra Jesús.

<sup>37</sup> Tsa tsiñi ra naha tsa cahan ra Jesús tacan, tsicá tuhun ra naha tsi ra:

—¿Numaa tahan cua cuví yacan, Jutu Mañi yu? —catyi ra naha.

Tacan tan nacahan ra Jesús, tan catyi ra:

—Nu canyií ndiyi, ican cua nataca nditsii.

## 18

*Nu jacuahq̄ ra Jesús tyin tumaa tsa cahān yuhu iin ñaha tsih̄i ȳi tsihin juez, tacan taahān tsi ndacan yo tsi Nyoo*

<sup>1</sup> Tshá cuenda ra Jesús iin cuhva ihya. Tyin iin nyita ñi cuñi tsi tsa ndacan tahvi ra naha tan ña cundihi iñi ra naha.

<sup>2</sup> Tan catyí ra:

—Iyó iin ñuu tsa nyaá iin ra cuví juez. Tan juez ícan ña tyaá yahvi maa ra tsi Nyoo. Tan ndi nyivi tan ña tyaá yahvi ra.

<sup>3</sup> Tan juvin ñuu ícan iyó iin ñaha ndaahvi tsa tsih̄i ȳi. Tan tsaahán ña tsihahán ña tsihin ra can, tyin tsiacán ña cuatyí tsaaha iin nu xaan iñi tsi ña.

<sup>4</sup> Tan juez ícan ña tyaá yahvi nu tsa caahán ña. Ña jandaq̄ maa nu tyiñu tsiacán ña. Tan tsanaha xaan tsiacán ña. Tacan tan quitsahq̄ tsiacán iñi nu juez can: “Vasu ndi maa ña tsiñú iñi yu tsi Nyoo, tan nduve náa cuenda yu tsi nyivi,

<sup>5</sup> maa tyin ñaha ihya tshá xaan ña tsih̄i tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsi ña, tan cuhva ca ña tsih̄i tsi yu”, cuñi ra tsiacán iñi ra.

<sup>6</sup> Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatinyee ra tsi ñaha ndaahvi ícan.

<sup>7</sup> Tan vihi ca cuví Nyoo tsihin yo, ¿a ña cua jatinyee ra tsi nyivi tsa nacatsj̄ ra tsa tsiacán ñi tsi ra nduvi tan ñiñu? ¿A cuatu xaan ca ra tan jatinyee ra tsi ñi?

<sup>8</sup> Catyí yu tsihin ndo, tyin numi ca cua jatinyee ra tsi ñi. Maa tyin quivi tsa cua quitsi nyico yu tsa cuví yu Rayi tsa quee nda gloria, tsiót Nyoo tun nañihi ca yu tsi nyivi tsa tsiñú tsa cuii iñi tsi yu —catyí ra Jesús.

*Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra*

<sup>9</sup> Tacan tan tsaḥq̄ cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñi ra naha nyehé ra tsi inga nyivi. Tan catyí ra:

<sup>10</sup> —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ícan ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra.

<sup>11</sup> Tan ra fariseo ícan nduvita nyityi ra, tan quitsahq̄ caahán ra tsihin Nyoo. Tan catyí ra: “Jutu Mañi yu, nacuhv̄a yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi ícá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya.

<sup>12</sup> Tyin yuhu uvi tsaaha tsiocoó nyitya yu tsa iin vitya. Tan tshá yu utsi taahan xuhun

tsa iin iin cientu tsa jahá canaa yu tsi un”, catyí ra can.

<sup>13</sup> Tan ra tsa tavá xuhun can tsa cañi luxu nyaá ra. Tan ña cana iñi ra nanyehe ndaa ra. Tan cañi ndaha ra yiqui nyica ra tyin ndu uvi iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

<sup>14</sup> Tan catyí nyico ra Jesús tyehen:

—Catyí yu tsihin ndo tyin Nyoo jahq̄ ra tucahun iñi tsi ra tavá xuhun ícan. Janaq̄ Nyoo cuatyí ra tan cuanuhq̄ ra nda yuvehe ra. Maa tyin ra fariseo ícan, nduve tucahun iñi tsiocoó tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

*Nu nasocó ra Jesús tsi tsa nyihi*

(Mt. 19.13-15; Mr. 10.13-16)

<sup>15</sup> Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyeḥe ra tsiacán tsihin ra tyin cuaha tsa nyihi tsaá nu nyaá ra, cuxaan ra naha tan ña tsaḥq̄ ra naha cahun tsa nyihi can.

<sup>16</sup> Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya.

<sup>17</sup> Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacu ñaha Nyoo.

*Nu tsaḥq̄ ra Jesús cuhva tyin ȳi xaan nacuhva cuenda iin ra cuca tsi ra tsi Nyoo*

(Mt. 19.16-30; Mr. 10.17-31)

<sup>18</sup> Tacan tan iin ra tsa cuví ityi nuu cuenda vehe ñuhu tsiça tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

<sup>19</sup> Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha.

<sup>20</sup> Yooho tsiót un tandih̄i tuhun tsa tsaḥq̄ Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaá yahvi un tsi jutu un tan sihi un” —catyí ra Jesús.

<sup>21</sup> Tacan tan ra ícan catyí ra:

—Tandih̄i maa yacan tan tyaá yahvi yu nda taḥan luhlu yu tan nda cuanda vityin —catyí ra.

<sup>22</sup> Tsa tsiñi ra Jesús tsa cahān ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandih̄i tsa iyó tsi un. Tan cuhva un xuhun can tsi nyivi



ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

<sup>23</sup> Maa tyin tsa tsiñi ra tsa cahān ra Jesús, nducuiihya xaan cuñi ra, tyin cuca xaan ra.

<sup>24</sup> Tan tsa nyehē ra Jesús tyin nducuiihya cuñi ra, tan catyí ra:

—Yii xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

<sup>25</sup> Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

<sup>26</sup> Tan nyivi tsa tsiñi tsa cahān ra catyí ñi:  
—Tatun tacan, ¿yoo cua cuví cacu? —catyí ñi.

<sup>27</sup> Tacan tan ra Jesús catyí ra:

—Tandihí tsa ña cuví javahá nyivi, Nyoo cuví javahá ra tandihí —catyí ra.

<sup>28</sup> Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoó ndi, tan nyicún ndi tsi un —catyí ra.

<sup>29</sup> Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihí nyooho tsa nacoó vehe, a ñasihí ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,

<sup>30</sup> cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

*Inga tsaha jacoto ra Jesús cuhva cua cahñi nyivi tsi ra*

(Mt. 20.17-19; Mr. 10.32-34)

<sup>31</sup> Tan canā siin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cahun yo nda ñuu Jerusalén. Tyin ndacan cua cundaa tyiñu Rayii tsa queē nda gloria: tandihí tyiñu tsa tyaā ra cuví ndusu yuhu Nyoo tahañ tsanaā.

<sup>32</sup> Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tiví sii ra naha nuu yu.

<sup>33</sup> Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

<sup>34</sup> Maa tyin ña cutuñi iñi ra tsicá tsihin ra tsa cahān ra, tan ndi ña tsitó ra naha náa tuhun cahān ra tsihin ra naha. Tyin ña cuví cutuñi iñi ra naha.

*Nu janduvahā ra Jesús iin ra cuaa ñuu Jericó*

(Mt. 20.29-34; Mr. 10.46-52)

<sup>35</sup> Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra.

<sup>36</sup> Tacan tan tsiñi ra cuvaa tsa yahá cuaha nyivi. Tan tsicá tuhun ra náa cuenda ñihi xaan cuvaa.

<sup>37</sup> Tan catyí tuhun nyivi tsihin ra tyin ra Jesús, ra ñuu Nazaret, vatsí.

<sup>38</sup> Tacan tan quitsahā caná tsaa ra tan catyí ra:

—jYooho Jesús, tata ra rey David! ¡Cundaahvi iñi tsi yu! —catyí ra.

<sup>39</sup> Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca canā tsaa ra, tan catyí ra:

—jYooho, tata ra rey David! ¡Cundaahvi iñi tsi yu! —catyí ra.

<sup>40</sup> Tacan tan tsicuiñi ra Jesús. Tan tava tyiñu ra na cahun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

<sup>41</sup> —¿Náa cuñi un javaha yu tsihin un?

Tacan tan ra cuaa ican nacahan ra, tan catyí ra:

—Jutu Mañi yu, cuñi yu nanyehe yu —catyí ra.

<sup>42</sup> Tacan tan catyí ra Jesús tsihin ra:

—Nanyehe. Tsa nduvahā tinuu un tyin tsinú iñi un tsi yu —catyí ra.

<sup>43</sup> Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihí nyivi tsa nyehē tsa cuví can, jacahnú ndihí tucu maa ñi tsi Nyoo.

## 19

*Nu cuahán ra Jesús vehe ra Zaqueo*

<sup>1</sup> Tacan tan quihvi ra Jesús ñuu Jericó. Tan cua yaha ra tsitsi ñuu.

<sup>2</sup> Tan ñuu can iyó iin ra cuca xaan, nañi ra Zaqueo. Tan cuví ra ityi nuu tsihin ra tava xuhun cuenda ra ndacá ñaha nda ñuu Roma.

<sup>3</sup> Ra ihya cuñi xaan ra nacoto ra tsi ra Jesús. Tan ña cuví nyehē ra tsi ra tyin cuaha xaan nyivi cuahan tsihin ra. Tan maa ra ndiqui xaan ra.

<sup>4</sup> Tacan tan tsinú xaan ra cuahán ra ityi nuu, tan ndaa ra iin nu yutun cahnú tsa nañi sicómoro tsa nyaá yuhu ityi nu cua yaha ra Jesús, tan cuví nyehē ra tsi ra Jesús.

<sup>5</sup> Tan cuhva tsa quitā ra Jesús nu nyaá yutun can, nanyehe ndaa ra ityi siqui tan nyehē ra tsi ra Zaqueo. Tan catyí ra tsihin ra:

—Zaqueo, ñanumi nuu un nu yutun juven. Tyin vityin cuñi tsi tsa cahun yu yuvehe un —catyí ra tsihin ra.

<sup>6</sup> Tacan tan numi xaan nuu ra Zaqueo. Tan sii xaan cuñi ra. Tan quihñ ra tsi ra Jesús cuahán tsihin ra yuvehe ra.

<sup>7</sup> Tan tsa nyehē nyivi tsa tacan cuví, tandihí ñi quitsahā caahán nyaa ñi tsi ra Jesús. Tan catyí ñi tyin ndoó ra vehe iin ra iyó cuatyí.

<sup>8</sup> Tan nu nyecú ra naha tsitsi vehe, ra Zaqueo tsinyaa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhú yu tsa tsií ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

<sup>9</sup> Tacan tan catyí ra Jesús:

—Vityin cacú un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.]

<sup>10</sup> Tyin yuhu, Rayi tsa quee nda gloria, vatsi yu vatsi nanducu yu tan vatsi jacacu yu tsi nyivi tsa cuanaa maa —catyí ra Jesús.

*Nu jacuahá ra Jesús tsi yo na jaha tyiñu yo tsihin tsa tsahá Nyoo tsi yo*  
(Mt. 25.14-30)

<sup>11</sup> Tan tsitsi tsa tsiñi nyivi tsa caahán ra Jesús, tan quitsahá tsahá cuenda ra inga cuhva ihya tsi ñi. Tyin tsa cuñi tsaa ra ñuu Jerusalén. Tan nyivi cuñi maa ñi tyin tsa cua quitsaha cundaca ñaha ra ndacan.

<sup>12</sup> Tacan tan catyí ra:

—Tsicoo iin ra cuca tan tsa cuñi kuhun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra.

<sup>13</sup> Tsa ndi cumañi ca kuhun ra, caná ra utsi taahan musu ra. Tan tsahá cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra.

<sup>14</sup> Maa tyin nyivi ñuu ra, ndasi cuñi ñi nyehé ñi tsi ra tan ña cuñi ñi tsa cundaca ñaha ra tsi ñi. Tan jacuhun ñi tsi ra kuhun cunyicun tsi ra, tyin cahan ra naha tyin ña cuñi ñi tsa cundaca ñaha ra tsi ñi.

<sup>15</sup> Maa tyin ra ican cuví maa ra rey. Tacan tan tsaá nyico ra nda ñuu ra. Tan quivi tsa tsaá ra, caná ra tsi musu ra, ra tsa nacoó ra xuhun tsihin. Tyin cuñi ra coto ra nácaa xuhun jahá canaa xuhun ra tsa nacoó ra.

<sup>16</sup> Tan tsaá iin ra ican. Tan catyí ra: “Yooho taa, jahá canaa yu utsi taahan ca siqui xuhun tsa nacoó un tsi yu”, catyí ra.

<sup>17</sup> Tacan tan catyí ra rey can tsihin ra: “Vaha xaan. Yooho cuví musu vaha. Tyin javahá un ndihi tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra.

<sup>18</sup> Tacan tan tsaá tucu inga ra tsa tsahá ra xuhun. Tan catyí ra: “Juhun xuhun ihya. Jahá canaa yu uhun taahan ca siqui xuhun tsa nacoó un tsi yu”, catyí ra.

<sup>19</sup> Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra.

<sup>20</sup> Tacan tan tsaá tucu inga ra can. Tan catyí ra: “Juhun xuhun tsa tsahá un tsi yu. Yuhu naquihin vaha yu itsi tsitsi pañitu.

<sup>21</sup> Tyin yuuhvi xaan yu tsi un, tyin yooho xaan xaan un. Tyin tuhva un naquihin tsa ñavin tsa tatsj un. Tan naquihin un ndaha tyiñu quitá nu jahá tyiñu inga nyivi”, catyí ra can.

<sup>22</sup> Tacan tan ra rey ican catyí ra tsihin ra: “Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihin yu tsa ña tatsj yu, tan naquihin yu ndaha tyiñu inga nyivi,

<sup>23</sup> ¿Nacuvi tyin ña tsityihí un xuhun yu banco tyin tsaá yu maa tyin tsa nandaa xuhun yu?” catyí ra rey can.

<sup>24</sup> Tan catyí ra tsihin ra nyecú ican: “Quinyaa ndo xuhun tsa tsahá yu tsi ra ihya, tan cuhva ndo tsi ra tsa jahá canaa utsi taahan ca siqui tsa tsahá yu tsi ra”, catyí ra.

<sup>25</sup> Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha.

<sup>26</sup> Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahá tyiñu tsihin tsa tsahá yu tsi ra, cuaha ca cua cuhva yu tsi ra. Tan ra tsa tsahá yu luxu ñi, tan ña cuñi ra jahá tyiñu ra tsihin tsi, cua quinyaa yu tandihí can tsi ra.

<sup>27</sup> Tan tandihí nyivi xaan iñi tsi yu, ñi tsa ña cuñi tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

*Nu tsaá ra Jesús ñuu Jerusalén*

(Mt. 21.1-11; Mr. 11.1-11; Jn. 12.12-19)

<sup>28</sup> Tsa yahá cahan ra Jesús yacan, tan jañihí ra cuahán ra ñuu Jerusalén.

<sup>29</sup> Tacan tan tsa cuñi tsaa ra ñuu Betfagé tsihin ñuu Betania, yatyin ñi iin yucu tsa nañi Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra.

<sup>30</sup> Tan catyí ra tsihin ra naha:

—Cuahaan ndo ñuu tsa canyí yatyin ñi ihya. Ican cua nañihí ndo iin burru luhlu, quiti tsa ñaha ca quihí tyayu. Nuuhñi ti. Ndatsi ndo tsi ti. Tan quitsi ndaca ndo tsi ti tsi yu.

<sup>31</sup> Tatun yóo tsicá tuhun tsi ndo: “¿Nacuenda ndatsi ndo tsi ti?” catyí ndo tsihin ñi: “Ndatsi ndi tsi ti tyin tsiñi ñuu ti tsi ra ndacá ñaha.”

<sup>32</sup> Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahan maa ra tsihin ra naha.

<sup>33</sup> Tan cuhva tsa ndatsí ra naha tsi ti, tsaá tsitoho ti. Tan nducu tuhun ra can naha ra tsi ra naha tan catyí ra:

—¿Nacuenda ndatsi ndo burru ihya? —catyí ra naha.

<sup>34</sup> Tacan tan nacahan ra can naha ra:

—Ndatsí ndi tsi ti tyin tsiñi ñuhu ti tsi ra ndacá ñaha —catyí ra naha.

<sup>35</sup> Tacan tan quihin ra naha tsi ti. Tan tsindaça ra naha tsi ti nu nyii ra Jesús. Tan tyiso ra naha jahma ra naha tsata ti. Tacan tan jandaça ra naha tsi ra Jesús tsata ti.

<sup>36</sup> Tacan tan cuahan ra Jesús. Tan cuaha xaan nyivi cuahan tsihin ra tsaquin ñi jahma ñi nu ñuhu ityi nu cua yaha ra, yosó ra burru ican.

<sup>37</sup> Tsa tsa cua cuyatyi tandihi nyivi tan ra Jesús nu ñi nuu yucu Olivo, quitsaha caná tsa tandihi ñi tsinú ñi tsi ra tsihin tsa sii cuñi ñi. Tan jacahnú ñi tsi Nyoo tyin cuaha xaan tsa iyo javaha ra nyehe ñi.

<sup>38</sup> Tan catyí ñi:

—¡Na jacahnu yo tsi ra Rey ihya tyin vatsi ra tsihin siyi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

<sup>39</sup> Tacan tan juhva ra fariseo tsa cuahan tsihin ñi, catyí ra naha:

—Maestro, jacutaxin tsi nyivi ihya —catyí ra naha.

<sup>40</sup> Tan nacahan ra Jesús tan catyí ra:

—Tatun nyivi ihya tan cutaxin ñi, yuu cua cana tsa, tan cua jacahnu tsi tsi yu —catyí ra Jesús.

<sup>41</sup> Tacan tan tsa tsaç ra Jesús yatyi ñi yuhu ñuu Jerusalén, nanyehé ra ñuu can tan quitsaha tsacú ra tsa cuihya cuñi ra.

<sup>42</sup> Tan catyí ra:

—Vaha xaan tun tsatyi cuvi coto ndo tan cutuñi ñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yihi tsa vaha can, tan ña cuvi nañihi ndo can.

<sup>43</sup> Coo quivi cua nyehe ndo tundoho jaha nu xaan ñi tsi ndo cua tyihi cutu nahnu tsi ndo. Tandihi ityi cua quitsi nahnu. Tan cañi tahan nahnu tsihin ndo.

<sup>44</sup> Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi in-tuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñi ndo nacoto ndo tyin tsa vatsi Nyoo, vatsi jacacu ra tsi ndo.

*Nu tavá ra Jesús tsi nu xicó tsitsi vehe ñuhu cahnu nahnu*

(Mt. 21.12-17; Mr. 11.15-19; Jn. 2.13-22)

<sup>45</sup> Tacan tan quihvi ra Jesús tsitsi cora vehe ñuhu cahnu. Tan quitsaha tavá ra tandihi nyivi xicó tan nyivi jatá tsa yucú nu quehe.

<sup>46</sup> Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuvi tsi. Tan nyooho jananduvj ndo itsi vehe ñasuhu —catyí ra Jesús.

<sup>47</sup> Tan tandihi quivi tsaahan ra Jesús tsijacuahá ra tsi nyivi tsitsi vehe ñuhu cahnu

can. Maa tyin ra jutu tsa cuvi ityi nuu naha ra, tan ra maestro cuenda ley vehe ñuhu naha ra, tan ra cuvi mandoñi ñuu Jerusalén can, nducú ra naha cuhva cahñi ra naha tsi ra.

<sup>48</sup> Maa tyin ña ñihí maa ra naha nácaa javaha ra naha tyin tandihi nyivi tan vaha tyaá soho ñi tsa caahan ra Jesús.

## 20

*Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tsa cahan ra tsihin nyivi*

(Mt. 21.23-27; Mr. 11.27-33)

<sup>1</sup> Iin quivi jacuahá ra Jesús tsi nyivi tsitsi vehe ñuhu cahnu, tan caahan ra nácaa jacacú Nyoo tsi ñi. Tan tsaç ra jutu tsa cuvi ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuvi mandoñi naha ra.

<sup>2</sup> Tan catyí ra naha tsihin ra Jesús:

—Catyi tuhun tsihin ndi ¿yóo tavá tyiñu tsi un javaha un tyiñu ihya? —catyí ra naha.

<sup>3</sup> Tacan tan ra Jesús catyí ra tsihin ra naha:

—Yuhu cuñi tucu yu nducu tuhun yu tsi ndo.

<sup>4</sup> ¿Yóo jaquitsj tsi ra Juan tyin jacoondutya ra tsi nyivi? ¿A Nyoo jaquitsj tsi ra, a nyivi?

<sup>5</sup> Tacan tan ra ican naha ra quitsaha caahan yuhu tahan ra naha tan catyí ra naha:

—Tun catyí yo tyin Nyoo jaquitsj tsi ra Juan, cua catyí ra tsihin yo nacuenda ña tsinú ñi yo tsa cahan ra Juan.

<sup>6</sup> Tun catyí tucu yo tyin nyivi jaquitsj tsi ra, tandihi nyivi cua cahñi ñi tsi yo tsihin yuu. Tyin tandihi ñi, tan cuñi ñi tyin ndusu yuhu Nyoo cuvi ra Juan —catyí ra naha.

<sup>7</sup> Tacan tan nacahan ra naha tsihin ra Jesús tyin ña tsitó ra naha yóo tavá tyiñu tsi ra Juan jacoondutya ra tsi nyivi.

<sup>8</sup> Tacan tan ra Jesús catyí ra tsihin ra naha:

—Ndi yuhu, tan ña cua catyí tuhun yu tsihin ndo yóo tavá tyiñu tsi yu tsa javaha yu tyiñu ihya.

*Nu jacuahá ra Jesús tyin tumaa cuvi juhva ra caquiñi naha ra, tacan cuvi ra tsa cua cahñi tsi ra*

(Mt. 21.33-44; Mr. 12.1-11)

<sup>9</sup> Tacan tan tsaç cuenda ra Jesús iin cuhva ihya tsi nyivi:

—Iin ra, tatsj cuaha ra nu ñuhu ra yoho tsiti yucu tsa cua cuvi vinu. Yaha can tan tsaç nuu ra ñuhu can tsi juhva ra jahá tyiñu. Tacan tan naha cuahan ra inga ñuu.

<sup>10</sup> Tan quivi tsa ñiñ tsiti nu yoho can, tacan tan jacuhun ra iin musu tyin naquihin ra juhva tsiti tsa taahan tsi tsi maa ra. Maa tyin cañj xaan ra jahá tyiñu ican naha ra tsi musu can. Tan nundj ra jacunuhj ra naha tsi ra.

<sup>11</sup> Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahān nyaa ra naha tsi ra. Tan jacunuhv ra naha tsi ra. Tan juvin ñi nduve tsa tsaḥā ra naha cuiso ra cunuhu ra.

<sup>12</sup> Tacan tan ra cuví tsitoho yoho can jacuhun nyico ra inga ra. Maa tyin juvin ñi tacan javahā nyico ra naha tsihin ra can. Tan jañicueehē ra naha tsi ra. Tan tava ra naha tsi ra.

<sup>13</sup> "Yahā can tan catyí tsitoho ñuhu ican: "¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqúi cua tyaa yahvi ra naha tsi ra, tyin sehe yu cuví tsi ra", catyí ra.

<sup>14</sup> Maa tyin tsa nyehē ra jahá tyiñu can naha ra tsi ra sehe ra, natuhún tahan ra naha: "Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya", catyí ra naha.

<sup>15</sup> Tacan tan tava ra naha tsi sehe tsitoho ñuhu ican ityi tsata cora, tan tsaḥñi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsaḥñi ra naha sehe ra?

<sup>16</sup> Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuví. Tan catyí ñi:

—¿Ña cuñi Nyoo tahan yo tacan! —catyí ñi.

<sup>17</sup> Maa tyin ra Jesús nanyehē ra nuu ñi tan catyí ra:

—Tun tacan tsicá iñi ndo ¿náa cuñi tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javahā vehe cuatyíñu ra, yacan cuví yuu tsa tsiñi ñuhu ca.

<sup>18</sup> Yóo nyivi cua canacava tsata yuu can, cua tahnu cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

<sup>19</sup> Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuvj iñi ra naha tyin tsa cahān ra Jesús tacan, tsi maa ra naha nañi can. Tan cuñi ra naha tñin ra naha tsi ra tyin cahñi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

*Nu jacuahā ra Jesús tsa cuenda tsa tyahvi nyivi xuhun tsi ra ndacá ñaha ñuu Roma*

(Mt. 22.15-22; Mr. 12.13-17)

<sup>20</sup> Tacan tan jacuhun ra naha tsi juhva ra nducu cuhva tsi ra Jesús. Tan jahā ra naha tyin ra vaha cuví ra naha. Tyin tacan tan coto ra naha náa tsa ña vaha cua cahān ra

Jesús tan cuví tñin ra naha tsi ra. Tan cuhva cuenda ra naha tsi ra tsi ra ndacá ñaha.

<sup>21</sup> Yacan tsicā tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahā un tsa vaha tsi nyivi. Tan ñavin tuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un.

<sup>22</sup> Catyí tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

<sup>23</sup> Tan ra Jesús tuvj iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu?

<sup>24</sup> Janaha jihna ndo iin xuhun tsi yu, na nyehē yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahān ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

<sup>25</sup> Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsi maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

<sup>26</sup> Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñi ra naha tsa nacahān ra. Tan taxin ña cuví ra naha.

*Nu cuñi ra cuví saduceo naha ra jandavi ñaha ra naha tsi ra Jesús*

(Mt. 22.23-33; Mr. 12.18-27)

<sup>27</sup> Tsa yahā can tan tsaā juhva ra cuví saduceo nu nyii ra Jesús. Maa ra naha cuví ra tsa catyí tyin ña nandoto nyivi tun tsa tsihi ñi.

<sup>28</sup> Tacan tan catyí ra naha tsihin ra Jesús:

—Maestro, jandoō ra Moisés tyiñu ihya tyin tatun iin ra tsihi tan nandoō ñasihi ra, tatun nduve sehe ra tsicoō tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.

<sup>29</sup> Maa tyin cuñi ndi coto ndi nácaa, tyin tsicoō iin ra tan tsicoō utsa sehe ra. Tan ra tsa ñihi ca tsicoō ñasihi ra, maa tyin nduve sehe ñi tsicoō, tan tsihi ra.

<sup>30</sup> Tacan tan naquihñin ra tsa tsinu uvi tsi ña can. Tan nduve tucu sehe ñi tsicoō. Tan tsihi tucu ra can.

<sup>31</sup> Tan juvin ñi tacan javahā ra tsinu uñi. Tandihí tsa utsa ra naha javahā tacan. Ndi intuhun ra tan ña tsicoō sehe ra tsihin ña.

<sup>32</sup> Tan nu ndihí tuhun tsihi ndihí maa ña.

<sup>33</sup> Tan cuñi ndi coto ndi yóo ra cua cuví yii ña tsitsi tsa tandihí tsa utsa taahan ra naha quivi cua nandoto nyivi —catyí ra saduceo naha ra.

<sup>34</sup> Tacan tan nacahān ra Jesús, tan catyí ra:

—Ihya nu ñuhu ñayivi, rayi tan ñaha tindahá ñi.

<sup>35</sup> Maa tyin nyivi tsa nacatsj Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha.

<sup>36</sup> Tan nduve tuhun tsiihi iyó ndacan tyin cua cuvi ñi tumaa ángel. Tan cua cuvi ñi sehe Nyoo tyin nandoto ñi.

<sup>37</sup> Tan tsa cuenda tuhun tsa nandoto ndiyi. Tsa nditsa cuvi tsi tyin yacan jacoto ra Moisés nu nacatyj tuhun ra nácaa cayú taca iñu can. Tsihin can jacoto ra tsi yo tyin nyivi tsiihi cua nandoto ñi. Tyin catyj ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyj ra Moisés.

<sup>38</sup> Tacan catyj ra tyin Nyoo, ñavin Nyoo cuenda nyivi tsiihi cuvi ra. Nyoo cuenda nyivi nyito cuvi ra. Tyin tsa cuenda Nyoo tandihi yo tan nyito añima yo vasu tsa tsihi cuñu ñuhu yo —catyj ra Jesús.

<sup>39</sup> Tacan tan juhva ra maestro cuenda ley vehe ñuhu naha ra catyj ra naha:

—Vaha xaan nacahan un, Maestro —catyj ra naha.

<sup>40</sup> Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

*Ra Cristo cuvi ra tata ra David, tan juvin ñi cuvi tucu ra Sehe Nyoo*  
(Mt. 22.41-46; Mr. 12.35-37)

<sup>41</sup> Tacan tan tsicá tuhun ra Jesús tsi ra naha:

—¿Nacuenda catyj yo tyin ra Cristo tata ra David cuvi tsi ra?

<sup>42-43</sup> Tyin juvin ñi maa ra David catyj ra nu libru Salmo:

Caahan Nyoo Jutu yu tsihin Jutu Mañi yu, ra Cristo, tan catyj ra tsihin ra:

“Cunyaaxiin cuaha yu nda cuenda cuhva yu tsi nu xaan iñi tsi un tyin cuhvi tsaha un tsi nahnu”, catyj Nyoo tsa tsatyinñu ra yuhu ra David tahan tsanaha.

<sup>44</sup> ¿Nacaa tsa tata ra David cuvi tucu ra Cristo, tan juvin ñi maa ra David catyj tyin Jutu Mañi ra cuvi tsi ra Cristo? —catyj ra Jesús.

*Nu cahán ra Jesús tyin cuaha xaan cuatyj ra maestro cuenda ley vehe ñuhu iyó*  
(Mt. 23.1-36; Mr. 12.38-40, Lc. 11.37-54)

<sup>45</sup> Tandihi nyivi tsiñi ñi tsa cahán ra Jesús tsihin ra tsicá tsihin ra nu cahán ra tyehen:

<sup>46</sup> —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahan xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyivi yucú nuyahvi nacumi tsi ra naha tsihin tsa jaha ñi tsa ñayivi tsi ra naha. Tan nanducú ra naha tyayu vaha cunyecu ra naha tsitsi vehe ñuhu, tan nu cuahan ra naha vico.

<sup>47</sup> Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyivi tan catyj ñi tyin vaha xaan nyivi cuvi ra naha. Maa tyin juvin ñi maa ra naha cuvi ra quinyaá vehe ñi ndaahvi tsa tsihi yñi tyin ña cuvi tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyj ra Jesús.

## 21

*Tsa jamañi iin ñaha ndaahvi tsa tsihi yñi*  
(Mr. 12.41-44)

<sup>1</sup> Tan nyehe ra Jesús tyin cuaha xaan nyivi cuca tyihí ñi xuhun tsitsi caja tsa nyii tsitsi vehe ñuhu cahnu.

<sup>2</sup> Tan nyehe tucu ra tsi iin ñaha ndaahvi tsa tsihi yñi. Tan tyihí ña uvi taahan ñi xuhun nyihi.

<sup>3</sup> Tan catyj ra:

—Tsa nditsa catyj yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihi ñi cuca can.

<sup>4</sup> Tyin tsa ndoo ña tyihí ñi. Tan ñaha ihya tyihí ña tandihi tsa iyó tsi ña —catyj ra.

*Nu cahán ra Jesús tyin cua tani vehe ñuhu cahnu*

(Mt. 24.1-2; Mr. 13.1-2)

<sup>5</sup> Tacan tan juhva nyivi natuhún ñi tuhun cuenda vehe ñuhu cahnu ican. Tan catyj ñi tyin sii xaan caá yuu. Tan sii xaan caá tsa jamañi nyivi. Tacan tan catyj ra Jesús:

<sup>6</sup> —Coo quivi tan cua tani tandihi tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua caní nu xaan iñi tsi ndo.

*Tsa cua cuvi tsa ndi cumañi ca naa ñuhu ñayivi*

(Mt. 24.3-28; Mr. 13.3-23)

<sup>7</sup> Tacan tan nducú tuhun nyivi tsi ra Jesús, tan catyj ñi:

—Maestro, ¿ama cua cuvi tandihi tsa caahan un ihya? ¿Nacaa tan coto ndi tatun tsa cuyatyin tsa naa ñuhu ñayivi? —catyj ñi.

<sup>8</sup> Tacan tan catyj ra Jesús:

—Jaha vaha ndo cuenda, coto jandavi ñaha nyivi tsi ndo. Tyin cuaha xaan ra cua quitsi, tan cua cuatyinñu ra naha sivi yu, tan cua catyj ra naha: “Yuhu cuvi Cristo, ra tsa jaquitsj Nyoo. Tyin tsa cuñi naa ñuu ñayivi”, cua catyj ra. Maa tyin ña cunyicun ndo tsi ra naha.

<sup>9</sup> Tan quivi cua ñihi tuhun ndo tyin tsa iyó cuatyj tan ñihi cañi tahan nyivi, ña nayuhvi ndo. Tyin tandihi can taahan tsi cuvi tsa jihna ñi. Maa tyin cumañi ca tsa quivi tsa cua naa ñuhu ñayivi.

<sup>10</sup> Tan catyj tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuatyj.

<sup>11</sup> Tan ñihi xaan cua taan. Tan cua coo tama. Tan cua coo cuehe tandihi ñi ityi. Tan

cua nyehe nyivi tsa yuuhvi ityi andivi. Tan cuaha xaan tsa iyo nahu tsa ña tuhvá nyivi nyehe tan cua nyehe ñi.

<sup>12</sup> Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihi ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu.

<sup>13</sup> Tacan tan cuví cahan ndo tuhun yu tsihin ñi.

<sup>14</sup> Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican.

<sup>15</sup> Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nuu cua cahan ndo. Ndi intuhun nu xaan iñi tsi ndo tan ña cuvi jaha nahnu tsi ndo.

<sup>16</sup> Maa tyin nyivi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cahñi nyivi tsi ndo.

<sup>17</sup> Tandihí nyivi tan ndasi cua cuñi ñi nyehe ñi tsi ndo tsacatyí yuhu.

<sup>18</sup> Maa tyin ndi intuhun ixi jiñi ndo tan ña cua cunaa.

<sup>19</sup> Tatun ña ndu uvi iñi ndo tsa nyicun ndo tsi yu, cua cacu ndo.

<sup>20</sup> Quivi cua nyehe ndo tyin ni canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya.

<sup>21</sup> Tan nyivi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya.

<sup>22</sup> Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuví tandihí cuhva catyí nu tutu Nyoo.

<sup>23</sup> Tan ndahvi ñiñaha tsa ñuhu sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnú xaan tsa uhvi cua nyehe nyivi ñuu Jerusalén ihya cua jaha Nyoo.

<sup>24</sup> Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

*Nacaa cua quitsi Rayi tsa quee nda gloria inga tsaha*

(Mt. 24.29-35, 42-44; Mr. 13.24-37)

<sup>25</sup> Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu.

<sup>26</sup> Tan cua cúu naaha ñi tsihin tsa yuuhvi ñi tsa tsicá iñi ñi náa ndihí tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan.

<sup>27</sup> Tacan tan cua nyehe ñi tsi yuhu, Rayi tsa quee nda gloria, vatsi nuu yu tsitsi vico tsihin tunyee iñi Nyoo, tan tsihin tsa cahnú cuví ra.

<sup>28</sup> Tan cuhva tsa cua quitsaha yacan tan jandu iin ndo iñi ndo tan cusii iñi ndo tyin numi xaan cua cacu ndo —catyí ra.

<sup>29</sup> Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihí ca yutun.

<sup>30</sup> Tatun tsa nduyutyá numa tun tsa cuy-  
atyin cuun savi.

<sup>31</sup> Tan tacan tucu nyooho, tatun tsa nyehe ndo tyin tsa quitsaha cuví tandihí tsa cahan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

<sup>32</sup> Maa tyin tsa nditsa catyí yu tsihin ndo tyin yacan cua cuví jihna tsa ndi cumañi ca cúu nyivi tsa iyó nu ñuhu ñayivi.

<sup>33</sup> Coo quivi cua naa andivi tan ñuhu ñayivi, maa tyin tuhun caahán yu, ña cua cundihí tsi.

<sup>34</sup> Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo.

<sup>35</sup> Tyin tacan cua cuvi, tandihí nyivi iyó nu ñuhu ñayivi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi.

<sup>36</sup> Maa tyin nyooho cuatu ndo. Ndacan tahvi ndo tsi Nyoo tandihí quivi, na jacacu ra tsi ndo. Tan ña nyehe ndo tandihí tundoho tsa cua coo. Ndacan tahvi ndo, tacan tan cua cuvi tsa ndo nu nyaá yuhu, Rayi tsa quee nda gloria —catyí ra Jesús.

<sup>37</sup> Tan tandihí quivi jacuahá ra Jesús tsi tandihí nyivi tsitsi vehe ñuhu cahnú. Tan tsa tsacuaa tsicá ra yucu Olivo.

<sup>38</sup> Tan tandihí nyivi tsáá ñi tsitsi vehe ñuhu cahnú ndihí tsa tuvi, tyin tyaa soho ñi tsa caahán ra.

## 22

*Nu cua xico ra Judas Iscariote tsi ra Jesús Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Tan tsa nyanaá yatyin quivi tsa cua coo vico pascua, vico nu tuhvá nyivi tsatsi paan tsa nduve yutsan iya yihí.

<sup>2</sup> Tan ra jutu tsa cuví ityi nuu naha ra tsihin ra maestro cuenda ley vehe ñuhu naha

ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyívi.

<sup>3</sup> Tacan tan quihví nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús.

<sup>4</sup> Tan nu ihya, tsahan nu tsicahan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha.

<sup>5</sup> Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas.

<sup>6</sup> Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

*Nu cuxiñi ra Jesús tsihin ra tsicá tsihin ra (Mt. 26.17-29; Mr. 14.12-25; Jn. 13.21-30; I Co. 11.23-26)*

<sup>7</sup> Tan tsaá quivi tsa cuví vico tsa tsatsi nyivi paan tsa nduve yutsan iya yihí. Tan juvin ñi quivi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti.

<sup>8</sup> Tan ra Jesús jacuhun ra tsi ra Pedro tsihin ra Juan, tan catyi ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyi ra.

<sup>9</sup> Tacan tan nducú tuhun ra naha tsi ra:  
—¿Numaa cuñi un javaha ndi tsa cuxiñi yo? —catyi ra naha.

<sup>10</sup> Tacan tan catyi ra Jesús tsihin ra naha:  
—Cuaahan ndo tsitsi ñuu. Ican cua nañihí ndo tsi iin ra nyisó iin quivi ndutya. Cuaahan ndo tsata ra tan quihví ndo vehe nu quihví ra.

<sup>11</sup> Tan catyi ndo tsihin tsitoho vehe can: “Ra cuví Maestro, cuñi ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyi ndo tsihin ra.

<sup>12</sup> Tacan tan cua janaha ra iin cuarto cahnu ityi síqui, nu tsinu uvi pisu tsi ndo. Tan tsa nduvahá maa tsi. Tan ndacan cua javaha ndo tsa cuxiñi yo —catyi ra tsihin ra naha.

<sup>13</sup> Tacan tan cuahán ra naha. Tan nañihí ra naha tandihí tumaa tsa cahán ra Jesús. Tacan tan na icá vaha ra naha tsa cuxiñi ra naha cuenda vico pascua.

<sup>14</sup> Tacan tan tsa taahan tsi cuhva tsa cuxiñi ra Jesús tsihin tandihí ra tavá tyiñu ra, tsinyecú ra naha yuhu mesa.

<sup>15</sup> Tacan tan catyi ra Jesús:  
—Cuñi xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu.

<sup>16</sup> Tan catyi yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyi ra.

<sup>17</sup> Tacan tan quihñin ra iin vasu vinu. Nacuhvá ra tyahvi nyoo tsi Nyoo. Yaha can tan catyi ra tsihin ra nyecú tsihin ra:

—Quihñin ndo tsehe. Tan coho ndo luxu luxu.

<sup>18</sup> Tyin catyi yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyi ra.

<sup>19</sup> Yaha can tan quihñin ra paan, tan tsaha ra tyahvi nyoo tsi Nyoo, tan tsahnyá sava ra can. Tsahan tsaha ra can tsi ra naha. Tan catyi ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñi tsi nducuhun iñi ndo tsi yu tan cuxiñi ndo tyehen —catyi ra.

<sup>20</sup> Tan tsa yaha cuxiñi ra naha, tacan tan quihñin ra vasu vinu, tan catyi ra:

—Tsihin vinu ihya ndoo Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa ñiñi yu cuví tsi. Tan tsa vaha tsi nyooho tan cua cati ñiñi yu. Tan cua cúu yu.

<sup>21</sup> “Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya.

<sup>22</sup> Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin ñdahvi ra tsa cua nacuhva cuenda tsi yu! —catyi ra Jesús.

<sup>23</sup> Tacan tan ra tsicá tsihin ra Jesús quitsaha nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

*Nu cahán yuhu tahan ra tsicá tsihin ra Jesús, yoo ra cahnu ca cuví*

<sup>24</sup> Yaha can tan quitsaha caahán yuhu tahan ra tsicá tsihin ra Jesús, ndáa ra cahnu ca cuví.

<sup>25</sup> Tan ra Jesús catyi ra:  
—Tsitó nyooho tyin ra ndacá ñaha tsi nyivi iyó nu ñuhu ñayivi, ñiñi xaan ndacá ñaha ra naha tsi ñi. Tan cuñi ra naha tyin catyi nyivi tyin jatyinyeé ra naha tsi ñi.

<sup>26</sup> Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñi ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñi ndo cundaca ñaha ndo, cuñi tsi tsa cuví ndo musu tandihí ndo.

<sup>27</sup> Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

<sup>28</sup> Tan nyooho cuví ndo tsa nyecú tshin yu tandíhi nu nyehe yu tundoho.

<sup>29</sup> Yacan cuenda, yuhu tsaha yu iin nu cua cundaca ñaha ndo tumaa tsa tsaha Jutu yu tsa cundaca ñaha yu.

<sup>30</sup> Tyin cua catsi ndo tan cua coho ndo nu mesa tshin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

*Nu caahán ra Jesús tyin cua catyí ra Pedro tyin ña nacoto ra tsi ra*

(Mt. 26.31-35; Mr. 14.27-31; Jn. 13.36-38)

<sup>31</sup> Tacan tan catyí ra Jesús tshin ra Pedro: —Nyehe vaha un, yooho Simón. Tyin nu ña vaha tsa tsican ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo.

<sup>32</sup> Maa tyin tsican tahvi xaan yu tsi ra tsa cuenda un, na ña jandíhi un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandíhi ra naha tsa tsinú iñi ra naha tsi yu —catyí ra Jesús tshin ra Simón.

<sup>33</sup> Tan ra Simón catyí ra tshin ra: —Jutu Mañi yu, tsa ndú iin vaha iñi yu tsa cuhun yu tshin un vasu vehe caa, vasu cúu yu tshin un —catyí ra.

<sup>34</sup> Tacan tan catyí ra Jesús tshin ra: —Pedro, catyí yu tshin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tshin ra.

*Nu tsa cuñí tsa cuhva tsa cua nacuhva cuenda ra Judas tsi ra Jesús*

<sup>35</sup> Tacan tan tsica tuhun ra Jesús tsi ra tsicá tshin ra tan catyí ra tshin ra naha:

—Nducuhun iñi ndo quivi tsa jacuhun yu tsi ndo tsa cahán ndo tshin nyivi, tan nduve tsa tsindahá ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

<sup>36</sup> Tacan tan catyí ra Jesús tshin ra naha: —Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

<sup>37</sup> Tyin catyí yu tshin ndo, tyin tandíhi tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandíhi tsa catyí tsi tsa cuenda yu cua cundaa tsi —catyí ra.

<sup>38</sup> Tacan tan catyí ra tsicá tshin ra: —Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

*Nu tsican tahvi ra Jesús tsi Nyoo nda Getsemani*

(Mt. 26.36-46; Mr. 14.32-42)

<sup>39</sup> Tacan tan quitá ra Jesús vehe nu nyii ra. Tan cuahán ra yucu Olivo, cuhva tuhvá maa ra tsicá. Tan ra tsicá tshin ra cuahán ra naha nyicún ra naha tsi ra.

<sup>40</sup> Tan tsa tsaá ra naha ndacan, catyí ra tshin ra naha:

—Ndacan tahvi ndo tsi Nyoo tyin tacan tan ña cuví jaha canaa nu ña vaha tsi ndo.

<sup>41</sup> Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsi ra. Tan quitsaha caahán ra tshin Nyoo,

<sup>42</sup> tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuví cuhva cuñi maa yu. Na cuví cuhva cuñi maa un —catyí ra Jesús.

<sup>43</sup> Tacan tan quituví iin ángel Nyoo, tyin cuhva ra tunyee iñi tsi ra Jesús.

<sup>44</sup> Tan tsitsi tsa nyehé xaan ra Jesús tundoho tsa cuihaya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñiñi.

<sup>45</sup> Tacan tan nduvitá ra tsa ndihí cahán ra tshin Nyoo. Tan cuahán nyico ra nu yucú ra tsicá tshin ra. Tan nyehe ra tyin quixí ra naha, tsa cuenda tsa cuihaya xaan cuñi ra naha, ña cunyeé iñi ra naha ñumaahna tan quixí ra naha.

<sup>46</sup> Tacan tan catyí ra Jesús tshin ra naha: —¿Nacuenda quixí ndo? Nduvita ndo. Tan ndacan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

*Nu tsaha cuenda ra Judas tsi ra Jesús tsi nu xaan iñi tsi ra*

(Mt. 26.47-56; Mr. 14.43-50; Jn. 18.2-11)

<sup>47</sup> Ndi caahán ca ra Jesús yacan, tan tsaá cuaha ra catsaá. Tan ityi nuu, vatsí nu Judas, iin ra tsicá tshin ra Jesús. Tan natuhva nu nu nyaá ra Jesús tyin tyayuhu nu tsi ra.

<sup>48</sup> Tacan tan cahán ra Jesús tshin nu: —Yooho Judas, ¿a tshin tsa cua tyayuhu un tsi yu, tan cua nacuhva cuenda un tsi yuhu Rayi tsa quee nda gloria tsi nu xaan iñi tsi yu nahnu? —catyí ra Jesús.

<sup>49</sup> Tan ra nyecú tshin ra Jesús quitsaha nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tshin mityi? —catyí ra naha.

<sup>50</sup> Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

<sup>51</sup> Maa tyin ra Jesús catyí ra tshin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahá ra itsi.



<sup>52</sup> Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsaḥan tsiñin tsi ra Jesús. Tan catyí ra Jesús tsihin ra naha:

—¿A vatsí tñin ndo tsi yu tumaa tñin ndo iin ñasuhu? tyin ndaha ndo mityi tan yutun.

<sup>53</sup> Ndihi quivi tsinyij yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaá cuhva tsa ndunaá tyin nu ña vaha ndacá ñaha. Yacan cuenda vatsí tñin ndo tsi yu.

*Nu caḥan ra Pedro tyin ña nacotó ra tsi ra Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Tacan tan tñin ra naha tsi ra Jesús. Tan tsindacá ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyicún ra.

<sup>55</sup> Tan tsa tsaá ra naha vehe ra jutu tsaahnu tsa cuví ityi nuu, jataḥan ra tsa cuví musu naha ra ñuhu nuquehe. Tan tsinyecu ra naha tani canduvi nu cayú ñuhu can. Tan tsinyaá ndihi ra Pedro tyañu ra naha.

<sup>56</sup> Tan tsa ndunditsin tsa cayú ñuhu ican, tacan tan iin ñaha tsa cuví musu jutu can, nyehé ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

<sup>57</sup> Maa tyin ra Pedro catyí ra:

—Yuhu ña nacotó yu tsi ra can.

<sup>58</sup> Tañi ñi tan nyehé tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

<sup>59</sup> Tan tsa yaha iin hora, tan nyehé tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

<sup>60</sup> Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacu ñi iin tsi-tooho.

<sup>61</sup> Tacan tan ra Jesús nanyehé ra nuu ra Pedro. Tan ra Pedro nducuhun iñi ra tsa caḥan ra Jesús tsihin ra: “Tsa ndi cumañi ca navacu tsi-tooho, yooho tsa cahan un uñi tsaha tyin ña nacotó un tsi yu.”

<sup>62</sup> Tacan tan quitá ra Pedro ityi tsata vehe. Tan tsacu xaan ra tsa cuiihya cuñi ra.

*Nu tsacu nducu nyaa ra naha tsi ra Jesús tan cañi ra naha tsi ra*

(Mt. 26.67-68; Mr. 14.65)

<sup>63</sup> Tacan tan ra jahá cuenda tsi ra Jesús, quitsahá tsacú nducu ra naha tsi ra. Tan cañi ra naha tsi ra.

<sup>64</sup> Tsañij ra naha jahma nuu ra, tan quitsahá cañi ra naha nuu ra. Tan catyí ra naha tsihin ra:

—Ñacoto yoo ra cañi tsi un —catyí ra naha tsihin ra.

<sup>65</sup> Tan cuaha xaan ca maa tsa caḥan nyaa ra naha tsi ra.

*Nu tsicá tuhun mandoñi naha ra tsi ra Jesús tatun Sehe Nyoo cuví tsi ra*

(Mt. 26.59-66; Mr. 14.55-64; Jn. 18.19-24)

<sup>66</sup> Tan tsa cunditsin inga quivi, tan ndu iin ra cuví mandoñi tsañu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

<sup>67</sup> —Catyí tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahán ra tan catyí ra:

—Tatun catyí yu tsihin ndo tyin juvin yu cuví, ña cua tsinu iñi ndo tsa cahan yu.

<sup>68</sup> Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu.

<sup>69</sup> Maa tyin vityin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihi tunyee iñi —catyí ra Jesús.

<sup>70</sup> Tacan tan tandihi ra naha tsicá tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahán ra Jesús tan catyí ra:

—Juvín, sehe Nyoo tsi yu tumaa catyí maa ndo.

<sup>71</sup> Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa caḥan ra —catyí ra naha.

## 23

*Nu nyehé ra Pilato tyin nduve cuatyí ra Jesús*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Tacan tan nduvitá tandihi ra naha. Tan tsindacá ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma].

<sup>2</sup> Tacan tan quitsahá tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví

ra Cristo, ra tsa jaquitsj Nyoo tyin cuvi ra rey —catyí ra naha tsihin ra Pilato.

<sup>3</sup> Tacan tan ra Pilato tsicā tuhun ra tsi ra Jesús:

—¿A yooho cuví Rey cuenda nyívi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

<sup>4</sup> Tacan tan catyí ra Pilato tsihin ra jutu tsa cuví ityi nuu naha ra, tan tsihin nyívi:

—Nduve cuatyí ra ihya —catyí ra tsihin ñi.

<sup>5</sup> Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyívi. Tsa jlhna ñi quitsahā caahán ra tsihin nyívi iyó ñuu tsa cayucú Galilea. Tan naní ityi vatsí ra, jacuahá ra tsi nyívi. Tan vityin tsa tsag ra Judea ihya tan juvín ñi yacan javahá ra —catyí ñi.

*Nu jacuhun ra Pilato tsi ra Jesús nu nyaá ra Herodes, ra cuví rey nyívi iyó Galilea*

<sup>6</sup> Cuhva tsa tsiñí ra Pilato yacan, tan nducú tuhun ra tatun ra Galilea cuví ra Jesús.

<sup>7</sup> Tan catyí nyívi tsihin ra tyin juvín. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quívi can nyíi ra ñuu Jerusalén.

<sup>8</sup> Tan kuhva tsa nyehe ra Herodes tsi ra Jesús, síi xaan cuñí ra. Tyin tsanaha xaan cuñí ra nyehe ra tsi ra. Tyin ñihí tuhun ra tyin cuaha xaan tsa iyo javahá ra. Tan cuñí xaan ra nyehe ra iin tsa iyo tsa cua javaha ra Jesús.

<sup>9</sup> Tan cuaha xaan tsa nducú tuhun ra Herodes tsi ra Jesús. Maa tyin ra Jesús ña nacahan maa ra.

<sup>10</sup> Ican nycú ndihí tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaa xaan ra naha cuatyí tsi ra Jesús.

<sup>11</sup> Tacan tan ra Herodes tsihin andaru cuenda ra, tsacú nducu ra naha tsi ra. Tan jacunditsj nuu ra naha iin jahma yahvi tan síi caá tsi ra Jesús, tumaa caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato.

<sup>12</sup> Tan quívi can ra Pilato tsihin ra Herodes nduhahā iyó ra naha. Tyin nu quitsj quívi, ña cuví nyehé tahan ra naha tsi ra naha.

*Nu cutuñi ra Jesús tyin cua cúu ra*  
(Mt. 27.15-26; Mr. 15.6-15; Jn. 18.39-19.16)

<sup>13</sup> Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihí nyívi.

<sup>14</sup> Tan catyí ra tsihin ñi:

—Nyooho quitsj ndaca ndo tsi ra ihya nu nyaá yu. Tan catyí ndo tyin jatívi ra tsi nyívi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa kuhva cahan ndo can nañihí yu.

<sup>15</sup> Tan ndi ra Herodes tan ña nañihí ra ndi intuhun cuatyí ra. Yacan jaquitsj nyico ra tsi ra inga tsaha nu nyaá yu. Nyehe ndo tyin nduve cuatyí ra. Tan yacan ña taahán tsi tsa cúu ra.

<sup>16</sup> Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

<sup>17</sup> Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá.

<sup>18</sup> Maa tyin tandihí nyívi iin caa ñi canā tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

<sup>19</sup> Tan ra Barrabás can nyíi ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyívi.

<sup>20</sup> Tan ra Pilato cuñí ra jaña ra tsi ra Jesús. Tan quitsahā caahán ra tsihin nyívi can inga tsaha tyin cua jaña ra tsi ra.

<sup>21</sup> Maa tyin nyívi tsaa ca canā tsaa ñi:

—¡Tyaa tsi ra nu cruu. Na cúu ra nu cruu!

<sup>22</sup> —¿Náa tsa ña vaha javahā ra ihya? Tan nyehe yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

<sup>23</sup> Maa tyin nyívi canā tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñí ñi tyin canā tsaa xaan ñi.

<sup>24</sup> Tacan tan javahā ra Pilato kuhva cahan ñi.

<sup>25</sup> Tan jaña ra tsi ra Barrabás, ra tsa nyíi vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyívi. Tan nacuhva cuenda ra Pilato tsi ra Jesús tsi ñi kuhva cuñí maa ñi.

*Nu tyaa ra naha tsi ra Jesús nu cruu*  
(Mt. 27.32-44; Mr. 15.21-32; Jn. 19.17-27)

<sup>26</sup> Tacan tan quihín andaru tsi ra Jesús. Tan cuahán ra tsihin ra naha. Tan tñín tucu ra naha tsi iin ra ñuu Cirene nañi Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

<sup>27</sup> Tan cuaha xaan nyívi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihaya cuñí ñi tsacatyí tundoho tahan ra.

<sup>28</sup> Maa tyin ra Jesús nanyehe ra nuu ñi. Tan catyí ra tsihin ñi:

—Tandihi nyooho, ñiñaha ñuu Jerusalén ihya, ña vacu ndo tsacaty yuhu. Vacu ndo, tsacaty maa ndo tan tsacaty sehe ndo.

<sup>29</sup> Tyin cua quitsi quivi cua nyehé xaan ndo tundoho. Tan cua cahan nyivi tsi tandihi ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoq tyin cuaha xaan tundoho nyehé yo vityin”, cua catyí ñi tsihin ndo.

<sup>30</sup> Tyin quivi can cua cuñi ñi nduva yucu tsata ñi tan quihvi xeehe ñi.

<sup>31</sup> Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityí —catyí ra Jesús tsihin ñiñaha ñuu Jerusalén can.

<sup>32</sup> Tan quihñin tucu andaru can naha ra tsi uvi taahan ra iyó cuatyí, tyin cahñi ndihi ra naha tsi ra naha iin caa ñi tsihin ra Jesús.

<sup>33</sup> Tacan tan tsaq ra naha iin nu nañi Yiqui Jiñi Ndiyi. Tan ican tyaq ra naha tsi ra Jesús nu cruu. Tan tacan tyaq ndihi tucu ra naha tsi nduvi taahan ra iyó cuatyí can naha ra. Iin ra tyaq ra naha nuu cruu xiin cuaha ra Jesús. Tan inga ra can tyaq ra naha nuu cruu xiin satyin ra.

<sup>34</sup> Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tavá ra naha suerte tsihin jahma ra Jesús, tyin nyehé ra naha ndáa ra cua jaha canaa jahma can.

<sup>35</sup> Tan nyivi nyecú ñi nyehé ñi. Tan ra cumi tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsj Nyoo, cuví ra —catyí ra naha.

<sup>36</sup> Tan juvin ñi cahañ nyaá ra andaru can naha ra tsi ra. Tan natuhvá ra naha nu ticaá ra. Tan tsañá ra naha vinu iya tsihi ra.

<sup>37</sup> Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

<sup>38</sup> Tan jiñi cruu nu nyaá ra Jesús nyaá iin tsa tyaq ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

<sup>39</sup> Tan iin ra tsa iyó cuatyí tsa nyaá nu cruu xiin ra Jesús, quitsahá caahán nyaá ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihi tsi nyuhu —catyí ra can.

<sup>40</sup> Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin.

<sup>41</sup> Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

<sup>42</sup> Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

<sup>43</sup> Tacan tan ra Jesús nacahañ ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añima nyivi tsinú iñi tsi Nyoo] —catyí ra Jesús tsihin ra.

*Nu tsihi ra Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Tacan tan cuhva ora quitsahá ndunaá nu ñuhu ñayivi, nda cuanda caa uñi tsa tseñi.

<sup>45</sup> Tyin ndunaq ñicanyii. Tan jahma tsa ticaá tsitsi vehe ñuhu cahnu, ndatá sava tsi.

<sup>46</sup> Tacan tan caná tsa ra Jesús tan catyí ra:

—Tyatya, Jutu yu, tyaá cuenda yu añima yu ndaha un —catyí ra.

Tan cuhva tsa cahañ ra tacan, tan tsihi ra.

<sup>47</sup> Tan ra cuví capitán cuenda andaru can naha ra, nyehé ra tandihi tsa cuví. Tan jacahnú ra tsi Nyoo, tan catyí ra:

—Nduve tsa cuí cuatyí ra ihya tsicoq —catyí ra.

<sup>48</sup> Tan tandihi nyivi tsa nyecú ican, nyehé ñi tsa cuví. Tan cuahán ñi tan quitsahá cañi ndaha ñi yiqui nyica ñi. Tyin tsitó ñi tyin ña vaha tsa javahá ñi tsihin ra Jesús.

<sup>49</sup> Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehé ñi tandihi tsa cuví can.

*Nu cua cutsi ra naha tsi ra Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Tan iyó iin ra vaha, nañi ra José. ra ñuu Arimatea tsa canyí Judea. Tan cuví ra iin ra cuví ityí nuu cuenda Junta Cahnu nyivi Israel.

<sup>51</sup> Tan ra José can ndatú ra quivi tsa cua cundaca ñaha Nyoo. Tan ña ndoq ra vaha tsihin tsa javahá ra cutahán tsihin ra, ra cuví jutu tsa cuví ityí nuu naha ra.

<sup>52</sup> Tacan tan tsañan ra José can tsindacañ ra cuñu ñuhu ra Jesús tsi ra Pilato.

<sup>53</sup> Tan yahá tsa januy ra José can cuñu ñuhu ra Jesús nu cruu, cavá nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsaá tsa cuví yavi yuu tsa javahá nyivi tan ñaha ca quihvi ndiyi tsitsi can.

<sup>54</sup> Tan viernes cuví can, quivi tsa janduvahá nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

<sup>55</sup> Tan tandihi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyii cuñu ñuhu ra.

<sup>56</sup> Tan cuanuhu ñi nda yuvehe ñi. Tan janduvaha ñi ndutya tami tyin cua tyihi ñi cuñu ñuhu ra Jesús. Tacan tan quitaty ñi inga quivi can tumaa catyí maa tuhun tsa tshah cuenda Nyoo tsi yo.

## 24

*Nu nandoto ra Jesús*

*(Mt. 28.1-10; Mr. 16.1-8; Jn. 20.1-10)*

<sup>1</sup> Tsa tuví tuminga quivi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvaha ñi.

<sup>2</sup> Tan cuhva tsa tsaq ñi, nyehe ñi tyin tsa cuatsiyo yuu tsa ndasí yuhu ñaña can.

<sup>3</sup> Tan quihví ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús.

<sup>4</sup> Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituví uvi taahan rayi nuu ñi. Tan xiñu xaan jahma nditsí ra naha.

<sup>5</sup> Tan tsihin tsa yuuhví ñi, tan tsaquín ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi?

<sup>6</sup> Nduve ca ra nyii ihya, tyin tsa nandoto ra. Nducuhun iñi ndo tsa cahán ra tsihin ndo quivi tsicá ra Galilea.

<sup>7</sup> Catyí ra tyin taahán tsi nacuhva cuenda nyivi tsi ra ndaha ra iyó cuatyí naha ra. Tyin cuví ra Rayi tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quivi cua nandoto ra. Tacan catyí ra tsihin ndo —catyí ángel can naha ra tsihin ñi.

<sup>8</sup> Tacan tan nducuhun iñi ñi tsa cahán ra Jesús quivi can.

<sup>9</sup> Tan cuanuhu ñi. Tan nacatyí tuhun ñi tsihin tsa utsi iin ra tsa tava tyiñu ra Jesús tan tsihin tandihi ca nyivi tsa tsinyicun tsi ra.

<sup>10</sup> Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha.

<sup>11</sup> Maa tyin ra tava tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

<sup>12</sup> Maa tyin ra Pedro nduvitá ra tan tsinú xaan ra cuahán ra cua nyehe ra tsitsi ñaña nu tinyii ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasí ña ra canyii nda sava. Tacan tan cuanuhu ra yuvehe nu yucú tandihi ca ra naha. Tan iyo xaan cuñi ra tsa cuví.

*Tsa cuví ityi cuahán ñuu Emaús*  
*(Mr. 16.12-13)*

<sup>13</sup> Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén.

<sup>14</sup> Tan cuahán ra naha tan natuhún tahan ra naha náa ndihi tsa cuví.

<sup>15</sup> Tan tsitsi tsa natuhún ra naha, tan ra Jesús tshah ra tsi ra naha ityi cuahán ra naha.

<sup>16</sup> Maa tyin vasu nyehe ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús.

<sup>17</sup> Tacan tan nducú tuhun ra Jesús tsi ra naha:

—¿Náa natuhún xaan ndo? ¿Nacuenda cui-ihya xaan cuñi ndo? —catyí ra tsihin ra naha.

<sup>18</sup> Tan iin ra tsa nañi Cleofas nacahán ra tan catyí ra:

—Tandihi nyivi tsitó tsa cuví ñuu Jerusalén. ¿A ra inga ñuu cuví yoocho tyin ña tsitó un tsa cuví? —catyí ra.

<sup>19</sup> Tacan tan catyí ra Jesús tsihin ra naha:

—¿Náa cuví?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan tsihin tunyee iñi cahnu Nyoo javaha ra tsa cahnu tan cahán ra tsa vaha nuu Nyoo tan nuu tandihi nyivi.

<sup>20</sup> Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tshah cuenda ra naha tsi ra tsi ra ndacá ñaha cuenda ñuu Roma. Tan tshahñi ra naha tsi ra. Tan tsihi ra nu cruu.

<sup>21</sup> Tan vityin tsa quitá uñi quivi tsa cuví yacan. Tan nyuhu cuñi maa ndi tyin juvín ra ca jaccu tsi yo tsa cuví yo nyivi Israel.

<sup>22</sup> Maa tyin vityin iyo xaan cuñi ndi tsa nacatyí juhva ñiñaha tsihin ndi. Tyin maa ñi tshahñi ñi nu ñaña ra tsa tuví.

<sup>23</sup> Tan nduve ca cuñu ñuhu ra canyii. Tan nacatyí tuhun ndihi ñi tyin nyehe ñi uvi taahan ángel. Tan catyí ángel can naha ra tsihin ñi tyin ra Jesús nyito ra.

<sup>24</sup> Yaha yacan tan tshahñi tucu juhva ra cutahán tsihin ndi tsinyehe ra naha nu ñaña. Tan nyehe ra naha tyin tsa nditsa cuví tsa cahán ñiñaha can. Maa tyin ña nyehe ra naha tsi ra Jesús —catyí ra naha tsihin ra Jesús.

<sup>25</sup> Tacan tan catyí ra Jesús tsihin ra naha:

—Luxu xaan cutuñi iñi ndo. Tan cuee xaan tan tsinu iñi ndo tuhun tsa cahán ra cuví ndusu yuhu Nyoo tshah tshanaha.

<sup>26</sup> ¿A ña tsitó ndo tyin taahán tsi tsa nyehe jihna ra Cristo tundoho? Yaha can tan tshah tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

<sup>27</sup> Tacan tan quitsahā tsahá cuenda ra nácaa cuahán tuhun maa ra nu tutu Nyoo. Tan quitsahā caahán ra tuhun tsa tyaā ra Moisés tahañ tsanaha. Tan yaha can tan cahān ra tuhun tandihí libru tsa tyaā ra cuví ndusu yuhu Nyoo.

<sup>28</sup> Tan cuhva tsa tsaā ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

<sup>29</sup> Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñicananyí —catyí ra naha.

Tacan tan cuahán ra Jesús tsihin ra naha.

<sup>30</sup> Tan cuhva tsa tsinyaā ra yuhu mesa tsihin ra naha, quihñ ra paan. Tan tsahā ra tyahví nyoo tsi Nyoo. Tan tsahnū sava ra, tan tsahā ra tsi ra naha.

<sup>31</sup> Tan iin yaha ñi nuñā nuu ra naha tan nacoto ra naha tsi ra Jesús. Maa tyin ra Jesús naā ihñi ñi ra.

<sup>32</sup> Tacan tan quitsahā natuhún tahan ra naha tan catyí ra naha:

—Yacan cuenda vaha xaan cuñi añima yo tsa vatsí ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

<sup>33</sup> Ña ndatu ca ra naha, tan cuanuhu ra naha nda ñuu Jerusalén. Tan ñihí tahan ra naha tsihin tsa utsi iin ra tsa tavā tyiñu ra Jesús, ndu iin ra naha tsihin juhva ra nyecú tsihin ra naha.

<sup>34</sup> Tacan tan tsa utsi iin ra can naha ra nacatyí tuhun ra naha tsihin ra tsa ndi tsaā can naha ra:

—Nditsa tyin Jutu Mañi yo nandoto ra. Tyin ra Simón nyehé ra tsi ra —catyí ra naha.

<sup>35</sup> Tacan tan ra tsa ndi tsaā can nacatyí tuhun ndihí ra naha nácaa natuhun ra Jesús tsihin ra naha ityí cuahán ra naha ñuu Emaús, tan nácaa nacoto ra naha tsi ra nu tsahnū sava ra paan.

*Nu quituví ra Jesús nu yucú ra tsicā tsihin ra*

(Mt. 28.16-20; Mr. 16.14-18; Jn. 20. 19-23)

<sup>36</sup> Ndi natuhún ca ra naha yacan tan quituví ra Jesús tyañu ra naha. Tan tsahā ra nacumí tsi ra naha, tan catyí ra:

—Na coo tsa vaha añima ndo.

<sup>37</sup> Tacan tan nayuhví xaan ra naha. Tan cuñi ra naha tyin tatyí ndiyí cuví can.

<sup>38</sup> Tacan tan catyí ra Jesús tsihin ra naha:

—¿Nacuenda yuuhví xaan ndo? ¿Tan nacuenda tsicá xaan iñi ndo?

<sup>39</sup> Nyehé ndo ndaha yu. Tan nyehé ndo tsaha yu. Tyin juvin ñi maa yu cuví. Tñin ndo tsi yu tan coto ndo. Tyin tatyí ndiyí nduve cuñu ñuhu ca naha tsi yu. Tan nduve yiquí

can tumaa tsa nyehé ndo tsi yuhu —catyí ra Jesús.

<sup>40</sup> Tan cuhva tsa cahān ra yacan, tan janahā ra ndaha ra tsihin tsaha ra tsi ra naha.

<sup>41</sup> Maa tyin maa ra naha, tsa cuenda tsa iyo cuñi ra naha tan sñi cuñi ra naha, nda cuanda ña cuví ca tsinú vaha iñi ra naha. Yacan nacahān ra Jesús tsihin ra naha:

—¿A iyó tsa catsi yo? —catyí ra.

<sup>42</sup> Tacan tan tsahā ra naha luxu tyaca tyihyo tsihin ndutyá ñuñu tsi ra.

<sup>43</sup> Tan quihñ ra. Tan quitsahā tsatsí ra nu nyecú ra naha.

<sup>44</sup> Tan catyí ra tsihin ra naha:

—Tandihí tsa tahañ yu, yacan cuví tsa catyí yu tsihin ndo quiví can. Tan catyí yu tsihin ndo tyin tacan cua cuví, tumaa cuhva nyaá tuhun tsa tyaā ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

<sup>45</sup> Tacan tan tsahā cuenda ra Jesús cuhva catyí nu tutu Nyoo. Tan cutuñi iñi tandihí ra naha jahā ra.

<sup>46</sup> Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quiví cua nandoto ra.

<sup>47</sup> Tan taahán tsi coto nyiví tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahān ra naha tsihin sivi ra Cristo ñuu Jerusalén, yaha can tan tandihí ca ñuu tanñi cahnu nu ñuhu ñayiví.

<sup>48</sup> Tan catyí tucu ra Jesús tsihin ra naha:

—Tan nyoocho cuví tsandaa tsa cuenda tandihí tsehe.

<sup>49</sup> Tan cua jaquitsi maa yu Tatyí Ii Nyoo síqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihí ndo tunyee iñi Nyoo tsa cua quitsí tsi ndo —catyí ra Jesús.

*Nu cuanuhu ra Jesús gloria*

(Mr. 16.19-20)

<sup>50</sup> Tacan tan ra Jesús cuahán ra tsihin tandihí ra tsicā tsihin ra nda ñuu Betania. Tan cañihí ra ndaha ra. Tan nasoco ra tsi ra naha.

<sup>51</sup> Tan tsitsi tsa nasoco ra tsi ra naha, nandaā ra andiví.

<sup>52</sup> Tacan tan tandihí ra naha quitsahā jacahnú ra naha tsi ra. Tan sñi xaan cuñi ra naha, cuanuhu ra naha nda ñuu Jerusalén.

<sup>53</sup> Tan tandihí quiví tsiyucú ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuví tsi tacan ñi.

## Tuhun Nyoo tsa Tyaa Ra Juan

*Tuhun tsa Caahán Nyoo nanduvj tsi iin rayii, tan rayii can cuví ra Cristo*

<sup>1</sup> Nda quívi jihna ñi, nda ndi cumañi ca coo tandihi tsa iyó, tan tsa iyó maa ra cuví Tuhun tsa Caahán Nyoo. Nyíi ra tsihin Nyoo. Tan Nyoo cuví ra.

<sup>2</sup> Tan iyó ra tsihin Nyoo nda quívi jihna ñi.

<sup>3</sup> Tan tsihin ra, javaha Nyoo tandihi cuíi maa tsa iyó. Tan nduve tsa javaha Nyoo tsa intuhun ñi maa ra.

<sup>4</sup> Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhu tsa jandunditsín añima nyivi.

<sup>5</sup> Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

<sup>6</sup> Tsicoq iin ra tsa jaquitsj Nyoo, nañi ra Juan.

<sup>7</sup> Quitsj ra cuví ra tsa ndaa. Tyin cahán ra tumañi iñi cuenda ra cuví ñuhu can, tyin tacan tan tsinu iñi tandihi nyivi tsi ra.

<sup>8</sup> Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra.

<sup>9</sup> Tyin ñuhu nditsa can, ndi cua quitsi tsi nu ñuhu ñayivi, tan cua jandunditsín tsi añima tandihi nyivi tsa iyó nu ñuhu ñayivi ihya.

<sup>10</sup> Ra cuví Tuhun tsa Caahán Nyoo quitsj ra nu ñuhu ñayivi. Tan juvin ñi maa ra tsihin Jutu ra javaha ra naha ñuhu ñayivi. Maa tyin nyivi iyó nu ñuhu ñayivi ihya, ña nacoto ñi tsi ra tsa ra Cristo cuví ra.

<sup>11</sup> Quitsj ra nu iyó nyivi ñuu ra, nyivi Israel, tan ña naquihñin vaha ñi tsi ra.

<sup>12</sup> Maa tyin tandihi nyivi tsa naquihñin vaha tsi ra, tan tsinú iñi ñi tyin ra Cristo cuví ra, tsaha ra ndatu tsi ñi tsa cuví ñi sehe Nyoo.

<sup>13</sup> Juvín ñi nacacu tsa. Maa tyin ñavin tumaa tsa cacu ñi tsa culee ñi cuenda cuñu ñuhu ñi. Tan ndi ñavin tsa cuenda tsa cuñi iin rayii coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacu tsa ñi jahá maa Nyoo.

<sup>14</sup> Tan ra cuví Tuhun tsa Caahán Nyoo nanduvj ra iin rayii. Tan tsicoq ra tsihin yo. Tan nyehé ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsiyu ra tsihin tsa nditsa tan tsa vaha.

<sup>15</sup> Tan ra Juan can cahán ra tumañi iñi tsa cuenda ra, tan catyí ra:

—Juvín ra ihya cuví ra tsa cahán yu tuhun quívi can, tyin ra tsa vatsí ityi tsata yu, cahnu ca cuví ra tan ñavin ca maa yu. Tyin

nda quívi cacu yu tan tsa iyó maa ra —catyí ra Juan.

<sup>16</sup> Tandihí yo naquihñin yo tumañi iñi cahnu tsa tsahá ra tsi yo, tyin nasocó xaan ra tsi yo.

<sup>17</sup> Ra Moisés tsaha cuenda ra ley Nyoo tsi yo. Maa tyin ra Jesucristo tsahá ra tsa naquihñin yo tsa vaha Nyoo. Tan caahán ra tsa nditsa tsihin yo.

<sup>18</sup> Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

*Nu caahán ra Juan, ra jacoondutyá, tumañi iñi cuenda ra Jesucristo*

(Mt. 3.11-12; Mr. 1.7-8; Lc. 3.15-17)

<sup>19</sup> Ra cuví ityi nuu tsihin nyivi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cuhun ra naha nu nyíi ra Juan tan ndaca tuhun ra naha tsi ra yóo ra cuví ra.

<sup>20</sup> Tan tsicá tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihñi xeehe ra.

<sup>21</sup> Tacan tan tsicá tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo tahán tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihñi ca ra naha tsicá tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

<sup>22</sup> Tan tsicá tuhun nyico ra naha tsi ra Juan inga tsaha:

—¿Yóo ra cuví un? Tyin cuñi tsi catyí tuhun ndi tsihin ra tsa tava tyiñu tsi ndi yóo ra cuví un —catyí ra naha tsihin ra.

<sup>23</sup> Tan nacahan ra Juan:

—Yuhu cuví ndusu iin ra tsa cana tsaá nu tsiqui, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tumaa cahán ra Isaias ra cuví ndusu yuhu Nyoo tuhun yu tahán tsanaha —catyí ra Juan tsihin ra naha.

<sup>24</sup> Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan.

<sup>25</sup> Tan tsicá tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

<sup>26</sup> Tan nacahan ra Juan tan catyí ra:

—Yuhu jacoondutyá yu tsi nyívi tsihin ndutyá. Maa tyin mahñu ndo nyíi iin ra tsa ña nacotó ndo.

<sup>27</sup> Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuví ndatsí yu ñii nditsan ra —catyí ra Juan.

<sup>28</sup> Tandíhi yacan cuví nu nañi Betábara tsa canyíi inga tsiyo yutya cahnu Jordán nu tsinyíi ra Juan jacoondutyá ra.

*Ra Jesucristo, Mbee Ticatyí Luhlu jana Nyoo*

<sup>29</sup> Tsa inga quívi nyehe ra Juan tsi ra Jesús cuahán ra nu nyíi ra, tacan tan catyí ra Juan:

—Nyehe jihna ndo, ra ihya cuví Mbee Ticatyí Luhlu jana Nyoo ra tsa quihín nyaa cuatyí nyívi iyó nu ñuhu ñayívi ihya.

<sup>30</sup> Tuhun ra cahan yu quívi catyí yu tsihin ndo tyin ityí tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu.

<sup>31</sup> Ndi yuhu tan ña nacoto yu tsi ra quívi can. Maa tyin vityin vatsí yu jacoondutyá yu tsihin ndutyá tyin tacan tan nacoto nyívi Israel ñuu yu tsi ra —catyí ra Juan.

<sup>32</sup> Tan catyí nyico ra Juan:

—Yuhu nyehe yu Tatyí Ii Nyoo tsa quítsi ityí andiví tan quítsi tsi tumaa iin paloma, tan ndoo tsi tsihin ra.

<sup>33</sup> Yuhu ñaha ca nacoto yu yoo ra cuví ra quívi can. Maa tyin Nyoo, ra tsa tava tyíñu tsi yu jacoondutyá yu tsi nyívi tsihin ndutyá, catyí ra tsihin yu: “Quívi nyehe un Tatyí Ii, vatsí nuú tsi siqui iin rayíi, tan ndoo tsi tsihin ra, juvin ra can cuví ra tsa cua jacoondutyá tsi nyívi tsihin Tatyí Ii yu”, catyí Nyoo tsihin yu.

<sup>34</sup> Yuhu tsa yahá nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

*Ra tsa quítsaha nyicún jihna tsi ra Jesús*

<sup>35</sup> Tsa inga quívi nyíi nyico ra Juan nu nyíi ra tan yucú ndíhi uvi taahan ra tsicá tsihin ra.

<sup>36</sup> Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyí Luhlu jana Nyoo —catyí ra.

<sup>37</sup> Tsa tsiñi nduvi taahan ra nyicún tsi ra Juan tsa cahan ra, tacan tan cuahan ra naha cuanyicun ra naha tsi ra Jesús.

<sup>38</sup> Tacan tan nanyehe ra Jesús ityí tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahan ra naha tan catyí ra naha:

—Maestro, ¿numaa iyó un?

<sup>39</sup> Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaá ra naha ndacan tumaa caa cumi tsa tseñi.

<sup>40</sup> Iin ra tsa tsiñi tsa cahan ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro.

<sup>41</sup> Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñi tsi catyí, ra Cristo, o cuñi tucu tsi catyí, ra tsa nacatsí vaha Nyoo tyin quítsi ra cuví ra rey tsa cuenda yo.

<sup>42</sup> Tacan tan quihín ra Andrés tsi ra Simón yañi ra cuahán tsihin ra nu nyíi ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñi tsi catyí tsi “Pedro”, tan tsa nduvi sívi can, cuñi tsi catyí tsi “cava”, [tumaa iin yuu cahnu].

*Nu cana ra Jesús tsi ra Felipe tan ra Natanael*

<sup>43</sup> Tsa inga quívi tyaá ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Ñaha quítsi nyicun un tsi yu —catyí ra.

<sup>44</sup> Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro.

<sup>45</sup> Tacan tan tsaahan ra Felipe tsinanducú ra tsi ra Natanael. Tan catyí ra tsihin ra:

—Nyehe ndi tsi ra tsa tyaá ra Moisés tuhun nu libru ley Nyoo, ra tsa cahan tucu ra cuví ndusu yuhu Nyoo tuhun tahañ tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

<sup>46</sup> Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahan ra Felipe tan catyí ra:

—Ñaha tan nyehe un —catyí ra.

<sup>47</sup> Tacan tan tsa cua cuyatyin ra Natanael nu nyíi ra Jesús. Tan nanyehe ra Jesús tyin vatsí ra, tan quítsaha catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandavi ñaha —catyí ra Jesús.

<sup>48</sup> Tacan tan tsicá tuhun ra Natanael tsi ra:

—¿Nacaa tsa tsitó un tsi yuhu?

Tan nacahan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyíi un tsaaha yutun higo can —catyí ra Jesús tsihin ra.

<sup>49</sup> Tacan tan quítsaha catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyívi Israel.

<sup>50</sup> Tan catyí ra Jesús tshin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tshin ra.

<sup>51</sup> Tan catyí ra Jesús tshin ra naha:

—Tsa nditsa catyí yu tshin ndo tyin nyoocho cua nyehe ndo cua nuña andívi tan cuaha xaan ángel Nyoo cua ndaa, tan cua nuu ra naha siquí yuhu Rayí tsa quee nda gloria —catyí ra Jesús tshin ra naha.

## 2

*Nu iyó vico tindaha ñuu Caná iin ñuu tsa canyí Galilea*

<sup>1</sup> Tsa yaha uñi quívi tan tsicoo iin vico tindaha ñuu Caná tsa canyí Galilea. Tan ican nyívi síhi ra Jesús.

<sup>2</sup> Tan nyívi javaha vico can cana ndíhi ñi tsi ra Jesús tan tshin tandíhi ra tsicá tshin ra tyin cuhun ra naha.

<sup>3</sup> Tacan tan cuahán ra naha. Tan tsitsi tsa yucú ra naha nu iyó vico can, tan ndíhi vinu ñi javaha vico can. Tacan tan catyí síhi ra Jesús tshin ra:

—Nduve ca vinu ñi —catyí ña.

<sup>4</sup> Tan catyí ra Jesús tshin ña:

—¿Náa tsa ndíhi iñi yo yacan, Miyan? Tyin ñaha ca tsaa hora yu —catyí ra tshin ña.

<sup>5</sup> Maa tyin síhi ra cahan ña tshin ra tsa tyihí mesa nu iyó vico can naha ra:

—Javaha nyoocho tandíhi tsa cua cahan ra tshin ndo —catyí ña tshin ra naha.

<sup>6</sup> Tan nyecú iñu quisi yuu nahnu tsa yihí ndutya tsa tuhvá ra Israel naha ra tsatyíñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can.

<sup>7</sup> Tacan tan catyí ra Jesús tshin ra tsa tyihí mesa can naha ra:

—Jacutu ndo quisi ihya tshin ndutya —catyí ra tshin ra naha.

Tacan tan tsitú cuí quisi can jaha ra naha.

<sup>8</sup> Tacan tan catyí ra Jesús tshin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tshin ra naha.

Tan tacan icá ra naha.

<sup>9</sup> Ra cuví ityi nuu cuenda vico can tshihí ra naha ndutya tsa nanduví vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can.

<sup>10</sup> Tan catyí ra tshin ra:

—Tandíhi nyívi, jihna ca vinu vaha tuhvá ñi tava. Yaha can tan tatun tsa tshihí xaan nyívi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tshin ra.

<sup>11</sup> Tsa javaha ra Jesús ñuu Caná tsa canyí Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyívi. Tan ra tsicá tshin ra tsinú iñi ra naha tsi ra tyin ra ican cuví ra tsa jaquitsí Nyoo.

<sup>12</sup> Tsa yaha yacan tan cuahán ra ñuu Capernaum tshin síhi ra tan tshin yañi ra. Tan cuahan ndíhi ra tsicá tshin ra. Tan ican tsiyucu ñi juhva quívi.

*Nu jacunu ra Jesús tsi nyívi xicó nuquehe yuvehe ñuhu cahnu*

(Mt. 21.12-13; Mr. 11.15-18; Lc. 19.45-46)

<sup>13</sup> Tsa cua tahan tsi quívi vico pascua tsa jacahnú nyívi Israel. Yacan cuenda cuahán ra Jesús ñuu Jerusalén.

<sup>14</sup> Tsa tsaa ra ñuu can, quíhvi ra nuquehe vehe ñuhu cahnu, tan nyehe ra yucú cuaha nyívi xicó ñi nuquehe can. Yihí ñi xicó ñi indíqui, mbee ticatyí, tan paloma. Tan yucú ndíhi tucu nyívi nasamá xuhun.

<sup>15</sup> Tsa nyehe ra Jesús tandíhi yacan, tacan tan javaha ra iin yoho. Tan tshin yoho can jacunu ra tsi tandíhi nyívi nuquehe vehe ñuhu iin cahnu ñi tshin mbee tan tshin indíqui jana ñi. Tan ñi nasamá xuhun can, jatucuatyi ra xuhun ñi nu ñuhu tan janduvá ra mesa ñi.

<sup>16</sup> Tan catyí ra tshin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tshin ñi.

<sup>17</sup> Tacan tan ra tsicá tshin ra, nducuhun iñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun iñi ra naha.

<sup>18</sup> Tacan tan ra cuví ityi nuu tshin nyívi Israel quitsaha tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsaha Nyoo ndatu tsi un tsa javaha un yacan? —catyí ra naha tshin ra.

<sup>19</sup> Tan nacahan ra Jesús tan catyí ra:

—Cani ndo vehe ñuhu ihya, tan tsitsi tsa uñi quívi ñi tan cua janduvita nyico yu itsi inga tsaha —catyí ra tshin ra naha.

<sup>20</sup> Tacan tan quitsaha catyí ra nyecú ican naha ra tshin ra:

—Uvi xico iñu cuiya jaha tyiñu ra naha tan tsinú vehe ñuhu ihya. ¡Tan yooho catyí un tyin tsitsi tsa uñi quívi ñi tan cua janduvita un itsi inga tsaha! —catyí ra naha tshin ra.

<sup>21</sup> Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra.



<sup>22</sup> Yacan cuenda tandihi ra tsicá tsihin ra nducuhun iñi ra naha yacan quivi nandoto ra. Tan cutufiñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinuñi iñi ra naha tsa cahan ra Jesús tan tsa nyaá nuu tutu Nyoo.

*Ra Jesús tsitó ra tsa iyó añima nyivi*

<sup>23</sup> Tsitsi tsa ndi nyii ra Jesús ñuu Jerusalén, quivi iyó vico pascua, cuaha xaan nyivi quit-saha tsinuñi iñi tsa caahán ra tsa cuenda tsa cuaha tsa iyo javaha ra.

<sup>24</sup> Maa tyin ra Jesús ña nñi cuñi ra nyehé ra tsi tandihi ñi tyin tsitó ra cuhva tsicá iñi ñi.

<sup>25</sup> Ña tsiiñihuhú tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi añima yo.

### 3

*Nu jacuahá ra Jesús tsi ra Nicodemo*

<sup>1</sup> Tsicoo iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra.

<sup>2</sup> Ra Nicodemo ihya, tsahan ra nu nyii ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quitsi un jacuahá un tsi ndi. Tyin yoñi nyivi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

<sup>3</sup> Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsaa nyivi inga tsaha, ña cua cuví nyehé ñi nu ndacá ñaha Nyoo —catyí ra.

<sup>4</sup> Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayiñ inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsaa ra inga tsaha? —catyí ra.

<sup>5</sup> Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsaa ñi tsihin Tatyí Li Nyoo.

<sup>6</sup> Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsaa tsihin Tatyí Li Nyoo, Tatyí Li Nyoo iyó añima ñi.

<sup>7</sup> Ña cu iyo iñi un tsa caahán yu tsehe tsihin un tyin tandihi nyivi cuñi tsi nacacu tsaa ñi.

<sup>8</sup> Tumaa tsa yihí tatyí tandihi ñi ityi tan tsiiñi un cucayú vatsi tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihi nyivi nacacu tsaa tsihin Tatyí Li Nyoo —catyí ra Jesús tsihin ra.

<sup>9</sup> Tacan tan nducú tuhun nyico ra Nicodemo tsi ra inga tsaha tan catyí ra:

—¿Nacuenda caahán un tacan? —catyí ra tsihin ra.

<sup>10</sup> Nacahan ra Jesús tan catyí ra:

—Yooho tsa cuví un maestro cuenda nyivi Israel, taahán tsi coto un tsehe.

<sup>11</sup> Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehé ndi. Maa tyin nyooho ña tsinuñi iñi ndo tsa caahán ndi tsihin ndo.

<sup>12</sup> Tatun ña tsinuñi iñi ndo tsa caahán yu tuhun nu ñuhu ñayivi ihya tsihin ndo, ¿nácaa cua tsinuñi iñi ndo tatun cua cahan yu tuhun gloria tsihin ndo?

<sup>13</sup> Yoñi tsahan gloria tsinyehé nácaa iyó. Intuhun ñi maa yuhu Rayiñ tsa quee nda gloria nyehé yu nácaa iyó gloria, tyin ndacan quee yu.

<sup>14</sup> Tumaa tsa ticaa ra Moisés iin coo tsa tsinuñi tsihin caa nu yutun iin nu tsiqui, tacan cua ticaa nyivi tsi yuhu Rayiñ tsa quee nda gloria nuu cruu.

<sup>15</sup> Tacan tan tandihi nyivi tsa tsinuñi iñi tsi yu, ña cua cunaa ñi. Tan cua coo ñi ñayivi nyito tsa ña cua naa maa.

*Nyoo cuñi xaan ra tsi tandihi nyivi*

<sup>16</sup> Nyoo cuñi xaan ra tsi tandihi nyivi iyó nu ñuhu ñayivi. Yacan cuenda tsaha ra tsa cúu Sehe mañi ra nu cruu tsa cuenda ñi. Tyin tacan tan tandihi ñi tsa tsinuñi iñi tsi Sehe ra, ña cunaa ñi, tan coo ñi ñayivi nyito tsa ña cua naa maa.

<sup>17</sup> Tyin Nyoo jaquitsi ra tsi Sehe ra nu ñuhu ñayivi tyin jacacu ra tsi nyivi, tan ña jaquitsi ra tsi ra tsa jacunaa ra tsi ñi.

<sup>18</sup> Yacan cuenda nyivi tsa tsinuñi iñi tsi yu tsa cuví yu Sehe Nyoo ña cua cunaa ñi, maa tyin nyivi tsa ña tsinuñi iñi tsi yu, tsa cunaa ñi tyin ña tsinuñi iñi tsi yu tsa cuví yu Sehe mañi Nyoo.

<sup>19</sup> Nyivi ña tsinuñi iñi, tsa cunaa ñi. Tyin quivi quitsi yu jandunditsin yu nu ñuhu ñayivi, ña naquihñin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi.

<sup>20</sup> Tandihi nyivi javahá tsa ña vaha, ña taahán iñi ñi coo ñi nu nditsin, tyin ña cuñi ñi tsa quituvi tsa ña vaha javahá ñi.

<sup>21</sup> Maa tyin nyivi taahán iñi tsa nditsa, naquitá ñi nu nditsin tyin tacan tan nyehé nyivi tyin javahá ñi cuhva cuñi Nyoo tyin nyaá ra tsihin ñi —catyí ra Jesús.

*Nu caahán ra Juan, ra jacoondutyá tsi nyivi, tuhun ra Jesús inga tsaha*

<sup>22</sup> Tsa yahá yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quivi, tyin jacoondutyá ra naha tsi nyivi.

<sup>23</sup> Tacan tucu ra Juan nyii ra jacoondutyá ra tsi nyivi nu cuví Enón yatyin ñi nu cuví Salim, tyin ican ñuhú cuaha ndutyá. Tan tsaa nyivi tan tsicoondutyá ñi.

<sup>24</sup> Yacan javahá ra Juan tsa ndi cumañi ca quihvi ra vehe caa.

<sup>25</sup> Tacan tan quitsahā caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyivi tsi ñi nuu Nyoo.

<sup>26</sup> Tacan tan cuahán ra naha nu nyii ra Juan. Tan catyí ra naha tsihin ra:

—Maestro, ra tsa tsinyij tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihi ra tsi nyivi tan tandihi nyivi nyicún tsi ra —catyí ra naha tsihin ra.

<sup>27</sup> Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee iñi ra tsi yo.

<sup>28</sup> Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yo quivi catyí catsi yu tyin ra jaquitsi Nyoo ityi nuu ra Cristo cuví yu.

<sup>29</sup> Tyin nu iyó vico tandaha, ra tsa nyaá xiin ñaha yoco can, juven ra cuví ra cua tindaha tsihin ña. Tan ra vaha iñi tsi ra nyii ra ican. Tan cusí iñi ra tsiñi ra tsa caahán ra tsa cua tindaha. Tan tacan tucu yuhu, sii cuñi yu tyin naquihín nyivi tuhun caahán ra Jesús tan nyicún ñi tsi ra.

<sup>30</sup> Maa ra cuví ra cahnu ca cuví. Tan yuhu cua nduluhu yu nuu ra tyin tacan taahán maa tsi.

*Ra quee nda gloria tan quitsi ra nu ñuhu ñayivi*

<sup>31</sup> Ra tsa quee nda gloria, cahnu ca cuví ra tan ñavin ca tandihi nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra.

<sup>32</sup> Tan caahán ra tsa nyehé ra tan tsa tsiñi ra, maa tyin yoñi tsinú iñi tsa caahán ra.

<sup>33</sup> Taton yoo tan tsinú iñi yo tsa caahán ra, cua cuví yo tsa ndaa tyin Nyoo ña vatya ra.

<sup>34</sup> Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí li ra tan tsahā ra itsi tsi ra. Tsahā ra nanñi Tatyí li ra tsi ra.

<sup>35</sup> Nyoo Jutu yo cuñi ra tsi Sehe ra. Tan nacuhvā cuenda ra tandihi maa tsi ra.

<sup>36</sup> Nyivi tsa tsinú iñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñi tsinu iñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

## 4

*Nu natuhun ra Jesús tsihin iin ñaha Samaria*

<sup>1</sup> Tsa tsitó ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsicoondutyá.

<sup>2</sup> Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi.

<sup>3</sup> Tan quivi tsa tsitó ra Jesús tyin tsitó ra naha yacan, quee ra Judea can tan cuanuhu ra nda nu cuví Galilea.

<sup>4</sup> Tsa cuahán ra, yaha ra nu cuví Samaria tyin cuñi tsi yaha ra ican.

<sup>5</sup> Tacan tan tsaā ra iin ñuu tsa canyii Samaria tsa nañi Sicar yatyin ñi nu cuví ñuhu ra Jacob nu tsahā ra tsi ra José sehe ra.

<sup>6</sup> Ican nyaá iin soco pila tsa catyí nyivi tyin tsii ra Jacob cuví. Tsa quitā ra Jesús nu nyaá soco can tan tsinyaa ra yuhu soco can tyin tatu xaan ra tyin cañi xaan ityi tsicā ra tan maa hora cuví.

<sup>7-8</sup> Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaā iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

<sup>9</sup> Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.)

<sup>10</sup> Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

<sup>11</sup> Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu?

<sup>12</sup> Ra Jacob tsii tsahnu yo, nacoq ra soco ihya tsi ndi. Juvín ihya tsihi maa ra ndutya tan tsihin tandihi sehe ra. Tan juven ñi ihya tsihi tucu quiti jana ra naha. ¿A cahnu ca ra cuví yooho tan ñavin ca ra can? —catyí ña tsihin ra.

<sup>13</sup> Tacan tan nacahan ra Jesús tan catyí ra tsihin ña:

—Tandihí nyivi tsihi ndutya ihya, cua na ityi nyico iñi ñi.

<sup>14</sup> Maa tyin nyivi tsihi ndutya tsa tsahá yuhu, ña cua na ityi ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tsihin ña.

<sup>15</sup> Tacan tan quitsahā caahán ña tsihin ra:

—Yooho tatta, cuhva ndutya can coho yu na ña na ityi ca iñi yu, tan ndi ña quitsi ca yu

quitsi tava yu ndutya tsitsi soco ihya —catyí ra tsihin ra.

<sup>16</sup> Tacan tan catyí ra Jesús tsihin ña:

—Cuaahan cua quihin yíi un tan quitsi ndo —catyí ra tsihin ña.

<sup>17</sup> Tan nacahan ña tan catyí ña:

—Nduve yíi yu iyó.

Tacan tan catyí ra Jesús tsihin ña:

—Nditsa tsa caahan un, tyin nduve yíi un iyó.

<sup>18</sup> Tyin tsa uhun yíi un tsicoo, tan ra cumí tsi un vityin ñavin yíi un tsi ra. —catyí ra tsihin ña.

<sup>19</sup> Tsa tsiñi ña tsa cahān ra tacan, quitsaha catyí ña tsihin ra:

—Yooho tatta, tuví iñi yu tyin ra cuví ndusu yuhu Nyoo cuví un.

<sup>20</sup> Tsií tsahnu ndi, ra ñuu ihya naha ra, jacahnú ra naha tsi Nyoo yucu ihya. Maa tyin nyooho tsa cuví nyívi Israel catyí ndo tyin nda Jerusalén taahán tsi jacahnú yo tsi Nyoo —catyí ña tsihin ra.

<sup>21</sup> Tacan tan nacahan ra Jesús tan catyí ra tsihin ña:

—Tsinu iñi tsa caahan yu tsihin un. Tyin vatsi hora tsa cua jacahnú ndo tsi Jutu yo Nyoo. Maa tyin ña tsiñiñuhú ca tsa quitsi ndo yucu ihya, a cuhun ndo nda Jerusalén.

<sup>22</sup> Nyooho nyívi Samaria, ña tsitó ndo yóo jacahnú ndo. Maa tyin nyuhú tsitó ndi yóo jacahnú ndi. Tan tsitó ndi tyin cua jacacu iin ra Israel tsi nyívi jaha Nyoo.

<sup>23</sup> Maa tyin cua tsa hora, tan hora can iyó yo vityin tyin nyívi tsa nditsa jacahnú tsi Nyoo Jutu yo, cua jacahnú ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí li Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra.

<sup>24</sup> Tyin Nyoo Tatyí li cuví ra. Tan nyívi jacahnú tsi ra cuñi tsi jacahnú ñi tsi ra tsihin tsa nditsa tumaa jaquihín ityi maa Tatyí li tsi ñi —catyí ra tsihin ña.

<sup>25</sup> Tan nacahan ña tan catyí ña tsihin ra:

—Yuhu tsító yu tyin cua quitsi ra cuví Mesías, ra Cristo, ra cuví rey tsi yo. Tan quívi quitsi ra, maa ra cua nacatyí tuhun tandíhi tsihin yo —catyí ña tsihin ra.

<sup>26</sup> Tacan tan nacahan ra Jesús tan catyí ra tsihin ña:

—Ra tsa caahan un tuhun can, juvin ra caahan tsihin un —catyí ra tsihin ña.

<sup>27</sup> Tacan tan tsaā nyico ra tsicá tsihin ra, tan iyo xaan cuñi ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenda natuhún ra tsihin ñaha can.

<sup>28</sup> Tacan tan nacoo ña quiyí ña tan cuanuho ña nda ñuu. Tan catyí ña tsihin nyívi:

<sup>29</sup> —Cohon ndo cūnyehe ndo tsi iin ra tsa cahān tandíhi cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

<sup>30</sup> Tacan tan quita nyívi ñuu can tan cuahán ñi cua nyehe ñi nu nyíi ra Jesús.

<sup>31</sup> Tan tsa ndi cumañi ca tsaā ñi nu nyíi ra, ra tsicá tsihin ra, jañiñi ra naha tsi ra na catsi ra luxu. Tan catyí ra naha tsihin ra:

—Maestro, çatsi luxu —catyí ra naha.

<sup>32</sup> Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

<sup>33</sup> Tacan tan ra tsicá tsihin ra, quitsaha natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

<sup>34</sup> Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa javahá yu cuhva cuñi ra tsa jaquitsi tsi yu, tan javahá yu tyiñu tsañá ra tsi yu.

<sup>35</sup> Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsí yo.” Maa tyin yuhu catyí yu tsihin ndo: Nyēhe ndo tyin tsa ndíhi tsa tatsí ndo cuaan tan tsa nyecú vaha tsi tsa cua naquihin vaha yo itsi.

<sup>36</sup> Ra tsa naquihín vaha can ñihí ra yahví ra. Tan tsa naquihín vaha ra, cuví tsi nyívi tsa cua coo ñayívi nyito tsa ña cua naa maa. Tacan tan ra tsa tatsí tan ra tsa naquihín cusíi iñi ra naha.

<sup>37</sup> Tan iyó iin cuhva tuhvá nyívi caahan tan catyí ñi tyin sin nyívi tatsí tan sin nyívi naquihín vaha. Tan nditsa yacan.

<sup>38</sup> Yuhu jacuhun yu tsi ndo tyin cua cahnu ndo ñiñi tsa iyó nu ña jahá tyiñu ndo, nu jahá tyiñu inga ra. Tan nyooho cucahnu ndo tan cua naquihin vaha ndo ñiñi can —catyí ra Jesús tsihin ra naha.

<sup>39</sup> Tan cuaha xaan nyívi ñuu Samaria can quitsahá tsinú iñi ñi tsi ra Jesús tsa cuenda tsa cahān ñaha can, tyin catyí ña: “Cahān ra tsihin yu tandíhi cuhva iyó yu”, catyí ña.

<sup>40</sup> Cuhva tsa tsaā ñi nu nyíi ra Jesús, tan cahān ndaahví ñi tsihin ra na ndoo ra tsihin ñi. Tan ndoo ra tsihin ñi uvi quívi.

<sup>41</sup> Tan cuaha ca nyívi quitsahá tsinú iñi ñi tsa tsiñi ñi tsa caahan ra.

<sup>42</sup> Tacan tan quitsahá catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahān un tsihin ndi, tyin tsiñi maa ndi tsihin soho ndi tsa caahan ra, tan tsitó vaha ndi tyin juvin ra cuví ra Cristo ra jacacú tsi nyívi iyó nu ñuhu ñayívi ihya —catyí ñi.

*Nu janduvahá ra Jesús sehe iin ra cumí tyiñu*

<sup>43</sup> Tsa yaha uvi quivi tan quee ra Jesús nu cuví Samaria tan cuahán ra ityi nu cuví Galilea, nu cacu ra.

<sup>44</sup> Vasu ndi maa juvin ñi maa ra cahan tyin iin ra cuví ndusu yuhu Nyoo, nyivi ñuu ra ña jahá ñi tsa ñayivi tsi ra.

<sup>45</sup> Tacan tan tsa tsaá ra Galilea, nyivi iyó ican, vaha caahán ñi tshin ra, tyin tshahñ ñi vico Jerusalén, tan nyehe ñi tsa vaha tsa javaha ra.

<sup>46</sup> Tacan tan cuanuhu nyico ra Jesús nda ñuu Caná tsa canyí Galilea nu nanduvi ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum.

<sup>47</sup> Quivi tsa tsitq ra can tyin tsa tsaá nyico ra Jesús nda Galilea tsa tshahñ ra nda Judea, tshahñ ra tsinyehé ra tsi ra Jesús. Tan tsicahñ ra tumañi iñi tsi ra na cuhun ra vehe ra tan janduvaha ra tsi sehe ra, tyin tsa cuñi cúu cuii ña sehe ra.

<sup>48</sup> Tacan tan catyi ra Jesús tshin ra:

—Nyooho ña cua tsinu iñi ndo tatun ña nyehe jihna ndo tsa iyo —catyi ra tshin ra.

<sup>49</sup> Maa tyin ra can catyi ra tshin ra Jesús:

—Yooho taa, çohon ñi tshin yu tsa ndi cumañi ca cúu sehe yu —catyi ra tshin ra Jesús.

<sup>50</sup> Tacan tan catyi ra Jesús tshin ra:

—Cuanuhu yuvehe un. Sehe un nyito ra, tsa nduvaha ra —catyi ra tshin ra.

Tacan tan ra can tsinu iñi ra tsa cahan ra Jesús tan cuanuhu ra.

<sup>51</sup> Tsa tsa cuyatyn ra yuvehe ra, quitq musu ra tan caahán ra naha tshin ra:

—¡Taa, sehe un nyito ra; tsa nduvaha ra!

<sup>52</sup> Tacan tan quitsaha tsicá tuhun ra tsi ra naha náa hora quitsaha vaha cuñi ra. Tan catyi ra naha tshin ra:

—Icu cuhva caa iin tsa yaha hora quitq cahñi tsi ra —catyi ra naha.

<sup>53</sup> Tacan tan tsito ra can, tyin hora can cahan ra Jesús tshin ra, “Cuanuhu tyin sehe un nyito ra, tsa nduvaha ra.” Tan maa ra can tshin tandihí nyivi ra quitsaha tsinú iñi ñi tsi ra Jesús.

<sup>54</sup> Yacan cuví tsa iyo tsa tsinu uvi javaha ra Jesús tsa tsaá nyico ra Galilea tsa yaha tshahñ ra Judea.

## 5

### *Nu janduvaha ra Jesús iin ra cuuhví*

<sup>1</sup> Tsa yaha can tan cuahán ra Jesús ñuu Jerusalén inga tsa tyin nyivi ñuu Israel jacahnú ñi iin vico.

<sup>2</sup> Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyn ñi nyaá iin vehe cahnu. Tan tsitsi vehe can ñuhú ndutya. Tan tsa tshin yuhu hebreo nañi vehe can Betesda. Tan iyó uhun corredor.

<sup>3</sup> Tan ican yucu cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can.

<sup>4</sup> Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yaha ñi nacandá ndutya can, nduvahá ñi vasu ndi maa cuehe cahnu ndohó ñi.

<sup>5</sup> Tan ican canyí iin ra cuuhví tan tsa iyó oco tshahñ uñi cuiya cuuhví ra.

<sup>6</sup> Tsa nyehe ra Jesús tsi ra ican canyí ra, tuvj iñi ra tyin tsa cuaha xaan cuiya cuuhví ra. Tan tsicá tuhun ra tsi ra ndaahví can, tan catyi ra:

—¿A cuñi un nduvaha un?

<sup>7</sup> Tan ra cuuhví can nacahan ra tan catyi ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahán ñi tsa tsa cuñi yu quihví yu, inga nyivi quihví jihna —catyi ra cuuhví can tshin ra Jesús.

<sup>8</sup> Tacan tan catyi ra Jesús tshin ra:

—Nduvita, naquihin yuvi un tan çaça un —catyi ra tshin ra.

<sup>9</sup> Juvin ñi hora can tan nduvaha ra, naquihin ra yuvi ra, tan nacaca ra. Maa tyin quivi quitatú nyivi cuví quivi can.

<sup>10</sup> Yacan ra cuví ityi nuu tshin nyivi Israel catyi ra naha tshin ra tsa nduvaha can:

—Quivi quitatú yo cuví vityin, yacan cuenda ña taahán tsi cuiso un yuvi un —catyi ra naha tshin ra.

<sup>11</sup> Tan ra tsa nduvaha can nacahan ra tan catyi ra:

—Ra tsa janduvaha tsi yu, catyi ra tshin yu: “Naquihin yuvi un tan çaça un”, catyi ra tshin yu.

<sup>12</sup> Tacan tan quitsaha tsicá tuhun ra naha tsi ra, tan catyi ra naha:

—¿Yóo ra cahan tshin un tyin naquihin un yuvi un tan caca un? —catyi ra naha.

<sup>13</sup> Maa tyin ra tsa nduvaha can ña tsitó ra yóo janduvaha tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra.

<sup>14</sup> Yaha can tan nañihí ra Jesús tsi ra tsa nduvaha can tsitsi vehe ñuhu cahnu, tan catyi ra tshin ra:

—Jihna, vityin tsa nduvaha un, ña javaha ca un tsa ña vaha, tyin coto quitsi inga tun-doho cahnu ca siqui un —catyi ra tshin ra.

<sup>15</sup> Tacan tan tshahñ ra tsicahan ra tshin ra Israel naha ra tyin ra Jesús cuví ra janduvaha tsi ra.

<sup>16</sup> Tsa cuenda tsa janduvaha ra Jesús tsi ra can quivi quitatú nyivi, xaan xaan cuñi ra Israel naha ra nyehe ra naha tsi ra. Tan cuñi ra naha cahñi ra naha tsi ra.

<sup>17</sup> Maa tyin ra Jesús catyi ra tshin ra naha: —Maa Jutu yu, nda vityin tan jahá tyiñu ra. Tan jahá tyiñu tucu yuhu —catyi ra.

<sup>18</sup> Tan tsa cuenda tsa cahān ra yacan, xaan ca cuñi ra Israel can naha ra. Tan ñihi ca cuñi ra naha cahñi ra naha tsi ra tyin cuñi maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

*Sehe Nyoo iyó xaan ndatu tsi ra cundaca ñaha ra*

<sup>19</sup> Tacan tan catyí ra Jesús tsihin ra naha: —Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu.

<sup>20</sup> Tyin cuñi xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can.

<sup>21</sup> Tumaa janandotó Nyoo Jutu yu ndiyi, tan tsahá ra ñayivi coo ñi, tacan tucu yuhu tsa cuví yu Sehe ra, tsahá yu ñayivi coo nyivi cuñi maa yu cuhva yu.

<sup>22</sup> Tacan Nyoo Jutu yu, ña jandaa ca ra cuatyí ndi intuhun nyivi tyin tsa tsahá ra ndatu tsi yuhu tsa cuví yu Sehe ra tyin jandaa yu cuatyí nyivi.

<sup>23</sup> Tacan icá Nyoo Jutu yu tsa cuñi ra jacahnu nyivi tsi Sehe ra tumaa tsa jacahnú maa ñi tsi maa ra. Nyivi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsj tsi yu.

<sup>24</sup> Tan tsa nditsa caahán yu tyin nyivi tyaá soho tsa caahán yu tan tsinú iñi ñi tsi ra tsa jaquitsj tsi yu, iyó ñi ñayivi nyito tsa ña cua naa maa. Tan ña cua cuhun ca ñi anyaya tsa catyí cuatyí ñi tyin tsa jacacu Nyoo tsi ñi tan ña yihí ndaha ca tuhun tsihí tsi ñi, tan tsahá ra ñayivi nyito iyó ñi.

<sup>25</sup> Nyivi; tumaa ndiyi cuví ñi. Tan tsa nditsa caahán yu tsihin ndo tyin vatsí quivi cua cuñi ñi ndusu Sehe Nyoo. Tan nyivi tsa cua tyaá yahvi tsa caahán ra, cua coo ñi ñayivi nyito tsa ña cua naa maa. Tan vityin cuví quivi tsa caahán yu tuhun.

<sup>26</sup> Tyin Nyoo Jutu yu iyó ra ñayivi nyito tsa ña cua naa maa. Tan tsahá ra ndatu can tsi yuhu tsa cuví yu Sehe ra tyin cuhva yu ñayivi can coo nyivi.

<sup>27</sup> Tan tsahá tucu Nyoo ndatu tsi yu tsa jandaa yu cuatyí nyivi, tyin Rayii quee nda gloria cuví yu.

<sup>28</sup> Ña iyo cuñi ndo tsa caahán yu tyehen, tyin cua tsaá quivi tsa cuñi ndiyi yucú tsitsi ñaña ndusu Sehe Nyoo.

<sup>29</sup> Tan cua quita ñi tsitsi ñaña ñi. Tacan tan nyivi tsa javahá tsa vaha cua nandoto ñi tyin coo ñi ñayivi nyitó. Maa tyin nyivi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

*Nujanahá tsi tyin ra Jesús iyó ndatu tsi ra tsa cuhva ra ñayivi nyito coo nyivi*

<sup>30</sup> Yuhu ña cuví javaha yu tsa javahá yu tsa intuhun ñi maa yu. Yuhu jandaa yu cuatyí nyivi tumaa cuhva tava tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñi maa yu, tyin javahá yu cuhva caahán maa Jutu yu, ra tsa jaquitsj tsi yu.

<sup>31</sup> Tan tatun juvin ñi maa yu cuví tsa ndaa tsa cuenda yu, nduve yahvi nyaá tsa ndaa can.

<sup>32</sup> Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa.

<sup>33</sup> Nyooho tava tyiñu ndo na ndaca tuhun ra naha tsi ra Juan. Tan tuhun tsa cahān ra, tsa nditsa cuví tsi.

<sup>34</sup> Maa tyin yuhu ña tsiññuhú tsa cuví rayii tsa ndaa tsa cuenda yu. Maa tyin caahán yu tuhun tsa cahān ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo.

<sup>35</sup> Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quivi cusí iñi ndo tsihin ñuhú nditsin can.

<sup>36</sup> Maa tyin yuhu iyó iin tsa ndaa vaha ca tsi yu tan ñavin ca tsa caahān ra Juan. Tyin tandihí tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsj tsi yu.

<sup>37</sup> Tacan tucu Jutu yu, ra tsa jaquitsj tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehe ndo tsi ra.

<sup>38</sup> Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsj tsi yu.

<sup>39</sup> Nyooho tsihin cuenda xaan cahví ndo nu tutu Nyoo, tyin cuñi maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi.

<sup>40</sup> Tan nyooho ña cuñi ndo quitsi ndo nu nyaá yu tan cuhva yu ñayivi nyito coo ndo.

<sup>41</sup> Yuhu ña nducú yu tsa jacahnu nyivi tsi yu.

<sup>42</sup> Tyin yuhu tsitó yu tsi ndo tan tsitó yu tyin ña cuñi ndo tsi Nyoo.

<sup>43</sup> Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo.

<sup>44</sup> Nyooho ña cuví tsinu iñi ndo tsi yu tyin cuñi ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó.

<sup>45</sup> Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñi maa ndo tyin ley tsa tyaá ra Moisés cua

cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaā ra.

<sup>46</sup>Tyin tun tsatyin nditsa tsa tsinú iñi ndo tsa cahán ra Moisés, tacan cua tsinu ndihi iñi ndo tsa caahán yuhu. Tyin tuhun yuhu cuví tsa tyaā ra.

<sup>47</sup>Maa tyin tatun ña tsinú iñi ndo tuhun tsa tyaā ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityí nuu tsihin ra Israel naha ra.

## 6

*Nu jacatsi ra Jesús uhun mil rayii*  
(Mt. 14.13-21; Mr. 6.30-44; Lc. 9.10-17)

<sup>1</sup>Tsa yaha yacan, tan cuahán ra Jesús inga tsiyo miñi cahnu tsa nañi Nduya Ñuhu Galilea. Tan juvin ñi nañi tucu tsi Miñi Tiberias.

<sup>2</sup>Cuaha xaan nyivi cuahán nyicun tsi ra tyin nyehe ñi tsa iyo tsa javahá ra tyin jan-duvahá ra tsi nyivi cuuhvi.

<sup>3</sup>Tacan tan ra Jesús ndaā ra iin yucu tan tsinyaā ra ican tsihin ra tsicá tsihin ra.

<sup>4</sup>Tan tsa cuyatyn cuii tahan tsi quivi vico pascaua tsa jacahnú nyivi Israel.

<sup>5</sup>Tan nyehe ra Jesús tyin cuaha xaan nyivi nyicún tsi ra, tacan tan quitsaha caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

<sup>6</sup>Caahán ñi maa ra tsihin ra Felipe tyin nducú cuhva ra tsi ra náa cua cahán ra, tyin tsa tsitó maa ra Jesús náa cua javaha ra.

<sup>7</sup>Tacan tan nacahán ra Felipe tan catyí ra: —Xuhun tsa quihin yo tsa jahā tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

<sup>8</sup>Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

<sup>9</sup>—Ihya nyii iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

<sup>10</sup>Tacan tan catyí ra Jesús tsihin ra naha: —Cahan ndo tsihin tandihi nyivi na cun-yecu ñi —catyí ra.

Tan cuaha xaan itya ican tan tsinyecu ñi, uhun mil rayii, [tan siin maa ñi ñaha tsihin tsa nyihí].

<sup>11</sup>Tacan tan quihin ra Jesús paan can tan tsa yaha tsaha ra tyahvi nyoo tsi Nyoo, tan tsaha ra can tsi ra tsicá tsihin ra. Tan ra can naha ra, tsaha ra naha can tsi tandihi nyivi tsa nyecu can. Juvín ñi tacan icā nyico ra tsihin tyaca can. Tan tsatsj ndaha iñi ñi.

<sup>12</sup>Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tivi tsi —catyí ra tsihin ra naha.

<sup>13</sup>Naquihin vaha ra naha can, tan jacutu ra naha utsi uvi tyica tsihin tsa ñahñu tsa ndoo tsa uhun taahan paan can.

<sup>14</sup>Tacan tan tsa yaha nyehe nyivi can tsa iyo tsa javaha ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvin ra nyaá tsa quitsi maa nu ñuhu ñayivi ihya —catyí ñi.

<sup>15</sup>Maa tyin tsa tuvj iñi ra Jesús tyin cuñi ñi tsa quihin ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyi intuhun ñi maa ra.

*Nu tsicá ra Jesús nu ndutya*  
(Mt. 14.22-27; Mr. 6.45-52)

<sup>16</sup>Tsa cunaaha, nuu ra tsicá tsihin ra Jesús yuhu miñi can.

<sup>17</sup>Tan quihvi ra naha tsitsi yutun ndoo tyin cua yaha sava ra naha mahñu miñi can tan cua tsaa ra naha ñuu Capernaum. Tsa cunaaha tan ra Jesús ñaha ca maa tsaa ra.

<sup>18</sup>Tacan tan tsaa tatyí ñihí. Tan iyo ndu-vitā ndutya miñi can.

<sup>19</sup>Tsa tsa yaha ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyn ra nu cuahán yutun ndoo can, nayuhvi xaan ra naha.

<sup>20</sup>Maa tyin catyí ra Jesús tsihin ra naha: —¡Maa yu cuví, ña ngayuhvi ndo!

<sup>21</sup>Tacan tan tsaha ra naha quihvi ra Jesús tsitsi yutun ndoo can. Tan iin yaha ñi tsaa ra naha yuhu miñi nu cuahán ra naha.

*Nu nanducú nyivi tsi ra Jesús*

<sup>22</sup>Tsa tuvi inga quivi tan tsitō nyivi tsa ndo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsitō ñi tyin ña cuahán ra Jesús tsihin ra naha.

<sup>23</sup>Maa tyin tsaa taahan ca yutun ndoo tsa quee ñuu Tiberias yatyn ñi nu nacuhva Jutu Mañi yo tyahvi nyoo tsi Nyoo tan tsatsj nyivi paan.

<sup>24</sup>Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaa tan cuahán ñi nda ñuu Capernaum cua nanducu ñi tsi ra.

*Ra Jesús cuví paan tsa tsahā ñayivi nyito coo yo*

<sup>25</sup>Tsa tsaa ñi inga tsiyo miñi can, nañihí ñi tsi ra Jesús. Tan tsicā tuhun ñi tsi ra:

—Maestro, ¿náa cuhva tsaa un ihya? —catyí ñi tsihin ra.

<sup>26</sup>Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyooho nanducú ndo tsi yu maa tyin ñavin cuenda tsa nyehe ndo tsa iyo tsa javaha yu. Nanducú ndo tsi yu tyin tsatsj ndo tan ndaha iñi ndo.

<sup>27</sup> Ña jaha tyiñu ndo cuenda tunyee iñi tsa tsatsí ndo tsa cua ndiñi ñi maa, jaha tyiñu ndo cuenda tunyee iñi tsa catsi ndo tsa ña cua ndiñi tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuví Rayii tsa quee nda gloria —catyí ra Jesús.

<sup>28</sup> Tacan tan quitsaha tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

<sup>29</sup> Tacan tan catyí ra Jesús tsihin ñi:

—Tsa cuñi Nyoo javaha ndo, cuví tsa tsinu iñi ndo tsa caahán yuhu, ra tsa jaquitsj ra —catyí ra Jesús tsihin ñi.

<sup>30</sup> Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un?

<sup>31</sup> Tsii tsahnu ndi tsatsj ñi maná nu tsiquí, tumaa tsa caahán tuhun Nyoo tyehe: “Andivi quee paan tsatsj nyivi jaha Nyoo” —catyí ñi tsihin ra Jesús.

<sup>32</sup> Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsaha paan tsa quee andivi tsatsj ñi, tyin maa Nyoo Jutu yu cuví ra tsahá paan nditsa tsa quee andivi.

<sup>33</sup> Tyin paan tsa tsahá Nyoo, yacan cuví ra tsa quee andivi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

<sup>34</sup> Tacan tan quitsaha catyí ñi tsihin ra:

—Taa, cuhva paan can catsi ndi tandihi ñi quivi —catyí ñi.

<sup>35</sup> Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyivi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityi iñi ñi.

<sup>36</sup> Maa tyin tumaa tsa caahán yu tsihin ndo, nyehé vaha ndo tsi yu, maa tyin ña cuñi ndo tsinu iñi ndo tyin juvin yu cuví ra tsa cuví jatynyee tsi ndo

<sup>37</sup> Tandihi nyivi tsa tsaha Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi.

<sup>38</sup> Tyin yuhu tsa quee andivi; vatsí yu vatsí javahá yu cuhva cuñi ra tsa jaquitsj tsi yu. Ña vatsí yu vatsí javaha yu cuhva cuñi ñi maa yu.

<sup>39</sup> Tan cuhva cuñi ra tsa jaquitsj tsi yu, yacan cuví tsehe: tsa ña cunaa ndi intuhun

nyivi tsa tsahá ra tsi yu, tan janandoto yu tsi ñi nu cua cundihi quivi.

<sup>40</sup> Jutu yu, ra tsa jaquitsj tsi yu, cuñi ra tyin tandihi nyivi tsa cutuñi iñi tyin Sehe Nyoo cuví tsi yu, tan tsinu iñi ñi tsa caahán yu, cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihi quivi —catyí ra Jesús tsihin ñi.

<sup>41</sup> Tsa cuenda tsa cahan ra Jesús yacan, tan quitsaha caahán nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra.

<sup>42</sup> Tacan tan quitsaha catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andivi quee ra? —catyí ñi.

<sup>43</sup> Tacan tan catyí ra Jesús tsihin ñi:

—Jandihí ndo tsa caahán nyaa ndo.

<sup>44</sup> Yoñi maa nyivi cuví quitsi quitsi nyicún tsi yu tatun ñavin Jutu yu, ra tsa jaquitsj tsi yu, caná tsi ñi. Tan cua janandoto yu tsi ñi nu cua cundihi quivi.

<sup>45</sup> Nu libru tsa tyaá ra cuví ndusu yuhu Nyoo caahán tsi tyehe: “Nyoo cua jacuaha ra tsi tandihi nyivi” catyí tsi. Yacan cuenda nyivi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

<sup>46</sup> Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra.

<sup>47</sup> Tsa nditsa catyí yu tsihin ndo tyin nyivi tsa tsinú iñi tsa caahán yu tsa iyó ñi ñayivi nyito tsa ña cua naa maa.

<sup>48</sup> Yuhu cuví paan tsa tsahá tsa coo nyito añima ñi.

<sup>49</sup> Tsii tsaahnu ndo tsatsj ñi maná nu tsiquí, maa tyin juvin ñi tsihi ñi.

<sup>50</sup> Maa tyin yuhu, tuhun paan tsa quee andivi caahán yu tsihin ndo, tyin nyivi tsa cua catsi paan can, ña cua cúu ñi.

<sup>51</sup> Juvín ñi maa yu cuví paan nyito tsa quee andivi. Nyivi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihi nyivi iyó nu ñuhu ñayivi —catyí ra Jesús tsihin ñi.

<sup>52</sup> Tacan tan nyivi Israel can quitsaha natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

<sup>53</sup> Tan catyí ra Jesús:

—Tsa nditsa catyí yu tsihin ndo, tyin yuhu cuví Rayii tsa quee nda gloria, tan tatun nyooho tan ña cua catsi ndo cuñu ñuhu yu, tan ña coho ndo niñi yu, ña cuví coo ndo ñayivi nyitó.

<sup>54</sup> Nyivi tsatsí cuñu ñuhu yu tan tsihi ñi niñi yu, iyó ñi ñayivi nyito tsa ña cua naa maa.

Tan yuhu cua janandoto yu tsi ñi nu cua cundihi quivi.

<sup>55</sup> Tyin cuñu ñuhu yu yacan cuví paan tsa nditsa tsa taahán tsi catsi ñi, tan ñiñi yu cuví vinu tsa nditsa tsa taahán tsi coho ñi.

<sup>56</sup> Nyivi tsatsí cuñu ñuhu yu tan tsihi ñi ñiñi yu, iin ñi cuví ñi tsihin yu. Tan iin ñi cuví yu tsihin ñi.

<sup>57</sup> Jutu yu, ra tsa jaquitsi tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsí cuñu ñuhu yu, cua coo ñi tsihin tunyee iñi tsa iyó tsi yu.

<sup>58</sup> Tuhun paan tsa quee andivi caahán yu. Paan ihya ñavin tumaa maná tsa tsatsí tsií tsahnu yo cuví tsi, tyin juvin ñi tsihi ñi. Nyivi tsatsí paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

<sup>59</sup> Juvin yacan jacuahá ra Jesús nu ndu iin nyivi tsitsi vehe ñuhu ñuu Capernaum.

<sup>60</sup> Cuaha xaan nyivi nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yí xaan naquihin vaha yo itsi. Yoñi maa cua tsinu iñi tsa caahán ra —catyí ñi.

<sup>61</sup> Tacan tan tuví iñi ra Jesús tyin ña cuñí ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñí ndo tsa caahán yu ihya?

<sup>62</sup> Tan ñáa cua javaha ndo tatun nyehe ndo tsi yuhu Rayí tsa quee nda gloria nandaa nyico yu inga tsaha ityi nu quee yu?

<sup>63</sup> Tatyí Ii Nyoo tsahá ñayivi nyito. Tan cuñu ñuhu, ña jatinyee tsi tsa coo yo ñayivi can. Tan tsa caahán yuhu tsihin ndo, Tatyí Ii Nyoo cuví tsi tan tsahá tsi tsa coo nyitó añima ndo.

<sup>64</sup> Maa tyin yihí ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsitó maa ra yóo ña cua tsinú iñi tsi ra tan yóo cua xico tsi ra.

<sup>65</sup> Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

<sup>66</sup> Nda quivi can, tan cuaha xaan nyivi nyicún tsi ra Jesús nacoq ñi tsi ra. Tan ña tsicá ca ñi tsihin ra.

<sup>67</sup> Tacan tan tsicá tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñí ndihi tucu nyooho cahun ndo? —catyí ra tsihin ra naha.

<sup>68</sup> Maa tyin nacahan ra Simón Pedro tan catyí ra:

—Jutu Mañi yu, ¿yóo cunycun ndi? Tan intuhun ñi maa un caahán tuhun ñayivi nyito tsa ña cua naa maa.

<sup>69</sup> Nyuhu tsinú iñi ndi, tan tsitó ndi tyin yooho cuví ra Cristo Sehe Nyoo nyito.

<sup>70</sup> Tan nacahan ra Jesús tan catyí ra:

—¿A ñavin yuhu nacatsí tsi tandihi tsa utsi uvi ndo? Tan intuhun ndo yihí nu ña vaha —catyí ra.

<sup>71</sup> Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

## 7

*Nu ña tsinú iñi yañi ra Jesús tsi ra*

<sup>1</sup> Tsa yahá yacan, tan nyíí ra Jesús tsicá nuu ra nu cuví Galilea. Ña cuñí ra cahun ra nu cuví Judea tyin ra cuví ityi nuu tsihin nyivi Israel can naha ra cuñí ra naha cahñi ra naha tsi ra.

<sup>2</sup> Tacan tsa cuyatyin quivi vico tsa jacahnú nyivi Israel ndihi ñi cuiya. Tan nañí tsi Vico Tyahva.

<sup>3</sup> Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un.

<sup>4</sup> Tyin tatun cuñí yo tsa coto nyivi tsi yo, ña javahá xeehe yo tsa javahá yo. Tan yooho tatun nditsa tsa javahá un, javaha can nuu tandihi nyivi —catyí tandihi yañi ra.

<sup>5</sup> Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra.

<sup>6</sup> Tacan tan catyí ra Jesús tsihin ra naha:

—Ñaha ca tsaa hora tsa cahun yuhu. Maa tyin nyooho ndaa quivi ñi cuví cahun ndo.

<sup>7</sup> Tyin vaha cuñí nyivi nyehé ñi tsi ndo, maa tyin yuhu ndasi cuñí ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi.

<sup>8</sup> Cuaahan nyooho vico can. Yuhu ña cahun yu tyin ñaha ca tsaa hora tsa taahán tsi cahun yu —catyí ra.

<sup>9</sup> Yahá can tan ndoo ra nu cuví Galilea.

*Nu nyíí ra Jesús nu iyó vico Tyahva*

<sup>10</sup> Tsa yahá cuahán yañi ra Jesús vico can, tsahan cuahán ndihi ra, maa tyin cuahán xeehe ñi ra.

<sup>11</sup> Tan ra cuví ityi nuu tsihin nyivi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíí ra can? —catyí ra naha.

<sup>12</sup> Tan caahán nyivi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyivi”, catyí ñi.

<sup>13</sup> Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

<sup>14</sup> Tsa cusava iyó vico tan tsaq ra Jesús tsitsi vehe ñuhu cahun tan quitsahá jacuaha ra tsi nyivi.

<sup>15</sup> Tan ra cuví ityi nuu can iyó cuñí ra naha tan quitsahá natuhun tahan ra naha:



—¿Nacaa tyin tsitó ra ihya tan ña cahví ra? —catyí ra naha.

<sup>16</sup> Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsí tsi yu cuví tsi.

<sup>17</sup> Tatun yihí nyooho tsa cuñí javaha cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu.

<sup>18</sup> Nyiví tsa caahán cuenda maa ñi, caahán ñi tyin cuñí ñi tsa jacahnu nyiví tsi ñi. Maa tyin ra nducú tsa jacahnu nyiví tsi Nyoo, ra tsa jaquitsí tsi ra, ra ican caahán tsa nditsa. Tan ña jandaví ñaha ra.

<sup>19</sup> ¿A ña nditsa tyin ra Moisés tsa hā ra ley tsi ndo? Maa tyin ndi intuhun nyooho tan ña tyaá yahví ndo ley can. ¿Nacuenda cuñí ndo cahñi ndo tsi yu? —catyí ra.

<sup>20</sup> Tan nacahan nyiví tan catyí ñi tsihin ra: —Tatyí ña vaha yihí tsi yooho. Yoñi cuñí cahñi tsi un —catyí ñi tsihin ra.

<sup>21</sup> Tan catyí ra Jesús:

—Tscatyí tsa javahā yu tsa iyo quiví quitatu yo, yacan ndasi cuñí ndo nyehé ndo tsi yu.

<sup>22</sup> Maa tyin ra Moisés catyí ra tsihin ndo tyin coo ndo tsihin tsa cunyya tuñi Nyoo tsi sehe yihí ndo. Vasu ñavin ra quitsahā tsihin tuhun can, maa tyin nyiví cuví nyiví ra ityi tsata, jihna ca ñi javahā tacan. Yacan cuenda javahá ndo can vasu taahán tsi quiví quitatu yo.

<sup>23</sup> Tan vityin, vaha tatun tsa cuenda tsa ña cuñí ndo cumañi ndo ley ra Moisés tan javahá ndo tuhun can vasu quiví quitatú yo cuví. Maa tyin tatun tacan javahá ndo, ¿nacuenda tyin cuxaan ndo tsi yu tsa janduvahā yu tsi ra can quiví quitatú yo?

<sup>24</sup> Ña tyaá ndo cuatyí siqui nyiví tatun ña tsitó vaha ndo náa javahá ñi. Cyata ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

*Nu cahān ra Jesús tuhun maa ra*

<sup>25</sup> Tacan tan juhva nyiví iyó Jerusalén, quitsahā tsicá tuhun ñi:

—¿A ñavin ra ihya nducú xaan ra naha tyin cua cahñi ra naha tsi ra?

<sup>26</sup> Caahán nditsin ra tsihin nyiví. Tan yoñi caahán náa caahán tsihin ra. Vasiqui tsinú ndihí maa ñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsí Nyoo.

<sup>27</sup> Yoo tsitó vaha yo nu quee ra ihya, tan quiví quitsi ra Cristo yoñi maa cua coto numaa ityi cua quee ra —catyí ñi.

<sup>28</sup> Ra Jesús nyii ra tsitsi vehe ñuhu jacuahá ra, tan tsitó ra tsa natuhún nyiví, yacan cuenda ñihí cahān ra tan catyí ra:

—¿Nyooho cuñí maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsí tsi yu, ra tsa cuví tsa nditsa. Nyooho ña nacotó ndo tsi ra.

<sup>29</sup> Yuhu nacotó yu tsi ra tyin cuenda ra vatsí yu, tan maa ra jaquitsí tsi yu —catyí ra Jesús.

<sup>30</sup> Tacan tan cuñí ra naha tyihí ra naha tsi ra tsitsi vehe caa. Maa tyin ndi intuhun ra naha tan ña caná ñi ra naha tñin ra naha tsi ra tsa cuenda tyin ñaha ca tahan tsi quiví tsa taahán maa tsi tñin ra naha tsi ra.

<sup>31</sup> Maa tyin cuaha xaan nyiví tsinú ñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

*Nu jacuhun ra cuví fariseo naha ra tsi ra vitya tyin tñin ra naha tsi ra Jesús*

<sup>32</sup> Tsa tsiñi ra fariseo naha ra tsa caahán nyiví tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tñin ra naha tsi ra Jesús.

<sup>33</sup> Tacan tan catyí ra Jesús:

—Juhva cuiñi ña quiví cua cunyya yu tsihin ndo. Yahā can tan cuacunuhu yu nu nyaá ra tsa jaquitsí tsi yu.

<sup>34</sup> Nyooho cua nanducu ndo tsi yu. Maa tyin ña cua nañihí ndo tsi yu. Tyin ña cua cuví cahun ndo nu cua cunyya yu —catyí ra Jesús.

<sup>35</sup> Tacan tan quitsahā natuhún tahan ra cuví ityi nuu tsihin nyiví Israel naha ra:

—¿Numaa cua cahun ra ihya tsa ña cua nañihí yo tsi ra? ¿A cahun ra nu iyó ra Israel ñuu Grecia naha ra tyin jacuahā ra tsi nyiví iyó Grecia can?

<sup>36</sup> ¿Naa cuñí tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañihí ca ndo tsi yu tyin ña cua cuví cahun ndo nu cua cunyya yu” —tacan caahán yuhu tahan ra naha tuhun ra Jesús.

*Nyiví tsinú ñi tsi Nyoo cua coo Tatyí Ii ra añima ñi*

<sup>37</sup> Quiví ndihí tsicoo vico, yacan cuví quiví tsa ñihí ca. Tan quiví can nduvitā ra Jesús tan ñihí caahán ra tan catyí ra:

—Tatun ndaa nyooho na ityi ñi ndo, naha ndo tan tsinu ñi ndo tsa caahán yu.

<sup>38</sup> Tyin nyiví tsa tsinú ñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

<sup>39</sup> Maa tyin tsihin yacan cuñí ra catyí ra tyin ñi tsinú ñi tsi ra cua ñihí ñi Tatyí Ii Nyoo, tyin quiví can ñaha ca quitsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnu jutu ra tsi ra.

*Nu natahvj sava nyivi tsa cuenda ra Jesús*

<sup>40</sup> Juhva nyivi tsa tsiñi yacan, catyí ñi:

—Nditsa tsa cuii tyin ra ihya cuví ndusu yuhu Nyoo tsa nyaá tsa cua quitsi —catyí ñi.

<sup>41</sup> Tan inga ñi catyí ñi:

—Ra ican cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuví ra Cristo?

<sup>42</sup> Tyin nu tutu Nyoo catyí tsi tyin ra Cristo cua cuví ra nyivi tata ra rey David, tan ra ñuu Belén tsa canyii nu cuví Galilea cua cuví ra, tumaa ra David —catyí ñi.

<sup>43</sup> Tacan tan nyivi can natahvj sava ñi tsa cuenda ra Jesús.

<sup>44</sup> Yihí ñi cuñi ñi quihin ñi tsi ra tan tyihí ñi tsi ra tsitsi vehe caa. Maa tyin yoñi tñin tsi ra.

*Ra cuví ityi nuu vehe ñuhu naha ra ña tsinú iñi ra naha tsi ra Jesús*

<sup>45</sup> Tacan tan ra vitya tsa iyó vehe ñuhu cahnu can, cuanuhu ra naha nu yucu ra fariseo naha ra tsihin ra cuví ityi nuu tsihin ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

<sup>46</sup> Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa caahán ra can! —catyí ra naha.

<sup>47</sup> Tacan tan catyí ra fariseo naha ra tsihin ra vitya can naha ra:

—¿A jandavj ñaha ndihi ra can tsi nyooho?

<sup>48</sup> Nyehé ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can.

<sup>49</sup> Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

<sup>50</sup> Tacan tan ra Nicodemo, ra tsa tsahan nu nyii ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

<sup>51</sup> —Catyí ley tyin ña cuví tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

<sup>52</sup> Tacan tan nacahan ña naha tan catyí ra naha tsihin ra:

—¿A juvin ñi ra Galilea cuví ndihi tucu yooho? Cahvi nu tutu Nyoo tan nyehé un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

*Ñaha tsa quituvj tsihin rayii tsa ñavin yii ña cuví*

<sup>53</sup> Tacan tan cuanuhu intuhun intuhun ra naha nda yuvehe ra naha.

## 8

<sup>1</sup> Maa tyin ra Jesús cuahán ra yucu Olivo.

<sup>2</sup> Tsa cunditsin inga quivi, cuahán nyico ra Jesús inga tsaha vehe ñuhu cahnu. Tan

tandihí nyivi natuhva ñi nu nyii ra. Tan tsinyaá ra tan quitsahá caahán ra tsihin ñi.

<sup>3</sup> Tacan tan ra jacuahá ley vehe ñuhu tan ra cuví fariseo naha ra tsaá ra naha tsihin iin ñaha iyó yii tyin tñin ra naha tsi ña nu tsicoo cuatyí ña tsihin inga rayii. Tan tyaa ra naha tsi ña mahñu nyivi tsa nyecú can.

<sup>4</sup> Tan quitsahá catyí ra naha tsihin ra Jesús:

—Maestro, tñin ndi tsi ñaha ihya nu tsicoo cuatyí ña tsihin inga rayii.

<sup>5</sup> Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nacaa catyí un? —catyí ra naha tsihin ra.

<sup>6</sup> Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siqui ra. Tacan tan tsinyaá tyayii ra Jesús nu ñuhu tan quitsahá tyaá ra letra nu ñuhú tsihin nundaha ra.

<sup>7</sup> Maa tyin nducú tuhun ca ra naha tsi ra, tacan tan nduvitá nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

<sup>8</sup> Tan tsinyaá tyayii nyico ra tan quitsahá jañihí ca ra tyaá ra letra nu ñuhu.

<sup>9</sup> Tsa tsiñi ra naha tsa caahán ra tacan, tuvj iñi ra naha tyin iyó tucu cuatyí maa ra naha. Tan quitsahá quitá intuhun intuhun ra naha, jihna ca ra tsahnu naha ra quitá. Cuhva tsa ndihí ra naha quitá cuahán tan ndoq intuhun ña maa ra Jesús tsihin ñaha can mahñu nu nyecú nyivi can.

<sup>10</sup> Tacan tan nduvitá nyityi ra Jesús tan nyehé ra tyin tsa cuahán ra naha tan ndoq intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaa cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

<sup>11</sup> Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

*Ra Jesús cuví tsa nditsin tsa jandunditsin añima nyivi*

<sup>12</sup> Tacan tan cahán nyico ra Jesús tsihin nyivi inga tsaha, tan catyí ra tsihin ñi:

—Yuhu cuví ra tsa jandunditsin añima nyivi iyó nu ñuhu ñayivi. Yóo nyivi tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

<sup>13</sup> Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

<sup>14</sup> Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyooho ña tsitó ndo numaa ityi quee yu tan numaa ityi cua cuhun yu.

<sup>15</sup> Nyooho yatyi xaan caahán ndo tsa caa nyivi. Maa tyin yuhu, ña caahán yu tsa caa ñi.

<sup>16</sup> Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu.

<sup>17</sup> Nu ley nyooho nyaá tyin tatun uvi ra tsahá tsa ndaa, cuñi tsi tsinú iñi yo tsa caahán ra naha.

<sup>18</sup> Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

<sup>19</sup> Tacan tan tsicá tuhun ra naha tsi ra:

—¿Numaa nyii jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihi ndo tsi Jutu yu —catyí ra.

<sup>20</sup> Tuhun ihya cahan ra Jesús tsitsi tsa jacuahá ra tsitsi vehe ñuhu cahnu, nu nyii caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahán tsi cuhun ra.

*“Nu cuhun yuhu ña cua cuví cuhun ndo”,  
catyí ra Cristo*

<sup>21</sup> Tacan tan quitsahá caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cuhun yuhu, nyooho ña cua cuví cuhun ndo —catyí ra Jesús tsihin ra naha.

<sup>22</sup> Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuví cuhun yo nu cuahán ra —catyí ra naha.

<sup>23</sup> Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui quee yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu.

<sup>24</sup> Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí

ndo siqui ndo quivi cúu ndo —catyí ra Jesús tsihin ra naha.

<sup>25</sup> Tacan tan quitsahá tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahan ra Jesús tan catyí ra:

—Tsa yaha cahan yu tsihin ndo nda quivi jihna.

<sup>26</sup> Cuaha xaan ca tsa ndi cumañi cahan yu tsihin ndo, tan ndi cumañi cahan yu cuhva iyó ndo. Maa tyin tsa caahán yu tsihin nyivi iyó nu ñuhu ñayivi, cuví tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

<sup>27</sup> Maa tyin ra Israel naha ra ña cutuñi iñi ra naha tatun tuhun Nyoo Jutu yo cahan ra tsihin ra naha.

<sup>28</sup> Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayii tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu.

<sup>29</sup> Tyin Jutu yu, ra tsa jaquitsi tsi yu, nyii ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñi ra —catyí ra Jesús.

<sup>30</sup> Tsa cahan ra Jesús yacan, cuaha xaan ra naha quitsahá tsinú iñi tsi ra.

*Nyivi cuví sehe Nyoo tan nyivi javahá tsa  
caquiñi*

<sup>31</sup> Tacan tan catyí ra Jesús tsihin nyivi Israel, tsa quitsahá tsinú iñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyivi tsa nditsa yihí cuenda yu.

<sup>32</sup> Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

<sup>33</sup> Tan nacahan ra naha tan catyí ra naha: —Nyuhu nyivi tata ra Abraham cuví ndi. Ndi iin tsaha tan ñaha ca cuví ndi musu nyivi. ¿Nacaa tsa catyí yooho tyin quita nuña ndi? —catyí ra naha tsihin ra.

<sup>34</sup> Tan catyí ra Jesús:

—Tsa nditsa catyí yu tsihin ndo tyin tandihí nyivi javahá tsa caquiñi, musu cuenda tsa caquiñi cuví ñi.

<sup>35</sup> Iin musu ña ndoo cuii ra vehe tsitoho ra. Maa tyin ra cuví sehe tsitoho vehe can, ndoo cuii ra vehe jutu ra.

<sup>36</sup> Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuii tyin ña cua cundaca ñaha ca tsa ña vaha tsi ndo.

<sup>37</sup> Tsa tsitó yu tyin tata ra Abraham cuví ndo. Maa tyin yihí ndo cuñi ndo cahñi ndo tsi yu, tyin ña naquihín vaha ndo tsa caahán yu.

<sup>38</sup> Yuhu caahán yu tsa janahá Jutu yu tsi yu. Tan nyooho javahá ndo tsa caahán ra cuví jutu ndo tsihin ndo —catyí ra tsihin ra naha.

<sup>39</sup> Tan nacahán ra naha tan catyí ra naha: —Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha: —Tun tsatyin nditsa tsa tata ra Abraham cuví tsi ndo, cua javaha ndo tsa javahá ra.

<sup>40</sup> Maa tyin nyooho, vasu caahán yu tsihin ndo tsa nditsa tsa janahá Nyoo tsi yu, nyooho cuñí ndo cahñi ndo tsi yu. ¡Ra Abraham ña javahá ra tacan!

<sup>41</sup> Nyooho javahá ndo tumaa javahá jutu ndo —catyí ra tsihin ra naha.

Tacan tan nacahán ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

<sup>42</sup> Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñí ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsj tsi yu.

<sup>43</sup> ¿Nacuenda ña cutuñi ñi ndo tsa caahán yu tsihin ndo? Tsa cuenda tyin ña cuñí ndo tyaá soho ndo tsa caahán yu.

<sup>44</sup> Cuihna cuví jutu ndo. Tan sehe nu tsi ndo. Tan cuñí ndo javaha ndo cuhva cuñí nu. Tan nu ña vaha can cuví nu tsaññi nyivi nda quivi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyivi tyin cuñí nu tsa coo ñi cuhva iyó nu tyin vatya xaan nu. Tan jutu nyivi vatya cuví nu.

<sup>45</sup> Tan yuhu caahán yu tsa nditsa, maa tyin nyooho ña tsinú ñi ndo tsa caahán yu.

<sup>46</sup> ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú ñi ndo tsi yu?

<sup>47</sup> Nyivi cuenda Nyoo tyaá soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñí ndo tyaá soho ndo tsa caahán yu —catyí ra Jesús.

*Ra Cristo, tsa iyó maa ra nda ndi cumañi ca coo ra Abraham,*

<sup>48</sup> Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tsihin ra.

<sup>49</sup> Tan nacahán ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu.

<sup>50</sup> Yuhu ña nducú yu tsa jacahnú nyivi tsi yu, maa tyin iyó iin ra nducú tsa jacahnú ñi tsi yu. Tan maa ra cua jandaa cuatyí ndo tatun ña jacahnú ndo tsi yu.

<sup>51</sup> Tsa nditsa catyí yu tyin nyivi tsa tyaá yahvi tsa caahán yu ña cua tsaá tuhun tsihiñi añima ñi —catyí ra Jesús tsihin ra naha.

<sup>52</sup> Tacan tan nacahán ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihí ca ra cuví ndusu yuhu Nyoo tsihiñi ra naha. Tan yooho catyí un tyin nyivi tyaá yahvi tsa caahán un ña cua cúu ñi.

<sup>53</sup> ¿A canhu ca ra cuví yooho tan ñavin ca ra Abraham jutu yo? Maa ra tsihiñi ra tan tacan tucu ra cuví ndusu yuhu Nyoo. ¿Yóo ra cuví yooho cuñí maa un? —catyí ra naha tsihin ra.

<sup>54</sup> Tan nacahán ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra.

<sup>55</sup> Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra.

<sup>56</sup> Ra Abraham tsií tsaahnu yo sñi xaan cuñi ra tyin cua nyehe ra quivi cua quitsi yuhu nu ñuhu ñayivi. Nyehe ra quitsi yu tan sñi xaan cuñi ra —catyí ra Jesús tsihin ra naha.

<sup>57</sup> Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

<sup>58</sup> Tan nacahán ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

<sup>59</sup> Tacan tan quihñi ra naha yuu tyin cua cañi ra naha tsi ra Jesús. Maa tyin iin yaha ñi quihñi xeehe ra tan yahá ra mahñu ra naha tan quita ra tsitsi vehe ñuhu can cuahán ra.

## 9

*Nu janduvahá ra Jesús tsi iin ra cuaa nda cacú ra*

<sup>1</sup> Cuhva tsa yahá ra Jesús iin nu yahá ra, nyehe ra tsi iin ra cuaa nda cacú ra.

<sup>2</sup> Tan quitsahá tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacú ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

<sup>3</sup> Tan nacahán ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee ifni ra tsi nyívi tsa cuenda ra can.

<sup>4</sup> Tsa tsinu cahñi, cuñí tsi tsa javaha yu tyiñu ra tsa jaquitsí tsi yu. Tyin tsa yatyin cuii cua cuaa tan ña cua cuví ca jaha tyiñu yu.

<sup>5</sup> Tsa ndi nyíi yu nu ñuhu ñayivi ihya, ñuhu jandunditsín [cuenda nyívi iyó] nu ñuhu ñayivi ihya cuví yu.

<sup>6</sup> Tsa yahā tsa cahān ra Jesús tacan, tan tiví sii ra nu ñuhu. Tan jatyií ra luxu nyahyu tsihin sii ra tan tyaā ra tinuu ra cuaa can.

<sup>7</sup> Tacan tan catyí ra tsihin ra cuaa can:  
—Cuaahan cua nacatya nuu un nda tanque Siloé. —Sivi can cuñí tsi catyí: “Jacuhun Yu Tsi Un.”

Tacan tan ra cuaa can tsahan ra tsi-nacatyā ra nuu ra. Tan cuhva tsa tsaā nyico ra, tsa nyehé ra.

<sup>8</sup> Tacan tan nyívi iyó yatyin yuvehe ra, tan nyívi tsa nyehé tsi ra tsa ndi cuaá ra catyí ñi:  
—¿A ñavin ra ihya cuví ra tuhvá tsinyaá tsicán xuhun? —catyí ñi.

<sup>9</sup> Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

<sup>10</sup> Tacan tan quitsahā tsicá tuhun ñi tsi ra:  
—¿Tan nácaa tyin cuví nyehé un vityin? —catyí ñi.

<sup>11</sup> Tan catyí ra:

—Ra tsa nañí Jesús, ra ican jatyií nyahyu tan tyaā ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yahā nacatya yu nuu yu tan nanyehé yu —catyí ra tsihin ñi.

<sup>12</sup> Tacan tan quitsahā tsicá tuhun ñi tsi ra:  
—¿Tan numaa nyíi ra can vityin?

Tan catyí ra tsihin ñi:

—Ña tsitó yu —catyí ra.

*Nu janahma ra cuví fariseo nahara tsi ra cuaā tsa nduvahā*

<sup>13</sup> Tacan tan tsindacā ñi tsi ra tsa nduvahā can nuu ra cuví fariseo naha ra.

<sup>14</sup> Tyin quívi tsa jatyií ra Jesús nyahyu tan janduvahā ra tsi ra can, cuví tsi quívi quitatú nyívi.

<sup>15</sup> Yacan cuenda ra cuví fariseo naha ra tsicā tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaā ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

<sup>16</sup> Tacan tan catyí juhva ra fariseo naha ra:

—Ra tsa javahā yacan ñavin cuenda Nyoo cuví ra, tyin ña tyaá yahvi ra quívi quitatú yo —catyí ra naha.

Maa tyin catyí inga ra naha

—¿Nacaa tsa cuví javahā ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahví sava ra naha.

<sup>17</sup> Tan tsicā tuhun nyico ra naha tsi ra nduvahā can inga tsaha, tan catyí ra naha tsihin ra:

—¿Tan yoocho, náa catyí un tuhun ra tsa janduvahā tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

<sup>18</sup> Maa tyin ra cuví ityi nuu tsihin nyívi Israel ña cuñí ra naha tsinu ifni ra naha tsa cuaā ra can tan nanyehé ra. Nda cuanda canā ra naha tsi jutu ra tan tsi sihi ra.

<sup>19</sup> Tan tsicā tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaá ra cacú ra? ¿Nacaa tsa cuví nyehé ra vityin? —catyí ra naha.

<sup>20</sup> Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quívi cacú ra.

<sup>21</sup> Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yoo janduvahā tinuu ra. Ndacā tuhun maa ndo tsi ra. Tsa iyó tucu maa cuiya ra. Tan cuví nacatyi tuhun maa ra tsihin ndo —catyí ñi tsihin ra naha.

<sup>22</sup> Jutu ra tan sihi ra caahán ñi tacan tsa cuenda tyin yuuhví ñi tsi ra cuví ityi nuu tsihin nyívi Israel naha ra, tyin tsa natuhun tahan ra naha tyin cua tava cuii ra naha tsi nyívi vehe ñuhu, tun cahan ñi tyin ra Jesús cuví ra Cristo, ra tsa jaquitsí Nyoo.

<sup>23</sup> Yacan cuenda catyí ñi: “Ndacā tuhun ndo tsi maa ra. Ra tsa ñihí cuví ra.”

<sup>24</sup> Tacan tan canā nyico ra naha tsi ra tsa nduvahā can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

<sup>25</sup> Tacan tan nacahan ra tsa nduvahā can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

<sup>26</sup> Tan tsicā tuhun nyico ra naha tsi ra inga tsaha tan catyí ra naha:

—¿Náa icā ra tsihin un? ¿Nacaa icā ra tan nanyehé un? —catyí ra naha tsihin ra.

<sup>27</sup> Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñí ndo

tsa cahan yu inga tsaha? ¿A cuñi ndihi ndo cunyicun ndo tsi ra can?

<sup>28</sup> Tacan tan nduxaḡn ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoḡ tsa naha yihí ndi.

<sup>29</sup> Nyuhu tsitó ndi tyin Nyoo caḡan tsihin ra Moisés taḡan tsa naha. Maa tyin ra can, ndi ña tsitó ndi numaa queḡ ra —catyí ra naha.

<sup>30</sup> Tacan tan nacahaḡn ra tsa nduvahaḡ can tan catyí ra:

—¡Naa tsa iyo cahnu cuví tsehe! Nyooho ña tsitó ndo numaa queḡ ra, tan jananyehé ra tsi yu.

<sup>31</sup> Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñi ra, tyaá soho Nyoo tsa caahán ra.

<sup>32</sup> Ndi iin tsaha tan ñaha ca cuñi yo tatun iyó iin ra jananyehé tsi iin ra cuaá nda cacu ra.

<sup>33</sup> Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

<sup>34</sup> Tacan tan catyí ra naha tsihin ra:

—Yooho ra iyó cuatyí cuví un nda cacu un. ¿Tan cuñi un jacuaha un tsi nyuhu? —catyí ra naha.

Tan tavaḡ cuii ra naha tsi ra vehe ñuhu.

*Nyivi tsa nduve tuhun Nyoo iyó añima tumaa tsa cuaa ñi*

<sup>35</sup> Tsitó ra Jesús tyin tavaḡ ra naha tsi ra tsa janduvahaḡ ra vehe ñuhu. Tan tsa ñihí tahaḡn ra tsihin ra tan catyí ra tsihin ra:

—¿A tsinú iñi yooho tsa caahán Rayíi tsa queḡ nda gloria? —catyí ra tsihin ra.

<sup>36</sup> Tan nacahaḡn ra tan catyí ra:

—Catyí tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

<sup>37</sup> Tan catyí ra Jesús:

—Tsa nyehé un tsi ra. Tan juven ra natuhún tsihin un —catyí ra tsihin ra.

<sup>38</sup> Tacan tan tsicuñiḡ tsiti ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

<sup>39</sup> Tan catyí ra Jesús:

—Yuhu vatsí yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehé ñi tyin coo tuhun Nyoo añima ñi. Tan nyivi cuñi tyin nditsin nyehé ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

<sup>40</sup> Tacan tan juhva ra fariseo tsa nyecú tsihin ra Jesús tsihí ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

<sup>41</sup> Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsihí ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

## 10

*Mbee ticatyí jana Nyoo cuví nyivi yihí cuenda ra, tan tsitó ñi tsi ra tsa jaquitsí Nyoo tyin jahá cuenda ra tsi ñi*

<sup>1</sup> Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu.

<sup>2</sup> Maa tyin ra tsa quihvi ityi yuhu cora, ra jahá cuenda mbee can cuví ra.

<sup>3</sup> Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavaḡ ra tsi ti ityi tsata cora.

<sup>4</sup> Tsa yahaḡ tavaḡ ra tsi ti, tan cuahán ra ityi nuu tan nyciún ti naha ti tsi ra, tyin nacotó ti ndusu ra.

<sup>5</sup> Maa tyin tatun nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

<sup>6</sup> Tyehen caḡan ra Jesús tsihin nyivi. Maa tyin maa ñi ña cutuñi iñi ñi náa tuhun caahán ra tsa caahán ra tacan.

*Ra Jesús cuví ra jahá cuenda vaha mbee ticatyí*

<sup>7</sup> Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihvi nyivi yihí cuenda yu tan cuví ñi tumaa mbee ticatyí jana yu.

<sup>8</sup> Tandihí ra tsa quitsí tsa ndi cumañi quitsi yu, ra suhu cuví ra naha. Maa tyin mbee jana yu ña tyaḡ yahvi ti naha ti tsa caḡan ra naha.

<sup>9</sup> Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cuhan ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti cuhu tsatsí ti.

<sup>10</sup> Iin ra ñasuhu, vatsí ra, vatsí suhu ra, vatsí cahñi ra, vatsí jativi ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa.

<sup>11</sup> Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can.

<sup>12</sup> Maa tyin ra cuví musu, tatun nyehé ra vatsi lobo tsa cuví quití xaan, nacoo ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tñin

quiti xaan can tsi mbee can. Tan jacunu ti tsi mbee can ityi can tan ityi ihya.

<sup>13</sup> Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

<sup>14</sup> Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu,

<sup>15</sup> tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu.

<sup>16</sup> Iyó tucu inga mbee jana yu tsa ña yihí tsitsi cora ihya. Cuñi tsi tsa cuhun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

<sup>17</sup> Jutu yu cuñi ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu.

<sup>18</sup> Yoñi cuví quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

<sup>19</sup> Tsa tsihí nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahvi sava nyico ra naha inga tsaha.

<sup>20</sup> Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

<sup>21</sup> Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

*Nu ña cuñi ra cuví ityi nuu tsihin nyivi Israel tyaa yahvi ra naha tsi ra Jesús*

<sup>22</sup> Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu.

<sup>23</sup> Tan ra Jesús tsicá nuu ra vehe ñuhu can ityi nu nañi corredor ra Salomón.

<sup>24</sup> Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quit-sahá tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsj Nyoo? Cahan catsi tsihin ndi vityin ihya —catyí ra naha.

<sup>25</sup> Tan catyí ra Jesús:

—Tsa yahá cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu.

<sup>26</sup> Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo.

<sup>27</sup> Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu.

<sup>28</sup> Yuhu tsahá yu ñayivi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaá tsi ti naha ti tsitsi ndaha yu.

<sup>29</sup> Maa Jutu yu tsahá tsi ti naha ti tsi yu. Tan cahnu ca cuví maa ra tan ñavin ca tandihí nyivi. Tan yoñi cuví quihin nyaá tsi ti tsitsi ndaha ra.

<sup>30</sup> Yuhu tan Nyoo Jutu yu, iin ñi cuví ndi —catyí ra Jesús.

<sup>31</sup> Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra.

<sup>32</sup> Tan catyí ra Jesús tsihin ra naha:

—Cuaha xaan tsa vaha javahá yu nuu ndo tsihin tunyee iñi Jutu yu. ¿Tan ndaa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

<sup>33</sup> Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahá un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

<sup>34</sup> Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

<sup>35</sup> Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacanañi ra nyoo tsi nyivi naquihin tsa caahán ra.

<sup>36</sup> Tatun maa Nyoo nacatsj tsi yuhu tan jaquitsj ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu?

<sup>37</sup> Tatun ña javahá yu tsa javahá Jutu yu, ña tsinu iñi ndo tsi yu.

<sup>38</sup> Maa tyin tatun javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

<sup>39</sup> Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

<sup>40</sup> Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutyá ra Juan tsa jihna, tan ndoo ra ican.

<sup>41</sup> Cuaha nyivi tsahan tsinyehe tsi ra, tan catyí ñi:

—Nditza, vasu ndi intuhun tsa iyo ña javaha ra Juan, maa tyin tandihi tsa cahān ra cuenda ra ihya tan nditsa —catyí ñi.

<sup>42</sup> Tan cuaha xaan nyivi tsa iyó ityi can tsinü iñi tsa caahān ra Jesús.

## 11

*Nu tsihi ra Lázaro*

<sup>1</sup> Ñuu Betania tsicoḡ iin ra cuuhvi tsa nañi Lázaro. Tan ñuu can iyó ña María tsihin ña Marta taha ña.

<sup>2</sup> Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña.

<sup>3</sup> Tacan tan nduvi taahan ñi, ña María tan ña taha ña, jacotoñi tsi ra Jesús tan catyí ñi: —Ra vaha iñi tsi un, cuuhví xaan ra.

<sup>4</sup> Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

<sup>5</sup> Cuñi xaan ra Jesús tsi ña Marta tan ña taha ña, tan ra Lázaro cuhva ñi.

<sup>6</sup> Maa tyin quivi tsa tsiñi ra tyin cuuhví ra Lázaro, ndoḡ ra uvi quivi ca nu nyii ra.

<sup>7</sup> Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

<sup>8</sup> Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vi-tyin, cuñi nyico un cahun un inga tsaha ¿Nacuenda?

<sup>9</sup> Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhü tsa jandunditsín nu ñuhu ñayivi ihya.

<sup>10</sup> Maa tyin tatun tsacuaa tsicá nuu ra, cuví nduva ihñi ra tyin nduve ñuhü Nyoo jandunditsín nu cuahan ra.

<sup>11</sup> Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cahun yo jandoto yu tsi ra —catyí ra tsihin ra naha.

<sup>12</sup> Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

<sup>13</sup> Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra.

<sup>14</sup> Tacan tan cahān catsi ra Jesús tsihin ra naha:

—Ra Lázaro tsa tsihi ra.

<sup>15</sup> Tan cusii iñi yu tyin yoñi yu nyii ndacan. Tyin tacan vaha ca tsa cuenda nyooḡ na tsinu iñi ndo tsa caahān yu. Cohon ndo

cunyehe yo tsi ra —catyí ra Jesús tsihin ra naha.

<sup>16</sup> Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihi yo tyin cúu yo iin caa ñi tsihin ra —catyí ra.

*Ra Jesús cuví ra janandoto tsi yo tan tsahá ra ñayivi nyito coo yo*

<sup>17</sup> Tsa tsaḡ ra Jesús Betania, ñihü tuhun ra tyin tsa cumi quivi nyii ra Lázaro tsitsi ñuhü.

<sup>18</sup> Ñuu Betania can canyii tsi yatyn ñi nu canyii ñuu Jerusalén, tumaa iin cuhva tsa uvi kilómetro sasava.

<sup>19</sup> Tan cuaha ra cuví ityi nuu tsihin nyivi Israel cuahan cua nyehe nu nyii ña Marta tan ña María cua jatynyee ra naha tsi ñi tyin tsihi cuhva ñi.

<sup>20</sup> Tan ñihü tuhun ña Marta tyin tsa cua tsa ra Jesús. Tan cuahān ña cua jatahan ña tsi ra. Maa tyin ña María ndoḡ ña yuvehe.

<sup>21</sup> Tan catyí ña Marta tsihin ra Jesús:

—Jutu mañi yu, tun tsatyn ihya nyii maa un, ña cua cúu cuhva yu.

<sup>22</sup> Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

<sup>23</sup> Tan catyí ra Jesús tsihin ña:

—Cuhva un cua nandoto ra.

<sup>24</sup> Tan catyí ña Marta:

—Nditza, tsitó yu tyin cua nandoto ra quivi nandoto ndiyi nu cua cundihí quivi —catyí ña.

<sup>25</sup> Tacan tan catyí ra Jesús tsihin ña:

—Yuhu cuví ra janandoto ndiyi. Tan tsahá yu tsa coo nyitó nyivi. Nyivi tsinú iñi tsa caahān yu, vasu tsa tsihi ñi maa tyin coo nyico ñi.

<sup>26</sup> Tan tandihí ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahān yu ihya? —catyí ra tsihin ña.

<sup>27</sup> Tan catyí ña:

—Tsinú iñi yu, Jutu Mañi yu, tyin yoḡo cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

*Nu tsacu ra Jesús nu ñaña ra Lázaro*

<sup>28</sup> Tsa yaha tsa cahān ña Marta tacan, tan tsahān ña tsiquihñi ña tsi ña María taha ña, tan xeehe ñi cahān ña tsihin ña:

—Tsa tsaḡ Ra Maestro ihya. Tan caná ra tsi un —catyí ña.

<sup>29</sup> Tsa tsiñi ña María tsa caahān ña, numi xaan ña nduvita ña, tan cuahān ña nu nyii ra Jesús.

<sup>30</sup> Tan ñaha ca quihvi ra Jesús tsitsi ñuu hora can, ndi nyii ra nu nañihü ña Marta tsi ra.

<sup>31</sup> Tan nda yuvehe ña María, yucú ra cuví ityi nuu tsihin nyivi Israel jatynyee ra naha tsi ñi. Tan nyehe ra naha tyin numi quita ña. Tan cuñi maa ra naha tyin cuahān ña nu



ñaña cua vacu ña. Tan cuahán ndihi ra naha tsata ña.

<sup>32</sup> Tan cuhva tsa tsaá ña María nu nyii ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihi ra cuhva yu —catyí ña.

<sup>33</sup> Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuihya xaan cuñi ra.

<sup>34</sup> Tan tsicá tuhun ra tsi ñi:

—¿Nu maa tinyi ndo tsi ra? —catyí ra.

Tan catyí ñi:

—Jutu Mañi yu, cohon tan nyehe un —catyí ñi tsihin ra.

<sup>35</sup> Tan tsacú ra Jesús.

<sup>36</sup> Tacan tan catyí ra Israel can naha ra:

—Nyehe ndo tyin yahá xaan cuñi ra tsi ra —catyí ra naha.

<sup>37</sup> Maa tyin catyí juhva ra naha:

—Ra ihya jananyehe ra tsi ra cuaa. ¿Nacuvi tyin ña cuvi ica ra iin cuhva tan ña cúu ra Lázaro ihya? —catyí ra naha.

*Nu janandoto ra Jesús tsi ra Lázaro*

<sup>38</sup> Nducuihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuvi can. Tan ndasí iin yuu yuhu can.

<sup>39</sup> Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

<sup>40</sup> Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuvi Nyoo? —catyí ra tsihin ña.

<sup>41</sup> Tacan tan jatsiyo ra naha yuu can. Tan nanyehe ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu.

<sup>42</sup> Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

<sup>43</sup> Tsa yahá tsa cahán ra tacan, caná tsa ra, tan catyí ra:

—¿Lázaro, quita nu nyii un juvin!

<sup>44</sup> Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

*Nu nducú cahñi ra naha tsi ra Jesús  
(Mt. 26.1-5; Mr. 14.1-2; Lc. 22.1-2)*

<sup>45</sup> Tan cuaha xaan ra cuvi ityi nuu tsihin nyivi Israel tsa tsahan tsihin ña María quitsaha tsinú iñi ra naha tsa nyehe ra naha tsa javahá ra Jesús.

<sup>46</sup> Maa tyin juhva ra naha tsahan ra naha tsijacoto ra naha tsi ra fariseo naha ra tsa javahá ra Jesús.

<sup>47</sup> Tacan tan ra fariseo can naha ra tan ra cuvi ityi nuu tsihin ra jutu naha ra jatitahan ra naha tsi ra tuhvá ndu iin naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can.

<sup>48</sup> Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumi tyiñu nda ñuu Roma cua quitsi ra naha tan cua caní ra naha vehe ñuhu yo tan ñuu yo —catyí ra naha.

<sup>49</sup> Maa tyin ra Caifás ra tsahnu tsa cuvi ityi nuu tsihin ra jutu naha ra cuiya can, cahán ra tan catyí ra tsihin ra naha:

—Nyooho nduve maa náa tsitó ndo.

<sup>50</sup> Ndi ña cutuñi iñi ndo tyin vaha ca tsa cúu intuhun ñi rayi tsa cuenda tandihi nyivi ñuu, tan ñavin ca tsa cúu tandihi yo —catyí ra Caifás.

<sup>51</sup> Ra Caifás can ñavin tsa cuñi maa ra tan caahán ra, tyin ra cuvi ityi nuu tsihin tandihi jutu cuvi ra cuiya can, yacan cuenda maa Nyoo jacahan tsi ra nu catyí ra tyin ra Jesús cua cúu ra tsa cuenda tandihi nyivi ñuu Israel.

<sup>52</sup> Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuvi sehe Nyoo tsa iyó tandihi ca ñuu.

<sup>53</sup> Tacan tan nda quivi can tan ra cuvi ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

<sup>54</sup> Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañi Efraín tsa canyii yatyin ñi nu tsiqui, nu cuvi ñuhu ityi. Tan ndoo ra ican tsihin ra tsicá tsihin ra.

<sup>55</sup> Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can.

<sup>56</sup> Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñi nyooho? ¿A cua quitsi ra can vico ihya, o ña cua quitsi ra? —catyí ñi.

<sup>57</sup> Tan ra cuvi fariseo tan ra cuvi ityi nuu tsihin jutu, catyí ra naha tyin tatun ndaa nyivi tsitó nu nyii ra Jesús, na catyí tuhun ñi. Tyin cuquihin ra naha tsi ra tyin cunyii ra vehe caa.

## 12

*Nu tyosó ña María ndutya tami tsaha ra Jesús*

(Mt. 26.6-13; Mr. 14.3-9)

<sup>1</sup> Cumañi iñu quivi ca tsa tahan tsi vico pascua, tan tsaa ra Jesús ñuu Betania nu iyó ra Lázaro, ra tsa janandoto ra.

<sup>2</sup> Ican javaha ñi tsa cuxiñi ra Jesús. Ña Marta tyihí ña coho nu mesa. Tan tsinyaa ra Jesús nu mesa. Tan nyaá ndihi tucu ra Lázaro tsihin ra.

<sup>3</sup> Tacan tan quihñi ña María tumaa sava litru ndutya tami tsa tsinú tsihin maa ñi maa yucu tsa nañi nardo, iin tsa yahvi xaan nyaá. Tan tyisó ña ndutya tami can tsaha ra Jesús. Yahá can tan jana ityi ña tsaha ra tsihin xixi jiñi ña. Nanií cahnu maa tsitsi vehe can tsitú xico ndutya tami can.

<sup>4</sup> Tan ican nyii tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsahá catyí ra Judas can tsihin ñi can:

<sup>5</sup> —¿Nacuenda ña xico ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyivi ndaahvi? —catyí ra.

<sup>6</sup> Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyivi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can.

<sup>7</sup> Tacan tan catyí ra Jesús tsihin ra: —Jaña tsi ña, tyin ñaha ihya javaha ña tyehen tsa cuenda tsa cua quihví cuñu ñuhu yu tsitsi ñuhu.

<sup>8</sup> Nyivi ndaahvi tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

*Nu nducú cahñi ndihi ra Israel naha ra tsi ra Lázaro*

<sup>9</sup> Cuaha xaan nyivi Israel ñihí tuhun ñi tyin ra Jesús nyii ra Betania, tan tsahan ñi ican. Ñavin intuhun ñi ra Jesús cuñí ñi nyehe ñi tyin cuñí ndihi tucu ñi nyehe ñi tsi ra Lázaro, ra tsa janandoto ra Jesús.

<sup>10</sup> Tacan tan ra cuví ityi nuu tsihin jutu natuhun tahan ra naha tyin cua cahñi ndihi ra naha tsi ra Lázaro.

<sup>11</sup> Tyin tsa cuenda ra tan cuaha xaan nyivi Israel quitá tsiyo ñi tan quitsahá tsinú iñi ñi tsi ra Jesús.

*Nu quihví ra Jesús ñuu Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Cuaha xaan nyivi tsaa ñi ñuu Jerusalén tsa cuví vico pascua. Tan tsa inga quivi tsito ñi tyin ra Jesús cua tsaa ra ñuu can.

<sup>13</sup> Tacan tan tsahnya ñi ndaha ndicaha tan cuahán ñi cua jatahan ñi tsi ra Jesús. Tan caná tsaa ñi, tan catyí ñi:

—¡Cahnu xaan cuví Nyoo! ¡Nasoco xaan Nyoo tsi ra vatsi ihya tsihin tunyee iñi Nyoo! ¡Nasoco xaan Nyoo tsi Rey cuenda yo nyivi Israel! —catyí ñi, caná tsaa ñi.

<sup>14</sup> Tan ñihí ra Jesús iin burru tan tsicosó ra tsi ti tumaa catyí maa nu tutu Nyoo tyehen:

<sup>15</sup> Ña nayuhvi ndo nyivi ñuu Sión

Nyehé ndo, vatsí Rey ndo.

Yosó ra iin burru —catyí tsi nu tutu Nyoo.

<sup>16</sup> Quivi can ra tsicá tsihin ra Jesús, ña cutuñi iñi ra naha tsa nyaá nu tutu Nyoo. Maa tyin tsa yahá cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuii tahan ra.

<sup>17</sup> Nyivi tsa nyehé quivi tsa caná ra Jesús tsi ra Lázaro tsitsi ñaña, quivi janandoto ra tsi ra, nacatyí tuhun ñi tsa nyehé ñi.

<sup>18</sup> Yacan cuenda cuaha xaan nyivi tsi-jatahan tsi ra Jesús, tyin tsito ñi tsa iyo tsa javaha ra.

<sup>19</sup> Tacan tan ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihí nyivi tan cuahán ñi canyicún ñi tsi ra —catyí ra naha.

*Nu nanducú juhva ra tsa quee Grecia tsi ra Jesús*

<sup>20</sup> Yucú tucu juhva ra Grecia mahñu nyivi tsa tsahan tsijacahny vico ñuu Jerusalén.

<sup>21</sup> Tacan tan natuhvá ra Grecia can naha ra nu nyaá ra Felipe, ra quee ñuu Betsaida tsa canyí Galilea, tan cahán ndaahvi ra naha tsihin ra tan catyí ra naha:

—Taa, cuñí ndi cahan ndi tsihin ra Jesús —catyí ra naha.

<sup>22</sup> Tan tsahan ra Felipe tsicahan ra tsihin ra Andrés. Tan tsahan nduví ra naha tsicatyí tuhun ra naha tsihin ra Jesús tyin ra Grecia can cuñí ra naha cahan ra naha tsihin ra.

<sup>23</sup> Tan nacahan ra Jesús, tan catyí ra:

—Vityin tsa tsaa hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayíi tsa quee nda gloria.

<sup>24</sup> Tsa nditsa catyí yu tsihin ndo tyin tatun iin tsiti tan ña cua quihví tsi ñuhu tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi.

<sup>25</sup> Nyivi tsa cuñí xaan ñayivi iyó ñi, cua cunaa ñi. Maa tyin nyivi ña cuñí ñayivi iyó ñi nu ñuhu ñayivi ihya, cua ñihí ñi ñayivi nyitó tsa ña cua naa maa coo ñi.

<sup>26</sup> Ndáa nyooho nyivi cuñí javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa

jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

*Nu caahán ra Jesús nácaa cua cúu ra*

<sup>27</sup> Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya.

<sup>28</sup> Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahan iin ndusu ityi andivi tan catyí tsi tyehen:

—Tsa yaha jacahnu yu sivi yu, tan cua jacahnu nyico yu inga tsaha —catyí ndusu can.

<sup>29</sup> Tan nyivi nyecú ican, tsiñi ñi ndusu can, tan catyí ñi tyin savi cahan. Tan inga ñi catyí tyin iin ángel cahan tsihin ra.

<sup>30</sup> Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahan ndusu can, tyin tsa cuenda tsa vaha tsi maa ndo cuví can.

<sup>31</sup> Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya.

<sup>32</sup> Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihi nyivi cahun ñi tsihin yu —catyí ra Jesús.

<sup>33</sup> Caahán ra tacan tsa cuenda tsa cuñi ra cutuñi iñi ñi tyin tacan cua cúu ra.

<sup>34</sup> Tan nacahan nyivi tan catyí ñi tsihin ra:

—Tuhvá ndi tsiñi cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyivi tsi Rayii tsa quee nda gloria nu cruu? Tan ¿yóo ra cuví Rayii tsa quee nda gloria tsa caahán un tuhun? —catyí ñi, tsicá tuhun ñi tsi ra.

<sup>35</sup> Tacan tan catyí ra Jesús tsihin ñi:

—Ñuhu tsa jandunditsin nu nyecú ndo, juhva ña quivi iyó tsi. Çaca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi.

<sup>36</sup> Tsjnu iñi ndo tsi yuhu ra cuví ñuhu nditsin, tsitsi tsa ndi nyii yu tsihin ndo. Tacan tan cuví ndo nyivi iyó nu nditsin.

Tsa yaha cahan ra Jesús tacan tan jatsiyo ñi ra tsi ra nuu ñi.

*Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús*

<sup>37</sup> Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra.

<sup>38</sup> Tyin taahán tsi tsa cuví tumaa tsa cahan ra Isaías ra cuví ndusu yuhu Nyoo, nu cahan ra tyehen:

Jutu Mañi yu, yoñi cuñi tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahan tsanaha.

<sup>39</sup> Tsa cuenda tsa nyaá nu tutu, yacan cuenda ña cuví tsinu iñi ñi tyin juven ñi tyaa nyico tucu ra Isaías tyehen:

<sup>40</sup> Nyoo jacuaa ra tsi ñi. Tan jandundava ra añima ñi,

tan ña cua nyehe ñi tsihin tinuu ñi, tan ña cua cutuñi iñi ñi tsihin añima ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

<sup>41</sup> Ra Isaías cahan ra tyehen tyin nyehe ra tsa cahan cuví Jutu Mañi yo Jesús, tan cahan ra tuhun ra.

<sup>42</sup> Cuaha xaan nyivi Israel tsinú iñi tsi ra Jesús. Tan nda cuanda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu.

<sup>43</sup> Tyin cuñi ra naha nduvaha ra naha nuu nyivi tan ñavin nuu Nyoo.

*Tuhun cahan ra Jesús cua tatsi tuñi tsi nyivi*

<sup>44</sup> Ñihi caahán ra Jesús, tan catyí ra:

—Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihi iñi ñi tsi ra tsa jaquitsj tsi yu.

<sup>45</sup> Tan nyivi tsa nyehé tsi yu, nyehé ndihi ñi tsi ra tsa jaquitsj tsi yu.

<sup>46</sup> Yuhu cuví tumaa ñuhu nditsin tan vatsí yu jandunditsin yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa.

<sup>47</sup> Maa tyin tatun yihí ndo tsiñi ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihya tyin tatsi tuñi yu tsi nyivi. Vatsí yu tyin vatsí jacacú yu tsi ñi.

<sup>48</sup> Nyivi tsa ña cuñi naquihin vaha tsa caahán yu tan ña cuñi ñi javaha ñi tumaa cuhva cuñi yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihí quivi.

<sup>49</sup> Tyin ñavin cuenda maa yu caahán yu. Jutu yu, ra tsa jaquitsj tsi yu, tsaha ra tyiñu tsi yu caahán ra náa cua cahan yu tan náa cua jacuaa yu.

<sup>50</sup> Tan tsitó yu tyin tyiñu tsa tsaha ra, tsahá tsi ñayivi nyitó tsa ña cua naa maa coo nyivi. Yacan cuenda, tandihi tsa caahán yu, caahán yu cuhva catyí maa Jutu yu tsa cahan yu.

## 13

*Nu nacatyá ra Jesús tsaha ra tsicá tsihin ra*

<sup>1</sup> Tsa ndi cumañi ca iin quivi tan tahan tsi vico pascua, tsa tsitó maa ra Jesús tyin

tsa cua tsa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñi xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñi xaan ra tsi ñi tyin cua cúu ra tsa cuenda ñi.

<sup>2</sup> Tan cuxiñi ra Jesús tsihin ra tsicá tsihin ra. Tan quihvi nu ña vaha añima ra Judas Iscariote sehe ra Simón tan natyuhu nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra.

<sup>3</sup> Maa tyin ra Jesús tsitó ra tyin tsaḡ Jutu ra tandihí tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra.

<sup>4</sup> Tacan tan nduvitá ra tan tava ra jahma tsa nditsi ra ityi tsata, tan tsañi ra iin toalla tsitsi ra.

<sup>5</sup> Tacan tan tyihí ra ndutya tsitsi iin tsi-coho tan quitsahá nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

<sup>6</sup> Tan tsa cua nacatya ra tsaha ra Simón Pedro tan catyi ra Simón tsihin ra:

—Jutu Mañi yu, ¿a yoocho cua nacatya tsaha yu?

<sup>7</sup> Tacan tan catyi ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quivi.

<sup>8</sup> Maa tyin ra Pedro catyi ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyi ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuvi un.

<sup>9</sup> Tacan tan catyi ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyi ra.

<sup>10</sup> Maa tyin catyi ra Jesús tsihin ra:

—Nyivi tsa ndi tsityi, ña cuñi tsi tsa ndoo nanñi cahnu cuñu ñuhu ñi. Tsaha ña ñi cuñi tsi ndoo, tyin tsa ndoo maa nanñi ñi. Nyoocho tsa ndoo maa ndo, vasu ña tandihí ndo ndoo —catyi ra Jesús.

<sup>11</sup> Cahán ra tsa ña tandihí ra naha ndoo tyin tsitó ra yóo cua xico tsi ra tsi nu xaan iñi tsi ra nahnu.

<sup>12</sup> Tsa yaha nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaá nyico ra inga tsaha nu mesa tan catyi ra tsihin ra naha:

—¿A cutuñi iñi nyoocho tsa javahá yu tsihin ndo?

<sup>13</sup> Nyoocho caahán ndo tsihin yu, “Maestro tan Jutu Mañi yu”, tan nditsa tyin yacan cuvi yu.

<sup>14</sup> Yuhu tsa cuvi yu Ra Jacuahá tan Jutu Mañi ndo, nacatya yu tsaha ndo, tan tacan

cuñi tsi tsa nacatya tahan maa ndo tsaha ndo.

<sup>15</sup> Yuhu tsaḡ yu iin cuhva tsi ndo tyin javaha ndo tumaa cuhva javahá maa yu.

<sup>16</sup> Tsa nditsa catyi yu tsihin ndo tyin ndi iin musu tan ña cahnu ca cuvi ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuvi ra tan ñavin ca ra tsa tava tyiñu tsi ra.

<sup>17</sup> Tatun cutuñi iñi ndo yacan, tan javahá ndo can, sñi xaan cua coo ndo.

<sup>18</sup> Ñavin tsa cuenda tandihí ndo caahán yu. Yuhu tsitó maa yu yóo nacatsj yu. Maa tyin cuñi tsi tsa cuvi tumaa caahán tuhun Nyoo tyehen: “Ra tsa tsatsj paan tsihin yu, juvin ra cua xico ñaha tsi yu tsi nu xaan iñi tsi yu”, catyi tsi nu tutu Nyoo.

<sup>19</sup> Caahán yu tyehen tsihin ndo tsa ndi cumañi ca cuvi can tyin quivi cua cuvi yacan, cua tsinu iñi ndo tyin yuhu cuvi ra tsa iyó nda ndi cumañi ca coo tandihí tsa iyó.

<sup>20</sup> Tsa nditsa catyi yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuvi can. Tan nyivi tsa naquihin vaha tsi yuhu, naquihin vaha ndihí ñi tsi ra tsa jaquitsj tsi yu —catyi ra Jesús.

*Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu*

(Mt. 26.20-25; Mr. 14.17-21; Lc. 22.21-23)

<sup>21</sup> Tsa yaha tsa cahán ra Jesús yacan, tan quitsahá nducuihiyá xaan cuñi añima ra, tan catyi catsi ra:

—Tsa nditsa catyi yu tsihin ndo, tyin iin nyoocho cua xico ndo tsi yu tsi nu xaan iñi tsi yu —catyi ra Jesús.

<sup>22</sup> Tacan tan ra tsicá tsihin ra, quitsahá nyehé nuu tahan ra naha, tan ña tsitó ra naha yóo tuhun caahán ra Jesús.

<sup>23</sup> Iin ra tsicá tsihin ra Jesús nyanaa ra tsi ra nu nyaá ra cuxiñi ra. Tan ra ícan cuvi ra tsa cuñi xaan ra Jesús.

<sup>24</sup> Tan ra Simón Pedro javahá ra seña tsi ra can, na ndaca tuhun ra yóo tuhun caahán ra Jesús.

<sup>25</sup> Tacan tan ra ícan tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoo ra cuvi ra tsa caahán un tuhun?

<sup>26</sup> Tan nacahán ra Jesús tan catyi ra:

—Cua jatyi yu luxu paan, tan ra tsa cua cuhva yu itsi, ra ícan cuvi ra —catyi ra.

Tacan tan quihñi ra luxu paan tan jatyi yu ra, tan tsaḡ ra tsi ra Judas Iscariote, sehe ra Simón.

<sup>27</sup> Tsa quihñi ra Judas paan can tan quihvi nu ña vaha añima ra. Tacan tan ra Jesús catyi ra tsihin ra:

—Tsa tsicá iñi un javaha un, janumi javaha can —catyi ra Jesús tsihin ra Judas.

<sup>28</sup> Maa tyin ndi intuhun ra tsa nyecú nu mesa can, ña cutuñi ñiñi ra naha nacuenda cahán ra tacan tsihin ra can.

<sup>29</sup> Ra Judas cuví ra yihí ndaha yitín nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa kujata ra tsa tsiñi ñihu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha.

<sup>30</sup> Tsa yahá quihín ra Judas paan can, tacan tan quita ra. Tan tsacuaa cuví can.

*Tyiñu tsa tsa tavá ra Jesús tsi yo: tsa cuñi tahan yo tsi yo*

<sup>31</sup> Tsa yahá tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayi tsa quee nda gloria. Tan cua nyehe ñi tsa cahnu cuví Nyoo tsa cuenda yu.

<sup>32</sup> Tatun Rayi tsa quee nda gloria jacahnú ra tsi Nyoo, tacan tucu Nyoo cua jacahnú ra tsi ra. Tsa tsaá quivi cua jacahnú ra tsi ra.

<sup>33</sup> Sehe yu, ña naha ca cua cunyi yu tsihin ndo. Nyooho cua nanducu ndo tsi yu, maa tyin tumaa tsa cahán yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuví cuhun ndo nu cua cuhun yu.

<sup>34</sup> Tsahá yu iin tyiñu tsa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo.

<sup>35</sup> Tatun cuñi tahan ndo tsi ndo, tandihi nyivi tan cua coto ñi tyin nyivi nyicún tsi yu cuví ndo.

*Nu caahán ra Jesús tyin ra Pedro cua cahan ra tyin ña nacotó ra tsi ra*

(Mt. 26.31-35; Mr. 14.27-31; Lc. 22.31-34)

<sup>36</sup> Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuví cunyicún un tsi yu vityin. Maa tyin nu cuahán ca tsi quivi, tan cunyicun un tsi yu —catyí ra Jesús.

<sup>37</sup> Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuví cunyicun yu tsi un vityin? Tan tsa iyó vaha ñiñi yu tsa cuhva yu ñayivi yu tsa cuenda un —catyí ra.

<sup>38</sup> Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

## 14

*Ra Jesús cuví ityi cuhun yo nu nyaá Nyoo Jutu yo*

<sup>1</sup> Tan catyí ra Jesús:

—Ña caca xaan ñiñi ndo. Tsinu ñiñi ndo tsi Nyoo, tan tsinu ndihi ñiñi ndo tsi yu.

<sup>2</sup> Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu iin nu coo ndo.

<sup>3</sup> Tsa yahá tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyata yu.

<sup>4</sup> Nyooho tsa tsitó maa ndo nu maa cuhun yu, tan tsa tsitó ndo ityi.

<sup>5</sup> Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿nácaa coto ndi ityi? —catyí ra.

<sup>6</sup> Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juven ñi yuhu cuví ra tsahá ñayivi coo ndo. Tan tsa cuenda yuhu ñi, tan cuví tsaá ndo nu nyaá Jutu yu.

<sup>7</sup> Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi ityi nuu, cua nacoto ndihi ndo tsi ra, tyin tsa nyehé ndo tsi ra —catyí ra Jesús.

<sup>8</sup> Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

<sup>9</sup> Tan nacahan ra Jesús, tan catyí ra:

—Yooho Felipe, tsa naha xaan nyii yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo?”

<sup>10</sup> ¿A ña tsinú ñiñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu.

<sup>11</sup> Tsinu ñiñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú ñiñi ndo yacan, cuví tsinu ñiñi ndo tsi yu tsa cuenda tyiñu Nyoo Jutu yu tsa javahá yu.

<sup>12</sup> Tsa nditsa caahán yu tsihin ndo tyin nyivi tsinú ñiñi tsi yu, cua javaha ndihi ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu.

<sup>13</sup> Tan tandihi tsa cua ndacan ndo tsi Jutu yu tsihin sivi yu, cua ñiñi ndo can tyin tacan tan jacahnú cuaha ca nyivi tsi Nyoo Jutu yu tsa cuenda yuhu tsa cuví yu Sehe ra.

<sup>14</sup> Yuhu cua javaha yu náa ndihi tsa ndacan ndo tsa cuenda yu.

*Nu caahán ra Jesús tyin cuhva ra Tatyí lí ra tsi yo*

<sup>15</sup> 'Tatun cuñí ndo tsi yu, tyaá yahvi ndo tsa caahán yu.

<sup>16-17</sup> Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí lí Nyoo, ra tsa caahán tsa nditsa. Tan iin nyita ñi maa cua cunyata ra tsihin ndo. Maa tyin nyivi tsa taahán ca iñi tsa iyó nu ñuhu ñayivi ihya, ña cua cuví naquihin ñi Tatyí lí Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyoocho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo.

<sup>18</sup> Ña cua nacoo cuivi yu tsi ndo. Cua quitsi nyico yu nu yucú ndo.

<sup>19</sup> Juhva cuivi ña quivi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyoocho cua nyehe ndo tsi yu. Tyin yuhu nyito yu, yacan cuenda nyoocho cua coo ndihi ndo.

<sup>20</sup> Quivi can cua coto ndo tyin yuhu iin ñi cuví yu tsihin Jutu yu. Tan nyoocho iin ñi cuví ndo tsihin yu. Tan yuhu iin ñi cuví yu tsihin ndo.

<sup>21</sup> Nyivi tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuñi tsi yu. Tan ñi tsa cuñi tsi yu, Jutu yu cua cuñi ra tsi ñi. Tan cuñi ndihi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

<sup>22</sup> Tan catyí ra Judas, ñavin ra Judas Iscariote, inga ra.

—Jutu Mañi yu, ¿náaca tsa nyuhu ñi cua janaha un tsi un, tan ñavin tsi tandihi nyivi iyó nu ñuhu ñayivi?

<sup>23</sup> Nacahan ra Jesús tan catyí ra:

—Nyivi cuñi tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi.

<sup>24</sup> Nyivi ña cuñi tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

<sup>25</sup> 'Caahán yu tandihi tuhun ihya tsihin ndo tsitsi tsa ndi nyivi yu tsihin ndo.

<sup>26</sup> Maa tyin nu cuahán ca tsi ityi nuu cua jaquitsi Jutu yu Tatyí lí ra tsihin sivi yu. Tan cua jatinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihi tsi ndo. Tan cua janducuhun iñi ra tsi ndo tsa tsa yahá cahan yu tsihin ndo.

<sup>27</sup> Jandoó yu iin tsa taxin coo añima ndo, tumaa tsa taxin cuñi añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña çaça xaan iñi ndo tan ña nayuhvi ndo.

<sup>28</sup> Tsiñi ndo tsa cahan yu nu catyí yu tyin cua cuhun yu tan cua quitsi nyico yu nu

yucú ndo. Tatun cuñi ndo tsi yu, cua cusii iñi ndo tyin catyí yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu.

<sup>29</sup> Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

<sup>30</sup> Ña cuaha ca cua cahan yu tsihin ndo. Tyin vatsi nu ndacá ñaha nu ñuhu ñayivi ihya. Maa tyin ña ndacá ñaha nu tsi yu.

<sup>31</sup> Tyin tacan tan coto nyivi iyó nu ñuhu ñayivi, tyin yuhu cuñi yu tsi Nyoo Jutu yu, tan javahá yu tyiñu tava ra tsi yu.

'Nduvita ndo, tan cohon ndo, na cua tsiyo yo ihya.

## 15

*Nu cahan ra Jesucristo tyin cuví ra tumaa yoho tsa cuví uvas*

<sup>1</sup> 'Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi.] Tan Jutu yu cuví ra jahá cuenda yoho can.

<sup>2</sup> Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti.

<sup>3</sup> Tsa yahá janduvahá Jutu yu tsi nyoocho tsihin tsa jacuahá yu tsi ndo.

<sup>4</sup> Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyoocho, ña cua cuví javaha ndo tsa vaha tatun ña iin ñi cuví ndo tsihin yu.

<sup>5</sup> 'Yuhu cuví yoho cahnu. Tan nyoocho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu.

<sup>6</sup> Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

<sup>7</sup> 'Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo náa cuñi maa ndo tsi yu, tan yuhu cua cuhva yu tsa cua ndacan ndo.

<sup>8</sup> Tatun cuaha tsa vaha javahá ndo, jachahú xaan ndo tsi Jutu yu cuví can. Tan tsihin yacan javahá ndo tyin cuví ndo nyivi tsa nditsa nyicún tsi yu.

<sup>9</sup> Yuhu cuñi yu tsi ndo, tumaa tsa cuñi Jutu yu tsi yu. Ña naa iñi ndo cuhva cuñi yu tsi ndo.

<sup>10</sup> Tatun tyaá yahvi ndo tsa caahán yu, ña cua naa iñi ndo tyin cuñi yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñi xaan ra tsi yu.

<sup>11</sup> 'Caahán yu tyeheh tsihin ndo tyin na cusii iñi ndo tsihin yu. Tan cusii ca iñi ndo.

<sup>12</sup> Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñi maa yu tsi ndo.

<sup>13</sup> Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo.

<sup>14</sup> Nyooho cuví ra vaha iñi tsi yu tatun javahá ndo tsa caahán yu tsihin ndo.

<sup>15</sup> Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihí tsa caahán Jutu yu tsihin yu tan jacotó yu itsi tsi ndo.

<sup>16</sup> Ñavin nyooho nacatsj tsi yuhu tyin maa yu nacatsj tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tiví maa tsi. Tacan tan cua cuhva Jutu yu tandihí tsa ndacan ndo tsi ra tsihin sivi yu.

<sup>17</sup> Tyeheh caahán yu tsihin ndo: Cuñi tahan ndo tsi ndo.

*Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra*

<sup>18</sup> Tatun ndasi cuñi nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca tmaa yu ndasi cuñi ñi nyehe ñi.

<sup>19</sup> Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyooho tsa nacatsj yu tsi ndo mahñu ñi. Yacan cuenda ndasi cuñi ñi nyehe ñi tsi ndo, tyin ñavin ca nyivi cuenda nu ñuhu ñayivi ihya cuví ndo.

<sup>20</sup> Nducuhun iñi ndo tsa cahan yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaá yahvi ndihí ñi tsa jacuahá ndo tsi ñi. Tan tatun ndasí icá ñi tsihin yu, ndasi cua ica ndihí ñi tsihin ndo.

<sup>21</sup> Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsj tsi yu.

<sup>22</sup> Tun tsatyin ña quitsj yu cahan yu tsihin ñi, nduve cuatyí ñi. Maa tyin vityin nduve náa siqui cua tyaá ñi cuatyí ñi, tyin tsa yaha cahan yu tsihin ñi.

<sup>23</sup> Nyivi tsa ndasi cuñi nyehé tsi yu, ndasi cuñi ndihí ñi nyehé ñi tsi Jutu yu.

<sup>24</sup> Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehé ñi tandihí yacan. Vasu ndi maa tsa nyehé ñi can maa tyin ndasi cuñi ñi nyehé ñi tsi yu, tan tsi Jutu yu.

<sup>25</sup> Maa tyin tandihí yacan cuví, tyin cuñi tsi cundaa tumaa cuhva caahán nu tutu ley tsa jacuahá ñi tsa caahán tyeheh: "Nduve vihi náa tsaha, tan ndasi cuñi ñi nyehe ñi tsi yu", catyi tsi.

<sup>26</sup> 'Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quivi cua tsa yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu.

<sup>27</sup> Tan nyooho tucu cua cahan ndo tumañi iñi tsa cuenda yu, tyin yucú ndo tsihin yu nda quivi quitsahá jahá tyiñu yu.

## 16

<sup>1</sup> 'Caahán yu tyeheh tsihin ndo tyin tacan tan ña jandihí ndo tsa tsinú iñi ndo tsi yu.

<sup>2</sup> Cua tava cuii nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñi ñi tyin tyiñu Nyoo javahá ñi.

<sup>3</sup> Tacan cua ica ñi tyin ña nacoto ñi tsi Jutu yu tan ndi tsi maa yu.

<sup>4</sup> Caahán yu tsehe tsihin ndo tyin quivi tsa cua cuví tumaa cuhva caahán yu tsihin ndo, cua nducuhun iñi ndo tyin tsa yaha cahan yu tuhun ihya tsihin ndo.

'Ña cahan yu tyeheh tsihin ndo nda jihna tyin ndi nyii maa yu tsihin ndo.

### *Tyiñu jahá Tatyí Ii Nyoo*

<sup>5</sup> Maa tyin vityin cua cuhun yu tyin cun- yaa yu tsihin ra tsa jaquitsj tsi yu. Ndi intuhun ndo tan ña tsicá tuhun ndo tsi yu nu maa cua cuhun yu.

<sup>6</sup> Tyin tsa nducuiihya cuñi ndo tsa caahán yu tyeheh tsihin ndo.

<sup>7</sup> Caahán yu tsa nditsa tsihin ndo tyin vaha ca tsa cuhun yu cuenda tsa vaha tsi maa ndo. Tyin tatun ña cuhun yu, ña cua quitsi Tatyí Ii tsa cua cuhva tunyee iñi tsi ndo. Maa tyin tatun cuhun yu, cua jaquitsi yu tsi ra.

<sup>8</sup> Tan quivi quitsi ra, cua jacoto ra tsi nyivi iyó nu ñuhu ñayivi ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo.

<sup>9</sup> Cua jacoto ra tsi ñi tyin iyó cuatyí ñi tyin ña tsinú iñi ñi tsi yu.

<sup>10</sup> Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu.

<sup>11</sup> Tan cua coto ñi tyin cua jandaa Nyoo cuatyí ñi tyin tsa yaha cundaa cuatyí nu cuví cuhna, nu ndacá ñaha nu ñuhu ñayivi ihya.

<sup>12</sup> Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin.

<sup>13</sup> Quiví quitsi Tatyí li tsa caahán tsa nditsa, maa ra cua janaha tandihi tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihi tsa tsiñí ra. Tan cua jacoto ra náa cua cuví nu cuahán ca tsi ityi nuu.

<sup>14</sup> Cua jacahnu ra tsi yu, tyin cua naquihin ra tuhun yu tan cua janaha ra can tsi ndo.

<sup>15</sup> Tandihi tsa iyó tsi Jutu yu, tsií maa yu cuví ndihi can. Yacan cuenda caahán yu tyin Tatyí li cua naquihin ra tuhun yu, tan cua janaha ra tsi nyooho.

*Ra tsicá tsihin ra Jesús cuihyá xaan cuñí ra naha, maa tyin nu cuahán ca tsi quívi cua cusii íñi ra naha, catyí ra Jesús*

<sup>16</sup> \*Ña naha cuií ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

<sup>17</sup> Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñí tsi cahan yacan? Catyí ra tsihin yo tyin ña naha cuií ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra.

<sup>18</sup> ¿Náa cuñí tsi catyí tsa “ña naha cuií ca” can? Ña cutuñí íñi yo náa tuhun caahán ra —catyí ra naha.

<sup>19</sup> Tan tuví íñi ra Jesús tyin cuñí ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuií ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo?

<sup>20</sup> Tsa nditsa caahán yu tsihin ndo tyin nyooho cua nducuihya íñi ndo tan cua vacu ndo, maa tyin nyívi cuenda nu ñuhu ñayívi cua cusii íñi ñi. Vasu cuihya cuñí ndo vityin, tucuihya íñi can cua nanduvi tsi tsa sii.

<sup>21</sup> Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca íñi ña tsa uhvi can tsa cuenda tsa sii cuñí ña tyin cacu iin lee sehe ña.

<sup>22</sup> Tacan tucu nyooho vityin, cuihya xaan cuñí ndo. Maa tyin cua nyehe nyico yu tsi ndo inga tsaha. Tacan tan cua cusii nyico íñi ánima ndo. Tan yoñi cuví quihin nyaa tsa sii can tsi ndo.

<sup>23</sup> Quiví can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihi tsa ndacan ndo tsi ra tsihin sivi yu.

<sup>24</sup> Nda vityin tan ñaha ca ndacan ndo tsa ndacan ndo tsihin sivi yu. Ndacan ndo tan cua ñihi ndo tan cusii xaan íñi ndo.

*Ra Jesucristo cuví jaha canaa ra tsa ña vaha iyó nu ñuhu ñayívi*

<sup>25</sup> \*Maa ñi maa tsihin tsa jandu inducú yu tuhun jacuahá yu tsi ndo. Maa tyin nu

cuahán ca tsi, ñavin ca tsihin cuhva can cua jacuahá yu tsi ndo, maa tyin cua catyí tuhun catsi yu tuhun Jutu yu tsihin ndo.

<sup>26</sup> Quiví can tsihin sivi yu cua ndacan ndo tsa ndacan ndo tsi ra. Tan ña tsiñí ñuhu ca tsa cahan ndaahvi yu tsihin Jutu yu tsa cuenda ndo.

<sup>27</sup> Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsiñí íñi ndo tyin nu nyaá Nyoo quee yu.

<sup>28</sup> Nu nyaá Jutu yu quee yu tyin quitsi yu nu ñuhu ñayívi ihya. Maa tyin vityin cua nacoó yu ñuhu ñayívi ihya tyin cua cunuhu nyico yu nu nyaá ra —catyí ra Jesús.

<sup>29</sup> Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi.

<sup>30</sup> Vityin nyehé ndi tyin tsitó un tandihi cuií maa, tan ña tsiñí ñuhu ca tsa ndaca tuhun ndi tsi un tan coto un tsa tsicá íñi ndi. Yacan cuenda tsiñí íñi ndi tyin nu nyaá Nyoo quee un —catyí ra naha tsihin ra Jesús.

<sup>31</sup> Tan catyí ra Jesús:

—Tan vityin ¿a tsiñí íñi ndo tsi yu?

<sup>32</sup> Maa tyin caahán yu tsihin ndo tyin tsa vatsi hora. Tan vityin cuví hora tsa cua cuhun ndo siin siin ityi. Tan cua nacoó ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu.

<sup>33</sup> Caahán yu tandihi tsehe tsihin ndo na coo tsa taxin ánima ndo tsa cuenda tsa iin ñi cuví ndo tsihin yu. Nu ñuhu ñayívi ihya cua nyehe ndo tundoho, maa tyin janyee ndo íñi ndo, tyin yuhu tsa jaha canaa yu tsa ña vaha tsa iyó nu ñuhu ñayívi ihya.

## 17

*Nu tsicán tahvi ra Jesús tsi Nyoo tsa cuenda ra tsicá tsihin ra*

<sup>1</sup> Tsa yaha cahan ra Jesús yacan, nanyehe ndaa ra ityi andivi tan catyí ra:

—Jutu Mañi yu, tsa tsaq hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un.

<sup>2</sup> Tyin tava tyiñu un tsi yu tsa quihí ndaha yu tandihi nyívi, tan cuhva yu ñayívi nyitó tsa ña cua naa maa tsi tandihi nyívi tsa tsaq un tsi yu.

<sup>3</sup> Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayívi nyitó tsa ña cua naa maa.

<sup>4</sup> Tsa jacahnu yu tsi un nu ñuhu ñayívi ihya tan tyiñu tsa tava tyiñu un tsi yu tsa ndihi tsi javahá yu.

<sup>5</sup> Tan vityin, Jutu Mañi yu, cua quitsi nuhu nyico yu nu nyaá un, tan cuñí yu tyin nacuhva un tsa cahnú cuví yu tsihin un tsi yu, tumaa tsa tsicoq maa tsi yu nda ndi cumañi ca tsiñu ñuhu ñayívi.



<sup>6</sup> Tandihí ra tsa tsahá un tsi yu naha ra, ra tsa natavá vaha un mahñu nyívi iyó nu ñuhu ñayívi ihya, jacotq̄ yu tsi ra naha yóo ra cuví yooho. Tsii maa un cuví tsi ra naha tan tsahá un tsi ra naha tsi yu. Tan tyaá yahvi ra naha tsa caahán un.

<sup>7</sup> Vityin tsitó ra naha tyin tandihí tsa tsahá un tsi yu, nu nyaá un quee tsi.

<sup>8</sup> Tyin catyí tuhun yu tsihin ra naha tsa cahan un tsihin yu, tan naquihñ̄ vaha ra naha itsí. Tan tsitó ra naha tyin nditsa tsa quee yu nu nyaá un, tan tsinú ñi ra naha tyin maa un jaquitsj̄ tsi yu.

<sup>9</sup> Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyívi, maa tyin tsicán tahvi yu tsa cuenda ra tsa tsahá un tsi yu naha ra, tyin tsi maa un cuví ra naha.

<sup>10</sup> Tandihí nyívi tsa cuví tsii un, tsahá tucu un tsi ñi tsi yu. Tan maa ñi janahá tsa cahnu cuví yu.

<sup>11</sup> Yuhu ña cua ndoo ca yu nu ñuhu ñayívi ihya, maa tyin maa ra naha cua ndoo ra naha nu ñuhu ñayívi ihya. Tan yuhu cua cunyaa nyico yu tsihin un. Jaha cuenda tsi ra tsa tsahá un tsi yu tsihin tunyee ñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yu.

<sup>12</sup> Quivi tsinyij̄ yu nu ñuhu ñayívi ihya tsihin ra naha, jaha cuenda yu tsi ra tsa tsahá un tsi yu naha ra tsihin tunyee ñi tsa iyó tsi un. Tan jaha cuenda yu tsi ra naha. Tan ndi intuhun ra naha tan ña tsinaq̄ ra naha. Maa tyin ra tsa tsa nyaá maa tsa cunaa, ra ican ñi cuví ra cuanaq̄ tan quitá cuhva tumaa tsa catyí nu tutu maa un.

<sup>13</sup> Vityin tsa cua quitsí yu nu nyaá un, maa tyin tsitsi tsa ndi nyívi yu nu ñuhu ñayívi ihya, caahán yu tsehe, tyin na cusii ñi ra naha tumaa tsa sī cuñi maa yu.

<sup>14</sup> Yuhu cahan yu tsihin ra naha tsa caahán un, maa tyin nyívi cuenda nu ñuhu ñayívi ndasi cuñi ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayívi cuví ra naha. Tumaa yuhu, ñavin ra cuenda nu ñuhu ñayívi cuví yu.

<sup>15</sup> Ña tsicán yu tsi un tsa tava un tsi ra nyicún tsi yo naha ra nu ñuhu ñayívi ihya, maa tyin jaha cuenda tsi ra naha coto náa jaha nu ña vaha tsi ra naha.

<sup>16</sup> Tumaa yuhu ñavin ra cuenda nu ñuhu ñayívi cuví yu, tacan tucu ra ihya naha ra, ñavin ra cuenda nu ñuhu ñayívi cuví ra naha.

<sup>17</sup> Jacu ii tsi ra naha tsihin tsa nditsa, na javaha ra naha maa ñi maa cuhva cuñi maa un. Tyin tsa caahán un, yacan cuví tsa nditsa.

<sup>18</sup> Tumaa tsa jaquitsj̄ un tsi yuhu nu yucú nyívi iyó nu ñuhu ñayívi, tacan cua jacuhun ndihí tucu yuhu tsi ra tsa nyicún tsi yo,

nacahan ra naha tuhun yo tsihin nyívi tsa ñaha ca coto tuhun yo.

<sup>19</sup> Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

<sup>20</sup> Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihí tucu yu tsi un tsa cuenda nyívi tsa cua tsinu ñi tsi yu, tsa cuenda tsa cua cahan ra ihya naha ra ityi nuu ca.

<sup>21</sup> Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihí nyívi iyó nu ñuhu ñayívi cua tsinu ñi ñi tyin maa un jaquitsj̄ tsi yu.

<sup>22</sup> Yuhu tsahá yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsahá un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo.

<sup>23</sup> Yuhu nyíi yu tsihin ñi. Tan yooho nyaá un tsihin yu tyin tacan tan iin ña nyívi cua cuví ñi. Tan coto tandihí nyívi iyó nu ñuhu ñayívi tyin maa un jaquitsj̄ tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

<sup>24</sup> Jutu Mañi yu, maa un tsahá tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsahá un tsi yu, tyin cuñi un tsi yu nda ndi cumañi ca tsinu ñuhu ñayívi.

<sup>25</sup> Jutu Mañi yu, ra vaha cuví un, tan nyívi cuenda nu ñuhu ñayívi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsj̄ tsi yu.

<sup>26</sup> Tsa cahan yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

## 18

*Nu cua tyihi ra Israel naha ra tsi ra Jesús vehe caa*

(Mt. 26.47-56; Mr. 14.43-50; Lc. 22.47-53)

<sup>1</sup> Tsa yaha tsa cahan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihv̄i ra Jesús tsihin ra tsicá tsihin ra.

<sup>2</sup> Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra.

<sup>3</sup> Tan ican tsaq̄ ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha

ra tan ra cuví fariseo naha ra. Tsaꝯ ra naha ican, nyisó ra naha mityi, tan nyisó ra naha lámpara tan ñuhꝯ yiti.

<sup>4</sup> Tan ra Jesús tsa tsitó maa ra tandihi tsa cua tahan ra. Quitꝯ ra tan tsicꝯ tuhun ra tsi ra naha:

—¿Yóo nanducú ndo? —catyí ra.

<sup>5</sup> Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xicó tsi ra Jesús tsi nu xaan iñi tsi ra nahnu, nyii ndihi ra tsihin ra naha.

<sup>6</sup> Cuhva tsa caħan ra Jesús: “Yuhu cuví”, tandihi ra naha nacacꝯ tsata ra naha tan nduvꝯ ra naha nu ñuhu.

<sup>7</sup> Tacan tan tsicꝯ tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

<sup>8</sup> Tan catyí ra Jesús:

—Tsa caħan yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicꝯ tsihin yu naha ra na cunuhun ra naha —catyí ra Jesús tsihin ra naha.

<sup>9</sup> Yacan caħan ra Jesús tyin na cundaa tsa caħan ra nda ityi tsata ca nu catyí ra: “Ra tsa tsaħa Jutu yu tsi yu, ndi intuhun ra naha tan ña tsinaá ra naha.”

<sup>10</sup> Tacan tan tava ra Simón Pedro mityi tsa ndahá ra tan tsahnyꝯ ra soho cuaha iin ra tsa nañi Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra.

<sup>11</sup> Maa tyin ra Jesús catyí ra tsihin ra Pedro:

—Natyihi mityi un tsitsi vena un. Tatun Nyoo Jutu yu tan cuñi ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

*Nu tsindacꝯ ra naha tsi ra Jesús nuu ra cuví ityi nuu tsihin jutu naha ra*  
(Mt. 26.57-58; Mr. 14.53-54; Lc. 22.54)

<sup>12</sup> Tacan tan andaru can tsihin capitán ra naha, tan vitya cuenda vehe ñuhu naha ra, tiñ ra naha tsi ra Jesús, tan tsahñi ra naha tsi ra,

<sup>13</sup> tacan tan tsindacꝯ ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu.

<sup>14</sup> Ra Caifás can cuví ra tsa caħan tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayiꝯ tsa cuenda tandihi nyivi ñuu.

*Nu caahán ra Pedro tyin ña nacotó ra tsi ra Jesús*  
(Mt. 26.69-70; Mr. 14.66-68; Lc. 22.55-57)

<sup>15</sup> Ra Simón Pedro tan inga ra tsa tsicꝯ tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can.

<sup>16</sup> Maa tyin ra Pedro ndoo ra ityi tsata vehe. Yacan cuenda quitꝯ ra tsa nacotó ra jutu can, tan caħan ra tsihin ñaha tsa nyaá yuvehe can. Tan jayahꝯ ra tsi ra Pedro ityi tsitsi nuquehe can.

<sup>17</sup> Tacan tan ñaha tsa nyaá yuvehe can tsicꝯ tuhun ña tsi ra Pedro, tan catyí ña:

—¿A ñavin yoocho cuví iin ra tsicꝯ tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

<sup>18</sup> Tacan tan ra cuví musu tan ra vitya naha ra tsa yucú ican, jataħan ra naha ñuhu tyin vitsin xaan. Tan nyecú nyityi ra naha tuñu ra naha ñuhu. Tan nyii ndihi tucu ra Pedro tuñu ra ñuhu tsihin ra naha ican.

*Nu janahma ra jutu tsaahnu tsi ra Jesús*  
(Mt. 26.59-66; Mr. 14.55-64; Lc. 22.66-71)

<sup>19</sup> Tacan tan ra jutu tsaahnu can quitsaha tsicꝯ tuhun ra tsi ra Jesús yoo ra cuví ra tsicꝯ tsihin ra, tan náa jacuahá ra tsi nyivi.

<sup>20</sup> Tan catyí ra Jesús tsihin ra:

—Yuhu nuu tandihi nyivi caħan yu. Tan jacuahꝯ yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu iħya nu tuhvá tandihi nyivi Israel ndu iin. Tan nduve nu caħan xeehe yu.

<sup>21</sup> ¿Nacuenda tsicꝯ tuhun un tsi yuhu? Vaha ca ndꝯca tuhun un tsi nyivi tsa tsiniꝯ tsa caħan yu, tan maa ñi cua catyí tuhun náa caħan yu tsihin ñi tyin maa ñi tsitó náa caħan yu —catyí ra Jesús tsihin ra.

<sup>22</sup> Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

<sup>23</sup> Tan catyí ra Jesús:

—Tatun caħan yu iin tsa ña vaha, caħan tsihin yu nda tsa ña vaha caħan yu. Maa tyin tatun caħan yu tsa vaha, ¿nacuvi tyin cañi un tsi yu? —catyí ra Jesús tsihin ra can.

<sup>24</sup> Yahꝯ can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

*Nu caahán nyico ra Pedro inga tsaha tyin ña nacotó ra tsi ra Jesús*  
(Mt. 26.71-75; Mr. 14.66-72; Lc. 22.58-62)

<sup>25</sup> Tan nyaá nyityi ra Pedro tuñu ra ñuhu. Tan catyí ra naha tsihin ra:

—¿A ñavin yooho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

<sup>26</sup> Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyivi ra tsa tsahnyá ra Pedro soho, quitsahá tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

<sup>27</sup> Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitooho.

*Nu cutuñi ra Jesús nuu ra Pilato*

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Yahá can tan quitá ra naha tsihin ra Jesús yuvehe ra Caifás tan tsindacá ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihví ra naha tsitsi vehe tyiñu can tyin ñavin vehe nyivi Israel cuví can. Tyin ica tsa quihví ñi Israel vehe ndavaha ñi tyin coto ña cua cuví cuxiñi ñi quivi vico pascua.

<sup>29</sup> Yacan cuenda quitá ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siqui ra ihya? —catyí ra Pilato tsihin ra cuví ityi nuu tsihin nyivi Israel naha ra.

<sup>30</sup> Tan nacahan ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

<sup>31</sup> Tacan tan catyí ra Pilato tsihin ra naha:

—Quihin ndo tsi ra, tan tatsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

<sup>32</sup> Tacan cundaá tsa cahan ra Jesús nácaa cua cúu ra.

<sup>33</sup> Yahá can tan quihví nyico ra Pilato tsitsi vehe tyiñu can inga tsaha. Tan caná ra tsi ra Jesús tan tsicá tuhun ra tsi ra:

—¿A yooho cuví rey cuenda nyivi Israel? —catyí ra tsihin ra.

<sup>34</sup> Tan catyí ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyivi natyuhu tsi un cuhva cahan un tsihin yu? —catyí ra Jesús tsihin ra Pilato.

<sup>35</sup> Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsahá cuenda tsi un tsi yu. ¿Náa javahá un? —catyí ra tsihin ra Jesús.

<sup>36</sup> Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yofi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

<sup>37</sup> Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa caahán maa un. Yacan cuenda cacú yu tan vatsi yu nu ñuhu ñayivi ihya, tyin cahan yu tsa nditsa. Tandihí nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

<sup>38</sup> Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahá tsa tsicá tuhun ra Pilato yacan, quitá ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

*Nu cua cahñi ra naha tsi ra Jesús*

(Mt. 27.15-31; Mr. 15.6-20; Lc. 23.13-25)

<sup>39</sup> Maa tyin nyooho iyó ndo tuhun tsa tsicán ndo na tava yu tsi iin ra nyíi vehe caa tsa iyó vico pascua ihya. ¿A cuñi ndo tava yu tsi ra tsa cuví rey cuenda ndo tsa cuví ndo nyivi Israel? —catyí ra Pilato tsihin ra naha.

<sup>40</sup> Tacan tan quitsahá caná tsa tandihí ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

## 19

<sup>1</sup> Tacan tan quihñin ra Pilato tsi ra Jesús tan tava tyiñu ra na cañi andarú tsi ra.

<sup>2</sup> Tan andarú can javahá ra naha iin corona iñu tan tyihí ra naha jiñi ra Jesús. Tan jacunditsí ra naha iin jahma tunduuhva tsi ra, tahan tsa tuhvá ra cuví rey tsinditsí.

<sup>3</sup> Tacan tan natuhvá ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyivi Israel! —catyí ra naha, tan cañi ra naha nuu ra.

<sup>4</sup> Tacan tan quitá nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihi yu —catyí ra Pilato tsihin ra naha.

<sup>5</sup> Tan quitá ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaa ihya! —catyí ra tsihin ra naha.

<sup>6</sup> Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quit-sahā caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

<sup>7</sup> Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñí tsi tsa cúu ra tyin jahá ra tsa Sehe Nyoo cuví tsi ra —catyí ra naha.

<sup>8</sup> Tsa tsiñi ra Pilato yacan, tan nayuhvi xaan ca ra.

<sup>9</sup> Tan quihvi nyico ra inga tsaha tsitsi vehe tyiñu, tan tsicā tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

<sup>10</sup> Tacan tan catyí ra Pilato tsihin ra:

—¿Nacuenta ña caahán un tsa caahán yu? ¿A ña tsító un tyin ra cumi tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

<sup>11</sup> Tan nacahan ra Jesús tan catyí ra:

—Tun tsatyin ña tsahā Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

<sup>12</sup> Tsa ndihí cahān ra Jesús yacan, tan quitsahā nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, tsi tsi un! Tyin tandihí ra tsa caahán tyin rey cuví ra naha, ra xaan iñi tsi rey cahnu cuví ra naha —catyí ra naha.

<sup>13</sup> Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñí tsi catyí: “Nu canyí yuu”.

<sup>14</sup> Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

<sup>15</sup> Maa tyin canā tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yofi ca rey iyó. Intuhun ñi maa ra César, ra cuví rey cahnu —catyí ra naha.

<sup>16</sup> Tacan tan tsahā cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihñ andaru tsi ra, cuahán ra tsihin ra naha.

*Nu tsihi ra Jesucristo nu cruu*

(Mt. 27.32-44; Mr. 15.21-32; Lc. 23.26-43)

<sup>17</sup> Tan nyisó ra Jesús cruu ra, cuahán ra iin nu nañi: “Yiqui Jiñi Ndiyí”. Tan tsihin yuhu hebreo nañi tsi Gólgota.

<sup>18</sup> Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaā ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaā ra naha tsi ra Jesús mahñu.

<sup>19</sup> Tan tava tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.”

<sup>20</sup> Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín.

<sup>21</sup> Yacan cuenda ra cuví ityi nuu tsihin jutu cahān ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

<sup>22</sup> Maa tyin catyí ra Pilato:

—Tsa tsa yahā tyaa yu, nandoo maa tsi tacan —catyí ra tsihin ra naha.

<sup>23</sup> Tsa yahā tyaa ra andaru can naha ra tsi ra Jesús nu cruu, naquihñ ra naha jahma ra. Tsa cumi taahan ra naha quihñ luxu luxu jahma ra. Tan ndoo jahma ra tsa quicu cañi ñi tsa tsindasi ra.

<sup>24</sup> Tan andaru can natuhñ tahan ra naha:

—Ña cua cahnya yo itsi. Jasiqui suuhva jihna yo na nyehé yo yóo cua jaha canaa jahma can —catyí ra naha.

Tacan cuví tumaa caahán nu tutu Nyoo nu catyí tsi tyehen: “Tsatsa tahan ra naha luxu luxu jahma yu tan jasiqui suuhva ra naha tsihin tsi, nyehé ra naha yóo ra jaha canaa itsi.” Tan yacan cuví tsa javahā ra andaru can naha ra.

<sup>25</sup> Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasihi ra Cleofas, tan ña María quee ñuu Magdala.

<sup>26</sup> Tan nanyehé ra Jesús tsi sihi ra, nyaá ña yatyin ñi. Tan nanyehé tucu ra tsi ra tsa tsicā tsihin ra, ra tsa cuñi xaan ra. Tan catyí ra tsihin sihi ra:

—Miya, va ra sehe un nyaá tsihin un juvin —catyí ra.

<sup>27</sup> Tacan tan catyí ra tshin ra tsa cuñi xaan ra:

—Tsa, va sihi un nyáá tshin un juvin —catyí ra tshin ra.

Nda quivi can tan quihin ra tsi ña, cuahan tshin ra yuvehe ra. Tan jahá cuenda ra tsi ña.

*Nu tsihi ra Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Tsa yaha yacan, tsa nyehe ra Jesús tyin tsa ndihi tyiñu jahá ra. Tacan tan catyí ra:

—Na ityi iñi yu —catyí ra.

Tan tshin yacan cundaá tsa nyaá nu tutu Nyoo nu caahán tsi nácaa cua cúu ra.

<sup>29</sup> Tan ican nyaá iin quivi nu yihí vinu iya. Tacan tan jatyi ra naha tsa cuví yahma tumaa caa catyí tshin vinu iya can. Tan tyaa ra naha yacan nu iin yutun hisopo. Tan jandaá ra naha tan tyanaa ra naha can yuhu ra.

<sup>30</sup> Tsihi ra Jesús vinu can tan catyí ra:

—Tsa iyó vaha tandihi vityin —catyí ra.

Tacan tan nacañi nuu ra jiñi ra tan tsihi ra.

*Nu tutsi ra andaru yoco xaan yiqui naha ra Jesús*

<sup>31</sup> Tsa ndi cumañi intuhun ña quivi tan tahan tsi quivi vico cahnu pascua, tan ra cuví ityi nuu tshin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuví tsi tsa cuenda ra naha. Yacan cuenda tsican ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha.

<sup>32</sup> Tacan tan cuahán andaru nu nyecú cruu can. Tan tsahnú ra naha sihin iin ra ticaá iin tsiyo xiin ra Jesús. Tan tsahnú nyico ra naha sihin inga ra tsa ticaa inga tsiyo xiin ra.

<sup>33</sup> Maa tyin cuhva tsa natuhva ra naha nu ticaá ra Jesús, nyehe ra naha tyin tsa tsihi maa ra. Yacan cuenda ña tsahnú ca ra naha sihin ra.

<sup>34</sup> Maa tyin iin andaru can tutsi ra yoco xaan yiqui naha ra Jesús. Tan quitá niñi tan ndutya.

<sup>35</sup> Ra tsa nacatyí tuhun yacan, ra tsa nyehe vaha cuví ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho.

<sup>36</sup> Tacan cuví tyin tacan tan cundaá tsa catyí tuhun Nyoo nu catyí tsi: “Ndi intuhun yiqui ra tan ña tahnu.”

<sup>37</sup> Tan iyó inga nyico nu catyí tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

*Nu quihvi ñuhu ra Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Tsa yaha yacan, ra José ra ñuu Arimatea tsican ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuví ra iin ra yihí cuenda ra Jesús vasu tsa xeehe ñi tsa cuenda tsa yuuhví ra tsi ra cuví ityi nuu tshin nyivi Israel. Tacan tan tsaha ra Pilato ndatu tsi ra, tan tsahan ra José tsinaquihin ra cuñu ñuhu ra Jesús.

<sup>39</sup> Tsahan ndihi tucu ra Nicodemo, ra tsa tsahan tsicahan tshin ra Jesús tsa tsa cuaa. Tsaá ra tshin ndutya tami. Tan iin ndutya tami tsa nañi mirra nasaca nuu tshin inga tsa nañi áloe. Tan quitá tsi tumaa oco utsi kilu tsa tandihi tsi.

<sup>40</sup> Tacan tan ra José tshin ra Nicodemo quihin ra naha cuñu ñuhu ra Jesús tan cava nuu ra naha tsi ra tshin jahma cuiñi tsa tyihí ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu.

<sup>41</sup> Yatyin nu tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsa nu ñaha ca cuyucu ndi intuhun ndiyi.

<sup>42</sup> Ican ñi tinyi ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

## 20

*Nu nandoto ra Jesús*

(Mt. 28.1-10; Mr. 16.1-8; Lc. 24.1-12)

<sup>1</sup> Tsa naa ca tsa cuví tumbingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndasí yuhu ñaña can.

<sup>2</sup> Tacan tan tsinú xaan ña cuahán ña nu nyii ra Simón Pedro tan inga ra tsicá tshin ra Jesús, ra tsa cuñi xaan ra Jesús. Tan catyí ña tshin ra naha:

—Quihin nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindaca ñi itsi —catyí ña María tshin ra Pedro tan tshin inga ra can.

<sup>3</sup> Tacan tan ra Pedro tan inga ra can cuahán ra naha nu ñaña.

<sup>4</sup> Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaá nu ñaña.

<sup>5</sup> Quitsaha nyehé ihñi ra tsitsi ñaña, tan nyehe ra jahma cuiñi tsa cava nuu cuñu ñuhu ra Jesús, canyii can. Maa tyin ña quihvi ra tsitsi ñaña.

<sup>6</sup> Yaha can tan tsaá ndihi ra Simón Pedro tsata ra, tan ra ican quihvi ra tsitsi ñaña can. Juvín ñi nyehe ndihi ra can jahma can canyii tsi.

<sup>7</sup> Tan juvin ñi nyehe ndihi ra tyin jahma tsa tsindasi jiñi ra Jesús, ña iin ñi nu canyiñ can tsihin inga jahma can, yihí tahuñ can tan cayucú siñ can.

<sup>8</sup> Tacan tan quihvi ndihi inga ra tsicá tsihin ra Jesús can, ra tsa tsaá tsa jihna nu ñaña can. Tan nyehe ra tsa cuví can, tan tsinuñ iñi ra.

<sup>9</sup> Tyin tsa jihna, ña cutuñi iñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra.

<sup>10</sup> Tacan tan cuanuhu ra tsicá tsihin ra Jesús nda yuvehe ra naha.

*Nu quituvi ra Jesús nuu ña María quee ñuu Magdala*

(Mr. 16.9-11)

<sup>11</sup> Maa tyin tsa tsaá nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehe ihñi ña tsitsi ñaña can.

<sup>12</sup> Tan nyehe ña uvi taahan ángel nditsi ra naha jahma cuitin, nyecú ra naha nu tsicavaá cuñu ñuhu ra Jesús. Iin ra nyaá ityi nu tsicavaá jiñi ra, tan inga ra nyaá ityi nu tsicavaá tsaha ra.

<sup>13</sup> Tan tsicá tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihñin nyivi tsi Jutu Mañi yu, tan ña tsitó yu nu maa tinyiñ ñi tsi ra —catyí ña tsihin ángel can.

<sup>14</sup> Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña taton ra Jesús cuví ra.

<sup>15</sup> Tacan tan tsicá tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñi maa ña tyin ra jahá cuenda cora yutun tata can cuví ra. Tan catyí ña:

—Tatta, taton yooho quihñin tsi ra Jesús, cahan tsihin yu nu maa tsindacá un tsi ra, tyin cunaquihñin yu tsi ra —catyí ña tsihin ra.

<sup>16</sup> Tacan tan catyí ra Jesús tsihin ña:

—¡María! —catyí ra tsihin ña.

Tan nanyehe ña tan cahan ña tsihin ra tsihin yuhu hebreo, tan catyí ña:

—¡Raboni! —Tan cuñi tsi catyí can: “Maestro”.

<sup>17</sup> Tan catyí ra Jesús tsihin ña:

—Ña tñin un tsi yu, tyin ñaha ca cahun yu nu nyaá Jutu yu. Maa tyin cúaahan tan cahan un tsihin tandihi yañi yu tyin cuahan yu nu nyaá Jutu yu, tan juvin ñi Jutu ndihi ndo cuví tsi ra. Cuahan yu nu nyaá Nyoo yu, tan juvin ñi Nyoo ndo cuví tsi ra —catyí ra Jesús tsihin ña.

<sup>18</sup> Tacan tan tsahañ ña María ñuu Magdala can tsijacotó ña tsi ra tsicá tsihin ra Jesús tyin nyehe ña tsi ra tan cahan ra yacan tsihin ña.

*Nu quituvi ra Jesús nuu ra tsicá tsihin ra*  
(Mt. 28.16-20; Mr. 16.14-18; Lc. 24.36-49)

<sup>19</sup> Juvin ñi maa quivi can nu quitsaha vitya, tsa cua cuaa tan ndu iin ra tsicá tsihin ra Jesús. Tan ndasi vaha yuvehe nu yucú ra naha tsa cuenda tsa yuuhvi ra naha tsi ra cuví ityi nuu tsihin nyivi Israel. Tan ra Jesús quituvi ra tan tsinyaá nyityi ra mahñu ra naha. Tan tsahaá ra nacumi tsi ra naha, tan catyí ra:

—Na coo tsa taxin añima ndo —catyí ra.

<sup>20</sup> Tsa yaha tsa cahan ra yacan tan janaha ra ndaha ra tan xiin ra tsi ra naha. Tan ra ican naha ra si xaan cuñi ra naha tsa nyehe ra naha tsi Jutu Mañi yo.

<sup>21</sup> Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tsihin ra naha.

<sup>22</sup> Tacan tan tiví ra tsi ra naha tan catyí ra tsihin ra naha:

—Naquihñin ndo Tatyí Ii Nyoo.

<sup>23</sup> Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

*Nu nyehe ra Tomás tsi Jutu Mañi yo tsa yaha nandoto ra*

<sup>24</sup> Maa tyin ra Tomás, iin rq tsicá tsihin ra Jesús, ra tsa catyí ñi: “ra tinihi”, yoñi ra nyii tsihin ra naha tsa tsahañ ra Jesús.

<sup>25</sup> Yaha can tan nacatyí tuhun ra tsicá tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahvi nu quihvi nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinuñi yu —catyí ra Tomás.

<sup>26</sup> Tsa yaha una quivi yucú nyico ra tsicá tsihin ra Jesús tsitsi iin vehe. Tan nyii ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihvi ra tan tsinyaá nyityi ra mahñu ra naha. Tan tsahaá ra nacumi tsi ra naha tan catyí ra:

—Na coo tsa taxin añima ndo.

<sup>27</sup> Tacan tan quitsaha catyí ra tsihin ra Tomás:

—Cuaxin nundaha un nu caahvi ndaha yu ihya. Tan cuaxin ndaha un yiqui naha yu. Tan ña cuví un ra ndava iñi. Tsinuñi —catyí ra Jesús tsihin ra Tomás.

<sup>28</sup> Tacan tan nacahan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

<sup>29</sup> Tan catyí ra Jesús tshin ra:

—Yooho Tomás, vityin tsinú iñi un tyin nyehé un tsi yu. Sii ca cuñi nyivi tsa nduve tsa nyehé tan tsinú iñi ñi —catyí ra Jesús tshin ra Tomás.

*Nu jacoto ra Juan nacuenda tsinu libru ihya*

<sup>30</sup> Cuaha ca tsa iyo javaha ra Jesús nuu ra tsicá tshin ra, maa tyin ña tandihi tsi nyaá nu libru ihya.

<sup>31</sup> Tsinyaá tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayivi nyitó tsa ña cua naa maa.

## 21

*Nu quituví ra Jesús nuu utsa taahan ra tsicá tshin ra*

<sup>1</sup> Tsa yaha can tan quituví ra Jesús nuu ra tsicá tshin ra inga tsaha. Tyehen quituví ra yatyin ñi yuhu miñi Tiberias:

<sup>2</sup> Iñi ñi nu yucú ra Simón Pedro tan ra Tomás tsa nañi: “ra tinihi”, tan ra Natanael, ra ñuu Caná nu cuví Galilea. Tan yucú ndihi sehe ra Zebedeo naha ra tan uvi taahan ca ra tsicá tshin ra Jesús.

<sup>3</sup> Tan catyí ra Simón Pedro tshin ra naha:

—Cuahan yu cua tñin yu tyaca —catyí ra.

Tan catyí ra naha tshin ra:

—Cuhun ndihi ndi tshin un —catyí ra naha.

Cuahán ra naha tan quihví ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha.

<sup>4</sup> Tsa cuñi cunditsin tan quituví ra Jesús nu nyiti yuhu miñi can. Maa tyin ra tsicá tshin ra, ña nacoto ra naha tsi ra.

<sup>5</sup> Tacan tan catyí ra tshin ra naha:

—Nyooho ra cuatyí, ¿a ñaha ca ñihi ndo tyaca?

Tan nacahan ra naha tan catyí ra naha:

—Ñaha ca ñihi ndi.

<sup>6</sup> Tacan tan nacahan ra Jesús tan catyí ra:

—Cuaxin ndo traya ndo tsiyo cuaha yutun ndoo juvin, tan cua ñihi ndo tyaca —catyí ra Jesús tshin ra naha.

Tacan icá ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can.

<sup>7</sup> Tan ra tsa cuñi xaan ra Jesús catyí ra tshin ra Pedro:

—¡Jutu Mañi yo cuví ra! —catyí ra tshin ra Pedro.

Tsa tsiñi ra Simón Pedro tyin Jutu Mañi yo cuví ra, tsinditsi ra jahma ra, tyin tava ra can tsa cua tñin ra tyaca, tan quihví ra cuahán ra tsitsi ndutya can.

<sup>8</sup> Tan inga ra tsa tsicá tshin ra Jesús tsaá ra naha nda yuhu miñi can tshin yutun ndoo,

ixtá ra naha traya can tyin tsitu cuii can tshin tyaca, tyin yatyin ñi yuhu miñi can yucu ra naha tumaa iin cientu metru ñi.

<sup>9</sup> Tsa nuu ra naha nu ñuhu, nyehe ra naha iin nu cayú tuun ñuhu. Tan canyí iin tyaca tshin paan nuu tuun ñuhu can.

<sup>10</sup> Tan catyí ra Jesús tshin ra naha:

—Ndaca ndo taahan tyaca tsa ndi tñin ndo —catyí ra Jesús tshin ra naha.

<sup>11</sup> Tan ndaa ra Simón Pedro nu yutun ndoo tan quitsaha ixtá caa ra traya tyin tsitu cuii can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can.

<sup>12</sup> Tacan tan catyí ra Jesús tshin ra naha:

—Ñaha ndo tyin curumusa ndo —catyí ra Jesús tshin ra naha.

Tan ndi intuhun ra tsicá tshin ra, ña cana iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra.

<sup>13</sup> Tacan tan natuhva ra Jesús tan quihñin ra paan can, tan tsaha ra tsi ra naha. Tan juvin ñi tacan icá ra tshin tyaca.

<sup>14</sup> Yacan cuví nu tsinu uñi tsaha quituví ra Jesús nuu ra tsicá tshin ra tsa yaha nandoto ra.

*Nu caahan ra Jesús tshin ra Simón Pedro*

<sup>15</sup> Tsa yaha tsa curumusa ra Jesús, tan tsicá tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tshin ra:

—Cuhva tsa catsi mbee nyihi jana yu —catyí ra Jesús tshin ra Pedro.

<sup>16</sup> Tsicá tuhun nyico ra Jesús tsi ra inga tsaha:

—Simón sehe ra Jonás, ¿a cuñi un tsi yu? —catyí ra Jesús tshin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tshin ra.

Tan catyí ra tshin ra:

—Jaha cuenda mbee jana yu —catyí ra Jesús tshin ra.

<sup>17</sup> Tan tsinu uñi tsaha tsicá tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tshin ra.

Cuhva tsa tsicá tuhun ra tsi ra tsa tsinu uñi tsaha tatun cuñi ra tsi ra, ra Pedro nducui-ihya xaan cuñi ra, tan catyí ra tshin ra:

—Jutu Mañi yu, maa un tsitó nacaa añima yu tan maa un tsitó tyin cuñi yu tsi un —catyí ra.

Tan catyí ra Jesús tshin ra:

—Jaha cuenda mbee jana yu.

<sup>18</sup> Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñi un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñi un cuhun un —catyí ra Jesús tsihin ra Pedro.

<sup>19</sup> Tsa cahan ra Jesús yacan, cuñi ra cahan ra nácaa cua cúu ra Pedro tan cua jacahnu ra tsi Nyoo tacan. Yahá can tan catyí ra Jesús tsihin ra Pedro:

—¡Naha quitsi nyicun un tsi yu! —catyí ra tsihin ra.

*Nu caahán ra Juan tuhun maa ra*

<sup>20</sup> Tacan tan natsico coo ra Pedro tan nyehe ra tyin nyicún inga ra tsa tsica tsihin ra Jesús tsi ra naha, ra tsa cuñi xaan ra Jesús. Juvín ra tsinyanaa tsi ra Jesús tsa cuxiñi ra quivi can. Tan tsica tuhun ra tsi ra tan catyí ra: “Jutu Mañi yu, ¿yóo ra cua xico tsi un?” catyí ra, tsica tuhun ra quivi tsa ndi cumañi ca cúu ra Jesús.

<sup>21</sup> Cuhva tsa nyehe ra Pedro tsi ra, tsica tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

<sup>22</sup> Nacahan ra Jesús tan catyí ra:

—Tatun cuñi maa yu tsa coo ra nda cuanda quitsi yu inga tsaha, ¿náa cuenda yooho? Cqhon yooho tsihin yu —catyí ra Jesús tsihin ra Pedro.

<sup>23</sup> Tacan tan iin yaha ñi tsinú tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñi yuhu tsa coo ra nda cuanda quitsi yu inga tsaha, ¿náa cuenda yooho?”

<sup>24</sup> Yuhu cuví ra can, ra tsa cahan ra Jesús tuhun. Tan nyehe yu tandihi cuii maa tsa cuví tan tyaq yu nu libru ihya. Yuhu tsitó yu tyin tandihi tsa tyaq yu, tsa nditsa caahán tsi.

<sup>25</sup> Iyó cuaha ca tsa javahá ra Jesús. Tun tsatyín tsicunyaq tandihi can nu libru, tsicá ñi yu tyin ndi ña cua cutahan can naní cahnú nu ñuhu ñayivi.

Tan na cuví tsi tacan ñi.



## Tyiñu Tsa Javaha Ra Apóstol: Ra Tsa Tava Tyiñu Ra Jesucristo

*Nu catyí ra Jesús tyin cua quitsi Tatyí Ii Nyoo*

<sup>1</sup> Yooho Teófilo, quivi tsa jacuhun yu tutu tsa jihna ñi can tsi un, tyaá yu tandihi tsa quitsahá javahá ra Jesús tan tandihi tsa jacuahá ra nda quivi jihna ñi,

<sup>2</sup> tan nda quivi nandaá ra andivi. Tan tsa ndi cumañi ca nandaá ra andivi, nacatsj ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra.

<sup>3</sup> Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvj ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvj ra nu yucú ra naha, tyin na coto ra naha tyin nditsa tsa nyito ra. Tan cahān ra Jesús tsihin ra naha nácaa ndacá ñaha Nyoo tsi yo.

<sup>4</sup> Tsa ndi nyíí ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahān yu tsihin ndo quivi can.

<sup>5</sup> Nditsa tyin tsihin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

*Nu nandaá ra Jesús andivi*

<sup>6</sup> Tsa ndu iin ra tava tyiñu ra Jesús, tan tsica tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

<sup>7</sup> Tan nacahān ra Jesús tan catyí ra tsihin ra naha:

—Ña taahán tsi coto nyooho ndáa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi.

<sup>8</sup> Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihi ñuu tsa cayucú Judea tan Samaria, tan nda cuanda nanii cahnu ñuhu ñayivi —catyí ra Jesús tsihin ra naha.

<sup>9</sup> Tan tsa yaha tsa cahān ra Jesús tuhun ihya, tan tsitsi tsa nyehé ra naha tsi ra, nandaá ra andivi, tan quihvi ra tsitsi vico. Tacan tan ña nyehe ca ra naha tsi ra.

<sup>10</sup> Tan cuhva tsa nyehé ndaá ra naha andivi, quituvj uvi taahan ángel Nyoo tsa

nditsí jahma cuitsin yatyin ñi nu nyecú ra naha.

<sup>11</sup> Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andivi? Ra Jesús tsa nyehe ndo nandaá ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

*Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javaha ra Judas*

<sup>12</sup> Tacan tan quitá ra tava tyiñu ra Jesús nu tsiyucú ra naha yucu nu iyó yutun olivo. Tan cuanuhú ra naha ñuu Jerusalén. Tan yatyin ñi canyíí ñuu can, tumaa sava hora ñi tan tsaá yo. Tyin sava hora ñi cuvi caca nyivi quivi quitatú ñi, tyin tacan catyí maa ley tsa tyaá ra Moisés.

<sup>13</sup> Tsa tsaá ra naha ñuu Jerusalén can, ndaá ra naha nu tsinu uvi pisu vehe nu iyó ra naha. Tan ra tsa yucú can, cuvi ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñí tsa nasama ra ndacá ñaha, tan tsihin ra Judas yañi ra Jacobo.

<sup>14</sup> Tan tandihi ra ican naha ra ndu iin ra naha tandihi quivi tan tsicán tahvi ra naha tsi Nyoo. Tan yucú ndihi tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

<sup>15</sup> Tan tsa tandihi nyivi tsa ndu iin quivi can quitá maa cientu oco ñi. Tacan tan nduvitá ra Pedro. Tan catyí ra tsihin ñi:

<sup>16</sup> —Nyooho yañi, tsa nyaá tucu maa tsa tahān ra Jesús cuhva ihya tan vityin tsa cundaá tsa cahān ra David jahá Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra.

<sup>17</sup> Tan ra Judas cuvi ra iin ra tsa tsinyij tsihin yo. Tan iin caa ñi jahá tyiñu ra tsihin yo.

<sup>18</sup> Maa tyin tsahān ra, tan jatá ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiji ra, tan ndatá tsitsi ra tan quitá tandihi tsiti ra.

<sup>19</sup> Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu cuenda tsa Tsatí Niñi Nyivi.

<sup>20</sup> Tyin nu libro Salmo catyí tsi cuenda ra Judas tyehen:

Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javaha ra.

<sup>21-22</sup> Tan vityin yucú ra tsa cutahān tsihin yo quivi tsinyij Jutu Mañi yo Jesucristo tsihin yo; nda quivi jacoondutya ra Juan

tsi ra, tan nda quivi nandaq̄ ra cuahán ra andivi. Tan vityin ñiñi cuñi tsi tsi inga ra cuvi tsandaa tsihin yo tsa cuenda tsa nandotō ra Cristo —catyi ra Pedro.

<sup>23</sup> Tacan tan canā ra naha tsi uvi taahan ra naha. Canā ra naha tsi ra José tsa nañi Barsabás, tan juven ñi nañi tucu ra Justo; tan canā tucu ra naha tsi ra Matías.

<sup>24</sup> Tan tsican tahvi ra naha tsi Nyoo tan catyi ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsj̄ maa un,

<sup>25</sup> tyin cuišo ra tyiñu tsa jacunaq̄ ra Judas tsa cuenda cuatyí ra, tan cuahán ra nu taahán maa tsi cuhun ra —catyi ra naha, tsican tahvi ra naha tsi Nyoo.

<sup>26</sup> Tacan tan tavā cuenda ra naha ndáa ra cua tahan tsi cuišo tyiñu can. Tan tahan tsi tsi ra Matías. Ra ícan cuvi ra tahan tsi cutahan tsihin tsa utsi iin ra tsa tavā tyiñu ra Jesús.

## 2

### *Nu nuu Tatyí Ii Nyoo*

<sup>1</sup> Tsaq̄ quivi vico Pentecostés, tan ndu iin tandihi nyivi tsa tsinú iñi tsi ra Jesús.

<sup>2</sup> Tan sana iñi ñi tan tsiñi ñi cucayu ityi andivi. Tumaa cucayu tsa vatsi tatyí xaan. Tan iyo xaan cuvi tsitsi vehe nu yucú ñi.

<sup>3</sup> Tacan tan quituvj̄ tumaa iin ñuhj̄ tan tsaq̄ tsi siqui intuhun intuhun ñi.

<sup>4</sup> Tan tandihi ñi tsitu ñi tsihin Tatyí Ii Nyoo. Tan quitsahā caahán ñi inga yuhu cuhva tsa jacahan maa Tatyí Ii Nyoo tsi ñi.

<sup>5</sup> Tan quivi can cuaha xaan ra ñuu Israel tsaq̄ ra naha ñuu Jerusalén. Ra vaha tsicá tsihin Nyoo cuvi ra naha. Queq̄ ra naha tandihi ñuu tsa cayucú nu ñuhu ñayivi.

<sup>6</sup> Tan tsa tsiñi ra can naha ra tsa iyo xaan cuvi nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán ñi jahá Tatyí Ii Nyoo.

<sup>7</sup> Iyo xaan cuñi ra naha tan quitsahā natuhún tahan ra naha tan catyi ra naha:

—¿A ñavin nyivi ñuhu Galilea cuvi tandihi ñi tsa caahán ihya?

<sup>8</sup> ¿Nacuenda tyin tsiñi yo caahán ñi cuhva caahán intuhun intuhun yo?

<sup>9</sup> Ihya yucú yo tsa cuvi yo nyivi queq̄ Partia, Media, Elam, Mesopotamia, Judea, Capadocia, Ponto, Asia,

<sup>10</sup> Frigia, Panfilia, Egipto, tan nyivi queq̄ ityi nuu ca Cirene ityi Africa. Tan yucú tucu yo tsa cuvi yo nyivi ñuu Roma tan iyo yo ñuu ihya. Tan juhva yo cuvi yo nyivi Israel nda quivi cacú yo. Tan inga yo cuvi yo nyivi

nanduvj̄ cuenda nyivi Israel tan nyicún yo ley tsa tyaa ra Moisés.

<sup>11</sup> Iyó tucu yo tsa cuvi yo nyivi queq̄ Creta tan Arabia. Maa tyin tandihi yo tan tsiñi yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnú tsa javahá Nyoo —catyi ra naha.

<sup>12</sup> Tandihi ra naha, iyo xaan cuñi ra naha, tan tsicá tuhun tahan ra naha tan catyi ra naha:

—¿Náa cuñi tsi catyi tandihi tsa cuvi ihya? —catyi ra naha.

<sup>13</sup> Maa tyin inga ra jacuñi nyaa ra naha tsi ñi, tan catyi ra naha tyin tsiñi ñi.

### *Nu caahán ra Pedro tsihin nyivi*

<sup>14</sup> Tacan tan nduvit̄a ra Pedro tsihin tsa utsi iin ca ra tavā tyiñu ra Jesús. Tan ñihi cahan ra tan catyi ra:

—Nyooho yañi, tsa cuvi ndo ra ñuu Israel, tan tandihi nyooho tsa iyó ñuu Jerusalén ihya. Cuñi tsi tsa coto ndo tuhun ihya. Tan tyaa soho vaha ndo tsa cua cahan yu tsihin ndo.

<sup>15</sup> Tyin cuñi maa ndo tyin tsiñi ndi. Maa tyin ñavin nyixi tsihi ndi, tyin ña tuhvā nyivi coho nyixi hora ihya, tyin ndi jatyaan.

<sup>16</sup> Maa tyin tsa cuvi ihya cuvi tsa cahan ra Joel, ra cuvi ndusu yuhu Nyoo tahan tsanaha. Tyin catyi ra:

<sup>17</sup> Nu cua ndihi quivi, catyi Nyoo, cua jaquitsi yu Tatyí Ii yu siqui tandihi nyivi. Tan cua cahan sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyivi tsahnú cua nyehe ñi ñumaahna jaha yu.

<sup>18</sup> Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahan ñi tsa cuenda yu, catyi Nyoo.

<sup>19</sup> Tan catyi ra tyin cua janaha ra tsa iyo cua nyehe nyivi ityi andivi.

Tan ityi nu ñuhu ñayivi cua javaha ra tsa iyo, seña niñi, seña ñuhj̄, tan vico yuhma.

<sup>20</sup> Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihí tuhun caahán ra ihya cua cuvi tsi tsa ndi cumañi ca tahan tsi quivi quitsi Jutu Mañi yo.

Tan quivi cua quitsi ra, iyo xaan cua cuvi.

<sup>21</sup> Tan tandihí nyivi tsa tsicán tahvi tsi ra cua cacú ñi, catyi ra Joel jahá Nyoo.

<sup>22</sup> Tsa yaha nacatyí tuhun ra Pedro yacan, tacan tan catyi ra tsihin ra naha:

—Nyooho ra Israel, tyaa soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsj̄ tsi ra, tan tsa janahā Nyoo tsi yo tyin nditsa tsa nacatsj̄ ra tsi ra, tsaq̄ ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandihi tsa caahán yu ihya.

<sup>23</sup> Maa tyin quiví nacuhvã cuenda ndo tsi ra, javahã ndo tumaa cuhva tyaã maa Nyoo cuhva nda quiví jihna ñi. Tyin tsaãã cuenda ndo tsi ra tsi ra caquiñi. Tan ticaã ra naha tsi ra nu cruu. Tsaññi ra naha tsi ra jahã ndo.

<sup>24</sup> Maa tyin Nyoo janandoto ra tsi ra. Jacacũ ra tsi ra tyin ña cuvi cundaca ñaha tuhun tsihi tsi ra.

<sup>25</sup> Tyin ra David caãan ra tuhun cahan ra Cristo taãan tsanaha, tan catyí ra: Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuvi jayuhvi tsi yu.

<sup>26</sup> Yacan cuenda sii xaan cuñi yu. Tan jacahnú yu tsi Nyoo tsihin tsa sii cuñi yu. Tan cuñu ñuhu yu cua quitatu tsi tyin tsitó yu tyin cua nandoto yu inga tsaaha.

<sup>27</sup> Tyin yoocho, Nyoo Jutu yu, ña cua nacoo ihñi un añaima yu nu yucú añaima nyiví tsa tsihi, tan ndí ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

<sup>28</sup> Tan janahã un tsi yu ityi nu coo yu ñayiví ña cua naa maa.

Tan cua jacutu un tsi yu tsihin tusii iñi tyin maa un nyaá tsihin yu, catyí ra David caãan ra tsa caãan ra Cristo taãan tsanaha.

<sup>29</sup> Nyoocho yañi, tsitó vaha yo tyin ra David tsii tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin.

<sup>30</sup> Maa tyin ra David cuví ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata maa ra cua cuvi ra Cristo. Tan ra Cristo, cuví ra cua cundaca ñaha tumaa tsa tsindacã ñaha ra David.

<sup>31</sup> Tan ra David tumaa tsa tyin nyehé ra tsa cua cuvi nu cuahán ca tsi ityi nuu. Tan caãan ra tuhun tsa caãan ra Cristo. Tan catyí ra tyin ña cua ndoo añaima ra nu yucú añaima nyiví tsa tsihi. Tan ndí ña cua tyahyu cuñu ñuhu ra, catyí ra.

<sup>32</sup> Tan ra Jesús can janandoto Nyoo tsi ra. Tan tandihi maa ndí cuví ndí tsandaa tsa cuenda tsa nandoto ra.

<sup>33</sup> Jutu Nyoo jacahnú ra tsi ra Jesús, tan tsihin ndaha cuaha ra cañihí ra tsi ra nda gloria. Tan ra Jesús naquihin cuenda ra Tatyí Ii tsa catyí Jutu yo Nyoo taãan tsanaha tyin cuhva ra tsi yo. Tan yacan cuví tsa tsaãã ra tsi ndi vityin. Juvín tsi cuví tsa nyehé ndo tan tsiñi ndo.

<sup>34</sup> Tyin ñavin ra David nandaa ityi andiví. Maa tyin maa ra David caãan ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: “Cunya xiin cuaha yu

<sup>35</sup> tsitsi tsa cua caquin yu tsi ra xaan iñi tsi un tsaaha un”, catyí ra David jahã Nyoo.

<sup>36</sup> Tacan caãan ra Pedro tsihin ra naha, tan catyí tucu ra:

—Nyoocho tan tandihi ca nyiví Israel, coto vaha ndo tyin tuhun ra Jesús, yacan cuví tsa caahán yu tsihin ndo ihya. Ticaã ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacá ñaha tsi yo jahã Nyoo —catyí ra Pedro.

<sup>37</sup> Cuhva tsa tsiñi ra naha tsa caãan ra Pedro tuhun ihya, cuihya xaan cuñi ra naha cuví. Tan tsicã tuhun ra naha tsi ra Pedro tan tsi tandihi ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

<sup>38</sup> Tacan tan catyí ra Pedro tsihin ra naha: —Intuhun intuhun ndo ndũ uvi iñi ndo cuatyí ndo tan nasama ndo cuhva iyó ndo. Tan cõndutya ndo tsihin sivi ra Jesucristo. Tan cua jaha ra tucahnú iñi cuatyí ndo. Tacan tan cua cuhva Nyoo Tatyí Ii ra tsi ndo.

<sup>39</sup> Tyin taãan tsanaha catyí Nyoo tyin cuhva ra Tatyí Ii ra tsi yo, tan tsi sehe yo, tan tsi nyiví tsa cañi iyó. Tyin tandihi nyiví tsa cua nacana Jutu Nyoo cua cuhva ra Tatyí Ii ra tsi ñi —catyí ra Pedro.

<sup>40</sup> Tsihin tuhun ihya tan tsihin inga ca tuhun, ra Pedro tsaãã cuenda ra tsi ra naha tan catyí ra tsihin ra naha:

—Ndũcu ndo cuhva na jacacu Nyoo tsi ndo, coto cunaa ndo tsihin nyiví caquiñi iyó nu ñuhu ñayiví ihya —catyí ra tsihin ra naha.

<sup>41</sup> Tacan tan tandihi ra tsa tyaã yahvi tuhun caãan ra Pedro tsicõndutya ra naha. Tan quitã tumaa uñi mil nyiví tsa tandihi ñi, tan ndu iin ñi tsihin nyiví yihí cuenda ra Jesucristo.

<sup>42</sup> Tan tandihi quiví ndu iin tandihi ñi, tan niñi iñi ñi tyaá soho ñi tsa jacuahã tandihi ra tava tyiñu ra Jesucristo tsi ñi. Tan iin ñi cuví ñi tsihin tahan ñi, tan tsicán tahvi ñi tan tsatsí ñi paan tan tsihi ñi vinu tyin tacan tan ña cua naa iñi ñi tyin tsihi ra Cristo tsa cuenda cuatyí ñi.

*Cuhva iyó nyiví yihí cuenda Jutu Mañi yo Jesucristo quiví can*

<sup>43</sup> Tan cuaha tsa iyo javahã tandihi ra tsa tava tyiñu ra Jesucristo jahã Nyoo. Tan tandihi ñi iyo cuñi ñi.

<sup>44</sup> Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi.

<sup>45</sup> Xicó ñi tsa iyó tsi ñi. Tan tsatsá ñi xuhun ñi tsi nyiví tahan ñi cuhva tsa tsiñi ñuhu tsi intuhun intuhun ñi.

<sup>46</sup> Tandihi quiví tan ndu iin ñi nda vehe ñuhu cahnú. Tan nda yuvehe ñi iin caa ñi tsatsí ñi paan tan tsihi ñi vinu. Tan sii cuñi ñi tsatsí ñi tyin iin ñi cuví ñi.

<sup>47</sup> Tan jacahnú ñi tsi Nyoo. Tan vaha caahán tandihi nyiví tuhun ñi. Tan iin tan iin

quivi tan nducuahá ca nyivi quihví cuenda Jutu Mañi yo Jesús tyin jacacú ra tsi ñi.

### 3

#### *Nu nduvahá iin ra coxo*

<sup>1</sup> Iin quivi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyivi Israel cuahán cuandacán tahvi tsi Nyoo.

<sup>2</sup> Tan iin ra ndaahvi, coxo ra nda quivi cacú ra, nyaá ra yuhu cora vehe ñuhu cahnu can tandihí maa quivi. Tyin tsindacá ñi tsi ra na ndacan ra xuhun tsi nyivi quihví yuhu cora can, tan nañi tsi Yuhu Cora Sii Caá.

<sup>3</sup> Tacan tan nyehe ra coxo can tsi ra Pedro tsihin ra Juan tsa cua quihví ra naha yuhu cora can. Tan tsican ra xuhun tsi ra naha.

<sup>4</sup> Tan nyehe ra Pedro tan ra Juan tsi ra. Tan ra Pedro catyí ra tsihin ra:

—Nyehe tsi ndi —catyí ra.

<sup>5</sup> Tacan tan quitsahá nyehé ra coxo can tsi ra naha. Cuñi maa ra tyin iyó tsa cua cuhva ra naha tsi ra.

<sup>6</sup> Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan çaça —catyí ra Pedro tsihin ra.

<sup>7</sup> Tacan tan tñin ra Pedro ndaha cuaha ra tan cañihí ra tsi ra. Tan juven ñi cuhva can nacoc tunyee iñi nduvi taahan tsaha ra tan jacun tsaha ra.

<sup>8</sup> Tacan tan ra coxo can ndavá ra, tan nduvita ra tsinyaá nyityi ra. Tan quitsahá tsicá ra. Tan quihví ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo.

<sup>9</sup> Tandihí nyivi nyehe ñi tsi ra tyin tsicá ra tan jacahnú ra tsi Nyoo.

<sup>10</sup> Tan iyo xaan cuñi ñi tan yuuhví ñi tsa cuenda tsa nduvahá ra can. Tyin nacotó ñi tsi ra. Tyin juven ra cuví ra tsa tuhvá tsinyaá Yuhu Cora Sii Caá can tsicán ra xuhun tsi nyivi.

*Nu caahán ra Pedro tuhun ra Cristo tsihin nyivi nu cuví corredor cuenda ra Salomón*

<sup>11</sup> Ra coxo tsa nduvahá can, ña jañá maa ra tsi ra Pedro tan ra Juan. Tan tandihí nyivi iyo cuñi ñi, tan tsinú xaan ñi tsaá ñi nu cuví corredor cuenda ra Salomón tyin cua nyehe ñi tsi ra coxo can tyin tsa nduvahá ra.

<sup>12</sup> Tsa nyehe ra Pedro yacan, tan catyí ra tsihin nyivi can:

—Nyooho ra Israel, ¿nacuenta iyo xaan cuñi ndo? Tan ¿nacuenta nyehé xaan ndo tsi nyuhu? ¿A cuñi maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvahá ndi tsi ra coxo ihya?

<sup>13</sup> Ñavin maa nyuhu janduvahá tsi ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacahnú tsi Sehe ra tan tsaḥa ra tunyee iñi tsi ra, ra tsa tsaḥa cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyooho ña tsaḥa ndo.

<sup>14</sup> Tahan tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsaññi ndyi.

<sup>15</sup> Tan nyooho tsaññi ndo tsi ra tsa tsaḥa ñayivi nyito coo yo tsihin Nyoo. Maa tyin Nyoo Jutu yo janandotó ra tsi ra. Tan ña ndog ra nu yucú añima nyivi tsa tsiñi. Tan nyuhu cuví ndi tsandaa tsa cuenda tsa nandotó ra.

<sup>16</sup> Tan juven ra Jesús cuví ra tsa tsaḥa tunyee iñi tsi ra coxo ihya tan nduvahá tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvahá tsaha ra ihya, tan nacotó vaha ndo tsi ra. Tan tandihí nyooho nyehe ndo tyin nduvahá ra tsa cuenda tsa tsinú iñi ndi.

<sup>17</sup> Tsitó yu, —catyí ra Pedro— tyin quivi tsa tsaññi ndo tsi ra Jesús, ña tsitó ndo tyin ña vaha tsa javahá ndo. Tan tacaan tucu ra cuví ityi nuu tsihin ndo, ña tsitó ra naha.

<sup>18</sup> Maa tyin tacan jacuví ndo tan cundaa tsa caḥan ra cuví ndusu yuhu Nyoo tahañ tsanaha, tyin catyí ra naha tyin ra Cristo cua nyehe ra tundoho.

<sup>19</sup> Yacan cuenda ndu uvi iñi ndo cuatyí ndo, tan nacuhva cuenda ndo añima ndo tsi Nyoo, na ndatsi cuatyí ndo. Tacan tan sii xaan cua cuñi añima ndo jaha tunyee iñi Jutu Mañi yo.

<sup>20</sup> Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quivi jihna ñi tyaa Nyoo cuhva tyin quitsi ra tsa cuenda yo.

<sup>21</sup> Taahán tsi tsa ndoó ra Jesucristo gloria tsa vityin nda cuanda quivi cua jandutsaa Nyoo tandihí maa tsa iyó. Tumaa cuhva catyí ra cuví ndusu yuhu Nyoo tahañ tsanaha.

<sup>22</sup> Tyin tacan catyí ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juven ñi nyivi yo cua cuví ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihí tsa cua cahan ra tsihin ndo.

<sup>23</sup> Tyin tandihí nyivi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyí ra Moisés.

<sup>24</sup> Tan tacan tucu tandihí ra cuví ndusu yuhu Nyoo nda quivi tsioco ra Samuel tan nda cuanda vityin, jacotó ra naha tsa cuví vityin.

<sup>25</sup> Tandihí tsa catyí Nyoo tyin cuhva ra tsi yo, caḥan ra cuví ndusu yuhu Nyoo tahañ tsanaha. Tandihí can tsii maa ndo cuví can.

Tan tyiñu tsa ndoo Nyoo tshin ra Abraham tsii tsaahnu yo, juvin ñi tsa cuenda maa ndo cuví yacan. Tyin catyí Nyoo tshin ra Abraham: “Tandihí nyivi tsa iyó nu ñuhu ñayivi cua nasoco yu tsi ñi tsa cuenda nyivi tata un.”

<sup>26</sup> Tan yacan cuenda quivi janandoto Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacao ndo tsa caquiñi iyó ndo —catyí ra Pedro tshin ñi.

#### 4

*Nu tñin ra cuví ityi nuu vehe ñuhu cahnu naha ra tsi ra Pedro tan ra Juan*

<sup>1</sup> Ndi caahán ca ra Pedro tan ra Juan tshin nyivi, tan tsaá ra cuví jutu naha ra tshin ra cuví ityi nuu tshin ra jahá cuenda vehe ñuhu, tan tshin ra cuví saduceo naha ra.

<sup>2</sup> Nduxaan xaan ra naha tyin ra Pedro tan ra Juan jacuahá ra naha tsi nyivi tan catyí ra naha tyin nditsa tsa cua nandoto nyivi tsa tsa tsihi, tyin ra Jesús nandoto ra.

<sup>3</sup> Tacan tan tñin ra naha tsi nduvi taahan ra tavá tyiñu ra Jesús can naha ra. Tan tyihí ra naha tsi ra naha vehe caa. Tan ndoo ra naha nda cuenda inga quivi tyin tsa cueñi cuví cuhva can.

<sup>4</sup> Maa tyin cuaha ñi tsa tsiñi tuhun caahán ra Pedro quitsahá tsinú iñi ñi. Tan ndu iin ñi tshin nyivi yihí cuenda ra Jesús. Tan tsa tandihí ñi quitá maa uhun mil cuví tsa maa ñi maa rayii naha ra.

<sup>5</sup> Tsa tuvi inga quivi, nda ñuu Jerusalén ndu iin tandihí ra cumi tyiñu cuenda nyivi Israel, tan tshin ra tsahnu, tan tshin ra cuví maestro cuenda ley tsa tyaa ra Moisés.

<sup>6</sup> Tan nyii tucu ra Anás ra jutu tsaahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihí tucu tandihí rayii tsa cuví nyivi ra jutu tsaahnu cuví ityi nuu.

<sup>7</sup> Tacan tan tavá tyiñu ra naha na cuquihin ra naha tsi ra Pedro tan ra Juan. Tan tsindaqá ra naha tsi ra naha nda mahñu nu yucú ra naha. Tan tsicá tuhun ra naha tsi ra naha, tan catyí ra naha:

—¿Yóo tsahá ndatu tsi ndo tsa janduvaha ndo tsi ra can? ¿Yóo tsahá tunyee iñi tsi ndo tsa javaha ndo tyehen? —catyí ra naha tshin ra Pedro tan ra Juan.

<sup>8</sup> Tan ra Pedro tsitú ra tshin Tatyí Ii Nyoo. Tan nacahan ra tshin ra naha:

—Nyooho ra ndacá ñaha Israel ñuu yo ihya, tan nyooho ra tsahnu.

<sup>9</sup> Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñi ndo coto ndo nácaa nduvahá ra.

<sup>10</sup> Yacan cuenda cua catyí tuhun ndi tshin ndo na coto tandihí nyivi Israel. Tyin ra ihya nyaá ra nuu tandihí ndo, tyin nduvahá

ra tshin tunyee iñi tsi ra Jesucristo, ra ñuu Nazaret, ra tsa tsahá cuenda ndo na cúu ra nu cruu. Maa tyin Nyoo janandoto ra tsi ra.

<sup>11</sup> Tan juvin ra Jesús cuví yuu tsa tsiñi ñuhu ca tsa ña cuñi ra javahá vehe cuatyíñu ra, tumaa cuhva catyí nuu tutu Nyoo. Tan nyooho cuví ra javahá vehe tan ña cuñi ndo yuu tsa tsiñi ñuhu ca can.

<sup>12</sup> Yoñi inga ra cuví jacacú tsi yo. Tyin intuhun ñi maa ra tsahá Nyoo tyin jacacu ra tsi yo —catyí ra Pedro tshin ra can naha ra.

<sup>13</sup> Tan ra cumi tyiñu can naha ra iyo xaan cuñi ra naha tsiñi ra naha tsa caahán ra Pedro tan ra Juan tyin nii xaan iñi ra naha caahán ra naha, tan ñavin ra cahví scuela cuví ra naha. Tacan tan nacoto ra naha tsi ra naha tyin ra ican naha ra cuví ra tsa tsicá tshin ra Jesús quivi can.

<sup>14</sup> Tan ra tsa nduvahá can, nyaá nyityi ra tshin ra naha. Yacan cuenda ña cuví cahan ra cumi tyiñu can naha ra tsa ndavaha ñi siquí ra Pedro tan ra Juan.

<sup>15</sup> Tacan tan catyí ra cumi tyiñu naha ra tshin ra naha:

—Quita nduñi taahan nyooho tsata vehe.

Tan quitá ra naha. Tan ndoo ra cumi tyiñu can naha ra natuhún tahan ra naha.

<sup>16</sup> Tan catyí ra naha:

—¿Náa javaha yo tshin ra ihya naha ra? Tyin tandihí maa nyivi Jerusalén tsitó ñi tsa iyo tsa javahá ra naha. Tan ña cua cuví catyí yo tyin ña nditsa.

<sup>17</sup> Maa tyin ña cuñi yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tshin ra naha na ña cahan ca ra naha tuhun ra Jesús tshin nyivi —catyí ra cumi tyiñu naha ra.

<sup>18</sup> Tacan tan caná ra cumi tyiñu tsi ra Pedro tan ra Juan. Tan catyí ra naha tshin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi.

<sup>19</sup> Maa tyin ra Pedro tan ra Juan nacahan ra naha tan catyí ra naha:

—Tyihí tuñi ndo iñi ndo tan nyehé ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo.

<sup>20</sup> Tyin nyuhu ña cuví tsa jandihí ndi tsa nacatyí tuhun ndi tsa nyehé ndi tan tsa tsiñi ndi —catyí ra naha.

<sup>21</sup> Tacan tan tyasí nyico ra cumi tyiñu naha ra tsi ra Pedro tan ra Juan. Tan jañá ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyivi tan jacahnú ñi tsi Nyoo tsa cuenda tsa cuví can.

<sup>22</sup> Tyin rayii tsa nduvahá can, tsa yahá uvi xico cuiya ra, tan tacan cuiya tahan ra tundoho tan nduvahá ra jahá Nyoo.

*Nu tsicán nyivi yihí cuenda ra Cristo tunyee iñi Nyoo*

<sup>23</sup> Tan tsa quitá ra Pedro tan ra Juan, cuahán ra naha nu yucú nyivi yíhí cuenda ra Jesús. Tan nacatyi tuhun ra naha tandihí tsa cahán ra tsahnu naha ra tan ra jutu tsa cuví ityi nuu naha ra tsihin ra naha.

<sup>24</sup> Cuhva tsa tsiñí tandihí ñi, tan iin caa ñi quitsahá tsicán tahvi ñi tsi Nyoo. Tan catyi ñi:

—Jutu Mañi yu, yooho javahá un andivi tan ñuhu ñayivi. Javahá un ndutya ñuhu. Tan tandihí ca tsa iyó, maa un javaha.

<sup>25</sup> Tan yooho tsihin Tatyí Ii un jacahan un tsi ra David tahán tsanaha. Tan catyi ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

<sup>26</sup> Rey naha ra tan tsihin ra tsa ndacá ñaha nu ñuhu ñayivi ihya nduvitá ra naha siqui un, Jutu Mañi yu, tan siqui ra Cristo, ra nysisó tyiñu maa un, catyi ra David.

<sup>27</sup> Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsi vaha maa un.

<sup>28</sup> Tan tacan javahá ra naha, tumaa kuhva tsa catyi maa un tahán tsanaha tyin cua cuví.

<sup>29</sup> Tan vityin, Jutu Mañi yu, nyehe tyin cuñí ra naha casi ra naha tsi ndi. Tan cuhva tsa nii coo iñi ndi tyin tyiñu maa un javahá ndi, Jutu Mañi yu. Tan na ña nayuhvi ndi cahan ndi tuhun maa un.

<sup>30</sup> Tan tsihin tunyee iñi maa un tan cua nduvaha nyivi cuuhvi, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyi ñi, tsicán tahvi ñi tsi Nyoo.

<sup>31</sup> Tan kuhva tsa ndihí tsicán tahvi ñi tsi Nyoo tan tañ nu yucú ñi. Tan tandihí ñi tsitú ñi tsihin Tatyí Ii Nyoo tan cahán ñi tuhun Nyoo tsihin tsa ña yuuhvi ñi.

*Nduve tsa cumañi tsi nyivi yihí cuenda ra Cristo*

<sup>32</sup> Tandihí ñi tsa tsinú iñi, iin ñi cuví ñi, tan iin ñi kuhva tsicá iñi ñi. Ndi intuhun ñi tan ña catyi ñi tyin tsa tsii maa ñi cuví tsa iyó tsi ñi, tyin tsii tandihí ñi cuví can.

<sup>33</sup> Tan tsihin tunyee iñi cahnú, caahán ra tavá tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha.

<sup>34</sup> Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can

<sup>35</sup> tsi ra tavá tyiñu ra Jesús. Tan maa ra naha natsatsá xuhun can tsi intuhun intuhun nyivi kuhva tsa tsifí ñuhu tsi ñi.

<sup>36</sup> Tacan javahá iin ra tsa nañi José. Ra ican cuví ra tata ra Leví. Tan cacú ra ñuhu Chipre tsa canyii mahñu ndutya ñuhu. Tan ra tavá tyiñu ra Jesús jacunañi ra naha tsi ra Bernabé. Tan sivi can cuñí tsi catyi: ra jandu iin iñi nyivi.

<sup>37</sup> Tan ra Bernabé can xicó ra ñuhu ra. Tan tsahá ra xuhun can tsi ra tavá tyiñu ra Jesús.

## 5

*Cuatyi ra Ananías tsihin ña Safira*

<sup>1</sup> Maa tyin iin ra tsa nañi Ananías tsihin ña Safira, ñasihi ra, xicó ñi iin ñuhu.

<sup>2</sup> Tan tyihí xeehe ñi juhva xuhun. Tacan tan ra Ananías tsindacá ra xuhun tsa ndoo ña tsi ra tavá tyiñu ra Jesús. Tan catyi ra tyin tandihí xuhun tsa cuyahvi ñuhu cuví can.

<sup>3</sup> Tacan tan catyi ra Pedro tsihin ra:

—Yooho Ananías, ¿nacuenda tsa tsahá un tsa quihvi nu ña vaha añima un? Tyin cuñí un jandavi ñaha un tsi Tatyí Ii Nyoo, tan catyi un tyin tandihí xuhun tsa cuyahvi ñuhu can cuví tsehe, tan ña nditsa un tyin ndoo juhva xuhun can tsi un.

<sup>4</sup> Tsii un cuví ñuhu can, tan tsii un cuví xuhun tsa ñihí un cuenda ñuhu can. ¿Nacuenda tsa cuñí un jandavi ñaha un tsi Nyoo tan catyi un tyin tandihí xuhun can tsahá un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyi ra Pedro tsihin ra Ananías.

<sup>5</sup> Tsa tsiñi ra Ananías tuhun tsa cahán ra Pedro, nduvá ra tan tsiñi ra. Tan tsa tsitó nyivi tuhun ihya tan cuatyí xaan ñi.

<sup>6</sup> Tacan tan tsaa ra cuatyí naha ra tan cavá nuu ra naha jahma cuñu ñuhu ra Ananías. Tan tsahan ra naha tsindacá ra naha tsi ra nu ndaa cumi santu.

<sup>7</sup> Yahá uñi hora tan tsaa ñasihi ra Ananías tan quihvi ña nu yucú ra tavá tyiñu ra Jesús, tyin ña tsitó ña tsa cuví.

<sup>8</sup> Tan quitsahá tsicá tuhun ra Pedro tsi ña tan catyi ra tsihin ña:

—¿A tyehen ñi cuví xuhun tsa cuyahvi ñuhu ndo? —catyi ra Pedro tsihin ña.

Tacan tan nacahán ña tan catyi ña tsihin ra:

—Tacan ñi cuví xuhun tsa cuyahvi tsi —catyi ña tsihin ra.

<sup>9</sup> Tacan tan catyi ra Pedro tsihin ña:

—¿Nacuenda tsa natuhun tahan ndo tan cuñí ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsahan tsindacá tsi yí un nu ndaa cumi santu. Tan vityin cua cundaca ndihí ra naha tsi un —catyi ra Pedro tsihin ña Safira.

<sup>10</sup> Tan juvin ñi kuhva can tan nduvá ña tsaha ra Pedro, tan cueta tsiñi ña. Tan quihvi ra cuatyí can naha ra, tan nyehe ra naha tyin canyii ña tsiñi ña. Tan cañihí ra naha tsi

ña, tan tsindacá ra naha tsi ña nu ndaa cumi sandu. Tan tinyij ra naha tsi ña xiin yii ña.

<sup>11</sup> Tan tandihi nyivi yihí cuenda ra Cristo, tan tandihi nyivi tsa tsito tuhun can, nayuhvi xaan ñi.

*Cuaha xaan tsa iyo tan seña javahá ra tavá tyiñu ra Jesús*

<sup>12</sup> Cuaha seña tan tsa iyo javahá ra tavá tyiñu ra Jesús nu yucú nyivi. Tan tandihi ñi yihí cuenda ra Cristo ndu iin ñi nu cuví corredor cuenda ra Salomón.

<sup>13</sup> Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siqui ñi yihí cuenda ra Cristo.

<sup>14</sup> Tan cuaha xaan nyivi quitsahá tsinú iñi tsi Jutu Mañi yo Jesús, tahan ñi rayii tan ñaha.

<sup>15</sup> Tan nda cuanda tavá ñi tsi nyivi cuuhví ityi cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra siqui ñi cua nduvaha ñi.

<sup>16</sup> Tacan tucu nyivi iyó yatyin ñi ñuu Jerusalén can, cuandacá ñi tsi nyivi cuuhví tan nyivi tsa yihí tatyí ña vaha. Tan nduvahá tandihi ñi.

*Nu nyehé ra Pedro tan ra Juan tundoho*

<sup>17</sup> Tacan tan ra jutu tsaahnu tsa cuví ityi nuu, tan ra yihí cuenda ra cuví saduceo naha ra, ndasi cuñi ra naha nyehé ra naha tsi ra tavá tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsahá Nyoo tsi ra naha.

<sup>18</sup> Tacan tan tijn ra naha tsi ra naha. Tan tyihj ra naha tsi ra naha vehe caa.

<sup>19</sup> Maa tyin tsa cuaa can quitsj iin ángel tsa jaquitsj Jutu Mañi yo, tan nuñá ra yuvehe caa can. Tan tavá ra tsi ra naha. Tan catyí ra tsihin ra naha:

<sup>20</sup> —Cuaahan ndo tan cunyacu nyityi ndo vehe ñuhu cahnu. Tan ñacatyí tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

<sup>21</sup> Tsa tsiñj ra naha tsa cahán ra ángel can, tan cuahán ra naha. Tan tsa tuvi inga quivi can nañihj nyivi tsi ra naha vehe ñuhu cahnu. Tan quitsahá jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuví ityi nuu tan ra tsa yucú tsihin ra. Tan caná ra naha tsi ra cumi tyiñu cuenda nyivi Israel tyin coo ra naha junta. Tacan tan tavá tyiñu ra naha na cuquihin ra naha tsi ra tavá tyiñu ra Jesús nu yucú ra naha vehe caa can.

<sup>22</sup> Maa tyin cuhva tsa tsaá ra vitya naha ra tsitsi vehe caa can, ña nañihj ra naha tsi ra naha. Tan cuanuhj ra naha cua nacatyí tuhun ra naha tsihin ra jutu tsaahnu tsa cuví ityi nuu.

<sup>23</sup> Tan catyí ra naha tsihin ra:

—Ndasi yuvehe caa can tan tsaá ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñá ndi yuvehe can, yoñi maa nañihj ndi —catyí ra naha tsihin ra jutu tsaahnu tsa cuví ityi nuu.

<sup>24</sup> Tacan tan ra jutu tsaahnu tsa cuví ityi nuu can tsihin ra yihí ndaha tsi tandihi ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñj ra naha tsa cahán ra vitya naha ra tsihin ra naha tan iyo xaan cuñi ra naha. Tan natuhun tahan ra naha nácaa javaha ra naha tan cundihi tuhun can.

<sup>25</sup> Tacan tan tsaá iin ra tan catyí ra:

—Ra tsa tyihj ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

<sup>26</sup> Tacan tan ra yihí ndaha tsi ra jahá cuenda vehe ñuhu can, tsaahán ra tsihin ra vitya naha ra, tan tsiquihin ra naha tsi ra tavá tyiñu ra Jesús tsihin tsa vii ñi tan ña cañj ra naha tsi ra naha, tyin yuuhví ra naha tsi nyivi coto cañi ñi yuu tsi ra naha.

<sup>27</sup> Tsindacá ra naha tsi ra tavá tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tavá tyiñu ra Jesús:

<sup>28</sup> —Nyuhu tsa cahán vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaá soho ndo tsa cahán ndi. Tan tsa ndihi maa tsitsi ñuu Jerusalén jacotó ndo tuhun ra. Tan cuñi ndo tyaá ndo cuatyí can siqui ndi tyin tsihj ra —catyí ra jutu tsaahnu tsa cuví ityi nuu tsihin ra naha.

<sup>29</sup> Tacan tan nacahán ra Pedro tan inga ra tavá tyiñu ra Jesús, tan catyí ra naha:

—Taahán tsi tyaá yahvi jihna ndi tsi Nyoo tan ñavin ca tsi nyooho.

<sup>30</sup> Nyoo cuenda tsi tsaahnu yo juvin ra janandotó tsi ra Jesús, ra tsa ticaá ndo nu cruu tan tsañj ndo.

<sup>31</sup> Tan ra Jesús cuví ra tsa jacahñu xaan Nyoo, tan tyaá ra tsi ra xiin cuaha ra, tyin cua cundaca ñaha ra tandihi maa. Tan in-tuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo.

<sup>32</sup> Tan nyuhu cuví ndi tsandaa tsa cuenda tandihi yacan. Tan tacan cuví tucu Tatyí Ii Nyoo tsa tsahá Nyoo cunyaa añima nyivi tyaá yahvi tsi ra —catyí ra Pedro tsihin ra naha.

<sup>33</sup> Tan tsa tsiñj ra naha tsa cahán ra Pedro, nduxaán xaan ra naha. Tan cuñj ra naha cahñi ra naha tsi ra naha.

<sup>34</sup> Maa tyin tsihin ra cumi tyiñu can naha ra nyii iin ra cuví fariseo tsa nañi Gamaliel. Tan cuví ra maestro cuenda ley Nyoo tsa tyaá ra Moisés. Tan nyivi tyaá yahvi xaan ñi tsi ra. Tan ra Gamaliel can, nduvitá nyityi

ra. Tan caahán ra na quita ra tava tyiñu ra Jesús tañi ñi. Tacan tan quita ra naha.

<sup>35</sup> Tan quitsaha caahán ra Gamaliel can tsihin tandihi ca ra cumi tyiñu naha ra, tan catyí ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra.

<sup>36</sup> Nduchun iñi ndo tyin tsa iyó juhva quivi nduvita iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayi tsinyicun tsi ra. Maa tyin yaha can tsahñi nyivi tsi ra. Tan tandihi ra tsa tsinyicun tsi ra cuanuhu ra naha ñuu ra naha. Tan tsindihí tuhun can.

<sup>37</sup> Yaha can tan nu cuahán ca tsi ityi nuu, quivi nacahvi ra gobiernu tsi nyivi, tan nduvita ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihi ñi tsa tsinyicun tsi ra cuanuhu ñi ñuu ñi.

<sup>38</sup> Yacan cuenda jaña yo tsi ra ihya naha ra. Tan ña cua tyihí yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundihí tuhun can.

<sup>39</sup> Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

<sup>40</sup> Tandihí ra naha ndoo ra naha vaha tsa ña cua cahñi ra naha tsi ra naha. Tacan tan cana ra naha tsi ra tava tyiñu ra Jesús. Tan catyí ra cumi tyiñu naha ra tsihin ra vitya naha ra na cañi ra naha tsi ra naha. Tan tyasí ra naha nu cahan ra naha tuhun ra Jesús. Tacan tan jaña ra naha tsi ra naha.

<sup>41</sup> Tan quita ra naha nuu ra cumi tyiñu. Tan si xaan cuñi ra naha tyin tsaha Nyoo ndatu tyin nyehé ra naha tundo ho tsa cuenda ra Jesús.

<sup>42</sup> Tan ña jandihí ra naha tsa caahán ra naha. Tan tandihí quivi jacuahá ra naha tuhun ra Jesucristo vehe ñuhu tan vehe nyivi.

## 6

*Nu nacatsí nyivi yihí cuenda ra Jesús utsa taahan ra naha tyin jaha cuenda ra naha náa tsa tsihí ñuhu tsi ñi*

<sup>1</sup> Tan nu cuahán ca tsi quivi cuaha xaan nyivi yihí cuenda ra Cristo cuví. Tacan tan nyivi tsa caahán yuhu griego quitsaha caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihí quivi ña jahá vaha ra naha cuenda tsi ñi ndaahvi grecia tsa tsihí yí.

<sup>2</sup> Tacan tan tandihí tsa utsi uvi taahan ra tava tyiñu ra Jesús jandu iin ra naha tsi

tandihí nyivi yihí cuenda ra Cristo. Tan catyí ra naha tsihin nyivi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo.

<sup>3</sup> Yacan cuenda, nyoo ho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsifituñi iñi, ra tsitú tsihin Tatyí Ii Nyoo. Tan cuhva yo tyiñu ihya tsi ra naha.

<sup>4</sup> Tan nyuhu cua jañihí ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

<sup>5</sup> Tandihí ñi tan ndoo ñi vaha. Tan nacatsí ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsí tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquia, tan nanduvá ra iin ra Israel.

<sup>6</sup> Tacan tan tsindacá ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

<sup>7</sup> Tan tsityá ca tuhun Nyoo. Tan nducua ha ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinú ndihí iñi ra naha tuhun ra Cristo.

*Nu tyihí ra naha tsi ra Esteban vehe caa*

<sup>8</sup> Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú aña ma ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi.

<sup>9</sup> Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihí juhva ra ñuu Alejandria naha ra, tan ra ityi Cilicia naha ra, tan ra ityi Asia naha ra. Tan quitsaha caahán yuhu tahan ra naha tsihin ra Esteban.

<sup>10</sup> Maa tyin ña cuví jaha canaa ra naha tsi ra, tyin ra Esteban caahán ra tsihin tsa tsifituñi jiñi ra tsa tsaha Tatyí Ii Nyoo tsi ra.

<sup>11</sup> Tacan tan tyahvi ra can naha ra tsi juhva ra na cahan ra naha cuendu siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo.

<sup>12</sup> Yacan cuenda tandihí nyivi can quitsaha cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahan ra naha tsindacá ra naha tsi ra nu ndu iin ra cumi tyiñu cuenda vehe ñuhu nyivi Israel.

<sup>13</sup> Tan nducú ra naha tsi ra cahan cuendu siqui ra Esteban. Tan maa ra naha catyí ra naha tyehen:



—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaá ra Moisés.

<sup>14</sup> Tan tsiñi ndi tsa caahán ra tyin ra Jesús, ra Nazaret can, cua cani ra vehe ñuhu cahnu ihya. Tan cua nasama ra cuhva iyó yo tsa jacuahá ra Moisés tsi yo —catyí ra tsa caahán cuendu siqui ra Esteban.

<sup>15</sup> Tacan tan ra cumí tyiñu naha ra tan ra nyecú ican nyehe ra naha tsi ra Esteban tyin tumaa caá nuu iin ángel, tacan caá nuu ra.

## 7

*Nu caahán ra Esteban tuhun Nyoo tsihin nyivi nducú cahñi tsi ra*

<sup>1</sup> Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyi ra:

—¿A nditsa tsa caahán ra ihya naha ra siqui un?

<sup>2</sup> Tacan tan nacahan ra Esteban tan catyi ra:

—Nyooho yañi, tan nyooho ra tsahnu, tyaá soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsii tsaahnu yo, ra Abraham, quivi nyí ra ityi Mesopotamia tsa ndi cumañi ca cuhun ra coo ra nda ñuu Harán.

<sup>3</sup> Tan catyi ra tsihin ra: “Nacoo ñuu un, tan tsi tandihí nyivi un. Tan cuhun cun inga ñuu tsa cua janaha yu tsi un” catyi Nyoo tsihin ra Abraham.

<sup>4</sup> Tacan tan ra Abraham quita ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihi jutu ra. Yaha can jaquitsj Nyoo tsi ra ñuhu nu iyó yo ihya vityin.

<sup>5</sup> Maa tyin nduve ñuhu tsaah Nyoo tsi ra quivi can. Ndi luxu maa nu cuañi ra tan ña tsaah Nyoo. Maa tyin catyi ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahán Nyoo tsihin ra Abraham, vasu tsa ñaha ca coo sehe ra quivi can.

<sup>6</sup> Tan inga tucu tuhun cahán Nyoo tsihin ra tyin nyivi tata ra cua coo ñi inga ñuu. Tan cua cuví ñi musu nyivi ñuu can. Tan maa nyivi ñuu can cua quihí ndaha ñi tsi ñi. Tan cua nyehe ñi tundoho cumi cientu cuiya.

<sup>7</sup> Maa tyin cahán tucu Nyoo tsihin ra tyehen: “Nyivi tata un cua nyehe ñi tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuví tata un ñuu can tan cua quitsi ñi ihya. Tan cua jacahnu ñi tsi yu” catyi Nyoo tsihin ra Abraham.

<sup>8</sup> Tacan natuhun Nyoo tsihin ra. Tan ndog ra tuhun tsihin ra. Tan Nyoo tsaah ra iin cuhva tsa cua javaha ñi coto naa iñi ñi tsa cahán ra. Tsaah cuenda ra tyin tandihí

ñi sehe yí ñi tsa cua coo tan cuví tsi cunyaa tuñi ra itsi naha tsi. Tan tsa yaha una quivi tsa cacú ra Isaac, sehe ra Abraham, tacan javaha ra tsi ra. Tan juvin ñi tacan javaha ndihí tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaá ra tuñi can tsi intuhun intuhun sehe yí ra. Tan ra ican naha ra cuví tsii tsaahnu yo.

<sup>9</sup> Tacan tsa utsi iin taahan ca sehe ra Jacob ndasi cuví ra naha nyehe ra naha tsi ra José yañi ra naha, tsa cuenda tyin cuví ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoo Nyoo tsi ra.

<sup>10</sup> Tan jacacú ra tsi ra nu nyehé ra tundoho. Tan tsaah ra tsa nyityi jiñi ra tsi ra José. Tan tsaah ra tsa vaha coo ra nuu ra Faraón, ra cuví rey Egipto. Tan rey can tsaah ra tsa cuví ra José ra cumí tyiñu ñuu tsa cayucú Egipto can. Tan tsindacá ñaha ndihí tucu ra vehe maa rey.

<sup>11</sup> Tacan tan tsioco tama naní cahnu ityi Egipto tan ityi Canaán. Tan nyehe xaan nyivi tundoho. Tan tandihí tsii tsaahnu yo ña ñihí ra naha tsa catsi ra naha.

<sup>12</sup> Maa tyin quivi tsi to ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsaah ra naha iin tsaah.

<sup>13</sup> Tan tsa tsinu uvi tsaah tsa tsaah ra naha, ra José jacoto ra tsi ra naha tyin yañi ra naha cuví tsi ra. Tacan tan tsi to ra Faraón yóo tata cuví ra José.

<sup>14</sup> Tacan tan tava tyiñu ra José na quitsi ra Jacob jutu ra, tsihin tandihí nyivi ra. Tan cuví ñi uñi xico tsaah taahan nyivi.

<sup>15</sup> Tan tacan cuví tsa cuahán ra Jacob cua coo ra ñuhu Egipto can. Yaha can tan tsihi ra ndacan. Tan tsihi ndihí tucu tandihí sehe ra, ra cuví tsii tsaahnu yo naha ra.

<sup>16</sup> Tacan tan tsaah quivi tsa tsindacá ñi yiqui ra Jacob tan yiqui sehe ra nda Siquem. Tan ican quihvi yiqui tandihí ra naha tsitsi ñuhu nu jatá ra Abraham iin ñaña tsi sehe ra Hamor tahán tsanaha.

<sup>17</sup> Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can cuaaha xaan ñi cuví. Tan tsa nyanaa yatyin quivi tsa cua cuhva Nyoo ñuhu tsi ñi tumaa tsa cahán catsi ra tsihin ra Abraham.

<sup>18</sup> Tacan tan quitsahá ndacá ñaha iin rey tsa ña nacoto tsi ra José.

<sup>19</sup> Rey can jandavi ñaha ra nyivi yo. Tan janyehe xaan ra tundoho tsi ñi, tan jafñiñi ra tsi ñi na nacoo ñi tsi sehe ñi tsa ndi cacú tyin na cúu tsi.

<sup>20</sup> Tan juvin ñi quivi can cacú ra Moisés. Tan tahán xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña.

<sup>21</sup> Yaha can ña cuví ca tyihí xeehe sihi ra tsi ra. Tan nacoo ña tsi ra tsitsi iin tyica yuhu yuya. Tacan tan sehe sihi ra rey Egipto can

nañihj ña tsi ra. Tan naquihjñ ña tsi ra. Tan jacuahñu ña tsi ra, tumaa tsa sehe maa ña cuvj tsi ra.

<sup>22</sup> Yacan cutuhvã ra Moisés tandihi tsa tsitó ñi Egipto. Tan vaha xaan cañan ra tan vaha javahã ra jahã tunyee iñi tsa tsahã Nyoo tsi ra.

<sup>23</sup> "Tan tsa quitã uvi xico cuiya ra Moisés cuñi ra cuhun ra cunyehe ra nu iyó nyivi Israel, nyivi ra.

<sup>24</sup> Tacan tan iin quivi nyehẽ ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra.

<sup>25</sup> Cuñi maa ra Moisés can tyin nyivi Israel can cutuñi iñi ñi tyin Nyoo jaquitsj tsi ra tyin jacacu ra tsi ñi. Maa tyin ña tuvj iñi ñi tsa tacan cua cuvı.

<sup>26</sup> Tacan tan tsa inga quivi can nyehẽ ra Moisés tsi uvi taahan ra Israel, cañi tahan ra naha. Tan ra Moisés, cuñi ra tsa ña cañi tahan ca ra naha, tan quitsahã catyı ra: "Ña vaha tsa cañi un tsi ra yañi un" catyı ra tsihin ra naha.

<sup>27</sup> Tacan tan ra tsa cañi tsi inga ra can tindahñi ra tsi ra Moisés, tan catyı ra tsihin ra: "¿Yóo tava tyiñu tsi un tyin cundaca ñaha un tan cuvı un juez tsa cuenda ndi?"

<sup>28</sup> ¿A cuñi un cahñi un tsi yu tumaa tsa tsahñi un tsi ra Egipto icu?" catyı ra tsihin ra Moisés.

<sup>29</sup> Cuhva tsa tsiñi ra Moisés tsa cañan ra can, tsinũ ra. Tan cuahán ra nda ñuu Madián. Ndacan ñihj ra ñasihj ra. Tan ndacan tsicoo uvi taahan sehe ra.

<sup>30</sup> "Yahã uvi xico cuiya. Tacan tan iin quivi tsicã nuu ra Moisés nu tsiqui yatyin yucu tsa nañi Sinai. Tan nyehẽ ra cayú iin yutun iñu. Tacan tan quituvj iin ángel tsitsi ñuhu tsa cayú can.

<sup>31</sup> Iyo xaan cuñi ra Moisés tsa nyehé ra yacan. Tan natuhvã ra nu cayú iñu can tyin nyehẽ vaha ra, tan tsiñi ra ndusu Jutu Mañi yo. Tan catyı ndusu can tyehein:

<sup>32</sup> "Yuhu cuvı Nyoo cuenda tsii tsaahnu un, Nyoo cuenda ra Abraham, tan ra Isaac, tan ra Jacob" catyı ndusu can tsihin ra. Tacan tan ra Moisés quitsahã nihj ra tsihin tsa yuuhví ra. Tan ña canã iñi ra nanyehe ra.

<sup>33</sup> Tan quitsahã catyı tucu Jutu Mañi yo tsihin ra: "Tava nditsan tsaha un tyin ñuhu nu tsañi un, ñuhu ii cuvı tsi.

<sup>34</sup> Yuhu nyehé yu tandihi tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacú tsaa ñi. Yacan vatsi nuú yu tyin jacacu yu tsi ñi. Naha, tyin jacuhun yu tsi un nda Egipto" catyı Nyoo tsihin ra Moisés.

<sup>35</sup> 'Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyı

ñi tsihin ra: "¿Yóo tava tyiñu tsi un tyin cundaca ñaha un tan cuvı un juez tsa cuenda ndi?", catyı ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvı ra nuu tsihin ñi, tan jacacu ra tsi ñi. Tyin tacan catyı ángel tsa quituvj nuu ra nu iñu tsa cayú can.

<sup>36</sup> Tan ra Moisés can tava tsi nyivi Israel ñuhu Egipto can tsihin tsa javahã ra tsa iyo tan seña ñuu can, tan nu yahã ñi nda nu Nduya Ñuhu Cuaaha, tan nu tsicã nuu ñi nu tsiqui tsitsi tsa uvi xico cuiya.

<sup>37</sup> "Tan juven ñi maa ra Moisés can cuvı ra tsa cañan tsihin nyivi Israel tan catyı ra tyehein: "Nyoo cua jaquitsi ra tsi iin ra cuvı ndusu yuhu ra tumaa jaquitsj ra tsi maa yu. Tan cua cuvı ra iin ra Israel tumaa maa yo. Tan taahán tsi tyaa yahvi yo tsi ra" catyı ra Moisés.

<sup>38</sup> Tan maa ra Moisés can cuahán ra tsihin nyivi tsii tsaahnu yo nu tsicã nuu ñi nu tsiqui can. Tan ra ican cuvı ra tsa cañan ángel tsihin nda yucu Sinai. Tan ra ican naquihjñ cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

<sup>39</sup> "Maa tyin nyivi tsii tsaahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto.

<sup>40</sup> Yacan cuenda cuhva tsa nyii ra Moisés yucu Sinai, tan cañan nyivi tsihin ra Aarón tan catyı ñi: "Javaha taahan nyoo cuhun ityi nuu ndi. Tyin ña tsitó yo náa tahan ra Moisés, ra tsa tava tsi yo Egipto" catyı ñi.

<sup>41</sup> Tacan tan javahã ñi iin indiqui xuhun cuaan. Tan tsahñi ñi quiti tyin cuhva cuenda ñi tsi tsitoho can. Tan si xaan cuñi ñi tsicoo ñi vico cuenda tsitoho tsa javahã ñi tsihin ndaha ñi.

<sup>42</sup> Tacan tan Nyoo jatsiyõ ra tsi ñi. Tan jañã ndaha ra tsi ñi tyin cua jacahnu ñi ñicanyii, tan yoo, tan tandihi tiñuu tsa iyó ityi andivi. Tyin tyehein tyaa ra cuvı ndusu yuhu Nyoo nu libru tahan tsanaha:

Nyooho nyivi Israel, ¿A tsahñi ndo quiti tyin cuhva cuenda ndo tsi maa yu tsitsi tsa uvi xico cuiya tsa tsicã nuu ndo nu tsiqui? Ñavin.

<sup>43</sup> Tyin jacahñu ndo tsi nyoo tsa nañi Moloc, tan jacahñu ndihi tucu ndo tsi nyoo tsa nañi Renfán tsa caã tumaa caã iin tiñuu tsa iyó andivi.

Juvin ñi maa ndo javahã tsitoho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacuhun yu tsi ndo iin nu cañi ca ityi nuu ñuu Babilonia, catyı Nyoo tsihin ñi.

<sup>44</sup> 'Nu tsicã nuu tsii tsaahnu yo nu tsiqui can, tsicumj ra naha iin vehe ñuhu tsa tsinũ tsihin ñi quiti. Tan tsitsi vehe can tsicumj ra

naha tabla yuu tsa nyaá ley Nyoo nuu. Tan ra Moisés tavā tyiñu ra na javaha ñi vehe ñuhu can ityi tsata, tumaa cuhva janahā maa Nyoo tsi ra.

<sup>45</sup> Yaha can tan ra Josué cuv̄i ra ityi nuu tsihin ñi. Tacan tan quih̄in ñi vehe ñuhu can tan vatsi ñi tsihin tsi nu iyó yo ihya vityin. Tyin Nyoo tavā ra tsi nyivi tsiçoō ñuhu ihya tan nacuhvā cuenda ra ñuhu ihya tsi ñi Israel, nyivi yo. Tan tsatyñū ñi vehe ñuhu can nda cuanda quivī tsiçoō ra rey David.

<sup>46</sup> Tan ra rey David ñih̄i ra tumañi iñi nuu Nyoo. Tan cuñī ra javaha ra iin vehe vaha nu coo Nyoo. Juv̄in ñi Nyoo jacahnū ra Jacob tahān tsanaha.

<sup>47</sup> Maa tyin ra Salomón javahā ra vehe Nyoo.

<sup>48</sup> Vasu ña iyó Nyoo tsitsi vehe ñuhu tsa javahá nyivi. Tumaa cahān ra cuv̄i ndusu yuhu Nyoo tahān tsanaha tyehen:

<sup>49</sup> Andiv̄i cuv̄i tyayu nu nyaá yu ndacá ñaha yu.

Tan ñuhu ñayivi, yacan cuv̄i nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

<sup>50</sup> ¿A ña tsitó ndo tyin maa yu javahā andiv̄i tan ñuhu ñayivi? catȳi ra cuv̄i ndusu yuhu Nyoo jahā Nyoo.

<sup>51</sup> Maa tyin nyooho —catȳi ra Esteban— tacan ñi tuhvá maa ndo jandavá ndo iñi ndo. Tan ña cuñī ndo naquih̄in ndo tuhun caahán Nyoo. Tacan ñi ña tyaá yahvi ndo tsi Tatȳi Ii Nyoo. Inducu ñi caá ndo tsihin tsīi tsaahnu yu.

<sup>52</sup> Tsīi tsaahnu yo cuxān ra naha tan tsañī ra naha tsi tandih̄i ra cuv̄i ndusu yuhu Nyoo tahān tsanaha. Tan ra ican naha ra catȳi tyin cua quitīi iin ra vaha. Tan tsa quitīs̄j ra vityin, nyooho xicō ñaha ndo tsi ra tsi ra xaan iñi tsi ra, tan tsañī ndo tsi ra.

<sup>53</sup> Nyooho naquih̄in cuenda ndo ley Nyoo tsa tsañī ángel tsi ndo, maa tyin ña cuñī ndo tyaá yahvi ndo tsa caahán ley can —catȳi ra Esteban.

#### *Nu tsih̄i ra Esteban*

<sup>54</sup> Tsa tsiñī ra cumī tyiñu vehe ñuhu cahnu naha ra tuhun ihya, xaan xaan cuñī ra naha, ndacua jacahȳu nuhu ra naha nyehé ra naha tsi ra Esteban.

<sup>55</sup> Maa tyin ra Esteban tsitú ra tsihin Tatȳi Ii Nyoo tan nanyeh̄e ra ityi andiv̄i. Tan nyeh̄e ra tsa cahnu cuv̄i Nyoo. Tan nyeh̄e tucu ra tsi ra Jesús nyaá nyityi ra xiin cuaha Nyoo.

<sup>56</sup> Tacan tan catȳi ra Esteban: —j̄ihna ndo! Nyehé yu andiv̄i tan ticohó tsi. Tan nyehé yu tsi ra Jesús, Rayīi tsa quee

nda gloria, nyaá nyityi ra xiin cuaha Nyoo —catȳi ra Esteban.

<sup>57</sup> Maa tyin ra can naha ra tyasī ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñi caná tsaá ra naha. Tan tandih̄i ra naha cuahán ra naha siquī ra Esteban.

<sup>58</sup> Tacan tan tavā ra naha tsi ra yuhu ñuu. Tan tsañī ra naha tsi ra tsihin yuu. Tan ra tsa javahá tsa ña vaha can naha ra, nacoç ra naha jahma tsa nyaá tsata ra naha tyin jaha cuenda iin ra tyuvaa tsa nañī Saulo.

<sup>59</sup> Tan tsitsi tsa cañī ra naha yuu tsi ra Esteban, quitsahā tsiçán tahvi ra Esteban tsi Nyoo, tyin tuv̄i iñi ra tyin tsa cua cúu ra. Tan catȳi ra tyehen:

—Jutu Mañi yu Jesús, naquih̄in añima yu —catȳi ra.

<sup>60</sup> Yahā can, tan tsiçuiñī tsiti ra, tan tsaá caná tsaá ra tan catȳi ra:

—Jutu Mañi yu, ña t̄in cuenda un cuatȳi tsa javahá ra naha —catȳi ra.

Tsa yahā cahān ra tacan, tan tsih̄i ra.

## 8

*Nu tsinyaç ndaha ra Saulo tsi nyivi yih̄i cuenda ra Cristo*

<sup>1</sup> Tan ra Saulo ña tsinú iñi ra tsi ra Jesús, tan ndooç ra vaha tsa tsañī ra naha tsi ra Esteban.

Tan juvin ñi quivī can quitsahā nducú xaan nyivi tsi ñi yih̄i cuenda ra Cristo ñuu Jerusalén tyin cañī ñi tsi ñi. Tan tandih̄i ñi yih̄i cuenda ra Cristo tsinū ñi, cuahán ñi cua coo ñi tandih̄i ñuu tsa cayucú Samaria, tan tandih̄i ñuu tsa cayucú Judea. Maa tyin ra tavā tyiñu ra Jesús ña quitá ra naha. Ndoç ra naha Jerusalén.

<sup>2</sup> Tan juhva ra tsa nyicún vaha tsi Nyoo ñuu Jerusalén can, tsañan ra naha tsiçuts̄j ra naha cuñu ñuhu ra Esteban nda nu ndaa cumī santu. Tan tsac̄u xaan ra naha tsa cuenda tsa tsih̄i ra.

<sup>3</sup> Tan ra Saulo can quitsahā nyaá ndaha ra tsi nyivi yih̄i cuenda ra Cristo. Tan tsañan ra tan iin tan iin vehe ñi. Tan ixtá caa ra tsi ñi, tan tsañī cuenda ra tsi ñi tyin cahun ñi vehe caa, tahañ ñi rayīi tan ñaha.

*Nu caahán ra Felipe tuhun ra Cristo nu cuv̄i Samaria*

<sup>4</sup> Tan tandih̄i ñi tsa quitá ñuu Jerusalén can, caahán ñi tuhun Nyoo nácaa jacacú ra Cristo tsi yo, tandih̄i ñi ityi nu cuahán ñi.

<sup>5</sup> Iin ra tsa nañī Felipe tsaá ra iin ñuu canyiī Samaria. Tan quitsahā caahán ra tuhun ra Cristo tsihin nyivi iyó ican.

<sup>6</sup> Tan tandih̄i ñi nūi cuñī ñi tan tyaá soho ñi tsa caahán ra. Tyin nyehé ñi tsa iyo tsa javahá ra.

<sup>7</sup> Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quita nahnu tan cana tsa nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi.

<sup>8</sup> Yacan cuenda nyivi ñuu can, sii xaan cuñí ñi.

<sup>9</sup> Tan Samaria can iyó iin ra tasi nañí Simón. Tuhvá ra jandaví ñaha tsi nyivi. Catyí ra tyin cahnu xaan cuví ra.

<sup>10</sup> Tandihí maa nyivi, ñi cuca tan ñi ndaahvi, tyáá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tsihin ra ihya —catyí ñi.

<sup>11</sup> Tyaa yahví xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi.

<sup>12</sup> Tacan tan quitsj ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsaha tsinú iñi ñi tsi ra Cristo, rayi tan ñaha. Tan tsicoondutya ñi.

<sup>13</sup> Nda cuanda ra Simón can, tan natsinu iñi ra tsi ra Cristo, tan tsicoondutya ra. Tan quitsaha tsicá nuu ra Felipe. Tan iyo xaan cuñí ra nyehé ra tsa iyo tan seña tsa javahá ra Felipe.

<sup>14</sup> Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria.

<sup>15</sup> Tan tsa tsaá ra naha, quitsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihín ñi Tatyí Ii Nyoo.

<sup>16</sup> Tyin ñi can, ñaha ca nuu Tatyí Ii Nyoo siquí ñi. Maa tsa tsicoondutya ñi ñi tsihin sivi Jutu Mañi yo Jesús.

<sup>17</sup> Tacan tan ra Pedro tan ra Juan tyiso ndaha ra naha jiñi ñi, tan naquihín ñi Tatyí Ii Nyoo.

<sup>18</sup> Tan ra Simón can nyehé ra nu tyiso ndaha ra tava tyiñu ra Jesús jiñi ñi, tan naquihín ñi Tatyí Ii Nyoo.

<sup>19</sup> Tan quitsaha caahán ra Simón tan catyí ra:

—¿Najava xuhun cuñí ndo tan cuhva ndo tunyee iñi tsi yu, cuví tyiso ndaha yu jiñi nyivi, tan naquihín ñi Tatyí Ii Nyoo? —catyí ra Simón tsihin ra naha.

<sup>20</sup> Tacan tan nacahan ra Pedro tan catyí ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví.

<sup>21</sup> Yooho, ña taahán tsi tyihí un tsi un tsihin tyiñu ihya. Tyin añima un ña vaha nuu Nyoo.

<sup>22</sup> Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un.

<sup>23</sup> Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tsihin ra Simón.

<sup>24</sup> Tacan tan nacahan ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihí tsa caahán un tsihin yu siquí yu —catyí ra Simón tsihin ra Pedro.

<sup>25</sup> Tsa yaha can tan ra tava tyiñu ra Jesús tsahá cuenda ra naha tandihí tsa nyehé ra naha tsa javahá ra Cristo nu tsicá ra nu ñuhu ñayivi. Tan cahan ra naha tuhun Nyoo. Tacan tan cuanuhu ra naha nda ñuu Jerusalén. Tan tandihí ñuu tsa cayucú Samaria nu yaha ra naha jacoto ra naha nácaa javahá yo tan cacu yo.

*Nu caahán ra Felipe tuhun Nyoo tsihin iin ra ñuu Etiopía*

<sup>26</sup> Tsa yaha yacan tan cahan iin ángel Nyoo tsihin ra Felipe, tan catyí ra:

—Nduvita tan cahun can ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yaha nu tsiquí.

<sup>27</sup> Tacan tan ra Felipe nduvita ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan cuví ra can eunuco [tyin ña cuví coo ñasihi ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén.

<sup>28</sup> Tan ityi cuanuhú ra nda ñuu ra nyaá ra siquí carreta ra. Tan cahví ra nu libru tsa tyaa ra Isaías, ra cuví ndusu yuhu Nyoo tahan tsanaha.

<sup>29</sup> Tacan tan Tatyí Ii Nyoo cahan tsihin ra Felipe:

—Nguhva nu carreta can.

<sup>30</sup> Tan cuhva tsa natuhva ra Felipe nu carreta can, tsiní ra tyin cahví ra Etiopía can nu libru tsa tyaa ra Isaías. Tan tsicá tuhun ra Felipe tsi ra tan catyí ra:

—¿A cutuñi iñi un tsa caahán tsi? —catyí ra.

<sup>31</sup> Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catyí ra tsihin ra Felipe.

Tan tsican ra tsi ra Felipe na ndaa ra tan cunyaa ra tsihin ra.

<sup>32</sup> Tan nu cuahán cahví ra, catyí tsi tye-hen:

Tsahñi ra naha tsi ra tumaa tuhvá ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixí ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehe ra tundoho tan nduve náa cahañ ra.

<sup>33</sup> Janduluhlú ra tsi ra nuu ra naha tan yoñi cuñí javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoo sehe ra tan tsihi ra.

Tacan catyí tsi nu tutu tsa cahví ra can.

<sup>34</sup> Tacan tan ra Etiopía quitsahá tsicá tuhun ra tsi ra Felipe, tan catyí ra:

—Jaha tumañi iñi tsi yu, tan çatyi tuhun un luxu tsihin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tsihin ra Felipe.

<sup>35</sup> Tacan tan ra Felipe quitsahá caahán ra siqui tuhun tsa tsa yaha cahví ra can, tan tsahá cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahá cuenda ra tyin ra Jesús cuví ra jacacú tsi yo.

<sup>36</sup> Tacan tan tsa cua yaha ra naha nu yihí ndutya. Tan ra Etiopía can quitsahá caahán ra tsihin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

<sup>37</sup> Tacan tan nacahañ ra Felipe tsihin ra Etiopía, tan catyí ra:

—Tatun tsinú iñi un tsihin tsa nii añima un, cuví coondutya un —catyí ra tsihin ra.

Tacan tan nacahañ ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

<sup>38</sup> Tacan tan ra can caahán ra tsihin musu ra na jacuñi ra carreta can. Tan nduvi taahan ra naha nuu ra naha. Tan quihví ra naha tsitsi ndutya. Tacan tan jacoondutya ra Felipe tsi ra Etiopía.

<sup>39</sup> Tan cuhva tsa quitá ra naha tsitsi ndutya can, tan Tatyí Ii Jutu Mañi yo naquihñ ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin sii xaan cuñí ra, cuanuhú ra.

<sup>40</sup> Tan ra Felipe tsaá ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaá ra ñuu Cesarea.

## 9

*Nu natsinú iñi ra Saulo tsi ra Cristo  
(Hechos 22.6-16; 26.12-18)*

<sup>1</sup> Tan tsicá ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahañ ra nu nyaá ra jutu tsaahnu cuví ityi nuu,

<sup>2</sup> tsindacañ ra iin tutu tsi ra jutu, tyin nacuhva ra ndatu tsa cahun ra vehe ñuhu ñuu Damasco, tan tñin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayii tan ñaha. Ñihí ra Saulo tutu can tan cuahán ra.

<sup>3</sup> Tan tsa cua tsaá ra ñuu Damasco, sana iñi ra, tan quitsi ñuhú ityi andivi, jandunditsin tsi tanii cahnu maa nu cuahán ra.

<sup>4</sup> Tacan tan ra Saulo nduvá ra nu ñuhu. Tan tsiñi ra iin ndusu tsa catyí tyehen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tsihin ra.

<sup>5</sup> Tacan tan nacahañ ra Saulo:

—¿Yóo cuví yooho, taa? —catyí ra, tsicá tuhun ra.

Tacan tan nacahañ ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicueehé un, tumaa jañicueehé indiqui tsi ti tsa tsahí ihñi ti nu tsa tutsi ra naha tsi ti —catyí ra Jesús tsihin ra.

<sup>6</sup> Tacan tan quitsahá ñihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñí un tyin javaha yu? —catyí ra.

Tacan tan Jutu Mañi yo nacahañ ra tsihin ra tan catyí ra:

—Nduvita tan cahun un tsitsi ñuu Damasco. Tan ican cua cahan iin ra tsa cua cahan tsihin un náa taahán tsi javaha un —catyí ra Jesús tsihin ra Saulo.

<sup>7</sup> Tan ra tsa cuahán tsihin ra Saulo, nayuhví xaan ra naha. Tan ña ñihí ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha.

<sup>8</sup> Tacan tan ra Saulo nduvitá ra. Tan tsa nuñá ra tinuu ra, ña cuví maa nanyehé ra tyin cuaá ra jahá Nyoo. Yacan cuenda, ra tsa cuahán tsihin ra tñin ra naha ndaha ra tan tsindacá ra naha tsi ra ñuu Damasco.

<sup>9</sup> Ican tsinyij ra uñi quivi. Tan ña cuví maa nanyehé ra. Tan ña tsatsj ra, tan nduve maa náa tsihi ra.

<sup>10</sup> Ñuu Damasco can iyó iin ra tsinú iñi tsi Nyoo, nañí ra Ananías. Tan nyehe ra iin tsa nyehe ra nu cahñ Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahañ ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

<sup>11</sup> Tacan tan Jutu Mañi yo catyí ra:

—Nduvita, tan cahun cun ityi cahnu tsa nañí Ndoó ñi. Tan nanducu un vehe ra tsa nañí Judas. Tan ndaca tuhun un nu maa tahan iyó ra tsa nañí Saulo, ra ñuu Tarso. Tyin tsicán tahví ra tsi yu.

<sup>12</sup> Tan nyehe ra iin tsa nyehe ra, tan nyehe ra tsi yooho, Ananías, tyin tsaá un nu nyaá

ra, tan tyisō ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

<sup>13</sup> Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javaha ra Saulo can tsihin ñi.

<sup>14</sup> Tan vityin vatsi ra ihya tyin tsaḥa ra jutu tsaahnu tsa cuví ityi nuu ndatu tsi ra tsa tyihí ra tsi nyivi tsiacán tahvi tsi un vehe caa —catyí ra Ananías tsihin Jutu Mañi yo.

<sup>15</sup> Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsi vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juven ñi cahan ndihí ra tuhun yu tsihin nyivi Israel.

<sup>16</sup> Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

<sup>17</sup> Tacan tan cuahán ra Ananías vehe nu nyii ra Saulo. Tsaḥa ra yuvehe can tan quihvi ra tsitsi vehe. Tan tyisō ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituví nuu un ityi vatsi un, ra ican jaquitsi tsi yu tyin nanyehe un inga tsaha. Tan cua jacutu ra tsi un tsihin Tatyí li ra —catyí ra Ananías tsihin ra Saulo.

<sup>18</sup> Tan juven ñi cuhva can tan coyō tsa caá tumaa caa yaa tyaca tsa tsyasi tinuu ra Saulo. Tacan tan cuví nanyehe ra. Yahā can tan tsicondutyā ra.

<sup>19</sup> Yahā can tan nacatsi ra, tan ndunyeē cuñu ñuhu ra inga tsaha. Tan ndoḡ ra juhva quivi tsihin nyivi tsa yihí cuenda ra Cristo ñuu Damasco.

*Nu quitsahā caahán ra Saulo tuhun ra Cristo tsihin nyivi ñuu Damasco*

<sup>20</sup> Tacan tan numi ñi quitsahā caahán ra Saulo tuhun ra Cristo tsihin nyivi tandihí vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra.

<sup>21</sup> Tandihí maa nyivi tsa tsiñi tsa caahán ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaḡ ndaha tsi nyivi tsiacán tahvi sivi ra Jesús ityi ñuu Jerusalén? ¿A ñavin juven ra cuví ra tsa vatsi tñi tsi nyivi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

<sup>22</sup> Maa tyin ra Saulo ñihí ca caahán ra tuhun ra Cristo tsihin tsa ñi ñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihj ñi nácaa nacahan ñi tsihin ra.

*Nu tsinū xeehe ra Saulo nuu ra Israel naha ra*

<sup>23</sup> Tsa yaha juhva quivi, tan ra Israel tsa ña tsinú ñi tsi ra Cristo natuhún tahan ra naha tyin cua cahñi ra naha tsi ra Saulo.

<sup>24</sup> Ñiñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can.

<sup>25</sup> Tacan tan nyivi tsa tsinú ñi tsi ra Cristo ñuu can tyihj ñi tsi ra tsitsi ñi tyica cahnu. Tan tsacuaa januu ñi tsi ra ityi ventana ñi vehe tsa nyaá yuhu cora ñuu can. Tacan tan tsinū ra cuahán ra.

*Nu nyii ra Saulo ñuu Jerusalén*

<sup>26</sup> Quivi tsa tsaḡ ra Saulo ñuu Jerusalén, cuñi ra ndu ñi ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú ñi ñi tsa yihí ra cuenda ra Jesús.

<sup>27</sup> Maa tyin ñi ra tsa nañi Bernabé, quihj ra tsi ra. Tan tsaḥa cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyehe ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa cahñ Jutu Mañi yo tsihin ra. Tan nácaa cahñ ra tuhun ra Cristo tsihin tsa ña yuuhví ra nda ñuu Damasco.

<sup>28</sup> Tacan tan ndoḡ ra Saulo ñuu Jerusalén tsihin nyivi tsa yihí cuenda ra Cristo.

<sup>29</sup> Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra.

<sup>30</sup> Maa tyin tsito ra hermano can naha ra tyin tacan tsicá ñi ra can naha ra. Yacan cuenda tsindacā ra hermano naha ra tsi ra Saulo nda ñuu Cesarea. Tacan tan jacuhun ra naha tsi ra nda Tarso, ñuu ra.

<sup>31</sup> Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, si xaan cuñi ñi tyin ña cuxaán ca nyivi tsi ñi. Tan ndunyeē ca ñi ñi tsihin tunyee ñi tsi Nyoo tyin tyaá yahvi vaha ñi cuhva cahñ ra, tyin yuuhví ñi coto ña cua javaha ñi cuhva cuñi ra. Iyó ñi tsihin tsa jatyinyeé Tatyí li Nyoo tsi ñi. Tan nducuahá ca ñi tan ñi tan ñi quivi.

*Nu nduvahā ra Eneas*

<sup>32</sup> Tacan cuví tan ra Pedro tuhvá ra cuahán cua nyehe nácaa yucú ra hermano naha ra tan ñi tan ñi ñuu. Tan tsaḥan tucu ra tsinyehē ra nu iyó nyivi yihí cuenda ra Jesucristo ñuu Lida.

<sup>33</sup> Ican nañihj ra tsi ñi ra cuuhví, nañi ra Eneas. Tan tsa una cuiya canyí ra tan ña cuví maa nacandá ra tyin naxij cuñu ñuhu ra.

<sup>34</sup> Tan ra Pedro catyí ra tsihin ra:

—Yooho Eneas, ra Jesucristo janduvaha ra tsi un. Nduvita tan natuvi yuvi un —catyí ra tsihin ra.

Tan juvin ñi cuhva can tan nduvitã ra Eneas.

<sup>35</sup> Tan nyehe tandihí nyivi ñuu Lida can tyin tsa nduvaha ra. Tan nyehe tucu nyivi ñuu Sarón. Tacan tan ñi can, natsinũ ñi ñi tsi Jutu Mañi yo. Tan nacoq ñi tuhun tsahnu tsa tsinũ ñi ñi nda ndi cumañi ca coto ñi tuhun ra Cristo.

*Nu nandoto ña Dorcas*

<sup>36</sup> Quivi can tsicoq iin ñaha tsinũ ñi tsi ra Cristo ñuu Jope. Tan nañi ña Tabita, tan tsihin yuhu griego, nañi ña Dorcas. Tan tuhvã ña javahã tsa vaha tsihin nyivi, jatyinyeé ña tsi nyivi ndaahvi.

<sup>37</sup> Tan quivi can ña Dorcas quihñin cuehe tsi ña tan tsihĩ ña. Tan tsa yaha jacutyí ñi tsi ña, tsicaquñ ñi tsi ña tsitsi cuarto nu tsinu uvi pisu.

<sup>38</sup> Yatyin ñi canyí ñuu Jope tsihin ñuu Lida, nu nyii ra Pedro. Tan nyivi tsa yihí cuenda ra Cristo ñuu Jope can tsito ñi tyin nyii ra Pedro ñuu Lida. Tacan tan jacuhñ ñi tsi uvi taahan ra na cucana ra naha tsi ra Pedro tyin na cuhun ra ñuu Jope tsa numi ñi. Tan tsaq ra naha nu nyii ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

<sup>39</sup> Tacan tan ra Pedro nduvitã ra tan cuahán ra tsihin ra naha. Tan cuhva tsa tsaq ra naha, tsindacã ra naha tsi ra nda cuarto nu canyí ndiyi can. Tan tandihí maa ñiñaha tsa tsihĩ yii natuhvã ñi tsata ra, tan tsacú tsaã ñi. Tan janahã ñi jahma tsa quicu ña Dorcas tsa tsicoq ña.

<sup>40</sup> Tacan tan ra Pedro tavã ra tsi tandihí nyivi cuarto can. Tan tsicuiñi tsiti ra tan quitsahã tsicán tahvi ra tsi Nyoo. Tacan tan nanyehẽ ra tsi ñaha tsa tsihĩ can canyí ña. Tan quitsahã catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehẽ ña. Tan tsa nyehe ña tsi ra Pedro, tsinyaq ña.

<sup>41</sup> Tacan tan ra Pedro tijn ra ndaha ña tan janduvitã ra tsi ña. Tacan tan canã ra tsi ra hermano naha ra, tan tsihin ñiñaha tsa tsihĩ yii. Tan nacuhvã cuenda ra tsi ña tsi ñi tyin tsa nandoto ña.

<sup>42</sup> Yaha can tan tandihí maa nyivi ñuu Jope tsito ñi tyin nandoto ña can. Tan cuaha xaan ñi natsinũ ñi tsi Jutu Mañi yo.

<sup>43</sup> Tan ra Pedro ndoo ra juhva quivi ñuu can, nyii ra yuvehe iin ra tsa janduvitã ñi quiti, nañi ra Simón.

## 10

*Ra Pedro tsihin ra Cornelio*

<sup>1</sup> Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihí andaru tsa yihí ndaha ra can nañi tsi Italiano.

<sup>2</sup> Tan ra Cornelio can yuuhví ra tsi Nyoo. Maa ra tan tsihin tandihí nyivi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahã ra tsi nyivi ndaahvi ñuu Israel, tan tandihí quivi tsicán tahvi ra tsi Nyoo.

<sup>3</sup> Tan iin quivi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhñ Nyoo nu nyii ra, tan catyí tsi tsihin ra:

—¡Yooho Cornelio! —catyí ángel can tsihin ra.

<sup>4</sup> Tacan tan nanyehẽ ra Cornelio tsi ángel can. Tan nayuhví xaan ra. Tan quitsahã tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahã caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán ñi ra tyin jatyinyeé xaan un tsi nyivi ndaahvi.

<sup>5</sup> Tan vityin cuñi tsi tsa tava tyiñu un na cuquihñ tyiñu tsi iin ra tsa nañi Simón Pedro nda ñuu Jope.

<sup>6</sup> Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvitã ñi quiti. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

<sup>7</sup> Tsa yaha cuahán ángel can, ra Cornelio canã ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo.

<sup>8</sup> Tandihí maa tsa cahãn ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhñ ra tsi ra naha ñuu Jope.

<sup>9</sup> Tuví inga quivi tan cuahán ra can naha ra. Tan tsa ndi cumañi ca tsaã ra naha ñuu Jope, tan ra Pedro ndaq ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can.

<sup>10</sup> Tan tsaq soto tsi ra tan tsisocó xaan ra. Maa tyin tsitsi tsa tsinú tsa catsi ra, quitsahã nyehe ra iin tsa janahã Nyoo tsi ra.

<sup>11</sup> Tan nyehe ra tyin ticohó andivi. Tan nyehe ra andivi tyin vatsi nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi.

<sup>12</sup> Tan tsitsi jahma can yihí tandihí maa nuu quiti tsa cumi taahan tsaha, tan tandihí nuu coo, tan saa.

<sup>13</sup> Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quiti ihya, tan catsi un —catyí ndusu can tsihin ra.

<sup>14</sup> Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quití tsa catyí ley tyin ña vaha catsi ndi —catyí ra Pedro.

<sup>15</sup> Tacan tan quitsaha caahan nyico ndusu can tsihin ra inga tsaah:

—Ña catyí un tyin ña catsi un tsa tsa jan-duvaha yu —catyí ndusu can tsihin ra.

<sup>16</sup> Uñi taahan tsaha nyehe ra yacan jahá Nyoo. Tacan tan jahma cahnu can nandaq nyico can ityi andivi.

<sup>17</sup> Tan tsitsi tsa tsicá iñi ra Pedro náa cuñi tsi catyí tsa nyehe ra can, tsaq musu tsa jacuhun ra Cornelio naha ra. Tan tsica tuhun ra naha numaa tahan iyó vehe ra nañí Simón.

<sup>18</sup> Tan tsa tsaq ra naha ityi yuvehe tsica tuhun ra naha tatun ican iyó iin ra tsa nañí Simón Pedro.

<sup>19</sup> Tan ra Pedro tsicá xaan iñi ra náa cuñi tsi catyí tsa nyehe ra. Tacan tan Tatyí Ii Nyoo quitsaha caahan tsihin ra, tan catyí tsi:

—Nyehe Pedro, uñi taahan ra vatsí nanducú tsi un.

<sup>20</sup> Nduvita tan cuhun cun tsihin ra naha, tan ña çaça iñi un tyin maa yu jaquitsí tsi ra ihya naha ra —catyí Tatyí Ii Nyoo tsihin ra Pedro.

<sup>21</sup> Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

<sup>22</sup> Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsí tsi ndi. Vaha xaan nyivi cuví ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñi ra naha tsi ra tsa cuenda tsa vaha nyivi cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

<sup>23</sup> Tacan tan tsaha ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahan ra tsihin ra naha. Tan cuahan juhva ra hermano tsa iyó ñuu Jope can tsihin ra naha.

<sup>24</sup> Tsa inga quivi tsaq ra naha nda ñuu Cesarea nu ndatú ra Cornelio tsi ra naha tsihin tandihí nyivi ra, tan tsihin tandihí ra vaha iñi tsi ra.

<sup>25</sup> Cuhva tsa tsaq ra Pedro yuvehe ra Cornelio, quitá ra Cornelio tan caahan ra tsihin ra. Tan tsicuiñi tsiti ra nuu ra Pedro tan quitsaha jacahnú ra tsi ra.

<sup>26</sup> Maa tyin ra Pedro cañihí ra tsi ra, tan catyí ra tsihin ra:

—Nduvita tyin tahan ñi cuví yooho cuví tucu yuhu; ñavin Nyoo cuví yu —catyí ra tsihin ra.

<sup>27</sup> Tan tsitsi tsa caahan ra Pedro tsihin ra, tan quihvi ra tsitsi vehe tan nanyehé ra tyin cuaha xaan nyivi ndu iin tsitsi vehe can.

<sup>28</sup> Tacan tan catyí ra Pedro tsihin ñi:

—Nyooho tsitó ndo tyin ley nyuhu tsa cuví ndi nyivi Israel, catyí tsi tyin ña taahan tsi tsa ndu iin ndi tsihin nyivi tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janaha ra tsi yu, tan catyí ra: “Yooho, ña catyí un tsihin nyivi tyin ndi intuhun ñi tan ña vaha ñi” catyí Nyoo tsihin yu.

<sup>29</sup> Yacan cuenda quivi tsa caná ndo tsi yu, numi ñi vatsí yu. Tan vityin cuñi yu coto yu nacuenta caná ndo tsi yu —catyí ra Pedro.

<sup>30</sup> Tacan tan nacahan ra Cornelio, tan catyí ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsj yu tan tsicán tahvi yu tsi Nyoo tsa tseñi. Tan quituvj iin rayiñ nuu yu. Ndisí ra jahma xiñu.

<sup>31</sup> Tan catyí ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun iñi ra tsa javahá un tyin jatyinyeé xaan un tsi nyivi ndaahvi.

<sup>32</sup> Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyii ra yuvehe ra tsa nañí Simón, iin ra tsa janduvitá ñi quití. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyí ángel can tsihin yu.

<sup>33</sup> Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsí un. Tan vityin tandihí yo ndu iin yo nuu Nyoo. Tan cuñi ndi tyaa soho ndi tandihí tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

*Nu caahan ra Pedro tuhun ra Cristo yuvehe ra Cornelio*

<sup>34</sup> Tacan tan quitsaha caahan ra Pedro tan catyí ra:

—Vityin cutuñi iñi yu tyin Nyoo cuñi ra tsi tandihí nyivi, tahán ñi nyivi Israel, tan nyivi tsa ñavin nyivi Israel cuví. Ña tavá tsiyo ra tsi ndi intuhun maa yo.

<sup>35</sup> Tyin naquihín ra tsi yo tatun tyaá yahvi yo tsi ra, tan javahá yo tsa vaha.

<sup>36</sup> Nyoo cahan ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo.



<sup>37</sup> Nyooho tsító vaha ndo tandihi tsa cuvı́ ñuu nyı́vi Israel ñuu yu, nácaa quıtsaha tsi nu cuvı́ Galilea tsa yaha tsa cahan ra Juan tuhun Nyoo tsihin nyı́vi, tan jacoondutya ra tsi ñi.

<sup>38</sup> Tsító ndo nácaa tsaha Nyoo tunyee iñi Tatyı́ İi ra tsi ra Jesús, ra ñuu Nazaret. Tan tsicā ra javaha ra tsa vaha, janduvaha ra tsi tandihi nyı́vi tsa nyehé tundoho jahá nu ña vaha. Tyehen javaha ra Jesús tyin Nyoo nyaá ra tsihin ra.

<sup>39</sup> Nyuhu cuvı́ ndi tsandaa tsa cuenda tandihi tsa javaha ra Jesús ñuu Jerusalén tsihin tandihi ca ñuu tsa cayucú Judea. Yaha can tan ticaā ra naha tsi ra nu cruu tan tsahı́ ra naha tsi ra.

<sup>40</sup> Maa tyin tsa tsinu uñi quıvi janandoto Nyoo tsi ra. Tan quituvı́ ra nuu ndi.

<sup>41</sup> Ña quituvı́ ra nuu tandihi nyı́vi. Maa tyin quituvı́ ra nuu nyuhu tyin nacatsı́ ra tsi ndi nda tsanaha tyin cuvı́ ndi tsandaa cuenda ra. Nyuhu tsatsı́ ndi tan tsihi ndi tsihin ra tsa yaha tsa nandoto ra.

<sup>42</sup> Tan tava tyiñu ra tsi ndi tyin cahan ndi tuhun ra tsihin nyı́vi. Tan cuvı́ ndi tsandaa tyin Nyoo tava tyiñu ra tsi ra Jesús tyin cuvı́ ra juez tsi nyı́vi tsa nyito tan nyı́vi tsa tsihi.

<sup>43</sup> Tan tacan tucu nda tsanaha, cahan tandihi ra cuvı́ ndusu yuhu Nyoo tuhun ra Jesús. Tan catyı́ ra naha tyin tandihi nyı́vi tsa tsinú iñi tsi ra Jesús, cua jaha Nyoo tucahnu iñi cuatyı́ ñi tsa cuenda maa ra.

*Nu naquihın nyı́vi Tatyı́ İi Nyoo tan ñavin nyı́vi Israel cuvı́ ñi*

<sup>44</sup> Ndi caahan ca ra Pedro tan nuu Tatyı́ İi Nyoo siqui tandihi ñi tsa tyaá soho tsa caahan ra.

<sup>45</sup> Tan ra Israel tsa yihı́ cuenda ra Jesús tsa tsaā tsihin ra Pedro iyo xaan cuñi ra naha tyin tsaha ndihi tucu Nyoo Tatyı́ İi ra tsi nyı́vi tsa ñavin nyı́vi Israel cuvı́.

<sup>46</sup> Tyin tsiñi ra naha caahan ñi inga yuhu tan jacahnú ñi tsi Nyoo.

<sup>47</sup> Tacan tan quıtsahā caahan ra Pedro tsihin ra tsa tsaā tsihin ra:

—Ña cuvı́ casi yo nu coondutya nyı́vi ihya. Tyin tsa naquihın ñi Tatyı́ İi Nyoo tumaa tsa naquihın tucu maa yo —catyı́ ra tsihin ra naha.

<sup>48</sup> Tacan tan tava tyiñu ra Pedro tsi ñi tsa ndi ñihı́ Tatyı́ İi Nyoo na coondutya ñi tsihin sivi ra Jesucristo. Tacan tan caahan ndaahvi ñi tsihin ra Pedro na ndoo ra taahan quıvi tsihin ñi.

## 11

*Nu nacatyı́ tuhun ra Pedro tsihin ra yihı́ ndaha vehe ñuhu ñuu Jerusalén nácaa nducuahá tuhun ra Jesucristo inga ñuu*

<sup>1</sup> Ra tava tyiñu ra Jesús tan inga ra yihı́ cuenda ra Jesús tsa iyó Judea, ñihı́ tuhun ra

naha tyin nda cuanda nyı́vi tsa ñavin nyı́vi Israel cuvı́ tan naquihın ñi tuhun Nyoo.

<sup>2</sup> Tacan tan tsaā nyico ra Pedro ñuu Jerusalén. Tan ra tsa catyı́ tyin tsiñi ñuhu tsa cunyaa tuñi Nyoo tsi tandihi rayı́, xaan xaan cuñi ra naha nyehé ra naha tsi ra Pedro.

<sup>3</sup> Tan catyı́ ra naha tsihin ra:

—¿Nacuenda tsahan un yuvehe nyı́vi tsa ñavin nyı́vi Israel cuvı́ tan tsatsı́ un tsihin ñi? —catyı́ ra naha.

<sup>4</sup> Tacan tan ra Pedro nacatyı́ tuhun ra nda nu quıtsahā tandihi tsa cuvı́ tsi ra, tan catyı́ ra:

<sup>5</sup> —Yuhu nyı́i yu ñuu Jope. Tan tsa tsicán tahvi yu tsi Nyoo tan nyehé yu iin tsa janaha Nyoo tsi yu tyin iin jahma cahnu quee ityi andıvi. Tan tandihi tsa cumi tutun tsi nuuhı́ nuuhı́ ñi tan vatsı́ nuú tsi ityi nu ñuhu nu nyı́i yu.

<sup>6</sup> Tan nyehé vaha yu tsa yihı́ tsitsi jahma can. Tan nyehé yu quiti tsa cumi tsaha, quiti cuuhu, coo, tan saa.

<sup>7</sup> Tan tsiñi yu iin ndusu tsa caahan tsihin yu: “Ndıvıta Pedro. Cahı́i quiti ihya tan catsı́ un” catyı́ ndusu can tsihin yu.

<sup>8</sup> Tan nacahan yu tan catyı́ yu tyehen: “Jutu Mañi yu, ña catsı́ yu, tyin ña tuhvá yu catsı́ quiti tsa catyı́ ley tyin ña vaha catsı́ ndi.”

<sup>9</sup> Tacan tan ndusu can nacahan tsi tsihin yu inga tsaha, tan catyı́ tsi: “Ña vaha tsa cahan un tyin ña catsı́ un tsa tsa yaha janduvaha yu” catyı́ ndusu can tsihin yu.

<sup>10</sup> Uñi tsaha cuvı́ yacan. Yaha can tan nandaā nyico tandihi quiti can tsihin jahma can ityi andıvi.

<sup>11</sup> Tan juvin ñi cuhva can tsaā uñi taahan ra naha yuvehe nu nyı́i yu, quee ra naha ñuu Cesarea tan nanducú ra naha tsi yu.

<sup>12</sup> Tan Tatyı́ İi Nyoo cahan tsihin yu na cuhun yu tsihin ra naha. Tan catyı́ ra tsihin yu tyin ña caca iñi yu tsa ñavin ra ñuu Israel cuvı́ ra naha. Yacan cuahán yu. Tan cuahán ndihi iñu taahan ra yañi yo ihya naha ra tsihin yu. Tan tsa tsaā ndi nda ñuu Cesarea, quıhvı́ ndi tsitsi vehe iin ra tsa nañi Cornelio.

<sup>13</sup> Tan nacatyı́ tuhun ra can tsihin ndi nácaa nyehé ra tsi iin ángel tsitsi vehe ra. Nyaá nyityi ángel can tan catyı́ ra tsihin ra tyin na jacuhun ra musu ra ñuu Jope na cucana ra naha tsi yu.

<sup>14</sup> Tyin yuhu cua cuhva cuenda yu tsi ra nácaa cuvı́ cacu ra tsihin tandihi nyı́vi ra, catyı́ ángel can tsihin ra, catyı́ ra tsihin ndi.

<sup>15</sup> Tan javaha ra can tumaa cuhva catyı́ ángel can tsihin ra. Tan tsa tsaā yu yuvehe ra quıtsahā caahan yu tsihin nyı́vi tsa ndu iin yuvehe ra. Tan quıtsı́ Tatyı́ İi Nyoo siqui ñi tumaa tsa nuu tsi siqui yo tsa jihna ñi.

<sup>16</sup> Tacan tan nducuhun iñi yu tsa catyí Jutu Mañi yo quivi can. Tan catyí ra tyehen: “Nditsa tyin ra Juan jacoondutyá ra tsi nyivi tsihin ndutyá. Maa tyin nyooho cua coondutyá ndo tsihin Tatyí Ii Nyoo”, catyí ra.

<sup>17</sup> Nyoo tsaḥá ndihi tucu ra Tatyí Ii ra tsi ñi can tumaa tsa tsaḥá ra Tatyí Ii ra tsi yo quivi tsa natsinú iñi yo tsi Jutu Mañi yo Jesucristo. Tan tsa tacan zyóo ra cuví yuhu tan casi yu tsa javahá Nyoo? —catyí ra Pedro tsihin ra hermano can naha ra.

<sup>18</sup> Tacan tan tsa tsiñi ra ñuu Jerusalén tuhun can, ña cahán ca ra naha. Tan jacahnú ra naha tsi Nyoo, tan catyí ra naha:

—Tun tacan cuví, cuñi tsi catyí tyin Nyoo tsaḥá ndihi tucu ra ndatu tsi nyivi tsa ñavin nyivi Israel cuví tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyí ra naha.

*Nyivi yihí cuenda ra Cristo ñuu Antioquía*

<sup>19</sup> Quivi tsa tsañi ra naha tsi ra Esteban, quitsahá nyaá ndaha ra naha tsi inga ca nyivi yihí cuenda ra Cristo. Tan yihí ñi tsinú ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mañu ndutyá ñuhu. Tan yihí ñi tsaḥá ñi ñuu Antioquía. Tan tandihi ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel.

<sup>20</sup> Tan tsihin ñi tsa cuahán can, yihí nyivi ñuhu Chipre, tan yihí tucu juhva nyivi ñuu Cirene. Tan tsa tsaḥá ñi ñuu Antioquía, tan quitsahá caahán ñi can tuhun ra Cristo tsihin nyivi tsa ñavin nyivi Israel cuví. Tan jacotó ñi tuhun vaha Jutu Mañi yo ra Jesús.

<sup>21</sup> Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoo ñi tuhun tshahu. Tan quitsahá tsinú iñi ñi tsi Jutu Mañi yo.

<sup>22</sup> Tacan tan tsaḥá tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía.

<sup>23</sup> Tan tsa tsaḥá ra Bernabé Antioquía can, nyeḥe ra nácaa nasocó Nyoo tsi ñi. Tan sií xaan cuñi ra. Tan catyí ra tsihin ñi na cunyicun ñi tsi Jutu Mañi yo tsihin tsa ñi iñi ñi.

<sup>24</sup> Tacan javahá ra Bernabé tyin cuví ra iin ra vaha. Tsitú ra tsihin Tatyí Ii Nyoo, tan tsinú xaan iñi ra tsi Nyoo. Yacan cuenda cuaha xaan nyivi quihvi cuenda Jutu Mañi yo.

<sup>25</sup> Tsa yahá can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindacá ra tsi ra nda ñuu Antioquía.

<sup>26</sup> Tan tsiyucu ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuahá ra naha tuhun Nyoo.

Tan juven ñi ñuu Antioquía can cuví nu quitsahá catyí nyivi tyin nyivi Cristiano cuví ñi, o ñi yihí cuenda ra Cristo.

<sup>27</sup> Tan quivi can tsaḥá taahan ra cuví ndusu yuhu Nyoo. Queḥe ra naha ñuu Jerusalén tan tsaḥá ra naha ñuu Antioquía.

<sup>28</sup> Tan iin ra can nañi ra Agabo tsi cunyaḥa nyityi ra tyañu nyivi yihí cuenda ra Cristo tan cahán ra tsa tsaḥá Tatyí Ii Nyoo tsi ra. Tan catyí ra tyin can quitsi iin tama ñi cahnu nu ñuhu ñayivi. Tan tacan cuví quivi tsa cuví ra Claudio rey cahnu.

<sup>29</sup> Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatynyee ñi tsi nyivi yihí cuenda ra Cristo tsa iyó ñuu tsa cayucú Judea.

<sup>30</sup> Tacan javahá ñi tan jacuhun ñi juhva xuhun tsi ra tsa cuví ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacá ra naha xuhun can.

## 12

*Nu tsihi ra Jacobo tan nu quihvi ra Pedro vehe caa*

<sup>1</sup> Tan quivi can quitsahá nyaá ndaha ra cuví rey Herodes tsi juhva nyivi yihí cuenda ra Cristo.

<sup>2</sup> Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi.

<sup>3</sup> Tan nyeḥe ra Herodes tyin tahan xaan iñi nyivi Israel tsa javahá ra tacan, tan tava tyiñu ra tyin tñi ndihi ra naha tsi ra Pedro. Tan cuví tsi quivi vico pascua nu tuhvá nyivi tsatsi paan tsa nduve yutsan iya yihí.

<sup>4</sup> Tsa yahá tsa tñi ra naha tsi ra Pedro, tyihi ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihvi tucu inga cumi taahan andaru. Tan tyaḥa ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua.

<sup>5</sup> Tan tacan nyii ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyii ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ñi iñi ñi.

*Nu jacacu Nyoo tsi ra Pedro vehe caa*

<sup>6</sup> Tan tyaḥa ra Herodes cuhva tyin inga quivi can cua tava ra tsi ra Pedro nuu nyivi. Tan juven ñi tsacuaa can, tan ra Pedro quixi xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe.

<sup>7</sup> Tan sana iñi ra tan quituvj iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tñi ra xiin ra

Pedro, jandotq̄ ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsj̄ cadena tsa nuuhñi ndaha ra.

<sup>8</sup> Tan ángel can catyí ra tsihin ra:

—Nacuhñi vaha tsitsi un tan tyih̄i nditsan un tsaha un —catyí ángel can tsihin ra.

Tacan javah̄a ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

<sup>9</sup> Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví can, tan cuñí maa ra tyin iyó iin tsa janah̄a Nyoo tsi ra.

<sup>10</sup> Maa tyin cuahán ra tsata ángel can tan yah̄a ra naha iin nu jahá cuenda ra andaru. Tacan tan yah̄a tucu ra naha inga nu jahá cuenda ra naha. Yah̄a can tacan tan tsaq̄ ra naha yuvehe caa cahnu nu quitá nyivi. Tan yuvehe can nuñ̄a maa tsi. Tan quitá ra naha. Tan tsa yah̄a yah̄a ra naha iin itiyi, tan nacoq̄ ángel can tsi ra.

<sup>11</sup> Tacan tan nacoq̄ ra Pedro tyin nditsa, tan quitsah̄a tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsj̄ iin ángel tyin jacac̄u ra tsi yu ndaha ra Herodes tan ndaha ra ñuu Israel naha ra —cuñí ra Pedro.

<sup>12</sup> Tsicá iñi ra yacan itiyi cuahán ra, tan tsaq̄ ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo.

<sup>13</sup> Tan tsa cañj̄ ndaha ra Pedro yuvehe nuquehe, tan quitá iin ñaha tyuvaa tsa nañí Rode, tsinyeh̄e ña yóo cañí ndaha yuvehe can.

<sup>14</sup> Maa tyin cuhva tsa tsin̄i ña ndusu ra Pedro, s̄i xaan cuñí ña, tan naq̄ iñi ña nuña ña yuvehe can, tyin tsinú ña cuahán ña cua cahan ña tsihin nyivi tsa yucú tsitsi vehe can. Tan catyí ña tyin ra Pedro nyaá ra yuvehe.

<sup>15</sup> Tacan tan quitsah̄a catyí ñi tsihin ña:

—Iñi yooho ña vaha cuñí —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

<sup>16</sup> Tan ra Pedro jañihí ca ra cañí ndaha ra yuvehe. Tan cuhva tsa nuñ̄a ñi yuvehe tan nyeh̄e ñi tsi ra, iyo xaan cuñí ñi tan nayuhvi ñi.

<sup>17</sup> Maa tyin javah̄a ra seña tsihin ndaha ra na cutaxin ñi. Tan nacatyj̄ tuhun ra tsihin ñi nácaa tav̄a Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quitá ra tan cuahán ra.

<sup>18</sup> Cuhva tsa cunditsin, iyo xaan cuñí ra andaru tsa jahá cuenda tsitsi vehe caa can naha ra, tyin ña tsitó ra naha nácaa quitá ra Pedro.

<sup>19</sup> Tacan tan tav̄a tyiñu ra Herodes na cunanducu ra naha tsi ra, tan ña nañih̄j̄ ra naha tsi ra. Tacan tan tav̄a tyiñu ra tsi ra naha na cahñi ra naha tsi ra jahá cuenda vehe caa can naha ra. Yah̄a can tan quitá ra Herodes Judea can tan cuahán ra cua coo ra ñuu Cesarea.

### *Nu tsih̄i ra Herodes*

<sup>20</sup> Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñí ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsi ñi. Tacan tan ndu iin ñi tan cuahán ñi cua cutahan ñi tsihin iin ra tsa nañí Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes.

<sup>21</sup> Tacan tan catyí ra Herodes tyin cuhun ñi nu nyaá ra iin quivi. Tan tsaq̄ quivi can tan tsicunditsj̄ ra jahma s̄i caá ra tsa jahá tyiñu ra. Tan tsicunyaq̄ ra nu tyayu ra. Tan cahan ra tsihin ñi.

<sup>22</sup> Tacan tan quitsah̄a caná tsa ñi, tan catyí ñi:

—Ra tsa caahán ihya ñavin rayi cuví ra, tyin Nyoo cuví ra —catyí ñi.

<sup>23</sup> Tan juven ñi cuhva can tan t̄ijn cuehe tsi ra Herodes jah̄a ángel Jutu Mañi yo tyin tsaq̄ ra tsa catyí nyivi tyin Nyoo cuví ra. Tan quihvi tindacu tsi ra, tan tsih̄i ra.

<sup>24</sup> Maa tyin tuhun Nyoo nducuah̄a ca tsi. Tan jañih̄j̄ ca nyivi caahán ñi tuhun Nyoo tandih̄i ñi itiyi.

<sup>25</sup> Quivi tsa ndih̄j̄ tyiñu jahá ra Bernabé tsihin ra Saulo nda ñuu Jerusalén, cuanuh̄u ra naha ñuu Antioquía. Tan cuahán ndih̄j̄ tucu ra Juan Marcos tsihin ra naha.

## 13

### *Nu quitsah̄a tsicá ra Saulo tan ra Bernabé tyiñu Nyoo*

<sup>1</sup> Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa sahn̄u iin nducu ñi tsihin ra Herodes tsa cuví rey itiyi Galilea, tan ra Saulo.

<sup>2</sup> Tan iin quivi yucú tandih̄j̄ ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahan Tatyí Ii Nyoo tsihin ra naha:

—Tava sɪn ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

<sup>3</sup>Tacan tan tsa ndihí tsioco nyitya ra naha, tan tyiso ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahan tsihin tahan ra naha, tsahan cuahán ra naha.

*Nu caahán ra tava tyiñu ra Jesús tuhun Nyoo ñuhu Chipre*

<sup>4</sup>Yaha can tan jacuhun Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyí mahñu ndutya ñuhu.

<sup>5</sup>Tacan tan tsaq ra naha ñuu Salamina tsa canyí yuhu ndutya ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha.

<sup>6</sup>Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaq ra naha ñuu tsa nañi Pafos. Tan ican nañihí ra naha tsi iin ra ñuu Israel tsa nañi Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra.

<sup>7</sup>Tan ra tasi can nyaá ra tsihin ra cumi tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñi ra tyaa soho ra tuhun Nyoo tsa caahán ra can naha ra.

<sup>8</sup>Tan ra tasi can nañi tucu ra Elimas, tan tyasi xaan ra nu tsinu iñi ra cumi tyiñu can tsi ra Cristo.

<sup>9</sup>Tacan tan ra Saulo tsa nañi tucu Pablo, tsitú ra tsihin Tatyí Ii Nyoo. Tan ñihi xaan nanyehé ra tsi ra Elimas can.

<sup>10</sup>Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñi un jativi un tandihi tsa vaha. Tan tacan ñi tyasi un ityi vaha Jutu Mañi yo.

<sup>11</sup>Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhu ñicanyii juhva quivi —catyí ra Pablo tsihin ra Elimas.

Tacan tan juvin ñi cuhva can cuaq ra. Tan ndoo ra nu naa. Tan nducu ra iin ra tiin ndaha ra tyin ña nditsin nyehé ra.

<sup>12</sup>Tsa nyehe ra cumi tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñi ra nyehé ra tsa javahá Jutu Mañi yo.

*Nu cuahán ra Pablo tan ra Bernabé nda ñuu Antioquia tsa canyí Pisidia*

<sup>13</sup>Ra Pablo tan ra vaha iñi tsi ra quihvi ra naha tsitsi iin yutun ndoo ñuu Pafos. Tan

cuahán ra naha nda ñuu Perge tsa canyí Panfilia. Maa tyin ra Juan Marcos nacoq ihñi ra tsi ra naha tan cuanuhq ra nda ñuu Jerusalén.

<sup>14</sup>Yaha can tan quee ra naha Perge can, tan cuahán ra naha ñuu Antioquia tsa canyí Pisidia. Ican quihvi ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecu ra naha.

<sup>15</sup>Tacan tan quitsaha cahvi nyivi nu libru ley Nyoo tsa tyaa ra Moisés. Tan cahvi tucu ñi libru tsa tyaa ra cuví ndusu yuhu Nyoo tahañ tsanaha. Yaha can tan ra cuví ityi nu vehe ñuhu naha ra catyí ra naha tsihin ra hermano tsa nyecu ican, tyin tatun cuñi ra naha cahan ra naha tsihin nyivi, cuví cahan ra naha.

<sup>16</sup>Tacan tan nduvita ra Pablo tan javaha ra iin seña tsihin ndaha ra tyin na cutaxin ñi. Tan catyí ra:

—Tyaa soho nyooho, ra ñuu Israel, tan nyooho nyivi tsa tyaa yahvi tsi Nyoo.

<sup>17</sup>Nyoo cuenda yo, tsa cuví yo nyivi Israel, nacatsj vaha ra tsi tsi tsaahnu yo. Tan quivi tsa iyó ca ra naha Egipto, javaha ra iin ñuu cahnú tsi ra naha. Vasu ñavin nyivi ñuu can cuví ra naha, maa tyin janducuahq ra tsi ra naha. Yaha can tan tava ra tsi ra naha ityi can tsihin tunyee iñi tsa iyó tsi ra.

<sup>18</sup>Tan cunyee iñi Nyoo tandihi cuhva tsiocoq ra naha nu tsicq nuu ra naha nu tsiqui tsitsi tsa uvi xico cuiya.

<sup>19</sup>Tan janaq ra utsa taahan ñuu nahnu tsa cayucú ñi cahnú Canaán, tyin tsahaq ra ñuhu can tsi tsi tsaahnu yo.

<sup>20</sup>Yaha can tan quitsaha ndacá ñaha juez tsi nyivi can jahq Nyoo. Tumaa cumi cientu sasava cuiya tsindaca ñaha juez tsi ñi, nda cuanda quivi tsindaca ñaha ra Samuel ra cuví ndusu yuhu Nyoo tsi ñi.

<sup>21</sup>Tacan tan maa ñi tsican ñi iin rey tsa cundaca ñaha tsi ñi. Tan Nyoo tsahaq ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindaca ñaha ra tsi ñi.

<sup>22</sup>Yaha can tan Nyoo tava ra tsi ra Saúl tsa cuví ra rey. Tan tsahaq ra tyiñu can tsi ra David. Tan catyí ra: “Nyehe yu tyin ra David, sehe ra Isaí, cuví ra iin rayi tsa taahán iñi yu cuhva iyó. Tan cua javaha ra tandihi tsa cuñi yu” catyí Nyoo tuhun ra David.

<sup>23</sup>Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsj tsi ra tyin jacacu ra tsi yo tsa cuví yo nyivi Israel, tumaa catyí ra tsihin tsi tsaahnu yo tahañ tsanaha.

<sup>24</sup>Tan ndi cumañi ca quitsi ra Jesús, ra Juan, ra jacoondutya tsi nyivi, cahan ra tsihin tandihi nyivi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutya ñi.

<sup>25</sup> Tan tsa cua ndihí tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahví nyaá yu tan tava yu itsi. Tyin cahnu xaan ra cuví ra”, catyí ra Juan.

<sup>26</sup> Tan caahán ca ra Pablo tan catyí ra:

—Yañi, nyooho nyivi tata ra Abraham tan tandihí inga ndo tsa tyaá yahví tsi Nyoo. Tsa cuenda nyooho cuví tuhun ihya tyin jacuahá Nyoo tsi yo nácaa cacu yo.

<sup>27</sup> Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñí iñi ñi tuhun tsa tyaá ra cuví ndusu yuhu Nyoo tahān tsanaha, vasu jacuahá xaan ñi tuhun can tandihí quivi tsa quitatu ñi, maa tyin ña cutuñí iñi ñi. Tan quivi tsaññi ñi tsi ra Jesús cuví tsi tumaa cuhva catyí ra cuví ndusu yuhu Nyoo.

<sup>28</sup> Tyin vasu nduve cuatyí ra Jesús nañihí ñi, maa tyin tsicān ñi tsi ra Pilato na tyihí ra tyiñu tyin cahñi ra naha tsi ra Jesús.

<sup>29</sup> Tan tsa yahā janyehe ñi tundoho tsi ra tumaa catyí maa tuhun ra nu libru, tan tsihí ra. Tacan tan januu ñi tsi ra nu cruu. Tan tsicutsí ñi tsi ra.

<sup>30</sup> Maa tyin Nyoo janandotó ra tsi ra inga tsaha.

<sup>31</sup> Tan tsitsi tsa cuaha quivi tan quituví ra nuu ra tsa cuahán tsihin ra quivi quita ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin.

<sup>32</sup> Tan yacan cuenda nyuhu caahán ndi tuhun vaha tsa catyí Nyoo tsihin tsiit saahnu yo tyin cuhva ra tsi yo.

<sup>33</sup> Tyin tsa cuenda tsa vaha tsi maa yo tsa cuví yo nyivi tata ñi, javahā maa Nyoo tsa catyí ra. Tyin janandotó ra tsi ra Jesús tumaa cuhva nyaá nu tsinu uvi salmo nu catyí ra tyeheh: “Sehe yu cuví tsi un, tan yuhu tsahá yu ñayivi coo un vityin” catyí Nyoo tsihin ra.

<sup>34</sup> Nyoo tyaá ra cuhva tyin janandoto ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahān yu tsihin ra David tyin cua cuhva yu tsi ndo.”

<sup>35</sup> Yacan cuenda catyí tucu nu inga salmo tyeheh. “Ña cua cuhva un tsa tyahyu cuñu ñuhu Sehe ii un” catyí tsi.

<sup>36</sup> Ra David jahā tyiñu ra tsa cuenda nyivi tsa tsicoq quivi tsicoq ra, tandihí tsa catyí Nyoo tsihin ra tyin javaha ra, javahā ra. Yahā can tan tsihí ra tan tsicutsí ñi tsi ra tumaa tsicutsí ñi tsi jutu ra. Tan tyahyu cuñu ñuhu ra.

<sup>37</sup> Maa tyin ra tsa janandotó Nyoo, ña tyahyu cuñu ñuhu ra.

<sup>38</sup> Yañi, cuñí tsi tsa coto ndo tyin tsa cuenda cuatyí yo tan quitsí ra Jesús tan tsihí ra tyin jahá ra tucahnu iñi cuatyí yo.

<sup>39</sup> Tan tsa cuenda ra Jesús jahá Nyoo tucahnu iñi tsi tandihí ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo.

<sup>40</sup> Jahā ndo cuenda coto ndoo tsa tyaá ra cuví ndusu yuhu Nyoo siqui ndo. Tyin catyí ra naha tyeheh:

<sup>41</sup> Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quivi tsa iyó ndo vityin.

Maa tyin ña cua tsinu iñi ndo tandihí tsa javahá yuhu vasu nacatyí tuhun nyivi tsihin ndo, catyí Nyoo.

<sup>42</sup> Ndhí cahān ra Pablo tan quita ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsahā catyí ñi tsihin ra, tyin na cahān nyico ra tuhun can tsihin ñi inga vitya quivi tsa quitatú ñi.

<sup>43</sup> Cuhva tsa ndihí ndu iñ ñi, cuaha xaan nyivi Israel tan nyivi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cuhān ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

<sup>44</sup> Tsa inga vitya quivi quitatú ñi, ndu iñ nyico ñi. Tan tsa yatyin tandihí ña maa nyivi ñuu can ndu iñ tsihin ñi tan tyaá soho ñi tuhun Nyoo.

<sup>45</sup> Maa tyin cuhva tsa nyehe ra Israel naha ra, cuxaán ra naha tyin nyehe ra naha tyin cuaha nyivi nyicun tsi ra hermano can naha ra. Tan quitsahā caahán ra naha tsi ra Pablo, tan cahān ra naha ndavaha ñi siqui ra.

<sup>46</sup> Maa tyin ra Pablo tan tsihin ra Bernabé ña yuuhví maa ra naha tan quitsahā caahán ñihí ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyivi Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayivi nyito tsa ña cua naa maa tsi ndo. Yacan cuenda cua cuhān ndi cucahan ndi tsihin nyivi tsa ñavin nyivi Israel cuví.

<sup>47</sup> Tyin tacan catyí Jutu Mañi yo tsihin ndi tan catyí ra tyeheh:

Tyaá yu tsi un tumaa iin ñuhu tsa jandunditsín nu iyó nyivi nanií cahnu nu ñuhu ñayivi.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

<sup>48</sup> Tsa tsiñi ra tsa ñavin ra Israel cuví naha ra, sií xaan cuñí ra naha. Tan quitsahā catyí ra naha tyin tuhun Nyoo vaha xaan tsi.

Tan natsinü iñi tandihí nyivi tsa nacatsj maa Nyoo, tyin coo ñi ñayivi nyito tsa ña cua naa maa.

<sup>49</sup> Tacan tan nducuahá ca tuhun Nyoo tandihí ityi ñuu can.

<sup>50</sup> Maa tyin ra Israel cahan ra naha tsihin juhva ñaha cuca tsa nyicún ley Nyoo tsa tyaa ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsahá nyaá ndaha nyivi tsi ra Pablo tan ra Bernabé, nda cuanda tsa tavá ñi tsi ra naha ñuu can.

<sup>51</sup> Tacan tan naquisi ra naha nyaca tsaha ra naha tumaa iin seña tyin ndoo cuatyí nyivi can siqui maa ñi. Tan cuahán ra naha ñuu Iconio.

<sup>52</sup> Maa tyin ñi yihí cuenda ra Cristo ñuu Antioquia can sñi xaan cuñí ñi. Tan tsitú ñi tsihin Tatyí Ii Nyoo.

## 14

*Nu nyii ra Pablo tan ra Bernabé ñuu Iconio*

<sup>1</sup> Ra Pablo tan ra Bernabé yucú ra naha ñuu Iconio. Tan quihví ra naha tsitsi vehe ñuhu nyivi Israel. Tan vaha xaan cahan ra naha tuhun Nyoo tsihin nyivi can. Tan cuaha xaan ñi natsinü iñi ñi tsi ra Cristo, nyivi Israel tan nyivi tsa ñavin nyivi Israel cuví.

<sup>2</sup> Maa tyin ra Israel tsa ña tsinú iñi tsi ra Cristo natyuhü ra naha tsi nyivi tsa ñavin nyivi Israel cuví tyin na caca ña vaha iñi ñi nyehé ñi tsi ra yihí cuenda ra Cristo.

<sup>3</sup> Yacan cuenda ra Pablo tan ra Bernabé ndoo ra naha ican cuaha quivi. Tan tsihin tsa ñi iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsahá Jutu Mañi yo tunyee iñi tsi ra naha tyin javaha ra naha seña tan tsa iyo na coto nyivi tyin nditsa tsa caahán ra naha.

<sup>4</sup> Maa tyin nyivi ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tavá tyiñu ra Jesús.

<sup>5</sup> Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tavá tyiñu ra Jesús, tan cua cañi ra naha yuu tsi ra naha.

<sup>6</sup> Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Lистра, tan nda ñuu Derbe ityi Licaonia. Tan tsicá nuu ra naha ityi ñuu can.

<sup>7</sup> Tan cahan nyico tucu ra naha tuhun Nyoo nácaa jacacú ra tsi yo.

*Nu cañi nyivi yuu tsi ra Pablo nda ñuu Lистра*

<sup>8</sup> Nda Lистра iyó iin rayi tsa coxo tyin nda quivi cacú ra tan ña cuví caca ra, tyin pehe nduvi taahan tsaha ra.

<sup>9</sup> Tan ra pehe tsaha can tyaá soho ra tsa caahán ra Pablo. Tan ra Pablo, tuví iñi ra tyin tsinú iñi ra can tyin cuví nduvaha ra.

<sup>10</sup> Tacan tan ra Pablo caahán ra tsihin tsa ñihi ndusu ra, tan catyí ra:

—Ndúvita tan cunyaa nyityi un —catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsahá tsicá ra.

<sup>11</sup> Tsa nyehé nyivi tyin javahá ra Pablo tacan, quitsahá caná tsa ñi tsihin yuhu Licaonia, tan catyí ñi:

—Ra tsa tsaá nu yucú yo ihya, nyoo cuví ra naha, maa tyin tumaa caá rayi, caá ra naha —catyí ñi.

<sup>12</sup> Tan catyí ñi tyin ra Bernabé cuví ra nyoo tsa nañí Júpiter, tan ra Pablo cuví nyoo tsa nañí Mercurio, tyin ra ican cuví ra tsa caahán.

<sup>13</sup> Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter. Tan quitsj ndaca ra indiqui tan ita tyin maa ra tan nyivi cuñí ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñí ñi tyin nyoo cuví ra naha.

<sup>14</sup> Maa tyin cuhva tsa tuví iñi ra naha tsa tsicá iñi ñi, quitsahá tsaahnyá ra naha jahma ra naha. Tan javahá ra naha tacan tumaa iin seña tyin ña ndoo ra naha vaha. Tan quihví ra naha tyañu nu tuvi nyivi, tan caná tsa ra naha,

<sup>15</sup> Tan catyí ra naha:

—Nyooho tata, ¿nácaa tsa javahá ndo tyehen? Nyuhu juvin ñi rayi ñuu ñayivi ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tyehen tyin ña tsiñí ñuhu yacan tsi ndo, tan na cunyicun ndo tsi Nyoo nyito. Juvín ra tsa javahá andivi tan ñuhu ñayivi. Tan javahá ra ndutyá ñuhu tan tandihí maa tsa iyó tsitsi ndutyá ñuhu can.

<sup>16</sup> Tan tahán tsanaha nda cuanda vityin, Nyoo jañá ndaha ra tsi nyivi na javaha maa ñi cuhva cuñí ñi,

<sup>17</sup> vasu tandihí quivi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsí yo quivi taahán tsi. Tan tsahá ra tsa catsi yo. Tan tsahá ra tsa cusí cuñí yo —catyí ra naha tsihin nyivi can.

<sup>18</sup> Maa tyin vasu catyí ra naha tacan, yñi xaan tan tyasj ra naha tsa cahñi ñi indiqui can, tyin cuñí ñi jacahnu ñi tsi ra naha tsihin can.

<sup>19</sup> Tacan tan tsaq juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhú ra naha tsi nyívi, na cañi ñi yuu tsi ra Pablo. Tan tacan javahá ñi, tan cuñi maa ñi tyin tsa tsihí ra. Tacan tan ixta caa ñi tsi ra tan tsindaca ñi tsi ra nda yuhu ñuu.

<sup>20</sup> Maa tyin ndu iin ra yihí cuenda ra Cristo nu canyíi ra Pablo. Tan nduvitá nyico ra. Tan quihví nyico ra inga tsaha tsitsi ñuu can. Tan tsa inga quívi can cuahán ra ñuu tsa nañi Derbe tan cuahán ra Bernabé tsihin ra.

<sup>21</sup> Tan cahan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyívi nacuhvá ñi tsi ñi tsi Nyoo. Yahá can tan cuanuhú ra naha ityi quítsj ra naha. Tan yahá nyico ra naha ñuu Listra tan ñuu Iconio inga tsaha, tan tsaq nyico ra naha nda ñuu Antioquía.

<sup>22</sup> Tan tandihí ñuu can jandu iin ra naha iñi nyívi tsa yihí cuenda ra Cristo. Tan catyí ra naha tsihin ñi na cuhun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñi yo tsa cundaca ñaha Nyoo tsi yo, cuñi tsi tsa nyehe yo tundoho.

<sup>23</sup> Tan natyisq ra naha tsi ra cua cuvi ityi nuu tsihin nyívi tsa yihí cuenda ra Cristo tan iin tan iin vehe ñuhu. Tan tsicoq nyitya ra naha tan tsicān tahvi ra naha tsi Nyoo tsa cuenda ra tsa cua cuvi ityi nuu tsihin nyívi vehe ñuhu can naha ra. Yahá can tan catyí ra Pablo naha ra tsihin ra cuvi ityi nuu vehe ñuhu can naha ra:

—Tsjnu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

*Nu cuanuhú nyico ra Pablo tan ra Bernabé ñuu Antioquía ityi Siria*

<sup>24</sup> Yahá can tan yahá ra Pablo tsihin ra Bernabé ñuu tsa cayucú Pisidia, tan tsaq ra naha nda cuanda Panfilia.

<sup>25</sup> Cahan ra naha tuhun Nyoo ñuu Perge. Yahá can tan tsañān ra naha ñuu Atalia.

<sup>26</sup> Ican quihví ra naha tsitsi iin yutun ndoo tan cuanuhú ra naha nda ñuu Antioquía. Ican cuvi ñuu nu natyisq ñi tsi ra naha tyin cua javaha ra naha tyiñu Nyoo, tan vityin tsa tsaq nuhu ra naha.

<sup>27</sup> Tsa tsaq nyico ra naha ñuu Antioquía jandu iin ra naha tsi nyívi yihí cuenda ra Cristo. Tan nacatyí tuhun ra naha tsihin ñi tandihí tsa javahá Nyoo tsihin ra naha, tan nácaa nuñā Jutu Mañi yo ityi tyin tsinú tucu iñi ñi tsa ñavin nyívi Israel cuvi.

<sup>28</sup> Tan naha xaan ndoq ra Pablo tan ra Bernabé tsihin ñi yihí cuenda ra Cristo ñuu can.

## 15

*Nujandaaq ra tava tyiñu ra Jesús tyiñu nda ñuu Jerusalén*

<sup>1</sup> Ndi nyíi ca ra Pablo tan ra Bernabé ñuu Antioquía, tan tsaq taahan ra naha quee ra naha nda Judea. Tan quitsahá jacuahá ra naha tsi ra yihí cuenda ra Cristo. Tan catyí ra naha tyin cuñi tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha.

<sup>2-3</sup> Tan ñihi xaan cahan yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyisq ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cuhun ra naha ñuu Jerusalén, cujandaa ra tyiñu can tsihin ra tava tyiñu ra Jesús tan tsihin ra cuvi ityi nuu tsihin nyívi vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yahá ra naha ityi Fenicia tan Samaria. Tan nacatyí tuhun ra naha tsihin nyívi yihí cuenda ra Cristo nácaa jañā nyívi tsa ñavin nyívi Israel cuvi tuhun tsañnu tsa tsinú iñi ñi, tyin nacuhvá cuenda ñi tsi ñi tsi Nyoo. Tan tandihí ra hermano sii xaan cuñi ra naha tsa tsitq ra naha yacan.

<sup>4</sup> Quívi tsaq ra Pablo tan ra Bernabé ñuu Jerusalén, cuahán ra naha nu ndu iin nyívi yihí cuenda ra Cristo. Tan tandihí ñi tan ra cuvi ityi nuu tsihin ñi, tan tsihin ra tava tyiñu ra Jesús, tsañā ñi yaha ra naha tyin nacatyí tuhun ra naha tsa javahá Nyoo tsihin ra naha.

<sup>5</sup> Maa tyin juhva ra fariseo tsa tsinú iñi tsi ra Cristo, nduvitá ra naha tan catyí ra naha:

—Tandihí ra tsa ñavin ra Israel cuvi tan tsinú iñi ra naha tsi ra Jesús, cuñi tsi tsa cunyaa tuñi Nyoo tsi ra naha. Tan cuñi tucu tsi tsa javaha ra naha cuhva catyí ley Nyoo tsa tyaaq ra Moisés —catyí ra naha.

<sup>6</sup> Tacan tan ndu iin ra cuvi ityi nuu tsihin ñi yihí cuenda ra Cristo tan ra tava tyiñu ra Jesús tyin natuhun tahan ra naha tuhun can.

<sup>7</sup> Tsa yahá tsa cahan yuhu xaan ra naha, tan nduvitá ra Pedro, tan catyí ra:

—Yañi, tsitq ndo tyin tsitsi tsa tandihí yo, nacatsj Nyoo tsi yuhu ra ndaahvi quívi can, tyin cahan yu tuhun ra tsa jacacú tsi yo tsihin nyívi tsa ñavin nyívi Israel cuvi, tan na tsinu iñi ñi tsi Jutu Mañi yo.

<sup>8</sup> Tan Nyoo, ra tsitq añima tandihí nyívi, janahá ra tsi yo tyin cuñi ra tsi ñi ican. Yacan cuenda tsañā ra Tatyí Ii ra tsi ñi, tumaa tsa naquihñ tucu maa yo Tatyí Ii ra tahañ tsanaha.

<sup>9</sup> Nyoo inducu ñi cuñi ra tsi nyívi. Yacan cuenda ña tyaa tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo.

<sup>10</sup> Vityin ¿nacuenda ña tsinú iñi ndo tsa javahā Nyoo tsihin ñi can? Tyin ña vaha tsa tyisó yo ley Nyoo tsa tyaa ra Moisés siqui ñi. Tyin ndi maa tsi tsaahnu yo tan ndi maa yo tan ña cuvī naquihin vaha yo ley can.

<sup>11</sup> Ñavin tacan cacū yo. Yoo tsitó yo tyin cacū yo tsihin tumañi iñi tsa javahā Jutu Mañi yo ra Jesús tsihin yo. Tan tacan tucu ñi can —catyí ra Pedro tsihin tandihi ra can naha ra.

<sup>12</sup> Tacan tan taxin ñi cuvī tandihi ra naha. Tan tyaa soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javahā Nyoo nu cahān ra naha tuhun ra nu yucú nyivi tsa ñavin nyivi Israel cuvī.

<sup>13</sup> Tsa ndihī cahān ra naha, quitsahā caahán ra Jacobo, tan catyí ra:

—Nyooho yañi, tyaa soho ndo tsa cua cahan yu tsihin ndo.

<sup>14</sup> Tsa catyí tuhun ra Simón Pedro tsihin yo nácaa quitsahā tsahá Nyoo tumañi iñi tsi ñi tsa ñavin nyivi Israel cuvī. Tyin nacatsi tucu ra tsi juhva ñi tyin cuvī ñi nyivi cuenda ra.

<sup>15</sup> Tan ndu ijin tuhun ihya tsihin tuhun tsa cahān ra cuvī ndusu yuhu Nyoo tahān tsanaha, tumaa cuhva nyaá maa nu tutu Nyoo nu catyí ra:

<sup>16</sup> Yahā tandihi tuhun ihya tan cua quitsi nyico yu nu yucú ndo.

Quivi tsa tsicoq ra David, vaha xaan jacahnū nyivi tsi yu.

Maa tyin yahā can jandihī nyivi tsa jacahnū ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David.

Tyin cua jacahnū nyico nyivi tsi yu.

<sup>17</sup> Tyin tacan tan cuvī nanducu tandihi inga ca nyivi tsi yu,

tandihī ñi tsa ñavin nyivi Israel cuvī tan tsinú iñi tsi yu.

<sup>18</sup> Tacan catyí Jutu Mañi yo, tan jacuahā ra tuhun ihya tsi nyivi tsicoq tahān tsanaha tan tsihin nyivi tsa iyó vityin.

<sup>19</sup> Yacan cuenda catyí yu tyin ña vaha tsa jatyañu yo tsi nyivi tsa ñavin nyivi Israel cuvī, ñi tsa nacoq tuhun tsahnu ñi tan quihvī ñi cuenda ra Cristo. Ña vaha catyí yo tyin cuñi tsi tsa tyaa yahvi ñi ley tsahnu yo.

<sup>20</sup> Vaha ñi maa tsihin tsa jacuhun yo carta tsi ñi. Tan catyí yo tsihin ñi tyin ña cua catsi ñi cuñu tsa tsahā cuenda nyivi tsi tsitoho. Tan ña cuvī coo rayi tsihin ñaha tun ña tindaha ra. Tan ndi ñiñaha ña cuvī coo ñi tsihin rayi tun ña tindaha ñi. Rayi tsa iyó ñasiñi ña cuvī coo ra tsihin inga ñaha, tacan tucu ñiñaha tsa iyó yii, ña cuvī coo ñi tsihin inga rayi. Tan catyí tucu yo tsihin ñi quihvī cuenda ra Cristo tan ñavin nyivi Israel cuvī ñi tyin ña cua catsi ñi cuñu quiti tsa tsihī tsa

cava ñi jucun tatun ña tsatī niñi ti. Tan ña cua catsi ñi niñi quiti.

<sup>21</sup> Tyin nda tyembu tsahnu tan nda cuanda vityin iyó maa ra jacuahā ley Nyoo tsa tyaa ra Moisés vehe ñuhu nyivi Israel. Tan jacuahā ra naha tuhun can tan iin tan iin ñuu, tan tahan tahan una quivi, quivi tsa quitatú ñi —catyí ra Jacobo tsihin ra naha.

<sup>22</sup> Tacan tan ra tava tyiñu ra Jesús tan ra cuvī ityí nuu tsihin ñi vehe ñuhu tsihin tandihī ñi yihī cuenda ra Cristo, nacatsi ñi tsi taahan ra naha. Tan yahā can tan jacuhun ñi tsi ra naha tyin cuhan ra naha ñuu Antioquia tsihin ra Pablo tan ra Bernabé. Tan ra tsa natyisó ñi cuvī ra: Judas tsa nañi Barsabás, tan ra Silas. Ra ican cuvī iin ra tsa nyisó tyiñu vehe ñuhu nda ñuu Jerusalén.

<sup>23</sup> Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuvī ityí nuu tsihin ñi vehe ñuhu tan tsihin ra yañi ndo cuenda ra Cristo, tandihī ndi tsahá ndi nacumi tsi nyooho tsa ñavin ra Israel cuvī ndo. Tyin yañi ndi cuvī tsi ndo vasu ñavin nyivi Israel cuvī ndo. Tandihī nyooho tsa iyó ndo ñuu Antioquia, tan nyooho nyivi Siria, tan tsihin nyooho nyivi Cilicia, jaquitsi ndi carta ihya tsi tandihī ñi ndo.

<sup>24</sup> Tsitó ndi tyin quita taahan ra ityí nu yucú ndi ihya. Tan vatsi ra naha nu yucú ndo. Maa tyin ña catyí nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyí ra naha tyin cuñi tsi tsa cunyya tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahān tsihin ra naha tyin quitsi cahān ra naha yacan tsihin ndo.

<sup>25</sup> Yacan cuenda ndu ijin ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo.

<sup>26</sup> Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñi nyivi cañi ñi tsi ra naha, maa tyin ña jandihī ra naha tsa jacotó ra naha tuhun Jutu Mañi yo ra Jesucristo.

<sup>27</sup> Yacan cuenda jaquitsi ndi tsi ra Judas tan ra Silas. Tan maa ra naha cua cahān ra naha tsihin yuhu ra naha tsihin ndo, tyin cua cuhva cuenda ra naha tandihī tsa tyaa ndi nu tutu ihya.

<sup>28</sup> Tyin ndi Tatyí li Nyoo tan ndi nyuhu ña cuñi ndi tyiso ndi tundoho siqui ndo. Maa tyin ñiñi ca cuñi tsi tsa naquihin vaha ndo tuhun ihya:

<sup>29</sup> Ña cua catsi ndo cuñu tsa tsahā cuenda nyivi tsi tsitoho. Tan ña cua catsi ndo niñi quiti, ndi cuñu quiti tsa tsihī tsa cava ñi jucun tan ña tsatī niñi ti. Ña caca nuu ndo



tsihin ñaha. Tan nyooho ñiñaha ña caca nuu ndo tsihin rayii. Tatu na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra naha nu carta can.

<sup>30</sup> Tan cuahán ra tsa jacuhun ra naha, tan tsaq ra naha ñuu Antioquia. Tan jandu iin ra naha tsi tandihi nyivi yihí cuenda ra Cristo tan nacuhva cuenda ra naha carta can.

<sup>31</sup> Tsa cahvi ñi carta can, sii xaan cuñi ñi tyin vaha xaan caahán tsi.

<sup>32</sup> Tan ra Judas tsihin ra Silas cuví tucu ra naha ndusu yuhu Nyoo. Tan jandu iin ra naha iñi nyivi can tsihin tsa cahán ra naha.

<sup>33</sup> Tan tsa yaha tsiyucu ra naha juhva quivi tan cuanuhu nyico ra naha nda nu yucú nyivi tsa jacuhun tsi ra naha. Tan tandihi nyivi yihí cuenda ra Cristo ñuu Antioquia can catyí ñi tyin na cuhun vaha ra naha.

<sup>34</sup> Maa tyin ra Silas catyí ra tyin cua ndoo ra.

<sup>35</sup> Tan ra Pablo tsihin ra Bernabé ndoo tucu ra naha ñuu Antioquia can. Tan maa ra naha tsihin inga ca ra jañihí ca ra naha cahán ra naha tuhun Jutu Mañi yo tsihin nyivi can tan jacuahá ra naha tsi ñi.

*Nu tsinu uvi tsa cuahán ra Pablo tuhun Nyoo, tan nu quitá tsiyo ra nuu ra Bernabé*

<sup>36</sup> Tan tsa yaha juhva quivi, tan cahán ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihi ñuu nu cahán yo tuhun ra, tyin nyehe yo nácaa yucú ñi —catyí ra Pablo tsihin ra.

<sup>37</sup> Tan ra Bernabé cuñi ra tsa cuhun nyico ra Juan Marcos tsihin ra naha.

<sup>38</sup> Maa tyin ra Pablo ña taahán iñi ra tsa cuhun ra Juan tsihin ra naha, tyin nacoq ihñi ra tsí ra naha nda Panfilia quivi tsa tsahán ra tsihin ra naha. Tan ña tsahán ca ra tsijaha tyiñu ra tsihin ra naha.

<sup>39</sup> Tan cahán yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihvi ra naha tsihi iin yutun ndoo tan cuahán ra naha ñuhu Chipre.

<sup>40</sup> Tan ra Pablo nacatsj ra tsi ra Silas. Tan tsa yaha tsican tahvi ra hermano naha ra tsi Nyoo tsa cuenda ra naha tyin na jatinyee Nyoo tsi ra naha, tacan tan cuahán ra naha.

<sup>41</sup> Tan yaha ra naha ñuu tsa cayucú Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

## 16

*Nu cuahán ra Timoteo tsihin ra Pablo tan ra Silas*

<sup>1</sup> Ra Pablo tsihin ra Silas tsaq ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañi ra Timoteo. Tan sihi ra cuví ña iin ñaha Israel. Tan yihí ndihi ña cuenda ra Cristo. Maa tyin jutu ra, ra Grecia cuví ra.

<sup>2</sup> Tan ra Timoteo vaha xaan tsi cá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio.

<sup>3</sup> Tan ra Pablo cuñi ra tsa cuhun ra Timoteo tsihin ra. Tan tyaaq ra naha tuñi Nyoo tsi ra Timoteo jahá ra Pablo. Tyin coto ndasi cuñi nyivi Israel nyehe ñi tsi ra. Tyin tandihi ñi tsító ñi tyin jutu ra cuví ra ra Grecia.

<sup>4</sup> Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahá ra tava tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha.

<sup>5</sup> Tacan tan ndu iin iñi nyivi yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

*Nu janaha Nyoo iin tsa janahaq ra tsi ra Pablo cuenda iin ra Macedonia*

<sup>6</sup> Na tsaha Tatyí Ii Nyoo tsa cahán ra naha tuhun Nyoo ñuu tsa cayucú Asia. Yacan cuenda yaha sava ra naha ñuhu cuenda Frigia tan Galacia.

<sup>7</sup> Tan tsaq ra naha Misia. Tan cuñi ra naha cuhun ra naha Bitinia, maa tyin Tatyí Ii ra Jesucristo ña tsaha cuhun ra naha.

<sup>8</sup> Tacan tan nda sava ñi yahaq ra naha ñuu tsa cayucú Misia tan cuahán ra naha ñuu Troas tsa canyií yuhu ndutya ñuhu.

<sup>9</sup> Tan yucú ra naha ñuu Troas can, tan iin tsacuaa nyeheq ra Pablo iin tsa nyeheq ra. Nyeheq ra tsi iin rayii tsa iyó iin ñuu tsa canyií Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Naha ihya, tyin jatinyee un tsi ndi” catyí ra.

<sup>10</sup> Tan tsa nyeheq ra Pablo can, yuhu ra Lucas tsihin ra Pablo tan inga ra janduvahaq ndi tsi ndi tan cuahán ndi nda Macedonia can. Tyin tsító vaha ndi tyin Nyoo cana ra tsi ndi, tyin cahán ndi tuhun ra nácaa jacacú ra tsi yo tsihin nyivi ityi can.

*Nu nyii ra Pablo tsihin ra Silas ñuu Filipos*

<sup>11</sup> Quihvi ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyií mahñu ndutya ñuhu. Tan tsa inga quivi tsaq ndi ñuu Neápolis.

<sup>12</sup> Tan ican quee ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa nuu tandihi ñuu tsa cayucú Macedonia. Tan ican tsiyucu ndi taahan quivi.

<sup>13</sup> Iin quivi tsa quitatú nyivi, tan quitá ndi ityi tsata ñuu, yatyin iin yutya nu tuhvá nyivi

tsicán tahvi tsi Nyoo. Tsinyecü ndi, tacan tan cahan ndi tuhun Nyoo tsihin ñiñaha tsa ndu iin ícan.

<sup>14</sup> Iin ñaha nañi ña Lidia. Tan ñuu ña cuvü Tiatira. Tan tuhvá ña xicó jahma vaha, tsa tunduuhva. Yacan cuvü tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñi ña tsa caahán ra Pablo. Tan Nyoo nuñá ra añaima ña na tyaa yahvi ña tsa caahán ra.

<sup>15</sup> Tan tsicoondutyá ña tsihin nyivi ña. Tan yahá can tan cahan ndaahvi ña tsihin ndi, tan catyí ña:

—Tatun nyehé ndo tyin nditsa tsa tsinú iñi yu tsi Jutu Mañi yo, cohon ndo, ndo ndo yuvehe yu —catyí ña tsihin ndi.

Tan jañiñi xaan ña tsi ndi na ndoo ndi yuvehe ña.

<sup>16</sup> Tan cuvü iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahañ ndi tsi iin ñaha tyuvaa tsa yihí tatyí ña vaha tsi. Yacan cuenda cuvü nacoto ña náa ndihi tsa cua cuvü ityi nuu. Tan iyó ra cuvü tsitoho ña. Tan cuaha xaan xuhun jahá canaa ña tsa cuenda ra naha, tyin cuvü nacotó ña.

<sup>17</sup> Tan ñaha tyuvaa can quitsaha nyicún ña tsi ndi, nyuhu tsihin ra Pablo. Tan caná tsaa ña tan catyí ña:

—Rayií ihya ra jahá tyiñu tyiñu Nyoo cahnu, cuvü ra naha. Tan caahán ra naha tuhun nácaa cuvü cacu yo —catyí ña.

<sup>18</sup> Cuaha quivi javahá ñaha tyuvaa can tacan. Tacan tan ra Pablo ña cunyeé ca iñi ra, tan nanyicó coo ra tan catyí ra tsihin tatyí ña vaha tsa yihí tsi ña:

—Tsihin sivi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quita nu tsi ña juvin ñi cuhva can.

<sup>19</sup> Maa tyin tsa nyehe ra cuvü tsitoho ña tyin ña cua cuvü ca jaha canaa ra naha xuhun tsihin ña, tiin ra naha tsi ra Pablo tsihin ra Silas tan tsindacá ra naha tsi ra naha nda vehe tyiñu.

<sup>20</sup> Tan tsicán ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyivi ñuu yo tan jativi ra naha ñuu yo.

<sup>21</sup> Tyin jacuahá ra naha iin cuhva tsa ña cuvü coo yo, ndi ña cuvü javahá yo tyin nyivi cuenda ñuu Roma cuvü yo —catyí ra naha.

<sup>22</sup> Tacan tan nduxaan nyivi tsi ra Pablo tan ra Silas. Tan ra cumí tyiñu can tsahnyá ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun.

<sup>23</sup> Tsa yahá tsa cañi xaan ra naha tsi ra Pablo tan ra Silas, tan tsindacá ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha.

<sup>24</sup> Quihñ ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaha ra naha tyañu vitu.

<sup>25</sup> Yahá can tan maa ñuu ra Pablo tan ra Silas quitsaha tsicán tahvi ra naha tsi Nyoo. Tan quitsaha tsitá xaan ra naha cantu Nyoo. Tan ra yucü vehe caa can naha ra tyaa soho ra naha.

<sup>26</sup> Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñá tandihi yuvehe, tan ndatsi cadena tsa yihí tsi tandihi ra tsa yucü vehe caa can naha ra.

<sup>27</sup> Tan tsa ndoto ra tsa jahá cuenda vehe caa can, nyehe ra tyin tichó tandihi maa yuvehe can. Tacan tan tava ra mityi ra tyin cua cahñi ra tsi ra. Tyin tsicá iñi maa ra tyin tandihi ra tsa yucü vehe caa can quita.

<sup>28</sup> Maa tyin ra Pablo caná tsaa ra tsi ra, tan catyí ra:

—Ña cahñi un tsi un, tyin tandihi ndi tan yucü ndi ihya —catyí ra tsihin ra.

<sup>29</sup> Tacan tan ra jahá cuenda vehe caa can tsicán ra ñuhu. Tan tsinu ra quihvi ra nu yucü ra naha. Tan ñihi ra tsihin tsa yuuhvi ra. Tan tsicuiñi tsiti ra nuu ra Pablo tan ra Silas.

<sup>30</sup> Numi xaan tava ra tsi ra naha nu yucü ra naha ícan. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

<sup>31</sup> Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihi nyivi un —catyí ra naha tsihin ra jahá cuenda vehe caa can.

<sup>32</sup> Tan cahan ra naha tuhun Jutu Mañi yo tsihin ra tan tsihin tandihi nyivi tsa yucü yuvehe ra.

<sup>33</sup> Tan juvin ñi maa tsacuaa can ra jahá cuenda vehe caa can nacatyá ra nu uhvi nu cañi ra vitya tsi ra naha. Yahá can tan juvin ñi tsacuaa can tsicoondutyá ra tsihin tandihi nyivi ra.

<sup>34</sup> Tacan tan tsindacá ra tsi ra naha nda vehe ra. Tan tsahá ra tsa catsi ra naha. Tan maa ra tsihin nyivi ra si xaan cuñi ñi tyin tsinú iñi ñi tsi Nyoo. Tacan tan cuanuhu ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

<sup>35</sup> Tsa tuvü inga quivi tan tava tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan

catyí ra naha tyin na jaña ra tsi ra Pablo tsihin ra Silas.

<sup>36</sup> Tacan tan ra jahá cuenda vehe caa can catyí ra tsihin ra Pablo:

—Tsaá tyiñu tsi yu jahá ra cumí tyiñu, tsa jaña yu tsi ndo. Yacan cuenda vityin tsa cuví quita ndo —catyí ra tsihin ra naha.

<sup>37</sup> Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyívi. Tan ndi ña tatsi tuñi ra naha tsi ndi tumaa cuhva taahán tsi. Tan tyihí ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

<sup>38</sup> Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhví xaan ra naha tsa tsito ra naha tyin ra cuenda ñuu Roma cuví ra Pablo.

<sup>39</sup> Tan tsahan ra cumí tyiñu naha ra tsindacan ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahví ra naha tsihin ra Pablo naha ra na quita ra naha ñuu can.

<sup>40</sup> Tan tsa quitá ra naha vehe caa can, tsahan ra naha vehe ña Lidia. Tan yaha can tan tsinyehe ra naha tsi ra hermano naha ra tan jandu iin ra naha iñi ra naha tan cuahán ra naha.

## 17

*Nu quitsahá caahán yuhu tahan nyívi ñuu Tesalónica*

<sup>1</sup> Nu cuahán ra Pablo tsihin ra Silas, yaha ra naha ñuu Anfípolis, tan ñuu Apolonia. Yaha can tan tsaá ra naha ñuu Tesalónica nu nyaá iin vehe ñuhu nyívi Israel.

<sup>2</sup> Tan tsahan ra Pablo vehe ñuhu can, tumaa cuhva tuhvá maa ra tsahán tan iin tan iin ñuu. Tan cahan ra tuhun Nyoo tsihin nyívi tsicá vehe ñuhu can uñi taahan quívi quitatú ñi.

<sup>3</sup> Tan cahví ra nu libru Nyoo tan tsaha cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yaha can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

<sup>4</sup> Tan juhva nyívi Israel can tsinu iñi ñi tsa caahán ra. Tan ndu iin ñi tsihin ra naha. Tan cuaha xaan nyívi Grecia tsa tuhvá jacahnú tsi Nyoo tan natsinu ndihí iñi ñi. Tan cuaha ñiñaha cuca tsa iyó ñuu can natsinu ndihí iñi ñi tsa caahán ra tuhun ra Cristo.

<sup>5</sup> Maa tyin ra ñuu Israel tsa ña tsinú iñi, ndasi cuñi ra naha nyehé ra naha tyin cuaha xaan nyívi nyicún tsi ra Pablo. Tan jandu iin ra naha tsi taahan ra caquiñi tsa tsicá nuu jutsan ñi maa. Tan quitsahá caahán yuhu

tahan nyívi ñuu can jahá ra naha. Tan quihví ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñi ra naha tsa quita ra Pablo naha ra. Tyin ra caquiñi can cuñi ra naha nacuhva cuenda ra naha tsi ra Pablo naha ra tsi nyívi.

<sup>6</sup> Maa tyin tsa ña nañihí ra naha tsi ra Pablo tan ra Silas ican, quihín ra naha tsi ra Jasón. Tan ixtá caa ra naha tsi ra. Tan quihín ndihí ra naha tsi taahan ca ra hermano tan cuahán ra naha nuu ra cumí tyiñu ñuu can. Tan caná tsaá ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihí nyívi nanií cahnu ñuhu ñayivi. Tan vityin tsaá ndihí tucu ra naha ihya.

<sup>7</sup> Tan ra Jasón can tsahá ra yuvehe ra na cuyucu ra naha. Tan tandihí maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañi Jesús —catyí ra naha.

<sup>8</sup> Tsa tsiñi nyívi tan ra cumí tyiñu tsa caahán ra caquiñi can naha ra quitsahá caahán yuhu tahan ñi.

<sup>9</sup> Maa tyin ra Jasón tan inga ra naha tsahá ra naha xuhun tan jaña ra cumí tyiñu tsi ra naha.

*Nu cuahán ra Pablo tsihin ra Silas ñuu Berea*

<sup>10</sup> Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaá ra naha, tsahan ra naha vehe ñuhu nyívi Israel.

<sup>11</sup> Tan nyívi Israel tsa iyó ñuu Berea can vaha ca nyívi cuví ñi tan ñavin ca nyívi ñuu Tesalónica tyin tsihin tsa ñi iñi ñi tan naquihín ñi tuhun Nyoo. Tan tandihí quívi nanducú ñi nuu tutu Nyoo, nyehé ñi tatun nditsa tsa caahán ra Pablo.

<sup>12</sup> Yacan cuenda cuaha xaan ñi natsinu iñi ñi tsi ra Cristo tsihin tucu nyívi Grecia tahan ñi ñiñaha cuca tan rayi naha ra.

<sup>13</sup> Maa tyin tsa tsito ra Israel tsa iyó ñuu Tesalónica tyin ra Pablo nyíi ra Berea caahán ra tuhun Nyoo, tan cuahán ra naha tan natyuhu ra naha tsi nyívi Berea can.

<sup>14</sup> Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndog ra naha ñuu Berea.

<sup>15</sup> Tan ra tsa cuahán tsihin ra Pablo tsindaca ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahan ra Pablo tsihin ra naha, tyin na janumi ra naha tan cuhun ra naha nu nyíi ra.

*Nu nyíi ra Pablo ñuu Atenas*

<sup>16</sup> Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima

ra tsa nyehé ra tyin cuaha xaan tsitoho iyó ñuu can.

<sup>17</sup> Yacan cuenda cahán ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihí quiví caahán ra tsihin nyiví tsa cuahán nuyahvi.

<sup>18</sup> Tan ñihí tahan ra tsihin nyiví tsa cahví tuhun tsa jacuahá nyiví tsa nañí epicúreo. Tan ñihí tahan tucu ra tsihin nyiví tsa cahví tuhun tsa jacuahá nyiví tsa nañí estoico. Tan cahán ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahán ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahán ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyiví tatun cua cúu ñi.

<sup>19</sup> Tacan tan tsindaca ra naha tsi ra Pablo iin nu nañí Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñí ndi coto ndi tuhun tsa tsa jacuahá un.

<sup>20</sup> Tyin jacotó un tuhun tsa ña tsitó ndi. Tan cuñí tucu ndi coto ndi náa cuñí tsi catyí tandihí tuhun ihya —catyí ra naha tsihin ra.

<sup>21</sup> Tyin tandihí nyiví Atenas tan nyiví inga ñuu tsa iyó ican taahán xaan iñi ñi tyaa soho ñi tan nacatyí tuhun ñi náa ndihí tuhun tsa.

<sup>22</sup> Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo.

<sup>23</sup> Tyin tsahan yu tsinyehé yu nu tuhvá ndo ndu iin. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo.

<sup>24</sup> Nyoo tsa javahá ñuhu ñayiví tan tandihí tsa iyó nu ñuhu ñayiví ihya, tsii maa ra cuví andiví tan ñuhu ñayiví. Tan ña iyó ra tsitsi vehe ñuhu tsa javahá nyiví.

<sup>25</sup> Tan ña nyitá iñi ra tsa jatyinyeé nyiví tsi ra. Tyin maa ra tsahá ñayiví coo tandihí yo. Tan tsahá ra tatyí tsa ixtá tatyí yo. Tan maa ra tsahá tandihí tsa tsiñí ñuhu tsi yo.

<sup>26</sup> Javahá Nyoo tsi intuhun rayií. Tan tsa yahá can tsicoq cuaha nyiví tata ra. Tan maa ra naha cuví tsii tsaahnu tandihí yo. Yacan cuenda intuhun ñi niñi nyisó tandihí yo. Tan tsahá Nyoo tsa coo yo nanií cahnú ñuhu ñayiví. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayiví ihya. Tan catyí tucu ra maa nda cua coo intuhun intuhun yo.

<sup>27</sup> Tacan javahá ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihí yo tsi ra tyaa ra cuhva. Vasu ndi maa ña cañi nyaá ra tsihin intuhun intuhun yo.

<sup>28</sup> Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra.

<sup>29</sup> Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinú tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinú tsihin tsa tsiñituñi iñi nyiví cuví ra.

<sup>30</sup> Tahan tsanaha Nyoo ña cuxaqañ ra tsi nyiví tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyiví tandihí ñi ityi tyin na ndu uvi iñi ñi cuatyí ñi tan na nasama ñi cuhva iyó ñi.

<sup>31</sup> Tyin tsa tyaa ra cuhva tyin cua coo iin quiví tsa cua tatsi tuñi ra tsi nyiví iyó nu ñuhu ñayiví. Tan tsa cua tsa quiví can, ra tsa nacatsj vaha maa ra cua tatsi tuñi tsi ñi jaha ra. Tan tsa janahá ra tsi yo tyin nditsa tsa ra ihya cua tatsi tuñi tsi nyiví, tyin janandoto ra tsi ra can nu tsihj ra —catyí ra Pablo.

<sup>32</sup> Tsa tsiñi nyiví tuhun tsa nandotó nyiví tsa tsihj, yihí ñi tsacú nducu ñi, tan yihí tucu nyiví catyí ñi:

—Quitsi un inga tsaha tan cahán un tuhun ihya tsihin ndi —catyí ñi.

<sup>33</sup> Tacan tan cuahán ra Pablo.

<sup>34</sup> Maa tyin yihí ñi ndu iin ñi tsihin ra, tan natsinú iñi ñi tsi ra Cristo. Tan iin ra tsa natsinú iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinú ndihí tucu iñi ña, tan tsihin inga ca ñi.

## 18

### *Nu nyii ra Pablo ñuu Corinto*

<sup>1</sup> Yahá can tan quita ra Pablo ñuu Atenas tan cuahán ra ñuu Corinto.

<sup>2</sup> Tan ican nañihí ra tsi iin ra Israel tsa nañi Aquila. Tan ñuu Ponto cacú ra. Tan maa ra tsihin ñasihí ra, ña Priscila, quita ñi Italia nu tsicoq ñi, tyin ra Claudio, ra cuví rey cahnú ñuhu can, tava ra tsi tandihí nyiví Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto.

<sup>3</sup> Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi.

<sup>4</sup> Tan quiví quitatú nyiví Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyiví Israel tan tsihin nyiví tsa ñavin nyiví Israel cuví. Tyin nducú ra cuhva tsa tsinu iñi ñi tsi ra Jesucristo.

<sup>5</sup> Tan quivi tsaꜥ ra Silas tan ra Timoteo tsa quee ra naha Macedonia, ra Pablo nacoꝝ ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvin ra cuví ra Jesús.

<sup>6</sup> Maa tyin ñi ican xaan cuñi ñi. Tan quit-saha caahán ñi ndavaha ñi siqui Jutu Mañi yo. Tacan tan ra Pablo naquisꝝ ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñꝝ iñi. Vitin tan ityi nuu ca cua cuhun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

<sup>7</sup> Tan quitꝝ ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra.

<sup>8</sup> Tan iin ra tsa nañi Crispo, ra cuví ityi nu vehe ñuhu can, natsinꝝ iñi ra tsi Jutu Mañi yo tan tacan tucu tandihí nyivi ra. Tan cuaha ca nyivi iyó ñuu Corinto can, tsa yaha tsa tsiñꝝ ñi tsa caahán ra Pablo, natsinꝝ iñi ñi tsi ra Jesús, tan tsicoondutyꝝ ñi.

<sup>9</sup> Tacan tan iin tsacuaa nyehe ra Pablo iin tsa janaha Nyoo tsi ra. Tan cahan Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandihí un tsa cahan un.

<sup>10</sup> Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

<sup>11</sup> Yacan cuenda ra Pablo ndooꝝ ra iin cuiya sasava ñuu Corinto can, jacuahá ra tuhun Nyoo tsi nyivi.

<sup>12</sup> Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsican ra naha cuatyí tsaha ra nuu ra Galión.

<sup>13</sup> Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

<sup>14</sup> Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyi cuví.

<sup>15</sup> Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya —catyí ra Galión can tsihin ra naha.

<sup>16</sup> Tan tavaꝝ ra tsi ra Israel naha ra nu cuví vehe tyiñu ra.

<sup>17</sup> Tacan tan tandihí ra Grecia tin ra naha tsi ra Sóstenes, ra cuví ityi nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ñi cahan maa ra.

*Nu cuanuhú ra Pablo ñuu Antioquia tan cuahán ra tsa tsinu uñi tsaha cua cahan ra tuhun Nyoo*

<sup>18</sup> Tan ra Pablo ndooꝝ ra ñuu Corinto can cuaha quivi. Yaha can tan catyí ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaꜥ ñi ñuu Cenchrea. Tan ra Pablo xatyꝝ ndi ra jiñi ra tumaa iin seña tyin tsa yaha javahá ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria.

<sup>19</sup> Tan tsa tsaꜥ yutun ndoo can nda ñuu Éfeso, quitꝝ ñi. Tan ra Aquila tsihin ña Priscila ndooꝝ ñi ican. Tan ra Pablo cuahán ra vehe ñuhu nyivi Israel, tan cahan ra tsihin nyivi tsa ndu iin can.

<sup>20</sup> Tan cahan ndaahvi ñi tsihin ra tyin na ndooꝝ ra taahan ca quivi tsihin ñi. Maa tyin ña cuñi ra.

<sup>21</sup> Tan catyí ra tsihin ñi tyin tsa cuahán ra, tan catyí tucu ra tyehen:

—Cuñi tsi tsa cuhun yu ñuu Jerusalén tyin jacahnu yu vico tsa vatsi tahan. Maa tyin tatun Nyoo cuñi, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihvi ra tsitsi iin yutun ndoo tsa cuahán nda Siria.

<sup>22</sup> Quivi tsa tsaꜥ nyico ra ñuu Cesarea cuenda Siria, tsahan ra ñuu Jerusalén tsihuhva ra nacumi tsi nyivi yihí cuenda ra Cristo tsa iyó ican. Yaha can tan cuahán nyico ra ñuu Antioquia.

<sup>23</sup> Tan tsa yaha tsinyiꝝ ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyivi yihí cuenda ra Cristo.

*Nu caahán ra Apolos tuhun Nyoo ñuu Éfeso*

<sup>24</sup> Quivi can tsaꜥ iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru.

<sup>25</sup> Tan vaha xaan cutuhva ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyꝝ ra Juan ñi tsitó ra.

<sup>26</sup> Tan quitsaha caahán ra tsitsi vehe ñuhu tsihin tsa ñi iñi ra. Tan cuhva tsa tsiñꝝ ra Aquila tan ña Priscila, tavaꝝ sin ñi tsi ra tan tsaha cuenda vaha ca ñi tuhun Nyoo tsi ra.

<sup>27</sup> Tacan tan quitsahá cuñí ra Apolos cuhun ra ityi Acaya. Tan ra hermano jatyinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsaar. Tacan tan cuahán ra. Tan cuhva tsa tsaar ra Acaya can, jatyinyee xaan ra tsi nyivi yihí cuenda ra Cristo, ñi tsa natsinü iñi tsa cuenda tumañi iñi tsa javahá Nyoo tsi ñi.

<sup>28</sup> Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinü iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

## 19

*Nu cuahán nyico ra Pablo ñuu Éfeso*

<sup>1</sup> Tsitsi tsa nyii ra Apolos ñuu Corinto, ra Pablo yahá ra ityi yucu tan tsaar na nda ñuu Éfeso. Tan ican nañihí ra tsi taahan ra yihí cuenda ra Cristo.

<sup>2</sup> Tan tsicá tuhun ra tsi ra naha:

—¿A naquihin ndo Tatyí Ii Nyoo quivi tsa natsinü iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

<sup>3</sup> Tacan tan ra Pablo tsicá tuhun ra tsi ra naha:

—¿Nacaa tsicoondutyá ndo? —catyí ra.

Tan nacahan ra naha tan catyí ra naha:

—Cuhva tsa jacoondutyá ra Juan, tacan tsicoondutyá ndi —catyí ra naha.

<sup>4</sup> Tacan tan catyí ra Pablo tsihin ra naha:

—Ra Juan jacoondutyá ra tsi nyivi tsa ndu uvj iñi cuatyí. Maa tyin catyí tucu ra tsihin ñi tyin cuñí tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

<sup>5</sup> Tsa tsiñi ra naha tsa cahan ra Pablo tuhun ihya, tacan tan tsicoondutyá ra naha inga tsaha tsihin sivi Jutu Mañi yo Jesús.

<sup>6</sup> Tan tsa tsiyó ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsahá caahán ra naha inga yuhu. Tan tsahá cuenda ra naha tuhun tsa tsahá Tatyí Ii Nyoo tsi ra naha tsi nyivi.

<sup>7</sup> Tan tsa tandihí ra naha quitá maa utsi uvj taahan ra naha.

<sup>8</sup> Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi iñi ra. Tan jacuahá ra tsi ñi na nacuhva ñi tsi ñi tsi Nyoo na cundaca ñaha ra tsi ñi.

<sup>9</sup> Maa tyin yihí ñi jandava ñi añima ñi, tan ña cuñí ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyó nyaha ra nu yucú ñi.

Tan tsindacá ra tsi ñi tsinü iñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihí quivi.

<sup>10</sup> Tan tacan ñi tsicá ra tsitsi tsa uvi cuiya. Tan tandihí nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví.

<sup>11</sup> Tan nahnu tsa iyo javahá ra Pablo jahá Nyoo.

<sup>12</sup> Tyin nda cuanda jahma tsa tñin ra Pablo tan tsindacá ñi tsi nyivi tan quitá cuehe tsi ñi, tan quitá ndihí tucu tatyí ña vaha tsi ñi.

<sup>13</sup> Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñí ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

<sup>14</sup> Tacan javahá tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu.

<sup>15</sup> Tan tsa cahan ra can naha ra tsihin nu tatyí ña vaha, nacahan nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan zyóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

<sup>16</sup> Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tunyee iñi nu tatyí ña vaha can tan cuví cunyee ra tñin tahan ra tsihin tandihí ra can naha ra. Tan tsahnyá cuatyí ra jahma ra naha. Tan jañicuehe ra tsi ra naha. Tan jacuhun tandihí ra tsi ra naha jahá nu tatyí can.

<sup>17</sup> Tacan tan tandihí nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsitó ñi tuhun can. Tan yuuhvi xaan ñi cuví. Tan jacahnú ñi sivi Jutu Mañi yo Jesús.

<sup>18</sup> Tan cuaha xaan nyivi tsa natsinü iñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihí maa tsa ña vaha tsa icá ñi tahan tsanaha.

<sup>19</sup> Tan cuaha ñi tsa cahví tuhun tasi, tsindacá ñi libru ñi. Tan tsahmjí ñi libru can nuu tandihí nyivi. Tan tava cuenda ñi nácaa yahvi libru can. Tan yahvi tsa tandihí libru can quitá tsi uvi xico utsi mil xuhun cuitsin.

<sup>20</sup> Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

<sup>21</sup> Tan tsa yahá tuhun ihya, ra Pablo tyaa ra cuhva tsa cuhun ra ñuu tsa cayucú Macedonia tan Acaya. Yahá can tan cua cunuhu

ra nda ñuu Jerusalén, tyaá ra cuhva. Tan catyí ra tyin yaha can tan cuñi tsi tsa cuhun ra nda ñuu Roma.

<sup>22</sup> Tacan tan jacuhun ra tsi uvi taahan ra jatyinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

*Nu quitsaha cuvaá nyivi Éfeso*

<sup>23</sup> Tan juvin ñi quivi can quitsaha cuvaá nyivi ñuu Éfeso tsa cuenda tuhun Nyoo,

<sup>24</sup> tyin iin ra tsa nañi Demetrio natyuhu ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyeé tsi ra.

<sup>25</sup> Tan cana ra Demetrio can tsi ra tsa jahá tyiñu tsihin ra. Tan cana tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo.

<sup>26</sup> Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihi ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu.

<sup>27</sup> Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihi nyivi nñi cahnu Asia tsihin nyivi nanñi cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

<sup>28</sup> Tan cuhva tsa tsiñi ra naha tsa cahán ra, xaan xaan cuñi ra naha. Tan quitsaha caná tsaa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

<sup>29</sup> Tan cuvaq tandihi nyivi ñuu can. Tan tñin ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihi ñi can ixta caa ñi tsi ra naha nda cuanda nu tuhvá ñi ndo iin.

<sup>30</sup> Tan ra Pablo cuñi ra quihvi ra nu yucú ñi tyin cahan ra tsihin ñi. Maa tyin ra hermano ña tsaha ra naha tsa cuhun ra.

<sup>31</sup> Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tavá tyiñu ra naha tsi ra tyin ña taahán tsi tyihí ra tsi ra ican.

<sup>32</sup> Tan nu ndu iin nyivi ican, juhva ñi caná tsaa iin tuhun, tan inga ñi caná tsaa inga

tuhun, tyin cuvaá ñi. Tan cuaha xaan ñi ndi ña tsitó ñi nacuenta yucú ñi ican.

<sup>33</sup> Tacan tan nyivi Israel tavá tyiñu ñi tsi iin ra tsa nañi Alejandro na yaha ra ityi nuu. Tan juhva ñi tsa yucú ican, tsaha cuenda ñi tsi ra nácaa cua cahan ra. Tacan tan javahá ra seña tsihin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel.

<sup>34</sup> Maa tyin cuhva tsa tsitó nyivi tyin ra Israel cuví ra, tandihi maa ñi caná tsaa ñi. Tan tsitsi tsa uvi hora caná tsaa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsaa ñi.

<sup>35</sup> Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihi nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa quee andivi tan nacava nu ñuhu ihya.

<sup>36</sup> Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo.

<sup>37</sup> Tyin ra tsa tsindaca ndo ihya nduve náa tsa suhu ra naha vehe ñuhu yo. Tan ndi ña caahán ra naha ndavaha ñi siqui nyoo yo.

<sup>38</sup> Tatun ra Demetrio tan ra tsa jahá tyiñu tsihin ra, tsicán ra naha cuatyí tsaha iin ra, na cuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can.

<sup>39</sup> Tan tatun inga tuhun tsicán ndo, cuñi tsi tsa ndaca ndo can tsi ra cumí tyiñu, tumaa cuhva catyí ley.

<sup>40</sup> Tyin tatun coto ra ndaca ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan yo tatun ndaca tuhun ra tsi yo nacuenta cuvaá yo —catyí ra cuví secretario can.

<sup>41</sup> Tan tsa yaha cahan ra, tacan tan catyí ra tyin na cunuhu ñi nda yuvehe ñi.

## 20

*Nu yaha ra Pablo Macedonia tan cuahán nyico ra nda Grecia*

<sup>1</sup> Tsa yaha tsa cuvaq nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee iñi tsi ñi, tyin tsa tsaq quivi tsa cua cuhun ra inga ñuu. Tan cahan ra tsihin ñi. Tacan tan cuahán ra Macedonia.

<sup>2</sup> Tan tsahan ra tandihi ityi can tan tsihin tuhun caahán ra jandu iin ra iñi tandihi nyivi yihí cuenda ra Cristo tsa iyó ityi can. Tacan tan tsaq ra ityi Grecia.

<sup>3</sup> Tan ican ndoo ra uñi yoo. Tan tsa nyaá tsa cua quihin ra yutun ndoo tan cahun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaá iñi ra tsa cua cahun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia.

<sup>4</sup> Tan cuahán ra Sópater, ra ñuu Berea tsihin ra. Tan cuahán ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Tróximo.

<sup>5</sup> Ra hermano ihya yahá ra naha ityi nuu tan ndatú ra naha tsi ndi nda ñuu Troas.

<sup>6</sup> Tan nyuhu ndatú ndi nda tsa yahá vico pascua nu tuhvá nyivi Israel tsatsí paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahan ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

*Nu caahán ra Pablo tuhun Nyoo ñuu Troas*

<sup>7</sup> Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun iñi ndi tyin tsihi ra Cristo tsa cuenda cuatyí yo. Tan ra Pablo caahán ra tsihin ñi, tan tahañ ñuu, tyin tsa nyaá tsa cahun ndi inga quivi can.

<sup>8</sup> Yucú ndi iin cuartu nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú.

<sup>9</sup> Tan iin ra tyuvaa tsa nañi Eutico nyaá ra ventana tyaá soho ra, maa tyin ña cunyeé iñi ra ñumaahna, tyin ra Pablo, naha xaan caahán ra. Quixi ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihi ra hermano naha ra tsi ra, maa tyin tsa tsihi ra.

<sup>10</sup> Tacan tan ra Pablo nuu ra tan tsaá ra nu canyii ra tyuvaa can. Tan tyihí jucun ndaha ra tsi ra tyuvaa can, tan catyí ra tsihin tandihi ra hermano naha ra:

—Ña nayuhvi ndo, tyin ra ihya nyito ra —catyí ra.

<sup>11</sup> Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra.

<sup>12</sup> Tan ra tyuvaa can nandotó ra tan cuanuhu ra nda yuvehe ra. Tan sii xaan cuñi ñi cuvi.

*Nu quita ra Pablo ñuu Troas tan cuahán ra nda ñuu Mileto*

<sup>13</sup> Nyuhu yahá ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaá maa ndi tyiñu tsihin ra, tyin maa ra cuñi ra cahun ra ityi nu ñuhu tsihin tsaha ra.

<sup>14</sup> Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene.

<sup>15</sup> Tsa quita ndi ñuu can tacan tan yahá ndi ityi nuu iin ñuhu luhlu tsa nañi Quío, canyii tsi mahñu ndutyá ñuhu. Tan tsa inga quivi can tsaá ndi inga ñuhu luhlu tsa nañi Samos. Yahá ndi ican tan tsaá ndi ñuu Trogilio nu quitatú ndi. Tan tsa inga quivi tsaá ndi nda ñuu Mileto.

<sup>16</sup> Tacan cuví tyin ra Pablo ña cuñi ra tsa cunyii naha ra ityi Asia. Tan ña cuñi ra cahun ra ñuu Éfeso tyin numi ñi cuñi ra tsaá ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecésés.

*Nu caahán ra Pablo tsihin ra ñuu Éfeso naha ra tyin cua cahun ra tan ña cua quitsi ca ra*

<sup>17</sup> Tan tsa yucú ndi ñuu Mileto, caná ra Pablo tsi ra cuví ityi nuu tsihin nyivi yihí cuenda Nyoo ñuu Éfeso.

<sup>18</sup> Tan tsa tsaá ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaá nuu yu Asia ihya.

<sup>19</sup> Tandihí quivi tsa tsinyii yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuiihya iñi nyehe yu. Tan cuaha tundoho quitsi siqui yu jahá nyivi Israel.

<sup>20</sup> Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iin ndo tan nda yuvehe ndo.

<sup>21</sup> Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo.

<sup>22</sup> Tan vityin cua cahun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan.

<sup>23</sup> Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu.

<sup>24</sup> Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa sii cuñi yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuahá yu tuhun vaha nácaa cuñi maa Nyoo tsi yo.

<sup>25</sup> Tan vityin tsitó vaha yu tyin tandihí nyooho tsa cahan yu tuhun Nyoo tsihin ndo, ña cua nyehe ca ndo tsi yu.

<sup>26</sup> Yacan cuenda cuñi yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo.



<sup>27</sup> Tyin ñiñi cuñi yu tan cañan yu tandihi tuhun Nyoo tsihin ndo tan nduve náa tsa tyihí xeehe yu.

<sup>28</sup> Yacan cuenda jaha cuenda ndo tsi ndo. Tan jaha cuenda ndihi ndo tsi tandihi nyivi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jata ra tsi ñi tsihin ñiñi ra.

<sup>29</sup> Tan tsitó yu tyin quivi cahun yu, cua quitsi inga ra naha. Tan cua cuñi ra naha jativi ra naha tsi nyivi yihí cuenda Jutu Mañi yo. Tumaa lobo xaan tsa tsahñí tsi mbee, tacan cua quitsi ra can naha ra.

<sup>30</sup> Tan juvin ñi nu yacú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cunycun ndo tsi ra naha.

<sup>31</sup> Yacan cuenda jaha vaha ndo cuenda. Ndūcuhun iñi ndo tyin tsitsi tsa uñi cuiya ña jandihi yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñi yu, coto nacoó ihñi ndo tuhun Nyoo.

<sup>32</sup> Tan vityin nyooho yañi, tyaá yu tsi ndo ndaha Nyoo. Naquihin vaha ndo tandihi tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandihi inga nyivi tsa nacuhva cuenda tsi ñi tsi ra.

<sup>33</sup> Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo.

<sup>34</sup> Nyooho tsitó vaha ndo tyin jaha tyiñu xaan yu tsihin ndaha yu tan ñihí yu tsa tsiñí ñuhu tsi yu tsihin ra tsicá tsihin yu naha ra.

<sup>35</sup> Tacan ñi janahá yu tsi ndo tyin cuñi tsi tsa jaha tyiñu ndo tan jatinyee ndo tsi nyivi iyó náa tsa tsiñí ñuhu tsi ñi. Tan ndūcuhun iñi ndo tsa caahán Jutu Mañi yo Jesús, nu catyí ra tyehen: “Si# ca cuñi nyivi tsa tsahá, tan ñavin ca nyivi tsa ñihí ndaahvi” catyí Jutu Mañi yo.

<sup>36</sup> Tsa yaha tsa cañan ra Pablo tuhun ihya, tsicuiñí tsiti ra. Tan tsican tahvi ra tsihin tandihi ra naha.

<sup>37</sup> Tan tandihi ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra.

<sup>38</sup> Tyin ra Pablo catyí ra tyin cua cahun ra inga ñuu tan ña cua cahun ca ra nu yucú ra naha. Tacan tan tsindacá ra naha tsi ra nda nu quihvi ra tsitsi yutun ndoo.

## 21

### *Nu cuahán ra Pablo ñuu Jerusalén*

<sup>1</sup> Tacan tan nacoó ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyí mahñu ndutya ñuhu. Tan tsa

inga quivi tsaá ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara.

<sup>2</sup> Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ñi.

<sup>3</sup> Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yaha ñi ndi cuahán ndi ityi nuu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can.

<sup>4</sup> Tan tsa nañihí ndi tsi nyivi yihí cuenda Nyoo ñuu can, ndoo ndi tsihin ñi utsa quivi. Tan catyí ñi tsihin ra Pablo tyin ña taahán tsi tsa cahun ra ñuu Jerusalén tyin tacan cañan Tatyí Ii Nyoo tsihin ñi.

<sup>5</sup> Maa tyin tsa quita utsa quivi can, quita ndi ñuu can. Tan nu cua quita ndi tandihi ra hermano naha ra tsihin ñasiihi ra naha tan tsihin sehe ra naha tsindacá ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñí tsiti ndi, tan tsican tahvi ndi tsi Nyoo.

<sup>6</sup> Tacan tan tsinumí nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhú ra naha yuvehe ra naha.

<sup>7</sup> Tan tsa quee ndi ñuu Tiro, cuahán ndi nda ñuu Tolemaida. Tan ican tsahá ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi.

<sup>8</sup> Tan tsa inga quivi quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra.

<sup>9</sup> Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi.

<sup>10</sup> Tan tsa cuaha ñi quivi tsa yucú ndi ican, tan tsaá iin ndusu yuhu nyoo tsa quee nda Judea. Nañi ra Agabo.

<sup>11</sup> Quitsi nyehe ra nu yucú ndi. Tan quihin ra cinturón ra Pablo, tsahñí ra tsaha ra tan ndaha ra, tan catyí ra:

—Tatyí Ii Nyoo catyí tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyí ra Agabo.

<sup>12</sup> Tsa tsiñí ndi tsa caahán ra, nyuhu tan ra ñuu Cesarea naha ra caahán ndaahvi ndi tsihin ra Pablo na ña cahun ra ñuu Jerusalén.

<sup>13</sup> Maa tyin ra Pablo catyí ra:

—¿Nacuenda tsacú ndo tan janducuihya ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cahun yu tyiñu tsa

cuenda Jutu Mañi yo Jesús —catyí ra tsihin ndi.

<sup>14</sup> Tan tsa nyehe ndi tyin ña cuví tsa jahá ndi tsi ra, jañá ndi. Tan catyí ndi:

—Na cuví maa cuhva cuñí Jutu Mañi yo.

<sup>15</sup> Tsa yaha yacan na ica vaha ndi tsi ndi tan cuahán ndi nda ñuu Jerusalén.

<sup>16</sup> Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañi ra Mnasón. Cuaha xaan cuiya tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

*Nu cua nyehe ra Pablo nu nyii ra Jacobo*

<sup>17</sup> Tsa tsaá ndi ñuu Jerusalén, nyivi yihí cuenda ra Cristo si xaan cuñí ñi caahán ñi tsihin ndi.

<sup>18</sup> Tan inga quívi can cuahán ndi tsihin ra Pablo cua nyehe ndi nu nyii ra Jacobo. Tan ican yucú tucu tandihí ra cuví ityi nuu tsihin nyivi vehe ñuhu.

<sup>19</sup> Tsaá ra Pablo nacumi tsi ra naha. Yaha can tan nacatyí tuhun ra tandihí nácaa tsatyíñy Nyoo tsi ra nu cahan ra tuhun Nyoo tsihin nyivi tsa ñavin nyivi Israel cuví.

<sup>20</sup> Tsa tsiñi ra naha tuhun ihya, jacahnú ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihí ñi catyí ñi tyin taahán tsi tsa javaha yo cuhva catyí ley tsa tyaa ra Moisés.

<sup>21</sup> Tan ñihí tuhun ñi tyin yoocho jacuahá un tsi tandihí nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñí ca tsi tsa cunyaa tuñi Nyoo tsi sehe yii ñi, tan ndi ña cua javaha ca ñi tuhun tsahnú cuhva tsa iyó maa yo tahañ tsanaha.

<sup>22</sup> ¿Nacaa javaha yo vityin? Tyin nyivi cua ñihí tuhun ñi tyin tsaá un ihya.

<sup>23</sup> Vaha taxin ca tsa javaha un tsa cua cahan ndi tsihin un. Ihya iyó cumi taahan rayii tsa nyaá javaha tsa catyí ra tsihin Nyoo tyin cua javaha ra naha.

<sup>24</sup> Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyí ley. Tan tsa javaha un tacan, tan coto tandihí nyivi tyin ña nditsa tsa caahán ñi siqui un, tyin cua nyehe ñi tyin ña nacoó un ley tsa tyaa ra Moisés.

<sup>25</sup> Tan tsa cuenda nyivi tsa ñavin nyivi Israel cuví, tan tsinu iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi niñi quiti, tan ndi cuñu quiti tsa cava ñi jucun tan ña tsatí niñi ti. Tan ndi intuhun

ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayii —catyí ra tsahnú vehe ñuhu can naha ra tsihin ra Pablo.

*Nu quitsaha caahán yuhu tahan nyivi Israel siqui ra Pablo*

<sup>26</sup> Tacan tan tsa tuví inga quívi tan cuahán ra Pablo tsihin tandihí tsa cumi taahan ra can naha ra. Tan janduvaha ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundihi tsa utsa quívi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo.

<sup>27</sup> Tacan tan tsa cuñí ndihí tsa utsa quívi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaá xaan tandihí nyivi jahá ra naha, tan tñn ra naha tsi ra Pablo.

<sup>28</sup> Tan caná tsaá ra naha tan catyí ra naha: —Nyoocho nyivi Israel, jatinyee ndo tsi ndi. Juvín ra ihya cuvú ra tsa tsicá nuu tandihí ñi ityi. Tan jacuahá ra tsi tandihí nyivi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaa ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatívi ra naha —catyí ra naha caná tsaá ra naha.

<sup>29</sup> Tacan catyí ra naha tyin nda nu quitsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófico. Tan cuñí maa ra naha tyin ra Pablo tsindaca tsi ra tsitsi vehe ñuhu.

<sup>30</sup> Tan tandihí nyivi ñuu quitsaha cuvaá ñi. Tan tsinú xaan ñi tsaá ñi. Tacan tan tñn ñi tsi ra Pablo. Tan itxa caa ñi tsi ra cua ndaca ñi ityi tsata vehe ñuhu, tan numi ñi nacasi ñi yuvehe ñuhu can.

<sup>31</sup> Tsa cuñí cahñi ñi tsi ra, tan ñihí tuhun ra comandante cuenda andaru tyin tandihí nyivi ñuu Jerusalén iyo xaan caahán yuhu tahan ñi.

<sup>32</sup> Tacan tan ra comandante can jandu iñn ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jañá ñi tsa cañí ñi tsi ra Pablo.

<sup>33</sup> Tacan tan natuhva ra comandante can nu nyii ra Pablo. Tan tava tyiñu ra tsi andaru naha ra tyin na tñn ra naha tsi ra, tan na cuñi ra naha tsi ra tsihin uvi taahan cadena. Yaha can tan tsicá tuhun ra comandante can tsi ra yóo ra cuví ra, tan náa javaha ra.

<sup>34</sup> Maa tyin nyivi siin siin tuhun caná tsaá ñi. Tan ra comandante can ña cutuñí maa iñi ra tsa cuenda tsatyin ñihí xaan cuvaá

jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru.

<sup>35</sup> Cuhva tsa tsaá ra naha nu cuayi vehe can, tan quitsaha nducaña nyivi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra.

<sup>36</sup> Tyin tandihi ñi nyicún ñi tsi ra naha, tan caná tsaá ñi tan catyí ñi:

—¡Na cúu ra! —catyí ñi.

*Nu juven ñi maa ra Pablo jacacú tsi ra nuu nyivi*

<sup>37</sup> Cuhva tsa cua tyihi ra naha tsi ra Pablo tsitsi vehe can, tan quitsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego?

<sup>38</sup> Tun tacan caa, ñavin yooho cuví ra ñuu Egipto tsa quitsj quivi can tan jacañi tahan ra tsi nyivi siqui ra ndacá ñaha tan tava ra cumi mil ra tsahñi ndiyi tsindaca ra tsi ra naha ityi ñuhu ityi —catyí ra comandante can tsihin ra Pablo.

<sup>39</sup> Tacan tan ra Pablo catyí ra tsihin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnú ityi Cilicia. Maa tyin jaha tumañi iñi cuhva un ndatu cahan yu luxu tsihin nyivi —catyí ra Pablo tsihin ra comandante.

<sup>40</sup> Tacan tan tsa tsaha ra comandante can ndatu tsi ra, nduvita nyityi ra nu cuayi can tan javaha ra iin seña tyin na cutaxin ñi. Tan tsa cutaxin nyivi quitsaha caahán ra tsihin yuhu hebreo, tan catyí ra:

## 22

<sup>1</sup> —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyivi can.

<sup>2</sup> Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

<sup>3</sup> —Yuhu ra Israel cuví yu tumaa maa ndo. Tan cacu yu ñuu Tarso tsa canyií Cilicia. Maa tyin Jerusalén ihya tsahnú yu. Tan ra Gamaliel jacuahá ra tsi yu nácaa tyaa yahvi yuley tsii tsahnú yo. Tan tacan ñi nducú yu cuhva javahá yu tyiñu nuu Nyoo tsihin tsa ñi iñi yu, tumaa tsa javahá ndo vityin ihya.

<sup>4</sup> Yuhu, nu quitsj tsi tsinyaa ndaha yu tsi nyivi yihí cuenda ra Cristo. Tan tsindaca yu tsi ñi tsa cúu ñi. Tan cuaha ñi rayi tan ñaha tñi yu tsa cuhan ñi tsitsi vehe caa.

<sup>5</sup> Ra jutu tsahnú tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsaha tutu tsi yu tyin cuví tñi yu tsi ra yañi yo, ra yihí cuenda ra Cristo ñuu Damasco. Tsañan yu ican

tsinanducú yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnú naha ra tsi ñi.

*Nu nacatyí tuhun ra Pablo nácaa natsinu iñi ra tsi ra Cristo*

(Hechos 9.1-19; 26.12-18)

<sup>6</sup> Maa tyin cuhva tsa cuahán yu ityi tsa cua tsaá yu ñuu Damasco, maa ora cuví tsi. Tan sana iñi yu tan ndunditsin tanñi cahnú nu cuahán yu jahá iin ñuhu tsa quitsj ityi andivi.

<sup>7</sup> Tacan tan nduva yu nu ñuhu. Yaha can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacueda nyaá ndaha un tsi yu?” catyí ndusu can tsihin yu.

<sup>8</sup> Tacan tan tsicá tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra.

<sup>9</sup> Tandihí ra tsa cuahán tsihin yu nyehe ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cañan tsihin yu.

<sup>10</sup> Tacan tan quitsaha caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Ndyvita tan cuhun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu.

<sup>11</sup> Tan cuaá yu jahá ñuhu can, yacan cuenda ra tsa cuahán tsihin yu tñi ra naha ndaha yu tan cuahán ndi nda ñuu Damasco.

<sup>12</sup> “Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaa ra Moisés. Tan tandihí nyivi Israel tsa iyó ñuu Damasco catyí ñi tyin vaha xaan iñi ra.

<sup>13</sup> Tsañan ra can tsinyehe ra tsi yu. Tan cuhva tsa tsaá ra, catyí ra tsihin yu: “Yañi Saulo, nanyehe inga tsaha” catyí ra tsihin yu. Tan juven ñi cuhva can tan nanyehe yu. Tan cuví nyehe yu tsi ra.

<sup>14</sup> Tan catyí ra tsihin yu: “Nyoo cuenda jutu yo nacatsj ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra.

<sup>15</sup> Tyin yooho cua cahan un tuhun ra nuu tandihí nyivi. Cua nacatyí tuhun un tsa nyehe un tan tsa tsiñi un.

<sup>16</sup> Tan vityin, ña cuatu ca un. Ndyvita tan coondutya un. Tan ndacan tahvi un tsi Jutu Mañi yu tyin na jaha ra tucahnú iñi cuatyí un” catyí ra Ananías tsihin yu —catyí ra Pablo tsihin ñi.

*Nu nacatyí tuhun ra Pablo nácaa tsaha Nyoo tyiñu tsi ra tyin cuhun ra inga ñuu cuahan ra tuhun ra Cristo*

<sup>17</sup> Yaha can tan vatsi nuhu yu ñuu Jerusalén ihya tan cuhva tsa tsaá yu, tsañan

yu vehe ñuhu cahnu tsindaçan tahvi yu tsi Jutu Mañi yo. Tan janaha ra iin tsa nyehe yu.

<sup>18</sup> Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyivi tuhun yu tsa cahan un” catyí ra tsihin yu.

<sup>19</sup> Tacan tan quitsaha caahan yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahan yu tandihi vehe ñuhu. Tan tñin yu tsi ñi tsa tsinú iñi tsi un, tan tyihj yu tsi ñi vehe caa tan cañj yu tsi ñi.

<sup>20</sup> Tan quivi tsa tsiñj ra Esteban ra tsa cahan cuenda un, yuhu nyii ndihi yu ican. Tan ndoo yu vaha tsa tsahñj ra naha tsi ra. Tan jahā cuenda yu jahma ra can naha ra” catyí yu tsihin Jutu Mañi yo.

<sup>21</sup> Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

*Nu nyaá ra Pablo ndaha ra comandante cuenda ñuu Roma*

<sup>22</sup> Tyaā soho ñi yacan ña tan quitsaha caná tsaa ñi tan catyí ñi:

—¡Cahñi ndo tsi ra! Tyin ña taahán ca tsi tsa coo ra ñayivi —catyí ñi.

<sup>23</sup> Tan caná tsaa ca ñi. Tan javicó ñi jahma ñi. Tan javitá ñi nyahyu nu tyati tsa cuenda tsa xaan xaan cuñí ñi.

<sup>24</sup> Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsaa nyivi tsata ra.

<sup>25</sup> Maa tyin tsa yaha tsahñj ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñí ndo cañi ndo tsi yu —catyí ra Pablo tsihin ra.

<sup>26</sup> Tsa tsiñj ra capitán tsa caahan ra Pablo, tsahan ra tsjacotō ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

<sup>27</sup> Tacan tan ra comandante can cuahán ra nu nyii ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

<sup>28</sup> Tacan tan catyí ra comandante can tsihin ra:

—Yuhu cuaha xaan xuhun tyahvj yu tan cuví cuq yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

<sup>29</sup> Tacan tan andaru tsa cua cañi tsi ra jatsiyo nyaha ra naha tsi ra naha nu nyii ra Pablo. Tan nda cuenda ra comandante tan nayuhvj ra tsa cuenda tsa tsahñj ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

*Nu tsahan ra Pablo nu ndu iin ra ñuu Israel naha ra*

<sup>30</sup> Tan tsa tuvj inga quivi can tan ra comandante can cuñi ra coto ra náa cuatyí tyaá nyivi Israel tsi ra Pablo. Tan jañā ra tsi ra Pablo. Tan tava tyiñu ra na ndu iin tandihi ra jutu tsa cuví ityi nuu naha ra, tan tsihin tandihi ra cumi tyiñu cuenda nyivi Israel. Tacan tan tava tyiñu ra na quita ra Pablo vehe caa tan cuhun ra nu iyó junta can.

## 23

<sup>1</sup> Tan ra Pablo nyehe ra tsi tandihi ra tsa ndu iin can naha ra, tan catyí ra tsihin ra naha:

—Nyooho yañi, tandihi quivi nda cuenda vityin nducú yu cuhva javaha yu cuhva cuñi Nyoo. Yacan cuenda vaha cuñi yu —catyí ra Pablo.

<sup>2</sup> Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra.

<sup>3</sup> Tan ra Pablo nacahan ra tan catyí ra:

—¡Jihna ca tsi maa un cua cañi Nyoo, tyin jahā xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

<sup>4</sup> Tacan tan ra nyecú ican catyí ra naha tsihin ra:

—Ña vaha tsa caahan un tacan tsihin ra jutu tsaahnu tyin cahnu cuví ra nuu Nyoo —catyí ra naha tsihin ra Pablo.

<sup>5</sup> Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaa yo tsi ra yihí ndaha ñuu yo —catyí ra.

<sup>6</sup> Tacan tan tuvj iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahan ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsi tuñi ndo tsi yu tsatyin tsinú iñi yu tyin nyivi tsa tsiñj nandoto ñi —catyí ra Pablo.

<sup>7</sup> Cuhva tsa cahan ra tuhun ihya, ra tsa cuví fariseo naha ra tan ra saduceo naha ra, quitsahá caahán yuhu tahan ra naha tan natahví sava ra naha.

<sup>8</sup> Tyin ra saduceo catyí ra naha tyin ña cua nandoto nyívi tsa tsihí. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsínú iñi ra naha tandihí tuhun ihya.

<sup>9</sup> Tandihí ra naha quitsahá caná tsa ra naha. Tan nduvitá juhva ra cuví maestro cuenda ley tsa tyaá ra Moisés tsa cutahán tsihin ra fariseo naha ra, tan catyí ra naha:

—Nyéhe ndo, nduve tsa ña vaha javahá ra ihya, tyin tatun ángel cahan tsihin ra, jáha yo cuenda tyin ña vaha cahan yo siqui Nyoo —catyí ra naha.

<sup>10</sup> Tsa tsiñí tandihí ra naha yacan, quitsahá nduvaá nyico ra naha. Nda cua nayuhví ra comandante can coto cahnya cuatyí ra naha tsi ra Pablo. Yacan cuenda tavá tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru.

<sup>11</sup> Tan tsacuaa can quituvj Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

*Nu ndoq ra Israel naha ra tyiñu tyin cua cahñi ra naha tsi ra Pablo*

<sup>12</sup> Tsa inga quivi, juhva ra Israel natuhun tahan ra naha tan ndoq ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha.

<sup>13</sup> Yaha uvi xico ra naha ndoq ra naha tyiñu ihya.

<sup>14</sup> Tsañan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyívi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi.

<sup>15</sup> Tan vityin nyooho jácoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsa ra ihya, cua cahñi ndi tsi ra —catyí ra naha tsihin ra jutu naha ra.

<sup>16</sup> Maa tyin sehe cuhva ra Pablo tsiñí ra tsa natuhún tahan ra naha. Tan tsañan ra

vehe andaru nu nyíi ra Pablo tsi catyí tuhun ra tsihin ra.

<sup>17</sup> Tacan tan ra Pablo caná ra tsi iin ra capitán. Tan catyí ra tsihin ra:

—Cúandaca tsi ra luhlu ihya nuu ra comandante tyin iyó tsa cuñí ra cahan ra tsihin ra —catyí ra Pablo tsihin ra capitán.

<sup>18</sup> Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyíi vehe caa caná ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñí ra cahan ra tsihin un.

<sup>19</sup> Tacan tan ra comandante tñin ra ndaha ra luhlu can tan tavá sñin ra tsi ra tan catyí ra tsihin ra:

—¿Náa cuñí un cahan un tsihin yu?

<sup>20</sup> Tan ra luhlu can catyí ra tsihin ra:

—Ra Israel ndoq ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo.

<sup>21</sup> Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuví cahñi ra naha tsi ra, vaha taxín ca na cúu tandihí maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

<sup>22</sup> Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyívi. Yaha can tan jacunuhy ra tsi ra luhlu can.

*Nu cacu ra Pablo ndaha ra Israel naha ra tan cuahán ra nuu ra ndacá ñaha tsa naní Félix*

<sup>23</sup> Tacan tan ra comandante caná ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cuhun ndo ñuu Cesarea cuhva caa iin tsa tsacuaa. Cua cuhun uvi cientu andaru tsihin tsa ha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza.

<sup>24</sup> Janduvaha ndo cuayu coso ra Pablo. Tan jáha cuenda vaha ndo tsi ra ityi cuhun ndo na tsa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

<sup>25-26</sup> Tacan tan javahá ra iin carta cundaha ra naha nacuhva ra naha tsi ra Félix. Tan tuhun tsa tyaá ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyívi cuví un. Ihya vatsí nacumi tsi un.

<sup>27</sup> Ra Pablo ihya, tñin ra Israel naha ra tsi ra. Tan cuñí ra naha cahñi ra naha tsi ra. Maa tyin cuhva tsa tsitoy tyin ra ñuu Roma

cuví ra, tsahān yu tsihin andaru tan jacacū yu tsi ra.

<sup>28</sup> Tan cuñí yu coto yu náa cuatyí tyaá nyívi tsi ra, tsindacā yu tsi ra nu iyó junta tandihí ra cuví mandoñi nyívi Israel.

<sup>29</sup> Tan nyehe yu tyin xaan xaan cuñí nyívi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihí yo tsi ra vehe caa.

<sup>30</sup> Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihí ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahā ra.

<sup>31</sup> Tacan tan quihñ ra naha tsi ra Pablo tumaa cuhva catyí ra Claudio tsihin ra naha, tan juven ñi tsacuaa can tsindacā ra naha tsi ra nda ñuu Antípatris.

<sup>32-33</sup> Tsa inga quívi, ra tsa cuahán tsihin tsaha, sava ityi ñi tsahān ra naha, tan tsaā nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaā ra naha, nacuhvá ra naha carta can tsi ra Félix, tan tsahā cuenda ndihí ra naha tsi ra Pablo tsi ra.

<sup>34</sup> Tsa yahā tsa cahví ra Félix carta can, quitsahā tsicá tuhun ra tsi ra Pablo nu maa cuví ñuu ra. Tan tsa tsitō ra tyin ra Cilicia cuví ra.

<sup>35</sup> Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahañ tsanaha.

## 24

### *Nu cutuñi ra Pablo nuu ra Félix*

<sup>1</sup> Yahā uhun quívi tan ra Ananías, ra jutu tsaahnu tsa yihí ndaha inga ca ra jutu, tsaā ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahví tsaha nyívi cuví ra. Tsaā ra can naha ra nuu ra Félix tyin cua ndacan ra naha cuatyí tsaha ra Pablo.

<sup>2</sup> Tacan tan tava tyiñu ra Félix na quitsi ndaca andaru tsi ra Pablo. Tacan tan quitsahā tsicán ra Tértulo cuatyí tsaha ra. Tan catyí ra tsihin ra Félix:

—Tyahví nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyívi ñuu ndi.

<sup>3</sup> Nacuhvá xaan ndi tyahví nyoo tsi yooho tata Félix, tyin vaha xaan iñi un.

<sup>4</sup> Tan ña cuñí yu jatyañu yu tsi un tsihin tsa cuaha tuhun cua cahan yu, yacan cuenda

tsicán yu tumañi iñi tsi un na cuhva un ndatu cahan ndi luxu.

<sup>5</sup> Tyin tsitó ndi tyin rayñi ihya ñavin ra vaha cuví ra. Tandihí ñi ityi jacuvaá ra tsi nyívi Israel. Tan juven ra cuví ityi nuu tsihin nyívi tsa nyicún tsi ra Jesús ra ñuu Nazaret.

<sup>6</sup> Tan cuñí ra javaha ra tsa ndavaha ñi tsitsi vehe ñuhu cahnu. Tan yacan cuenda tññ ndi tsi ra, tyin tatsi tuñi ndi tsi ra tumaa cuhva catyí ley maa ndi.

<sup>7</sup> Maa tyin ra Licias, ra cuví comandante ñihí xaan tyasí ra tan quihñ nyaa ra tsi ra tsi ndi.

<sup>8</sup> Tan catyí ra tyin tun cuñí ndi ndacan ndi cuatyí tsaha ra, cuñí tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

<sup>9</sup> Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa.

<sup>10</sup> Tacan tan ra Félix janahā ndaha ra nu nyaá ra Pablo tyin nacahan ra. Tan ra Pablo quitsahā caahán ra tan catyí ra:

—Siñ xaan cuñí yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyívi iyó ñuu ihya.

<sup>11</sup> Tatun cua nducu tuhun un, cua coto un tyin tsa iyó ñi utsi uvi quívi tsa tsahān yu ñuu Jerusalén tsijacahnū yu tsi Nyoo.

<sup>12</sup> Tan ña cahan yuhu tahan yu tsihin ndi intuhun nyívi. Tan ndi ña jacuvaā yu tsi ñi tsitsi vehe ñuhu cahnu. Nduve maa náa javahā yu tandihí ca vehe ñuhu, tan ndi inga ca ityi tsitsi ñuu.

<sup>13</sup> Tan cuatyí tsa tyaá ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuví tsi.

<sup>14</sup> Maa tyin tsa cua catyí yu tsihin un cuví tsehe: tyin yuhu jacahnū yu tsi Nyoo. Juvín ra tsa jacahnū tsiñ tsaahnu yu. Tan jacahnū yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaā ra Moisés, tan tsinú iñi yu. Tan tandihí tsa tyaā ra cuví ndusu yuhu Nyoo tan tsinú iñi yu.

<sup>15</sup> Tan tsinú iñi yu tumaa tsa tsinú iñi ra ihya naha ra tyin nyívi tsa tsihñ cua nandoto ñi inga tsaha, tahan ñi nyívi vaha tan nyívi caquiñi.

<sup>16</sup> Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyívi.

<sup>17</sup> Tan tsa yahā juhva cuiya tsa tsicā yu tandihí ñi ityi, tsahan tsaā nuhu yu nda Israel ñuu yu tyin nacuhva cuenda yu xuhun tsa tsahā nyívi tsi yu tsi nyívi ndaahví tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo.

<sup>18</sup> Yacan javahá yu tsitsi vehe ñuhu cahnu. Tan tsa yaha tsa janduvaha yu tsi yu tumaa catyí ley ndi, tan juhva ra Israel ra tsa quee ityi Asia, nyehé ra naha tsi yu ndacan. Maa tyin nduve nyivi cuaha yucú, tan nduve náa javaha ñi.

<sup>19</sup> Tan ra tsa nyehé tsi yu ndacan naha ra, taahán tsi tsa quitsi maa ra naha cahan ra naha náa cuví tsa javaha yu o náa cuatyí tyaá ra naha siqui yu.

<sup>20</sup> Tatun ña tacan, na catyí tuhun ra tsa nyecú ihya naha ra tatun náa iin cuatyí yu nañihí ra naha quivi janahma ra cuví ityi nuu tsihin nyivi Israel naha ra tsi yu.

<sup>21</sup> ¿A ñavin cuenda tsatyin cahan yu iin tuhun tsihin ra tsa yucú junta can? Tan catyí yu: “¿A tatsi tuñi ndo tsi yu tsa cuenda tyin tsinú ñi yu tsa nandoto nyivi tsa tsihi?” —catyí ra Pablo.

<sup>22</sup> Tan tsa tsiñi ra Félix tsa cahan ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyí ra.

Cahan ra tacan tyin tsitó ra nácaa cuahán tuhun nyivi nyicún tsi ra Cristo.

<sup>23</sup> Tacan tan tava tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cahun ra vaha ñi tsi ra nu nyi ra, tan cahan ra naha tsihin ra.

<sup>24</sup> Tsa yaha juhva quivi tan tsaá nyico ra Félix inga tsaha tsihin ña Drusila ñasihi ra. Tan ñaha Israel cuví ña. Tan tava tyiñu ra na quitsi ra Pablo tyin cuñi ñi tyaá soho ñi nácaa tuhun tsa tsinú ñi ra tsi ra Jesucristo.

<sup>25</sup> Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñi Nyoo, tan ña cuví javaha yo tsa ña vaha tsa cuñi cuñu ñuhu yo. Tan coo quivi cua tatsi tuñi Nyoo tsi tandihi nyivi. Tan ra Félix nayuhvi xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

<sup>26</sup> Tan ra Félix cuñi maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra.

<sup>27</sup> Tan tsa yaha uvi cuiya, tacan tan nacoço tyiñu tsi ra Porcio Festo tyin cundaca ñaha ra. Tyin tsa quitá ra Félix. Tan ra Félix ña cuñi ra tsa cahan nyivi Israel tsi ra, yacan cuenda nacoço ra tsi ra Pablo vehe caa.

## 25

### *Nu jandaá ra Festo cuatyí ra Pablo*

<sup>1</sup> Tan tsa quihvi ra Festo tsa cua jaha tyiñu ra, tacan tan tsa tsinu uñi quivi quitá ra

ñuu Cesarea can tan cuahán ra nda ñuu Jerusalén.

<sup>2</sup> Tan tsa tsaá ra ñuu Jerusalén, tacan tan tsaá ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsican ra naha cuatyí tsaha ra Pablo.

<sup>3</sup> Tan tsican ra naha tumañi ñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra.

<sup>4</sup> Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu cuhva tsa yatyi ñi cua cunuhu nyico yu.

<sup>5</sup> Yacan cuenda, nyooho tsa cuví ndo ra cumí tyiñu ñuu ihya, cuví cahun ndo tsihin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tsihin ra naha.

<sup>6</sup> Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaá ra tsitsi vehe tyiñu ra tan tsinyaá ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra Pablo.

<sup>7</sup> Cuhva tsa quihvi ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaá ra naha cuatyí cahnu siqui ra. Maa tyin nduve tsandaa tava ra naha.

<sup>8</sup> Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

<sup>9</sup> Maa tyin ra Festo cuñi ra coo vaha ra tsihin ra Israel naha ra, yacan cuenda tsicá tuhun ra tsi ra Pablo:

—¿A cuñi un cahun un ñuu Jerusalén tyin jandaa yu tyiñu un ndacan? —catyí ra tsihin ra.

<sup>10</sup> Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javaha yu tsi nyivi Israel.

<sup>11</sup> Tun tsatyin javaha yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

<sup>12</sup>Tacan tan ra Festo, tsa yahā tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

*Nu nacatyí tuhun ra Festo tuhun ra Pablo tsihin ra Agripa*

<sup>13</sup>Tsa yahā juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyii ra Festo tyin cua cuhva ñi nacumi tsi ra.

<sup>14</sup>Tan ndoq ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoq ra tsi iin ra vehe caa ihya.

<sup>15</sup>Tan tsa tsahan yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsicān ra naha cuatyí tsaha ra can nuu yu tyin na cuhva yu ndatu tsa cúu ra.

<sup>16</sup>Tan yuhu catyí yu tsihin tandihí ra naha tyin ña tuhvá ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi.

<sup>17</sup>Yacan cuenda, tsa quitsj ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yahā tsicunyaq yu tan cana yu tsi ra can.

<sup>18</sup>Maa tyin ra tyaá cuatyí siqui ra, nduve náa tuhun ñiñi cahān ra naha. Tsa cuñi maa yu tyin cahnu cuatyí cua tyaa ra naha siqui ra.

<sup>19</sup>Maa tyin tuhun tsa cahān ra naha cuví tsa cuenda cuhva iyó maa ra naha cuhva tsinú iñi ra naha. Tan cahān ra naha tuhun ra tsa nañi Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra.

<sup>20</sup>Tan tsa ña ñihí yu nácaa tatsi tuñi yu tsi ra tsa cuenda tuhun can, tsicā tuhun yu tsi ra tan catyí yu tsihin ra tatun cuñi ra cuhun ra cutuñi ra nda ñuu Jerusalén.

<sup>21</sup>Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuenda cuví jacuhun yu tsi ra nuu ra Augusto —catyí ra Festo tsihin ra Agripa.

<sup>22</sup>Tacan tan ra Agripa catyí ra tsihin ra Festo:

—Cuñi tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

<sup>23</sup>Tsa inga quivi can tan tsaq ra Agripa tsihin ña Berenice. Iyo xaan caá ñi quihvi ñi

tsitsi vehe, tyin rey cuví ñi. Tan quihvi ndihí tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo.

<sup>24</sup>Tacan tan quitsaha catyí ra Festo:

—Yooho Rey Agripa, tan nyooho tata, tsa yucú ndo ihya. Nyēhe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra.

<sup>25</sup>Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan.

<sup>26</sup>Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu.

<sup>27</sup>Tyin ña vaha tsa jacuhún yu tsi ra tatun nduve náa tuhun caahán yu náa cuatyí javahā ra.

## 26

*Nu quitsaha caahán ra Pablo nuu ra rey Agripa*

<sup>1</sup>Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaa ra ndaha ra tan catyí ra tyehen:

<sup>2</sup>—Si xaan cuñi yu tyin cuví cahan yu nuu yooho, rey Agripa, tan cuví catyí yu tsihin un nácaa tandihí cuatyí tsa tyaá ra Israel naha ra siqui yu.

<sup>3</sup>Tyin yooho tsitó un tandihí tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi tyin tyaa soho vaha un tsa cua cahan yu.

*Nu catyí tuhun ra Pablo tsihin ra Agripa nácaa ñayivi tsicoq ra tsa ndi cumañi ca quihvi ra cuenda ra Cristo*

<sup>4</sup>Tandihí nyivi Israel tsitó ñi nácaa tsicoq yu nda ñuu yu quivi tsa ndi luhlu yu. Tan tsitó tucu ñi nácaa tsicoq yu nda ñuu Jerusalén.

<sup>5</sup>Cuaaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihí nyivi.

<sup>6</sup>Tan vityin cuñi nyivi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyivi tsa tsihi, tumaa catyí ra tsihin tsii tsahnu yo naha ra tahan tsanaha.



<sup>7</sup> Tandihí nyívi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyívi tsa tsihí. Tan yacan cuenda ña jandihí ñi tsa javahá ñi tyíñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyí siqui yu vityin, yooho rey Agripa.

<sup>8</sup> ¿A ña tsinú iñi nyooho tyin Nyoo cua janandoto ra tsi nyívi tsa tsa tsihí?

*Nu tsaha cuenda ra Pablo tsi ra Agripa cuhva tsinyaq ndaha ra tsi nyívi yihí cuenda ra Cristo*

<sup>9</sup> Tahan tsanaha juvin ñi maa yu tsicá iñi yu tyin vaha tsa tatsi tuñi yu tsi nyívi tsinú iñi tsi ra Jesús, ra ñuu Nazaret.

<sup>10</sup> Tan tacan javahá yu nda ñuu Jerusalén tsihin ndatu tsa tsahá ra jutu tsa cuví ityi nuu naha ra. Tan cuaha nyívi tsa tsinú iñi tsi ra Cristo tyihí yu vehe caa. Tan tatun tsahñi ra naha tsi ñi, vaha xaan cuñi yu.

<sup>11</sup> Tan cuaha xaan tundoho nyehe ñi jaha yu. Tan nducú yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javahá yu tandihí maa vehe ñuhu nyívi Israel. Javahá yu tacan tsa cuenda tsa xaan cuñi yu nyehe yu tsi ñi. Tan tandihí inga ñuu tsahan yu tsinyaq ndaha yu tsi ñi.

*Nu nacatyí tuhun nyico ra Pablo nácaa nanduví ra, ra yihí cuenda ra Cristo (Hechos 9.1-19; 22.6-16)*

<sup>12</sup> Tan tsa cuenda yacan cuahán yu nda ñuu Damasco quívi can tyin tsahá ra jutu tsa cuví ityi nuu naha ra ndatu tsi yu.

<sup>13</sup> Maa tyin ityi cuahán yu cuhva ora cuví tsi, yooho Rey. Tan quítsi ñuhu ityi siqui. Tan jandunditsin tsi nu cuahán yu tsihin tandihí ra tsa cuahán tsihin yu. Maa tyin yaha ca nditsin tsi tan ñavin ca ñuhu ñicanyii.

<sup>14</sup> Tacan tan tandihí ndi nduvá ndi nu ñuhu. Tan tsifí yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenta nyaá ndaha un tsi yu? Tumaa iin quíti tsañi nyaá ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicuehé un”, catyí ndusu can tsihin yu.

<sup>15</sup> Tacan tan catyí yu: “¿Yóo yooho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un.

<sup>16</sup> Ndúvita nyityi. Tyin quituví yu nuu un ihya tyin tacan tan cua jaha tyíñu un nuu yu, tan cua cuví un tsandaa tsa cuenda tsa nyehe un ihya tan tsa cuenda tsa cua nyehe un ityi nuu ca.

<sup>17</sup> Yacan cuenda vityin jacuhún yu tsi un nu iyó nyívi tsa ñavin nyívi Israel cuví tan juvin ñi maa yu cua jacacu yu tsi un ndaha

ra Israel naha ra, tan ndaha nyívi tsa ñavin nyívi Israel cuví.

<sup>18</sup> Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndihí tucu ñi tsa vaha tsa tsahá Nyoo tsi nyívi tsa nacuhvá cuenda tsi ñi tsi yu”, catyí Jutu Mañi yo tsihin yu.

<sup>19</sup> Yacan cuenda yooho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu.

<sup>20</sup> Tacan tan tsa jihna ñi quítsahá caahán yu tuhun ra nda ñuu Damasco. Yahá can tan cahán yu tsihin nyívi ñuu Jerusalén tan tandihí ca ñuu tsa cayucú Judea. Tan caahán ndihí yu tsihin nyívi tsa ñavin nyívi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javahá ñi tsa vaha tumaa javahá nyívi tsa tsinú iñi tsi ra Cristo.

<sup>21</sup> Tan tsa cuenda tuhun ihya tñin ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu.

<sup>22</sup> Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihí nyívi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán yu.

<sup>23</sup> Tyin catyí ra naha tyin taahán tsi tsa cua nyehe ra Cristo tundoho. Tan tsa yahá tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyívi tyin cua jacoto ra nácaa cua cacu ñi, tahan ñi nyívi Israel tan nyívi tsa ñavin nyívi Israel cuví —catyí ra Pablo.

*Nu nducú ra Pablo cuhva tsa tsinu iñi ra rey Agripa tsi ra Cristo*

<sup>24</sup> Cuhva tsa catyí ra Pablo tuhun ihya, ra Festo canq tsaa ra, tan catyí ra:

—Jiñi yooho ña vaha cuñi, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

<sup>25</sup> Maa tyin ra Pablo catyí ra tsihin ra:

—Ñavin iñi yu ña vaha cuñi, yooho tata Festo. Tyin tsa caahán yu, maa ñi tsa nditsa tan tsa vaha cuví tsi.

<sup>26</sup> Ihya nyaá ra rey Agripa. Tan tsitó vaha ra tuhun ihya. Yacan cuenda ña yí caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi.

<sup>27</sup> Yooho rey Agripa, ¿a tsinú iñi un tuhun tsa tyaa ra cuví ndusu yuhu Nyoo tahan tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

<sup>28</sup> Tacan tan ra Agripa catyí ra tsihin ra:

—¿A cuñí yooho tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

<sup>29</sup> Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndihi tucu iñi tandihi nyivi tsa yucú tyaá soho tsa caahán yu ihya. Intuhun ñi tsa ña cuñí yu, tsa quihí cadena ndaha ndo tumaa maa yu vityin —catyí ra Pablo.

<sup>30</sup> Tsa yahá tsa cahan ra Pablo tuhun ihya, nduvitá rey tan ra ndacá ñaha tan ña Berenice, tan tandihi ra yucú ican naha ra.

<sup>31</sup> Tan tsa yahá quitá ñi, tan quitsahá natuhún tahan ñi:

—Nduve cuatyí ra ihya tsa ñihi xaan. Ña taahán tsi cúu ra. Tan ndi ña taahán tsi cunyií ca ra vehe caa —catyí ñi.

<sup>32</sup> Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsicán ra tsa cutuñi ra nuu ra cuví rey cahnu —catyí ra.

## 27

*Nu jacuhun ra Festo tsi ra Pablo nda ñuu Roma*

<sup>1</sup> Quivi tsa tyaá ra Festo tan ra Agripa cuhva tyin jacuhun ra naha tsi ndi nda ñuu Roma tsa canyíi Italia, nacuhvá cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto.

<sup>2</sup> Tan cuahán ndihi tucu ra Aristarco tsihin ndi. Ra tsa quee ñuu Tesalónica tsa canyíi ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuíi cuhun nyico tsi ñuu tsa cayucú Asia yatyin ñi yuhu ndutya ñuhu.

<sup>3</sup> Tsa inga quivi tsaá ndi puerto Sidón. Tan ra Julio vaha nyivi cuví ra tsihin ra Pablo. Tan tsahá ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra.

<sup>4</sup> Yahá can tan quitá ndi ñuu Sidón tan jandaá ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yahá tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can.

<sup>5</sup> Tacan tan yahá sava ndi nu ndutya ñuhu ityi nuu Cilicia tan Panfilia, tan tsaá ndi iin ñuu tsa nañi Mira tsa canyíi Licia. Tan quitá ndi tsitsi yutun ndoo can.

<sup>6</sup> Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi.

<sup>7</sup> Cuaha quivi tsicá ndi tyin cuee ñi cuahán ndi. Tsihin tundoho tan tsaá ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsahá tsi tsa cuhun ca ndi ityi nuu, tan yahá ndi yatyin ñi ñuu Salmón tsa canyíi ñuhu Creta. Tan navicó ndi ityi yuhu ñuhu Creta.

<sup>8</sup> Nducú ndi cuhva tsa cuhun ndi yuhu ndutya ñuhu, maa tyin tsihin tundoho tan tsaá ndi nu nañi Buenos Puertos yatyin ñi ñuu Lasea.

<sup>9</sup> Tsa cuaha xaan quivi yahá tyin cuee xaan tsicá ndi tsa cuenda tatyí tan ica xaan nanduvj tsa yahá ndi nu ndutya ñuhu. Tyin tsa yahá quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsahá cuenda ra tsi ra jacacá yutun ndoo can naha ra,

<sup>10</sup> tan catyí ra:

—Tandihí nyooho ra yucú ihya, tyaá soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin tandihí tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

<sup>11</sup> Maa tyin ra capitán cuenda andaru can tyaá yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo.

<sup>12</sup> Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyíi juvin ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyíi tsi tsiyo cana ñicanyii —catyí ra naha.

*Nu ñihi xaan yihí tatyí nu ndutya ñuhu*

<sup>13</sup> Tacan tan quitsahá yihí luxu tatyí tsa quítsi ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can.

<sup>14</sup> Ña cuaha ñi tsicá ndi tan quitsahá yihí tatyí xaan tsa quítsi ityi norte. Tan tandahá tsi yutun ndoo inga ityi.

<sup>15</sup> Tan ña cuví ca cuhun ndi ityi nuu ca tsa cuenda tatyí can. Tan jaña ndaha ndi na cuhun maa yutun ndoo tsihin tatyí ndáa ityi cuñí maa tsi.

<sup>16</sup> Tan yahá ndi ityi tsata iin ñuhu luhlu tsa nañi Claudia tyin ña ñihi xaan yihí tatyí ityi can. Tan tsihin tundoho naquihñi ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya.

<sup>17</sup> Tan tsa yaha natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsaññi ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañi tsi Sirte. Yacan cuenda januu ra naha jahma yutun ndoo can tan tsaññi ra naha tsa cuhun tsi cuhva tandahá tatyí.

<sup>18</sup> Tan tsa inga quivi juven ñi ñihi xaan yihí tatyí. Yacan cuenda quitsaha tyihí ra naha carga tsa yihí tsitsi yutun ndoo can nuu ndutya ñuhu.

<sup>19</sup> Tan tsa tsinu uñi quivi quihín ndi ndaha tyiñu yutun ndoo can tan tyihí ndi nu ndutya ñuhu.

<sup>20</sup> Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaq ca ndi cuhva tsa cua cacu ndi.

<sup>21</sup> Cuaha quivi yaha tan ña tsatsí ndi. Tacan tan catyí ra Pablo tsihin tandihí ra naha:

—Nyehe ndo, vaha ca tun tsatyin tyaq yahvi ndo tuhun tsa cahan yu quivi can, tan ndoo yu ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo.

<sup>22</sup> Tan cua cunaa ndihi yutun ndoo ihya, maa tyin ña caca iñi ndo tyin ndi intuhun yo tan ña cua cúu yo.

<sup>23</sup> Tyin Nyoo cuví ra yihí ndaha tsi yu, tan jahatyíñu yu tyiñu ra, juven ra janaha ra iin tsa janaha tsi yu cuñi. Tan quituví iin ángel nuu yu.

<sup>24</sup> Tan catyí ángel can tsihin yu: “Ña nayuhvi un, Pablo. Tyin cuñi tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu.

<sup>25</sup> Yacan cuenda nyooho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuví tumaa cuhva catyí ángel can tsihin yu.

<sup>26</sup> Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

<sup>27</sup> Tan tsa ndihi tsahun quivi tsa tsicá ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví iñi ra jacacá yutun ndoo can naha ra tyin cua tsaá ndi iin ñuhu.

<sup>28</sup> Tacan tan tyihí cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán

ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru.

<sup>29</sup> Tan yuuhví ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cuhun ca tsi ityi nuu. Tan tsa cuñi ra naha tsa cunditsin.

<sup>30</sup> Tan ra jacacá yutun ndoo can naha ra tyaq ra naha cuhva cunu xeehe ra naha. Tan yacan cuenda quitsaha januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha.

<sup>31</sup> Maa tyin ra Pablo jacotó ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuví cacu ndo —catyí ra tsihin ra naha.

<sup>32</sup> Tacan tan andaru tsahnyá ra naha yoho yutun ndoo luhlu can. Tan jacanacava ra naha can nu ndutya.

<sup>33</sup> Tan tsa naa ca ra Pablo catyí ra tsihin tandihí ra naha:

—Tsa iyó utsi cumi quivi tsa ña tsatsí ndo tan ña quixí ndo.

<sup>34</sup> Catyí yu tsihin ndo, çatsi ndo vityin. Ñiñi xaan cuñi tsi tsa catsi yo tyin tacan tan ndunyee cuñu ñuhu yo. Tyin cua cacu yo tan ndi intuhun ixi jiñi yo tan ña cua cunaa.

<sup>35</sup> Tan tsa catyí ra Pablo tuhun ihya, quihín ra iin paan tan nacuhva ra tyahvi nyoo tsi Nyoo nuu tandihí ra naha. Tacan tan tahví ra tan quitsaha tsatsí ra.

<sup>36</sup> Tacan tan tandihí ra naha ndu iin ca iñi ra naha tan tsatsí ndihi ra naha.

<sup>37</sup> Tan tsa tandihí ndi tsa yucú ndi tsitsi yutun ndoo can, quita uvi cientu uñi xico tsahun iin ndi.

<sup>38</sup> Cuhva tsa ndihi tsatsí ra naha cuhva cuñi ra naha tan jacuhun ra naha yitin tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaá tsi yatyin ñi yuhu ndutya.

#### *Nu nyee yutun ndoo*

<sup>39</sup> Yaha can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaq ra naha cuhva nyehe ra naha tatun cuví jacuhun ra naha yutun ndoo ican.

<sup>40</sup> Tsahnyá ra naha yoho tsa nuuhñi caa vee can. Tan nacoó ra naha can tsitsi ndutya ñuhu. Tan jandutaya ra naha vitu tsa janav-icó yutun ndoo. Tacan tan jandaá ra naha jahma tsa tuhvá ticaá ityi nuu tsi. Tan quitsaha quihín tatyí jahma can, tan jacuhún tsi yutun ndoo nda nu iyó nyiti can.

<sup>41</sup> Tan tsaá tsi nu tatahán ndutya. Tan nyee jiñi tsi tsitsi nyiti. Tan ña cuví ca tava

ra naha itsi. Tan ityi xuu tsi quitsahā tahví cuatyí can tsa cuenda tsa ñihi xaan cañi ndutya ñuhu can.

<sup>42</sup> Tacan tan andaru cuñi ra naha cahñi ra naha tsi ra cuahán cua cutuñi naha ra tyin coto cunu ra naha.

<sup>43</sup> Maa tyin capitán andaru cuñi ra jacacu ra tsi ra Pablo. Yacan cuenda ña tsaḥā ra tsa cahñi ra naha tsi ra can naha ra. Tan catyi ra tyin ndáa ra tsitó sutya, na cuhun cuée ñi ra naha nu ndutya tan quita ra naha nda ñuhu ityi.

<sup>44</sup> Tan tandihí ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahví cuatyí jahā ndutya ñuhu. Tan tacan cacū tandihí ndi tan quitā ndi ñuhu ityi.

## 28

### *Nu nyii ra Pablo ñuhu Malta*

<sup>1</sup> Cuhva tsa tsa yaha cacū ndi tan catyi nyivi iyó ñuhu can tyin nu yucú ndi can nañi tsi Malta, o Melita.

<sup>2</sup> Tan vaha xaan natuhún ñi tsihin ndi. Tan jataḥan ñi ñuhu tyin cuñi savi tan vitsin xaan. Tan catyi ñi tsihin tandihí ndi, na natuhva ndi yuhu ñuhu can tyin quita tsa vitsin tsi ndi.

<sup>3</sup> Tacan tan ra Pablo naquihín ra juhva nducu ityi. Tan tsitsi tsa tyihí ra can nu ñuhu, quitā iin coo tsitsi nducu can, tsa cuenda tsa ihñi. Tan tsatsj yihí ti ndaha ra, tan ticaá tsico ti ndaha ra.

<sup>4</sup> Cuhva tsa nyeḥe nyivi ñuhu can tyin ticaá coo can ndaha ra, quitsahā natuhún tahan ñi tan catyi ñi:

—Ra ihya nyivi tsaññi ra, tun cuví, tyin vasu cacū ra nu ndutya ñuhu, maa tyin Nyoo ña tsaḥá ca ra tsa coo ra tsa cuenda cuatyí ra —catyi ñi.

<sup>5</sup> Maa tyin ra Pablo naquisj ra tsi coo can, tan canacava ti nu ñuhu, tan nduve náa tahan ra.

<sup>6</sup> Tandihí ñi ndatú ñi náa cuhva ndaa nu tyaa ti, a náa cuhva cua cúu ra. Maa tyin tsa yaha ndatú xaan ñi, tan nyeḥe ñi tyin nduve maa náa tahan ra. Tacan tan nasama ñi cuhva tsicá iñi ñi, tan quitsahā catyi ñi:

—Ra ihya cuví iin nyoo —catyi ñi.

<sup>7</sup> Yatyin ñi can canyiñ ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra.

<sup>8</sup> Tan jutu ra ñihi xaan cuuhví ra tsihin cahñi tan tsa tsiyó ra. Tan tsaḥan ra Pablo tsinyeḥe ra nu canyiñ ra. Tan tsican tahvi ra tsa cuenda ra, tan tyisó ndaha ra jiñi ra. Tacan tan nduvahā ra.

<sup>9</sup> Yaha can tan quitsahā tsaá cuaha nyivi cuuhví tsa iyó ñuhu can. Tan nduvahā ndihí ñi.

<sup>10</sup> Tan tandihí ñi vaha xaan tyanuú ñi tsi ndi. Tan quivi quihví ndi tsitsi iin yutun ndoo tsa cua cuhun ndi, tsaḥā ñi tandihí tsa cua cutyiñu ndi ityi cuhun ndi.

### *Nu tsaq ra Pablo ñuu Roma*

<sup>11</sup> Uñi yoo tsiyucú ndi ñuhu Malta can. Tacan tan quihví ndi tsitsi iin yutun ndoo tsa quee nda ñuu Alejandria tsa canyiñ nu cuví Egipto. Tan ndoo tsi Malta nda yaha yoo vitsin. Tan jiñi yutun ndoo can nycéc tsa caá tumaa caá nyoo Cástor tan nyoo Pólux.

<sup>12</sup> Tan tsaq ndi ñuu Siracusa. Tan ican ndoo ndi uñi quivi.

<sup>13</sup> Tacan tan quitā ndi tan cuahán ndi ityi yuhu ndutya ñuhu nda cuenda tsaq ndi ñuu Regio. Tan tsa inga quivi can ñihi xaan yihí tatyí tsa quitsj ityi sur tan tsicā ndi uvi quivi tan tsaq ndi ñuu Puteoli.

<sup>14</sup> Ican ñihí tahan ndi tsihin juhva ra hermano naha ra. Tan catyi ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma.

<sup>15</sup> Tan nyivi yihí cuenda ra Cristo ñuu Roma can ñihí tuhun ñi tyin cua tsa ndi. Tan tsaḥan ñi tsijataḥan ñi tsi ndi ityi. Juhva ñi ndatú tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyeḥe ra Pablo tsi ñi, nacuhva ra tyahvi nyoo tsi Nyoo. Tan ndu iin ca iñi ra.

<sup>16</sup> Cuhva tsa tsaq ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsaḥā ra can tsa coo sñin ra Pablo. Tan jahá cuenda intuhun ñi andaru tsi ra.

### *Nu caahán ra Pablo tuhun Nyoo ñuu Roma*

<sup>17</sup> Tsa yaha uñi quivi tsa tsaq ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu iin ra naha, quitsahā catyi ra tsihin ra naha:

—Nyooḥo yañi, vasu nduve náa javahā yu tsi nyivi Israel tahan yo, tan ndi nduve náa javahā yu siqui tuhun tsahnu cuhva iyó yo, maa tyin tsaḥā cuenda ra Israel naha ra tsi yu tsi ra ñuu Roma naha ra. Tan tsinyij yu vehe caa ñuu Jerusalén ndaha ra ñuu Roma naha ra.

<sup>18</sup> Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javahā yu.

<sup>19</sup> Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha.

<sup>20</sup> Yacan cuenda caná yu tsi nyooho tyin nacoto yu tsi ndo, tan catyi tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuvi yo nyivi Israel —catyi ra Pablo.

<sup>21</sup> Tacan tan catyi ra Israel naha ra tsihin ra Pablo:

—Ña tsitó ndi tuhun yooho. Tan yoñi jacoto tsi ndi, ndi tsihin carta, tan ndi ra ñuu yo tsa quee nda Judea ña cahan ra naha tuhun yooho, tan nduve náa cahan ra naha siqui un.

<sup>22</sup> Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandihi ñi ityi tan caahan nyivi siqui tuhun tsa ihya —catyi ra Israel naha ra tsihin ra Pablo.

<sup>23</sup> Tacan tan natuhun tahan ra naha ndaa quivi cua huhun ra naha inga tsaha. Tsa tsa quivi can, tsa quaha nyivi nu iyó ra Pablo. Tan quitsaha caahan ra nda tsa tuvi tan nda cuanda tsacuaa náca ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuvi ndusu yuhu Nyoo tahan tsanaha, jacuahá ra tsi ñi tyin ra Jesús cuvi ra tsa jacacú tsi yo. Tan tacan javaha ra Pablo tyin cuñi ra tsa tsinu iñi ñi tsi ra Jesús.

<sup>24</sup> Yihí ñi tsinú iñi ñi tsa caahan ra. Tan inga ñi ña tsinú iñi ñi.

<sup>25</sup> Tan ña iin tsicá iñi ñi, siin siin tuhun caahan ñi. Tan quitsaha tsinuhú ñi. Tan ra Pablo catyi ra tsihin ñi:

—Nditsa tsa cahan Tatyí Ii Nyoo tsihin ra Isaias ra cuvi ndusu yuhu ra tahan tsanaha, tyin na cahan ra tsihin tsii tsaahnu yo. Tan catyi ra:

<sup>26</sup> Cuaahan tan cahan un tyehen tsihin nyivi ihya:

Nyooho cua cuñi ndo tuhun Nyoo, maa tyin ña cua cutuñi iñi ndo.

Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

<sup>27</sup> Tyin añima ñi tsa ndundava xaan tsi.

Tsiñi ñi, maa tyin ña tyaa yahvi ñi.

Tan ndasí tinuu ñi, tyin tacan tan ña cua cuvi nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñi ñi quihvi ñi tsitsi ndaha yu na janduvaha yu tsi ñi.

Tacan catyi ra Isaias jahá Tatyí Ii Nyoo tahan tsanaha.

<sup>28</sup> Coto vaha nyooho tyin vityin tan ityi nuu ca huhun yu cua jacoto yu tsi nyivi tsa ñavin nyivi Israel cuvi tyin jacacú Nyoo tsi ñi. Tan maa ñi cua tyaa soho ñi —catyi ra Pablo tsihin ñi.

<sup>29</sup> Cuhva tsa catyi ra Pablo tyehen, ra Israel caahan ra naha juvin ñi caahan yuhu tahan ra naha tsa cuenda tuhun tsa cahan ra Pablo tsihin ra naha.

<sup>30</sup> Uvi cuiya ndoo ra Pablo vehe nu nyii ra cuenda yoo ñuu Roma can. Tan vaha caahan ra tsihin tandihi nyivi cuahan vehe ra.

<sup>31</sup> Tan tsihin tsa ñi iñi ra tan caahan ra tuhun náca ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasi nu caahan ra.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

*Nu quitsahá tyaá ra Pablo carta*

1 Yuhu ra Pablo cuví yu iin ra jahá tyiñu tyiñu ra Jesucristo. Caná Nyoo tsi yu, tan nacatsí ra tsi yu tyin caca yu jacoto yu tuhun tsa jacacú ra tsi yo tsi nyívi.

2 Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaa ra naha nu tutu ra.

3 Juvín tuhun ihya caahán tyin Jutu Mañi yo Jesucristo, Sehe Nyoo, quítsi ra nu ñuhu ñayívi tan nanduví ra tumaa maa yo. Tan cuví ra tata ra rey David.

4 Tan Nyoo jacoto ra tsi yo tsihin Tatyí lí ra tyin Sehe ra cuví tsi ra tsa cuenda tsa janandoto ra tsi ra tsihin tunyee íñi tsa iyó tsi ra.

5 Tan tsa cuenda ra Jesucristo tsañá Nyoo tumañi íñi tsi ndi tsa caca ndi tyiñu ra, tyin na tsinu íñi nyívi iyó nanií cahnú nu ñuhu ñayívi tsi ra tan na tyaa yahví ñi tsi ra.

6 Tan juhva ñi ican cuví tucu nyooho tyin tsa nacatsí ra Jesucristo tsi ndo tyin cuví ndo nyívi cuenda ra.

7 Jaquítsi yu carta ihya tsi tandihí nyooho tsa iyó ñuu Roma. Nyoo cuñi xaan ra tsi ndo tan caná ra tsi ndo tyin cuví ndo nyívi ra tan jacahnú ndo tsi ra. Naquihin ndo tsa vaha tan na coo tsa taxín añima ndo jahá Jutu yo Nyoo tan Jutu Mañi yo Jesucristo.

*Nu catyí ra Pablo tyin cuñi ra cuhun ra ñuu Roma*

8 Tsa jihna ñi, tsañá yu tyahví nyoo tsi Nyoo tsihin sívi ra Jesucristo tsa cuenda tandihí nyooho tyin tandihí ñi ityi caahán nyívi tyin tsinú xaan íñi ndo tsi ra Jesucristo.

9 Jahá tyiñu yu tyiñu Nyoo tsihin tsa ñi íñi añima yu. Tan caahán yu tsihin nyívi nácaa jacacú Sehe ra tsi yo. Tsandaa cuví maa Nyoo tyin tsa tsicán tahví yu tsi ra, tsicán tahví yu tsa cuenda ndo.

10 Tan tsicán yu tsi ra na cuví cuhva cuñi ra, tan quítsi yu nu yucú ndo, tyin tsanaha xaan cuñi yu quítsi yu.

11 Tyin cuñi yu jatyinyee yu tsi ndo, tan naquihin ndo tsa vaha tsa tsaahá ra tsi yo tan cunyicun ñihi ca ndo tsi ra.

12 Tsa cuñi yu cahan yu tsihin ndo cuví tuhun ihya: tsa jandu iin tahañ yo íñi yo tsihin tsa tsinú íñi yo tsi ra.

13 Yañi, cuñi yu tsa coto ndo tyin cuaha xaan tsaha cuñi yu quítsi yu quítsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñi yu quítsi yu ñuu ndo tyin cuñi yu cahan ca

yu tuhun Nyoo tsihin nyívi tyin tacan tan nducuaaha ca ñi tsinu íñi tsi ra, tumaa javahá yu tsihin nyívi inga ca ñuu.

14 Tyin tsa ñiñi cuñi tsi cahan yu tuhun tsa jacacú ra Cristo tsi yo tsihin nyívi Grecia tan nyívi inga ñuu; tahañ ñi nyívi tsa tsitó xaan tan nyívi soho.

15 Yacan cuenda, cuñi yu cahan yu tuhun ra Cristo tsihin nyooho tsa iyó ndo Roma ihya.

*Tuhun Nyoo iyó xaan tunyee íñi itsi*

16 Yuhu ña cahan nuu yu caahán yu tuhun ra Cristo, tyin tunyee íñi Nyoo cuví tsi tan jacacú tsi tsi tandihí nyívi tsa tsinú íñi tsi ra Cristo. Tsa jihna ñi maa ñi maa tsihin nyívi Israel cahan ndi tuhun ra Cristo, maa tyin vityin caahán ndihí tucu ndi tsihin nyívi tsa ñavin nyívi Israel cuví.

17 Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvín ñi tsañá cuenda tucu tsi tsi yo, tyin janduvahá ra tsi yo tsa cuenda tsa tsinú íñi yo tsi ra tan ñavin náa inga ca cuenda. Catyi nu tutu ra: "Nyívi tsa janduvahá Nyoo añima, iyó ñi ñayívi tsa tsihin tsa tsinú íñi ñi tsi ra."

*Tandihí nyívi tan iyó cuatyí ñi*

18 Nyehé yo tyin Nyoo, ra nyaá gloria, tatsí tuñi ra tsi nyívi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu íñi inga ca nyívi tsa nditsa.

19 Tsitó ñi tsa iyó Nyoo tyin juvín ñi maa ra janahá can tsi ñi.

20 Ña cuví catyi yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa javahá ra. Tsanaha javahá ra ñuhu ñayívi tan yacan janahá tsi yo tyin iyó Nyoo tan iyó tunyee íñi tsi ra. Nyívi tsa ña cuñi coto tsi Nyoo ña cua coo tucahnú íñi tsi ñi.

21 Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahá ra, ña cuñi ñi jacahnú ñi tsi ra tumaa taahán maa tsi jacahnú yo tsi ra. Ña tsañá ñi tyahví nyoo tsi Nyoo tyin maa ñi maa tsa iyó nu ñuhu ñayívi tyaá jíñi ñi. Tan tsa cuenda yacan ndusoho ñi.

22 Vasu ndi maa catyi ñi tyin tsitó xaan ñi, maa tyin ña nditsa tyin nduve náa tsitó ñi.

23 Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyivi tuhvá tsihi, tan nda cuanda tsitoho tsa caá tumaa caá saa, tan coo, tan quíti iyó cumi tsaaha.

24 Yacan cuenda nacoq Nyoo tsi ñi nu tsa caquiñi tsa javahá ñi. Tan javahá ndihí tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu.

25 Ña cuñi ñi tsinú íñi ñi tuhun Nyoo tsa nditsa, maa tyin tsinú íñi ñi tsa ña nditsa.

Tyaá yahvi ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuvi tsi tacan.

<sup>26</sup> Yacan cuenda jaña ndaha Nyoo tsi ñi na javaha ñi tsa tsahá ticanuu tsi ñi. Tyin nda cuenda ñiñaha tan tsicoó ñi tsihin ñi nduyii, tan ña vaha tacan.

<sup>27</sup> Tan juvin ñi tacan javahá tucu rayii, nacoó ra naha tsa iyó ra naha tsihin ñasihi ra naha, tan iyó ra naha tsihin ra ndusihi naha ra tan tsahá ra naha ticanuu tsi yañi ra naha. Tan tsa cuenda can tatsi tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

<sup>28</sup> Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi.

<sup>29</sup> Tyin tandihi nuu tsa ña vaha javahá ñi. Ñiñaha tsicoq ñi tsihin rayii tan ña tindaha ñi. Rayii tsicoq ra naha tsihin ñaha tan ña tindaha ra naha. Maa ñi tsa caquiñi javahá ñi. Cuñí ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñí ñi nyivi. Cañí tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu.

<sup>30</sup> Caahán ñi ndavaha ñi siqui inga nyivi. Ndasí cuñí ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndí tsi shí ñi.

<sup>31</sup> Ña cuñí ñi cutuñi iñi ñi. Ña javahá ñi tsa catyí ñi tyin cua javaha ñi. Ña cuñí maa ñi tsi ndí intuhun nyivi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyivi.

<sup>32</sup> Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyivi javahá tacan, si xaan cuñí ñi.

## 2

*Tatsí tuñi Nyoo tsi nyivi maa tyin tsihin tsa nditsa*

<sup>1</sup> Nyooho tsa nyehé cuatyí tsa javahá inga nyivi, iyó cuatyí ndo tyin jacutuñí ndo tsi ñi tsa cuenda cuatyí javahá ñi. Yoñi jaha ndaa nyooho cuví ndo. Tyin tsa jacutuñí ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihí ndo cuatyí tsa javahá ñi.

<sup>2</sup> Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra.

<sup>3</sup> Nyooho tsa jacutuñí tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo.

<sup>4</sup> ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñí ra tsa nasama ndo cuhva iyó ndo.

<sup>5</sup> Maa tyin nyooho jandavá xaan ndo aña mado. Tan ña cuñí ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa.

<sup>6</sup> Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo.

<sup>7</sup> Nyoo cua cuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñí ñi coo cuivi ñi tsihin ra. Cua ñihi ñi tandihi yacan tyin nanducú ñi can.

<sup>8</sup> Maa tyin cuaha ca tsa uhvi cua janyehe ra tsi nyivi tsa javahá tsa cuñí maa ñi, ñi tsa ña tyaá yahvi tuhun nditsa, tan javahá ñi tsa ña vaha.

<sup>9</sup> Cuaha xaan tundoho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihí ra tsi nyivi tsa ñavin ñi Israel cuví.

<sup>10</sup> Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo aña mado. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihí ñi tandihi can.

<sup>11</sup> Tyin Nyoo inducu ñi cuñí ra nyehé ra tsi iin yo tan tsi inga yo. Ña tavá tsiyo ra ndí intuhun yo.

<sup>12</sup> Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can.

<sup>13</sup> Tyin nyivi tsa javahá cuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi.

<sup>14</sup> Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi.

<sup>15</sup> Tyin tsihin cuhva iyó ñi, janahá ñi tyin iyó ley Nyoo tsitsi aña mado. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi.

<sup>16</sup> Tacan cua cuví quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

*Nyivi Israel nyicún ñi ley Nyoo tsa tyaq ra Moisés*

<sup>17</sup> Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaq ra Moisés. Tan nduyaá ñi maa ndo tyin catyí ndo tyin nyivi Nyoo cuví ndo.

<sup>18</sup> Tan tsitó ndo kuhva cuñi Nyoo tan ley can janahá tsi tsi ndo tsa nacatsí ndo tsa vaha.

<sup>19</sup> Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsín ndo nu yucú nyivi nu naa, cuñi maa ndo.

<sup>20</sup> Tan cuñi tucu ndo tyin tsitó ndo tandihi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo.

<sup>21</sup> Taton tsitó ndo jacuahá ndo tsi inga nyivi, ¿nacuenta ña jacuahá ndo tsi maa ndo? Catyí ndo tyin ña vaha suhu yo, ¿nacuenta tyin suhú ndo?

<sup>22</sup> Juvín ñi catyí ndo tyin ña vaha coo inga ñaha tsi iin rayii, o inga rayii tsi iin ñaha, ¿nacuenta tyin maa ndo javahá ndo tacan? Ndasí cuñi ndo nyehe ndo tsitoho, ¿nacuenta tyin suhú ndo ndaha tyiñu tsa iyó tsitsi vehe ñuhu can?

<sup>23</sup> Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra.

<sup>24</sup> Yacan cuenda catyí tuhun Nyoo tyehen: “Nyivi tsa ñavin nyivi Israel cuví, caahán ñi ndavaha ñi siqui Nyoo tsacatyí nyooho.”

<sup>25</sup> Nditsa tyin circunción tsa cuví tuñi Nyoo, tsa janahá tyin cuví yo nyivi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaq ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can.

<sup>26</sup> Maa tyin rayii tsa nduve tuñi Nyoo nyisó, tan javahá ra kuhva catyí ley can, cua naquihin Nyoo tsi ra tumaa tsatyin nyisó ra tuñi can.

<sup>27</sup> Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo.

<sup>28</sup> Vasu ndi maa cuví ndo nyivi Israel tan nyisó ndo tuñi ra, ña cuví cuví ndo nyivi Nyoo tun nduve ley ra iyó añima ndo.

<sup>29</sup> Tyin nyivi iyó ley Nyoo añima, ñi ican cuví nyivi Nyoo. Tyin maa Tatyí Ii Nyoo tyaq tuñi ra añima ñi, tan ñavin cuñu ñuhu ñi. Tatyí Ii Nyoo javahá can, cuvin ley tsa tyaq ra Moisés. Nyivi ihya cua cuví nyivi vaha nuu Nyoo, tan ñavin nuu nyivi.

### 3

<sup>1</sup> ¿Nacaa jatyinyee tsa cuví yo nyivi Israel tsi yo? ¿O nácaa jatyinyee tuñi Nyoo tsi yo?

<sup>2</sup> Cuaha kuhva jatyinyee tsi tsi yo. Iin kuhva jatyinyee tsi tsi yo tyin Nyoo tsahá ra ley maa ra tsi yo tsa cuví yo nyivi Israel.

<sup>3</sup> ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsínú iñi yo tsi ra?

<sup>4</sup> ¡Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyivi vatya ñi, ra ican javahá ra tandihí tsa caahán ra. Tyin catyí nu tutu ra tyehen:

Jutu Mañi yu, cua nyehe nyivi tyin ña vatya un.

Tan cua coto ñi tyin nditsa tsa caahán un.

<sup>5</sup> Tsa caquiñi tsa javahá tandihí yoo, tsa iyó nu ñuhu ñayivi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyivi tyin ña vaha tsa tatsi tuñi Nyoo tsi yo tyin janahá yo tyin vaha ra?

<sup>6</sup> Nyivi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

<sup>7</sup> Taton javahá nyivi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa.

<sup>8</sup> Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyivi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

#### *Tandihí yo tan iyó cuatyí yo*

<sup>9</sup> Tan nácaa ¿a vaha ca yoo tsa cuví yo nyivi Israel tan ñavin ca inga nyivi? Ña vaha ca yo. Tyin tsa yahá jahahá yu tsi ndo tyin tandihí yo tan iyó cuatyí yo. An cuví yo nyivi Israel, o ña cuví yo nyivi Israel, maa tyin ndacá ñaha cuatyí tsi yo.

<sup>10</sup> Tacan catyí nu tutu Nyoo, nu catyí tsi tyehen:

Ndi intuhun nyivi vaha nduve iyó.

<sup>11</sup> Nduve nyivi cuñi cutuñi iñi tuhun Nyoo.

Yoñi cuñi nanducu tsi ra.

<sup>12</sup> Tandihí ñi nacoq ñi tsi Nyoo, tan tandihí ñi tan cuanaq ñi.

Ndi intuhun ñi tan ña javahá ñi tsa vaha.

<sup>13</sup> Jucun ñi cuví tsi tumaa iin ñaña ndiyi tsa ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

<sup>14</sup> Maa ñi tsa ndvaha ñi caahán ñi.

<sup>15</sup> Yatyí xaan tsahñi ñi tsi tahan ñi.

<sup>16</sup> Janyehé ñi tundoho tan tucuihya iñi tsi nyivi tsihin kuhva iyó ñi.

<sup>17</sup> Tan ña tsitó ñi nácaa coo taxin ñi tsihin Nyoo, tan ndi tsihin nyivi.

<sup>18</sup> Ndi ña tsicá iñi ñi tatun coo iin quivi cua tatsi tuñi Nyoo tsi ñi, catyí tuhun Nyoo nu tutu ra.



<sup>19</sup> Tsitó yo tyin tandihi tsa caahán ley Nyoo tsa tyaá ra Moisés, cuví tsi tsa cuenda nyívi tsa yihí ndaha ley can, tyin tacan tan ña cuví catyí ñi tyin nduve cuatyí ñi iyó. Maa tyin coto tandihi nyívi iyó nu ñuhu ñayívi tyin cua tatsi tuñi Nyoo tsi ñi tsa cuenda cuatyí ñi.

<sup>20</sup> Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

*Tsa cuenda tsa tsinú iñi yo tsi Nyoo tan nduvaha yo nuu ra*

<sup>21</sup> Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuví ndusu yuhu Nyoo janahá nácaa coo vaha yo tsihin Nyoo.

<sup>22</sup> Tyin tsa cuenda tsa tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyívi Israel o ñavin.

<sup>23</sup> Tandihí yo tan iyó cuatyí yo, tan tsa cuenda yacan ña cuví quihví yo nu ndacá ñaha Nyoo.

<sup>24</sup> Maa tyin tsahá maa ra tsa vaha ra tsi yo, tan yacan jahá tsa naquihín cuenda ra tsi yo tumaa tsatyin vaha yo, tyin tsa yaha tyahví ra Cristo Jesús tsa cuenda cuatyí yo. Tan yacan cuenda ña tsicán ca ra yahví tsi yo.

<sup>25</sup> Nyoo jaquitsí ra tsi ra Cristo tyin cúu ra nu cruu tan cati ra ñiñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuví, tyin nyehe nyívi tyin Nyoo javahá ra tsa vaha. Tahán tsanaha, Nyoo ña tñin cuenda ra cuatyí nyívi tsa cuenda tyin cua quitsi ra Cristo tan janaa ra cuatyí ñi.

<sup>26</sup> Tan tacan cuví tyin vityin nyehé nyívi tyin Nyoo tacan ñi maa vaha ra, tan naquihín ra tsi tandihí yo tsa tsinú iñi tsi ra Jesús tumaa tsatyin vaha yo.

<sup>27</sup> ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandihí tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra.

<sup>28</sup> Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

<sup>29</sup> ¿A Nyoo cuenda nyívi Israel ñi cuví Nyoo? ¿A ñavin juvin ñi cuví tucu ra Nyoo nyívi tsa ñavin ñi Israel cuví? Juvín ñi cuví tucu ra Nyoo ñi can.

<sup>30</sup> Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyívi Israel, o nduve.

<sup>31</sup> Tatun tacan, ¿a cuñí tsi catyí tyin nduve ca yahví nyaá ley tsahnu can? ¡Ñavin tsa nduve yahví nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

## 4

*Cuhva tsicoq ra Abraham janahá tsi tsi yo nácaa nduvahá yo nuu Nyoo*

<sup>1</sup> ¿Náa catyí yo tsa cuenda ra Abraham, tsií tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra?

<sup>2</sup> Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo.

<sup>3</sup> ¿Náa catyí nu tutu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra.

<sup>4</sup> Vaha, vityin cua cuhva yu iin cuhva tsi ndo: Ra jahá tyiñu, quihín ra yahví tsa cuenda tyiñu jahá ra tan ña tuhvá nyívi cuhva maa xuhun tsi ra tun ña jahá tyiñu ra.

<sup>5</sup> Maa tyin iin ra tsa ña jahá tyiñu tan ñiñi ra tsa ñiñi ra, ñiñi ndaahví ra itsi cuví can. Tacan cuví nyívi iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra.

<sup>6</sup> Ra David cahan ra siqui tsa sii cuví tsi nyívi tsa naquihín cuenda Nyoo tumaa tsatyin vaha ñi tan ña tñin cuenda ra cuatyí tsa javahá ñi.

<sup>7</sup> Tyehen catyí ra David:

Sii xaan cuví tsi nyívi tsa jahá Nyoo tucahnu iñi tsi

tan ña jahá ra cuenda cuatyí ñi.

<sup>8</sup> Sii xaan cuví tsi ñi tsa ña tñin cuenda Nyoo cuatyí.

<sup>9</sup> ¿A cuñí maa ndo tyin tsa cuenda nyívi nyisó tuñi Nyoo ñi cuví tusii iñi ihya, o cuví tucu tsi tsa cuenda nyívi ña nyisó tuñi can? Tsa yaha catyí yo tyin Nyoo jahá ra tyin vaha ra Abraham tsa cuenda tsa tsinú iñi ra tsi ra.

<sup>10</sup> ¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yaha? Ñavin tsa tsa yaha, tyin tsa ndi cumañi ca.

<sup>11</sup> Yaha tsa naquihín Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yaha nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo.

<sup>12</sup> Nditsa tyin ra Abraham cuví tucu ra jutu nyivi Israel, tandihi ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinu iñi maa ra Abraham, tsi tshahu yo, quivi tsa ñaha ca cunyaa tuñi can tsi ra.

*Tsihin tsa tsinú iñi yo ñihí yo tsa tsahá Nyoo tsi yo*

<sup>13</sup> Nyoo catyi ra tsihin ra Abraham tan tsihin tata ra tyin cua kuhva ra tsa cua cundaca ñaha ñi ñuhu ñayivi tsihin ra. Maa tyin tsa cahān Nyoo can tsihin ra, ñavin tsa cuenda tyin javahá ra tsa catyi ley, maa tyin tsa cuenda tyin tsinú iñi ra tsi Nyoo, tan Nyoo naquihñin ra tsi ra tumaa tsatyin vaha ra.

<sup>14</sup> Tun tsatyin maa ñi maa nyivi tsa javahá kuhva catyi ley, cua ñihí tsa cua kuhva Nyoo, nduve náa catyi tsinú iñi yo tsi ra, tan nduve yahvi nyaá tsa catyi ra tyin kuhva ra tsa cua kuhva ra tsi yo tun tsinú iñi yo tsi ra.

<sup>15</sup> Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo kuhva catyi tsi. Maa tyin tun tsatyin nduve ley iyó, ña cua coo cuatyí yo.

<sup>16</sup> Yacan cuenda ñihí yo tsa catyi Nyoo tyin kuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihi yoo tsa cuví tata ra Abraham. Ñavin maa ñi nyivi tsinú iñi tsi Nyoo tan tyaá yahvi ley tsa tyaá ra Moisés cua ñihí tsa cua kuhva Nyoo, tyin cua ñihí ndihi tucu nyivi tsa ña nyitá iñi ley, tatun tsinú iñi ñi tsi ra tumaa tsa tsinu iñi ra Abraham. Ra ihya cuví jutu tandihi nyivi tsa tsinú iñi tsi Nyoo.

<sup>17</sup> Tyin catyi ra nu tutu ra tyehen: “Yooho cua cuví tumaa jutu nyivi cuaha tsa cua coo nu ñuhu ñayivi”, catyi ra tsihin ra Abraham. Tan tsa catyi ra tacan, cuñí tsi catyi tyin cuví yo tata ra Abraham nuu Nyoo. Tsinu iñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

<sup>18</sup> Ra Abraham tsa tsahnu xaan ra quivi tsa catyi Nyoo tyin cua coo sehe ñasihi ra, tan tsitó ra tyin ña cuví ca coo sehe ñi. Maa tyin tsinu iñi ra tan ñihí ra tsa cahān Nyoo tsihin ra. Tan cuví ra jutu nyivi cuaha, tumaa cahān maa Nyoo tsihin ra: “Tyehen cua nducuaha nyivi tata un”.

<sup>19</sup> Vasu ndi maa tsa yatyin ña iin cientu cuiya ra Abraham, ña jandihí ra tsa tsinú iñi ra. Tahan ñi maa ra tan ña Sara ñasihi ra, ña cuví ca coo sehe ñi, tyin tsa cuyatyin cuii cúu ñi tyin tsahnu xaan ñi.

<sup>20</sup> Maa tyin ña ndu uví iñi ra tsa cua ñihí ra tsa catyi Nyoo tyin kuhva ra tsi ra. Tsinu iñi ra tsihin tsa ñi iñi añima ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo,

<sup>21</sup> tsa cuenda tyin tsitó vaha ra tyin Nyoo iyó tunyee iñi tsi ra tsa javaha ra tsa catyi ra tsihin ra.

<sup>22</sup> Yacan cuenda Nyoo naquihñin ra tsi ra tsa cuenda tsa tsinu iñi ra tsi ra.

<sup>23</sup> Tuhun tsa nyaá nu tutu Nyoo tsa catyi tyin naquihñin Nyoo tsi ra Abraham tsa cuenda tsa tsinu iñi ra tsi ra, ñavin tsa cuenda ra Abraham ñi cuví tsi,

<sup>24</sup> tyin tsinyaá tucu tsi tsa cuenda yoo. Tyin naquihñin Nyoo tsi yo tsa cuenda tsa tsinú iñi yo tsi ra, tyin juvin ra janandotó tsi ra Jesús, Jutu Mañi yo.

<sup>25</sup> Ra Jesús quitsi ra quitsi cúu ra tsa cuenda cuatyí yo, tan nandotó ra tyin tacan tan cuví nduvaha yo nuu Nyoo.

## 5

*Tsa cua ñihí yo tsa cuenda tsa nacoq vaha yo tsihin Nyoo*

<sup>1</sup> Tsa yahā nduvaha yo nuu Nyoo tsa cuenda tsa tsinú iñi yo tsi ra. Tan vityin iyó vaha yo tsihin ra jahā Jutu Mañi yo Jesucristo.

<sup>2</sup> Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñi yo tyin tsa naquihñin yo can. Tan sií cuñi yo tyin cua kuhva ra tsa cahnu cuví yo tan javaha yo tsa cuñi maa ra tyin javaha yo.

<sup>3</sup> Tan ñavin tsa cuenda yacan ñi taahán tsi cusí iñi yo, tyin taahán tucu tsi cusí iñi yo tun nyehé yo tundoho. Tyin tsitó yo tyin tun cunyee iñi yo nyehé yo tundoho, tacan cua cunyee iñi yo cuatu yo nda cuanda ñihí yo tsa cua kuhva Nyoo tsi yo.

<sup>4</sup> Tatun cunyee iñi yo yahá yo tandihi tundoho, sií cuñi Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra.

<sup>5</sup> Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí Ii ra tsa tsahā ra coo añima yo janahá tsi tsi yo tyin cuñi xaan ra tsi yo.

<sup>6</sup> Tsanaha yoo ña ñihí yo kuhva jacacú maa yo tsi yo. Tacan tan quivi tahañ maa tsi quitsi ra Cristo, quitsi cúu ra tsa cuenda cuatyí yo.

<sup>7</sup> Tsitó yo tyin ndi intuhun yo tan ña cana iñi yo cúu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasiqi cahnya iñi iin yo cúu yo tsa cuenda ñi.

<sup>8</sup> Maa tyin Nyoo jaquitsi ra tsi ra Cristo, tan yacan janahá tsi yo tyin cuñi xaan ra tsi yo. Quitsi ra quitsi cúu ra tsa cuenda yo vasu ndi maa iyó xaan cuatyí yo.

<sup>9</sup> Tan tsa cuenda tsa tsihi ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quivi cua tatsi tuñi Nyoo tsi nyivi ña tsinú iñi tsi ra.

<sup>10</sup> Tahañ tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihi ra Cristo, Sehe ra. Yacan

cuenda tsa nyitá vaha íñi yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra.

<sup>11</sup> Tan ñavin yacan ñi, taahán tucu tsi cusii íñi yo tsihin Nyoo tyin tsa cuenda Jutu Mañi yo Jesucristo tan nduvahá iyó yo tsihin ra.

*Ra Adán tan ra Cristo*

<sup>12</sup> Tsanaha intuhun ñi rayii tsicoq cuatyí, tan tsa cuenda intuhun ñi ra can tsaq cuatyí nanii ñuhu ñayivi tan tsicoq tuhun tsiihi. Tan tuhun tsiihi can nacuña can tyin tandihi nyivi tan tsicoq cuatyí ñi.

<sup>13</sup> Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tñn cuenda Nyoo cuatyí ñi tsa cuenda tyin nduve ley iyó.

<sup>14</sup> Maa tyin nda cuanda quivi tsicoq ra Adán tan nda cuanda quivi tsicoq ra Moisés, tsindaca ñaha tuhun tsiihi tsi tandihi nyivi tyin iyó cuatyí tandihi ñi, vasu ndi maa ña javahá ñi tumaa javahá ra Adán tsa ña tyaq yahvi ra tsa cahán Nyoo tsihin ra. Ra Adán quitsj ra tsihin cuatyí, maa tyin ra Cristo quitsj ra jacacu ra tsi yo.

<sup>15</sup> Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyivi. Tacan tucu vityin, Nyoo jacacu ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihi nyivi cuví tsi.

<sup>16</sup> Cuatyí ra Adán ña cuví jandu inducu yo can tsihin tsa jacacu Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñi ra yahvi tan jacacu ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoq.

<sup>17</sup> Nditsa tyin quitsahá ndacá ñaha tuhun tsiihi tsi tandihi nyivi jaha cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ícan iyó ñi ñayivi tsa tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

<sup>18</sup> Nyoo tatsí tuñi ra tsi tandihi nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo.

<sup>19</sup> Cuñi tsi catyí tyehen: Tsa cuenda tsa ña tyaq yahvi iin rayii tsa cahán Nyoo, cuaha xaan nyivi tsicoq cuatyí. Ra ícan cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaq yahvi inga ra tsa cahán Nyoo. Tan ra ícan cuví ra Cristo.

<sup>20</sup> Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa

cuenda ley can, tsa vaha Nyoo nducuahá tucu tsi tyin cahnu ca tucahnu íñi iyó tsi ra tsihin yo.

<sup>21</sup> Tahan tsanaha, cuatyí yo quitsj ndaca tuhun tsiihi, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

## 6

*Ña cua javaha ca yo tsa caquiñi tyin cua javaha yo cuhva catyí ra Cristo*

<sup>1</sup> ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu íñi tsi ra tsihin yo?

<sup>2</sup> Ña vaha. Tyin yoo tsa tsa ndu uvj íñi cuatyí tumaa tsa tsihi cuatyí yo cuví can. Tan yacan cuenda, ña cuví ca javaha yo tsa caquiñi vityin.

<sup>3</sup> ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñi tsi catyí tyin tsa yaha tsihi yo tsihin ra.

<sup>4</sup> Tsa quihví yo tsitsi ndutya tsa tsicoó ndutya yo cuví tsi tumaa tsa tsihi yo tan quihví ñuhu yo tsihin ra Cristo tsa tsihi ra. Tan tumaa tsa nandoto ra Cristo jaha Nyoo tsihin tunyee íñi ra, tacan nandoto tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsa tsihin ra.

<sup>5</sup> Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandoto ra.

<sup>6</sup> Tan tsitó yo tyin tandihi cuhva tsicoq yo tahañ tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí.

<sup>7</sup> Tyin nyivi tsa tsa yaha tsihi, ña cuví ca javaha ñi tsa caquiñi.

<sup>8</sup> Tan yoo tsa tsa tsihi tsihin ra Cristo, nyitá íñi yo tyin cua coo yo tsihin ra.

<sup>9</sup> Tsitó yo tyin ra Cristo nandoto ra tsa yaha tsihi ra, tan vityin ña cúu ca ra tyin nduve ca tunyee íñi iyó tsi tuhun tsiihi tsa cahñi can tsi ra.

<sup>10</sup> Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo.

<sup>11</sup> Tan tacan tucu nyoocho, ña javaha ca ndo tsa caquiñi. Ña naa íñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñi Nyoo tsihin tsa iin ñi cuví ndo tsihin ra Cristo Jesús Jutu Mañi yo.

<sup>12</sup> Yacan cuenda ña cūhva ca ndo tsa jaha canaa cuñu ñuhu cuatyí ndo tsi ndo. Ña cūhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi.

<sup>13</sup> Ña cūhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihí yo tan nandoto yo. Cūhva cuenda ndo cuñu ñuhu ndo tsi Nyoo tyin tacan tan javaha ndo tsa vaha.

<sup>14</sup> Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

*Musu tsa javahá tsa vaha*

<sup>15</sup> ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin.

<sup>16</sup> Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahví. Tun tyaá yahví yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahví yo tsi can. Maa tyin tun tyaá yahví yo tsi Nyoo, cua cuví yo nyivi vaha nuu ra.

<sup>17</sup> Tyahví nyoo tsi Nyoo, tyin vasu ndi maa nu quítsj tsi cuví ndo musu tsa caquiñi maa tyin vityin tyaá yahví ndo tuhun Nyoo tsa cutuhvá ndo tsihin tsa nui iñi añima ndo.

<sup>18</sup> Tsa yaha ndatsj cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo.

<sup>19</sup> (Caahán yu tsihin ndo cuhva tsa ña yii ñi cutuñi iñi ndo tyin nyooho ñaha ca cutuñí vaha iñi ndo tuhun Nyoo.) Tumaa tsa tsahá cuenda ndo cuñu ñuhu ndo tsi tsa caquiñi tahán tsanaha tan javahá ndo tsa ña vaha; tacan tucu vityin cūhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

<sup>20</sup> Quivi tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo.

<sup>21</sup> Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahá ndo tsanaha, tyin maa ñi tuhun tsihií tsahá can.

<sup>22</sup> Maa tyin vityin ña ndacá ñaha ca cuatyí tsi ndo tyin tsa tsahá cuenda ndo tsi ndo tsi Nyoo. Tan vaha xaan tyin maa ñi tsa cuñí Nyoo javahá ndo. Tan nu cua ndihí tuhun cua coo cuií ndo tsihin Nyoo.

<sup>23</sup> Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

## 7

*Ley tsahnu ña ndacá ñaha ca tsi tsi nyivi yihí cuenda ra Cristo*

<sup>1</sup> Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi.

<sup>2-3</sup> Tumaa iin ñaha tsa iyó yii, catyí ley tyin coo ña tsihin yii ña nda cuanda cúu ra. Maa tyin juvin ñi catyí tucu ley tun cúu yii ña tan nandoo ndaahvi ña, ña cua quihí ndaha ca ley can tsi ña. Tan cuvi tindaha ña tsihin inga rayii tan ña cua coo cuatyí ña. Maa tyin tsitsi tsa ndi iyó yii ña, ña cuvi coo ña tsihin inga rayii, tyin tun cua javaha ña tacan, cua coo cuatyí ña nuu Nyoo.

<sup>4</sup> Tan tacan tucu nyooho yañi. Tسانaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayii tsi ñasihi ra. Maa tyin vityin tsa yaha tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayii tsi ndo tan juvin ra cuví ra Cristo, ra tsa nandoto jahá Nyoo. Tyehen cuví tsehe tyin tacan tan cuatyíñu Nyoo tsi yo.

<sup>5</sup> Tahán tsanaha tsicoq yo cuhva cuñí cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsahá cuñí ca yo javaha yo tsa caquiñi tsa cuñí cuñu ñuhu yo. Tan yacan tsahá tuhun tsihií tsi yo.

<sup>6</sup> Maa tyin vityin ña ndacá ñaha ca ley tsahnu can tsi yo, tyin tsa yaha tsihí cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí li Nyoo tsi yo, na jaha tyiñu yo tyiñu Nyoo tan ña javaha ca yo tumaa javahá yo quivi yihí ndaha ley tsahnu tsi yo.

*Ley Nyoo janahá tyin iyó cuatyí yo*

<sup>7</sup> ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yo núa cuví cuatyí. Tan ndi ña cua coto yo tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo.

<sup>8</sup> Tun tsatyin nduve ley can iyó, ña cua coto yo núa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsitó yu ley Nyoo, quivi can quitsahá tsicá iñi yu javahá yu tsa ña vaha. Nu nduve ley iyó, ña tsitó nyivi núa cuví tsa ña vaha.

<sup>9</sup> Quivi tsa ña tsitó yu núa cuñí tsi catyí ley Nyoo tsa tyaá ra Moisés, nyito yu. Maa tyin quivi cutuñí iñi yu tsa caahán ley can, cutuñí iñi yu tyin nuu Nyoo tsa tsihí yu jahá cuatyí yu.

<sup>10</sup> Catyí ley can tyin tatun tyaá yahví nyivi itsi, cua coo cuií ñi ñayivi nyito. Maa tyin yuhu tsihí yu nuu Nyoo jahá ley can tyin ña tyaá yahví yu itsi. Tyin catyí tsi tyin nyivi tsa

ña tyaá yahvi itsi, taahán tsi cunaa ñi nuu Nyoo.

<sup>11</sup> Cuatyi yu tsatyíñu can ley can, tan jan-daví ñaha can tsi yu, tyin catyi ley tyin tatun ña tyaá yahvi yo itsi, taahán tsi cunaa yo nuu Nyoo.

<sup>12</sup> Ley can ii xaan tsi tyin tuhun tsahá maa Nyoo cuví tsi, tan tandíhi tsa catyi ra tyin javaha yo, vaha tsi, tan cuiti xaan tsi.

<sup>13</sup> Tan ñavin ley vaha ihya jacunaa tsi yu. Tyin tsa ña vaha tsa javahá yu, yacan jacunaa tsi yu. Yacan cuenda cunaa yu nuu Nyoo tyin ley vaha can janahá tsi yu tyin cuatyí cuví tsa javahá yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuví cuatyí javahá yo.

*Nu tsahá cuenda ra Pablo tsi yo kuhva iyó yo tun ña tsahá yo cundaca ñaha ra Jesucristo tsi yo*

<sup>14</sup> Tan tsitó yo tyin maa Tatyí Ii Nyoo tsahá ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu.

<sup>15</sup> Ña cutuñi ñi yu náa taahán yu, tyin tsa vaha tsa cuñi yu javaha yu, ña javahá yu can. Maa tyin javahá yu tsa ña vaha tsa ña cuñi yu javaha yu.

<sup>16</sup> Tan tsa javahá yu tsa ña cuñi yu javaha yu, tsihin yacan nacotó yu tyin ley Nyoo vaha tsi.

<sup>17</sup> Yacan cuñi tsi catyi tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha.

<sup>18</sup> Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñi yu javaha yu tsa vaha, ña cuví javaha yu can.

<sup>19</sup> Ña javahá yu tsa vaha tsa cuñi yu javaha yu, jañihí ca yu javaha yu tsa ña vaha tsa ña cuñi yu javaha yu.

<sup>20</sup> Tan tatun javahá yu tsa ña cuñi yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

<sup>21</sup> Nacotó yu tsa taahán yu: tun cuñi yu javaha yu tsa vaha, yatyi xaan ca javahá yu tsa ña vaha.

<sup>22</sup> Tsitsi aña yu taahán xaan ñi yu ley Nyoo.

<sup>23</sup> Maa tyin iyó inga ley tan yacan yihí ndaha cuñu ñuhu yu tsihin aña yu. Ña tsahá can tsa javahá yu tsa taahán ñi aña yu. Tan ñihi yihí ndaha can tsi yu tumaa yihí ndaha ra vitya tsi iin ra nyii vehe caa.

<sup>24</sup> ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñi cuñu ñuhu yu tan ña cahun yu anyaya?

<sup>25</sup> Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñi ñi yu tyin

cuñi tsi tyaá yahvi yu ley Nyoo. Maa tyin tun ña tyaá yahvi yu tsi ra Jesucristo, tandíhi tsa ña vaha tsa cuñi cuñu ñuhu yu javaha yu, yacan cua quihí ndaha tsi yu.

## 8

*Tatyí Ii Nyoo jatyinyeé tsi tsi yo tan cuví coo yo ñayivi tsa*

<sup>1</sup> Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca kuhva cuñi cuñu ñuhu ñi tyin iyó ñi kuhva cuñi Tatyí Ii ra.

<sup>2</sup> Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juven tsi tsahá ñayivi tsa coo yo tsa cuenda tsa iin ñi cuví yo tsihin ra Cristo Jesús.

<sup>3</sup> Nyoo javahá ra tsa ña cuví javaha ley tsa tyaá ra Moisés. Ley tsa tyaá ra Moisés ña cunyeé tsi jandíhi tsi kuhva iyó nyivi. Yacan cuenda Nyoo jaquitsi ra tsi Sehe ra. Cuví ra tumaa rayii ñuu ñayivi tan tyahvi ra tsa cuenda cuatyí yo tyin tacan tan cundihi tsa javahá yo kuhva cuñi cuñu ñuhu yo.

<sup>4</sup> Javahá ra tyehen tyin tacan tan cuví javaha yo kuhva catyi ley tan ñavin kuhva cuñi cuñu ñuhu yo tyin vityin iyó yo kuhva cuñi Tatyí Ii Nyoo.

<sup>5</sup> Nyivi tsa iyó kuhva cuñi cuñu ñuhu, maa ñi kuhva cuñi cuñu ñuhu ñi tsicá ñi ñi, maa tyin nyivi tsa iyó kuhva cuñi Tatyí Ii Nyoo tsicá ñi ñi kuhva cuñi Tatyí Ii Nyoo.

<sup>6</sup> Nyivi tsa tsicá ñi maa ñi maa tsa cuñi cuñu ñuhu ñi, cua cunaa ñi. Maa tyin yoo tsa tsicá ñi kuhva cuñi Tatyí Ii ra, cua coo yo ñayivi tsa, tan cua coo tsa taxin aña yu.

<sup>7</sup> Nyivi tsa tsicá ñi kuhva cuñi cuñu ñuhu ñi, ñi xaan ñi tsi Nyoo cuví ñi can, tyin ña cuñi ñi javahá ñi kuhva catyi ley ra tan ndi ña cuví javaha ñi can.

<sup>8</sup> Yacan cuenda nyivi tsa nducú tsa cuñi cuñu ñuhu ñi, ña cuví javaha ñi kuhva taahán ñi Nyoo.

<sup>9</sup> Maa tyin nyooho ña iyó ca ndo kuhva cuñi cuñu ñuhu ndo, tyin iin ñi cuví ndo tsihin Tatyí Ii Nyoo, tun nditsa tsa iyó Tatyí Ii Nyoo aña ndo. Nyivi tsa nduve Tatyí Ii ra Cristo iyó aña, ñavin nyivi cuenda ra Cristo cuví ñi.

<sup>10</sup> Maa tyin tun iyó ra Cristo aña ndo, nyitó aña ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí.

<sup>11</sup> Nyoo janandoto ra tsi ra Jesús tsa yahá tsihi ra. Tan tacan tucu nyooho, tatun iyó Tatyí Ii ra aña ndo, cua janandoto ra cuñu ñuhu ndo tsihin Tatyí Ii ra tsa iyó aña ndo.

<sup>12</sup> Tan tacan yañi, nyaá javaha yo tsa javaha yo, maa tyin ñavin tsa javaha yo kuhva cuñi cuñu ñuhu yo.

<sup>13</sup> Tyin tatun maa ñi maa cuhva cuñi cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñi cuñu ñuhu ndo, cua coo nyíto ndo.

<sup>14</sup> Tyin tandihí yoo tsa javahá cuhva jaquihín ityí Tatyí Ii Nyoo, sehe Nyoo cuví tsi yo.

<sup>15</sup> Nyooho ña naquihín cuenda ndo Tatyí Ii Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí Ii Nyoo tsa tsahá tsa cuví ndo sehe Nyoo. Tan juven ñi Tatyí Ii Nyoo tsahá tsa cahan yo tyehen tsihin Nyoo: "Tyatya". Yacan cuenda ña taahán tsi nayuhví ndo.

<sup>16</sup> Tan Tatyí Ii ra tsa naquihín yo ndu iin tsi tsihin tsa nyíto yo tan jacotó tsi naha tsi tsi yo tyin cuví yo sehe Nyoo.

<sup>17</sup> Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quiví cua tahan tsi, Nyoo cua jacahnu ra tsi yo iin caa ñi tsihin ra Cristo.

<sup>18</sup> Tsitó yu tyin tundoho tsa nyehé yo vityin, luhlu cuí ñi cuví tsi tan ña cuví jandu inducu yo itsi tsihin tsa sii caá tsa cua nyehe yo quiví tahan tsi.

<sup>19</sup> Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñi tsi naha tsi nyehe tsi naha tsi tsi nyiví cuví sehe ra.

<sup>20</sup> Tandihí tsa javahá ra, tsa iyó nu ñuhu ñayiví tan andiví, tsa tiví tsi. Vasu ña cuñi tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyiví. Maa tyin catyí ra tyin coo quiví cua ndutsaa nyico tsi.

<sup>21</sup> Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tiví ca tsi, tyin cua nasama Nyoo cuhva caá tsi vityin. Tan sii xaan cua cuñi tsi iin caa ñi tsihin tandihí sehe Nyoo tyin ña cua tiví ca tsi.

<sup>22</sup> Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña.

<sup>23</sup> Tacan tucu yoó tsa naquihín cuenda Tatyí Ii tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñi yo tsa tahan ñi tsi quiví tsa nasama Nyoo cuhva iyó cuñu ñuhu yo tan nyehe tandihí tsa javahá ra tyin cuví yo sehe ra.

<sup>24</sup> Vasu ndi maa ñaha ca ñihí yo tandihí can maa tyin tsitó yo tyin cua ñihí yo can tyin tsinú ñi yo. Tyin juven ñi tsihin tsa tsinú ñi yo tan cacú yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo.

<sup>25</sup> Maa tyin ndita ñi yo tsa cua ñihí yo tsa ña nyehe yo, cuñi tsi tsa cunyee ñi yo cuatu yo can.

<sup>26</sup> Tan juven ñi tacan jatyinyeé Tatyí Ii Nyoo tsi yo tun nduve tunyee ñi iyó tsi yo tan ña tsitó yo náca ndacan tahvi yo tsi Nyoo cuhva taahán maa tsi. Tatyí Ii tsa iyó aña yo tsicán tahvi tsi tsi Nyoo tsa cuenda yo tsihin tuhun tsa ña cutuñi ñi yo.

<sup>27</sup> Tsitó maa Nyoo náa iyó aña yo, tan tsitó ra náa tsicán Tatyí Ii ra, tsa cuenda yoo tsa cuví yo nyiví ra tyin tsicán tsi cuhva cuñi maa ra ndacan yo tsi ra.

*Tsa cuenda ra Cristo tan cuví jaha canaa yo síqui tundoho*

<sup>28</sup> Tsitó yo tyin tandihí tundoho tsa nyehé nyiví tsa cuñi tsi Nyoo jatyinyeé can tsi ñi, tyin maa Nyoo cuví ra nacatsj tsi ñi, tumaa cuhva tyaá maa ra cuhva.

<sup>29</sup> Tyin nda quiví jihna ñi, tan tsa tsitó Nyoo yóo nyiví cua cunyicun tsi ra. Tan tyaá ra cuhva tyin cuví ñi sehe ra tan coo ñi cuhva cuñi ra. Maa tyin ra Jesucristo cuví ra cua cuví ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo.

<sup>30</sup> Tan ñi tsa tyaá Nyoo cuhva tyin cuví ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsahá ra tsa cahnu cuví ñi tsihin ra.

<sup>31</sup> Yacan cuenda, ¿náa cua catyí yo? Tatun Nyoo tan nyaá ra tumañi ñi tsihin yo, ¿yóo cuví jaha canaa tsi yo? Yoñi.

<sup>32</sup> Nyoo ña catyí ra tsa ña cua cuhva cuenda ra Sehe ra, tyin tsahá cuenda ra tsi ra tyin cúu ra tsa cuenda tandihí yo. Tun tacan tsahá ra Sehe ra tsa cuenda yo, ¿a ña cua cuhva ra tandihí ca tsa tsiiñi ñuhu tsi yo? Cuhva ra.

<sup>33</sup> ¿Yóo cuví xico ñaha tsi yo tsa cuví yo nyiví nacatsj Nyoo? Yoñi. Tyin Nyoo tsa naquihín cuenda ra tsi yo tumaa tsatyin vaha yo.

<sup>34</sup> ¿Yóo cuví catyí tyin cuhun yo anyaya? Yoñi. Tyin ra Cristo tsa tsihj ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo.

<sup>35</sup> Nduve náa cuví quihin nyaá tsa cuñi xaan ra Cristo tsi yo. ¿A cuví quihin nyaá tundoho itsi, a tsihí, a tsa caahán nyiví tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsiihí? Ndi intuhun tsehe tan ña cuví quihin nyaá can tsa cuñi ra Cristo tsi yo.

<sup>36</sup> Tumaa catyí nu tutu Nyoo tyehen: Jutu Mañi yu, tandihí ñi quiví tan cuñi nyiví cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyí tsi.

<sup>37</sup> Vasu ndi maa cuaha tundoho yahá yo, maa tyin tandihi ñi tsaha tsa nyehé yo tundoho tan jahá canaa yo, tyin ra tsa cuñi xaan tsi yo jatyinyeé tsi yo.

<sup>38</sup> Yacan cuenda tsitó vaha yo tyin nduve maa náa cuví quihin nyaa tsa cuñi xaan Nyoo tsi yo. Ndi tuhun tsihi, ndi ñayivi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuví ityi nuu ca, ndi intuhun can tan ña cuví jandusiin can tsi yo tsihin Nyoo.

<sup>39</sup> Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusiin can tsi yo tsihin Nyoo, ra tsa cuñi xaan tsi yo tsa cuenda ra Cristo Jesús Jutu Mafi yo.

## 9

### *Nyoo nacatsi ra tsi nyivi Israel*

<sup>1</sup> Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí li Nyoo jaquihin ityi tsa tsicá iñi yu. Yacan cuenda tsitó vaha yu tyin tsa nditsa caahán yu tun catyí yu

<sup>2</sup> cuihya xaan cuñi yu tan uhvi xaan cuñi añima yu

<sup>3</sup> tsa cuenda nyivi ñuu yu, ñi Israel. Cuñi xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can.

<sup>4</sup> Tata ra Israel cuví ñi. Tan Nyoo naquihin cuenda ra tsi ñi tumaa tsa sehe ra tsi ñi. Tan janahá ra tsa cahnú cuví ra tsi ñi, tyin tsinyaá ra tsihin ñi. Tan ndoo ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñi ra tsa jacahnú ñi tsi ra. Tan catyí ra tsihin ñi nácaa cua javaha ra tsa vaha tsihin ñi nu cuahán ca tsi.

<sup>5</sup> Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juven ra ndacá ñaha tandihi tsa iyó. ¡Na jacahnú yo tsi ra tacan ñi maa! ¡Tan na cuví tsi tacan ñi!

<sup>6</sup> ¿A catyí yu tyin ña javahá Nyoo tumaa cuhva catyí ra tsihin nyivi Israel tahan tsanaha? Ñavin. Cuñi tsi coto yo tyin ña tandihi nyivi Israel tan cuví ñi nyivi Israel tsa nditsa.

<sup>7</sup> Tan tacan tucu ña tandihi tata ra Abraham tan cuví ñi tata ra tsa nditsa. Tyin tsa cahán Nyoo tsihin ra, cahán tsi tuhun intuhun ñi sehe ra. Tyin catyí Nyoo tsihin ra tyehen: “Tsa cuenda ra Isaac sehe un tan cua coo nyivi tata un.”

<sup>8</sup> Tsehe janahá tsi yo tyin ñavin tsa cuenda tsa cuví ñi nyivi tata ra Israel tan cuví ñi nyivi Nyoo. Tyin nyivi tsa tsinú iñi tsa cahán Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahán Nyoo tsihin ra

<sup>9</sup> Tan tyehen cahán Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyí Nyoo tsihin ra.

<sup>10</sup> Tan ñavin yacan ñi. Tyin cahán ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsii tsaahnu yo, ra Isaac.

<sup>11-12</sup> Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uví. Javahá Nyoo tacan tyin nacatsi ra tsi nyivi tsa cuñi maa ra nacatsi ra, tan ñavin tsa cuenda tsa javahá ñi.

<sup>13</sup> Tumaa catyí ra nu tutu ra tyehen: “Cuñi ca yu tsi ra Jacob, tan ñavin ca ra Esaú.”

<sup>14</sup> ¿Tun tacan náa cua catyí yo? ¿A catyí yo tyin ña vaha tsa javahá Nyoo? ¡Ña cuví!

<sup>15</sup> Tyin catyí ra tsihin ra Moisés: “Cua cundaahvi iñi yu yóo nyivi cuñi maa yu cundaahvi iñi yu.”

<sup>16</sup> Tacan javahá ra; cundaahvi iñi ra tsi nyivi tsa cuñi maa ra cundaahvi iñi ra. Tan ña cundaahvi iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahvi iñi yóo cuñi maa ra.

<sup>17</sup> Tumaa catyí nu tutu ra, nu caahán ra tyehen tsihin ra rey ñuhu Egipto: “Tsahá yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihi nyivi yóo ra cuví yuhu”, catyí Nyoo.

<sup>18</sup> Tan tsihin tsehe tsitó yo tyin Nyoo cundaahvi iñi ra tsi nyivi cuñi maa ra. Tan jandundavá tucu ra añima nyivi cuñi maa ra jandundavá ra añima.

<sup>19</sup> Tan vasiqui yooho cua catyí un: “Yoñi cuví javaha tsa cuñi maa ñi javaha ñi tun ña tsaha Nyoo tyin javaha ñi can.” ¿Nacuenta tyin tyaá Nyoo cuatyí siqui ñi?

<sup>20</sup> Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyí iin quisi tsihin ra javahá itsi: “Ña taahán iñi yu cuhva javahá un tsi yu?” Ña cuví.

<sup>21</sup> Tyin nyivi tsa javahá ndaha tyiñu, iyó ndatu tsi ñi tsa javaha ñi náa cuñi maa ñi tsihin ñuhu quisi can. Tan iin ñi ñuhu quisi can tsatyíñu ñi juven ñi tsihin can javaha ñi quisi vaha tan quisi peehe.

<sup>22</sup> Ña cuví catyí yo tyin ña vaha Nyoo tsa cuenda tsa tsatyíñu ra tsi nyivi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyivi caquiñi.

<sup>23</sup> Javahá ra tacan tyin tacan tan coto yoo tsa cuví yo nyivi tsa cundaahvi iñi ra tyin

nda tsanaha tan tsa nacatsj maa ra tsi yo tyin cuhva ra tsa cahnu cuví ra tsi yo.

<sup>24</sup> Yacan cuenda nacatsj ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví.

<sup>25</sup> Tumaa catyí Nyoo nu tutu tsa tyaq ra Oseas:

Nyívi tsa ñavin nyívi ñuu yu cuví cua catyí yu tyin nyívi yu cuví ñi.

Ñi tsa ña cuñi yu, cua cuñi yu tsi ñi, catyí Nyoo.

<sup>26</sup> Tan nu catyí Nyoo: “Nyooho ñavin nyívi yu cuví ndo.” Juvín ñi ícan cua catyí ra tsihin ñi: “Yuhu cuví Nyoo nyito, tan nyooho cuví sehe yu.”

<sup>27</sup> Maa tyin ra Isaías catyí ra tyehen tsa cuenda nyívi Israel: “Vasu ndi maa cuaha xaan nyívi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu.

<sup>28</sup> Tan tsa yatýin cuíi cua jandaa Jutu Mañi yo tandihi tsa cahan ra tan cua tatsi tuñi ra tsi tandihi nyívi iyó nu ñuhu ñayívi.”

<sup>29</sup> Tumaa catyí tucu ra Isaías tahán tsanaha:

Tun tsatyin Jutu Mañi yo, ra ndacá ñaha tandihi tsa iyó andívi, tan ña jacacú ra tsi juhva yo, tsa naq tandihi yo,

Tumaa naq nyívi ñuu Sodoma tan ñuu Gomorra tahán tsanaha.

*Nyívi Israel ña ñihí ñi cuhva nduvaha ñi nu Nyoo,*

<sup>30</sup> ¿Náa cua catyí yo? Nyívi tsa ñavin ñi Israel cuví, ña nducú ñi cuhva coo vaha ñi tsihin Nyoo, maa tyin Nyoo naquihín cuenda ra tsi ñi tumaa tsatyin vaha ñi tsa cuenda tsa tsínú ñi tsi ra.

<sup>31</sup> Tan nyívi Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra.

<sup>32</sup> ¿Nacuenta? Tsa cuenda tyin cuñi ñi nduvaha ñi nu Nyoo tsihin tsa javahá ñi, tan ñavin tsihin tsa tsínú ñi tsi ra. Yacan cuenda tumaa tsa catyihj tsaha ñi yuu tan nduva ñi cuví can.

<sup>33</sup> Yuu can caahán Nyoo tuhun nu tutu ra tan catyí ra:

Tsaquín nyaa yu iin yuu nda ñuu Sión, tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsínú ñi tsi ra tsa cuví yuu can, ña cua nduva ñi, catyí Nyoo nu tutu ra.

## 10

<sup>1</sup> Yañi, tsihin tsa ñi ñi añima yu tan tsicán tahvi yu tsa cuenda nyívi Israel tyin cuñi yu tsa cacu ñi.

<sup>2</sup> Tsandaa cuví yu tyin cuñi ñi jacahnú ñi tsi Nyoo, maa tyin ña ñihí ñi cuhva javahá ñi can.

<sup>3</sup> Tyin ña tsitó ñi tyin juvín ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi.

<sup>4</sup> Tyin ra Cristo tsa quítsj ra tan javahá ra tandihi tsa catyí ley, tyin tacan tan tandihi nyívi tsa cua tsínú ñi tsi ra, naquihín cuenda Nyoo tsi ñi tumaa tsatyin vaha ñi.

<sup>5</sup> Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandihi tsa catyí ley, tyin tyaq ra tyehen: “Nyívi tsa tyaá yahvi tandihi tsa catyí ley, cua coo ñi ñayívi tsa ña cua naa maa.”

<sup>6</sup> Maa tyin tsa cuenda tsa nduvahá yo nuu Nyoo tsihin tsa tsínú ñi tsi ra Cristo, catyí tutu ra tyehen: “Ña catyí un: ¿Yóo cundaa andívi? tyin tun cahan un tacan cuñi tsi catyí tyin januu un tsi ra Cristo nda nu ñuhu ñayívi tan jacacu ra tsi yo.” Ña cahan un tacan tyin ra Cristo tsa yahá quítsj ra.

<sup>7</sup> Tan ndi ña catyí un: “Cuñi tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandotó ra.

<sup>8</sup> Ña catyí un tacan tyin tyehen catyí nu tutu Nyoo: “Tuhun Nyoo yatýin iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsínú ñi ndo tyin juvín ñi tsi jacuahá tucu nyuhu.

<sup>9</sup> Tatun catyí un tsihin yuhu un tyin ra Jesús cuví Jutu Mañi yo, tan tsínú ñi un tsihin añima un tyin Nyoo janandotó tsi ra tsa yahá tshj ra, cua cacu un.

<sup>10</sup> Tyin tsihin añima yo cuñi tsi tsínú ñi tsi ra Cristo tan cuví nduvaha yo nuu Nyoo, tan tsihin yuhu yo cuñi tsi catyí yo tyin tsínú ñi yo, tyin tacan tan cacu yo.

<sup>11</sup> Tuhun Nyoo catyí tsi tyehen: “Ndi intuhun nyívi tsa tsínú ñi tsi ra tan ña cua tahán ñi ticanuu.”

<sup>12</sup> Tyin Nyoo inducu ñi cuñi ra nyehé ra tsi nyívi Israel tan nyívi inga ñuu. Tyin intuhun ñi maa ra ndacá ñaha tsi tandihi yo. Tan nasocó ra tsi tandihi nyívi tsa tsicán tahvi tsi ra.

<sup>13</sup> Tyin tyehen catyí tuhun Nyoo: “Tandihi nyívi tsa tsicán tahvi tsi Jutu Mañi yo cua cacu ñi.”

<sup>14</sup> Maa tyin ¿nácaa cua ndacan tahvi ñi tsi ra tatun ñaha ca tsínú ñi tsi ra? Tan ¿nácaa cua tsínú ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi?

<sup>15</sup> Tan ¿nácaa cuhan nyívi cahan ñi nácaa coo taxin nyívi, tatun yoñi jacuhun tsi ñi? Tumaa catyí nu tutu Nyoo: “Sii xaan cuví nu tsa ñi caahán tuhun vaha.”

<sup>16</sup> Maa tyin ña tandihi nyívi tan tyaá yahvi ñi tuhun tsa jacacú Nyoo tsi yo. Tumaa catyí



ra Isaías: “Jutu Mañi yu, yofiñ cuñi tsinu iñi tuhun caahán ndi”, catyi ra.

<sup>17</sup> Yacan cuenda cuñi tsi tsa tyaa soho jihna yo tuhun ra Cristo, tacan tan tsinu iñi yo tsi ra.

<sup>18</sup> Maa tyin tsicá tucu iñi yu: ¿A ña tsiñi nyivi Israel tuhun Nyoo? ¡Tsiñi ñi! Tumaa catyi nu tutu Nyoo:

Jutu Mañi yu, nyivi tsa jacotó tuhun un tsa jacotó ñi tuhun un naniñ cahnu nu ñuhu ñayivi,

tan ña nacoñ ihñi ñi ndi intuhun ñuu luhlu, catyi tsi nu tutu Nyoo.

<sup>19</sup> Tan tsicá nyico tucu iñi yu: ¿A ña cutuñi iñi nyivi Israel tyin cua cacu nyivi tsa ñavin ñi Israel cuví? ¡Cutuñi iñi ñi! Tyin tsa jihna ñi ra Moisés tyaa ra tuhun cañan Nyoo tsihin ñi Israel nu tutu tyehen:

Nyooho, ndasi cua cuñi ndo tyin cua cuhva yu tsa vaha tsi nyivi tsa ñavin nyivi ñuu yu cuví.

Tan cua cúu ndo tsihi nyehé ndo tsi ñi, catyi Nyoo.

<sup>20</sup> Tan ra Isaías cana iñi ra cañan ra: “Nyivi tsa ña nanducu tsi Nyoo, nañihñi ñi tsi ra.

Tan janañá ra tsi ra tsi ñi tsa ña tsicá tuhun tuhun ra.”

<sup>21</sup> Tan tyaa tucu ra Isaías tuhun cañan Nyoo tsihin ñi Israel tyehen: “Tandihi ñi quivi cana yu tsi nyivi yu, na nacuhva cuenda ñi tsi ñi tsi yu, maa tyin ña tyaa yahvi ñi. Tan jandavañ xaan ñi iñi ñi”, catyi Nyoo.

## 11

### *Nyivi Israel tsa ñihí cuhva cacu*

<sup>1</sup> ¿A ña cuñi ca Nyoo tsi nyivi Israel? Ñavin tsa ña cuñi ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu.

<sup>2</sup> Tahañ tsanaha nacatsj Nyoo tsi ñi Israel tyin cuví ñi nyivi ra. Tan vityin ñavin tsa jatsiyó cuñi ra tsi ñi. ¿A ña ñuhú iñi ndo tyin catyi nu tutu Nyoo tyin ra Elías, ra cuví ndusu yuhu Nyoo, catyi ra tyin ña vaha nyivi Israel tan tsicán tahvi ra tsi Nyoo tyehen?

<sup>3</sup> “Jutu Mañi yu, nyivi Israel tsañi ñi tsi ra cuví ndusu yuhu maa un naha ra, tan tsanñi ñi nu jacahnú nyivi tsi un. Tan intuhun ña maa yu ndog, tan cuñi ndihi ñi cahñi ñi tsi yu”, catyi ra.

<sup>4</sup> Maa tyin nacahañ Nyoo tan catyi ra tsihin ra Elías: “Ñavin maa ñi maa un ndog. Tyin utsa mül ca nyivi naquihñin vaha yu, ñi tsa ña jacahnú maa tsitoho Baal”, catyi Nyoo tsihin ra.

<sup>5</sup> Tan juvin ñi tacan vityin, ndog juhva nyivi jacahnú tsi Nyoo. Tan tsa cuenda tsa vaha Nyoo nacatsj ra tsi ñi tyin jaha ra tucahnú iñi tsi ñi.

<sup>6</sup> Tan ña jahá ra tucahnú iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnú iñi tsi yo tsa cuenda tsa javahá yo tsa vaha, cuñi tsi catyi tyin ña jacacú ra tsi yo tsihin tsa vaha ra.

<sup>7</sup> Tan ¿nácaa? Nyivi Israel nducu ñi cuhva nduvaha ñi nuu Nyoo, maa tyin ña ñihñi ñi cuhva. Juhva ñi ñihñi ñi cuhva. Tan ñi tsa ñihñi cuhva can cuví ñi tsa nacatsj maa Nyoo. Tan ñi tsa ña ñihñi cuhva cacu, ndundavañ añima ñi.

<sup>8</sup> Tumaa catyi nu tutu Nyoo tyehen: “Nyoo tsañá ra tsa ña cutuñi iñi ñi. Tan vasu ndi maa iyó tinuu ñi, ña tsañá ra tsa nyehé ñi. Iyó soho ñi, maa tyin ña cutuñi iñi ñi tsa tsiñi ñi. Tacan iyó ñi nda cuenda vityin.”

<sup>9</sup> Tan juvin ñi catyi tucu ra David tyehen: Javahá ñi vico tan cusii iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

<sup>10</sup> Tan cua cuaa ñi na ña nyehé ca ñi tsa nditsa.

Tan nacosu tsa vee siqui ñi, catyi ra David tuhun nyivi Israel tsa ña tsinú iñi tsi Nyoo.

*Nacaa nduvahá nyivi tsa ñavin ñi Israel cuví nuu Nyoo*

<sup>11</sup> Tan vityin tsicá tuhun yu: ¿A tsa cuenda tsa ña tyaa yahvi nyivi Israel tsa cañan Nyoo, tan ndoó cuñi ñi tsa ña cua cacu ñi? Ñavin tsa ndoo cuñi ñi. Ndog nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehé ñi yacan, ndasi cuñi ñi tan natsinu ndihi iñi ñi tsi Nyoo.

<sup>12</sup> Tatun cuaha nyivi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javahá ñi Israel, cuaha ca ñi cua natsinu iñi quivi tsa cua cuví nyico tandihñi nyivi Israel nyivi Nyoo.

<sup>13</sup> Cuñi yu cahan yu juhva tsihin nyooho tsa ñavin ñi Israel cuví. Ra Jesús tavañ tyiñu ra tsi yu tsa quitsi yu nu iyó ndo. Tan tsitó yu tyin cuñi tsi tsa javaha yu tyiñu ihya tyin cahnú xaan cuví tsi. Cahnu jahá yu itsi

<sup>14</sup> tan caahán yu tuhun Nyoo tsihin ndo tyin na nyehé nyivi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihi iñi ñi tan cacu ñi.

<sup>15</sup> Tyin tun tsa cuenda tsa ña natñin cuenda Nyoo tsi nyivi Israel tan nduvahá iyó nyivi inga ñuu tsihin Nyoo, quivi cua naquihñin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi.

<sup>16</sup> Iin cuhva tatun vaha quitá paan tsa javahá yo tsa jihna ñi tsihin yutsan paan, vaha tandihñi ca yutsan can. Tan tatun iin yoho yutun tan vaha tun, vaha tandihñi ca soco tun. Tacan tucu nyivi Israel nyaá yahvi

ñi nuu Nyoo tyin tsii tsaahnu ñi yihí ra naha cuenda ra.

<sup>17</sup> Tan nyivi Israel cuví ñi tumaa soco yutun olivo. Tan nyoocho cuví ndo tumaa soco yutun olivo cuuhu. Tumaa tuhvá nyivi tsaahnya iin soco yutun tan natyaa ñi inga soco yutun, tacan javahá Nyoo tyin jatsiyo ra tsi nyivi Israel tan tyaá ra tsi nyoocho tsa cuví ndo nyivi inga ñuu. Tacan cuví tan tsaá ndo cuví ndo nyivi cuenda Nyoo tan naquihín ndo tandihí tsa vaha tsa iyó tsi ra.

<sup>18</sup> Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá ñi ndo tacan nducuhun ñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

<sup>19</sup> Vasiquí cua catyí ndo: “Juvín, maa tyin Nyoo tsaahnya ra soco yutun can tan natyaa ra tsi nyuhu.”

<sup>20</sup> Ndítsa. Maa tyin jatsiyo nuu ñi ra tsi nyivi Israel tsa cuenda tsa ña tsinú ñi tsi ra. Tan tyacu ra tsi nyoocho tsa cuenda tsa tsinú ñi ndo tsi ra. Yacan jaha ndo cuenda tsa ña nduyaa ndo tsihin can.

<sup>21</sup> Tyin tatun ña jaha Nyoo tucahnu ñi tsi ñi tsa cuví soco vaha can, ndi nyoocho tan ña cua jaha ra tucahnu ñi tatun ña tsinú vaha ñi ndo tsi ra.

<sup>22</sup> Nyehe ndo tyin vaha xaan ñi Nyoo, maa tyin xaan tucu ra tsihin nyivi tsa ña naquihín cuenda tumañi ñi tsa tsahá ra tsi ñi. Vaha ñi ra tsihin nyoocho yacan tyaa yahvi ndo tsa vaha tsa tsahá ra tsi yo. Tyin tatun ña tyaá yahvi ndo itsi, cua jatsiyo nyico ra tsi ndo tsaha yutun olivo ra.

<sup>23</sup> Tyin tatun natsinu nyico ñi nyivi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee ñi tsi ra tsa natyaa tahan nyico ra tsi ñi inga tsaha.

<sup>24</sup> Nyoocho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihín ra tsi ndo tan tyaá tahan ra tsi ndo tsihin yutun olivo vaha tsa cumí ra. Tacan cua javaha ra quivi cua cuñi ra iin yaha ñi cua tyaá tahan nyico ra soco yutun vaha nu tsinyaa jihna maa tsi.

*Nyivi Israel cua cacu nda nu ndihí*

<sup>25</sup> Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca ñi ndo tyin tsitó xaan ndo. Cuaha xaan nyivi Israel ndundavá añima ñi, nda cuanda cacu tandihí nyivi inga ñuu tsa nyaa tyin cacu.

<sup>26</sup> Tsa yaha cua cacu ñi, tacan tan cua cacu tandihí nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra. Tan cua quihin nyaa ra cuatyí nyivi ra Jacob.

<sup>27</sup> Tuhun ihya cuví tsa cua ndoo yu tsihin ñi quivi cua quihin nyaa yu cuatyí ñi, catyí Nyoo nu tutu ra.

<sup>28</sup> Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu ñi nyoocho. Tahán tsanaha nacatsí Nyoo tsi ra Abraham, tan ra Isaac, tan ra Jacob tyin tsinú ñi ra naha tsi ra. Tan cuñi ndihí ra tsi nyivi Israel tyin tata ra naha cuví tsi ñi.

<sup>29</sup> Tyin tsa tsa tsahá Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo.

<sup>30</sup> Tsanaha nyoocho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahví ñi ra nyehé ra tsi ndo tsa cuenda tsa ña tyaá yahvi nyivi Nyoo tsi ra.

<sup>31</sup> Nyivi Israel ña tyaá yahvi ñi tsi Nyoo vityin tumaa tsa ña tyaá yahvi nyoocho tsi ra tahán tsanaha. Maa tyin cua cundaahví ñi ra nyehé ra tsi ñi tumaa tsa cundaahví ñi ra nyehé ra tsi nyoocho.

<sup>32</sup> Yihí tsaha tandihí nyivi tan nacoó ñi tsa tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahví ñi ra tsi tandihí yo.

<sup>33</sup> ¡Cahnu xaan cuví tsa cuca tan tsa tsitó Nyoo tan tsa tsiniñ tuñi tsa iyó tsi ra! Yoo ña cuví nacatyí tuhun yo cuhva tsicá ñi ra, tan ndi iin sava quivi ña cua cutuñi ñi yo tandihí cuhva javahá ra.

<sup>34</sup> ¿Yóo cutuñi ñi cuhva tsicá ñi Jutu Mañi yo? ¿O yóo jacuahá tsi ra? Yoñi.

<sup>35</sup> Tyin yoñi cuví cuhva jihna iin tsa vaha tsi ra, tan tsa cuenda can tan cuita ñi ñi tyin cua naquihín ñi yahvi cuenda can.

<sup>36</sup> Tyin tandihí maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

## 12

*Na javaha yo cuhva cuñi Nyoo tsihin ñayivi iyó yo*

<sup>1</sup> Yacan cuenda yañi, tsitó ndo tyin cundaahví xaan ñi Nyoo nyehé ra tsi yo, tan tsa cuenda yacan caahán ndaahví yu tsihin ndo. Cuhva cuenda ndo cuñi ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin ndítsa tsa jacahnú yo tsi ra. Yacan cuví tsa taahán ñi ra.

<sup>2</sup> Na ço ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá ñi ndo, tan cuhva iyó ndo, tyin tacan tan coto ndo javaha ndo tsa taahán ñi maa ra: náa ndihí tsa vaha tan tsa cuiti.

<sup>3</sup> Nyoo, tsa cuenda tsa vaha ñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihí nyoocho tyin ndi intuhun ndo tan ña çaca ñi ndo tyin vaha xaan ndo. Maa tyin çaca ñi ndo náca iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú ñi ndo tsi ra.

<sup>4</sup> Tumaa soho yo tan tinuu yo iin ñi cuví tsi tsihin tandihí ca tahan tsi tsa iyó iin cuñu ñuhu. Tan tsa intuhun intuhun tsi siin siin tyiñu javahá tsi.

<sup>5</sup> Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

<sup>6</sup> Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñí maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi.

<sup>7</sup> Tatun tsahá ra ndatu tsi iin yo tsa jatyinyee yo tsi nyívi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuaha yo tsi nyívi, na jacuaha yo tsi ñi tsihin tsa ñi iñi yo.

<sup>8</sup> Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyee yo tsi nyívi tsihin xuhun, na jatyinyee yo tsi ñi, maa tyin ña cuita iñi yo tyin natyahví ñi tsi yo. Tatun inga yo ñihí tsa jaquihin ityi yo tsi nyívi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyee yo tsi nyívi tsa iyó tsa tsiñí ñuhu, na jatyinyee yo tsi ñi tsihin tsa si cuñí yo.

*Ñaa taahán tsi javaha nyívi yihí cuenda ra Cristo*

<sup>9</sup> Cuñi tahan ndo tsi ndo tsihin tsa ñi iñi añima ndo. Ndasí cuñi ndo nyehé ndo tsa ña vaha. Tan cuanyicun ndo tsa vaha.

<sup>10</sup> Cuñí tsi tsa cuñi tahan yo tsi yo tumaa tsa cuñí yo tsi nyívi yo. Tan tyaa yahví tahan ndo tsi ndo tan jaha tahan ndo tsa ñayívi tsi ndo.

<sup>11</sup> Ndücu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

<sup>12</sup> Cqo ndo ñayívi ihya tsihin tsa si, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndacan tahvi ndo tsi Nyoo iin nyita ñi.

<sup>13</sup> Cuhva ndo tsa tsiñí ñuhu tsi nyívi yihí cuenda Nyoo tsihin ndo. Vaha tyañuu ndo tsi nyívi tsaá vehe ndo.

<sup>14</sup> Tatun caahán nyívi ndavaha ñi tsi ndo, vaha çahan ndo tsihin ñi, tan ña çahan ndasí ndo tsi ñi. Ndacan tahvi ndo tsi Nyoo tsa cuenda ñi, na nasoco ra tsi ñi.

<sup>15</sup> Si cuñi ndo tsihin nyívi si cuñí. Vacu ndo tsihin nyívi tsa tsacú jahá tucuihya iñi.

<sup>16</sup> Ña çañi tahan ndo. Iin ñi cuví ndo tsihin tahan ndo. Ña cahnu jaha ndo tsi ndo;

jandundaahvi ndo tsi ndo tumaa iyó nyívi ndaahvi; ña jaha ndo tsa tsitó xaan ndo.

<sup>17</sup> Ña javaha ndo tsa ña vaha tsihin nyívi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyívi.

<sup>18</sup> Ndücu ndo cuhva coo taxin ndo tsihin tandihí nyívi.

<sup>19</sup> Yañi, cuñí yu tsi ndo. Tatun javahá nyívi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyívi tan tyahví tsi ñi”, catyí Jutu Mañi yo.

<sup>20</sup> Tan juven ñi catyí tucu ra: “Tatun nyívi xaan iñi tsi ndo tan tsisocó ñi, cuhva ndo tsa catsi ñi, tan tatun na ityi iñi ñi, cuhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.”

<sup>21</sup> Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan çasi ndo nu vatsí tsa ña vaha tsihin can.

## 13

<sup>1</sup> Tandihí nyívi cuñí tsi tsa tyaa yahví ñi tsi ra cumí tyiñu cuenda ra ndacá ñaha naha ra. Tyin tandihí maa ra cumí tyiñu tan Nyoo tsahá tyiñu can tsi ra naha. Ra cumí tyiñu tsa iyó, maa Nyoo tsahá tsi ra naha tsa cuví ra naha tyiñu.

<sup>2</sup> Yacan cuenda, nyívi tsa ña tyaa yahví tsi ra naha, cuñí tsi catyí tyin ña tyaa yahví ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi.

<sup>3</sup> Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyívi tsa javahá tsa vaha. Nyisó tyiñu ra naha tsa tatsi tuñi ra naha tsi nyívi tsa javahá tsa ña vaha. Tun ña cuñí un tsa jayuhvi ra cumí tyiñu naha ra tsi un, cqo vaha, tyin tacan tan cua nyehe ra naha tyin vaha iyó un tan vaha nyívi cuví un.

<sup>4</sup> Tyin ra cumí tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuví nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyívi javahá tsa ña vaha, tyin tyiñu can tyaa Nyoo tsi ra naha.

<sup>5</sup> Yacan cuenda ñiñi cuñí tsi tsa tyaa yahví ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo.

<sup>6</sup> Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

<sup>7</sup> Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi.

<sup>8</sup> Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés tyin javaha yo.

<sup>9</sup> Catyí ley Nyoo tyehen: “Tun iyó ñasihi ndo o yíi ndo ña coo inga ñaha o rayíi tsi ndo. Ña cahñi ndo. Ña suhu ndo. Ña çahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihí tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo.

<sup>10</sup> Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés.

<sup>11</sup> Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra.

<sup>12</sup> Tsa yahá tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsahá Nyoo tsi ndo; javaha ndo cuhva javahá nyivi iyó nu nditsin.

<sup>13</sup> Cuñi tsi cuiti coo yo tyin nu nditsin Nyoo iyó yo. Tan ña coho ndo nyixi, ña javaha ndo vico tan coho ndo nyixi. Nyooho rayíi, ña çaca nuu ndo tsihin ñaha. Tan nyooho ñaha ña çaca nuu ndo tsihin rayíi. Ña coo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi.

<sup>14</sup> Maa tyin coo ndo tsihin Jutu Mañi yo Jesucristo, tumaa tsinditsi yo jahma tacan na cunditsi yo tsi ra. Tan ña çaca iñi ndo javaha ndo cuhva cuñi cuñu ñuhu ndo.

## 14

*Na ña çahan nyaa yo tsi nyivi*

<sup>1</sup> Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña çahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi.

<sup>2</sup> Cua cuhva yo iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo.

<sup>3</sup> Maa tyin ñi tsa tsatsí tandihí can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña çahan nyaa ñi tsi inga ñi can. Tyin Nyoo naquihin cuenda ra tsi ñi can.

<sup>4</sup> Tan çyóo nyivi cuví yooho tan çahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatinyee ra tsi ñi na quita vaha ñi.

<sup>5</sup> Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi çahnu cuví tan quivi ña çahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihí tuñi vaha iñi yo.

<sup>6</sup> Ñi tsa naquihin vaha quivi, naquihin vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihin vaha can, juven ñi jacahnú tucu ñi tsi Nyoo tyin ña naquihin vaha ñi can. Tan ñi tsa tsatsí tandihí can, juven ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihí, ña tsatsí ñi tsa cuenda tsa jacahnú ñi tsi Jutu Mañi yo tan juven ñi nacuhvá tucu ñi can tyahvi nyoo tsi ra.

<sup>7</sup> Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihi yo.

<sup>8</sup> Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsihi yo, tsihi yo tsa cuenda Jutu Mañi yo tan naquihin ra añima yo. Yacan cuenda tsi maa Jutu Mañi yo cuví tsi yo vasu ndi maa nyito yo o tsihi yo.

<sup>9</sup> Tyin ra Cristo tsihi ra tan nandoto ra tyin cundaca ñaha ra tsi nyivi nyito tan nyivi ña nyito.

<sup>10</sup> Maa tyin yooho, çnacuenda nyehé nyaa un tsi ra yañi un? ¿o nacuenda ña naquihin cuenda un tsi ra?, tan tsitó vaha un tyin tandihí yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo.

<sup>11</sup> Tumaa tsa catyí Nyoo nu tutu ra tyehen: Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñi tsi cuñi tsi tandihí nyivi nuu yu. Tandihí ñi tan cua nacoto ñi tsi yu tsa cuví yu Nyoo.

Tan nuu tandihí nyivi cua çahnu ñi tsi yu, catyí Nyoo.

<sup>12</sup> Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

*Ña çanacava ndo tsi yañi ndo nu cuatyí*

<sup>13</sup> Yacan cuenda, ña taahán tsi çahan nyaa ca ndo tsi nyivi. Maa tyin nducu ndo cuhva

tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo.

<sup>14</sup> Yuhu tsitó yu tyin cuví catsí yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsí ñi tandihí, tsa cuenda maa ñi ña cuví catsí ñi can.

<sup>15</sup> Maa tyin tatun tsa cuenda tsa tsatsí ndo tan ndasi cuñí yañi yo, ña nditsa tsa cuñí ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihiñ ra tsa cuenda ra.

<sup>16</sup> Ña cuhva ndo tsa cahan nyívi ndavaha ñi siqui tsa tsahá Nyoo ndatu tyin catsí yo.

<sup>17</sup> Yacan ndacá ñaha Nyoo tsi yo ña ñiñi xaan náa tsatsí yo o náa tsihiñ yo. Tsa ñiñi ca cuví tsa vaha iyó yo nuu ra, tan tsihin tsa sii cuñí yo, tan taxin iyó añima yo jahá Tatyí Ii ra.

<sup>18</sup> Nyívi jahá tyiñu tyiñu ra Cristo tacan, sii cuñí Nyoo nyehé ra tsi ñi, tan tacan tucu nyívi sii cuñí ñi nyehé ñi tsi ñi.

<sup>19</sup> Yacan cuenda cuñí tsi jañiñi yo tsi yo tan coo vaha yo tsihin nyívi. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo.

<sup>20</sup> Ndi intuhun ndo tan ña jatívi ndo tyiñu jahá Nyoo tsitsi añima inga nyívi tsihin tsa tsatsí ndo. Nditsa tyin tandihí tsa tsatsí yo tan vaha tsi. Maa tyin ña vaha tsa catsí yo iin tsa tsatsí yo tatun tsihin can janacava yo tsi nyívi nu cuatyí.

<sup>21</sup> Yacan cuenda, vaha tsa ña catsí yo cuñu, ndi ña coho yo vinu tatun ndasi cuñí yañi yo nyehé ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo.

<sup>22</sup> Cuhva tsa tsinú iñi yo tsa cuenda tandihí yacan ña cahan yo tuhun can tsihin inga nyívi. Na coto intuhun ñi maa yo can tsihin Nyoo. Sii xaan cuñí yo tatun ña uvi tsicá iñi yo javahá yo tsa tsahá Nyoo ndatu tyin javahá yo.

<sup>23</sup> Maa tyin nyívi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsí ñi can. Tan tandihí tsa javahá yo tsihin tsa ña tsinú iñi yo tyin tsahá Nyoo ndatu javaha yo can, cuatyí cuví.

## 15

*Na javaha yo tsa taahán iñi nyívi yihí tuhun Nyoo tsihin yo, tan ñavin tsa taahán iñi ñi maa yo*

<sup>1</sup> Yoo tsa vaha cuanyicún tsi Nyoo, cuñí tsi tsa jatyinyee yo tsi nyívi tsa ñaha ca tsinú vaha iñi tsi ra. Jatyinyee yo tsi ñi na tsinú ca iñi ñi. Tan na ña nducu yo maa ñi maa tsa taahán iñi maa yo.

<sup>2</sup> Intuhun intuhun yo cuñí tsi tsa javaha yo cuhva taahán iñi inga nyívi tatun cuví

tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo.

<sup>3</sup> Tyin ndi ra Cristo tan ña javahá ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihí tsa ndavaha ñi tsa cahan nyívi siqui Nyoo, siqui ra Cristo ndoo can”, catyí tsi.

<sup>4</sup> Tyin tandihí tsa tsinyaá nu tutu Nyoo tahan tsanaha, tsinyaá tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahví yo itsi jandu iin tsi iñi yo.

<sup>5</sup> Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñí añima yo. Na jatyinyee ca ra tsi yo coo vaha yo tan iin ñi cuví yo tumaa taahán iñi ra Cristo Jesús.

<sup>6</sup> Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

*Nyívi tsa ñavin ñi Israel cuví, cua coto ñi tuhun Nyoo*

<sup>7</sup> Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo.

<sup>8</sup> Tan catyí yu tsihin ndo: ra Cristo quítsi ra quítsi jatyinyee ra tsi nyuhu tsa cuví nyívi Israel, tyin tacan catyí Nyoo tsihin tsii tsaahnu ndi tyin cua javaha ra. Tan tacan janahá ra Cristo tyin tandihí tsa catyí Nyoo tyin cua javaha ra, javahá ra itsi.

<sup>9</sup> Quítsi ra Cristo tyin tacan tan jacahnu tucu nyívi tsa ñavin ñi Israel cuví tsi Nyoo, tsa cuenda tsa cundaahví iñi ra nyehé ra tsi ñi, tumaa catyí nu tutu ra tyehen: Yacan cuenda cua jacahnu yu tsi un tan cua nyehé tandihí nyívi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

<sup>10</sup> Tan inga tucu nu catyí tsi tyehen: Nyooho tsa ñavin ñi Israel cuví, sii cuñi ndo tsihin ñi Israel, nyívi Nyoo.

<sup>11</sup> Tan inga tucu nu catyí tsi tyehen: Jacahnu ndo tsi Jutu Mañi yo, nyooho nyívi tsa ñavin ñi Israel cuví.

Çata tandihí ndo yaa tan jacahnu ndo tsi ra. <sup>12</sup> Ra Isaías tyaá tucu ra nu tutu Nyoo tyehen:

Cua cacu iin ra tsa cuví tata ra Isaí.

Cua quítsi ra cua cundaca ñaha ra tsi nyívi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

<sup>13</sup> Juvin ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusaí iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

<sup>14</sup> Yañi, tsitó vaha yu tyin nyooho vaha ifi ndo tan cutuñi vaha ifi ndo, tan tsitó vaha ndo cuhva cuhva cuenda tahan ndo tsi ndo.

<sup>15</sup> Maa tyin nu carta ihya ñihi xaan caahán yu siqui juhva tsa tyaá yu tyin tacan tan ña naa ifi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu

<sup>16</sup> tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuvi. Tan tyiñu tsa javahá yu cuvi tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuvi cuhva cuenda yu tsi ñi tsi Nyoo tan cuvi ñi iin ofrenda tsa taahán ifi ra, tyin tsa nduvahá ñi nuu ra jahá Tatyí Li ra.

<sup>17</sup> Yuhu tsa tsinú ifi yu tsi ra Cristo Jesús, siñi cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu.

<sup>18</sup> Yuhu ña caná ifi yu cahan yu tsa ña javahá ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuvi, tsinú ifi ñi tsi Nyoo tyin Nyoo tsatyíñu ra tsi yu tan vityin tyaá yahvi ñi tsi ra tsa cuenda tsa tsinú ifi ñi tuhun cahan yu tan nyehé ñi tsa javahá yu

<sup>19</sup> tsihin tunyee ifi seña tan tsa iyo tsa javahá yu jahá Tatyí Li Nyoo. Tsihin tandihi yacan cunyeé cahan yu tuhun ra Cristo tan nácaa jacacú ra tsi yu tsihin nyivi. Quit-sahá yu nda Jerusalén tan inga ca ñuu nda cuanda tsaá yu ñuu tsa cayucú Ilírico.

<sup>20</sup> Tacan nducú yu cuhva caahán yu tsa jacacú ra Cristo tsi yu nu ñaha ca coto nyivi tuhun ra, tyin ña cuñi yu jaha tyiñu yu nu tsa yaha cahan inga ra tuhun ra Cristo.

<sup>21</sup> Tumaa catyí nu tutu Nyoo tyehen: Nu nduve maa tuhun Nyoo iyó, cua tsaa tuhun Nyoo

tan cua cutuñi ifi nyivi iyó can itsi, catyí tsi.

*Nu tyaá ra Pablo cuhva tyin cuhun ra ñuu Roma*

<sup>22</sup> Yacan cuenda ña cuvi quitsi yu quitsi nyehé yu nu yucú ndo, vasu ndi maa cuaha xaan tsaha cuñi yu quitsi yu.

<sup>23</sup> Maa tyin vityin tsa ndihí jahá tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo.

<sup>24</sup> Nyehe jihna yo tatun cuvi yaha yu nu yucú ndo quivi cua cuhun yu España. Tsa yaha tsa cunyi yu juhva quivi tsihin ndo, nyehé yo tatun cuvi jatyinyee ndo tsi yu tan tsaa yu nu cuhun yu.

<sup>25</sup> Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan.

<sup>26</sup> Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo.

<sup>27</sup> Tyehen cuñi ñi javahá ñi. Tan nditsa tyin taahán tsi javaha ñi tacan. Tyin nyivi Israel, ñi tsinú ifi tsi ra Cristo, tsahá ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi.

<sup>28</sup> Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan cuhun yu nda España tan cua yaha yu nu yucú ndo.

<sup>29</sup> Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

<sup>30</sup> Yañi, Tatyí Li Nyoo tsahá tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu.

<sup>31</sup> Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú ifi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tsiin cuenda vaha ñi ofrenda tsa ndahá yu.

<sup>32</sup> Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehé yu nu yucú ndo tsihin tsa siñi cuñi yu tan cuvi quitatu vaha yu.

<sup>33</sup> Tan Nyoo, ra tsahá tsa taxin coo añima yo, na cunyaa ra tsihin tandihi ndo. Tan na cuvi tsi tacan.

## 16

*Nu tsahá ra Pablo nacumi tsi nyivi vaha ifi tsi ra*

<sup>1</sup> Jacotó yu tsi ndo tyin ña hermana Febe jatyinyee xaan ña tsi nyivi yihí cuenda Nyoo ñuu Cencrea.

<sup>2</sup> Naquihin vaha ndo tsi ña tumaa naquihin Jutu Mafí yo tsi yo, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihi tsa tsiñi ñuhu tsi ña, tyin maa ña cuaha xaan nyivi jatyinyee ña, tan nda cuanda maa yu.

<sup>3</sup> Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús.

<sup>4</sup> Tsahnya ifi ñi ñayivi ñi quivi jacacú ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihi tucu nyivi tsa ñavin ñi Israel cuvi, ñi tsa yihí cuenda Nyoo, tsahá ñi tyahvi nyoo tsi ñi.

<sup>5</sup> Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsi tucu nacumi tsi ra Epeneto, yañi yu. Juvín ra cuvi ra tsa tsinú jihna ifi tsi ra Cristo ityi Acaya.

<sup>6</sup> Cuhva ndo nacumi tsi ña María. Jahá tyiñu xaan ña nu yucú ndo.

<sup>7</sup> Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñu ra naha cuenda Jutu Mañi yo tsihin tandihi ca ra jahá tyiñu cuenda Nyoo. Tan jihna ca ra naha natsinü iñi tsi ra Cristo tan ñavin ca yuhu.

<sup>8</sup> Cuhva ndo nacumi tsi ra Amplias ra vaha iñi tsi yu cuenda Jutu Mañi yo.

<sup>9</sup> Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu.

<sup>10</sup> Cuhva ndo nacumi tsi ra Apeles. Nyehé yo tyin nditsa tsa tsinü iñi ra tsi ra Cristo. Tan tsahá tucu yu nacumi tsi nyivi ra Aristóbulo.

<sup>11</sup> Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinü iñi tsi Jutu Mañi yo.

<sup>12</sup> Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo.

<sup>13</sup> Cuhva ndo nacumi tsi ra Rufo, iin ra cahnu cuví nuu Nyoo. Tsinü vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu.

<sup>14</sup> Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha.

<sup>15</sup> Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpás tan tsi tandihi ñi yihí cuenda Nyoo tsa yucú tsihin ñi.

<sup>16</sup> Cuhva tahan ndo nacumi tsi ndo. Tandihí nyivi yihí cuenda ra Cristo tsa iyó ityi ihya jaquitsj ñi nacumi tsi ndo.

<sup>17</sup> Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñi jasiin tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can.

<sup>18</sup> Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñi maa ñi javahá ñi. Tan jandahví ñaha ñi añima nyivi ndaahvi tsihin tsa vita caahán ñi.

<sup>19</sup> Tandihí nyivi tsitó ñi tyin tyaá yahvi ndo tsi Nyoo. Yacan cuenda sii xaan cuñi yu tsihin ndo, tan cuñi yu tsa yatyi javaha ndo tsa vaha. Maa tyin ña yatyi javaha ndo tsa ña vaha.

<sup>20</sup> Nyoo ra iyó tandihí tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo siqui nu. Na nasoco Jutu Mañi yo Jesucristo tsi ndo.

<sup>21</sup> Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi

tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

<sup>22</sup> Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

<sup>23</sup> Jaquitsí tucu ra Gayo nacumi tsi ndo. Vehe ra iyó yu. Juvín ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

<sup>24</sup> Na ndoo Jutu Mañi yo Jesucristo tsihin tandihí ndo. Tan na cuví tsi tacan ñi.

*Nu ndihí caahán ra Pablo tan jacahnú ra tsi Nyoo*

<sup>25</sup> Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandihí ndo tsa tsinü iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhü xeehe tahan tsanaha nda ndi cumañi ca tsinü ñuhu ñayivi.

<sup>26</sup> Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsahá cuenda tuhun ra tahan tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaá yahvi ñi tsa caahán ra.

<sup>27</sup> Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ñi.

## Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta tsa cuenda nyivi yihí cuenda Nyoo ñuu Corinto*

<sup>1</sup> Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Stótenes, ra yañi yo,

<sup>2</sup> Jaquitsi ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihí nyivi tsa jacahnú tsi Jutu Mañi yo Jesucristo tandihí ñi ityi. Tyin cuví ra Nyoo cuenda ñi tan cuenda tucu maa yo.

<sup>3</sup> Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añima ndo.

*Nacaa nasocó Nyoo tsi nyivi yihí cuenda ra*

<sup>4</sup> Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús.

<sup>5</sup> Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo.

<sup>6</sup> Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo.

<sup>7</sup> Tan yacan cuenda nduve tsa cumañi tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo.

<sup>8</sup> Nyoo cua jaha cuenda ra tsi ndo nda cuanda naa ñuhu ñayivi tyin tacan tan yofñi cuví tyaa cuatyí tsi ndo quivi cua quitsi Jutu Mañi yo Jesucristo.

<sup>9</sup> Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

*Nyivi yihí cuenda Jutu Mañi yo, ña vaha quita siin ñi*

<sup>10</sup> Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caca iñi ndo, tan iin ñi tuhun quñi iñi ndo.

<sup>11</sup> Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo.

<sup>12</sup> Tyin nyooho siin siin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga

tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.”

<sup>13</sup> ¿A cuñi ra Cristo tsa quita siin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin.

<sup>14</sup> Tyahvi nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyooho,

<sup>15</sup> yacan ña cuví cahan ndo tyin tsicoondutyá ndo tsihin sivi yu.

<sup>16</sup> Aan, jacoondutyá tucu yu tsi nyivi ra Estéfanos, maa tyin ña nducuhún iñi yu tun jacoondutyá yu tsi inga ndo.

<sup>17</sup> Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyí nyivi tyin nduve yahvi nyaá tsa tsihi ra Cristo cuenda cuatyí yo.

*Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi*

<sup>18</sup> Nyivi tsa cua cuhun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi ra. Tan tsa cuenda yoo tsa cua cacu, tunyee iñi Nyoo cuví tsa tsihi ra.

<sup>19</sup> Tyin tacan catyí maa tuhun Nyoo: Cua janaa yu tsa nyityi jiñi ra tsitó xaan. Tan ña cua cahan yu tsa caahán ra, catyí Nyoo.

<sup>20</sup> Nduve yahvi nyaá ra tsa tsitó xaan, tan ra maestro, tan ra caahán náa ndihí tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduvi can jaha Nyoo.

<sup>21</sup> Nyoo tsihin tsa tsiñi tuñi tsa iyó tsi ra tyaa ra cuhva tyin ña cuví nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaa tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

<sup>22</sup> Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi.

<sup>23</sup> Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi.

<sup>24</sup> Maa tyin tsa cuenda nyivi tsa nacatsj Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandihí tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo.

<sup>25</sup> Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi



tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya.

<sup>26</sup> Yañi, cuñi tsi tsa cutuñi iñi ndo tyin Nyoo nacatsi ra tsi ndo vasu ndi maa ña cuaha ndo cuví nyivi tsiót, tan nyivi cahnu cuví o nyivi ndacá ñaha nu ñuhu ñayivi ihya.

<sup>27</sup> Nacatsi ra tsi nyivi tsa catyi nyivi tyin soho xaan ñi, tyin cuhva ra ticanuu tsi nyivi tsiót xaan. Tan nacatsi ra tsi nyivi nduve tunyee iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi.

<sup>28</sup> Tan nacatsi ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhlu ra tsi nyivi jahá tyin cahnu cuví ñi.

<sup>29</sup> Javahá ra tacan tyin tacan tan yoñi cuvi nduyaa nuu ra.

<sup>30</sup> Tan juvin ñi maa ra jandu iin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jatá ra tsi yo tsihin ñiñi ra, caqhín nyaa ra tsi yo ndaha nu ña vaha tan cacu yo tan nduvahá yo jahá ra tan jacu í ra tsi yo.

<sup>31</sup> Yacan cuenda na javaha yo cuhva catyi tuhun Nyoo nu catyi tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

## 2

### *Tuhun ra Cristo, ra tsihi nu cruu*

<sup>1</sup> Maa tyin yañi, quivi tsa quitsi yu cahán yu tuhun Nyoo tsihin ndo, ña cahán yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsiót xaan naha ra.

<sup>2</sup> Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaq iñi yu tan cahán yu tsihin ndo.

<sup>3</sup> Tan tsa tsaq yu nu yucú ndo ñihi ñihi yu jahá tsa yuuhvi yu.

<sup>4</sup> Tan tsa cahán yu tsihin ndo, ña cahán yu tsihin tuhun sñi caa tumaa caahán ra tsiót xaan naha ra. Maa tyin tsihin tunyee iñi Tatyí Ii Nyoo cahán yu tsihin ndo.

<sup>5</sup> Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

*Juvin ñi maa Tatyí Ii Nyoo tsahá tsa nacoto yo tsi Nyoo*

<sup>6</sup> Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihí ñi maa, tyin caahán ndi tsa tsiñi tuñi Nyoo

<sup>7</sup> tsa tsiicumí xeehe ra tsa ndi cumañi ca javaha ra ñuhu ñayivi ihya. Tyaq ra cuhva tsa jacacu ra tsi yo tan cunyecu cuí yo tsihin ra nda gloria.

<sup>8</sup> Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu.

<sup>9</sup> Maa tyin cuví tsi tumaa catyi maa tuhun Nyoo:

Yoñi nyehe tan yoñi tsiñi tan tsicá iñi tuhun vaha

tsa javahá Nyoo tsa cuenda nyivi cuñi tsi ra, catyi tsi.

<sup>10</sup> Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juvin ra jacotó tandihí ca tuhun xeehe tsa tsicá iñi Nyoo tsi yo.

<sup>11</sup> Intuhun intuhun yo tsiót yo nácaa tsicá iñi yo, maa tyin inga nyivi ña tsiót ñi tsa tsicá iñi yo. Tan tacan tucu intuhun ñi Tatyí Ii Nyoo tsiót ra tsa tsicá iñi maa Nyoo.

<sup>12</sup> Yoo ñavin tsa tsiñi tuñi tsa iyó nu ñuhu ñayivi naquihín yo, tyin naquihín yo Tatyí Ii Nyoo, tan juvin ra jacotó tandihí tsa ñihí yo jahá Nyoo.

<sup>13</sup> Tan tsa caahán ndi tsihin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhvá maa ndi tsihin tsa tsiñi tuñi jñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihí Tatyí Ii Nyoo.

<sup>14</sup> Maa tyin nyivi tsa nduve Tatyí Ii Nyoo iyó tsihin, ña naquihín vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi.

<sup>15</sup> Maa tyin nyivi yihí Tatyí Ii Nyoo cuví cutuñi iñi ñi. Tan tsiót ñi tatun vaha a ña vaha náa iin tuhun. Maa tyin ña cuví catyi inga nyivi tatun vaha a ña vaha tsa iyó añima ñi.

<sup>16</sup> Tyin tuhun Nyoo catyi tsi: “Yoñi tsiót tsa tsicá iñi Jutu Mañi yo Nyoo. Yoñi cuví jacuahá tsi ra”, catyi tuhun Nyoo. Maa tyin yoó tsiót yo tsa tsicá iñi ra tyin iyó tsa tsiñi tuñi ra Cristo tsi yo.

## 3

*Ña taahán tsi cunyicun yo tsi iin ra yihí tuhun Nyoo tsihin yo, na cunyicun yo tsi Nyoo*

<sup>1</sup> Yañi, quivi tsa quitsi yu nu yucú ndo ña cuví cahán yu tsihin ndo tumaa caahán yu tsihin nyivi jaquihín ityi Tatyí Ii Nyoo. Cahán yu tsihin ndo tumaa caahán yu tsihin nyivi ña tsiót tsi Nyoo, tyin ndi lee xaan ndo tsihin ra Cristo.

<sup>2</sup> Cahán yu tsihin ndo tsihin tuhun tsa ña yihí ñi cutuñi iñi ndo. Tumaa tsahá yo letsí coho lee tsa ñaha ca cuví catsi nyayu, tacan javahá yu tsihin ndo, tyin nyoocho ñaha ca cuví cutuñi vaha iñi ndo. ¡Tan ndi vityin tan ña cutuñi iñi ndo!

<sup>3</sup> Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihí nu yucú ndo, tan ndusín ndo. Ndi tsicá iñi ndo tuhun tsicá iñi nyívi cuenda nu ñuhu ñayívi ihya, tan javahá ndo tumaa cuñi cuñu ñuhu ndo.

<sup>4</sup> Tyin yihí ndo catyí ndo: “Cuenda ra Pablo yihí yu.” Tan inga ndo catyí ndo: “Cuenda ra Apolos yihí yu.” Yacan cuñi tsi catyí tyin javahá ndo tumaa javahá nyívi iyó ití tsata.

<sup>5</sup> Tyin zyóo ra cuví yuhu, ra Pablo? Tan zyóo ra cuví ra Apolos? tyin cañi tahan ndo tsaha ndi. ¿A ñavin musu Nyoo ñi cuví ndi? Juvín. Tan cahán ndi tuhun Nyoo tsihin ndo tan natsinú iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi.

<sup>6</sup> Yuhu tatsí tuhun Nyoo añima ndo, tan ra Apolos tyosó. Maa tyin Nyoo jacuahnú ra tuhun ra añima ndo.

<sup>7</sup> Tan yacan cuenda ndi ra tsa tatsí tan ndi ra tsa tyosó, nduve ra cuví ra. Maa tyin Nyoo cuví ra tandihí tyin maa ra jacuahnú tuhun ra añima yo.

<sup>8</sup> Ra tsa tatsí tan ra tsa tyosó, iin ñi ra cuví ra naha. Tan Nyoo cua tyahví tsi intuhun intuhun ra naha cuhva tyiñu jahá ra naha.

<sup>9</sup> Tan nyuhu, cuví ndi musu tan jahá tyiñu ndi tyiñu Nyoo. Tan nyooho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo.

<sup>10</sup> Tsaḡa Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquin yu cuhva vehe can tan tyihí yu tsaha tsi tsitsi ñuhu. Tan inga ra tsa cua sama ityi siqui cuví ra jacuahá, tan cuñi tsi jahá ra cuenda nácaa jacuahá ra tuhun Nyoo.

<sup>11</sup> Tan yoñi cuví caquin inga cuhva tyin tsa canyíi cuhva can. Tan yacan cuví ra Jesucristo.

<sup>12</sup> Tan siqui cuhva can cuví sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama.

<sup>13</sup> Maa tyin quívi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhú can cua nducu cuhva tsi tyiñu javahá ra naha.

<sup>14</sup> Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra.

<sup>15</sup> Maa tyin tun ndihí tyiñu javahá ra naha cayu, nduve náa cua ñihi ra naha. Vasu cua cacu maa ra naha tumaa cacú iin ra tsa cuñi cayu tan tsinú ra nu cayú ñuhu.

<sup>16</sup> ¿A ña tsitó ndo tyin vehe ñuhu Nyoo cuví ndo, tan iyó Tatyí Ii Nyoo tsitsi añima ndo?

<sup>17</sup> Tatun iin nyívi jatívi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

<sup>18</sup> Ndi intuhun ndo tan ña jandavi ñaha ndo tsi ndo. Tyin tatun cuñi ndo tyin tsitó xaan ndo tsihin tsa tsiñi tuñi tsa iyó nu ñuhu ñayívi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo.

<sup>19</sup> Tyin tsa tsiñi tuñi tsa iyó nu ñuhu ñayívi ihya nduve yahví nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvín ñi maa nu tsa nyityi javahá ra.”

<sup>20</sup> Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahví nyaá can.”

<sup>21</sup> Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsaḡa tsi ra naha tsa jacuahá ra naha tuhun vaha tsi ndo tan tsaḡa ndihí ra tandihí tsa iyó tsi ndo.

<sup>22</sup> Yuhu ra Pablo, ra Apolos, ra Pedro, maa Nyoo tsaḡa tsi ndi tsa cahan ndi tuhun ra tsihin ndo. Tan ñuhu ñayívi ihya, tan ñayívi iyó yo, tan tuhun tsiihí, tan tsa cuví vityin, tan tsa cua cuví nu cuahán ca tsi, tandihí maa tuhun ihya tsaḡa Nyoo tsi ndo.

<sup>23</sup> Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

## 4

### *Ña jacahnu yo tsi yo tan ndi tsi yañi yo*

<sup>1</sup> Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuaa ndi tuhun xeehe ra.

<sup>2</sup> Tan ra tsa tava tyiñu Nyoo cuñi tsi tsa tyaá yahví ra tandihí tsa caahán ra tsihin ra.

<sup>3</sup> Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu.

<sup>4</sup> Vasu ndi maa tuví iñi yu tyin nduve cuatyí yu, maa tyin ña cuñi tsi catyí tyin nduve cuatyí yu nuu Nyoo. Tyin maa Jutu Mañi yo cua catyí tun iyó cuatyí yu o nduve.

<sup>5</sup> Yacan cuenda, ña cahán ndo tsi yu. Cúatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

<sup>6</sup> Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo

tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi.

<sup>7</sup> Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

<sup>8</sup> Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu.

<sup>9</sup> Nyuhu tsa cuví ndi ra tsicá tyiñu ra Cristo, tumaa tsa nacoq Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi.

<sup>10</sup> Nyivi tsicá iñi maa ñi tyin tsa cuenda ra Cristo tan ndusohó ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñi ndo tyin iyó tunyee iñi tsi ndo. Tun ndasi cuñi nyivi nyehé ñi tsi nyuhu, jaha xaan ca ñi tsa ñayivi tsi nyooho.

<sup>11</sup> Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi.

<sup>12</sup> Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi.

<sup>13</sup> Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

<sup>14</sup> Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu.

<sup>15</sup> Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahán tuhun ra Cristo Jesús tsihin ndo nda jihna ñi tan natsinú iñi ndo tsi ra.

<sup>16</sup> Tan tsa cuenda tsehe tsicán yu tsi ndo tsa javaha ndo tumaa javahá maa yu.

<sup>17</sup> Yacan cuenda jaquitsi yu tsi ra Timoteo, sehe yu cuenda Jutu Mañi yo, nu yucú ndo. Ñi xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu.

<sup>18</sup> Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu

yucú ndo.

<sup>19</sup> Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha.

<sup>20</sup> Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha.

<sup>21</sup> ¿Naa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

## 5

*Nu tava tyiñu ra Pablo tyin cutuñi iin ra tsicoq tsihin sihi quín*

<sup>1</sup> Ñihí tuhun yu tyin iin ra nyii tsihin ndo iyó ra tsihin sihi quín ra. Tan yacan cuví cuatyí cahnu xaan, tyin ndi nyivi iyó ityi tsata tan ña javahá ñi tacan tyin tsitó ñi tyin ña vaha.

<sup>2</sup> Taahán tsi cuihyá cuñi ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo.

<sup>3-4</sup> Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhu iñi yu tsi ndo, tan tsihin sivi Jutu Mañi yo Jesucristo jandaá yu tyiñu ra tsa javahá cuatyí can. Yacan cuñi tsi tsa ndu iin ndo. Tan jaha ndo tuhun tyin nyii yu tsihin ndo. Tan cunyaa tunyee iñi Jutu Mañi yo Jesús tsihin ndo.

<sup>5</sup> Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqú tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añima ra.

<sup>6</sup> Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñi yu cuví tucu yacan.

<sup>7</sup> Tava ndo yutsan iya tsahnu tsa jativi tsi ndo. Tacan tan cuví ndo tumaa paan tsa tuhvá nyivi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyí luhlu tsa tsihí tsa cuenda cuatyí yo.

<sup>8</sup> Yacan cuenda taahán tsi catsi coo yo tyin tsihí ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi iñi yo tyin cuví tsi tumaa paan tsa nduve yutsan iya yihí.

<sup>9</sup>Nu inga carta tsa jaquitsj yu tsi ndo, catyj yu tyin ña taahán tsi cunyanaa ndo tsi ra tsicá nuu tsihin ñaha.

<sup>10</sup>Tan tsa caahán yu tyeheh tsihin ndo, ñavin tsa cunu ndo nu nyivi tsa iyó ityi tsata, ñi tsa iyó tsihin rayii a ñaha, ñi tsa nyiyó iñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñi tsi tsa quita ndihí ndo nu ñuhu ñayivi ihya.

<sup>11</sup>Maa tyin tsa cuñi yu catyj yu tsihin ndo ña cunyaa naa ndo tsi nyivi tsa catyj: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó iñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi.

<sup>12-13</sup>Tyin yoo ña taahán tsi tatsi tuñi yo tsi nyivi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñi tsi tatsi tuñi ndo tsi nyivi yihí cuenda Nyoo. Yacan cuenda tavá ndo tsi ra iyó cuatyí nu yucú ndo.

## 6

*Ña cua ndacan yo cuatyí tsaha iin yañi yo cuenda Nyoo nuu ra cumí tyiñu*

<sup>1</sup>¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyí?

<sup>2</sup>¿A ña tsitó ndo tyin juvin ñi maa yo cua jandaa cuatyí tandihí nyivi iyó nu ñuhu ñayivi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya?

<sup>3</sup>¿A ña tsitó ndo tyin cua jandaa yo cuatyí nda cuanda ángel? Tun tacan, ¿a yii jandaa yo cuatyí nyihi tsa iyó nu ñuhu ñayivi? ¡Ña yii jandaa yo can!

<sup>4</sup>Yacan cuenda tatun iyó tsihi nu yucú ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo?

<sup>5</sup>Caahán yu tyeheh tsihin ndo na nducahan nuu ndo. ¿A nduve cuii vasu intuhun ra jandaa cuatyí yañi ndo nu yucú ndo?

<sup>6</sup>Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

<sup>7</sup>Ña vaha tsa iyó tsihi nu yucú ndo. Vaha taxin ca cunyee iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo.

<sup>8</sup>¡Maa tyin nyooho javahá ndo tsa ña vaha tan suhú ndo nda cuanda tsa tsii yañi ndo!

<sup>9-10</sup>¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu

tsihin rayii, ndi ñi jacahnú tsitoho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yii tan iyó inga rayii tsi ñi, ndi ra ndusihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi.

<sup>11</sup>Tyin tacan javahá juhva nyooho. Maa tyin tsa ndatsi cuatyí ndo tan ndu ii ndo tan nduvahá ndo nuu Nyoo jaha Jutu Mañi yo Jesucristo tan Tatyí Ii Nyoo.

*Cuñu ñuhu yo cuví vehe ñuhu Nyoo*

<sup>12</sup>Catyí tsi tyin nuña maa javaha yo tandihí náa cuñi maa yo. Tan nditsa tucu maa, maa tyin ña tandihí tan vaha. Cuví javaha yo náa cuñi maa yo, maa tyin cuñi tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo.

<sup>13</sup>Catyí nyivi tyin Nyoo javahá ra tsa tsatsi yo tsa cuenda tsitsi yo. Tan javahá ra tsitsi yo tsa cuenda tsa tsatsi yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo.

<sup>14</sup>Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

<sup>15</sup>¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jatívi yu tsihin iin ñaha tsicá nuu? Ña taahán tsi javaha yu tacan.

<sup>16</sup>¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduvj ra tsihin ña? Tyin nu tutu Nyoo catyj tsi tyeheh: “Tsa nduvi ñi, iin ña nyivi cuví ñi.”

<sup>17</sup>Maa tyin tatun iin nyivi tan nacuhva ñi añima ñi tsi Jutu Mañi yo, iin ñi cuví ñi tsihin ra tyin quihvi Tatyí Ii ra añima ñi.

<sup>18</sup>Jandihí ndo tsa iyó ndo tsihin ñaha a tsihin rayii tun ñavin ñasihi ndo a ñavin yii ndo cuví. Tyin tandihí inga nu cuatyí tsa javahá nyivi ña jatívi can cuñu ñuhu ñi. Maa tyin tsa tsicá nuu ñi tsihin ñaha a tsihin rayii, jatívi can cuñu ñuhu ñi.

<sup>19</sup>¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo.

<sup>20</sup>Tyin Nyoo yahvi xaan jatá ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin

tsa tsiñi tuñi iñi yo tyin nduvi taahan tuhun ihya tsi maa Nyoo cuví.

## 7

*Nu tsahá cuenda ra Pablo nácaa taahán tsi coo nyivi tindahá*

<sup>1</sup> Tan vityin cua cahan yu tsa tsicá tuhun ndo tsi yu nu carta tsa jaquitsj ndo tsi yu. Nditsa tyin vaha tsa ña tindaha yo.

<sup>2</sup> Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayii. Yacan cuenda cuñi tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yii tsa intuhun intuhun ñi.

<sup>3</sup> Na javaha rayii cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yii ña.

<sup>4</sup> Ñiñaha ña cuví cundaca ñaha ñi maa ña cuñi ñuhu ña, tyin tsi yii ña cuví cuñi ñuhu ña. Tacan tucu maa yii ña, ña cuví cundaca ñaha ñi maa ra cuñi ñuhu ra tyin tsi ñasihi ra cuví cuñi ñuhu ra.

<sup>5</sup> Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayii inga ñaha o ñaha nducu ña inga rayii tan javaha ndo tsa ña vaha jaha nu ña vaha.

<sup>6</sup> Tsa caahán yu tyeheh tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñi ndo.

<sup>7</sup> Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

<sup>8</sup> Tsahá cuenda yu tuhun ihya tsi tandihí nyooho tsa ñaha ca tindaha tan nyooho ñi tsihi yii tyin vaha ca cuví tsi ndo tun ña tindaha ndo tumaa maa yu.

<sup>9</sup> Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

<sup>10</sup> Maa tyin caahán yu tsehe tsihin nyooho ñiñaha tsa tsa tindaha: ña naçoo ndo yii ndo tyin tuhun caahán yu ihya, ñavin tsa cuñi maa yu cuví, tyin maa Jutu Mañi yo tsahá itsi tyin cuhva cuenda yu tsi ndo.

<sup>11</sup> Maa tyin tatun iin ñaha tan nacoó ña yii ña, cuñi tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yii ña. Tan tacan tucu rayii, ña taahán tsi nacoó ra ñasihi ra.

<sup>12</sup> Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá

itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa nacoó ra tsi ña.

<sup>13</sup> Tan tatun iin ña hermana, tan ña tsinú iñi yii ña tsi Nyoo, ndoo ra vaha tsa cunyaa ra tsihin ña, nduve ndatu tsa nacoó ña tsi ra.

<sup>14</sup> Tyin tsa yaha nasoco Nyoo tsi rayii tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yaha nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndihí Nyoo itsi naha tsi.

<sup>15</sup> Maa tyin tatun rayii an ñaha tsa ña tsinú iñi tsi Nyoo, tan cuñi ñi nacoó ñi tsi tahan ñi tsa tsinú iñi tsi Nyoo, na nacoó maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tsihi.

<sup>16</sup> Tyin ña tsitó iin ñaha tatun cacu yii ña. Tan ndi rayii ña tsitó ra tatun cacu ñasihi ra.

<sup>17</sup> Tan catyí yu tsihin ndo ço ndo tsihin ndatu tsa tsahá Jutu Mañi yo tsi ndo tan cuhva iyó ndo quivi cana ra tsi ndo. Tan tsehe cuví tsa jacuahá yu tandihí vehe ñuhu tan iin tan iin ñuu.

<sup>18</sup> Tatun tsa yaha tsinyaa tuñi Nyoo cuñi ñuhu ndo tan cana Nyoo tsi ndo ña çaca iñi ndo tsa cuenda yacan. Maa tyin tun ña tyaa ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can.

<sup>19</sup> Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaa yahvi yo tuhun caahán Nyoo.

<sup>20</sup> Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quivi tsa cana Nyoo tsi ndo.

<sup>21</sup> Tyin tatun musu cuví ndo quivi tsa cana Nyoo tsi ndo, ña çaca iñi ndo. Maa tyin tatun tsahá tsi cuhva tsa ndoo nuña ndo, nducu ndo cuhva.

<sup>22</sup> Iin ra tsa cuví musu tan quihvi ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihvi ra cuenda Jutu Mañi yo, vityin cuví ra musu tsa cuenda ra.

<sup>23</sup> Nyoo yahvi xaan jatá ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo.

<sup>24</sup> Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quivi cana Nyoo tsi ndo.

<sup>25</sup> Tan tsa cuenda nyivi tsa ñaha ca tindaha, nduve tuhun tsahá Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsahá ra

tucahnu iñi tsi yu tan maa ra yihí ndaha tsi yu.

<sup>26</sup> Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó.

<sup>27</sup> Maa tyin tatun tsa iyó ñasihi ndo, ña nducu ndo kuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo.

<sup>28</sup> Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juven ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñí yu tsa nyehé ndo tundoho.

<sup>29</sup> Yañi, cuñí yu cahan yu tuhun ihya tsihin ndo: Juhva cuii ña quivi iyó yo. Yacan vityin tan ityi nuu tandihi ra tsa iyó ñasihi cuñí tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó.

<sup>30</sup> Tan nyoooho tsa iyó tucuihya iñi, ña tyaa yahvi ndo tushi iñi can. Tan nyoooho tsa sii cuñi, ña tyaa yahvi ndo tushi iñi can. Tan nyoooho tsa jatañ ndaha tyiñu taahán tsi coo ndo tumaa tsa nduve ndaha tyiñu ndo.

<sup>31</sup> Tan nyoooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayivi ihya.

<sup>32</sup> Cuñí yu tyin nyoooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra kuhva cuñí maa Jutu Mañi yo.

<sup>33</sup> Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya kuhva taahán iñi ñasihi ra.

<sup>34</sup> Tan tacan tucu ñiñaha, siin siin kuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña kuhva jacahnu ña tsi Nyoo tsihin cuñu ñuhu ña, tan tsihin tsa ñi iñi añima ña. Maa tyin ñaha tsa iyó yii, maa ñi kuhva coo vaha ña tsihin yii ña nducú ña.

<sup>35</sup> Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñí yu tsi ndo. Maa tyin coo ndo iin ñayivi cuiti tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

<sup>36</sup> Maa tyin ndáa nyoooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñí tsi; ñavin cuatyí cuví can.

<sup>37</sup> Maa tyin ndáa nyoooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa.

<sup>38</sup> Ñi tsa cuñí tindaha sehe ñi, vaha javahá ñi. Tan ñi tsa ña cuñí tindaha sehe ñi, vaha ca javahá ñi.

<sup>39</sup> Maa tyin ley Nyoo catyí tsi na cundacá ñaha rayii tsi ñasihi ra tsitsi tsa ndi iyó ra.

Tatun tsa tsihi ra, tacan tan cuví ndoo nuña ña tan tindaha ña yoo tsihin cuñí maa ña. Maa tyin tun cua tindaha ña, na tindaha ña tsihin ra yihí tuhun Nyoo.

<sup>40</sup> Maa tyin sii xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñí yu tyin maa Tatyí Ii Nyoo, tsaha tuhun ihya tsi yu, tan tsahá cuenda yu tsi ndo.

## 8

*Nu jacuahá ra Pablo tyin ña vaha janacava yo tsi nyivi nu cuatyí*

<sup>1</sup> Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñí yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñí yo tan nduyaa yo tsihin can. Tan ndi nduve nu jatynyee can tsi yo. Maa tyin tsa cuñí tahan yo tsi yo jacuahnú tsi tsi yo tsihin Nyoo.

<sup>2</sup> Ra tsa cuñí tyin tsitó xaan ra, nduve náa tsitó ra.

<sup>3</sup> Maa tyin Nyoo tsitó ra ndáa nyivi cuñí tsi ra tsihin tsa ñi iñi añima ñi.

<sup>4</sup> Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó.

<sup>5</sup> Vasu ndi maa juhva nyivi catyí ñi tyin iyó cuaha nyoo tsa ndacá ñaha nu ñuhu ñayivi ihya tan andivi,

<sup>6</sup> maa tyin tsa cuenda yoo, intuhun ñi Nyoo Jutu yo iyó. Tan juven ra javahá tandihí cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuanda tsi maa yo.

<sup>7</sup> Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho can. Tan cuñí ñi tyin nyayu, tsa jamañi nyivi tsi tsitoho can, ica tsi. Tan cuñí ñi tyin tun catsi ñi nyayu can cua coo cuatyí ñi nu Nyoo.

<sup>8</sup> Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo.

<sup>9</sup> Maa tyin nyoooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihví tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo.

<sup>10</sup> Tyin tatun yooho tsa tsitó un tuhun ihya, tan cunyaa un catsi un tsa iyó vehe tsitoho, tan iin ra yañi yo tsa ndi quihví cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñí ndihí ra catsi ra.

<sup>11</sup> Tan cua tiví añima ra tyin cuñí maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siguí un cua cahun cuatyí can.

<sup>12</sup> Tyin tun janacava yo tsi yañi yo tsa ndi quihví cuenda Nyoo, tsicoo cuatyí yo nuu ra Cristo.

<sup>13</sup> Yacan cuenda tatun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñí yu tsa janacava yu tsi yañi yo nuu cuatyí.

## 9

*Tsa taahán tsi javahá iin ra tava tyiñu ra Jesucristo*

<sup>1</sup> Nditsa tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juven ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacoto yu tsi ndo.

<sup>2</sup> Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyooho taahán tsi tsinu iñi ndo, tyin juven yu cahan tuhun ra tsihin ndo tan natsinu iñi ndo tsi ra. Yacan cuenda juven ndo cuví tsandaa.

<sup>3</sup> Tyehen cuví tsa cua cahan yu tsihin nyivi tsa caahán nyaa tsi yu.

<sup>4</sup> Iyó ndatu tsa quihín yu tandihi tsa tsahá ñi catsi yu tan tsa tsahá ñi coho yu.

<sup>5</sup> Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihi ca ra tava tyiñu ra Jesucristo.

<sup>6</sup> ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñí ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo?

<sup>7</sup> Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa queé nu nducuaa ra. Tan ra tsa jahá cuenda indiquí tsihi ra letsí ti.

<sup>8</sup> Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaá ra Moisés catyí tsi tyehen:

<sup>9</sup> “Ra tsa tatsí trigu ña taahán tsi tyihi ra yoho yuhu indiquí tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiquí ñi.

<sup>10</sup> Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha.

<sup>11</sup> Tan tacan cuví tucu nyuhu, quitsí cahan ndi tuhun Nyoo tsihin ndo, tumaa tsa quitsí tatsí ndi tsiti tsitsi añima ndo cuví can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo.

<sup>12</sup> Tatun jatyinyeé ndo tsi inga ra tsa ña quitsí tyihi tuhun Nyoo nu yucú ndo, taahán tsi tsa cuaha ca jatyinyeé ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihi. Ña tsicán ndi tsa tsiñí ñuhu tsi ndi tsi ndo tyin coto jandihí ndo tsa tyaá yahví ndo tuhun ra Cristo tsa jacuahá ndi.

<sup>13</sup> Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tava sijn ra naha juhva cuñu quiti tyin catsi ra naha. Tan tandihi ca cuñu can cua cahmi ra naha tumaa catyí maa Nyoo tsihin ra naha.

<sup>14</sup> Tan juven ñi tacan caahán Jutu Mañi yo, tyin taahán tsi jatyinyeé ñi yihí cuenda Nyoo tsi ra caahán tuhun Nyoo tsihin ñi.

<sup>15</sup> Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihí tsa sii cuñi yu caahán yu tuhun ra Cristo tsihin ndo vasu ndi maa nduve náa jatyinyeé ndo tsi yu.

<sup>16</sup> Ña cuví nduyaa yu tsihin tsa caahán yu tuhun Nyoo tyin maa ra Cristo tava tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya.

<sup>17</sup> Yacan cuenda tatun cahan yu tsihin tsa ñi iñi yu, cua ñihi yu yahvi yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsahá maa Nyoo tsi yu cuví tsi.

<sup>18</sup> Tan tsa sii cuñi yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

<sup>19</sup> Vasu ñavin musu cuví yu, maa tyin nanduví yu musu tandihi nyivi tyin tacan tan cuví jaha canaa yu cuaha ca nyivi cuenda ra Cristo.

<sup>20</sup> Tatun nyii yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu.

<sup>21</sup> Maa tyin tatun cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaá yahvi yu ley Nyoo tyin tyaá yahvi yu ley ra Cristo.

<sup>22</sup> Tatun nyii yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyeé ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi,

tyin tacan tan tyaa soho ñi tuhun Nyoo tsa caahán yu tsihin ñi tan cacu ñi.

<sup>23</sup> Javahá yu tacan tyin tacan tan cacu nyivi tan nasoco ndihi tucu maa Nyoo tsi yu.

<sup>24</sup> Tsitó ndo tyin tatun cua cunu suuhva nyivi, tandihi ñi tsinú, maa tyin intuhun ñi ñi jaha canaa. Tacan tucu maa yo, cuñí tsi tsa ñihi cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo.

<sup>25</sup> Tandihi nyivi tsa tsinú suuhva, nacoó ñi tandihi tsa jatyañú tsi ñi tyin cuñí ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa.

<sup>26</sup> Tsa cuenda yuhu ña tsinú soho ñi yu, tan ndi ña cañí tahan soho ñi yu.

<sup>27</sup> Maa tyin ñihi ndacá ñaha yu tsi cuñu ñuhu yu. Tan jañiñí yu tyaa yahvi yu tsi Nyoo, coto juvin ñi maa yu tsa yaha jacuahá yu tsi inga nyivi, tan ndoo yu.

## 10

*Nu jacuahá ra Pablo tyin ña vaha jacahnú yo tsitoho*

<sup>1-2</sup> Yañi, ña cuñí yu tsa naa iñi ndo tsa cuví tsi tsi tsaahnu yo tahan tsanaha. Nyoo jacuhun ra iin vico ityí nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuví ityí nuu tsihin ñi. Tan tsa tacan, tumaa tsa tsicoondutya ñi tsihin vico tan tsihin ndutya ñuhu tan ndu iin ñi tsihin ra Moisés.

<sup>3</sup> Tan Nyoo tsahá ra iin ñi tsa tsatsí tandihi ñi.

<sup>4</sup> Tan tsihí ñi ndutya tsa quitá tsata cava tsa cuahán tsihin ñi tan cava can cuví ra Cristo, tan tandihi ñi iin ñi ndutya can tsihí ñi.

<sup>5</sup> Maa tyin vasu cuaha tsa iyo javahá Nyoo nyehe ñi, cuaha ñi ña tyaa yahvi ñi tuhun cahán ra tsihin ñi. Tan tsihí ñi nu tsiqui can.

<sup>6</sup> Tandihi tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can.

<sup>7</sup> Yacan cuenda ña jacahnu ndo tsitoho, tumaa javahá juhva ñi can, tyin catyí nu tutu Nyoo tyehen: "Tsinyecú ñi, tsatsí ñi, tan tsihí ñi. Yaha can tan nduvitá ñi, tsahan quitsahá tsañi ñi [jacahnú ñi indiqui xuhun cuaan tsa javahá ñi]."

<sup>8</sup> Ña cōo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayi tumaa javahá nyivi can. Tan tsihí oco uñi mil ñi tsa iin quivi.

<sup>9</sup> Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihí ñi tsa cañ coo tsi ñi.

<sup>10</sup> Tan ña cahán ndo ndavaha ñi siqui Nyoo, tumaa tsa cahán juhva ñi can. Tan jaquitsí ra ángel ra tsahñí tsi ñi.

<sup>11</sup> Tandihi yacan tahan tsi tsaahnu yo tsa tsicoo tahan tsanaha. Tan tsinyaá tsi nu libru Nyoo tyin tacan tan yoo tsa iyó yo nu cua ndihi ñuu ñayivi ihya vityin coto yo tyin ña taahán tsi javaha yo tandihi tsa javahá ñi can.

<sup>12</sup> Tan nyooho tsa cuñí tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha].

<sup>13</sup> Tundoho tsa nyehe ndo, cuñí maa ndo tyin intuhun ñi maa ndo nyehe can. Maa tyin inducu ñi nyehe tandihi ca nyivi. Cuita iñi ndo tsi Nyoo, tyin ña tuhvá ra cuhva tsa nyehe ndo tundoho tsa ña cuví cunyeé iñi ndo. Tyin tun nyehe ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

<sup>14</sup> Yacan cuenda yañi, ña jacahnu ndo tsitoho.

<sup>15</sup> Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehe ndo tun nditsa a ña nditsa tsa caahán yu.

<sup>16</sup> Quivi tsa nducuhún iñi yo tyin tsihí ra Cristo nu cruu, tsihí yo vinu tan tsatsí yo paan. Tan vinu can cuñí tsi catyí tyin iin ñi cuví yo tsihin ra Cristo tsa cuenda niñi ra. Tan paan can cuñí tsi catyí tyin iin ñi cuví yo tsihin ra tsa cuenda cuñu ñuhu ra.

<sup>17</sup> Tyin vasu cuaha yo, maa tyin tandihi yo tan tsatsí yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

<sup>18</sup> Tyihi tuñi iñi ndo cuhva iyó nyivi Israel. Tsatsí ñi quiti tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra.

<sup>19</sup> Ñavin caahán yu tyin iyó yahvi nyaá tsitoho tsa jacahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can.

<sup>20</sup> Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha.

<sup>21</sup> Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha.

<sup>22</sup> Ña cuhva yo tsihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

*Tun cua javaha yo náa javaha yo, na javaha yo tsa cuenda tsa vaha tsi inga canyivi*



<sup>23</sup> Nditsa tsa caahán nyivi: “Cuví javaha yo náa cuñí maa yo.” maa tyin ña tandihi can tan jacuahnú can tsi yo tsihin Nyoo tan ndi ña cuví can tsa vaha tsi yo.

<sup>24</sup> Ña cuví caca iñi yo tsa cuenda maa ñi maa yo, tyin cuñí tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

<sup>25</sup> Çatsi nyooho tandihi cuñu tsa cuyahví nu nuyahví. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo.

<sup>26</sup> Tyin ñuhu ñayivi tan tandihi tsa iyó nuu tsi, tsii maa Nyoo cuví.

<sup>27</sup> Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñí ndo cuhun ndo, vaha maa cuhun ndo, çatsi nyooho tandihi tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

<sup>28-29</sup> Maa tyin tatun ndáa nyivi caahán tyehen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña çatsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñí tsi tsa jahá yu cuenda tsi yu tsa catyi tsa tsicá iñi inga ca nyivi?”

<sup>30</sup> ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyi ndo.

<sup>31</sup> Vaha maa, tun tsatsí ndo, tan tsihí ndo, o javahá ndo inga ca tsa javahá ndo; javaha nyooho maa tyin cuhva taahán iñi Nyoo.

<sup>32</sup> Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo.

<sup>33</sup> Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu añima ñi.

## 11

<sup>1</sup> Nyehe ndo tumaa javahá yu cuhva javahá ra Cristo, tacan taahán tucu tsi javaha nyooho cuhva javahá yuhu.

*Nacaa taahán tsi javaha ñiñaha nu iyó culto*

<sup>2</sup> Yañi, sii xaan cuñí yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo.

<sup>3</sup> Maa tyin cuñí yu tsa coto ndo tyin ra Cristo cuví jiñi tsihin intuhun intuhun rayii tyin juvin ra cuví ityi nuu tsihin ra, tan rayii cuví jiñi tsihin ñasihi ra, tumaa cuví Nyoo jiñi tsihin ra Cristo.

<sup>4</sup> Tatun iin rayii tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra.

<sup>5</sup> Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndii jiñi ña cuví can. Tan tsahá ña ticanuu tsi yii ña tyin juvin ra cuví jiñi tsihin ña.

<sup>6</sup> Tatun iin ñaha tan ña tyasí ña jiñi ña, vaha taxin ca xatya ña tandihi ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña.

<sup>7</sup> Ña taahán tsi tsa casi rayii jiñi ra. Tyin cuhva caá Nyoo caá ra, tyin ndacá ñaha ra tsi ñasihi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yii ña tsihin tsa tsahá ña tsa cundaca ñaha ra tsi ña.

<sup>8</sup> Tyin quivi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña.

<sup>9</sup> Tan tsacatyí rayii, tan tsinú ñaha, tan ñavin tsacatyí ñaha tan tsinú rayii.

<sup>10</sup> Yacan cuenda ñiñaha cuñí tsi tsa cundasi jiñi ñi. Tyin cuñi tsi catyi tyin ndacá ñaha yii ñi tsi ñi. Tan cuví tsi tsa vaha tsi ra ángel naha ra.

<sup>11</sup> Maa tyin tyaá Nyoo cuhva tyin tsiñí ñuhu rayii tsi ñaha. Tan tsiñí ñuhu ñaha tsi rayii.

<sup>12</sup> Nditsa tyin ñaha tsinú ña tsihin yiqui naha rayii jahá Nyoo. Maa tyin nda cuenda quivi can tan quitsahá tsahá Nyoo tsa coo sehe yii ña. Tan nda cuenda vityin juvin ñi maa Nyoo tsahá tsa coo nduvi taahan ñi, rayii tan ñaha.

<sup>13</sup> Tyihí tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu?

<sup>14</sup> Tsitó yo tyin ticanuu cuví tsi tsa cuenda rayii tatun nañi jiñi ra.

<sup>15</sup> Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi.

<sup>16</sup> Maa tyin tatun yóo cuñí cañi tahan tsa catyi tuhun ihya, cuñí tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

*Nu caahán ra Pablo tsihin nyivi Corinto tyin ña vaha cuhva tsatsí ñi Santa Cena*

<sup>17</sup> Yañi, inga tuhun cua cahan yu tsihin ndo tyin ña sii cuñí yu tsihin ndo; tyin tsa javahá ndo nu ndu iin ndo, ña tsahá tsi tsa vaha tsi ndo, tan jativi tsi tsi ndo.

<sup>18</sup> Tyin catyi nyivi tsihin yu tyin cuhva tsa ndu iin ndo tsa cua coo ndo culto, tan natahvi sava ndo. Tan tsicá tucu iñi yu tyin vasiquí nditsa tsa caahán ñi.

<sup>19</sup> ¡Vasiquí cuñí maa ndo tyin tsihin tsa natahvi sava ndo tan quituvi ndáa nyooho tsinú vaha iñi tsi Nyoo!

<sup>20</sup> Maa tyin tatun tacan ñi iyó tsihi nu yucú ndo, ñavin Santa Cena cuví can.

<sup>21</sup> Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda

cuanda ndu iin tandihi nyivi. Tan yihí ndo cuaha tsatsi ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo.

<sup>22</sup> ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

*Ra Pablo tsahá cuenda ra tsi ñi, nácaa taahán tsi coo ñi Santa Cena*

(Mt. 26.26-29; Mr. 14.22-25; Lc. 22.14-20)

<sup>23</sup> Tyin Jutu Mañi yo jacuahá tuhun ihya tsi yu. Tan juvin yacan tsa yahá jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihñ ra iin paan.

<sup>24</sup> Tan tsa yahá nacuhva ra tyahvi nyoo tsi Nyoo tan tsahnú ra paan can. Tan catyi ra: “Çatsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyi ra Jesús.

<sup>25</sup> Tan tsa yahá tsa cuxiñi ra naha tan quihñ ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yihí tsi tsi vasu ihya, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyi ra Jesús tsacuaa can.

<sup>26</sup> Tan tahan ñi tsa ndu iin yo tan tsatsí yo paan tan tsihi yo vinu jacotó yo tsi nyivi tyin tsacatyí cuatyí yo tsiñi Jutu Mañi yo. Tan tacan jacotó yo tsi nyivi nda cuanda quivi quitsi nyico ra.

*Ra Pablo tsahá cuenda ra tsi yo nácaa taahán tsi coo yo Santa Cena*

<sup>27</sup> Tatun tsatsí yo paan tan tsihi yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsiñi ra Cristo nu cruu tan tsa tsatí niñi ra.

<sup>28</sup> Yacan cuenda cuñi tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu.

<sup>29</sup> Tyin Nyoo tatsí tuñi ra tsi yo tun tsatsí yo tan tsihi yo tan ña tsicá iñi yo tsa cuenda tsa tsiñi ra Cristo.

<sup>30</sup> Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juvin nyivi tahan ndo tsa yahá tsiñi ñi.

<sup>31</sup> Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo.

<sup>32</sup> Maa tyin tatun tatsí tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyivi iyó cuenda nu ñuhu ñayivi ihya.

<sup>33</sup> Tan tacan nyoocho yañi, tatun cua ndu iin ndo tsa cua catsi ndo Santa Cena, çuatu

tahan ndo tsi ndo tan çatsi ndo tan coho ndo iin caa ñi.

<sup>34</sup> Maa tyin tatun ndáa nyoocho tsisocó ndo, çatsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

## 12

*Ndatu tsa tsahá Tatyí Ii Nyoo tsi yo*

<sup>1</sup> Yañi, cuñi yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

<sup>2</sup> Tsitó ndo tyin quivi tsa ñaha ca nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo.

<sup>3</sup> Yacan cuenda cuñi yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyi ra tyin ra Cristo cuví Jutu Mañi yo.

<sup>4</sup> Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo.

<sup>5</sup> Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo.

<sup>6</sup> Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihi yo tan javahá yo can.

<sup>7</sup> Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihi ca nyivi yihí cuenda ra.

<sup>8</sup> Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo.

<sup>9</sup> Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyivi cuuhví.

<sup>10</sup> Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi.

<sup>11</sup> Tan tandihi yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñi maa ra.

*Tandihí yo tan cuví yo intuhun ñi cuñu ñuhu tsihin ra Cristo*

<sup>12</sup> Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan

cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo.

<sup>13</sup> Tan tacan tucu tandihi yo, a cuví yo nyívi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutya yo tan nanduví yo intuhun ña cuñu ñuhu ra Cristo tyin tsahá ra intuhun ñi maa Tatyí li ra coo tsihin tandihi yo.

<sup>14</sup> Tyin cuñu ñuhu yo ña cuví cuví tsi intuhun ñi maa tinuu tyin cuñí tsi tsa cunyecu tandihi ca tsa cutahan tsihin tsi tan cuví tsi cuñu ñuhu ñi.

<sup>15</sup> Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can.

<sup>16</sup> O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can.

<sup>17</sup> Tun tsatyin nani cuñu ñuhu yo cuví tsi tinuu tan nduve soho yo, *¿nácaa* cua cuñi yo? O tun tsatyin nani cuñu ñuhu yo cuví tsi soho, *¿nácaa* cua tahíi yo?

<sup>18</sup> Maa tyin Nyoo tyaá ra tan iin tan iin can nu cuñí maa ra.

<sup>19</sup> Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can.

<sup>20</sup> Maa tyin tsa ndu iin soho, tinuu, jíñi, ndaha, tan tandihi ca maa, tacan tan cuví tsi intuhun cuñu ñuhu.

<sup>21</sup> Tinuu yo ña cuví catyí tsi tsihin ndaha yo: “Ña tsiñi ñuhu yooho tsi yu.” Tan ndi jíñi yo tan ña cuví catyí tsi tsihin tsaha yo: “Ña tsiñi ñuhu yooho tsi yu.”

<sup>22</sup> Ña vaha tsa cahan tsi tacan tyin vasu iin tsa lihi tsa cuñí maa yo tyin ña tsiñi ñuhu tsi yo, yacan cuví tsa tsiñi ñuhu ca.

<sup>23</sup> Tan nu cuñí yo tyin ña sii caá, tyasí yo. Tan nu ña taahán tsi nyehé nyívi, yacan tyasí vaha ca yo.

<sup>24</sup> Tan nu sii caá, ña tyasí yo. Tacan javahá Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa.

<sup>25</sup> Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusin tsi.

<sup>26</sup> Tatun luxu cuñu ñuhu yo nyehé tundoho, nyehé ndihi tani ca cuñu ñuhu yo tundoho. Tan tatun sii cuñí luxu tsi, sii cuñí tani tsi.

<sup>27</sup> Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo.

<sup>28</sup> Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi

ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yahá can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyívi cuuhví, tan ra tsa jatyinyee tsi nyívi, tan ra jaha cuenda vehe ñuhu, tan ra caahán inga yuhu tsa ña tsitó ra.

<sup>29</sup> Ña tandihi yo tan tsicá yo tyiñu ra Cristo. Ña tandihi yo tan cuví yo ndusu yuhu ra. Ña tandihi yo tan cuví yo ra jacuahá. Ña tandihi yo tan javahá yo tsa iyo.

<sup>30</sup> Ña tandihi yo tan tsahá Nyoo tunyee iñi tsa janduvahá yo tsi nyívi cuuhví. Ña tandihi yo tan caahán yo inga yuhu tsa ña tsitó yo. Ña tandihi yo tan cuví nacotó yo tan nacatýi tuhun yo náa cuñí tsi catyí tsa caahán inga nyívi.

<sup>31</sup> Ndycu ndo cuhva naquihin ndo tsa vaha ca tsa tsahá Nyoo. Maa tyin cua janaha yo iin cuhva vaha ca tsi ndo.

## 13

*Nu janahá ra Pablo nácaa taahán tsi cuñi yo tsi nyívi*

<sup>1</sup> Tatun yuhu tan cuví cahan yu cuaha ñi yuhu tsa caahán nyívi iyó nu ñuhu ñayívi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndi tsi nyívi, cuví yu tumaa tyombo tsa nañi ñi maa o iin caa tsa tsacú ndaxin ñi maa.

<sup>2</sup> Tatun cuví cuhva cuenda yu tuhun caahán Nyoo, tan cuví coto yu tandihi tuhun xeehe, tan tsitó yu tandihi tuhun, maa tyin tatun ña cuñí tucu yu tsi Nyoo tan ndi tsi nyívi, nduve náa catyí javaha yu tandihi yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñi yu tsi Nyoo tan ndi tsi nyívi, nduve náa ra cuví yu.

<sup>3</sup> O tatun cuhva yu tandihi tsa iyó tsi yu tsi nyívi ndaahvi, tan cuhva yu nda cuanda ñayívi yu tyin cucayu cuñu ñuhu yu, maa tyin tatun ña cuñi yu tsi Nyoo tan ndi tsi nyívi, nduve náa cua jatyinyee can tsi yu.

<sup>4</sup> Tatun nditsa tsa cuñi yo tsi Nyoo tan tsi nyívi, ña tyixin yo, vaha iñi yo, ña nyiyó iñi yo tsa tsahá ra tsi inga ñi, ña cahnú jahá yo tsi yo, tan ña yaa yo.

<sup>5</sup> Tatun nditsa tsa cuñi yo tsi Nyoo tan tsi nyívi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tsihi tsitsi añima yo.

<sup>6</sup> Tatun nditsa tsa cuñi yo tsi Nyoo tan tsi nyívi, ña sii cuñi yo náa ndihi tsa ña vaha javahá ñi, maa tyin cusii iñi yo tsihin tsa vaha tan tsa nditsa.

<sup>7</sup> Tatun nditsa tsa cuñi yo tsi Nyoo tan tsi nyívi, cunyéé iñi yo nyehe yo tundoho jahá

ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihi iñi yo.

<sup>8</sup> Tsa cuñi yo tsi Nyoo tan tsi nyivi ña cua cundihi maa tsi, maa tyin coo quivi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo.

<sup>9</sup> Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyivi,

<sup>10</sup> maa tyin quivi quitsi nyico ra Cristo, cua cundihi tsa tsitó yo luxu ñi tyin cua coto yo tandihi maa.

<sup>11</sup> Quivi tsa luhlu yo caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quivi tsahnú yu nacoq yu tsa yu cuhva javahá ra nyihi.

<sup>12</sup> Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndiñi tsi yaa. Maa tyin quivi cua quitsi ra Cristo, cua coto yo tandihi maa. Luxu ñi tsitó yo vityin, maa tyin quivi quitsi nyico ra, tandihi cuii maa tan cua coto yu, tumaa nacotó maa ra tsi yu vityin.

<sup>13</sup> Iyó uñi taahan tsa ña cua ndiñi maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihi tsa cahan Nyoo tyin cuhva ra tsi yo, tan tsa cuñi yo tsi Nyoo tan tsi nyivi. Tan tsitsi tsa nduñi taahan tsehe, tsa tsiñi ñuhu ca cuví tsa cuñi yo tsi Nyoo tan tsi nyivi.

## 14

*Nu jacuahá ra Pablo nácaa cahan yo inga yuhu tsa ña tsitó yo*

<sup>1</sup> Jañihi ca ndo cuñi ndo tsi Nyoo tan tsi nyivi. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyivi.

<sup>2</sup> Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahán yo jahá Tatyí Ii Nyoo.

<sup>3</sup> Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi.

<sup>4</sup> Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyivi, tandihi ñi tsahnú.

<sup>5</sup> Yuhu cuñi yo tsa cahan tandihi ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatyinyeé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto

ndo nácaa caahán inga ndo tsihin inga yuhu, naçatyí tuhun ndo tsihin ñi. Tacan tan cuví jatyinyeé tsi tsi tandihi ñi.

<sup>6</sup> Yacan cuenda yañi, tatun yuhu tan tsa yu nu yucú ndo, tan cahan yu inga yuhu, ña cua jatyinyeé tsi tsi ndo. Maa tyin tun cahan yu tsa janahá Nyoo tsi yu, o tsa jacotó ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyeé tsi tsi tandihi ndo.

<sup>7</sup> Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo.

<sup>8</sup> Tan tatun nu iyó cuatyí tan ña vaha tiví ra cutu, yofñi cua coto náa cuhva cua cañi tahan ra naha.

<sup>9</sup> Tan tacan tucu yoo, tatun caahán yo inga yuhu tsa ña cutuñi iñi nyivi, ña cua coto ñi náa caahán yo. Tan cua catyí ñi tyin jiñi yo ña vaha cuñi, yacan caahán maa yo.

<sup>10</sup> Cuaha xaan yuhu caahán nyivi nu ñuhu ñayivi ihya. Tan intuhun intuhun nuu yuhu tan iyó iyó ñi tsa cuñi tsi catyí.

<sup>11</sup> Maa tyin tun ña cutuñi iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu.

<sup>12</sup> Yacan cuenda nyoocho tsa cuñi xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuvi jatyinyeé vaha ca tsi nyivi yucú vehe ñuhu.

<sup>13</sup> Tacan tucu nyoocho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyivi náa cuñi tsi catyí.

<sup>14</sup> Tyin tatun tsicán tahvi yu tsi Nyoo tsihin iin yuhu tsa ña cutuñi iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñi iñi tsi.

<sup>15</sup> Yacan cuenda cuñi tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñi iñi yu. Tan cuñi tsi tsa cata yu yaa tsihin yuhu tsa ña cutuñi iñi yu. Tan cata ndihi tucu yu yaa tsihin yuhu tsa cutuñi iñi yu.

<sup>16</sup> Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñi iñi nyivi tsa ña tsitó náa cuví yacan. Tan ña cua cuvi jacahnú ñi tsi Nyoo tsihin un.

<sup>17</sup> Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyeé tsi tsi inga nyivi tyin ña cutuñi iñi ñi tsa caahán un.

<sup>18</sup> Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihi nyoocho.

<sup>19</sup> Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun

tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñi iñi ndo.

<sup>20</sup> Tsahnu çaca iñi ndo, yañi. Tan ña lee xaan çaca iñi ndo. Maa tyin tatun javaha ndo ñaa javaha ndo, javaha ndo tumaa javahá lee tyin lee ña javahá tsi tsa caquiñi.

<sup>21</sup> Catyí Nyoo nu libro ley ra tyehen: “Cua cahan yu tsihin nyivi ihya tsihin yuhu nyivi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo.

<sup>22</sup> Yacan cuenda tsa caahán yo inga yuhu cuví tsi tumaa iin seña tsa cuenda nyivi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyivi tsa tsinú iñi tsi ra.

<sup>23</sup> Tyin tatun tandihí ndo caahán ndo inga yuhu nu ndu iin ndo, tan quihví iin nyivi tsa ña yihí cuenda Nyoo, o ñi tsa ña cutuñi iñi tuhun Nyoo, cua catyí ñi tyin jiñi ndo ña vaha cuñi.

<sup>24</sup> Maa tyin tatun tandihí ndo tsahá cuenda ndo tsa caahán Nyoo tan quihví iin nyivi tsa ña yihí cuenda Nyoo, a ñi tsa ña cutuñi iñi tuhun Nyoo, cua coto ñi tyin iyó cuatyí ñi tsa cuenda tsa cutuñi iñi ñi tsa caahán ndo.

<sup>25</sup> Tan tandihí tsa iyó tsitsi añima ñi cua nacoto ñi, tan cua cuñi tsiti ñi jacahnu ñi tsi Nyoo. Tan cua catyí ñi tyin nditsa nditsa cuii tsa nyaá Nyoo tsihin ndo.

#### *Nacaa javahá yo culto iin cuhva vaha*

<sup>26</sup> Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuahá ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, ñi nacatyí tuhun ndo naa cuñi tsi catyí inga yuhu can. Maa tyin tandihí yacan taahán tsi cuví tsi iin tsa tsahá tunyee iñi maa Nyoo tsi tandihí ndo tsa yihí ndo cuenda ra.

<sup>27</sup> Tatun cua cahan ndo inga yuhu nu ndu iin ndo, cuñi tsi tsa cahan uvi ndo a uñi ñi ndo, maa tyin intuhun intuhun ñi ndo çahan; ña çahan tandihí ndo juvin ñi cuhva tsa caahán inga ndo. Tan inga tucu tuhun cuñi tsi tsa nacatyí tuhun inga ndo tsa caahán ndo.

<sup>28</sup> Maa tyin tun yoñi cuví nacatyí tuhun tsa caahán ndo, vaha taxin ca, ña çahan ndo tsihin inga yuhu nu ndu iin ndo. Çahan ndo tsihin Nyoo tsihin inga yuhu tun cuñi ndo, maa tyin ndihí cuhva tsiñi ñi maa ndo.

<sup>29</sup> Tacan tucu tatun tsahá cuenda yo tsa caahán Nyoo. Çahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo.

<sup>30</sup> Maa tyin tatun jacoto Nyoo náa inga ca tuhun tsi inga nyivi tsa yucú tsiñi tuhun caahán ndo, tacan tan ra tsa nyaá caahán can, cuñi tsi jandihí ra tsa caahán ra tan cahan inga ñi.

<sup>31</sup> Tan tacan tandihí nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihí nyooho tsa ndu iin vehe ñuhu tan ndu iin ca iñi ndo.

<sup>32</sup> Nyooho tsa tsahá cuenda tsa caahán Nyoo, cuví cuatu nu ndo nda cuanda ndihí cahan inga nyivi,

<sup>33</sup> tyin Nyoo ña cuñi ra tsa tavi tahan ña cahan ndo, tyin maa ra catsi iyó ra.

Quihín ndo cuhva iyó inga ca vehe ñuhu nu ndu iin nyivi yihí cuenda ra Cristo,

<sup>34</sup> tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yí ñi tumaa catyí ley Nyoo. Tan tacan taahán tucu tsi javaha nyooho.

<sup>35</sup> Tatun náa cuñi ñi coto ñi, na ndaca tuhun ñi tsi yí ñi nda yuvehe ñi, tyin ña vaha tsa cahan ñiñaha nu ndu iin ndo.

<sup>36</sup> Tatun siin cuhva tsicá iñi ndo, cuñi tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo.

<sup>37</sup> Tatun ndáa nyooho cuñi tyin ndusu yuhu Nyoo cuví ndo, o cuñi ndo tyin Tatyí ñi Nyoo jaquihín ityi tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví.

<sup>38</sup> Maa tyin tatun ña cuñi ndo naquihín ndo tuhun ihya, ndi nyuhu tan ña cua naquihín ndi tuhun caahán nyooho.

<sup>39</sup> Tan tacan, yañi, nduçu ndo cuhva cuhva cuenda ndo tuhun Nyoo tsi nyivi. Tan ña çasi ndo nu cahan nyivi inga yuhu.

<sup>40</sup> Maa tyin javaha ndo tandihí tsihin tsa vii tan tsa catsi.

## 15

### *Nacaa nandoto ra Cristo*

<sup>1</sup> Vityin yañi, cuñi yu tsa nduçuhun iñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihín ndo itsi tan ñi iñi añima ndo tsinú iñi ndo.

<sup>2</sup> Tan juvin tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinú iñi ndo tsi ra Cristo.

<sup>3</sup> Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyí yu tyin tsiñi ra tsacatyí cuatyí yo, tumaa catyí nu libro Nyoo tyin cua cuví.

<sup>4</sup> Tan quihvi cuñu ñuhu ra tsitsi ñuhu. Maa tyin tsinu uñi quivi nandoto ra tumaa catyi nu libru Nyoo.

<sup>5</sup> Tan tsa yaha tan quituvj ra nuu ra Pedro tan quituvj ndihi ra nuu tandihi ra tsicá tyiñu ra.

<sup>6</sup> Yaha can tan quituvj ra nuu yaha ca uhun cientu nyivi yihí cuenda ra. Tan juhva ñi can tsa tsihí ñi, maa tyin ndi iyó cuaha ca ñi nda cuanda vityin.

<sup>7</sup> Yaha can tan quituvj ra nuu ra Jacobo. Tacan tan quituvj ndihi ra nuu tandihi ra tsicá tyiñu ra.

<sup>8</sup> Tan nu ndihi ña quituvj ndihi ra nuu yuhu, tsa cuví yu tumaa iin lee tsa cacu yutya.

<sup>9</sup> Tyin tsa nuu tandihi ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaá ndaha xaan yu tsi nyivi yihí cuenda ra.

<sup>10</sup> Maa tyin Nyoo vaha iñi ra tsihin yu. Yacan cuenda tsaḥa ra ndatu tsa cuví yu ra tsicá tyiñu ra tan ña cuatu tsaḥa ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihi ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can.

<sup>11</sup> Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

*Nu jacuahá ra Pablo tyin nditsa tsa cua nandoto ndiyi*

<sup>12</sup> Tsa caahán ndi tsihin ndo yacan cuví tsa nandoto ra Cristo tsa yaha tsihí ra tan ¿Nacuenda yihí ndo catyi ndo tyin ña nandoto ndiyi?

<sup>13</sup> Tyin tatun ña cua nandoto ndiyi, ndi ra Cristo tan ña nandoto ra quivi can.

<sup>14</sup> Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra.

<sup>15</sup> Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyi ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo.

<sup>16</sup> Tyin tun ña cua nandoto ndiyi, ndi ra Cristo tan ña nandoto ra.

<sup>17</sup> Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jaha ra tucahnu iñi cuatyí ndo.

<sup>18</sup> Tan ndi nyivi tsa tsihí tsa yihí cuenda ra ña cacu ñi tun ña nditsa tsa nandoto ra.

<sup>19</sup> O tun nu ñuhu ñayivi ihya ñi jatyinyeé ra tsí yo, tan ña cua quitsi ra inga tsaha, nduve yahvi nyaá tsinú iñi yo tan cuví yo nyivi soho ca tsa nuu tandihi ca nyivi.

<sup>20</sup> Maa tyin tsitó vaha yo tyin nditsa tsa nandoto ra Cristo. Tan juven ra cuví ra tsa nandoto jihna ca tsitsi tsa tandihi ca ndiyi tsa cua nandoto.

<sup>21</sup> Tyin tsacatyí cuatyí ra Adán tan tsicoḡ tuhun tsihí. Tan yacan tsiihí nyivi nda cuenda vityin. Maa tyin tsa cuenda tsa nandoto ra Cristo cua nandoto tandihi nyivi yihí cuenda ra.

<sup>22</sup> Tyin tumaa tsa tandihi yo tsihí tyin cuví yo tata ra Adán, tacan tucu cua nandoto tandihi yo tan coo yo ñayivi nyito tyin cuví yo nyivi ra Cristo.

<sup>23</sup> Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra.

<sup>24</sup> Yaha can tan cua naa ñuhu ñayivi ihya tan ña cua cundaca ñaha ca ra cumi tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihi nahnu, tan cua nacuhva cuenda ra can tsi Nyoo Jutu ra.

<sup>25</sup> Tyin ra Cristo cua cundaca ñaha ra nda cuanda quivi cuhva Nyoo tsa cuví jaha canaa ra tsi tandihi nu xaan iñi tsi ra nahnu.

<sup>26</sup> Tan nu tsa cua janaa ra nu ndihi ña, nu ican cuví tuhun tsihí.

<sup>27</sup> Tyin tsa tsaḥa Nyoo tsa quihí ndaha ra tandihi maa tsa iyó. Maa tyin nu catyi tyin tandihi nacuhva cuenda Nyoo tsi ra Cristo, ña cuñi tsi catyi tyin quihí ndaha ndihi ra tsi maa Nyoo tyin maa Nyoo cuví ra tsaḥa tsa quihí ndaha ra tandihi maa tsa iyó.

<sup>28</sup> Maa tyin quivi jaha canaa ra Cristo tandihi can, tacan tan maa ra, tsa cuví ra Sehe Nyoo, cua nacuhva cuenda nyico ra tandihi tsa tsaḥa Nyoo tsi ra. Tyin tacan tan cundaca ñaha Nyoo tandihi maa tsa iyó.

<sup>29</sup> Tun tsatyin ña nandoto ndiyi, ¿nacuenta tyin juhva nyivi tsicoondutyá ñi tsa cuenda ndiyi? ¿Tan nacuenta javahá ñi tyehen tun ña tsinú iñi ñi tyin coo quivi cua nandoto ndiyi?

<sup>30</sup> Tan tacan tucu maa ndi, tun ña cua nandoto ndi, ¿nacuenta tyin ndoó ndi vaha tsa nyehé ndi tundoho ndihi quivi ñi?

<sup>31</sup> Tandihi ñi quivi nducú nyivi tsi yu cahñi ñi, tan tsa nditsa cuví tsi, yañi, tumaa tsa nditsa tsa sñi cuñi yu tsihin ndo, tsa cuenda tsa tsinú iñi ndo tsi Jutu Mañi yo Jesucristo.

<sup>32</sup> Nduve náa catyi tsa nyehe yu tundoho tsa cuñi cahñi nyivi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyivi: “Catsi yo, coho yo tyin tyaan isa cua cúu yo”, catyi ñi tsa ña tsitó.

<sup>33</sup> Tan catyi tucu ñi tyin: “Tun cutahán yo tsihin nyivi caquiñi jativi ñi cuhva vaha iyó yo.” Tan tsehe cuví tsa nditsa. Yacan jaha

ndo cuenda tsi ndo tan ña cuhva ndo tsa jandavi ñaha nyivi tsi ndo.

<sup>34</sup> Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

*Nu jacuahá ra Pablo nácaa cua janandoto Nyoo tsi yo quivi quitsi nyico ra Cristo*

<sup>35</sup> Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuvi?”

<sup>36</sup> ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñi tsi tsa tyahyu jihna tsi? Tacan tan cana nuu tsi.

<sup>37</sup> Tyin tsa tatsi yo nuñi, ñavin tsa cuvi maa tsi itu tan tatsi yo. Tyin nuñi cuvi tsi tatsi yo tan tacan ñi cuñi tucu yo tsihin náa inga ca tsiti.

<sup>38</sup> Nyoo javahá ra nácaa cuñi maa ra tsihin tsa intuhun intuhun tsiti can, yacan cuenda tsa cana tsi cuvi tsi tsa taahán maa tsi cuvi tsi. Tan ña cuvi nanduvi tsi inga ca tsiti.

<sup>39</sup> Tan tacan tandihi cuñu ñuhu, ña inducu caá tsi, tyin cuñu ñuhu nyivi, siin caá tsi, tan cuñu ñuhu quiti nahnu, siin caá tucu can, tan cuñu ñuhu saa, siin caá tucu yacan, tan tyaca siin caá tucu can.

<sup>40</sup> Tan tacan tucu tsa iyó andivi, siin caá tsi. Tan siin caá tucu tsa iyó nu ñuhu ñayivi ihya. Siin xaan caá tsa iyó nda andivi, tan siin tyaquí tucu tsa iyó nu ñuhu ñayivi ihya.

<sup>41</sup> Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu.

<sup>42</sup> Tan tacan tucu tuhun tsa cua nandoto ndiyi. Tuhvá yo tsicutsi cuñu ñuhu tan tyahyú tsi. Maa tyin tsa cua nandoto yo ña cua cúu ca yo.

<sup>43</sup> Cuñu ñuhu tsa iyó tsi yo vityin nduve tunyee iñi iyó tsi can, nacuhvi can, tan tsihi can. Maa tyin cua nandoto iin tsa siin caá tan iyó ca tunyee iñi tan ña cua cúu ca can.

<sup>44</sup> Tsa tsihi yo tsicutsi yo cuñu ñuhu tsa naquihin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

<sup>45</sup> Catyi tutu Nyoo tyin ra Adán ra tsa tsicoo tsa jihna ñi, tsahá Nyoo ñayivi coo ra. Tan ra Cristo cuvi ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juvin ra cuvi Tatyí li.

<sup>46</sup> Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí li Nyoo.

<sup>47</sup> Rayii tsa tsinu tsa jihna ñi, tsihin nyaca ñuhu tsinu ra. Tan cuvi ra cuenda ñuhu

ñayivi. Maa tyin ra Cristo cuvi ra tumaa rayii tsa tsinu uvi tan cuvi ra cuenda gloria.

<sup>48</sup> Tandihí yo iyó cuñu ñuhu yo tumaa tsicoo cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andivi.

<sup>49</sup> Tumaa ndacu yo tsi rayii, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

<sup>50</sup> Tan cuñi yu cahan yu tsihin ndo, yañi, tyin cuñu ñuhu yo ña cuvi quihvi tsi nu ndacá ñaha Nyoo, tyin iin tsa yatyi tiví ña cuvi quihvi can nu yihí tsa ña tuhvá tiví.

<sup>51</sup> Tan cuñi tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo.

<sup>52</sup> Tan nu cua ndihí tiví ángel trompeta, cua nandoto ndiyi iin yaha cuiñi ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo.

<sup>53</sup> Tyin cuñi tsi tsa nasama Nyoo cuñu ñuhu yo tsihin iin tsa ña cua naa maa.

<sup>54</sup> Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jaha canaa ra tsi tuhun tsihi.”

<sup>55</sup> Yooho, Tuhun Tsihi, ¿náa tunyee iñi tsa tsicoo tsi un tyin cahñi un tsi ndi?

¿Náa jaha canaa un, yooho Tuhun Tsihi?

<sup>56</sup> Tyin cuatyí yo tsahá can tsa cahñi tuhun tsihi tsi yo, tyin ley tsahnu tsahá tunyee iñi tsi can.

<sup>57</sup> Maa tyin tyahvi nyoo tsi Nyoo, yañi, tyin jaquitsi ra tsi Jutu Mañi yo Jesucristo tan tsahá ra tunyee iñi tsi yo tsa jaha canaa yo tsi nu tuhun tsihi can.

<sup>58</sup> Yacan cuenda yañi, cunya naa vaha ndo tsi Nyoo tsihin tsa ñi iñi añima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

## 16

*Nu tsahá cuenda ra Pablo tsi nyivi nácaa taahán tsi jatinyee ñi tsi inga ñi yihí cuenda Nyoo*

<sup>1</sup> Tan tuhun tsa jatinyeeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia.

<sup>2</sup> Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsahá maa Nyoo tsi ndo. Tan ña cuatu ndo nda tsaa yu.

<sup>3</sup> Tan nacatsi ndo ndáa ra cuñi maa ndo tyin cundaca xuhun can. Tan tsa tsaa yu,

cua javaha yu iin carta tyin cundaha ndihi ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén.

<sup>4</sup> Tan tatun tahan tucu tsi tsa cuhun yu, cuhun ra naha tsihin yu.

*Nu caahán ra Pablo ndáa ndihi nu cua cahan ra tuhun ra Cristo*

<sup>5</sup> Tsa cua quitsi yu nu yucú ndo ñuu Corinto, cua yaha yu ityi Macedonia.

<sup>6</sup> Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyeé ndo luxu tsi yu tan cuhun yu inga ñuu.

<sup>7</sup> Ña iin yaha ñi cua yaha yu nu yucú ndo tyin cuñi yu ndoo yu juhva quivi tsihin ndo tatun Jutu Mañi yo tan cuñi ra.

<sup>8</sup> Maa tyin cua cunyii yu ñuu Éfeso ihya nda cuanda yaha quivi vico Pentecostés tsa jacahnú nyivi Israel. Tacan tan cua quitsi yu nu yucú ndo.

<sup>9</sup> Cua ndoo yu juhva quivi ihya tyin tsahá xaan tsi cuhva caahán yu tuhun Nyoo tsihin nyivi vasu ndi maa cuaha ñi ña taahán iñi ñi tuhun ra.

<sup>10</sup> Tatun tsa ra Timoteo nu yucú ndo, na cunyii ra tsihin ndo. Tan vaha tyānuu ndo tsi ra tyin juvin ñi tyiñu Jutu Mañi yo jahá tyiñu ra tumaa maa yu.

<sup>11</sup> Tan vaha cuñi ndo nyehé ndo tsi ra. Tan jatyinyee ndo tsi ra na quitsi ra nu nyii yu tyin ndatú yu tsi ra tsihin inga ca ra yañi yo naha ra.

<sup>12</sup> Tan ra Apolos yañi yo, cahan ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

*Nu tsahá ra Pablo nacumi tsi tandihi nyivi yihí cuenda Nyoo ñuu Corinto*

<sup>13</sup> Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo.

<sup>14</sup> Tandihí tsa javahá ndo, javaha ndo tsa cuenda tsa cuñi ndo tsi Nyoo tan tsi nyivi yihí cuenda ra.

<sup>15</sup> Yañi, tsitó ndo tyin jihna ca nyivi ra Estéfanos natsinú iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano.

<sup>16</sup> Tan cuñi yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanos, tan tsi tandihí ca ñi tsa jatyinyeé tan jahá tyiñu cuenda Nyoo.

<sup>17</sup> Tan sii xaan cuñi yu tyin quitsi ra Estéfanos, ra Fortunato, tan ra Acaico. Tan jatyinyeé ra naha tsi yu tyin nyooho ña cuví quitsi ndo tyin cañi xaan ñuu ndo.

<sup>18</sup> Maa tyin maa ra naha quitsi ra naha. Tan jandunyeé ca ra naha iñi yu tsihin

tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

<sup>19</sup> Tan vatsí nacumi tsi ndo jahá tandihí nyivi yihí cuenda Nyoo ñuu tsa cayucú Asia ihya. Tan vatsi tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi.

<sup>20</sup> Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

<sup>21</sup> Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

<sup>22</sup> Tatun ndáa nyivi ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

<sup>23</sup> Tan na nasoco Jutu Mañi yo Jesucristo tsi tandihí ndo.

<sup>24</sup> Tan catyí yu tsihin ndo tyin yuhu cuñi yu tsi tandihí ndo tsa cuenda ra Cristo Jesús.

Tan na cuví tsi tacan ñi.



## Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta cuenda nyivi  
yihí cuenda Nyoo ñuu Corinto*

<sup>1</sup> Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsí tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihí ca nyivi yihí cuenda Nyoo tsa iyó inga ñuu tsa cayucú nanii cahnu Acaya.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Nu nyehé xaan ra Pablo tundoho nu tsicá  
ra caahán ra tuhun ra Cristo*

<sup>3</sup> Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusii ra iñi yo tandihí ñi tsaha.

<sup>4</sup> Nyuhu nyehé xaan ndi tundoho maa tyin maa ra jandusii iñi ndi. Tyin tacan tan cuví jandusii ndi iñi nyivi nyehé tundoho tumaa jandusii maa ra iñi ndi.

<sup>5</sup> Tyin nyehé ndi tundoho tsa cuenda ra Cristo, tan juvin ñi tsa cuenda ra jandusii Nyoo iñi ndi.

<sup>6</sup> Yacan cuenda tatun nyehé ndi tundoho tsa cuenda tsa jacotó ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusii Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi.

<sup>7</sup> Tyin tsitó vaha ndi tyin jandusii ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

<sup>8</sup> Yañi, cuñí ndi tsa coto ndo tyin cuaha xaan tundoho nyehé ndi tsa tsiyucú ndi ñuhu Asia. Ñihi xaan nducú cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ícan. Tan cuñi maa ndi tyin cua cúu ndi tsa ndi cumañi ca quita ndi ícan.

<sup>9</sup> Tsa nyehé ndi tyin tsa cuñí cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñí tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi.

<sup>10</sup> Nyoo jacacú tsi ndi quivi can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi,

<sup>11</sup> tun nyooho tan ña jandihí ndo tsa jatinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

*Nu caahán ra Pablo nacuenda ña tsahan  
ra ñuu Corinto*

<sup>12</sup> Iyó iin tuhun tsa tsahá tsa sii xaan cuñí ndi tan tuhun ihya cuví tsa cuiti iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsifni tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi.

<sup>13-14</sup> Nu tutu tsa tsa yaha jaquitsi ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñí ndi tsa cutuñi vaha ca iñi ndo tandihí tuhun can tyin tacan tan sii cua cuñi ndo tsihin ndi quivi quitsi Jutu Mañi yo Jesucristo. Tan sii cua cuñi tucu nyuhu tsihin nyooho.

<sup>15-16</sup> Tsa cuenda tsa tsitó vaha yu tyin tacan cua cuví: tyaá yu cuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusii iñi ndo. Tan tsicá tucu iñi yu tyin yaha can tan cuví jatinyeé ca ndo tsi yu tan cuhun yu Judea. Tyehen tyaá yu cuhva javaha yu, maa tyin ña cuví.

<sup>17</sup> ¿A cuñí maa ndo tyin ña tyaá yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyi ñi tyin vaha, maa tyin tsitsi añima ñi catyi ñi tyin ña vaha. Caahán ñi nduvi tuhun can tsa iin ñi cuhva.

<sup>18</sup> Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu.

<sup>19</sup> Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra.

<sup>20</sup> Tan tsa cuenda ra ñihí yo tandihí tsa vaha tsa catyi Nyoo tyin cuhva ra tsi yo. Yacan cuenda tsa jacahnú yo tsi Nyoo, catyi yo tyehen: “Na cuví tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo.

<sup>21</sup> Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihí tucu ra tunyee iñi tsi nyooho. Nacatsi ra tsi yo,

<sup>22</sup> tan tsahá ra Tatyí li ra coo añima yo, tan cuví tsi tumaa iin tuñi tsa tyaá ra tsi yo

tan janahá tsi tsi yo tyin cua ñihi yo tsa cua cuhva ra tsi yo.

<sup>23</sup> Ñaha ca maa quitsi nyico yu nu yucú ndo, tyin ña cuñi yu janducuihya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu.

<sup>24</sup> Caahán ndi tandihi tuhun ihya tsihin ndo tsa cuenda tsa cuñi ndi jatyinyee tahan yo tsi yo tan coo ca tusi iñi Nyoo tsi ndo. Ña cuñi ndi quihí ndaha ndi tsi ndo tyin nyooho tsa tsinú vaha maa iñi ndo tsi Nyoo.

## 2

<sup>1</sup> Yacan cuenda ña cuñi yu quitsi yu tyin tacan tan ña cuhva ca yu tucuihya iñi tsi ndo.

<sup>2</sup> Tyin tatun yuhu tan janducuihyá yu iñi ndo, yofí cua jandusi iñi tsi maa yu. Tyin nyooho ña cuví ca jandusi ndo iñi yu tun tsa jahá janducuihya yu iñi ndo.

<sup>3</sup> Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuihya ndo iñi yu tsihin cuhva iyó ndo. Tyin taahán tsi jandusi ndo iñi yu. Tyin tatun sií cuñi yuhu, tsitó yu tyin tandihi yo tan sií cuñi yo.

<sup>4</sup> Quivi tsa tyaa yu carta can tsa cuenda ndo, tsicá xaan iñi yu. Cuihya xaan cuñi yu tan nda cuenda tsacu yu. Jaquitsi yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

*Nu tsahá cuenda ra Pablo tsi nyivi nácaa taahán tsi jaha ñi tucahnu iñi*

<sup>5</sup> Ra tsa tsahá tucuihya iñi, ñavin yuhu ñi janducuihya ra iñi. Tyin janducuihya tucu ra luxu iñi nyooho. Caahán yu tyehen tyin tacan tan ña cuñi ndo tyin ña cuví coo tucahnu iñi tsi ra javahá tacan.

<sup>6</sup> Tsa iyó vaha ñi. Ña çahan ca ndo tsi ra can. Ña tãtsi tuñi ca ndo tsi ra.

<sup>7</sup> Vityin taahán tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra.

<sup>8</sup> Yacan cuenda cuñi yu tsa çahan ndo tsihin ra tan janaha ndo tsi ra tyin ndi cuñi ndo tsi ra.

<sup>9</sup> Jaquitsi yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo.

<sup>10</sup> Tan vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo.

<sup>11</sup> Tyin tacan tan ña cuví jaha canaa nu ña vaha tsi yo. Tyin tsitó vaha yo nácaa cuñi nu jandavi ñaha nu tsi yo.

*Ra Pablo ña ndoo ra ñuu Troas tyin ña nañihi ra tsi ra Tito*

<sup>12</sup> Quivi tsaá yu ñuu Troas tsa cua çahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo.

<sup>13</sup> Maa tyin tuñu xaan cuñi yu, tyin ña nañihi yu tsi ra Tito, yañi yo. Yacan cuenda vatsi yu ityi Macedonia ihya tan ña ndoo yu ndacan çahan yu tsihin nyivi.

*Nu caahán ra Pablo tuhun ra Cristo tsihin tsa ñi iñi añima ra*

<sup>14</sup> Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iin xico tami tsa caná tandihi ñi ityi nu cuahán ndi.

<sup>15</sup> Tyin nyuhu cuví ndi tumaa xico tami ra Cristo tsa cuenda Nyoo. Tan tandihi ñi ityi cuahán ndi tan ñihi nyivi xico tami can, tahan ñi nyivi tsa cua cacu tan ñi tsa ña cua cacu.

<sup>16</sup> Maa tyin tsa cuenda nyivi tsa ña cua cacu, ndasi caná tsi, tan cuñi maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin iyó cuví jaha tyiñu tyiñu ihya?

<sup>17</sup> Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñi ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi iñi añima ndi tyin iin ñi cuví ndi tsihin ra tan maa Nyoo tava tyiñu tsi ndi tsa çahan ndi tyin cuenda ra Cristo yihí ndi.

## 3

*Tuhun tsaá tsa ndoo ra Cristo tsihin yo*

<sup>1</sup> Tsa caahán ndi tuhun ihya, ¿a cuñi maa ndo tyin caahán ndi tacan tsa cuñi ndi nduyaa ndi? Ñavin. ¿A cuñi tsi cuhva ndi iin carta tsa catyi tyin vaha nyivi cuví ndi? ¿O cuñi tsi ndacan ndi carta tsi ndo tumaa javahá juhva nyivi?

<sup>2</sup> Ña cuñi tsi. Tyin tsa tyaa Nyoo tsi ndo añima ndi, tan maa ndo cuví carta tsa cuenda ndi. Yacan cuenda ña tsifí ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo.

<sup>3</sup> Tan catsi nyehé ñi tyin cuví ndo carta tsa tyaa ra Cristo tsa cuenda ñi, tan nyuhu nacuhvá cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa

ra itsi tsitsi añima ndo tsihin Tatyí Ii Nyoo nyito. Tan ñavin nu yuu tsinyaq tsi.

<sup>4</sup> Caahán ndi tyehein tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyeé ra Cristo tsi ndi.

<sup>5</sup> Ña cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihí tsa javahá ndi tan maa Nyoo javahá can.

<sup>6</sup> Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuví tuhun tsaq tsa tsahá ñayivi tsaq coo yo tyin iyó Tatyí Ii ra añima yo. Ley tsa tsahá Nyoo tsi ra Moisés ña tsahá tsi ñayivi tsaq coo yo tyin janahá ñi tsi tsi yo tyin iyó cuatyí yo tan taahán tsi cúu yo.

<sup>7</sup> Ley tsahnu can tsinyaq nu yuu tsihin letra, tan cahnu xaan cuví tsi. Yacan cuenda tsa tsaq ra Moisés tsihin tsi nu yucú nyivi Israel, nayuhví xaan ñi nyehe ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quivi quitsí ley tsa tsahá tuhun tsihi,

<sup>8</sup> iyaha ca cahnu cuví tuhun tsa ndoó Nyoo tsihin yo tsa tsahá Tatyí Ii ra tsi yo!

<sup>9</sup> Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsaq tsa ndoó Nyoo tsihin yo tyin janduvahá tsi tsi yo nuu ra.

<sup>10</sup> Nditsa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo.

<sup>11</sup> Tyin tatun cahnu cuví tsa tsicoq juhva ñi tyembu, yaha ca cahnu cuví tsa ña cua cundihí maa.

<sup>12</sup> Tsitó vaha ndi tyin ña cua cundihí tsi. Yacan cuenda caahán ndi tsihin tsa ñi iñi añima ndi. Ña cahan nuu ndi tan ña yuuhví ndi caahán ndi.

<sup>13</sup> Tan ña javahá ndi tumaa javahá ra Moisés. Tyin ra Moisés tyasí ra nuu ra tsihin jahma, tyin tacan tan ña nyehe nyivi Israel nu cua naa tsa xiñu nuu ra.

<sup>14</sup> Quivi can ña cutuñi iñi ñi. Nda cuenda vityin tan ña cutuñi iñi ñi. Tyin tatun cahví ñi ley tsahnu ña cutuñi iñi ñi itsi tyin ndasí tsa tsiñi tuñi jiñi ñi tumaa tsindasí nuu ra Moisés quivi can. Yoñi maa cuví jatsiyo yacan tyin intuhun ñi maa ra Cristo cuví jatsiyo can.

<sup>15</sup> Nda cuenda vityin tan ña cutuñi iñi ñi ley tsa tyaq ra Moisés tun cahví ñi itsi. Tyin ndasí tsa tsiñi tuñi iñi ñi.

<sup>16</sup> Maa tyin tatun nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi iñi ñi.

<sup>17</sup> Tyin Jutu Mañi yo, Tatyí Ii cuví ra. Tan tatun iyó Tatyí Ii Jutu Mañi yo añima yo, tsitó yo tyin ña yihí ndaha ca ley tsahnu tsi yo.

<sup>18</sup> Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehe nyivi tsa cahnu cuví Jutu Mañi yo jahá yo. Tan cuahán nduvahá ca yo jahá Tatyí Ii ra.

## 4

<sup>1</sup> Nyoo nyehe ndaahvi ra tsi ndi, tan tava tyiñu ra tsi ndi tsa cahan ndi tuhun ra tsihin nyivi yacan cuenda ña ndu uvi iñi ndi.

<sup>2</sup> Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyivi. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyivi, na jaha vaha ñi cuenda tyin tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi.

<sup>3</sup> Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyivi ndasí tsa tsiñi tuñi iñi, ñi tsa cua cunaa.

<sup>4</sup> Nu ña vaha, nu ndacá ñaha tsi nyivi iyó nu ñuhu ñayivi ihya, juven nu tyasí tsa tsiñi tuñi iñi ñi, tyin tacan tan ña tsinu iñi ñi tsi Nyoo, tan ña nyehe ñi tsa nditsin ra, tan ña cutuñi iñi ñi nácaa jacacú ra Cristo tsi yo, ra iin ñi cuví tsihin Nyoo.

<sup>5</sup> Ñavin tuhun maa ndi caahán ndi. Tyin tuhun ra Jesucristo caahán ndi tsihin nyivi tyin juven ra cuví Jutu Mañi yo. Tan nyuhu musu ñi ndo cuví ndi tyin cuñi ndi tsi ra.

<sup>6</sup> Nyoo catyí tyin ndunditsin nu naa quivi tsinu ñuhu ñayivi. Tan juven ñi ra jandunditsín tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

*Iyó yo ñayivi tsa tsihin tsa tsinu iñi yo tsi Nyoo*

<sup>7</sup> Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihín yo itsi. Juvén tsi janahá tsi nyivi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi.

<sup>8</sup> Yacan cuenda vasu ndi maa nyehé xaan ndi tundoho tandihí ñi nu cuahán ndi, ña ndu uvi iñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyin nyitá iñi ndi tyin cua quita vaha ndi.

<sup>9</sup> Vasu ndi maa nyaá ndaha nyivi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsihi ndi.

<sup>10</sup> Tandihí ñi nu cuahán ndi tan nyicún tuhun tsihi tsi ndi tsa cuenda tsa caahán ndi tuhun ra Jesús. Tyin tacan tan nyehe nyivi tyin iyó ndi ñayivi ra.

<sup>11</sup> Tsitsi tsa ndi iyó ndi nu ñuhu ñayivi ihya tandihi ñi quivi tan ndatú ndi tuhun tsihi tyin tandihi ñi quivi tan nducú nyivi cahñi ñi tsi ndi tsa cuenda ra Cristo. Tan tshin tsa taahán ndi janahá tyin iyó ñayivi ra añima ndi.

<sup>12</sup> Yacan cuenda nyuhu tandihi ñi tsaha nyicún tuhun tsihi tsi ndi tyin caahán ndi tuhun ra Cristo tshin nyivi. Maa tyin nyooho, iyó ndo ñayivi ra Cristo tsa cuenda tuhun ra tsa cahán ndi tshin ndo.

<sup>13</sup> Tsinú iñi ndi tsi Nyoo tumaa tsinu iñi ra David tsi ra. Tumaa catyi ra nu libru Salmos: “Tsinú iñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra.

<sup>14</sup> Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihi ra tsi ndi. Tan cua ndu iin ndo tshin ndi, tsahan cua cundaca ra tsi yo iin caa ñi nda gloria.

<sup>15</sup> Tandihi tuhun ihya cuví tsa cuenda tsa vaha tsi nyooho tan tsa vaha tsi cuaha ca nyivi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

<sup>16</sup> Yacan cuenda ña ndu uví maa iñi ndi, vasu ndi maa cuahán ndutsahnú cuñu ñuhu ndi, tyin ñayivi tsa tsa iyó ndi ndutsaá tsi tan iin tan iin quivi.

<sup>17</sup> Tundoho tsa nyehé ndi nu ñuhu ñayivi ihya, tsa yahá ñi maa cuví tsi. Tan tsahá tsi tsa coo cuii ndi tshin Nyoo nda gloria.

<sup>18</sup> Yacan cuenda ña tyaá iñi ndi tsa cuví nyehe yo. Tyin nyitá iñi ndi tsa ña cuví nyehe yo. Tyin tsa cuví nyehe yo juhva cuii ñi tyambu tsicoó can. Maa tyin tsa ña cuví nyehe yo, ña cua cundihi maa tsa iyó tsi.

## 5

<sup>1</sup> Tsitó yo tyin quivi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayivi ihya javaha can.

<sup>2</sup> Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñi yo cahun yo coo yo tsitsi cuñu ñuhu vaha tsa cua cuhva Nyoo tsi yo.

<sup>3</sup> Cuhun añima yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyin tacan tan ña cua cutandhi añima yo.

<sup>4</sup> Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñi yo. Maa tyin ña ndaahvi cuñi yo tsa cuenda tsa cuñi yo quita añima yo tsitsi cuñu ñuhu yo tan cutandhi tsi. Ndaahvi cuñi yo tsa cuenda tsa cuñi yo coo añima yo tsitsi tsa ña cua

cundihí maa, tyin tacan tan coo cuii yo. Tan cua cundihí tsa tañi ñi tsicoó jaha tsa ña cua cundihí maa.

<sup>5</sup> Tan Nyoo tyaá ra cuhva tyin tacan cua javaha ra tshin yo. Tan tsahá jihna ñi ra Tatyí li ra tsi yo tyin tacan tan cuita iñi yo tyin cua cuhva ra tandihi ca tsa cua cuhva ra tsi yo.

<sup>6</sup> Yacan cuenda nyitá iñi ndi tsi Nyoo tshin tsa ñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria.

<sup>7</sup> Vasu ndi maa ña cuví nyehe yo tsi ra, maa tyin iyó yo nu ñuhu ñayivi ihya tshin tsa tsinú iñi yo tsi ra.

<sup>8</sup> Nyitá iñi ndi tsi ra tan cuñi ndi quita ndi tsitsi cuñu ñuhu ihya tan cahun ndi coo ndi tshin Jutu Mañi yo.

<sup>9</sup> Yacan cuenda tsitsi tsa ndi iyó ndi tshin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tshin Jutu Mañi yo nda gloria.

<sup>10</sup> Tyin tandihi yo tan cua cahun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javaha yo quivi tsicoó yo tsitsi cuñu ñuhu yo cuenda nu ñuhu ñayivi ihya.

*Nu tsahá cuenda ra Pablo nácaa cuví coo vaha yo tshin Nyoo*

<sup>11</sup> Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tshin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñi ndi tsa coto tucu nyooho.

<sup>12</sup> Caahán ndi tyehen, maa tyin ñavin tsa cuñi ndi nduyaa ndi tyin caahán ndi tsa cuenda tsa cuñi ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihí ndo cuhva cahan ndo tshin inga ca ra tsa nduyaa naha ra. Catyi ra naha tyin vaha iyó ndi maa tyin tshin Nyoo, maa tyin tsitsi añima ra naha maa ñi tsa ña nditsa iyó.

<sup>13</sup> Tatun caahán ndi tuhun Nyoo, catyi juhva nyivi tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñi ndi, tsa cuenda nyooho vaha cuñi ndi.

<sup>14</sup> Tan tsitó ndi tyin intuhun ñi ra Cristo tshihí tsa cuenda tandihi nyivi ñuu ñayivi. Tacan tan tshihí tandihi yo. [Tsa tshihí yo cuñi tsi catyi tyin nacoó yo tsa javahá yo cuhva cuñi maa yo.] Tan tsa tyehen tsitó yo tsa tshihí ra Cristo tsa cuenda tsa cuñi xaan ra tsi yo, jañihí tsi tsi yo tsa cahan yo tuhun ra tshin nyivi.

<sup>15</sup> Ra Cristo tshihí ra tsa cuenda tandihi yo tyin tacan tan coo yo cuhva cuñi maa ra tan

ñavin cuhva cuñí maa yo tyin tsihi ra tan nandotq ra tsa cuenda tandihi yo.

<sup>16</sup> Vityin tan ityi nuu, ña caca ca iñi yo nyehe yo cuhva iyó nyivi tumaa tsicá iñi nyivi ña tsitó tsi Nyoo. Tsioco quivi tacan tsicá iñi yo nyehe yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan.

<sup>17</sup> Tyin quivi nacuhva cuenda yo tsi yo tsi ra Cristo, jandutsaa ra añima yo. Tan nanduvj yo nyivi tsaahá ra. Tan tandihi tuhun tsa tsicá iñi yo nu quitsj ca tsi, ña tsicá ca iñi yo can vityin ihya tyin tsahá ra tsa tsiñi tuñi tsa tsi yo.

<sup>18</sup> Maa Nyoo javahá tandihi yacan tyin vityin iyó vaha yo tsihin ra jahá ra tsa cuenda ra Cristo Jesús. Tsaahá cuenda ra tsi yo tyin cuñi tsi jacoto yo tsi nyivi nácaa javahá ñi tan cuví coo vaha ñi tsihin ra.

<sup>19</sup> Tyin maa ra tsa yaha nduvaha iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tavá tyiñu ra tsi yo tsa jacoto yo tuhun ihya tsi ñi.

<sup>20</sup> Yacan cuenda cuví ndi ra tavá tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo.

<sup>21</sup> Ra Cristo ña javahá ra ndi intuhun cuatyí. Maa tyin Nyoo jaquitsj ra tsi ra nu ñuhu ñayivi ihya; quitsj cúu ra tsa cuenda tandihi cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvaha yo jahá tsa vaha Nyoo.

## 6

<sup>1</sup> Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihi tsa vaha tsa tsahá ra tsi intuhun intuhun ndo.

<sup>2</sup> Tyin catyí Nyoo nu tutu ra tyehe: Quivi tahañ tsi tsa jacacu yu tsi un, tsiñi yu tsa cahan un tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

<sup>3</sup> Nducú xaan ndi cuhva tsa ña javahá ndi náa javahá ndi tyin tacan tan ña cahan nyaa nyivi tyiñu Nyoo tsa javahá ndi.

<sup>4</sup> Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihi tsa taahán ndi, náa tundoho, tan náa tsihi.

<sup>5</sup> Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihi xaan jahá tyiñu ndi nda cuenda tsiocoó nyito ndi, tan tsiocoó ndi.

<sup>6</sup> Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin

tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihi maa nuu tundoho tan ña tsihi ndi tsihi. Vaha iñi ndi, tan cuñi xaan ndi tsi nyivi tyin iyó Tatyí Ii Nyoo añima ndi.

<sup>7</sup> Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyíñu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha.

<sup>8</sup> Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi.

<sup>9</sup> Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsihi ndi tan ndi iyó ca ndi. Iyó quivi tatsí tuñi nyivi tsi ndi, maa tyin ña tsahí tucu ñi tsi ndi.

<sup>10</sup> Vasu ndi maa cuihya cuñi ndi iyó tsaha, maa tyin ña tsindihí tsa sñi cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihi maa tsa iyó tan tsi maa ndi cuví.

<sup>11</sup> Nyooho nyivi ñuu Corinto; caahán catsi ndi tsihin ndo tsihin tsa ñi iñi añima ndi tyin nditsa tsa cuñi xaan ndi tsi ndo.

<sup>12</sup> Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi.

<sup>13</sup> Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javahá maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

*Vehe Nyoo nyito cuví yo tyin iyó ra añima yo*

<sup>14</sup> Ña ndu iin ndo tsihin nyivi ña tsinú iñi tsi Nyoo tyin ña nacatsi tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa.

<sup>15</sup> Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyivi ña tsinú iñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi.

<sup>16</sup> Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jacahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahañ tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi,

tan maa ñi cua cuvi nyivi yu, catyj ra.

<sup>17</sup> Yacan cuenda catyj ra:

Quita ndo mahñu nyivi ña tsinú iñi tsi yu.

Ña cutahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

<sup>18</sup> Tan cuvi yu jutu ndo.

Tan cuvi ndo sehe yu,

catyj Jutu Mañi yo, ra iyó tandihi tunyee iñi tsi.

## 7

<sup>1</sup> Yañi, yacan cuvi tsa tsahá Nyoo tsi yo, yacan cuenda cuñi tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cuiti coo yo tyin tyaá yahvi yo tsi Nyoo.

*Nu nacatyí tuhun ra Pablo nácaa nasama cuhva iyó nyivi yihí cuenda Nyoo ñuu Corinto*

<sup>2</sup> Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javaha ndi tsi ndi intuhun ndo. Tan ndi ña jativi ndi tsi ndi intuhun ndo. Tan ña jandavi ñaha ndi tsi ndi intuhun ndo.

<sup>3</sup> Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyj yu tsihin ndo nda nu quitsj ca tsi, tyin nditsa tsa cuñi yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuvi yo tsihin ra; o tatun cúu yo, iin ñi cua cuvi tucu yo tsihin ra.

<sup>4</sup> Tsitó vaha yu tyin cua javaha ndo tsa vaha, yacan cuenda sii xaan cuñi yu nyehe yu tsi ndo. Vasu ndi maa nyehe xaan ndi tundoho, maa tyin ndu iin ca iñi añima ndi. Tan sii xaan ca cuñi ndi.

<sup>5</sup> Nda quivi tsaq ndi Macedonia ihya, tan ñaha ca maa quitatu ndi. Tyin cuaha xaan tsihi tan tundoho nyehe ndi tandihi ñi ityi cuahán ndi. Cañi tahan nyivi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi.

<sup>6</sup> Maa tyin Nyoo, tacan ñi maa jandu iin ra iñi yo tun cuilha cuñi yo. Tan jandu iin xaan ra iñi ndi quivi tsaq ra Tito nu yucú ndi ihya.

<sup>7</sup> Tan ñavin tsa cuenda tsa tsaq ñi ra, maa tyin sii cuñi tucu ndi tsa cuenda tsa jandu iin xaan ndo iñi ra. Nacatyí tuhun ra tsihin ndi tyin cuñi xaan ndo nyehe ndo tsi ndi. Tan catyj tucu ra tyin tsacú xaan ndo tsa cuenda tsa cuilha cuñi ndo. Tan ñuhú xaan iñi ndo tsi yu. Tsa tsito yu yacan, sii xaan ca cuñi yu cuví.

<sup>8</sup> Quivi can tsicá xaan iñi yu tyin tsaq yu tucuihya iñi tsi ndo tsihin carta tsa jaquitsj yu tsi ndo. Tan ndu uvj iñi yu tsa jaquitsj yu carta can tsi ndo. Maa tyin juhva ñi quivi nducuihya iñi ndo. Tan vityin ña tsicá ca iñi yu tsa cuenda tucuihya iñi tsa tsaq yu tsi ndo.

<sup>9</sup> Tan vityin sii xaan cuñi yu. Ñavin tsa cuenda tsa tsicoq ndo tucuihya iñi, tsa cuenda tsa ndu uvj iñi ndo cuatyí ndo jahq tucuihya iñi can. Tan cunyeq xaan iñi ndo nyehe ndo tucuihya iñi cuhva taahán maa iñi Nyoo. Yacan cuenda vaha javaha ndi tsa tsaq ndi tucuihya iñi tsi ndo.

<sup>10</sup> Tyin tun cunyeq iñi yo nyehe yo tucuihya iñi cuhva cuñi maa Nyoo, cua nasama cuhva iyó yo tacan tan cua cacu yo. Yacan cuenda na sii cuñi yo tun nyehe yo tucuihya iñi cuhva cuñi maa Nyoo. Tyin tucuihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can.

<sup>11</sup> Nyoocho cunyeq iñi ndo nyehe ndo tucuihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuihya iñi can. Jandaq vaha ndo cuatyí ra can. Cuxaan ndo tsi ra. Tan nayuhvj tucu ndo tsi Nyoo. Tsaq cuenda vaha ndo nácaa cuahán tyiñu can. Yaha can tan nda cuanda cuñi ndo nyehe ndo tsi yu. Tan tatsj tuñi ndo tsi ra can. Tan tsa cuenda tsa javaha ndo tumaa cuñi maa Nyoo, cuñi tsi catyj tyin nduve cuatyí ndo tsa cuenda yacan.

<sup>12</sup> Yacan cuenda quivi jaquitsj yu carta can tsi ndo ña jaquitsj yu itsi tsa cuenda tsa tsicá xaan iñi yu cuenda ra tsa javaha cuatyí can. Tan ndi ñavin tsa cuenda ra tsa tahan ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñi ndo jatinyee ndo tsi ndi.

<sup>13</sup> Yacan cuenda nduvaha cuñi añima ndi. Tan sii xaan cuñi ndi tyin tsitó ndi tyin cuñi ndo tsi ndi.

Tsa nyehe ndi tyin sii xaan cuñi ra Tito, ndusi ca iñi ndi tyin tsaq xaan ndo tunyee iñi tsi ra. Tan vaha xaan naquihin cuenda ndo tsi ra.

<sup>14</sup> Catyj yu tsihin ra Tito tsa ndi cumañi ca quitsj ra nu yucú ndo tyin cua tyaa soho vaha ndo tuhun tsa jaquitsj yu tsihin ra. Tan vityin sii cuñi yu tyin cundaq tsa cahan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsq tsa cahan yu tsihin ra.

<sup>15</sup> Cuñi xaan ra tsi ndo tsa nducuhún iñi ra tyin javaha ndo tandihi cuñi maa tsa cahan ra tsihin ndo. Tan tsa tsaq ra nu yucú ndo, ndaahvi jahq ndo tsi ndo nuu ra. Tan vaha xaan cahan ndo tsihin ra. Tan vaha xaan tyaa yahvi ndo tsi ra.

<sup>16</sup> Tan sii xaan cuñi yu tyin tsitó yu tyin tacan ñi javaha ndo tsa vaha.

## 8

*Na jatinyee yo tsi nyivi yihí cuenda Nyoo tsihin tsa ñi iñi añima yo*

<sup>1</sup> Vityin yañi, cuñi ndi nacatyí tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya.

<sup>2</sup> Vasu ndi maa cuaha xaan tundoho nyehé ñi, maa tyin sii cuñi ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi.

<sup>3</sup> Tan cuví yu tsandaa tyin nyehé yu tyin tsahá ñi cuaha tsa iyó tsi ñi tsihin tsa nii iñi ñi tan nda cuanda yaha ca tsahá ñi.

<sup>4</sup> Caahán ndaahvi xaan ñi tsihin ndi na cuhva ndi ndatu tsa jatyinyee ndihi ñi tsi nyivi yihí cuenda Nyoo tsa iyó ñuu Jerusalén.

<sup>5</sup> Cuaha ca javahá ñi tan ñavin ca tsa tsicá iñi maa ndi. Tyin tsa jihna ñi, nacuhvā cuenda ñi tsi ñi tsi Nyoo tsihin tsa nii iñi añima ñi. Tacan tan nacuhvā cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñi maa Nyoo.

<sup>6</sup> Tsa nyehé yu tyin tacan javahá nyivi Macedonia, tacan tan catyí yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahā tavá ndo jahā ra.

<sup>7</sup> Tyin nyooho vaha xaan javahá ndo tandihí tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cuntuñi iñi ndo. Tan tsihin tsa nii iñi añima ndo javahá ndo tyiñu ra. Tan cuñi xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

<sup>8</sup> Ña jañiñi yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñi yu tsa nyehé ndo tsa vaha javahá nyivi yihí cuenda Nyoo Macedonia. Tyin tacan tan javaha ndihi ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo.

<sup>9</sup> Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsi ra nu ñuhu ñayivi ihya tan jandundaahvi ra tsi ra tsa cuenda tsa cuñi ra tsi yo tyin tacan tan cuví janducua ra tsi yo.

<sup>10</sup> Yuhu cuñi yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyooho cuví nyivi tsa quitsahā jandu iin jihna xuhun cuyava. Ñavin nyivi tavā tyiñu tsi ndo javaha ndo tacan. Javahá ndo tacan tyin tacan tsicá iñi maa ndo.

<sup>11</sup> Yacan vityin cuñi yu tsa jañihi ca ndo javaha ndo tumaa javahá maa ndo nda nu quitsahā nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo.

<sup>12</sup> Tyin tatun iin nyivi tan cuñi ñi cuhva ñi tandihí cuhva iyó tsi ñi tan cuhva ñi can

tsihin tsa nii iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñi ra tsi yo cuhva yo tun nduve náa iyó tsi yo.

<sup>13</sup> Caahán yu tyehen tsihin ndo, maa tyin ñavin tsa cuenda tsa cuñi yu tsa jatyinyee ndo tsi nyivi tan ndoo ndaahvi ndo tan ñi ican coo tsa coo tsi ñi.

<sup>14</sup> Tyin vityin tsa iyó luxu tsi ndo, taahán tsi jatyinyee ndo tsi nyivi ndaahvi tsihin can. Tyin tacan tan inducu ñi coo tandihí yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyee tahan yo tsi yo tsihin tsa iyó tsi yo tyin tacan tan ña nyehé ndi intuhun yo tundoho.

<sup>15</sup> Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

*Nu tyaá ra Tito naha ra cuhva cuhun ra naha ñuu Corinto*

<sup>16</sup> Tyahvi nyoo tsi Nyoo tyin tsahā ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo.

<sup>17</sup> Tsa cahan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

<sup>18</sup> Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihí nyivi yihí cuenda Nyoo.

<sup>19</sup> Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cuhun ndihi ra tsihin ndi cundaca ndi xuhun tsi nyivi ndaahvi iyó ñuu Jerusalén. Cuñi xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihí nyivi yihí cuenda Nyoo.

<sup>20</sup> Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi.

<sup>21</sup> Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

<sup>22</sup> Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin nii xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, sii cuñi ra tyin tsitó ra tyin cua javaha ndo tsa vaha nuu Nyoo.

<sup>23</sup> Tatun yoo tsicá tuhun tuhun ra Tito, catyí ndo tsihin ñi tyin ra vaha iñi tsi yo cuví

ra, tan jahá tyiñu ra tsihin yu, tan jatyinyeé ra tsi ndo tsihin tuhun Nyoo. Tatan tsicá tuhun tucu ñi tuhun inga uvi ca ra yañi yo ihya naha ra, catyi ndo tyehen tsihin ñi:

—Maa nyivi yihí cuenda Nyoo jaquitsj tsi ra naha. Tan vaha xaan jahá tyiñu ra naha tyiñu ra Cristo —catyi ndo.

<sup>24</sup> Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan coto tandihí nyivi yihí cuenda Nyoo tyin nditsa tsa caahán yu tyin vaha javahá ndo.

## 9

*Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo*

<sup>1</sup> Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahan yu tuhun can tsihin ndo.

<sup>2</sup> Tyin tsitó yu tyin cuñi xaan ndo javaha ndo tsa vaha. Yacan cuenda sii cuñi yu nacatyí tuhun yu tuhun ndo tsihin nyivi iyó Macedonia, tyin nyooho tsa iyó ñuu Corinto tsa canyíi Acaya, nda cuyava tan quitsaha tsá ndo jatyinyeé ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñi ndihí tucu maa ñi jatyinyeé ñi tsi nyivi ndaahvi.

<sup>3</sup> Vasu ndi maa tsitó yu tyin vaha tsicá iñi ndo, maa tyin jaquitsj yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñi ndo javaha ndo tsa vaha. Tyin tacan tan ña cua catyi nyivi Macedonia tyin ña nditsa yu tsa caahán yu.

<sup>4</sup> Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yahá catyi yu tyin cuñi xaan ndo jatyinyee ndo tsi nyivi ndaahvi.

<sup>5</sup> Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihj ndo cuhva tyin cuhva ndo. Tyin tacan tan quivi quitsi yu tandihí tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñi tsi ndo.

<sup>6</sup> Ndúchuhun iñi ndo tuhun tsa catyi tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra.

<sup>7</sup> Tan intuhun intuhun yo cuñi tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin

jañiñi nyivi tsi yo. Tyin Nyoo cuñi ra tsi nyivi tsahá tsihin tsa sii cuñi ñi.

<sup>8</sup> Nyoo cuví cuhva ra tandihí nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyivi.

<sup>9</sup> Tumaa catyi tuhun Nyoo tyehen: Iin ra vaha tsahá ra, tsihin tsa nii iñi ra, tsa iyó tsi ra tsi nyivi ndaahvi.

Tan tumañi iñi tsa javahá ra, ña tsinaá tsi nuu Nyoo, catyi tsi.

<sup>10</sup> Nyoo, ra tsahá tsiti tatsi yo, tsahá tucu ra tandihí tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyivi.

<sup>11</sup> Tan coo ca tandihí nuu tsa cuca tsi ndo, tyin tacan tan cuví jatyinyee ca ndo tsi nyivi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi.

<sup>12</sup> Tyin tsa jatyinyeé yo tsi nyivi yihí cuenda Nyoo tsihin tsa tsahá yo tsa tsini ñuhu tsi ñi, tsahá tucu yo tsa nacuhva ñi tyahvi nyoo tsi Nyoo.

<sup>13</sup> Tan cua jacahnu ñi tsi Nyoo. Tyin tsihin tsa jatyinyeé ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyeé xaan ndo tsi maa ñi tan tsi tandihí ca nyivi.

<sup>14</sup> Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo.

<sup>15</sup> Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

## 10

*Ra Pablo iyó ndatu tsi ra tsa jaha cuenda ra tsi nyivi tsa jacoto ra tuhun Nyoo*

<sup>1</sup> Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyi ndo tyin tun tsahá cuenda yu tsi ndo tsihin carta, ñihí xaan caahán yu tsihin ndo, maa tyin tun nyíi yu tsihin ndo, ndaahvi xaan jahá yu tsi yu, catyi ndo.

<sup>2</sup> Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quivi quitsi yu nu yucú ndo tyin tsitó yu tyin cuñi tsi tsa cuxaan ñihí yu tsi juhva ndo. Tyin yihí ndo catyi ndo tyin javahá yu tumaa javahá ra ña yihí cuenda ra Jesucristo.

<sup>3</sup> Nditsa tyin ra ñuu ñayivi cuví ndi. Maa tyin ña cañi tahan ndi tumaa cañi tahan nyivi iyó nu ñuhu ñayivi ihya.

<sup>4</sup> Tyin tsa xaan tsa tsatyíñu ndi tsa cañi tahan ndi, ñavin tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi



siqui tandihí ca tunyee iñi tsihin tsi tan nda cuanda tunyee iñi tsa iyó tsi tatyí ña vaha.

<sup>5</sup> Tan tacan cuví jaha canaa ndi tsi tandihí tsa caahán ndasi nyívi siqui tuhun Nyoo, tan tandihí tsa ña vaha tsa tyasí nu tyaa yahvi nyívi tuhun Nyoo. Tan tsahá ndi tsa cundaca ñaha ra Cristo tandihí cuhva tsicá iñi ndi tyin tacan tan tyaa yahvi ca ndi tsi ra.

<sup>6</sup> Quívi cutuhva tandihí nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaa ndi cuhva tsa tatsi tuñi ndi tsi ndo.

<sup>7</sup> Nyooho jahá ndo cuenda cuhva iyó nyívi. Tan ña jahá ndo cuenda nácaa iyó aña ñi. Tatun tsitó vaha ndo tyin cuenda ra Cristo yihí ndo, taahán tsi coto ndihí tucu ndo tyin cuenda ra yihí tucu nyuhu.

<sup>8</sup> Ña cahán nuu yu caahán yu tsa tsahá Nyoo ndatu yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jatívi yu tsi ndo.

<sup>9</sup> Ña cuñi yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo.

<sup>10</sup> Tyin yihí ndo catyí ndo tyin nu carta tsa jaquitsí yu tsi ndo ñihí xaan caahán yu tsihin ndo. Maa tyin tatun maa yu tsaá nu yucú ndo, nduve yahví nyaá yu, catyí ndo. Tan catyí tucu ndo tyin nduve yahví nyaá tuhun caahán yu.

<sup>11</sup> Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

<sup>12</sup> Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahví nyaá caahán ra naha can tyin javahá ra naha cuhva javahá inga nyívi tan ñavin cuhva cuñi Nyoo. Tan cuñi ra naha tyin vaha tsa jandu inducú ra naha tsi ra naha tsihin inga nyívi.

<sup>13</sup> Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo.

<sup>14</sup> Tun tsatýin ña jihna ca maa ndi cahán tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindacá tuhun ra Cristo nu yucú ndo.

<sup>15</sup> Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuví jacuaha cua ca ndi tuhun ra

Cristo tsi ndo, maa tyin tandihí ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi.

<sup>16</sup> Tan tsicá iñi ndi cuhun ndi cucahan ndi tuhun ra Cristo nu ña tsitó nyívi tuhun ra. Tyin tacan tan ña cua catyí nyívi tyin nduyaá ndi tsihin tyiñu javahá inga ra naha.

<sup>17</sup> Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo.

<sup>18</sup> Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

## 11

*Nu tsahá cuenda ra Pablo tsi nyívi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi*

<sup>1</sup> Vaha xaan tun ña cundihí iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihí iñi ndo tsihin yu vasu ndi maa tuhun maa yu cuví tsi.

<sup>2</sup> Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahán tuhun ra Cristo tsihin ndo nda jihna. Tan cuñi yu tsa cuñi ndo tsi intuhun ñi maa ra tumaa cuñi iin ñaha yoco tsi ra tsa cua cuví yí ña. Tyin iin ñaha yoco cuñi ña tsi intuhun ñi maa ra tsa cua cuví yí ña.

<sup>3</sup> Maa tyin tsicá xaan iñi yu tsa cuenda ndo, coto tahan ndo tumaa tahán ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñi yu tsa jandaví ñaha nyívi tsi ndo tan nasama ndo cuhva tsicá iñi ndo tuhun ra Cristo, tan jandihí ndo tsa jacahnú ndo tsi intuhun ñi maa ra.

<sup>4</sup> Tyin nyooho yatýi xaan nasamá ndo cuhva tsinú iñi ndo tuhun ra Jesús tun siin cuhva caahán nyívi tuhun ra. Tyin ñavin tuhun ra Jesús tsa jacotó ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí Ii Nyoo tsa naquihín ndo nda jihna. Yatýi xaan natsinú iñi ndo tuhun caahán nyívi tan ñavin tuhun, tsa jacacú ra Cristo tsi yo, tsa cahán ndi tsihin ndo.

<sup>5</sup> Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnu ca cuví ra can naha ra tan ñavin ca maa yu. Tan nyooho nyicán ndo tsi ra naha.

<sup>6</sup> Vasu ndi maa ña ñihí vaha yu cuhva caahán yu, maa tyin cutuñi vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihí cuhva javahá ndi.

<sup>7</sup> ¿O cuñi maa ndo tyin ña vaha javahá yu tsa ña quihín yu yahví quívi cahán yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo.

<sup>8</sup> Nyiví tsa tsicá tuhun Nyoo vehe ñuhu inga ñuu jatinyiné tsi yu tsihin xuhun. Tan xuhun tsa tsahá ñi tsi yu tsatyíñ yu can quiví quítsi yu quítsi cahán yu tuhun ra Cristo tsihin ndo.

<sup>9</sup> Vasu ndi maa yihí tsaha cumañi tsa cumañi tsi yu tsa tsinyi yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juven ra naha tsahá tandihí tsa cumañi tsi yu. Tacan jahá cuenda yu tsi yu tyin ña cuñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu.

<sup>10</sup> Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyiví iyó nanií Acaya.

<sup>11</sup> ¿Nacuenda caahán yu tyeheen cuñi maa ndo? ¿A tsa cuenda tsa ña cuñi yu tsi ndo? Ñavin. Tyin nda maa Nyoo tan tsitó ra tyin cuñi xaan yu tsi ndo.

<sup>12</sup> Ña cua jandihí yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha.

<sup>13</sup> Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha.

<sup>14</sup> Tan tsa javahá ra ican naha ra ñavin tsa iyo cuñi yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu.

<sup>15</sup> Yacan cuenda ña iyo cuñi yo tun ra nyicún tsi nu tan jahá ra naha tyin javahá ra naha tsa vaha. Coó quiví cua tatsi tuñi Nyoo tsi ra naha tsa cuenda tsa ña vaha tsa javahá ra naha.

*Tundoho tsa nyehé ra Pablo nu tsicá ra caahán ra tuhun Nyoo*

<sup>16</sup> Inga tsaha caahán yu tsihin ndo: Ndi intuhun ndo tan ña çaca iñi ndo tyin sana iñi yu tsa caahán yu tyeheh. Maa tyin tun tacan tsicá iñi ndo, cùhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihí tucu yuhu luxu.

<sup>17</sup> Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyeheh.

<sup>18</sup> Cuaha xaan ra naha catyí ra naha tyin cahnu cuví ra naha tan nduyaa ra naha tsihin tsa iyó nu ñuhu ñayiví ihya. Yacan cuenda cua jacahnu ndihí tucu yuhu tsi yu.

<sup>19</sup> Nyooho catyí ndo tyin tsitó xaan ndo. Tun nditsa ndo, ¿nacuenta tyin yatyi xaan tyaá soho ndo tsa caahán ra sana iñi can naha ra?

<sup>20</sup> Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñí ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasí cuñí ra naha nyehé ra naha tsi ndo. Tan nda cuanda cañi ndaha ra naha nuu ndo.

<sup>21</sup> ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu.

<sup>22</sup> Catyí ra can naha ra tyin nyiví Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyiví Israel; juven ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu.

<sup>23</sup> Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyeheh caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyiví tsi yu tsihin yoho tan ñavin ca ra can naha ra. Cuaha ca tsaha tsinyi yu vehe caa. Tan cuaha tsaha cuñi cúu yu, maa tyin ña tsihi yu.

<sup>24</sup> Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu.

<sup>25</sup> Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quiví tan iin tsa cuaa.

<sup>26</sup> Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahán yu. Quitá ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juven ñi tacan javahá nyiví inga ñuu tsihin yu. Cuaha tsa tahán yu tsitsi ñuu, nu tsiquí, nu ndutya ñuhu. Cuaha tsa tahán yu jahá ra catyí tyin yañi yo cuví tsi ra naha tan ña nditsa ra naha.

<sup>27</sup> Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihj yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

<sup>28</sup> Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihí nyiví yihí cuenda Nyoo, nyooho tan nyiví inga ñuu tucu.

<sup>29</sup> Tyin tun iin ndo tan vita cuñí ndo, tacan vita cuñí tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñí yu.

<sup>30</sup> Tatun cuñí tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu.

<sup>31</sup> Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu.

<sup>32</sup> Quivi tsinyij yu ñuu Damasco ra cumí tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tiin ra naha tsi yu tan cundaca ra naha tsi yu vehe caa.

<sup>33</sup> Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumí tyiñu ñuu can.

## 12

*Tsa nyehe ra Pablo nda nu tsinu uñi gloria jahá Nyoo*

<sup>1</sup> Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehe yu jahá ra.

<sup>2</sup> Nacotó yu iin ra yihí cuenda ra Cristo tsa tsahan andívi. Tsa iyó utsi cumí cuiya tsa quihñ Nyoo tsi ra tsahan ra nda nu tsinu uñi andívi. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó.

<sup>3-4</sup> Tsitó yu tyin tsindaca Nyoo tsi ra nda paraiso nu iyó nyivi tsihí tsa tsinu iñi tsi Nyoo. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can.

<sup>5</sup> Cuví nduyaa yu tsihin tsa janahá Nyoo tsi yu quivi can. Maa tyin ña nduyaá yu tsihin tsa javahá yu tyin nduyaá yu maa ñi maa tsihin tsa nduve tunyee iñi maa yu iyó tsi yu.

<sup>6</sup> Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñí yu cahan yu can coto cahnu xaan jaha nyivi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

<sup>7</sup> Nyoo ña cuñí ra tsa nduyaa yu tsihin tsa janahá ra tsi yu. Yacan cuenda tsahá ra tsa nyehé xaan yu tundoho jahá nu ña vaha.

Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu.

<sup>8</sup> Tan tsicān yu uñi tsaha tsi Jutu Mañi yo na quihin nyaa ra tundoho can siqui yu.

<sup>9</sup> Maa tyin catyí Jutu Mañi yo tyehen tsihin yu: “Yuhu cuñí xaan yu tsi un, tan yacan ñi cuví tsa tsiñí ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sií xaan cuñí yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu.

<sup>10</sup> Yacan cuenda sií xaan cuñí yu tsa nduve tunyee iñi maa yu iyó tsi yu. Vasu ndi maa caahán nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sií xaan cuñí yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

*Tsicá iñi ra Pablo tuhun nyivi yihí cuenda Nyoo ñuu Corinto*

<sup>11</sup> Tsa caahán yu tuhun maa yu nanduví yu tumaa ra sana iñi. Maa tyin maa ndo cuñí tsa cahan yu tacan tyin ña jahá ca ndo tsa ñayivi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñí maa ra naha tyin vaha xaan ca ra naha tan ñavin ca inga ra tsicá tyiñu Nyoo.

<sup>12</sup> Yuhu cunyeē xaan iñi yu nyehe yu tandihí tundoho quivi tsinyij yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tava tyiñu ra.

<sup>13</sup> ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihí ndo. Intuhun ñi tsa ña javahá yu tsihin ndo tsa tsinyij yu tsihin ndo cuví tsa ña tsicān yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javahá yu.

<sup>14</sup> Vityin tsa iyó vaha tandihí tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiñí ñuhu tsi ra. Tyin maa ra taahán tsi cuhva tsa tsiñí ñuhu tsi sehe ra. Tan tacan yuhu.

<sup>15</sup> Sií xaan cuñí yu cua janaa yu tsa iyó tsi yu tsa cuenda tsa vaha tsi ndo. Tan nda cuenda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñí yu tsi ndo, nyooho ña cuñí vaha ndo tsi yu.

<sup>16</sup> Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda.

<sup>17</sup> ¿O cuñi maa ndo tyin cahan yu cuendu tsihin ra jaquitsj yu nu yucú ndo tan jandaví ñaha ra naha tsi ndo jahá yu?

<sup>18</sup> ¿A jandaví ñaha ra Tito tan inga ra naha tsi ndo quivi quitsj ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.

<sup>19</sup> Vasiqui tsicá iñi maa ndo tyin tandihí tsa caahán ndi, tan caahán ndi can tsa cuñi ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñi xaan ndi tsi ndo.

<sup>20</sup> Tsicá iñi yu coto ña cua tahan iñi yu cuhva yucú ndo quivi tsaá yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaá tahan ndo tsi ndo, tan nduyaa ndo. Tan yuuhví tucu yu coto tsaá yu nu yucú ndo tan ña cuiñi ña ndaa yucú ndo.

<sup>21</sup> Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihi ndo ña jandihí ndo tsa javahá ndo tsa ña vaha tsa quitsahá javahá ndo nu quitsj ca tsi tyin rayí ndi tsicá nuu ra tsihin ñaha tan ñaha ndi tsicá nuu ña tsihin rayí tan náa ndihí ca maa tsa ña vaha.

### 13

*Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha caahán ñi tsihin Nyoo*

<sup>1</sup> Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuñi tsi uvi o uñi taahan ra cua cuví tsandaa.

<sup>2</sup> Tyin quivi quitsj yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahví iñi yu nyehe yu tsi ndo.

<sup>3</sup> Tacan tan cua coto ndo tsa cuñi xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo.

<sup>4</sup> Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatyinyee ndi tsi nyooho.

<sup>5</sup> Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añima ndo tun nditsa tsa tsinú iñi ndo tsi ra?

<sup>6</sup> Maa tyin cuñi yu tsa coto ndo tyin nyuhu ña vatya ndi.

<sup>7</sup> Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñi ndi catyí nyivi tyin vaha ndi. Caahán ndi tyehen tyin cuñi ndi tsa javaha ndo maa ñi maa tsa vaha. Nduve cuenda ndi tun catyí nyivi tyin vaha ndi o ña vaha ndi.

<sup>8</sup> Tyin nyaá tsi siqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa.

<sup>9</sup> Yacan cuenda si cuñi ndi tsa nduve tunyee iñi iyó tsi ndi, tan nyee cuñi nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuenda ña cumañi ca tsa cumañi tsi ndo.

<sup>10</sup> Jaquitsí yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin tacan tan ña cua cuñi tsi cuxaan yu tsi ndo quivi tsaá yu nu yucú ndo. Tyin nditsa tsa tsahá Nyoo ndatu tsi yu tsa quihí ndaha yu tsi ndo. Maa tyin ña tsahá ra ndatu can tsi yu tsa janducuii ya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

<sup>11</sup> Yañi, nu ndihí caahán yu ihya, catyí yu tsihin ndo, nducu ndo cuhva ña cumañi tsa cumañi tsi ndo nuu Nyoo. Si cuñi ndo. Jandu iin ndo iñi ndo. Cqo mañi tahan ndo. Tan Nyoo, ra cuñi xaan tsi ndo tan tsahá tsa taxin coo añima yo, na cunyaa ra tsihin ndo.

<sup>12</sup> Cuhva tahan ndo nacumi tsi ndo tsihin tsa si cuñi ndo nyehé ndo tsi ndo.

<sup>13</sup> Tan jaquitsí tandihí nyivi yihi cuenda Nyoo nuu ihya nacumi tsi ndo.

<sup>14</sup> Naquihin ndo tsa vaha coo añima ndo jaha Jutu Mañi yo Jesucristo. Tan na coto ndo tyin Nyoo cuñi xaan ra tsi ndo. Tan nacoto tucu ndo tyin iyó Tatyí Ii ra tsihin ndo.

Tan na cuvi tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Nuu Cayucú Galacia

*Nu tyaá ra Pablo iin carta tsa cuenda  
nyivi yihí cuenda Nyoo nuu cayucú Galacia*

<sup>1</sup> Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsj tsi yu tyin maa ra Jesucristo tan maa Nyoo Jutu yo jaquitsj tsi yu tan tsaḥa ra tyiñu ihya tsi yu. Tan juvin ra cuví ra tsa janandotó tsi ra Cristo tsa yaha tsihi ra.

<sup>2</sup> Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó nuu cayucú Galacia.

<sup>3</sup> Naquihin ndo tsa vaha tan tsa taxin tsa tsaḥa Nyoo Jutu yo tan Jutu Mañi yo Jesucristo tsi yo coo aña ndo.

<sup>4</sup> Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa caḥan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya.

<sup>5</sup> Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

*Nduve ca inga cuhva cuví cacu yo*

<sup>6</sup> Iyo xaan cuñi yu tyin nyooho numi xaan nacoḡ ndo tsi Nyoo. Juvín ra nacanaḡ tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin siin tuhun tsinú iñi ndo. Cuñi maa ndo tyin cua jacacu yacan tsi ndo.

<sup>7</sup> Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñi ra naha jativi ra naha tuhun Nyoo tsa jacacú ra Cristo tsi yo.

<sup>8</sup> Tun iyó yóo caahán tuhun ra Cristo tsihin ndo tan ña nacatí tahan can tsihin tuhun tsa caḥan ndi tsihin ndo, na cuhun ñi anyaya. Yoñi jaha, vasu maa ndi cuví, o iin ángel quee andivi cuví.

<sup>9</sup> Tsa yaha caḥan yu tuhun ihya tsihin ndo, maa tyin cuñi yu cahan nyico yu itsi tsihin ndo inga tsaḥa. Tatun yóo nyivi caahán tuhun Nyoo tsihin ndo tan siin cuhva caahán ñi, na jacuhun Nyoo tsi ñi anyaya.

<sup>10</sup> Ña caahán yu tacan tsihin ndo tsa cuenda tsa cuñi yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñi yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

*Nacaa quitsahq tsicá ra Pablo tyiñu  
Nyoo*

<sup>11</sup> Cuñi yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi.

<sup>12</sup> Ñavin nyivi tsaḥa tuhun ihya tsi yu. Tyin juvin ñi maa ra Cristo jacotó itsi tsi yu.

<sup>13</sup> Nyooho tsiñi ndo nácaa javahaḡ yu quivi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quivi tsa tsinyi yu cuenda ñi Israel nuu yu. Tan nducú yu cuhva jandu uvi yu iñi ñi tsinú iñi tsi ra Cristo.

<sup>14</sup> Tan tsicoḡ yu cuhva iyó ñi Israel, tan yuhu cuví ra caahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu cuhva javahaḡ tsi tsaahnu ndi.

<sup>15</sup> Maa tyin tsa ndi cumañi ca cacu yu tan Nyoo tsa nacatí maa ra tsi yu tyin cuñi xaan ra tsi yu. Tan nda tsa tsaḡ maa quivi tsa tyaḡ ra cuhva, tan nacanaḡ ra tsi yu.

<sup>16</sup> Tacan tan janahaḡ ra tsi Sehe ra tsi yu tan nacotó yu tsi ra, tyin tacan tan cuví cahan yu tuhun ra nácaa jacacú ra tsi yo tsihin nyivi tsa ñavin nyivi Israel cuví. Tan quivi can ña nducú yu nyivi jacuaha tsi yu nácaa taahán tsi javaha yu.

<sup>17</sup> Tan ndi ña tsaḥan yu nuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsaḥan yu nda Arabia. Tacan tan cuanuhu nyico yu inga tsaḥa nda nuu Damasco.

<sup>18</sup> Tsa yaha uñi cuiya tan tsaḥan yu nda Jerusalén, tan nacotó yu tsi ra Pedro. Tan ndoḡ yu tsihin ra tsaḥan quivi.

<sup>19</sup> Maa tyin ña nyeḡe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyeḡe yu.

<sup>20</sup> Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

<sup>21</sup> Tsa yahaḡ tsa tsaḥan yu nuu Jerusalén tan tsaḥan yu nda Siria tan nda Cilicia.

<sup>22</sup> Tan ra yañi yo tsa yucú vehe ñuhu ra Cristo tsa iyó nuu tsa cayucú Judea, ña nacotó ra naha tsi yu.

<sup>23</sup> Maa tyin ñihí tuhun ra naha tsa caahán nyivi tuhun yu, tyin catyi ñi: “Ra tsa tsinyaa ndaha tsi yo quivi can, vityin caahán ndihi ra tsihin nyivi na tsinu iñi ñi tsi ra Cristo. Tan quivi can cuñi ra jativi ra tuhun ra Cristo”, catyi ñi, ñihí tuhun ra naha.

<sup>24</sup> Tan jacahnu ra naha tsi Nyoo tsa cuenda tsa javahaḡ Nyoo tsihin yu.

## 2

*Ra cuví ityi nuu tsihin nyivi vehe ñuhu  
ñuu Jerusalén, ndoḡ ra naha vaha cuhva jahá  
tyiñu ra Pablo*

<sup>1</sup> Tsa yaha utsi cumi cuiya, tan tsaḥan yu űuu Jerusalén inga tsaḥa tsihin ra Bernabé. Tan tsaḥan ndihí tucu ra Tito tsihin ndi.

<sup>2</sup> Tsaḥan yu ndacan tyin maa Nyoo janaha tsi yu tyin taahan tsi tsa cuhun yu. Tan ndacan quita sɪn yu tsihin ra cuví ityi nuu tsihin nyívi vehe űuhu naha ra. Tan tsaḥa cuenda yu tsi ra naha nácaa tuhvá yu caahán tuhun ra Cristo tsihin nyívi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu.

<sup>3</sup> Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra.

<sup>4</sup> Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra qihvɪ xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo.

<sup>5</sup> Maa tyin ndi luxu tan ña tsaḥa ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

<sup>6</sup> Maa tyin ra cuví ityi nuu tsihin nyívi vehe űuhu, nduve tuhun tsa tsaḥa ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo.

<sup>7</sup> Ra cuví ityi nuu vehe űuhu naha ra, nduve inga tuhun tsaḥa cuenda ra naha tsi yu tyin nacoto ra naha tyin maa Nyoo jaquitsɪ tsi yu tyin cahan yu tuhun ra Cristo tsihin nyívi tsa ñavin nyívi Israel cuví. Tumaa tsa jaquitsɪ ra tsi ra Pedro tyin cahan ra tsihin nyívi Israel.

<sup>8</sup> Tyin juven ñi maa Nyoo tava tyiñu tsi ra Pedro tyin cahan ra tuhun ra Cristo tsihin nyívi Israel. Tan tava tyiñu tucu ra tsi yuhu tyin cahan yu tuhun ra tsihin nyívi tsa ñavin nyívi Israel cuví.

<sup>9</sup> Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsaḥa ra tunyee iñi tsi yu tsa cahan yu tuhun ra Cristo tsihin nyívi. Tan tsaḥa ra naha ndaha ra naha tɪn ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyívi tsa ñavin nyívi Israel cuví, tan maa ra naha cahan tucu ra naha tsihin nyívi Israel.

<sup>10</sup> Tan cahan ra naha iin tuhun tsihin ndi, na nducuhun iñi ndi tsi nyívi ndaahvi tan na jatyinyee ndi tsi ñi. Tan yacan cuví tsa nducú xaan yu cuhva javahá yu tandihí ñi quívi.

*Nu nduxaḥn ra Pablo tsi ra Pedro tyin ña vaha tsa javahá ra*

<sup>11</sup> Maa tyin quívi tsaḥan ra Pedro űuu Antioquía, nuu nuu ra tan cuxaan yu tsi ra tyin ña vaha tsa javahá ra.

<sup>12</sup> Tyin tsa jihna ñi vaha javahá ra tyin tsatsɪ ra tsihin ñi tsa ñavin nyívi Israel cuví. Maa tyin tsa tsaḥ juhva ra Israel naha ra tsa jaquitsɪ ra Jacobo, tacan tan quitsaha jatsiyó ra tsi ra tan ña cuñi ca ra catsi ra tsihin ñi ican. Javahá ra tacan tyin yuuhvi ra coto cuxaan ra tsa tsaḥ can naha ra tsi ra tyin ndi nyitá iñi ra can naha ra tuñi Nyoo.

<sup>13</sup> Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihí ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuanda ra Bernabé tan ndu iin ra tsihin ra naha.

<sup>14</sup> Tan nyehe yu tyin ña vaha javahá ra naha. Ñavin tumaa cuhva catyí tuhun ra Cristo. Yacan cuenda cahan yu tsihin ra Pedro nuu tandihí ra yucú ican: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Nacaa tsa cuñi un jañiñi un tsi nyívi tsa ñavin nyívi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyí yu tsihin ra.

<sup>15</sup> Maa yo nda ndi cacu yo tan cuví yo ra űuu Israel ña javahá xaan yo cuatyí tumaa javahá ñi tsa ñavin nyívi Israel cuví.

<sup>16</sup> Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo cuhva tyaa yahvi yo tsa catyí ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyí ley tsahnu can.

<sup>17</sup> Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñi tsi catyí tyin nacoto yo tyin iyó tucu cuatyí yo tumaa iyó cuatyí ñi tsa ñavin nyívi Israel cuví. Tatun tacan, ¿a cuñi tsi catyí tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan.

<sup>18</sup> Maa tyin tun cua cuita nyico iñi yo ley tsa tsa yaha nacoḡ yo, yacan nditsa ra coo cuatyí yo.

<sup>19</sup> Tyin ley can janahá tsi tsi yu tyin taahán tsi cúu yu tsa catyí cuatyí yu, tan yacan cuenda ña nducu ca yu tacan cacu yu tsihin ley can, tyin tacan tan cuví coo yu tsa cuenda Nyoo.

<sup>20</sup> Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu

iyó, tyin ra Cristo iyó aña yu vityin. Tan cuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñi ra tsi yu, tan tsihi ra tsacatyí cuatyí yu.

<sup>21</sup> Ña cuñi yuhu tyaa tsiyo yu tunyee iñi tsa tsaha Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

### 3

*Naquihín yo Tatyí Ii Nyoo tsa cuenda tsa tsinú iñi yo tsi ra Cristo*

<sup>1</sup> ¡Náa tsa soho iyó nyooho, nyivi Galacia! ¿Yoo tsa jativí tsi ndo tan ña tyaa yahvi ca ndo tsa nditsa? Catsi xaan tsaha cuenda ndi tuhun ra Jesucristo tsi ndo. Tan cutuñi vaha iñi ndo nacuenda tsihi ra nu cruu.

<sup>2</sup> Intuhun ñi tsa cuñi yu nducu tuhun yu tsi ndo. ¿A naquihín ndo Tatyí Ii Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú iñi ndo tsi ra?

<sup>3</sup> ¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee iñi Tatyí Ii ra. Tan vityin, ¿nacaa cuñi ndo coo ndo tsihin tunyee iñi maa ndo?

<sup>4</sup> ¿A tsa cuatu ñi nyehé ndo nacaa jatyinyee Tatyí Ii Nyoo tsi ndo nu nyehé ndo tundoho? Ñavin tsa cuatu ñi cuví yacan, cuñi yuhu.

<sup>5</sup> ¿Nacaa tsahá Nyoo Tatyí Ii ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú iñi ndo tsa caahán ra.

<sup>6</sup> Ra Abraham, tsinú iñi ra tsa cahan Nyoo tsihin ra, yacan cuenda Nyoo naquihín tsi ra tumaa tsatyin vaha ra.

<sup>7</sup> Yacan cuenda taahán tsi coto ndo tyin nyivi tsa nditsa cuví tata ra Abraham, juvin ñi cuví ñi tsa tsinú iñi tsi Nyoo.

<sup>8</sup> Tan tsanaha ndoq tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra.

<sup>9</sup> Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinú iñi tucu maa ra.

<sup>10</sup> Nyivi tsa nyitá iñi ley tsa tyaa ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaa yahvi tandihí ley tsa nyaá nu libro ley Nyoo, cua tatsi tuñi Nyoo tsi ñi.”

<sup>11</sup> Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu

Nyoo tsa cuenda tsa tsinú iñi ra, juvin ra cua coo ñayivi tsa ña cua naa maa”, catyí tuhun Nyoo.

<sup>12</sup> Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

<sup>13</sup> Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tavá nuña ra tsi yo. Tan maa ra naquihín tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsi tuñi Nyoo tsi ra.”

<sup>14</sup> Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí Ii tsa catyí Nyoo tyin cuhva ra tsi yo.

*Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo*

<sup>15</sup> Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaac can. Tan yoñi ca cuví natyiso juhva ca siqui can.

<sup>16</sup> Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihí ra cuví tata ra, tyin intuhun ñi ra cua cuhva ra. Tan juvin ra can cuví ra Cristo.

<sup>17</sup> Tsa caahán yu, cuví tsehe: Nyoo natuhun tahan ra tsihin ra Abraham. Tan ndoq vaha ra tuhun tsihin ra. Tacan tan yahá cumi cientu oco utsi cuiya tan tsaá ley tsa tyaa ra Moisés. Maa tyin ña cuví caní ley can tuhun tsa ndoq Nyoo tsihin ra Abraham. Tan ña cuví casi tsi nu naquihín yo tsa catyí Nyoo tyin cuhva ra tsi yo.

<sup>18</sup> Tun tsatyin tsa cuenda ley ra Moisés tan naquihín yo tsa taahán tsi tsi yo, cuatu xaan ndoq Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsaha Nyoo tsa catyí ra tyin cuhva ra tsi ra.

<sup>19</sup> Tatun tacan, ¿nacuenta vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsaha ra ley can tsi ra Moisés tan janahá tsi tyin iyó cuatyí yo. Tan ángel Nyoo tsaha cuenda ley can tsi ra Moisés. Tan ra Moisés tsaha cuenda can tsi nyivi. Tan ndoq tsi nda cuanda quivi tsa quitsí ra Cristo, ra cuví tata ra Abraham. Juvin ra cuví ra tsa catyí Nyoo tyin cua cuhva tsa vaha tsi yo.

<sup>20</sup> Tan juvin ñi maa Nyoo cahan tsihin ra Abraham quivi can. Tan ña tsiñi ñuhu tsa nducu sñn ra iin ra nacatyí tuhun tsihin ra Abraham.



<sup>21</sup> ¿A cuñí tsi catyi tyin ley tsa tyaá ra Moisés ña nacatsí tahan tsi tsihin tsa catyi Nyoo tyin cuhva ra tsi yo? Ñavin. Tun tsatyin cuvi coo yo ñayivi nyito jaha ley can, cuvi nduvaha yo nuu Nyoo tsa cuenda tsi. Maa tyin ña cuvi.

<sup>22</sup> Tyin catyi nu tutu Nyoo tyin iyó cuatyí tandihí nyivi. Tyin tacan tan nyivi tsa tsinú iñi tsi ra Jesucristo cuvi ñihi ñi ñayivi nyito tsa catyi Nyoo tyin cuhva ra tsi yo.

<sup>23</sup> Tsa ndi cumañi ca tsinú iñi yo tsi ra Cristo, ley can yihí ndaha tsi yo tumaa tsa tsinyij yo vehe caa. Tacan cuvi nda cuanda jahaná Nyoo tsi yo nácaa tan tsinu iñi yo tsi ra.

<sup>24</sup> Tan ley can cuvi tsi tumaa iin nyivi jahá cuenda tsa nyihí. Tyin jahá cuenda tsi tsi yo nda cuanda quivi quitsi ra Cristo. Tan cuvi tsinu iñi yo tsi ra tan nduvaha yo nuu Nyoo.

<sup>25</sup> Tan vityin tsa tsaá quivi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

<sup>26</sup> Tyin tandihí yo cuvi yo sehe Nyoo tyin tsinú iñi yo tsi ra Cristo Jesús.

<sup>27</sup> Tan tandihí yo tsicoondutyá yo tan ndu iin yo tsihin ra Cristo, tan nanduví yo tumaa maa ra.

<sup>28</sup> Ña ñihi xaan ca tsa cuvi yo nyivi Israel, a cuvi yo nyivi Grecia; a cuvi yo musu, a ñavin musu cuvi yo; a cuvi yo rayi, a ñaha. Yoñi ca caahán tuhun yacan, tyin tsa iin ñi cuvi yo tsihin ra Cristo, intuhun ña nyivi cuvi yo tsihin ra.

<sup>29</sup> Tan tatun cuenda ra Cristo yihí ndo, nditsa tsa tata ra Abraham cuvi ndo. Tan ñihi ndo tsa catyi Nyoo tsihin ra Abraham tyin cuhva ra tsi ra.

## 4

<sup>1</sup> Cua cahan yu iin cuhva tsihin ndo. Tatun iin ra luhlu tan tsihí jutu ra, tan nacoq jutu ra tandihí tsa cuca ra tsi ra, ra luhlu can cua cutyiñu ra can nda cuahnu ra. Tan tsitsi tsa ndi cumañi ca cuahnu ra, cuvi ra tumaa iin musu ñi. Vasu tsi maa ra cuvi tandihí tsa cuca jutu ra.

<sup>2</sup> Iyó ra jahá cuenda tsi ra nda cuanda tsaá cuiya ra tsa catyi jutu ra tyin cua naquihín ra ndaha tyiñu tsa nacoq ra tsi ra.

<sup>3</sup> Tan tacan cuvi maa yo. Tsa ndi cumañi ca quitsi ra Cristo, cuvi yo musu cuhva iyó nyivi iyó nu ñuhu ñayivi ihya.

<sup>4</sup> Maa tyin quivi tahan tsi, Nyoo jaquitsi ra tsi Sehe ra. Tan jacacu iin ñaha tsi ra. Tan tsindacá ñaha ley tsahnu Nyoo tsi ra.

<sup>5</sup> Jaquitsi Nyoo tsi ra tyin jacacu ra tsi yo tsa ña quihí ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

<sup>6</sup> Tan tsa cuenda tsa nanduví yo sehe ra, Nyoo jaquitsi ra Tatyí Ii ra Cristo cunyaa

añima yo. Tan tsa cuenda Tatyí Ii ra caná tsaá yo tsi Nyoo tan catyi yo: “Tyatya”.

<sup>7</sup> Yacan cuenda sehe Nyoo cuvi yo tan ña cuvi ca yo tumaa iin musu. Tan tsa cuenda tsa cuvi yo sehe Nyoo, tsahá ra tsa cuca ra tsi yo tsa cuenda ra Cristo.

*Tsicá iñi ra Pablo tsa cuenda nyivi yihí cuenda Nyoo*

<sup>8</sup> Tan quivi tsa ñaha ca nacoto ndo tsi Nyoo, cuvi ndo musu tsitoho tsa ñavin Nyoo cuvi.

<sup>9</sup> Maa tyin vityin tsa nacotó ndo tsi Nyoo. Vaha ca catyi yu, maa Nyoo nacotó ra tsi ndo. ¿Nacaa tsa cuñi ndo quihin nyico ndo tuhun ndaahvi tsa nduve tunyee iñi iyó tsi, tan cuvi nyico ndo musu?

<sup>10</sup> Nyooho ndi jacahnú ca ndo quivi vico, quivi nduyutyá yoo, tan vico tandihí ñi cuiya.

<sup>11</sup> Yuuhví xaan yu coto iin tsa cuatu ñi cuvi tyiñu jahá yu tsihin ndo.

<sup>12</sup> Yañi, caahán ndaahvi yu tsihin ndo coo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñi yu tsa caca iñi ndo tyin jativi ndo tsi yu.

<sup>13</sup> Tan tsa tsitó ndo tyin quivi quitsi jhna yu ñuu ndo iyó iin cuehe tsi yu, yacan cuenda ndoq yu juhva quivi tsihin ndo, tan cahan yu tuhun ra Cristo tsihin ndo.

<sup>14</sup> Tan vasu ndi maa tsa cuhvi yu tsihin cuehe can vaha naquihín cuenda ndo tsi yu tan ña tyaá tsiyo ndo tsi yu. Naquihín cuenda ndo tsi yu tumaa tun cuvi yu iin ángel tan tumaa tun ra Cristo cuvi yu.

<sup>15</sup> Tan vityin ¿numaa cuahán tsa sii xaan cuñi ndo tsihin yu quivi can? Tyin yuhu cuvi yu tsandaa tyin quivi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuvi nduvaha yu tsihin yacan.

<sup>16</sup> Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

<sup>17</sup> Nyivi can, cuñi xaan ñi tsi ndo catyi ñi. Maa tyin ña nditsa ñi. Caahán ñi tacan tyin cuñi ñi tsa cunicun ndo tsi ñi tan ña tsinu ca iñi ndo tuhun caahán yu.

<sup>18</sup> Vaha tsa cuñi yo tsi nyivi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyii ñi yu tsihin ndo.

<sup>19</sup> Nyooho ra cuatyí sehe yu, nyehé nyico yu tundoho tan tsa uhvi tsa catyi ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehé yu tundoho nda cuanda cuahnu ndo tsihin tunyee iñi maa ra Cristo.

<sup>20</sup> Vaha xaan tun tsatyin cuvi cunyi yu tsihin ndo vityin ihya. Tyin tacan tan cuvi nasama yu cuhva cahan yu tsihin ndo. Tyin

vityin ña tsitó yu náa caca iñi yu tsa cuenda ndo.

*Na coo yo tsa cuenda Nyoo tan ñavin tsa cuenda ley tsahnu*

<sup>21</sup> ¿A ñaha ca cahvi ndo tsa caahán ley tsa tsahã Nyoo tsi ra Moisés? tyin cuñi ndo cuendaca ñaha can tsi ndo, catyi tuhun ndo tsihin yu tun ñaha ca cahvi ndo can.

<sup>22</sup> Catyi tsi tyin ra Abraham tsicoo uvi taahan sehe ra. Tsicoo iin sehe ra tsihin ña Agar tsa cuvı musu ñasihi ra. Tan tsicoo inga sehe ra tsihin ña Sara ñasihi vaha maa ra.

<sup>23</sup> Cacü sehe ñaha tsa cuvı musu can tumaa cacü tandihi ca maa lee. Maa tyin sehe ñasihi ra Abraham cacü ra tumaa catyi maa Nyoo tsihin ra tyin cua cuvı.

<sup>24</sup> Tan tuhun can iyó tsa cuñi tsi catyi tsi tsihin yo. Nduvi taahan ñi ñaha can cuvı ñi tumaa nduvi taahan tuhun tsa ndoo Nyoo tuhun tsihin yo. Intuhun tuhun can cuvı cuenda yucu Sinaí. Tan nyivi yihı cuenda ley can cuvı ñi tumaa ña Agar, tyin iin musu ñi cuvı ña tsihin sehe ña.

<sup>25</sup> Tumaa ña Agar, tan tumaa yucu Sinaí tsa canyiı Arabia, tacan cuvı ñuu Jerusalén nda quivi vityin. Tyin nyivi ñuu can yihı ndaha ley tsahnu tsi ñi. Tan cuvı ñi tumaa musu ley can.

<sup>26</sup> Maa tyin nda gloria iyó inga Jerusalén, tsa cuvı ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuvı tumaa sihi yo.

<sup>27</sup> Tan catyi tuhun Nyoo tyehen:  
Cusii iñi yooho, ñaha tsa ña cuvı coo sehe.  
Yooho tsa nduve sehe iyó.  
Cana tsaa tsihin tsa sii cuñi un, tyin ña tsitó un tsa uhvi cacü sehe un.

Cusii iñi tyin cua cuhva cuaha ca yu sehe un tan ñavin ca ñaha iyó yii, catyi tuhun Nyoo.

<sup>28</sup> Yañi, yoo cuvı yo tumaa ra Isaac, sehe ra Abraham tyin cacü ra cuhva catyi maa Nyoo tsihin jutu ra.

<sup>29</sup> Ra sehe ñaha tsa cuvı musu can, xaan iñi ra tsi ra Isaac sehe ñasihi ra Abraham. Tacan cuvı tucu vityin ihya. Ra tsa cuñi tyin javaha yo tsa catyi ley, xaan iñi ra naha tsi yo tsa cuvı yo nyivi cacü tsaa tsihin Tatyı Iı Nyoo.

<sup>30</sup> Tan ¿náa catyi tuhun Nyoo? Catyi tsi: “Tava tsiyo tsi ñaha tsa cuvı musu can tsihin sehe ña, tyin ña cuvı naquihin sehe ña tsa taahán tsi tsi sehe ñaha tsa ñavin musu cuvı”, catyi tuhun Nyoo.

<sup>31</sup> Yacan cuenda, yañi, ña cuvı yo tumaa cuvı sehe ñaha tsa cuvı musu can. Tyin cuvı yo tumaa cuvı sehe ñasihi ra Abraham, tyin ñavin musu cuvı yo. [Tan Nyoo naquihın cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

## 5

*Na tyaá yahvi yo tuhun ra Cristo tan ña cuhva yo cuendaca ñaha ley tsahnu tsi yo*

<sup>1</sup> Ra Cristo tsa yaha jacacü ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musuinga tsaha.

<sup>2</sup> Tyaá soho ndo, yuhu ra Pablo caahán tsihin ndo. Taton cuhva ndo tsa cunyaa tuñi Nyoo tsi ndo tan cuñi ndo tyin cua jacacü yacan tsi ndo, ña cua cuvı jatyinyee ra Cristo tsi ndo.

<sup>3</sup> Cuñi yu cahan yu tsihin ndo inga tsaha tuhun ihya: Tandihi ra tsa cuñi cacü tsihin tsa cunyaa tuñi Nyoo tsi ra naha, cuñi tsi javaha ra naha tandihi maa tsa catyi ley ra Moisés.

<sup>4</sup> Tandihi nyooho tsa nducú nduvaha nuu Nyoo tsihin tsa javaha ndo cuhva catyi ley can, tsa quita tsiyo ndo nuu ra Cristo. Tan jañã ndaha ndo tsa vaha tsa tsahá Nyoo tsi ndo.

<sup>5</sup> Maa tyin yoo tsihin tsa jatyinyee Tatyı Iı Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo.

<sup>6</sup> Tyin taton iin ñi cuvı yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuvı tsa tsinú iñi yo tsi ra Cristo. Tan tsihin tsa tsinú iñi yo cuvı coo yo, tan cuñi tahan ca yo tsi yo.

<sup>7</sup> Nyooho vaha xaan cuahán ndo quivi can. ¿Tan vityin yóo jandu uvi iñi ndo? Tan ña tyaá yahvi ca ndo tsa nditsa.

<sup>8</sup> Tuhun tsa janahá ñi can, ñavin tuhun Nyoo, ra tsa canã tsi yo, cuvı can.

<sup>9</sup> Tyin tumaa ndaá yutsan paan jahá luxu ñi yutsan iya, tacan cuvı iin nyivi caquiñi, cuaha ca nyivi cuvı javıvi ñi.

<sup>10</sup> Nyoo cua tatsı tuñi ra tsi nyivi jandu uvi iñi ndo. Nduve cuenda ra yóo ñi cuvı ñi. Maa tyin yuhu tsitó vaha yu tyin Jutu Mañi yo cua jatyinyee ra tsi ndo tan ña cua tyaá iñi ndo inga cuhva tsa ña janahã yu tsi ndo.

<sup>11</sup> Tan tsa cuenda yuhu, yañi, tun tsatyin catyi yu tyin ra tsinú iñi tsi ra Cristo cuñi tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyı cuatyı yo.

<sup>12</sup> Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuvı ca jandu uvi iñi ra naha tsi ndo.

<sup>13</sup> Nyooho, yañi, canã Nyoo tsi ndo tsa ña cuendaca ñaha ca ley tsi ndo. Tan ñavin tsa cuenda tsa iyó nuña ndo tan cuvı javaha ndo náa ndihi tsa cuñi cuñu ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo.

<sup>14</sup> Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñi ndo tsi maa ndo”, catyí tsi. Tan tatun nditsa tsa cuñi tahan yo tsi yo, tsa javahá ndihi yo tandihi ca tsa caahán ley tsahnu.

<sup>15</sup> Jaha ndo cuenda tyin tatun caahán nyaa tahan ndo tsi ndo tan ndasi cuñi ndo nyehe tahan ndo tsi ndo, cua tivi nu yucú ndo.

*Cuhva cuñi cuñu ñuhu yo tan cuhva iyó yo tsihin Tatyí Li Nyoo*

<sup>16</sup> Tsa cuñi yu cahan yo tsihin ndo cuví tuhun ihya: Coo ndo tsihin tunyee ñi Tatyí Li Nyoo. Tacan tan ña cua javaha ca ndo tsa ña vaha tsa cuñi cuñu ñuhu ndo.

<sup>17</sup> Tyin tsa javahá yo tsa ña vaha tsa cuñi cuñu ñuhu yo, ñavin cuhva cuñi Tatyí Li Nyoo javahá yo. Tyin Tatyí Li Nyoo cuñi tsi tsa javahá yo tsa vaha. Tan cuñu ñuhu yo ña cuñi tsi javahá tsi cuhva cuñi Tatyí Li Nyoo. Tsa cuñi Tatyí Li Nyoo cañi tahan can tsihin tsa cuñi cuñu ñuhu yo. Yacan cuenda yí javaha yo tsa cuñi yo javaha yo.

<sup>18</sup> Maa tyin tatun tsahá yo tsi yo tsa jaquihin ityí Tatyí Li Nyoo tsi yo, ña cua cundaca ñaha ca ley tsahnu tsi yo.

<sup>19</sup> Ña yí nacoto yo tsi nyívi javahá cuhva cuñi cuñu ñuhu ñi. Yihí rayí, iyó ñasihi ra naha tan iyó inga ñaha tsi ra naha. Tan yihí ñi ñaha iyó yí ñi tan iyó inga rayí tsi ñi. Tan yihí rayí quixí ra tsihin ñaha tan ña cuñi ra tindaha ra tsihin ña, tan juven ñi tacan javaha juhva ñi ñaha.

<sup>20</sup> Yihí ñi jacahnú ñi tsitoho. Yihí ñi tasi ñi. Yihí ñi ndasi cuñi ñi nyehe ñi nyívi. Yihí ñi cañi tahan ñi. Yihí ñi cuñu ñi. Tan yihí ñi iin yaha ñi cuxaan ñi. Yihí ñi tsicá ñi ñi maa ñi tsa vaha tsi maa ñi. Tan yihí ñi natahvi sava ñi nu yucú ñi tyin cañi tahan ñi. Tan tacan tan quita sín ñi.

<sup>21</sup> Tan yihí ñi nyiyó ñi ñi tsa iyó tsi inga nyívi. Tan yihí ñi tsahní tahan ñi. Tan yihí ñi tuhva ñi tsiñi. Tan yihí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quívi can. Tyin tandihi ñi tsa javahá yacan, ña cua cuví naquihin cuenda ñi nu ndacá ñaha Nyoo.

<sup>22</sup> Maa tyin tsa tsahá Tatyí Li Nyoo tsi yo, cuví tsa cuñi yo tsi Nyoo tan tsi nyívi, tsa sñi cuñi yo, tsa taxin cuñi añima yo, tsa nyee xaan ñi yo, tsa vaha ñi yo, tsa vaha nyívi cuví yo, tsa ña cundihí ñi yo javahá yo tsa vaha tsihin nyívi, tsa tsinú ñi yo tsi ra Cristo.

<sup>23</sup> Tan inga tsa tsahá Tatyí Li Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñi cuñu ñuhu yo. Tatun javahá yo tandihi tsa vaha ihya, ndi intuhun

ley tan ña cua cuví catyí tsi tyin iyó cuatyí yo.

<sup>24</sup> Tan yoo tsa yihí cuenda ra Cristo Jesús, tsa yaha jandihí yo tuhun tsa javahá yo tsa ña vaha tsa cuñi cuñu ñuhu yo.

<sup>25</sup> Tan tumaa tsa iyó yo ñayívi nyito tsa cuenda Tatyí Li Nyoo, tacan cuñi ndihi tucu tsi tsa tyaá yahvi yo tsa janahá ra tsi yo.

<sup>26</sup> Na ña cahnú jaha yo tsi yo. Tan ña jacañi tahan yo tsi nyívi. Tan na ña nyiyo ñi yo tsa tsií inga nyívi.

## 6

*Taahán tsi jatyinyee tahan yo tsi yo*

<sup>1</sup> Yañi, tatun nyehé ndo javahá iin ra yañi yo cuatyí, nyooho tsa ñihi nyaá Tatyí Li Nyoo tsihin, jatyinyee ndo tsi ra na nduvaha ra inga tsaha. Maa tyin cuñi tsi cahan vii ndo tsihin ra tsihin tsa vita ñi ndo. Tan cuñi tsi jahá xaan ndo cuenda tsi ndo coto nducu cuhva ndihi nu ña vaha tsi ndo.

<sup>2</sup> Na jatyinyee tahan yo tsi yo náa tundoho taahán yo. Tyin tatun javahá yo tacan, cuñi tsi catyí tyin tyaá yahvi yo tsi ra Cristo.

<sup>3</sup> Tatun ndáa yo cuñi maa yo tyin cahnú nyívi cuví yo, tan nduve náa cuví yo, juven ñi tsi maa yo jandaví ñaha yo.

<sup>4</sup> Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusí ñi yo. Tan ña taahán tsi nyehe yo náa javahá inga nyívi.

<sup>5</sup> Tyin intuhun intuhun maa yo tan taahán tsi cunyee ñi yo cuiiso yo tsa taahán tsi tsi yo.

<sup>6</sup> Tan cuñi tsi tsa jatyinyee ndo tsi ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

<sup>7</sup> Tan ña jandaví ñaha ndo tsi juven ñi maa ndo. Tyin Nyoo yoñi cuví vacu nducu tsi ra. Tyin tandihi tsa tatsí nyívi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi.

<sup>8</sup> Tacan tucu tatun iin nyívi tan javahá ñi tsa ña vaha tsa cuñi cuñu ñuhu ñi, juven ñi maa tsa javahá ñi cua jatívi tsi ñi. Maa tyin tatun javahá ñi cuhva cuñi Tatyí Li Nyoo, Tatyí Li Nyoo cua cuhva ñayívi nyito tsa ña cua naa maa coo ñi.

<sup>9</sup> Yacan cuenda janyee ndo ñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quívi.

<sup>10</sup> Yacan cuenda tandihi ñi tsaha tsa cuví javaha yo tsa vaha, na javaha yo itsi tsihin tandihi ñi nyívi. Tan tsa jihna ñi taahán tsi javaha yo tsa vaha tsihin nyívi yihí cuenda Nyoo.

*Sñi xaan cuñi ra Pablo tyin nyehé ra tundoho tsa cuenda ra Cristo*

<sup>11</sup> Nyehe ndo tsa nahnu letra tyaá yo tsihin ndaha yu nu tutu ihya vityin.

<sup>12</sup> Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñi ra naha na catyi nyivi tyin vaha xaan ra naha. Tan ña cuñi ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo.

<sup>13</sup> Tyin ndi maa ra tsa nyisó tuñi Nyoo tan ña tyaá yahvi ra naha tandihi tsa caahán ley. Cuñi ra naha tsa cunyaa tuñi Nyoo tsi nyooho. Tyin tacan tan cuvi jachnu ra naha tsi maa ra naha tyin javahá ndo cuhva caahán ra naha.

<sup>14</sup> Maa tyin yuhu ña cuñi yu cu iyo iñi yu tsi yu tsa cuenda náa ndihi tuhun. Maa tyin cu iyo iñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñi ca yu tsa iyó ñuu ñayivi ihya tyin ña ndaca ñaha ca yacan tsi yu.

<sup>15</sup> Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuvi, tsa nanduví yo iin nyivi tsa tsa cuenda ra.

<sup>16</sup> Tandihí nyooho tsa iyó tacan, ñaquihin ndo tsa taxin coo aña ndo. Tan na cundaahvi iñi Nyoo nyehe ra tsi tandihí ndo, tyin nditsa tsa cuvi ndo nyivi cuenda ra.

<sup>17</sup> Vityin tan nu cuahán tsi ityi nuu, ndi intuhun ndo tan ña cua cuhva ca ndo tsihi tsi yu. Tyin tandihí paa tsa nyecú cuñu ñuhu yu, cuñi tsi catyi tsi tyin nditsa tsa cuvi yu iin ra tsicá tyiñu Jutu Mañi yo Jesús.

<sup>18</sup> Yañi, na nasoco Jutu Mañi yo Jesucristo tsi tandihí ndo.

Tan na cuvi tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

*Nu quitsaha javahá ra Pablo carta*

<sup>1</sup> Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsi yu carta ihya tsi ndo.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Tsa iin ñi cuví yo tsihin ra Cristo, Nyoo nasocó xaan ra tsi yo*

<sup>3</sup> Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo.

<sup>4</sup> Tsa ndí cumañi ca javaha ra ñuhu ñayivi tan nacatsj ra tsi yo tyin ndu iin yo tsihin ra Cristo. Tyin tacan tan cuñi coo yo nuu ra tan ña coo ca cuatyí yo.

<sup>5</sup> Tsa cuenda tsa cuñí ra tsi yo, tyaá ra cuhva tahañ tsanaha tyin nanduvi yo sehe ra tsa cuenda ra Jesucristo. Tacan javahá ra tyin tacan cacu iñi maa ra.

<sup>6</sup> Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra.

<sup>7</sup> Nyoo cuñí xaan ra tsi yo. Tan yacan cuenda tyahví ra tsihin ñiñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo.

<sup>8</sup> Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsíñi tuñi ra coo tsi yo.

<sup>9</sup> Tan tsahá ra tsa nacotó yo tuhun tsa tyihj ra cuhva tahañ tsanaha tyin javaha ra tsihin ra Cristo. Tan tandihí tuhun can tsicumj xeehe ra tan ña jacotó ra can tsi nyivi tahañ tsanaha.

<sup>10</sup> Maa tyin tsa cua tahan tsi quivi cundaa tuhun tsa tyihj ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

<sup>11</sup> Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsj ra tsi yo, tyin tacan tyihj ra cuhva tyin javaha ra tyin maa ra javahá tandihí cuhva nyehé ra tyin vaha.

<sup>12</sup> Javahá ra tyehen tyin nyuhu tsa natsinú jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra.

<sup>13</sup> Tan tacan tucu nyooho natsinú iñi ndo tsi ra Cristo, tan ndu iin ndo tsihin ra quivi tsa tsíñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahá ra Tatyí li ra coo añima ndo, tumaa catyí ra tyin cua javaha ra tan yacan cuñí tsi catyí tyin cuví ndo nyivi yihí cuenda ra.

<sup>14</sup> Nyoo jihna ca Tatyí li ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

*Nu tsicán ra Pablo tsi Nyoo na cuhva ra tsa tsíñi tuñi tsi nyivi tsa tsinú iñi*

<sup>15-16</sup> Yacan cuenda, tsa ñihj tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahañ xaan ndo tsi ndo tsa yihí ndo tuhun Nyoo.

<sup>17</sup> Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí li ra, tacan tan nacoto vaha ca ndo tsi ra.

<sup>18</sup> Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenta cana ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyivi cuenda ra, si xaan caá can tan cuca xaan can.

<sup>19</sup> Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juven ñi maa tsihin tunyee iñi cahnu can

<sup>20</sup> Janandotó Nyoo tsi ra Cristo. Tan tyaá ra tsi ra xiin cuaha ra nda gloria.

<sup>21</sup> Tan yacan cuví nu jacahnu xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayivi ihya tan nda andivi. Tyin yoñi yóo ra cahnu ca cuví ñuu ñayivi ihya tan ndí ñayivi tsa cua coo, tyin intuhun ñi maa ra Cristo cuví ra cahnu ca cuví.

<sup>22</sup> Tan tandihí cuñi maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuví ra jiñi tsihin nyivi tsa yihí cuenda ra.

<sup>23</sup> Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juven maa ra janduní ra tandihí tsa iyó.

## 2

*Jacacú Nyoo tsi yo tsa cuenda tsa cuñí ra tsi yo*

<sup>1</sup> Nyoo tsahá ra ñayivi nyito coo ndo quivi ndu iin ndo tsihin ra Cristo. Maa tyin tsa ndí cumañi ca tsinu iñi ndo tsi ra Cristo ña nyito añima ndo tyin ndi iyó cuaha cuatyí ndo.

<sup>2</sup> Tan quiví can ndi javahá ndo cuhva javahá nyívi ña tsitó tsi Nyoo. Ndi tyaá yahví ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyívi tsa ña tyaá yahví tsi Nyoo.

<sup>3</sup> Tan juvin ñi tacan tsicoq tucu yo quiví can, tyin javahá yo tsa ña vaha tsa cuñí cuñu ñuhu yo tan cuhva tsicá ñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihi ca nyívi tsa javahá tsa ña vaha.

<sup>4</sup> Maa tyin Nyoo cundaahví xaan ñi ra nyehé ra tsi yo tsa cuenda tsa cuñí xaan ra tsi yo.

<sup>5</sup> Tan vasu tsa tsihí añima yo jahá cuatyí yo, Nyoo janandotó ra añima yo tan tsaḥa ra ñayívi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñí xaan Nyoo tsi yo.

<sup>6</sup> Tan tsa janandotó ra tsi yo iin caa ñi tsihin ra Cristo Jesús tyaá ra tsi yo tsihin ra nda gloria.

<sup>7</sup> Tan javahá Nyoo tyehen tyin tacan tan nu cuahán ca tsi ityi nuu cua coto tandihi ca tsa cua coo tyin vaha xaan ñi ra tsihin yo tan cahnu xaan tumañi ñi tsaḥa ra tsi yo tsa cuenda ra Cristo Jesús.

<sup>8</sup> Tyin tsa cuenda tsa vaha tsa tsaḥa Nyoo tsi yo tan cacú yo. Tan ñihí yo tumañi ñi ihya jahá tsa tsinú ñi yo tsi ra Cristo. Tan ñavin tsihin tsa javahá yo tan ñihí yo can, tyin maa Nyoo tsaḥa can tsi yo.

<sup>9</sup> Ñavin tsihin tsa javahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo ñi yo tyin cacú yo tsihin tsa javahá yo tsa vaha.

<sup>10</sup> Nyoo janduvahá ra añima yo tsihin tsa ndu iin yo tsihin ra Cristo Jesús. Tacan javahá ra tyin tacan tan javaha yo tsa vaha, tyin nda tsanaha tan tyaá ra cuhva tyin coo yo tacan.

*Cuví yo nyívi Israel, a cuví yo nyívi inga ñuu, maa tyin tsa cuenda ra Cristo iin ñi nyívi cuví tandihi yo*

<sup>11</sup> Catyí ra Israel naha ra tyin ña vaha nyoooho tsa ñavin nyívi Israel cuví, tyin ña tsinyaá tuñi Nyoo cuñu ñuhu ndo tumaa maa ra naha. Cuñí maa ra naha tyin vaha ra naha nuu Nyoo tan nyoooho ña vaha ndo.

<sup>12</sup> Tan nducuhun tucu ñi ndo tyin nu quítsj tsi tahán tsanaha, nduve ra Cristo iyó añima ndo. Tan ndi ña iin ñi cuví ndo tsihin nyívi Israel. Tan ña tsitó ndo tuhun tsa ndoq Nyoo tsihin ra Abraham tan tsihin nyívi tata ra. Tyin iyó soho ñi maa ndo quiví can, tan nduve Nyoo nyaá tsihin ndo. Yacan cuenda nduve náa cua ñihi ndo.

<sup>13</sup> Tyin ndi luxu tuhun Nyoo tan ña tsitó ndo tahán tsanaha, maa tyin vityin ndu iin ndo tsihin ra Cristo Jesús tyin quítsj ra tsatj ra ñi ra tsa cuenda ndo.

<sup>14</sup> Tyin juvin ra Cristo tsaḥa tsa taxin coo yo tan jandu iin ra tsi nyoooho tsa ñavin nyívi Israel cuví tsihin nyuhu tsa cuví nyívi Israel. Vityin iin ña nyívi cuví yo, tyin jandihí ra tsa xaan cuñí yo nyehé tahan yo tsi yo.

<sup>15</sup> Tan tsa quítsj ra Cristo tsihí ra nu cruu, tsindihí tuhun tsaḥu tsa iyó ndi tsa tyaási nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyívi cuví yo nuu ra, tan iyó yo tsihin tsa taxin.

<sup>16</sup> Tan tsihin tsa tsihí ra nu cruu tsindihí tsa ña caahán tsihin tahan yo, tan nacoq vaha yo tsihin Nyoo jahá ra, iin ña nyívi cuví yo vityin.

<sup>17</sup> Ra Cristo quítsj ra cahan ra tyin cuví coo vaha yo tsihin Nyoo tan tsihin tahan yo: Cahan ra tsihin ndi tsa cuví ndi nyívi Israel tsa tsa tsitó maa tuhun Nyoo tan tsihin nyoooho tsa ña tsitó ndi luxu maa tuhun Nyoo tahan tsanaha.

<sup>18</sup> Tan tsa cuenda tsa quítsj ra Cristo tsihí ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí Ii ra iyó añima yo: a cuví yo nyívi Israel, o ñavin nyívi Israel cuví yo.

<sup>19</sup> Yacan cuenda nyoooho ñavin ca nyívi inga ñuu cuví ndo, tyin iin ña nyívi cuví ndo tsihin nyívi yihí cuenda Nyoo. Tan cuví ndo nyívi maa ra.

<sup>20</sup> Tan cuví ndo tumaa iin vehe. Tan nyecú ndo nu samá ra tavá tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús.

<sup>21</sup> Tan tsata yuu tsa cuví ra Cristo, sñ xaan cua quita vehe tsa ndi cuahán tsinú, tyin tandihi maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo.

<sup>22</sup> Tan tacan tucu nyoooho ndu iin ndo tsihin tandihi nyívi yihí cuenda ra Cristo jahá Tatyí Ii ra, tyin tacan tan cua cuví ndo vehe nu coo Nyoo.

### 3

*Nyoo tavá tyiñu tsi ra Pablo tyin cahan ra tuhun ra Cristo tsihin nyívi tsa ñavin nyívi Israel cuví*

<sup>1</sup> Yacan cuenda yuhu ra Pablo nyíi yo vehe caa ihya tyin jacotó yo tuhun ra Cristo Jesús tsi nyoooho tsa ñavin nyívi Israel cuví.

<sup>2</sup> Taahán tsi coto ndo tyin cahnu xaan tunyee ñi tsaḥa ra tsi yo tsa cuenda tsa vaha tsi ndo, tyin jacotó yo tuhun ra tsi ndo.

<sup>3</sup> Tan Nyoo janahá ra tuhun xeehe tsa tsicumj ra tsi yo, tan tyaá yo juhva tuhun can nu carta ihya tyin coto ndo.

<sup>4</sup> Tan tsa cua cahví ndo tuhun tsa tyaá yo ihya cua coto ndo nácaa tsaḥa Nyoo tyin cutuñi ñi yo tuhun ra Cristo tsa tsicumj xeehe ra.

<sup>5</sup> Tyin nu quitsj tsi tahañ tsanaha, ña janaha Nyoo tuhun xeehe can tsi nyivi, tumaa tsa janahá Tatyí li ra tuhun can tsi ra tava tyiñu ra Jesucristo tan ra cuví ndusu yuhu Nyoo.

<sup>6</sup> Tan tuhun xeehe can, cuñí tsi catyí tye-hen: Nyivi tsa ñavin nyivi Israel cuví cua ñihi ndihi ñi tsa cua ñihi nyivi Israel tyin iin ña cuñu ñuhu cuví yo vityin tsa cuenda tsa jacacu ra Cristo tsi yo. Tan cua ñihi yo tsa catyí Nyoo tyin cuhva ra tsi yo tyin natsinu iñi yo tsi maa ra Cristo Jesús.

<sup>7</sup> Nyoo tsañá ra tsa vaha tsi yu tan jatyinyee ra tsi yu tyin tacan tan jacoto yu tuhun vaha ihya tsi nyivi.

<sup>8</sup> Yuhu luhlu xaan ra cuví yu tan ñavin ca tandihi nyivi tsa yihí cuenda Nyoo. Maa tyin Nyoo tsañá ra tumañi iñi cahnu ihya tsi yu tyin cahan yu tuhun ra Cristo tsihin nyivi tsa ñavin ñi Israel cuví. Tyin na coto ñi tsa cuca tsa cua cuhva ra Cristo tsi ñi.

<sup>9</sup> Tava tyiñu Nyoo tsi yu na jacoto yu tsi tandihi nyivi nácaa tyañ ra cuhva tsa cua javaha ra tsa ndi cumañi ca javaha ra tandihi tsa iyó, tyin tsanaha ña jacoto ra tuhun tsa tsicumj xeehe ra tsi nyivi.

<sup>10</sup> Tacan cuví tan vityin tandihi ra ndacá ñaha nda andivi cua nyehe tsa vaha tsa javahá Nyoo tsihin yo tsa cuví yo nyivi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo.

<sup>11</sup> Tandihi tuhun ihya nacatsí tahan tsi tsihin tsa tyañ Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo.

<sup>12</sup> Tan tsa cuenda tsa tsinú iñi yo tsi ra Cristo, tsañá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra.

<sup>13</sup> Tan tsa cuenda tsa tsañá ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyeheh nyehé yu tundoho tsa cuenda ndo, tsa vaha tsi maa ndo cuví can.

*Tsicán tahvi ra Pablo tyin na nacoto vaha ca nyivi tsi ra Cristo*

<sup>14</sup> Tan tsa cuenda tsa nducuhun iñi yo tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuñí tsiti yu nuu ra.

<sup>15</sup> Tyin juvin ra cuví Jutu tandihi nyivi: ñi tsa cuahán andivi, tan ñi tsa yucú nu ñuhu ñayivi ihya.

<sup>16</sup> Tan tsicán yu tsi ra na jandunyeexaan ra iñi ndo tsihin Tatyí li ra tsa iyó añima ndo.

<sup>17</sup> Tan na coo ra Cristo añima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihi nyivi, tyin nyanaá vaha ndo tsi Nyoo.

<sup>18</sup> Tacan tan cua cutuñi vaha iñi ndo tsihin tandihi ñi yihí cuenda ra nácaa tsa cahnu xaan tsa cuñí ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñí ra tsi ndo.

<sup>19</sup> Tsicán yu tsi Nyoo na coto ndo nácaa tsa cahnu xaan tsa cuñí ra tsi ndo. Nyoo nyaá maa ra tsihin ndo.

<sup>20</sup> Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsañá ra tsi yo, javahá ra tandihi.

<sup>21</sup> Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

## 4

*Iin ñi cuví tandihi yo tsa yihí yo cuenda ra Cristo jahá Tatyí li Nyoo*

<sup>1</sup> Yacan cuenda yuhu, tsa nyii yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyivi tsa nacañ Nyoo. Tyin nacañá ra tsi ndo na cuví ndo nyivi ra.

<sup>2</sup> Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyixin ndo tsihin ñi, tan ña cundhi iñi ndo nyehé ndo tsi ñi tyin tacan tan coto ñi tyin cuñí ndo tsi ñi.

<sup>3</sup> Tyin tsa taxin tsa tsañá Nyoo coo añima yo jandu iin tsi tsi yo tan yacan cuenda nducu vaha ndo cuhva tan iin ñi cuví ndo tsihin tsa jatyinyee Tatyí li Nyoo tsi ndo.

<sup>4</sup> Tandihi yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihi yo intuhun ñi Tatyí li Nyoo iyó tsihin yo, tan catyí Nyoo tsihin tandihi yo tyin nditsa tsa cua ñihi yo ñayivi nyito coo yo.

<sup>5</sup> Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutya yo.

<sup>6</sup> Iyó intuhun ñi Nyoo tan maa ra cuví ra Jutu tandihi yo. Tan ndacá ñaha ra tsi tandihi yo, tan iyó ra añima tandihi yo, tan tsatyíñu ra tsi tandihi yo, tan jahá tyiñu yo tyiñu ra.

<sup>7</sup> Tan tsañá ra Cristo ndatu tsi tsa intuhun intuhun yo cuhva cuñí maa ra.

<sup>8</sup> Yacan cuenda catyí tsi nu tutu Nyoo tuhun ra Cristo tyeheh:

Cunyee ra jahá canaa ra tsi nu xaan iñi tsi ra, tan quihñ nyaa ra tsi nyivi tsa yihí ndaha nu tan nandañ ra andivi tsihin ñi.

Tan tsañá ra ndatu tsi yo tsa jaha tyiñu yo tyiñu ra, catyí tsi.

<sup>9</sup> ¿Tan náa cuñí tsi catyí tsa “nandañ ra”? Cuñí tsi catyí tyin nuu jihna ra nu ñuhu ñayivi.

<sup>10</sup> Ra tsa nuu can, juvin ñi ra cuví ra tsa nandaq nda gloria. Tyin tacan tan janduni ra tandihí maa tan cunyaa ra tsihin yo tandihí ñi ityi.

<sup>11</sup> Tan juvin ñi maa ra Cristo tsaha ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsaha ra tsa cuví yo ndusu yuhu ra. Tan tsi inga yo tsaha ra tyin jacoto yo tsi nyivi nácaa jacacú ra tsi yo. Tan tsi inga yo tsaha ra tsa jaha cuenda yo tsi ñi yihí cuenda ra, tan tsi inga yo tsaha ra tsa cuví jacuaha yo tuhun ra tsi ñi.

<sup>12</sup> Tacan tsaha Nyoo ndatu can tsi yo tyin jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo.

<sup>13</sup> Nda cuanda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaa yo cuví yo tumaa cuví maa ra Cristo.

<sup>14</sup> Tacan tan ña cua cuví ca yo tumaa tsa nyihí. Tyin tsa nyihí yatyi xaan tsinú iñi tsi náa luxu tsa ñihí tuhun tsi. Tan na ña cuví yoo tacan tyin coto jandavi ñaha nyivi tsi yo.

<sup>15</sup> Maa tyin tyehen cua javaha yo: cua cuñi yo tsi nyivi tan cua cahan yo tsa nditsa tsihin ñi. Tan ndunyeec ca añima yo tsihin tandihí tsa vaha tsa iyó tsi Nyoo. Tan cuahnu yo tan cuví yo tumaa maa ra Cristo, ra cuví ityi nuu tsihin yo.

<sup>16</sup> Tan tsa cuenda ra Cristo tandihí yo tsa cuví yo cuñu ñuhu ra, iin ñi cuví yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyee tsi tsi nanú cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñi tahan yo tsi yo tan jatyinyee tahan yo tsi yo.

#### *Tsaha ra Cristo ñayivi nyito coo yo*

<sup>17</sup> Tuhun ihya cuví tsa tsahá cuenda yo tsi ndo, catyí jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyee tsi ñi tsicá iñi ñi.

<sup>18</sup> Tan ña cutuñi iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi.

<sup>19</sup> Ña cahán ca nuu ñi javahá ñi tsa ña vaha. Tan nacuhvā cuenda ñi tsi ñi tsi tsa caquiñi. Maa ñi tsa ña vaha cuñi ñi javaha ñi.

<sup>20-21</sup> Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhvā ndo tsa nditsa cuví tuhun maa ra Cristo.

<sup>22</sup> Yacan cuenda ña coo ca ndo cuhva tsi-coo ndo quivi can, tan ña javaha ca ndo tsa caquiñi tsa cuñi cuñu ñuhu ndo, tyin tsanaha, jandaví ñaha xaan can tsi ndo.

<sup>23</sup> Nacuhva cuenda ndo tsi ndo tsi Nyoo na nasama ra cuhva tsicá iñi ndo.

<sup>24</sup> Tan coo ndo ñayivi nyito tyin vityin nyivi tsaa cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuiti iyó ndo.

<sup>25</sup> Yacan cuenda ña cahan ca ndo cuendu. Cahán ndo maa ñi tsa nditsa tsihin nyivi tyin iin ña cuñu ñuhu cuví tsa tandihí yo.

<sup>26</sup> Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi.

<sup>27</sup> Tan ña cuhva ndo ndatu tsi nu ña vaha tsa nducu cuhva nu tsi ndo.

<sup>28</sup> Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuví jatyinyee ra tsi nyivi tsa iyó tsa tsiñi ñuhu tsi ñi.

<sup>29</sup> Ña cahan ndo tsa ndavaha ñi. Cahán ndo, maa ñi tsa vaha tsa cua jatyinyee tsi nyivi tsa tsiñi tsa caahán ndo.

<sup>30</sup> Tan ña cuhva ndo tucuihya iñi tsi Tatyí Ii Nyoo tyin Tatyí Ii ra cuví tuñi tsa tyaq ra añima yo nda cuanda ndihí jacacu ra tsi yo quivi cua quitsi ra.

<sup>31</sup> Ña cuxaan iñi ndo tsihi. Tan ña cuxaan ndo. Tan ña cuví ndo nyivi tyixin. Tan ña cahan nyaa ndo tsi nyivi, tan ndi ña cahan ndo tsa ndavaha ñi.

<sup>32</sup> Maa tyin cuví ndo nyivi vaha, tan cundaahvi iñi ndo tsi nyivi. Tan jaha ndo tucahnu iñi tsi ñi, tumaa jahá Nyoo tucahnu iñi tsi maa ndo tsa cuenda ra Cristo.

## 5

### *Nacaa taahán tsi coo nyivi yihí cuenda Nyoo*

<sup>1</sup> Nducu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo.

<sup>2</sup> Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javahá ra tacan.

<sup>3</sup> Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya.

<sup>4</sup> Ña cahan ndo tuhun tsa tsahá ticanuu tsi yo. Tan ndi ña cahan ndo tsa nduve yahvi nyaa. Tyin ña taahán tsi cahan yo tacan. Vaha ca cuhva ndo tyahvi nyoo tsi Nyoo.

<sup>5</sup> Tyin tsa tsitó ndo tyin tandihí nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihí ra cuví ña, a ñaha iyó tsihin rayi tan ñavin yí ña cuví ra, tan



nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo.

<sup>6</sup> Ña cùhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihí tsa ña vaha can cua tatsi tuñi Nyoo tsi nyivi tsa ña tyaá yahvi tsi ra.

<sup>7</sup> Yacan cuenda ña cùtahan ndo tsihin ñi.

<sup>8</sup> Nyooho tsicoo ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tavá ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo.

<sup>9</sup> Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan cahan ndo maa ñi maa tsa nditsa.

<sup>10</sup> Jañiñi ndo cutuhva ndo cuhva taahán iñi Jutu Mañi yo.

<sup>11</sup> Ña javaha ndo cuhva javahá nyivi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi.

<sup>12</sup> Tyin cahan nuu yo cahan yo tsa javahá xeehe ñi.

<sup>13</sup> Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihí tsa yihí xeehe.

<sup>14</sup> Yacan cuenda iyó nu catyi tsi:

Ndoto yooho tsa quixí un, ndùvita mahñu nu yucú ndiyi.

Tan ra Cristo cua jandunditsin ra ñuhu nu cuahán un, catyi tsi.

<sup>15</sup> Yacan cuenda jaha ndo cuenda cuhva iyó ndo. Tan ña coo ndo tumaa iyó ra soho. Coo ndo tumaa iyó ra tsitó.

<sup>16</sup> Tan nducu ndo cuhva cahan ndo tuhun Nyoo tsihin nyivi tandihí ñi cuhva tsa nuña ndo, cahan ndo tyin vityin maa ñi maa tsa caquiñi javahá ñi.

<sup>17</sup> Yacan cuenda ña soho coo ndo. Nducu ndo cuhva cutuñi iñi ndo cuhva cuñi maa Jutu Mañi yo.

<sup>18</sup> Ña coho ndo nyixi tan cuvi ndo ra tsiñi tyin cuví jativi yacan tsi ndo. Maa tyin cùhva ndo tsi ndo cundaca ñaha Tatyí Ii Nyoo.

<sup>19</sup> Cahan ndo tsihin tahan ndo maa ñi tsa vaha, tan jacahnu ndo tsi Nyoo. Çata ndo salmo cuenda ra; çata ndo yaa Nyoo; çata ndo tsa tsahá Tatyí Ii tsi ndo; jacahnu ndo tsi Jutu Mañi yo tsihin tandihí añima ndo.

<sup>20</sup> Tacan ñi nacuhva ndo tyahvi nyoo tsi Nyoo Jutu yo tsa cuenda tandihí maa, a sii cuñi ndo, o nyehé ndo tundoho. Nacuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

*Nacaa taahán tsi coo yo tsihin nyivi yo*

<sup>21</sup> Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

<sup>22</sup> Nyooho tsa iyó yii, tyaa yahvi ndo tsa caahán yii ndo tumaa tsa tyaá yahvi ndo tsa caahán Jutu Mañi yo.

<sup>23</sup> Tyin rayii cuví ityi nuu tsihin ñasihi ra, tumaa cuví ra Cristo ityi nuu tsihin nyivi yihí cuenda ra. Juvín ñi maa ra jacacú tsi yo tsa cuví yo cuñu ñuhu ra.

<sup>24</sup> Yacan cuenda tumaa tsa cuví ra Cristo ityi nuu tsihin nyivi yihí cuenda ra, tacan taahán tsi tyaá yahvi ñaha tsi yii ña.

<sup>25</sup> Tan nyooho rayii, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yihí yo cuenda ra, tan tsahá ra ñayivi ra tsa cuenda yo.

<sup>26</sup> Tacan javahá ra tan jandundí ra añima yo tsihin tuhun caahán ra tsa cuví tumaa ndutya, tan nacatyá ra tsi yo quivi tsa natsinu iñi yo tsi ra.

<sup>27</sup> Ndoó añima yo tumaa ndoó iin jahma, ña nyayu ca tsi, ña tyi ca tsi. Tyin ra Cristo jandundí ra tsi yo tsa cuví yo nyivi yihí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo.

<sup>28</sup> Tacan taahán tsi cuñi rayii tsi ñasihi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasihi ra, cuñi ra tsi maa ra.

<sup>29</sup> Tyin ndi intuhun yo tan ña cuví tsa ña cuñi yo cuñu ñuhu yo, tyin jacatsi yo tan jacunditsi yo cuñu ñuhu yo. Tan ra Cristo juvín ñi tacan javahá ra tsihin nyivi yihí cuenda ra.

<sup>30</sup> Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yiqui ra.

<sup>31</sup> Catyi tuhun Nyoo: “Rayii taahán tsi nacao ra tsi jutu ra tan tsi sihi ra, tan ndu iin ra tsihin ñasihi ra. Tan intuhun ña cuñu ñuhu cua cuvi tsa nduvi ñi!”

<sup>32</sup> Xeehe xaan tan cahnu xaan tuhun ihya, tan catyi yu tyin cuñi tsi catyi tyin ra Cristo ndu iin ra tsihin nyivi yihí cuenda ra tumaa ndu iin iin rayii tsihin ñasihi ra.

<sup>33</sup> Tan inga tucu tuhun, cuñi tsi catyi tyin intuhun intuhun ndo taahán tsi tsa cuñi ndo ñasihi ndo, tumaa cuñi ndo tsi maa ndo. Tan nyooho ñiñaha, tyaa yahvi ndo tsi yii ndo.

## 6

<sup>1</sup> Nyooho tsa nyihí, tyaa soho ndo tsa caahán jutu ndo tan sihi ndo. Tyin tacan taahán tsi javaha ndo.

<sup>2-3</sup> Tyin nu tutu Nyoo catyi tsi tyehen: “Jaha tsa ñayivi tsi jutu un tan sihi un”, tan tuhun ihya cuví tsa jihna ñi catyi Nyoo tyin javaha yo tan cua ñihi yo tsa cua cuhva ra

tsi yo. Tyin tyaa ra cuhva tyin tun javaha yo tacan, si xaan cua coo yo tan cuaha xaan quivi cua coo yo nu ñuhu ñayivi ihya.

<sup>4</sup> Tan nyooho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

<sup>5</sup> Tan nyooho tsa cuví musu, tyaa yahvi ndo tsi ra yihí ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa ñi iñi añima ndo. Tan nducu ndo cuhva tyaa yahvi ndo tsi ra naha tumaa tyaa yahvi ndo tsi ra Cristo.

<sup>6</sup> Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyi tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñi Nyoo tsihin tsa ñi iñi añima ndo.

<sup>7</sup> Jaha tyiñu ndo tsihin tsa si cuñi ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi.

<sup>8</sup> Tyin tsitó ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

<sup>9</sup> Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña siin caá iin nyivi tan inga ñi nuu ra.

*Tunyeé iñi tsa tsahá Nyoo tsi yo tsa yihí yo cuenda ra*

<sup>10</sup> Tan vityin ço ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra.

<sup>11</sup> Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu.

<sup>12</sup> Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi.

<sup>13</sup> Yacan cuenda jaha cuenda vaha ndo tsi ndo tsihin tandihi tsa jatyinyee Nyoo tsi yo. Tyin tacan tan cunyee iñi ndo quivi nducu cuhva nu ña vaha tsi ndo. Tan ña cua nduva ndo jaha nu.

<sup>14</sup> Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan çaça vaha ndo ityi tsa nditsa cuví ityi Nyoo tyin yacan cuví tsa tyasi yiqui nyica ndo tumaa iin andaru iyó

tsa tyasi yiqui nyica ra tan nduve náa taahán ra.

<sup>15</sup> Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi.

<sup>16</sup> Tan çasi vaha ndo tsi ndo tumaa tyasi ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo.

<sup>17</sup> Ra andaru iyó iin caa ndasi jiñi ra tan jacacú can tsi ra, tacan cuví tsa jacacú Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí li Nyoo tsi ndo.

<sup>18</sup> Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí li ra tsi ndo. Yacan cuenda ña ndu uvi iñi ndo tan ço nyito vaha ndo, ndaçan tahvi ndihí ndo tsi Nyoo tsa cuenda tandihí nyivi yihí cuenda ra.

<sup>19</sup> Tan ndaçan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi itsi.

<sup>20</sup> Tan tsa cuenda tsa jacotó yu tuhun ra Cristo, nyii yu vehe caa ihya vityin. Ndaçan tahvi ndo tsa cuenda yu, na ña nayuhvi yu, tan cahan yu cuhva taahán maa tsi cahan yu.

*Nu jacuhún ra Pablo tsi ra Tíquico nu yucú nyivi yihí cuenda ra Cristo*

<sup>21</sup> Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Ñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra.

<sup>22</sup> Jaquitsí yu tsi ra nu yucú ndo tyin jacoto ra tsi ndo náca iyó ndi ihya, tyin tacan tan ndu iin iñi ndo.

<sup>23</sup> Na cuhva Nyoo Jutu yo tan Jutu Mañi yo Jesucristo tsa taxin coo añima tandihí ra yañi yo naha ra tan na tsinu ca iñi ra naha tsi ra tan na cuñi ra naha tsi nyivi.

<sup>24</sup> Tan na nasoco xaan Nyoo tsi tandihí nyooho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.

Tan na cuví tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo ņuu Filipos,

*Nyii ra Pablo vehe caa, tan javaha ra iin carta tan jacuhun ra tsi nyivi yihí cuenda Nyoo ņuu Filipos*

<sup>1</sup> Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ņuu Filipos tan cuví ndo nyivi cuenda Nyoo tan iin ņi cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ņuhu naha ra, tan tsihin ra jahá tyiņu vehe ņuhu naha ra.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

*Nu tsicán tahvi ra Pablo tsa cuenda ņi yihí cuenda Nyoo ņuu Filipos*

<sup>3</sup> Tandihí ņi tsaha tsa nducuhún iņi yu tsi ndo, nacuhvá xaan yu tyahvi nyoo tsi Nyoo tsa cuenda ndo.

<sup>4</sup> Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sii cuñi añima yu.

<sup>5</sup> Tyin nda quivi jihna tsa tsiņi ndo tuhun ra Cristo tan nda vityin tan ņa jandihí ndo tsa jatinyeé ndo tsi yu. Tyin iin caa ņi jacotó yo tuhun ra Jesucristo tsi nyivi.

<sup>6</sup> Tsitó vaha yu tyin tumaa tsa quitsaha javahá Nyoo tsa vaha tsitsi añima ndo, tacan cua javaha ca ra nda cuanda quivi quitsi ra Jesucristo inga tsaha.

<sup>7</sup> Taahán tsi tsa caca iņi yu tacan tsa cuenda ndo, tyin cuñi xaan yu tsi ndo. Tyin iin caa ņi nasocó Nyoo tsi yo. Vasu ndi maa tsa nyii yu vehe caa ihya, tan vasu ndi maa cuhun yu nuu ra cumí tyiņu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyiņu naha ra, na coto ra naha tyin nditsa tuhun ra Cristo.

<sup>8</sup> Nyoo tsitó ra tyin cuñi xaan yu tsi tandihí nyooho tumaa tsa cuñi maa ra Jesucristo tsi ndo.

<sup>9</sup> Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iņi ndo tsi nyivi. Tan nacoó ca tsa nyityi Nyoo tsi ndo, tan cutuņi ca iņi ndo,

<sup>10</sup> tyin tacan tan cuví ņihi ndo tsa vaha tsi Nyoo. Tan ņa cua coo ca cuatyí ndo tan cuví coo vaha ndo tsihin tuhun Nyoo nda cuanda quivi quitsi ra Cristo.

<sup>11</sup> Maa ra cua jatinyeé tsi ndo. Tan tacan ņi cua javaha ndo maa ņi maa tsa vaha, tan

tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

*Maa ņi maa tyiņu Nyoo javahá ra Pablo tyin iyó ra Cristo añima ra*

<sup>12</sup> Yaņi, cuñi yu tsa coto ndo tyin tandihí tundoho taahán yu, jatinyeé xaan tsi tyin nducua ca nyivi tsinú iņi tuhun Nyoo.

<sup>13</sup> Tan tandihí andarú tsa iyó vehe ra cuví rey tan tandihí nyivi iyó ihya tsitó ņi tyin nyii yu vehe caa tsa cuenda tsa nyicún yu tsi ra Cristo.

<sup>14</sup> Tan cuaha xaan ra yaņi yo cuenda Jutu Mañi yo naá tsa yuuhvi ra naha tsa nyehé ra naha tyin jatinyeé Nyoo tsi yu nu nyii yu vehe caa. Yacan cuenda jaņihí ca ra naha caahán ra naha tuhun Nyoo tsihin nyivi.

<sup>15</sup> Tan nditsa tyin yihí ra naha, caahán ra naha tuhun ra Cristo tsa cuenda tyin cuñi ra cunyicun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa nņi iņi ra naha.

<sup>16-17</sup> Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyivi tyin nditsa tsa jacacú ra tsi yo. Tan tsa cuenda tsa cuñi ra naha tsi ra Cristo, yacan caahán ra naha tuhun ra. Maa tyin inga ra can naha ra ņavin tsa nņi iņi ra naha tan caahán ra naha tuhun ra Cristo, tyin cuñi ra naha na cunyicun cuaha nyivi tsi ra naha tan cuñi ra naha vacu nducu ra naha tsi yu nu nyii yu vehe caa ihya.

<sup>18</sup> Tan ņa ndihí iņi yuhu tatun juhva ra naha caahán ra naha tuhun ra Cristo tsihin tsa ņa nņi iņi ra naha. Maa tyin yuhu sii xaan cuñi yu tyin tuhun ra Cristo caahán tandihí ra naha, cuví ņi tsa nņi iņi ra naha caahán ra naha o ņavin.

Tan ndusi ca cuñi yu

<sup>19</sup> tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatinyeé xaan Tatyí li ra Cristo tsi yu.

<sup>20</sup> Tsitó vaha yu tyin Nyoo cua jatinyeé ra tsi yu tan ņa cua nducahan nuu yu, tan ņa cua nayuhvi yu cahan yu tuhun ra Cristo tsihin tsa nņi iņi yu. Tan ņa ndihí iņi yu, an coo ca yu ņayivi, o cúu yu, maa tyin cuñi yu cahan yu tuhun ra, tahan ņi cuhva tsa tuhvá yu caahán, na nyehe nyivi cuhva iyó yu tan coto ņi tyin ra Cristo cahnu xaan ra cuví ra.

<sup>21</sup> Tyin tsa cuenda yuhu ņayivi tsa iyó yu vityin, ņayivi ra Cristo cuví. Maa tyin tatun cúu yu, cua ņihi yu tsa sii caa tsa iyó gloria.

<sup>22</sup> Tan tatun coo ca yu, vaha xaan. Tyin tacan tan cuví jaņihí ca yu jahá tyiņu yu tyiņu Jutu Mañi yo. Tan cua cuví tsi tsa vaha tsa cuenda ra. Yacan cuenda ņa tsitó yu nda ityi cuhun yu, a cúu yu, a cuhun yu cucahan ca yu tuhun Nyoo tsihin nyivi, ņa tsitó yu.

<sup>23</sup> Yi# xaan cuñi yu tan quihin yu ndáa ityi cuhun yu tyin tsa cuñi yu cuhun yu cunyaa yu tsihin ra Cristo. Tyin vaha ca yacan.

<sup>24</sup> Maa tyin tsa cuenda nyooho, vaha ca tsa ña cúu naha yu tyin tacan tan cuví cun- yaa yu tsihin ndo tan coto ca ndo tuhun Nyoo.

<sup>25</sup> Yacan cuenda tsitó yu tyin cua ndoo yu juhva ca quívi ihya. Tyin cuñi tsi tsa jatyinyeé ca yu tsi ndo tan cuvi cuhun ndo ityi nuu ca tan cusii ca iñi ndo tsihin tsa tsinú iñi ndo tsi Nyoo.

<sup>26</sup> Tacan tan cua nyehe ndo tsi yu inga tsaha, tan sii xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

<sup>27</sup> Cuñi tsi tsa coo yo cuhva taahán tsi coo nyívi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñi yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyívi tuhun ra Cristo.

<sup>28</sup> Maa tyin nyívi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacú nyooho jahá Nyoo.

<sup>29</sup> Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo.

<sup>30</sup> Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehé yo tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

## 2

*Cuca xaan ra Cristo, maa tyin quítsi cúu ra tumaa iin ra ndaahvi*

<sup>1</sup> Nditsa tyin ra Cristo jandu iin xaan ra iñi yo tsa iin ñi cuví yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí Ii Nyoo tsihin yo. Tan nditsa tucu tsa ndaahvi cuñi yo nyehé yo tsi nyívi tahan yo. Tatun nditsa tandihi yacan,

<sup>2</sup> Cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñi ra Cristo tsi yo. Tan iin ñi juhva çaça iñi ndo. Tan iin ñi tsa vaha javaha ndo.

<sup>3</sup> Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyívi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyívi tan ñavin ca maa yo.

<sup>4</sup> Tan intuhun intuhun yo caca iñi yo tsa cuenda tsa vaha tsi inga nyívi, tan ñavin tsa cua jatyinyee tsi maa ñi maa yo.

<sup>5</sup> Çaça iñi yo tumaa tsicá iñi maa ra Cristo Jesús.

<sup>6</sup> Tyin nu quítsi tsi tsanaha tsa ndi cumañi ca quítsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá iñi ra tsa nacoo ra yacan.

<sup>7</sup> Tan tyaq tsiyo ra tandihi tunyee iñi ra tan tandihi tsa cuca ra. Tan quítsi ra nanduvj ra iin nyívi ndaahvi nu ñuhu ñayivi ihya quívi tsa cacú ra.

<sup>8</sup> Tan tsa nanduvj ra iin rayii, tan ndaahvi jahá ra tsi ra tan tyaq yahvi vaha ra tsi Nyoo nda cuanda tsahá ra tsa cahñi nyívi tsi ra nu cruu. Tumaa iin ra caquiiñi, tacan jahá ñi tsi ra, tan tahan ra ticanuu tyin tsahñi ñi tsi ra nu cruu.

<sup>9</sup> Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuví tan ñavin ca tandihi sivi.

<sup>10</sup> Tyin tatun tsiñi yo sivi ra Jesucristo, tandihi yo tan cua cuiñi tsiti yo. Tan tandihi tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihi yacan cua jacahnu tsi ra.

<sup>11</sup> Tyin tandihi tsa iyó, cua nacoto tan cua cahan tyin ra Jesucristo cuví ra ndacá ñaha tsi tandihi maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

*Nyívi yihí cuenda Nyoo cuví ñi tumaa iin ñuhu tsa jandunditsin nu ñuhu ñayivi ihya*

<sup>12</sup> Yacan cuenda, yañi tsa cuñi xaan yu, tumaa tsa tyaq yahvi ndo tsi yu quívi tsa tsinyii yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañi nyii yu vityin. Nducu ndo cuhva na nyehe nyívi tyin nditsa tsa jacacú Nyoo tsi yo. Tan jaha vaha ndo cuenda cuhva coo ndo tsihin ra.

<sup>13</sup> Tyin maa Nyoo tyihj tsa vaha añima ndo. Tan jatyinyeé ra tsi ndo tyin tacan tan cuví tyaa yahvi ca ndo tsa caahán ra tan javahá ndo cuhva cuñi ra.

<sup>14</sup> Tatun cua javaha ndo náa tsa cua javaha ndo, nducu jihna ndo cuhva tsa ña cahan yuhu tahan ndo. Tan ña cañi tahan ndo.

<sup>15</sup> Tacan tan ña cua coo cuatyí ndo. Taahán tsi cuví ndo nyívi cuiñi iyó, taahán tsi cuví ndo nyívi nduve cuatyí, tumaa tsa taahán tsi coo nyívi cuenda Nyoo tyañu nyívi caquiiñi ihya. Cuñi tsi tsa cuví ndo tumaa iin ñuhu tsa jandunditsin nu naa nu ñuhu ñayivi ihya.

<sup>16</sup> Cahan yo tuhun Nyoo tsihin nyívi tyin yacan tsahá ñayivi nyito tsa iyó yo. Javaha ndo tacan, tan quívi cua quítsi ra Cristo, yuhu ñi vaha cua cuñi yu tsa cuenda ndo, tyin ña jacotó cuatu yu tuhun Nyoo tsi ndo.

<sup>17</sup> Tan vasu cahñi nyívi tsi yu tsa catyi tuhun Nyoo, maa tyin cua cuví tsi iin tsa cua jamañi yu tsi Nyoo tan tsihin tsa tsinú iñi

ndo tsi ra. Tan iin caa ñi cusii iñi yo tshin ra.

<sup>18</sup> Tan yacan cuenda taahán tsi tsa cusii iñi ndo tshin yu.

*Nu jacuhun ra Pablo tsi ra Timoteo tan ra Epafrodito ñuu Filipos*

<sup>19</sup> Taton Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsa ra inga tsaha nu nyii yu sii xaan cua cuñi yu. Tyin cua nacatyí tuhun ra tshin yu nácaa yucú ndo.

<sup>20</sup> Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan.

<sup>21</sup> Tyin tandihi ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús.

<sup>22</sup> Maa tyin tsitó ndo tyin ra Timoteo, vaha cuahán ra tshin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tshin nyivi.

<sup>23</sup> Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyiñu, tatun ña naha ca cunyii yu ihya.

<sup>24</sup> Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

<sup>25</sup> Tan ra Epafrodito, yañi yo tsa jaquitsi ndo tsa jatyinyeé tsi yu tshin tyiñu tsa javahá yu, iin caa ñi cuví ndi andarú ra Cristo tshin ra. Tan vityin cua jaquitsi nuhu yu tsi ra inga tsaha nu yucú ndo.

<sup>26</sup> Cuñi xaan ra quitsi nuhu ra nu yucú ndo, tyin tsicá xaan iñi ra tsa tsitó ndo tyin nacuhví ra.

<sup>27</sup> Ndiitsa ñihi xaan nacuhví ra tan tsa cua cúu maa ra cuví. Maa tyin Nyoo cundahví iñi tsi ra, tan tsi tucu yuhu tyin na ña nducuihya xaan ca iñi yu.

<sup>28</sup> Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra.

<sup>29</sup> Yacan cuenda, naquihin ndo tsi ra tshin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra.

<sup>30</sup> Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhví xaan ra, maa tyin ña cuñi ra jandhi ra tsa jatyinyeé ra tsi yu. Tyin maa ndo ña cuví quitsi ndo tan jatyinyeé ndo tsi yu tyin cañi xaan yucú ndo.

### 3

*Nu janahá ra Pablo nácaa nduvaha yo nuu Nyoo*

<sup>1</sup> Tan vityin yañi, cusii iñi ndo tshin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi.

<sup>2</sup> Jaha ndo cuenda tsi ndo tshin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo.

<sup>3</sup> Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tshin Tatyí Íi ra tsa iyó añima yo. Tan cusii iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tshin náa cunyaa cuñu ñuhu yo.

<sup>4</sup> Tun tsatyin nditsa tsa cuví cacu yo tshin tsa javahá yo yacan, jihna ca yuhu tsa yaha cacu tan ñavin ca tandihi ra tsa javahá yacan vityin.

<sup>5</sup> Tyin una quivi yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihi yu. Juvín ñi tata nyivi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quivi can, tyin ra fariseo cuví yu.

<sup>6</sup> Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yihí cuenda ra Cristo. Tan tyaa yahvi yu tandihi maa ley tsahnu, tyin nducú xaan yu cuhva tyaa yahvi yu tsa caahán ley can.

<sup>7</sup> Maa tyin tandihi tsa cuñi maa yu tyin cahnu xaan cuví quivi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu.

<sup>8</sup> Tan inga tucu tuhun, tandihi tsa javahá yu, tsitó maa yu tyin nduve ca yahvi nyaá yacan tyin tsa nacotó yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihi tsa javahá yu quivi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihi can. Tyin cuñi yu coto vaha ca yu tsi ra Cristo.

<sup>9</sup> Tan cuñi yu ndu iin ca yu tshin ra. Tsinú iñi yu tyin jacacú ra tsi yu, yacan cuenda nduvaha iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihin cuenda ra tsi yo.

<sup>10</sup> Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandotó ra tsi ra Cristo tshin tunyee iñi ra. Tan cuñi yu tyin coo ca tunyee iñi can tsi yu. Tan cuñi yu cunyee iñi yu tundoho tsa taahán

tsi nyehé yu tsa cuenda ra. Tan cuñi yu nacuhva cuenda yu tsi yu tumaa maa ra Cristo nacuhva cuenda ra tsi ra tan tsihi ra.

<sup>11</sup> Tyin nducú xaan yu cuhva nandoto yu tsa yaha cúu yu.

*Nacaa cunyicun ñihi ca yo tsi Nyoo*

<sup>12</sup> Ña catyi yu tyin nduve ca tsa cumañi tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu.

<sup>13</sup> Yañi, ña catyi yu tsihin ndo tyin tsa ñihi yu tandihi tsa vaha can. Maa tyin iyó intuhun ñi tsa javahá yu; nacoó yu ityi tsata tandihi tsa javahá yu, tan jañiñi yu cuhun yu ityi nuu ca.

<sup>14</sup> Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyi ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

<sup>15</sup> Tacan taahán tsi caca iñi tandihi nyivi tsa ñihi nyaá tsihin Nyoo. Maa tyin tatun ñavin tacan tsicá iñi ndáa nyooho, Nyoo cua cuhva ra tsa cutuñi iñi ndo.

<sup>16</sup> Maa tyin iyó iin tsa cuñi tsi tsa tyaa yahvi vaha yo, tuhun tsa tsa yaha jacoto Nyoo tsi yo.

<sup>17</sup> Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyivi iyó cuhva janahá ndi tsi tandihi nyivi.

<sup>18</sup> Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihya cuñi yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihi ra Cristo nu cruu jahá ra naha.

<sup>19</sup> Maa tyin quivi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñi cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihya.

<sup>20</sup> Maa tyin yoo nda gloria cuví nu iyó ñuu yo. Tan ndatú yo quivi quitsi nyico Jutu Mañi yo Jesucristo, ra jacacú tsi yo.

<sup>21</sup> Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihi tsa iyó.

#### 4

*Tacan ñi maa na cusii iñi yo tsihin Jutu Mañi yo*

<sup>1</sup> Yañi, cuñi yu tsi ndo. Tan cuñi xaan yu nyehe yu tsi ndo. Sii xaan cuñi yu tsihin ndo. Tan tsitó yu tyin ña cahan cuatu yu

tuhun Nyoo tsihin ndo. Tyin ñi xaan iñi ndo nyicún ndo tsi ra. Tan jañihi ca ndo cunyicun ndo tsi ra.

<sup>2</sup> Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñi Jutu Mañi yo.

<sup>3</sup> Tan yooho, yañi, tsa iin caa ñi jahá tyiñu tsihin yu, cuñi yu tyin jatinyee un tsi ñi cuhva yo ihya. Tyin juvin ñi jatinyee xaan tsi yu nu cahan yu tuhun Nyoo, maa tyin ñavin intuhun ñi yu jatinyee ñi, tyin jatinyee ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

<sup>4</sup> Cusii iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusii iñi ndo tsihin ra.

<sup>5</sup> Coo vaha ndo tyin tacan tan nyehe tandihi nyivi tyin nditsa tyin nyivi vaha cuví ndo. Tan nducuhun iñi ndo tyin tsa yatyin cua quitsi Jutu Mañi yo.

<sup>6</sup> Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihi tundo ho tsa iyó ndo. Tan ndacan ndo tsi ra nacuhva ra tandihi tsa tsiñi ñuhu tsi ndo. Tacan tan ña nacoó ndo tsa tsahá ndo tyahvi nyoo tsi ra.

<sup>7</sup> Tan Nyoo cua cuhva ra tsa taxin coo añima ndo. Tan cahnu xaan tsa vaha cuví yacan. Tan yoñi cuví cutuñi iñi nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

*Na caca iñi yo maa ñi maa tsa vaha*

<sup>8</sup> Nu cua ndihi tuhun, yañi, çaça iñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca iñi ndo tsa caquiñi. Çaça iñi ndo tsa sii caa, maa ñi tsa vaha, tan maa ñi cuhva cuví jacahnu ndo tsi Nyoo.

<sup>9</sup> Javaha ndo tsa jacuahá yu tsi ndo. Tuhun tsa cahan yu tsiñi ndo, tan tsa javahá yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

*Nu jatinyee nyivi ñuu Filipos tsi ra Pablo tsihin tsa iyó tsi ñi*

<sup>10</sup> Sii xaan cuñi yu. Tan jacahnú yu tsi Jutu Mañi yo tsa cuenda tsa jatinyee xaan ndo tsi yo inga tsaha. Tan tsitó yu tyin ndihi ñi tsaha tan cuñi ndo jatinyee ndo tsi yu. Maa tyin tsicoo juhva quivi ña tsahá tsi cuhva tsa jatinyee ndo tsi yu.

<sup>11</sup> Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhva maa yu tsa cusii iñi yu tsihin náa tsa iyó tsi yu.

<sup>12</sup> Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa

caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha.

<sup>13</sup> Tandihí tan cuví jaha yu tshin tunyee ifi tsa tsahá ra Cristo tsi yu.

<sup>14</sup> Tan nyooho yañi, vaha xaan tsa javaha ndo tyin jatyinyee ndo tsi yu quivi tsa tsicoo yu tundo.

<sup>15</sup> Tsa tsitó nyooho nyivi Filipos nácaa cuvi quivi quitsaha caahan yu tuhun Nyoo tshin ndo. Tacan tan quee yu Macedonia nu iyó ndo tan cuahan yu cua jacoto yu tuhun Nyoo inga ñuu. Tan nyooho cuvi nyivi tsa jatyinyee tsi yu tshin xuhun, tyin vaha xaan cuñi ndo tsa cahan yu tuhun Nyoo tshin ndo.

<sup>16</sup> Tan tsitsi tsa nyii yu ñuu Tesalónica, ñavin intuhun ñi tsaha jatyinyee ndo tsi yu.

<sup>17</sup> Ñavin tsa tsicá ifi yu tsa jatyinyee ndo tsi yu, tyin tsa cuñi yu tsa jatyinyee ndo tshin tyiñu Nyoo, tacan tan cuaha ca cua nasoco Nyoo tsi ndo.

<sup>18</sup> Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tshin ra Epafrodito. Tan tsa tsaha ndo can cuvi tsi tumaa xico tami, xico vaha tsa tsaá nuu Nyoo. Yacan cuvi tsa taahan ifi ra.

<sup>19</sup> Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo.

<sup>20</sup> Na jacahnu yo tsi Nyoo Jutu yo tacan ñi maa. Tan na cuvi tsi tacan ñi.

*Nu jacuhún ra Pablo nacumi tsi nyivi ñuu Filipos*

<sup>21</sup> Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsí tucu ra yañi yo tsa yucú tshin yu ihya nacumi tsi ndo.

<sup>22</sup> Tan nyivi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyivi yihí cuenda Nyoo ñuu ihya jaquitsí ñi nacumi tsi ndo.

<sup>23</sup> Na nasoco maa Jutu Mañi yo Jesucristo tsi tandihí ndo.

Tan na cuvi tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Nuu Colosas

*Nu quitsaha javahá ra Pablo carta*

<sup>1-2</sup> Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

*Nu tsicán tahvi ra Pablo tsa cuenda nyivi yihí cuenda ra Cristo*

<sup>3</sup> Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo.

<sup>4</sup> Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo.

<sup>5</sup> Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo.

<sup>6</sup> Tan juvin ñi maa tuhun ra Cristo tsa cahán ra Epafras tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cua ha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsitó ndo tyin nditsa tsa cuñí Nyoo tsi ndo.

<sup>7</sup> Yacan janahá ra Epafras tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo.

<sup>8</sup> Tan juvin ra catyi tuhun tsihin ndi tyin cuñí xaan ndo tsi nyivi tahan ndo, tyin maa Tatyí li Nyoo tsahá tsa vaha can coo aña ndo.

<sup>9</sup> Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí li ra tan coto vaha ndo ná ndihí tsa cuñí ra tyin javahá ndo.

<sup>10</sup> Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra.

<sup>11</sup> Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó

tsi ra tan ña cundihí iñi ndo tsa yaha ndo tandihí tundoho, tan na cusii iñi ndo.

<sup>12</sup> Tan na cuhva ndo tyahvi nyoo tsi Nyoo Jutu yo, tyin maa ra tsa janduvahá ra tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catyi nyivi tsa cuiti iyó nuu ra.

<sup>13</sup> Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo.

<sup>14</sup> Tan jaha ra tsi yo tsihin ñihí Sehe ra tan jaha ra tucahnu iñi tsi yo.

*Tsa cuenda tsa tsihi ra Cristo nu cruu tsacatyí cuatyí yo tan nduvahá iyó yo tsihin Nyoo*

<sup>15</sup> Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinu ñuhu ñayivi tan tsa iyó maa ra Cristo.

<sup>16</sup> Tan maa ra javahá tandihí tsa iyó andivi tan nu ñuhu ñayivi jahá Nyoo. Javahá ra tsa cuví nyehe yo tan tsa ña cuví nyehe yo. Javahá ra tandihí tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihí yacan javahá ra tyin cuatyíñu ra cuhva cuñí ra.

<sup>17</sup> Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra.

<sup>18</sup> Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandotó tsa jiñha ca, tyin tacan tan quihí ndaha ra tandihí tsa iyó.

<sup>19</sup> Tyin Nyoo cuñí ra tsa cuví ra Cristo tumaa cuví maa ra.

<sup>20</sup> Tan tsahá ra tsi ra Cristo tsa cúu ra nu cruu tyin tacan tan cuví coo vaha tandihí tsa iyó tsihin ra, tahan ñi tsa iyó nu ñuhu ñayivi tan andivi.

<sup>21-22</sup> Tahan tsanaha javahá ndo tsa ña vaha tan xaan cuñi ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsahá cuenda ra cuñu ñuhu ra tan tsihi ra nu cruu. Tan janacoó vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra.

<sup>23</sup> Yacan cuenda jañihí ca ndo tsinú iñi ndo. Tan cuita iñi ndo tyin cua tsa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tani cahnu ñuhu ñayivi. Tan yuhu ra Pablo jatyinyee yu caahán yu tuhun ihya tsihin nyivi.

*Nu catyi ra Pablo tyin nyaá siqui ra tsa janahá ra tuhun ra Cristo tsi tandihí nyivi tsicá vehe ñuhu*



<sup>24</sup> Vityin sii cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehé ra tsa cuenda yo tsa cuví yo cuñu ñuhu ra. Tacan tan cua jaquita ndihi yu tundoho tsa nyehé ra.

<sup>25</sup> Yuhu cuví iin ra caahán tuhun ra Cristo tyin tacan jatyinyee yu tsi tandihí nyivi yihí cuenda ra. Tyin maa ra Nyoo catyí tsa cahan yu tandihí tuhun ra tsa cuenda tsa vaha tsi ndo.

<sup>26</sup> Jacuahá yu tuhun tsa tsicumj xeehe Nyoo tañan tsanaha, tsa ndi cumañi ca javahá ra ñuhu ñayivi. Tan vityin tsahá ra tsa nacoto nyivi yihí cuenda ra itsi.

<sup>27</sup> Tan nyooho tsa ñavin nyivi Israel cuví cuñi ndihi ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

<sup>28</sup> Tuhun maa ra Cristo caahán ndi. Tan tsahá cuenda ndi tuhun ihya tsi tandihí nyivi. Tan jacuahá ndi tsi tandihí ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo.

<sup>29</sup> Tan tsa cuenda tsa cuñi yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

## 2

<sup>1</sup> Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihí ndo tan tsa cuenda nyivi ñuu Laodicea, tan tsa cuenda tandihí nyivi tsa ñaha ca nyehe tsi yu.

<sup>2</sup> Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsj ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumj xeehe Nyoo tañan tsanaha, tan vityin jacotó ra itsi tsi yu.

<sup>3</sup> Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo.

<sup>4</sup> Caahán yu tyehen tsihin ndo tyin tacan tan ña jandaví ñaha nyivi tsi ndo tsihin tuhun tsa sii natuhún ñi.

<sup>5</sup> Vasu nduve yu nyii tsihin ndo, maa tyin ñuhú xaan iñi yu tsi ndo. Tan sii xaan cuñi yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

<sup>6</sup> Yacan cuenda tumaa natsinú iñi ndo tsi ra Cristo quivi nañihj ndo tsi ra, tacan cuñi tsi coo ndo tsihin ra.

<sup>7</sup> Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhva ndo. Tan iin nyita ñi nacuhvá ndo tyahvi nyoo tsi Nyoo.

*Ñayivi nyito tsa tsahá ra Cristo tsi yo*

<sup>8</sup> Jaha ndo cuenda tsi ndo coto jandaví ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñu iñi ñi cuhva tsicá iñi nyivi.

<sup>9</sup> Yacan ña tsinu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi.

<sup>10</sup> Tan tsitú ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihí tsa ndacá ñaha nu ñuhu ñayivi tan tandihí tatyí tsa ña nyehé yo.

<sup>11</sup> Tan tsa iin ñi cuví ndo tsihin ra Cristo, nda quivi natsinú iñi ndo tsi ra, tan nanduvj ndo nyivi ra. Maa tyin ña nanduvj ndo nyivi ra tsa cuenda tsa tsinyaq tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaq ra Cristo tsi ndo:

<sup>12</sup> Quivi tsicoondutyá ndo tsitsi ndutyaa, tumaa tsa tsiñi ndo tsihin ra Cristo tan quihvi ndo tsitsi ñuhu cuví can. Tacan tan nandotó tucu ndo tsihin ra tyin tsinú iñi ndo tyin Nyoo janandotó tsi ra tsihin tunyee iñi ra.

<sup>13</sup> Tahán tsanaha cuví ndo tumaa nyivi tsiñi jahá cuatyí ndo, tyin nduve Nyoo nyaá añima ndo tan ña tsinyaq tuñi Nyoo cuñu ñuhu ndo. Maa tyin vityin Nyoo jahá ra tucahnu iñi tandihí cuatyí ndo. Tan tsahá ra tsa coo ndo ñayivi nyito tsihin ra Cristo.

<sup>14</sup> Tyin ley tsahnu jaquitivj tsi cuatyí yo. Tan catyí tsi tyin taahán tsi cuhun yo anyaya tyin ña tyaá tahvi yo itsi. Maa tyin ra Cristo tsiñi ra nu cruu jahá Nyoo tan tsindihí tsa cuhun yo anyaya.

<sup>15</sup> Tan tsa tsiñi ra nu cruu jahá canaa ra tsi nu ña vaha tan tandihí ca tatyí ña vaha tsa ndacá ñaha. Tacan tan tsindaca ra tsi nu nuu tandihí nyivi tan nuu ángel tyin na nyehe ñi tyin cahnú ca cuví maa ra, yacan cuenda jahá canaa ra.

*Na nanducú yo tsa vaha tsa tsahá Nyoo*

<sup>16</sup> Yacan cuenda ña taahán tsi tyaá nyivi cuatyí tsi ndo tsa cuenda tsa tsatsí ndo a tsa cuenda tsa tsiñi ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi.

<sup>17</sup> Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yaha quitsj ra, tan juvin ra jacacú tsi yo.

<sup>18</sup> Ña cuhva ndo tsa casi nyivi nu naquihin ndo tsa tsahá Nyoo tsi ndo. Tyin ndaahvi

jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can.

<sup>19</sup> Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñí maa Nyoo.

<sup>20</sup> Tumaa tsa tsihj cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenta tyin iyó ca ndo tumaa iyó nyivi tsa ña nacotó tsi Nyoo? Tan tyaá yahví ndo tsa caahán ñi tsa javahá tuhun tsahnú.

<sup>21</sup> Tyin catyí ñi tsihin ndo tyehen: “Ña tiin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo.

<sup>22</sup> Maa tyin ña taahán tsi casi ñi nu javahá ndo yacan tyin tsa jacuahá ñi, maa ñi tsa tsicá iñi nyivi cuví can. Tyin tsa tsatsi yo tsa iin yaha ñi cuví can, tan ña cuví jativi can tsi ndo nuu Nyoo.

<sup>23</sup> Ñi tsa javahá tandihí can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

### 3

<sup>1</sup> Tshah Nyoo ñayivi nyito coo yo tyin nandoto ra Cristo, tan vityin nyaá ra xiin cuaha Nyoo nda gloria. Yacan cuenda nangduco ndo tsa vaha tsa tshah ra tsi yo.

<sup>2</sup> Çaca iñi ndo yacan, tan ña çaca xaan iñi ndo tuhun tsa iyó nu ñuhu ñayivi ihya.

<sup>3</sup> Tyin vityin ña javahá ca ndo tsa javahá ndo tshah tsanaha, tyin tsa tsihj ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo.

<sup>4</sup> Tan quivi cua quitsi nyico ra Cristo, ra tsa tshah ñayivi nyito tsa iyó yo, tacan tan cua nyehé nyivi tyin maa ra cahnu ca cuví ra. Tan cua nyehé tucu ñi tsi nyooho iin caa ñi tsihin ra.

*Nacaa tsicoo yo nu quitsi tsi ityi tsata tan nácaa cuñí tsi coo yo tsihin Nyoo vityin*

<sup>5</sup> Yacan cuenda jandihí ndo tandihí tsa ña vaha tan tsa caquiñi tsa cuñí cuñu ñuhu ndo. Tan ña çusu ndo tsihin iin ñaha tun ñaha ca tindaha ndo, tahan ñi rayi tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña yihí tuhun Nyoo, maa tyin nyooho ña taahán tsi javaha ndo tacan.

<sup>6</sup> Tsa cuenda tandihí tsa caquiñi ihya cuxaán xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi.

<sup>7</sup> Tan juvin ñi tacan javahá tucu maa yo quivi tsa ña nacotó yo tsi Nyoo.

<sup>8</sup> Maa tyin vityin ña javaha ca ndo tandihí tsa ña vaha can: ña cuxaan ca ndo. Ña xaan cuñi ndo nyehé ndo tsi nyivi tahan ndo, tan ña jacuñi nyaan ndo tsi ñi, tan ña çahan ndo cuendu siqui ñi. Tan ña çahan ca ndo tsa ndavaha ñi.

<sup>9</sup> Ña çahan tahan ca ndo cuendu siqui iin ndo tan inga ndo. Tyin tsa nacoo ndo tandihí tsa ña vaha tsa javahá ndo tshah tsanaha.

<sup>10</sup> Tyin vityin tsa nanduví yo nyivi tsaan iyó yo ñayivi nyito. Tan ndutsaá ca yo tumaa caá Nyoo, ra javahá tsi yo, nda cuanda coto vaha ca yo tsi ra.

<sup>11</sup> Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihí yo tsihin ra Cristo, tyin maa ra cuví tandihí tan iyó ra tsihin tandihí yo.

<sup>12</sup> Nyoo cuñi ra tsi yo tan nacatsi vaha ra tsi yo tyin cuví yo nyivi ra. Yacan cuenda coo ndo ñayivi nyito tumaa taahán tsi coo nyivi yihí cuenda ra; çundaahvi iñi ndo nyehé ndo tsi nyivi tahan ndo; cuví ndo nyivi vaha tan ndaahvi jaha ndo tsi ndo nuu Nyoo; ndumasu ndo; çunyeey iñi ndo nyehé ndo tandihí tsihi tan tundoho tsihin tsa sii cuñi ndo.

<sup>13</sup> Ña çundihí iñi ndo tsihin nyivi tahan ndo. Jaha ndo tucahnu iñi tsi ñi tatun náa javahá ñi tsi ndo. Tumaa ra Cristo jahá ra tucahnu iñi tsi maa ndo, tacan cuñí tsi javahá tucu maa ndo tsihin nyivi.

<sup>14</sup> Tyin tsa cuñí tahan yo tsi yo, yacan cuví tsa ñiñi ca cuñí tsi. Tyin yacan cuví tsa jandu iin tsi yo.

<sup>15</sup> Tan çuhva ndo tsa cundaca ñaha tsa taxin Nyoo añima ndo, tan na jaquihin ityi tsi tsi ndo. Tyin tsa cuenda yacan, cana Nyoo tsi ndo tan jandu iin ra tsi ndo tsihin ra Cristo. Tan çuhva ndo tyahvi nyoo tsi Nyoo.

<sup>16</sup> Tan na cutu añima ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iin tahan ndo iñi ndo tsihin tandihí tsa tsiñi tuñi tsa tshah Nyoo tsi ndo. Çata ndo yaa tan salmo. Tan çata ndo yaa tsa tshah Tatyí Ii Nyoo tsi ndo tsihin tsa nii iñi añima ndo. Tan tacan ñi naçuhva ndo tyahvi nyoo tsi Nyoo.

<sup>17</sup> Tatun náa tyiñu cua javaha ndo, o náa cua çahan ndo, javaha ndo can tsihin sivi Jutu Mañi yo Jesús. Tan juvin ñi çuhva

can nacuhva ndo tyahvi nyoo tsi Nyoo tsa cuenda maa ra Cristo.

*Nu tsahá cuenda ra Pablo nácaa nducúyo cuhva coo vaha yo tsihin nyivi*

<sup>18</sup> Nyooho tsa iyó yíi cūhva ndo tsa cundaca ñaha yíi ndo tsi ndo. Tacan taahán tsi coo ndo, tyin yihí ndo cuenda Jutu Mañi yo.

<sup>19</sup> Tan nyooho rayii, cuñi ndo tsi ñasihi ndo. Tan ña cundihí iñi ndo nyehé ndo tsi ñi.

<sup>20</sup> Nyooho tsa nyihi tyaa yahvi ndo tsi jutu ndo tan tsi sihi ndo, tyin sii xaan cuñi Jutu Mañi yo tun javahá ndo tacan.

<sup>21</sup> Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi.

<sup>22</sup> Tan nyooho tsa cuví musu, tyaa yahvi ndo tsi ra yihí ndaha tsi ndo. Ñavin tsa nyehé ñi ra tsi ndo tan tyaa yahvi ndo tsi ra naha, tan catyi ra naha tyin vaha xaan ndo. Tyaa yahvi nyooho tsi ra naha tsihin tsa nii iñi añima ndo vasu ña nyehé ra naha, tyin Nyoo nyehé ra.

<sup>23</sup> Tandihí ñi tyiñu javahá ndo, javaha ndo can tsihin tsa sii cuñi ndo tumaa tsa jahá tyiñu ndo cuenda Jutu Mañi yo tan ñavin cuenda nyivi.

<sup>24</sup> Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa.

<sup>25</sup> Tan taton javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihí yo tan inducu ñi caá yo.

#### 4

<sup>1</sup> Nyooho tsa iyó musu, cuñi tsi cuví ndo nyivi vaha tsihin musu ndo. Nducuhun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

<sup>2</sup> Ndācan tahvi ndo tsihin tsa níi iñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihí maa.

<sup>3</sup> Ndācan tahvi ndo tsa cuenda ndi, tyin na nuña Jutu Mañi yo añima nyivi tan tyaa soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyíi yu vehe caa.

<sup>4</sup> Ndācan tahvi ndo tsa cuenda yu na cuví jacuaha yu tsi nyivi cuhva cuví cutuñi vaha iñi ñi tuhun ra Cristo, tumaa taahán maa tsi javahá yu.

<sup>5</sup> Cuiti coo ndo tsihin nyivi tsa ña yihí tuhun Nyoo, tyin tacan tan cuví cahan ndo tuhun Nyoo tsihin ñi.

<sup>6</sup> Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo taton nducu tuhun ñi náa nducu tuhun ñi tsi ndo.

*Nu tsahá ra Pablo nacumi tsi nyivi yihí cuenda Nyoo ñuu Colosas*

<sup>7</sup> Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu.

<sup>8</sup> Yacan cuenda jaquitsí yu tsi ra nu yucú ndo na jandu iin ra iñi ndo tan catyi tuhun ra tsihin ndo nácaa yucú ndi.

<sup>9</sup> Tan vatsí ndihí ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñi xaan yo tsi ra. Cua catyi tuhun maa ra naha tsihin ndo tandihí tsa cuví nu nyíi yu ihya.

<sup>10</sup> Ra Aristarco, ra nyíi tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun tsaa ra Marcos nu yucú ndo, vaha cahan ndo tsihin ra.

<sup>11</sup> Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihí ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha iñi yu.

<sup>12</sup> Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihí cuhva cuñi ra.

<sup>13</sup> Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis.

<sup>14</sup> Vatsí tucu nacumi tsi ndo jahá ra Lucas, ra tsa cuví doctor tsa cuñi xaan yo, tan ra Demas tucu.

<sup>15</sup> Cūhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cūhva ndihí ndo nacumi tsi ña Ninfas tan tsi tandihí nyivi yihí cuenda Nyoo tsa ndu iin yuvehe ña.

<sup>16</sup> Taton cuendi cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihí ñi itsi. Tan na cuhva ñi carta tsa jacuhun yu tsi ñi, cahvi ndo.

<sup>17</sup> Cahan ndo tsihin ra Arquipo tan catyi ndo: “Javaha vaha tyiñu tsa tsahá Jutu Mañi yo tsi un tyin javaha un.”

<sup>18</sup> Yuhu ra Pablo tyaá yu nacumi ihya tsi ndo. Na ña naa iñi ndo tyin nyíi yu vehe caa tsa cuenda ra Cristo. Tan na nasoco Nyoo tsi ndo.

Tan na cuví tsi tacan ñi.

## Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

*Nu tyaq ra Pablo tan ra cutahán tsihin ra iin carta cuenda nyivi yihí tuhun Nyoo*

<sup>1</sup>Yuhu ra Pablo ra Silvano tan ra Timoteo, jaquitsi ndi carta ihya tsi ndo tsa cuvi ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo aña ndo.

*Vaha xaan tsinú iñi nyivi Tesalónica tsi Nyoo*

<sup>2</sup>Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo.

<sup>3</sup>Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñi ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua kuhva Jutu Mañi yo Jesucristo tsi ndo.

<sup>4</sup>Tyin tsitó ndi tyin Nyoo cuñi xaan ra tsi ndo, nyooho yañi, tan maa ra nacatsj vaha tsi ndo.

<sup>5</sup>Tyin quivi cahán ndi tuhun Nyoo, nácaa jacacú ra tsi yo, tsihin ndo, cahán ndi tuhun tsihin tunyee iñi Tatyí li Nyoo, tan tsitó vaha ndi tyin tuhun nditsa cuvi tsi. Tan ñavin tuhun caahán ñi cuvi tsi. Tan nyehe ndo nácaa tsicoq ndi quivi tsiyucú ndi tsihin ndo. Tsicoq ndi tacan tsa cuenda tsa vaha tsi maa ndo.

<sup>6</sup>Tan quitsahá iyó ndo kuhva iyó ndi, tan kuhva iyó Jutu Mañi yo. Tyin naquihñ cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin si xaan cuñi ndo tyin maa Tatyí li tsahá can tsi ndo.

<sup>7</sup>Tan tsa tacan iyó ndo, jatyinyeé xaan ndo tsi tandihí nyivi yihí cuenda Nyoo tani cahnu Macedonia tan tani cahnu Acaya ihya, tyin nyehé ñi kuhva iyó ndo tsihin Nyoo.

<sup>8</sup>Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñi tsi cahan ndi tuhun Nyoo tsihin ñi.

<sup>9</sup>Tyin juvin ñi maa ñi nacatyí tuhun tsihin ndi nácaa tsa vaha xaan naquihñ cuenda ndo tsi ndi. Nacatyí tuhun ndihí tucu ñi

tsihin ndi nácaa jandihí ndo tsa jacahnú ndo tsitoho tan quitsahá jahá tyiñu ndo tyiñu Nyoo nyito.

<sup>10</sup>Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ícan cuvi ra tsa janandotó Nyoo. Tan maa ra cuvi ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

## 2

*Tyiñu jahá ra Pablo ñuu Tesalónica*

<sup>1</sup>Nyooho yañi, tsitó ndo tyin ñavin tsa cuatu quitsj ndi cahán ndi tuhun Nyoo ñuu ndo.

<sup>2</sup>Tyin tsitó ndo nácaa nyehe ndi tundoho jahá nyivi ñuu Filipo tsa ndi cumañi ca tsaq ndi ñuu ndo. Tan vasu nyehe xaan ndi tundoho ñuu can, maa tyin quivi tsaq ndi ñuu ndo cahán ndi tuhun Nyoo tsihin ndo tsihin tsa ña yuuhvi ndi. Tan vasu xaan xaan cuñi nyivi ñuu ndo, maa tyin jatyinyeé xaan Nyoo tsi ndi tan ñi iñi ndi jacotó ndi tsi ndo kuhva jacacú ra tsi yo.

<sup>3</sup>Tyin tuhun tsa tsahá cuenda ndi tsi ndo maa ñi maa tsa nditsa cuvi tsi. Tan nduve tsa caquñi tsicá iñi ndi. Tan ndi ñavin tsa cuñi ndi jandavi ñaha ndi tsi ndo.

<sup>4</sup>Nduve tsa ña vaha cahán ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñi ndi tsa vaha cahán nyivi tuhun ndi, maa tyin cuñi ndi tsa vaha cahán Nyoo tuhun ndi, tyin maa ra nyehé ra kuhva iyó yo.

<sup>5</sup>Tan tsitó ndo tyin ndi iin tsaha tan ña cahán ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cahán ndi tuhun Nyoo tsihin ndo. Maa Nyoo cuvi tsandaa tyin nditsa tsa caahán ndi ihya.

<sup>6</sup>Tan ndi iin tsaha ña nducú ndi kuhva jacahnu nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi.

<sup>7</sup>Tan vita cahán ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyinyeé ndi tsi ndo.

<sup>8</sup>Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi kuhva ndi tsi ndo, tyin cuñi ndi kuhva tucu ndi nda cuanda ñayivi iyó ndi tsa cuenda tsa cuñi ndi tsi ndo.

<sup>9</sup>Nyooho yañi, nducuhún iñi ndo nácaa jahá tyiñu ndi tan tsatsj ndi quivi tsiyucú ndi tsihin ndo. Jahá tyiñu ndi tsinu cahñi tan

tsacuaa tyin ña cuñí ndi jatyañu ndi tsi ndo tsitsi tsa caahán ndi tuhun Nyoo tsihin ndo.

<sup>10</sup> Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quivi tsiyucu ndi tsihin ndo tsa cuví ndo nyivi tsinú ñi tsi ra Cristo. Maa tyin maa ñi maa kuhva cuñí Nyoo javahá ndi, tan yacan cuenda ña cuví cahan ndo tsi ndi.

<sup>11</sup> Tan tsitó tucu ndo nácaa jandu iin ndi ñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee ñi tsi ndo tumaa iin rayi tsa iyó sehe tsahá ra tunyee ñi tsi sehe ra.

<sup>12</sup> Tan catyí ndi tsihin ndo, catsi cgo ndo tumaa taahán tsi coo nyivi yihí cuenda Nyoo. Tyin maa Nyoo caná tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

<sup>13</sup> Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñí ndo tuhun ra tsa cahan ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsahá tsinú ñi ndo tsi Nyoo tan nasama kuhva iyó ndo.

<sup>14</sup> Yahá can tan nyehe tucu maa ndo tundo ho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucu Judea. Tacan nyehe ñi can tundo ho jahá nyivi Israel.

<sup>15</sup> Tan ñi Israel can tsahñí ñi tsi Jutu Mañi yo Jesús tumaa tsahñí ñi tsi ra cuví ndusu yuhu Nyoo tahán tsanaha. Ñi Israel can tsinyaa ndaha ñi tsi ndi. Ñavin kuhva cuñí Nyoo iyó ñi. Tan xaan ñi ñi tsi tandihí maa nyivi.

<sup>16</sup> Tatun cuñí ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaa ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

*Nu cahan ra Pablo tyin cuñí ra cunyehe ra nu yucu nyivi Tesalónica inga tsaha*

<sup>17</sup> Nyooho yañi, tsa yahá tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan ñi ndi tsi ndo. Tan tsihin tsa ñi ñi ndi cuñí ndi cunyehe ndi nu yucu ndo inga tsaha.

<sup>18</sup> Tan nducu ndi kuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu kuhva quitsi ndi, maa tyin tandihí ñi tsaha tsa cuñí ndi quitsi ndi, ña tsahá nu ña vaha.

<sup>19</sup> Maa tyin ¿náa ndatú ndi? Tan ¿yóo cuenda cusii ñi ndi, tan vaha cuñí ndi? ¿A ñavin tsa cuenda maa ndo cua cusii xaan ñi ndi nuu Jutu Mañi yo Jesucristo quivi quitsi ra inga tsaha?

<sup>20</sup> Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sii xaan cuñí ndi tsa cuenda yacan.

### 3

<sup>1</sup> Tan ña cunyehe ca ñi ndi tsa cuñí ndi coto ndi nácaa cuahán tsinú ñi ndo tsi Nyoo. Tan tyaa ndi kuhva tsa ndoo intuhun ñi maa yu ñuu Atenas.

<sup>2</sup> Tan jaquitsí yu tsi ra Timoteo yañi yo, na quitsi nyehe ra nu yucu ndo. Ra ícan cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsí ndi tsi ra nu yucu ndo na jandu iin ca ra ñi ndo tan kuhva ca ra tunyee ñi tsi ndo na tsinú ca ñi ndo tsi Nyoo.

<sup>3</sup> Tyin tacan tan ndi intuhun ndo tan ña ndu uvi ñi ndo tsihin tsa nyehé ndo tundo ho. Tyin nyooho tsitó ndo tyin nyaá tsa nyehe yo tundo ho.

<sup>4</sup> Tyin nda ndi yucu ca maa ndi tsihin ndo, tan cahan ndi tsihin ndo tyin nyaá cua nyehe yo tundo ho. Tan tsitó vaha maa ndo tyin tacan cuví.

<sup>5</sup> Ña cunyehe ca ñi yu tsa cuñí yu coto yu nácaa yucu ndo. Yacan cuenda jaquitsí yu tsi ra Timoteo na nyehe ra tun vaha tsinú ñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahá tyiñu ndi nu yucu ndo.

<sup>6</sup> Maa tyin vityin tsa tsaa nuhu ra Timoteo tsa quitsí ra nu yucu ndo. Tan nacatyí tuhun ra tsihin ndi tyin ñi xaan ñi ndo tsinú ñi ndo tsi Nyoo. Tan cuñí tahan xaan ndo tsi ndo. Tan catyí ra tyin ñuhú xaan ñi ndo tsi ndi tan cuñí xaan ndo nyehe ndo tsi ndi; tumaa tsa cuñí tucu maa ndi nyehe ndi tsi ndo.

<sup>7</sup> Yacan cuenda, nyooho yañi, vasu ndi maa cuaha tsa taahán ndi tan cuaha tundo ho nyehé ndi, maa tyin vaha xaan cuñí ndi tsa tsitó ndi tyin nyooho vaha tsinú ñi ndo tsi Nyoo tan ña nacoó ndo tsi ra.

<sup>8</sup> Tyin tumaa tsa ndutsaa ñayivi iyó ndi cuñí ndi tsa tsitó ndi tyin nyooho vaha tsinú ñi ndo tsi Nyoo.

<sup>9</sup> Ndi ña ñihí ca ndi kuhva kuhva ndi tyahvi nyoo tsi Nyoo tsa cuenda ndo. Tyin sii xaan cuñí ndi nuu Nyoo tsa cuenda tyin vaha cuahán ndo tsihin ra.

<sup>10</sup> Tsicán tahvi xaan ndi tsi Nyoo tsinu cahñi tan tsacuaa, tyin cuñí xaan ndi quitsi nyehe ndi tsi ndo. Tacan tan cuví jandu iin vaha ndi ñi ndo tan tsinú vaha ca ñi ndo tsi ra, tan ña cumañi ca tsa cumañi tsi ndo tsihin kuhva tsinú ñi ndo tsi ra.

<sup>11</sup> Tan vityin ndatú ndi tunyee ñi Nyoo Jutu yo tan Jutu Mañi yo Jesucristo, maa ra

naha cua jatinyee tan cuvi quitsi ndi nu yucú ndo.

<sup>12</sup> Tan na jatinyee ca Jutu Mañi yo Jesucristo tsi ndo na cuahnu ca ndo tshin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihi ca nyivi tumaa tsa cuñi maa ndi tsi ndo.

<sup>13</sup> Tyin tacan tan cuñi coo ndo tshin ra tyin tsa yahá janduvahá ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tshin tandihi nyivi yihí cuenda ra.

#### 4

##### *Nacaa taahán iñi Nyoo coo yo*

<sup>1</sup> Vityin nyooho yañi, tshin siví ra Jesús caahán ndaahví xaan ndi tshin ndo tan tsicán ndi tsi ndo tsa ña jandihí ndo tsa iyó ndo tumaa tsa janahá ndi tsi ndo. Jañihi ca ndo nducu ndo cuhva coo vaha ndo nuu Nyoo tumaa taahán iñi maa ra.

<sup>2</sup> Tyin nyooho tsa tsitó maa ndo nácaa tavá tyiñu ndi tsi ndo tumaa tavá tyiñu maa Jutu Mañi yo Jesús tsi ndi.

<sup>3</sup> Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tshin ñaha tun ñavin ñasiñhi ndo cuví ña, tan ñiñaha na ña coo ñi tshin rayii tun ñavin yii ñi cuví ra.

<sup>4</sup> Tan nyooho yañi, intuhun intuhun ndo cuñi tsi coto ndo nácaa coo vaha ndo tshin ñasiñhi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha.

<sup>5</sup> Na caca caquiñi iñi ndo nyehe ndo tsi ñasiñhi ndo, ña javaha ndo tumaa javahá nyivi ña yihí tuhun Nyoo.

<sup>6</sup> Ndi intuhun ndo tan ña jandavi ñaha ndo tsi inga ca rayii tan coo ndo tshin ñasiñhi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahán ndi tshin ndo.

<sup>7</sup> Tyin Nyoo caná ra tsi yo tsa coo yo cuhva cuñi maa ra, tan ña javaha yo tsa caquiñi.

<sup>8</sup> Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí li ra tsi yo.

<sup>9</sup> Maa tyin tuhun tsa cuñi tahan yo tsi yo ña tsíñi ñuhu tsa tyaa yo itsi nu carta ihya. Tyin tsa janahá maa Nyoo tsi yo nácaa taahán tsi cuñi tahan yo tsi yo.

<sup>10</sup> Tan nyooho tsa tsitó maa ndo tuhun can tyin cuñi ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahví yu tshin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi.

<sup>11</sup> Nducu ndo cuhva coo taxin ndo. Tan ña tyihí ndo tsi ndo nu ña taahán tsi quihvi

ndo. Jaha tyiñu ndo iin ñi tyiñu maa ndo. Tan jaha tyiñu ndo tshin ndaha ndo tumaa cahán ndi tshin ndo quivi can.

<sup>12</sup> Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

##### *Nacaa cua cuvi quivi quitsi Jutu Mañi yo Jesús inga tsaha*

<sup>13</sup> Nyooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihya iñi ndo tumaa cuihya cuñi nyivi ña cua nandoto tsa ña cua coo tshin Nyoo.

<sup>14</sup> Tumaa tsa tsinú iñi yo tyin tsihi ra Jesús tan nandotó ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

<sup>15</sup> Yacan cuenda catyí ndi tshin ndo tumaa jacuahá Jutu Mañi yo tsi ndi, tyin yoo tsa nyito nda quivi quitsi ra, ña jilna ca yo cua cuhun tan nacoó yo tsi nyivi tsa tsihi.

<sup>16</sup> Tyin juven ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tshin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jilna ca ñi cua nandoto.

<sup>17</sup> Yahá can tan yoo tsa ndi nyito cua ndaa yo iin caa ñi tshin ñi nu vico, nu cua ñihi tahan yo tshin Jutu Mañi yo. Tacan tan cua coo cuvi yo tshin ra.

<sup>18</sup> Yacan cuenda jandu iin tahan ndo iñi ndo tshin tuhun ihya.

#### 5

<sup>1</sup> Nyooho yañi, ña ñiñi cuñi tsi jacoto yu tsi ndo ama cua cuvi tandihi tsa tsa yahá cahán yu tuhun tshin ndo.

<sup>2</sup> Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihví ñasuhu yuvehe yo tsa tsacuaa tacan cua cuvi.

<sup>3</sup> Tyin quivi tsa catyí nyivi tyin taxin ñi caa, tan nduve maa tsa yuuhví ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhví tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi.

<sup>4</sup> Maa tyin nyooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihví ñasuhu yuvehe ñi tyin nyooho ñavin ca nu naa iyó ndo.

<sup>5</sup> Tyin tandihi yo tsitó yo nácaa taahán tsi coo yo tyin jandunditsin Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo.

<sup>6</sup> Yacan cuenda catsi coo ndo cconyito ndo tan ña cusu ndo tumaa iyó nyivi ña nacotó

tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha.

<sup>7</sup> Tyin nyívi quixí, quixí ñi tsacuaa, tan nyívi tuhva tsihí nyixi, tsiñi ñi tsacuaa.

<sup>8</sup> Maa tyin yoo tsa cuví yo nyívi iyó tsinu cahñi, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandihí nyívi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo.

<sup>9</sup> Tyin Nyoo ña nacatsí ra tsi yo tsa tatsi tuñi ra tsi yo, nacatsí ra tsi yo tyin jacacu Jutu Mañi yo Jesucristo tsi yo jahá ra.

<sup>10</sup> Tyin ra Jesucristo tsihí ra tsa cuenda yo tyin tacan tan coo yo iin caa ñi tsihin ra. Yofñi jaha vasu tsa tsihí yo, a nyito yo, maa tyin tandihí yo cua coo yo iin caa ñi tsihin ra.

<sup>11</sup> Yacan cuenda jandu iin ndo iñi nyívi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

*Nu tsahá cuenda ra Pablo tsi nyívi yihí cuenda Nyoo*

<sup>12</sup> Nyooho yañi, caahán ndaahvi xaan ndi tsihin ndo, jaha ndo tsa ñayívi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha.

<sup>13</sup> Cuñi tsi tsa jaha xaan ndo tsa ñayívi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

<sup>14</sup> Tavá tucu ndi tyiñu tsi ndo yañi, jacahan ndo tsi nyívi ña cuñi jaha tyiñu. Tan jandu iin ndo iñi nyívi tsa ndu uvi xaan iñi. Tan jatyinyee ndo tsi nyívi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihí iñi ndo tsihin nyívi.

<sup>15</sup> Jaha ndo cuenda coto javaha ndo tsa ndavaha ñi tsihin nyívi javahá tsa ña vaha tsihin ndo. Nducu ndo cuhva javaha ndo tsa vaha tsihin nyívi yihí tuhun Nyoo tsihin ndo tan tsihin tandihí ca nyívi.

<sup>16</sup> Cusiñi iñi ndo tandihí ñi quívi.

<sup>17</sup> Tan ña jandihí ndo tsa tsicán tahvi ndo tsi Nyoo.

<sup>18</sup> Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuví yo nyívi tsinú iñi tsi ra Cristo Jesús.

<sup>19</sup> Ña ndahva ndo ñuhú Tatyí Ii Nyoo tsa iyó añima ndo.

<sup>20</sup> Ña vacu nducu ndo tsa caahán ra cuví ndusu yuhu Nyoo.

<sup>21</sup> Nyehé jihna ndo tun tandihí tsa caahán ra tan vaha tsi tumaa tsa taahán tsi nyehe ndo tandihí inga ca tuhun. Tan naquihin ndo tsa vaha.

<sup>22</sup> Ña tyihí ndo tsi ndo nu iyó tsa ña vaha.

<sup>23</sup> Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quívi quitsi Jutu Mañi yo Jesucristo inga tsaha.

<sup>24</sup> Ra tsa caná tsi yo, cuví cuita iñi yo tsi ra, tyin maa ra cua javaha tandihí maa tsa caahán yu ihya.

*Nu ndihí cahán ra Pablo tan tsahá ra nacumi tsi nyívi*

<sup>25</sup> Yañi, ndácan tahvi ndo tsa cuenda ndi.

<sup>26</sup> Tan cuhva ndo nacumi tsi tandihí nyívi yihí cuenda Nyoo.

<sup>27</sup> Tavá tyiñu yu tsi ndo tsihin sívi Jutu Mañi yo na cahví ndo carta ihya nuu tandihí nyívi tsa yihí cuenda Nyoo.

<sup>28</sup> Tan maa Jutu Mañi yo Jesucristo nasoco tsi ndo.

Tan na cuví tsi tacan ñi.

## Carta Tsinú Uvi Tsa Jacuhun Ra Pablo Tsi Nyivi Yihí Cuenda Nyoo ñuu Tesalónica

*Nu tyaq ra Pablo, tan ra cutahán tsihin ra, tsa tsinu uvi carta tsa cuenda nyivi yihí tuhun Nyoo ñuu Tesalónica*

<sup>1</sup> Yuhu ra Pablo, ra Silvano tan ra Timoteo jaquitsi ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Nu cahan ra Pablo nácaa cua tatsi tuñi Nyoo tsi nyivi iyó cuatyí quivi quitsi ra Cristo*

<sup>3</sup> Nyooho yañi, cuñi tsi tsa nacuhva ndi tyahvi nyoo tsi Nyoo tsa cuenda ndo tandihi ñi quivi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quivi, tan cuñi xaan ndo tsi nyivi yihí tuhun Nyoo tsihin ndo.

<sup>4</sup> Yacan cuenda sii xaan cuñi ndi caahán ndi tuhun ndo tsihin nyivi yihí cuenda Nyoo inga ca vehe ñuhu. Tyin nyooho cunye xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyivi.

<sup>5</sup> Tandihi yacan janahá tyin Nyoo cuiñi xaan jacutuñi ra tyin cua catyi ra tyin taahán maa tsi cahun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

<sup>6</sup> Tan tsa cuenda maa Nyoo, taahán tsi janyehe ra tundoho tsi nyivi tsa janyehé xaan tundoho tsi ndo.

<sup>7</sup> Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tsihin ndi quivi cua quitsi nyico Jutu Mañi yo Jesucristo tsa quee ra andivi tsihin ñuhu tan tsihin ángel tsa iyó tunyee iñi maa ra.

<sup>8</sup> Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo.

<sup>9</sup> Ñi ican cua janyehe Nyoo tundoho tan ña cua cundihi maa tsa nyehé ñi tundoho, ña cua nyehé ñi tsi Jutu Mañi yo Jesucristo tan ña cua nyehé ñi tsa cahnu cuví ra tsihin tunyee iñi tsa iyó tsi ra

<sup>10</sup> quivi cua quitsi ra. Tyin quivi can nyivi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehé ñi tsi ra. Tan tyañu nyivi can, cua cuyucu tucu nyooho tyin tsinu iñi ndo tuhun tsa cahan ndi tsihin ndo.

<sup>11</sup> Yacan cuenda tsicán tahvi ndi tsi Nyoo tsa cuenda ndo tandihi ñi quivi, na jatinyee ra tsi ndo. Tacan tan catyi ra tyin taahán tsi tsi ndo tsa cuví ndo nyivi cana maa ra. Tan tsicán tahvi tucu ndi tsi ra na jatinyee ra tsi ndo tan cuvi javaha ndo tsa vaha tsa cuñi ndo javaha ndo. Tan na quita vaha tandihi tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra.

<sup>12</sup> Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

## 2

*Ra tsa nduve ley Nyoo iyó añima*

<sup>1</sup> Nyooho yañi, vityin cuñi yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo,

<sup>2</sup> ña nudi xaan sama ndo cuhva tsicá iñi ndo. Tan ña nayuhvi ndo tatun quita tuhun jaha tatyí ña vaha tyin tsa tañan tsi quivi quitsi Jutu Mañi yo; vasu ndi maa nyivi caahán can, a jaquitsi ñi carta tsi ndo tan catyi ñi tyin yuhu jaquitsi carta can tsi ndo. Ña tsinu iñi ndo tandihi yacan.

<sup>3</sup> Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehé ñi tuhun Nyoo, tan cua quituvi rayi tsa nduve ley Nyoo iyó añima, ra tsa nyaá maa cahun anyaya.

<sup>4</sup> Ra ican cuví ra xaan iñi tsi Nyoo. Cua cañi tahan ra tsihin tandihi tsa nyisó sivi Nyoo; tan cua cañi tahan ra tsihin tandihi tsa jacahnu tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

<sup>5</sup> ¿A ña nducuhún iñi ndo tyin nda ndi nyii ca yu tsihin ndo tan cahan yu tuhun ihya tsihin ndo?

<sup>6</sup> Maa tyin nyooho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra.

<sup>7</sup> Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyii xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihi tsa tyasí ra, tacan tan cua quituvi nu.

<sup>8</sup> Tacan tan cua quituvi ra tsa nduve ley Nyoo iyó añima, maa tyin Jutu Mañi yo Jesús cua cahñi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quivi quitsi ra inga tsaha.

<sup>9</sup> Ra ña vaha can, nu ña vaha cua jaquitsi tsi ra. Tan cua cuhva nu tandihi tsa nyityi



nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi.

<sup>10</sup> Cua cuatyíñu ra tandihí nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñí ñi naquihin cuenda ñi tuhun Nyoo tsa nditsa tan cacu ñi.

<sup>11</sup> Tan yacan cuenda cua kuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa ña nditsa.

<sup>12</sup> Tacan tan cua tatsi tuñi ra tsi tandihí ñi tyin ña cuñí ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

*Nu cahán ra Pablo tuhun nyivi tsa nacatsj Nyoo tyin cacu ñi*

<sup>13</sup> Maa tyin tandihí quivi cuñí tsi kuhva ndi tyahvi nyoo tsi Nyoo tsa cuenda nyooho yañi. Tyin cuñí xaan Jutu Mañi yo tsi ndo. Tan nacatsj ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí Ii ra añima ndo tan tsihin tsa tsinú iñi ndo tuhun nditsa cuvi cacu ndo.

<sup>14</sup> Yacan cuenda caná Nyoo tsi ndo quivi tsa cahán ndi tuhun ra tsihin ndo tyin tacan tan ñihi ndo tsa cahnu cuví Jutu Mañi yo Jesucristo coo tsi ndo.

<sup>15</sup> Yacan cuenda nyooho yañi, jandu iin ndo iñi ndo. Tan ña naa iñi ndo tandihí tsa tsahá cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña ña iñi ndo tandihí tuhun tsa tyaa ndi nu carta tsa jaquitsj ndi tsi ndo.

<sup>16</sup> Jutu Mañi yo Jesucristo tan Nyoo Jutu yo, juven ra cuñí tsi yo; tan tsahá ra tunyee iñi tsi yo tandihí tyembu, tan tsahá ra naha tsa cuita iñi yo coo yo tsihin ra. Tandihí yacan tsahá ra tsi yo quivi tsahá ra tsa vaha tsa iyó tsi ra tsi yo.

<sup>17</sup> Na kuhva ra tsa sñi cuñi añima ndo. Tan jandu iin ra iñi ndo, tacan tan cua cahán ndo tan javaha ndo tandihí tsa vaha.

### 3

*Nu tsicán ra Pablo na ndacan tahvi nyivi tsi Nyoo tsa cuenda ra naha*

<sup>1</sup> Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsaa tuhun Jutu Mañi yo tandihí ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi.

<sup>2</sup> Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihí ñi tan tsinú iñi ñi tsi Jutu Mañi yo.

<sup>3</sup> Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tñin nu ña vaha tsi ndo.

<sup>4</sup> Tan nditá xaan iñi ndi tsi Jutu Mañi yo tyin tsitó ndi tyin jatyinyeé ra tsi ndo tan javahá ndo tsa catyí ndi tyin javaha ndo.

Tan tsitó tucu ndi tyin ña cua jandihí ndo tsa javaha ndo tacan.

<sup>5</sup> Tan na jatyinyee ca Jutu Mañi yo tsi ndo tan cuñí ca ndo tsi nyivi tumaa tsa cuñí maa Nyoo tsi yo tsihin ñi, tan cunyeé ca iñi ndo nyehé ndo tundoho, tumaa tsa cunyeé iñi maa ra Cristo nyehe ra tundoho.

*Taahán tsi tsa jaha tyiñu yo*

<sup>6</sup> Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñí jaha tyiñu, tan ña cuñí ra coo ra tumaa jacuahá ndi tsi ndo.

<sup>7</sup> Tyin tsitó maa ndo nácaa taahán tsi coo ndo tumaa tsicoq maa ndi tsa tsiyucú ndi tsihin ndo. Tyin nyuhu ña tsicá nuu utsan ndi tyin jahá tyiñu ndi.

<sup>8</sup> Tan tandihí tsa tsatsj ndi, maa ñi maa tyahvi ndi tsi ndo. Tyin jahá tyiñu ndi tsinu cahñi tan tsacuaa tyin ña cuñí ndi tsa coso tundoho can siqui ndi intuhun ndo.

<sup>9</sup> Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jahá tyiñu ndi tyin cuñí ndi janaha ndi nácaa taahán tsi coo ndo.

<sup>10</sup> Tyin quivi tsiyucú ndi tsihin ndo, cahán ndi tsihin ndo tyin nyivi ña cuñí jaha tyiñu, na ña catsi ñi.

<sup>11</sup> Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo.

<sup>12</sup> Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jaha tyiñu ndo, tan coo tsa catsi ndo.

<sup>13</sup> Nyooho yañi, ña cundihí iñi ndo javaha ndo tsa vaha.

<sup>14</sup> Tatun iyó iin ra ña cuñí tyaa yahvi tuhun caahán ndi nu carta ihya, jaha ndo cuenda ndáa ra cuví ra, tan ña cunyanaa ndo tsi ra na nducahan nuu ra.

<sup>15</sup> Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

*Nu ndihí cahán ra Pablo*

<sup>16</sup> Jutu Mañi yo ra iyó tsa vaha tsi, juven ñi maa ra kuhva tsa vaha coo añima ndo tandihí ñi quivi tan tandihí ñi tsaha vasu ndi maa nyehé ndo tundoho. Tan Nyoo ndoo tsihin tandihí ndo.

<sup>17</sup> Yuhu ra Pablo tyaa yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihí carta yu. Tan tyehen tyaa yu.

<sup>18</sup> Tan na nasoco Jutu Mañi yo Jesucristo tsi tandihí ndo.

Tan na cuvi tsi tacan ñi.

## Carta Tsa Jihna Ñi Tsa Jacuhun Ra Pablo Tsi Ra Timoteo

*Nu tyaq ra Pablo iin carta tsa cuenda ra Timoteo*

<sup>1</sup> Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo.

<sup>2</sup> Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinú iñi un tuhun ra Cristo tsa jacotó yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

*Nu tsahq cuenda ra Pablo tyin jaha cuenda yo tsi yo tan ña cunyicun yo tsa ña nditsa*

<sup>3</sup> Quivi quita yu ñuu Éfeso tan vatsi yu Macedonia nu nyí yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyí yu tsihin un tyin catyí un tsihin ñi na ña jacuahá ñi tsa ña nditsa. Tan vityin juvin ñi tacan caahán nyico yu tsihin un.

<sup>4</sup> Cahan tsihin ñi na ña tyaá iñi ñi cuendu, na ña tyaá iñi ñi tuhun nyivi tsicoq tahan tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua jatynyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuví quita vaha tsi.

<sup>5</sup> Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa ñi iñi añima yo tsa janduvahq Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo.

<sup>6</sup> Maa tyin yihí nyivi nacoq ihñi ñi yacan, tan tsinaq ñi jahá tsa caahán yuhu tahan ñi.

<sup>7</sup> Cuñi ñi cuví ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

<sup>8</sup> Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi.

<sup>9</sup> Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihi nyivi tsahñi nyivi.

<sup>10</sup> Iyó ley can tsa cuenda nyivi iyó tsihin rayii a ñaha tan ñavin yii ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juvin ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo.

<sup>11</sup> Tuhun Nyoo ihya, iin ñi cuví tsi tsihin tuhun cahnun xaan tsa jacacú ra Jesús tsi yo. Nyoo tava tyiñu ra tsi yu tsa jacuahá yu tuhun ihya tsi nyivi. Tan intuhun ñi maa ra taahán tsi jacahnú yo.

*Tsahq ra Pablo tyahvi nyoo tsi Nyoo tyin nyehé ndaahvi ra tsi ra*

<sup>12</sup> Tsahá xaan yu tyahvi nyoo tsi Jutu Mañi yo Jesucristo tyin tsahq ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

<sup>13</sup> Tacan javahq ra tsihin yu, vasu ndi maa nu quitsí tsi quivi, yuhu cahan nyaa xaan yu tsi ra. Tan tsinyaq ndaha yu tsi nyivi yihí cuenda ra, tan tsacq nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu.

<sup>14</sup> Tacan tsahq Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahq ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

<sup>15</sup> Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsí ra nu ñuhu ñayivi ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandihi nyivi.

<sup>16</sup> Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuanda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa.

<sup>17</sup> Yacan cuenda na jacahnu yo tsi ra yihí ndaha tsi yo tandihi ñi quivi, ra nduve tuhun tsihi iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihi. Na cuví tsi tacan.

<sup>18</sup> Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsahq cuenda ra yañi yo naha ra tsi un quivi cahan ra naha tuhun un jahq Nyoo.

<sup>19</sup> Ña jandihí un tsa tsinu iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, naçoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandihi

yacan, yacan cuenda ña tsinú ca iñi ra naha tumaa taahán maa tsi.

<sup>20</sup> Tacan javahá ra Himeneo tan ra Alejandro. Yacan cuenda tsahá cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

## 2

*Nu jacuahá ra Pablo nácaa taahán tsi ndacan tahvi yo tsi Nyoo*

<sup>1</sup> Tshá cuenda yu tsi tandihí nyívi yihí cuenda Nyoo tyin ñiñi xaan cuñí tsi ndacan tahvi yo tsi Nyoo tsa cuenda tandihí nyívi. Tan nacuhva yo tyahvi nyoo tsi Nyoo tsa cuenda ñi.

<sup>2</sup> Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayívi vaha nuu Nyoo tan nuu nyívi. Tacan tan cua jaha ñi tsa ñayívi tsi yo.

<sup>3</sup> Tyin tacan taahán iñi Nyoo, ra tsa jacacú tsi yo.

<sup>4</sup> Tyin cuñí ra tsa cacu tandihí nyívi. Tan cuñí ra tsa coto ñi tuhun nditsa.

<sup>5</sup> Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ícan cuví ra Cristo Jesús. Tan cuví ra iin nyívi tumaa maa yo.

<sup>6</sup> Juvín ra Jesucristo tsihi tsa cuenda tandihí nyívi. Tyahví ra tsa cuenda cuatyí tandihí yo tyin tacan tan cuví cacu yo. Tan cundaá can quívi tyaa maa Nyoo cuhva.

<sup>7</sup> Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuahá yu tsi nyívi tsa ñavin nyívi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

<sup>8</sup> Yacan cuenda cuñí yu tsa ndacan tahvi rayíi naha ra tsi Nyoo tandihí ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo.

<sup>9</sup> Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyívi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiri ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan.

<sup>10</sup> Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyívi nacuhvá cuenda tsi ñi tsi Nyoo.

<sup>11</sup> Tan cunyecu taxin ñi tyaa soho ñi tuhun Nyoo. Tan jaha ñi tsa ñayívi tsi ra tsahá cuenda tuhun Nyoo tsi ñi.

<sup>12</sup> Tyin ña tsahá yu jacuahá ñiñaha nuu nyívi cuaha. Ndi ña tsahá yu tsa cundaca ñaha ñi tsi rayíi. Taxin ñi na cunyecu ñi.

<sup>13</sup> Tyin jihna ca ra Adán javahá Nyoo, yahá can tan javahá ra tsi ña Eva.

<sup>14</sup> Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoo cuatyí ña.

<sup>15</sup> Maa tyin ñiñaha nduve tsa cua tahan ñi tsa cua cacu sehe ñi, tatun jacuahnu vaha ñi tsi sehe ñi, tan tsinú vaha iñi ñi tsi Nyoo tan cuñí ñi tsi ra tan tsi nyívi, tan catsi coo ñi nuu Nyoo tan nuu nyívi.

## 3

*Nacaa taahán tsi coo ra cuví ityi nuu tsihin nyívi vehe ñuhu*

<sup>1</sup> Tuhun ihya tuhun nditsa cuví tsi: Tatun iin ndo cuñí ndo cuví ndo ityi nuu tsihin nyívi vehe ñuhu, vaha xaan tyiñu cuñí ndo javaha ndo.

<sup>2</sup> Maa tyin ñiñi cuñí tsi tyin ra cuví ityi nuu tsihin nyívi vehe ñuhu cuñí tsi cuví ra iin ra catsi iyó tyin tacan tan ña cuví tyaa nyívi cuatyí tsata ra. Tan cuñí tsi tsa coo intuhun ñi ñasihi ra. Tan cuñí tsi tsa cuví ra iin ra tsitó vaha cuhva coo, iin ra vaha nuu nyívi. Tan cuñí tsi vaha cahan ra tsihin nyívi tsaá yuvehe ra, tan cuví ra iin ra tsitó vaha jacuahá tsi nyívi.

<sup>3</sup> Iin ra cuví ityi nuu tsihin nyívi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñí tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun.

<sup>4</sup> Cuñí tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi vaha sehe ra tsi ra, tan jahá ñi tsa ñayívi tsi ra.

<sup>5</sup> Tyin tatun ña tsitó ra cundaca ñaha ra nyívi vehe ra, ¿nácaa cua quíhi ndaha ra nyívi tsicá vehe ñuhu Nyoo?

<sup>6</sup> Tan iin ra ndi tsaa xaan tsihin tuhun Nyoo ña taahán tsi cuví ra ityi nuu tsihin nyívi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu.

<sup>7</sup> Tan cuñí tucu tsi tsa cuví ra iin nyívi vaha nuu nyívi tsa ña yihí tuhun Nyoo, tyin tacan tan ña ñihi ñi náa cuatyí tyaa ñi tsata ra tan ña cuví jaha canaa nu ña vaha tsi ra.

*Nacaa taahán tsi coo ra jahá tyiñu vehe ñuhu*

<sup>8</sup> Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi

ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi.

<sup>9</sup> Cuñí tsi tsa cutuñí vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo.

<sup>10</sup> Tan cuñí tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu.

<sup>11</sup> Tan tacan tucu ñiñaha, cuñí tsi cuví ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandihi tyiñu.

<sup>12</sup> Ra jahá tyiñu vehe ñuhu na coo intuhun ñi ñasiihi ra. Tan cuñí tsi tsa coto vaha ra cundaca ñaha ra tsi sehe ra tan nyivi vehe ra.

<sup>13</sup> Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi iñi ra caahán ra tuhun Nyoo tyin tsinú vaha iñi ra tsi ra Cristo Jesús.

*Nu caahán ra Pablo siqui tuhun xeehe cuhva tsinú iñi yo*

<sup>14-15</sup> Vasiqú numi ñi cua quitsi nyehe yu nu nyí un. Maa tyin tun ña cuví quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo cuví vehe ñuhu Nyoo nyito. Tan cuñí tsi tsa jañiñi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuví tsi.

<sup>16</sup> Tsa nditsa tyin yaha xaan cahnu cuví tuhun xeehe tsa jaquituvj Nyoo, tyin coo yo tumaa iyó maa ra:

Nyoo nanduvj ra rayñi tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyi Tatyí Ii Nyoo tyin ra nduve cuatyí cuví ra.

Tan nyehe ra cuví ángel naha ra tsi ra.

Tanñi cahnu nu ñuhu ñayivi caahán nyivi tuhun ra.

Tan tsinú iñi nyivi tsi ra tanñi cahnu nu ñuhu ñayivi.

Tan cuanuhú ra nda gloria.

#### 4

*Nu catyi ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo*

<sup>1</sup> Maa tyin caahán catsi Tatyí Ii tan catyi ra tyin nu cua ndihi tyembu yihí nyivi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha.

<sup>2</sup> Cua tyaa soho ñi tuhun caahán nyivi jandaví ñaha. Tan ñi can ña tuví iñi ñi náa

javahá ñi tyin tsa ndundavá xaan añima ñi. Tumaa tsa cayú añima ñi jahá iin caa ihñi tan ndundavá tsi.

<sup>3</sup> Cua casi ñi nu tindaha nyivi. Tan cua catyi ñi tyin ña vaha catsi yo juhva nuu nyayu. Vasu tsitó yo tyin tandihi nuu tsa tsatsí yo, Nyoo javahá itsi. Tan tandihi yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra.

<sup>4</sup> Tyin tandihi tsa javahá Nyoo tan vaha tsi. Tan ña taahán tsi catyi yo tyin ña vaha tsi. Tan cuví catsi yo tandihi tsi tun tsahá yo tyahvi nyoo tsi Nyoo tsa cuenda tsi.

<sup>5</sup> Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

*Nacaa iyó ra vaha jahá tyiñu tyiñu ra Jesucristo*

<sup>6</sup> Tatun jacuahá un tandihi tsa caahán yu ihya tsi tandihi nyivi yihí tuhun Nyoo tsihin yo, cua cuví un iin musu vaha ra Cristo Jesús. Tan tuhun tsa tsinú iñi yo, tsihin tandihi tuhun ra Cristo tsa nyicún yo, cua jatinyee tsi tsi un tan cuahnu ca un tsihin tuhun Nyoo.

<sup>7</sup> Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñí maa Nyoo.

<sup>8</sup> Tsa jañiñi yo coo tunyee iñi cuñu ñuhu yo, juhva ñi jatinyeeé tsi tsi yo. Maa tyin tsa jañiñi yo javahá yo tandihi cuhva cuñí Nyoo, jatinyeeé tsi tsi yo iin cahnu ñi, tyin jatinyeeé tsi tsi yo nu ñuhu ñayivi ihya. Tan jatinyeeé tucu tsi tsi yo tsa coo vaha yo nu cua tsaá yo nda gloria.

<sup>9</sup> Tan nditsa, tyin tsa nditsa cuví tsi tan tandihi yo taahán tsi tsa tsinú iñi yo itsi.

<sup>10</sup> Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihi nyivi, tan jihna ca yoo tsa tsinú iñi yo tsi ra jacacú ra.

<sup>11</sup> Tuhun ihya jacuahá un tsi nyivi yihí cuenda Nyoo, tan jañiñi un tsi ñi na cutuhva ñi itsi.

<sup>12</sup> Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuahá tsi ñi tsihin cuhva iyó un, tan tsihin cuhva caahán un. Jacuahá tsi ñi tsihin tsa cuñí un tsi Nyoo tan tsi nyivi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha.

<sup>13</sup> Tan tsitsi tsa ndi cumañi ca tsaá yu nu nyí un, çahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuahá tsi ñi nácaa cunyicun vaha ñi tsi Nyoo.

<sup>14</sup> Jaha cuenda vaha tunyee iñi tsa tsaha Nyoo tsi un quivi tyiso ndaha ra nyisó tyiñu vehe ñuhu naha ra jifiñ un tan cahan ra naha tsa tsaha cuenda Nyoo tsi ra naha.

<sup>15</sup> Tyaa vaha iñi tuhun can tan javaha cuhva catyi tsi. Tacan tan cua nyehé tandihí nyivi nácaa cuahán un ityi nuu ca tsihin Nyoo.

<sup>16</sup> Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaá soho tuhun jacuahá un.

## 5

*Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo*

<sup>1</sup> Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha.

<sup>2</sup> Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihí tsa caahán yu ihya tsihin tsa vaha tsicá iñi un.

<sup>3</sup> Jatyinyee tsi ñiñaha ndaahvi tsa tsihí yíi tatun nduve nyivi ñi cuví jatyinyee tsi ñi.

<sup>4</sup> Maa tyin tatun iyó iin ñaha tsihí yíi tan iyó sehe ña, a sehe yañi ña, cuñí tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihí ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo.

<sup>5</sup> Tan ñaha tsa tsihí yíi tan ndoq ndaahvi intuhun ña maa ña, iin ña Nyoo tyaá iñi ña tan tsicán tahvi ña tsi ra tsinu cahñi tan tsacuaa.

<sup>6</sup> Maa tyin ñaha tsihí yíi tsa cusii iñi tsihin tsa iyó nu ñuhu ñayivi ihya, vasu nyito ña maa tyin tsihí ña cuenda Nyoo.

<sup>7</sup> Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi.

<sup>8</sup> Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

<sup>9</sup> Nu tutu tsa nyaá sivi ñi tsihí yíi, na cun-yaá sivi ñi tsahnu tsa iyó ndaahvi, tatun tsa yaha uñi xico cuiya ñi, tan intuhun ñi yíi ñi tsicoq.

<sup>10</sup> Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi

tsaá yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa nu iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihí tsa vaha, cuví cunyaa sivi ñi.

<sup>11</sup> Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñí ñi coo nyico yíi ñi tan cuñí ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo.

<sup>12</sup> Tan coo cuatyí ñi tyin ña javahá ñi cuhva cahan ñi tsa cua javaha ñi.

<sup>13</sup> Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi.

<sup>14</sup> Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyivi xaan iñi tsi yo tsi yo.

<sup>15</sup> Caahán yu tandihí tuhun ihya tsihin un tyin yihí ñi tsa nacoo ñi tsi Nyoo tan nyicún ñi tsi nu ña vaha.

<sup>16</sup> Tatun ñi yihí cuenda Nyoo tan iyó iin nyivi ñi tsa tsihí yíi, cuñí tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi inga ñi tsihí yíi tsa nduve ca maa nyivi iyó.

<sup>17</sup> Ra tsahnu ra nyisó tyiñu vehe ñuhu, cuñí tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi.

<sup>18</sup> Tyin tuhun Nyoo catyi tsi tyehen: “Ña tyihí un yoho yuhu indiqui nu jahá tyiñu ti, tacan tan cuví catsi ti luxu.” Tan catyi tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

<sup>19</sup> Tatun tyaá nyivi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi.

<sup>20</sup> Maa tyin nyivi tsa jañihí ca javahá tsa ña vaha, cuñí tsi tsa cahan ndo tsihin ñi nu tandihí nyivi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha.

<sup>21</sup> Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsj ra. Tan caahán yu tsihin un tyaa yahvi tsa caahán yu ihya, inducu ñi cuñí un nyehé un tsi tandihí nyivi.

<sup>22</sup> Ña numi xaan cuhva un tyiñu tsi iin ra cuví ra ityi nuu tsihin nyivi vehe ñuhu. Coto cahun cuatyí javaha ra siqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

<sup>23</sup> Tan tsa cuenda tsa uhvi tsitsi un, ña coho ca un maa ñi maa ndutya, cõho luxu vinu na nduvaha tsitsi un.

<sup>24</sup> Yihí nyivi quituvi cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi.

<sup>25</sup> Tan tacan tucu tatun javahá yo tsa vaha, ña cuxeehe tsi. Vasu ña quituvi tsi tsa numi ñi, maa tyin ña cuví ndoo xeehe tsi.

## 6

<sup>1</sup> Nyivi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihi nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo.

<sup>2</sup> Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñi ra tsi ra ican. Jacuaha yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

*Cuhva iyó yo tsihin Nyoo tan na cusii iñi yo tsihin tsa tsaha ra tsi yo*

<sup>3</sup> Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo,

<sup>4</sup> cuví ra iin ra nduyaa ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihí tan nyiyo iñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñi nyivi nyehe tahan ñi tsi ñi.

<sup>5</sup> Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñi maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can.

<sup>6</sup> Nditsa tyin tsa javahá yo cuhva catyí Nyoo tan si cuñi yo tsihin tsa tsaha ra tsi yo, cuví tsi tumaa iin tsa cuca iyó tsi yo.

<sup>7</sup> Tyin nduve náa tsaa tsihin yo quivi cacú yo nu ñuhu ñayivi ihya. Tan nduve náa cuhun tsihin yo quivi cúu yo.

<sup>8</sup> Maa tyin tatun iyó tsa catsi yo tan iyó jahma cunditsí yo, na cusii iñi yo, tan na ndoo yo vaha tsihin yacan.

<sup>9</sup> Maa tyin nyivi cuñi nducuca, nducú cuhva nu ña vaha tsi ñi. Tan nacavañi ñi tsitsi xayí nu. Jandusohó nu tsi ñi tsihin tsa cuñi ñi coo cuaha tsa coo tsi ñi. Tan jatíví can tsi ñi. Tan nu ndihí tuhun cua tiví ndihí ñi tan cua cuhun ñi anyaya.

<sup>10</sup> Tyin tsa cuñi xaan yo xuhun, yacan cuví yoho tandihí ca nuu tsa ña vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

*Nacaa cañi tahan yo tsihin nu ña vaha tsihin tsa tsinú iñi yo tsi Nyoo*

<sup>11</sup> Maa tyin yoocho cuví un iin rayii cuenda Nyoo. Quita tsiyo nuu tandihí tsa caquiñi. Coo cuñi vaha nuu Nyoo. Cuanycun tsi Nyoo tsihin tsa ñi iñi un. Cuñi tsi nyivi. Cunyee iñi tsihin tsa vita iñi un nyehe un tandihí tsa cua tahan un. Tan ña cahnu jaha un tsi un.

<sup>12</sup> Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyí un quivi cahan catsi un nuu tandihí ra cuví tsandaa naha ra, catyí un tyin tsinú iñi un tsi Nyoo.

<sup>13</sup> Tan vityin nuu Nyoo, ra tsa tsahá ñayivi coo tandihí tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio Pilato, caahán yu tsihin un,

<sup>14</sup> javaha tandihí tsa catyí yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo.

<sup>15</sup> Nda tsaa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihí ca ra cuví rey. Tan ra ndacá ñaha cahnu cuví ra nuu tandihí ca ra ndacá ñaha.

<sup>16</sup> Intuhun ñi maa ra cuví ra tsa nduve tuhun tsiihi iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihí tyembu. Tan na ña cundihí maa tsa ndacá ñaha ra tsi yo. Na cuví tsi tacan.

<sup>17</sup> Tan cahan tsihin nyivi tsa iyó tsa cuca ñuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihí can. Na cuita iñi ñi tsi Nyoo nyito, tyin maa ra cuví ra tsahá tandihí tsi yo. Tan cuví cusii iñi yo tsihin tsi.

<sup>18</sup> Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa ñi iñi ñi tan ñavin tsihin tsa cuihya cuñi ñi.

<sup>19</sup> Tacan tan coo tsa cuca tsa ña cuanaa maa tsi ñi, tan jatinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

*Nu ndihí tsahá cuenda ra Pablo tsi ra Timoteo*

<sup>20</sup> Yooho Timoteo, jaha cuenda vaha tyifū tsa tsahā Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyí nyivi tyin tsitó xaan ñi tan ña nditsa.

<sup>21</sup> Tyin tsa cuenda yacan, yihí nyivi tsa nacoohñi ñi tuhun Nyoo. Tan ña tsinú vaha ca ñi ñi tsi ra vityin.

Çoo tsihin tsa vaha tsa iyó tsi Nyoo tsa tsahā ra tsi un.

Tan na cuvi tsi tacan ñi.

## Carta Tsinu Uvi Tsa Jacuhun Ra Pablo Tsi Ra Timoteo

*Nu tyaq ra Pablo inga carta tsa cuenda ra Timoteo*

<sup>1</sup> Yuhu ra Pablo cuvı̄ yu iin ra tava tyiñu ra Jesucristo, tyin tacan cuñı̄ maa Nyoo. Tyin cuñı̄ ra tsa jacoto yu tsi nyı̄vi tyin tsahá ra ñayı̄vi nyito coo tandihi ñi tsa iin ñi cuvı̄ tsihin ra Cristo Jesús.

<sup>2</sup> Jaquitsı̄ yu carta ihya tsi yooho Timoteo. Tan cuñı̄ xaan yu tsi un tyin tumaa cuvı̄ sehe yu cuvı̄ tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

*Nu caahán ra Pablo tsihin ra Timoteo na catyi tuhun ra tsihin nyı̄vi tyin cuenda ra Cristo yihı̄ ra*

<sup>3</sup> Tandihı̄ ñi quı̄vi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsiı̄ tsahnu yu tyiñu Nyoo tsanaha. Tan vaha cuñı̄ añima yu tyin vaha iyó yu nuu ra.

<sup>4</sup> Nducuhún xaan iñi yu nácaa tsacu un quı̄vi quita yu nu nyı̄ un. Tan vityin cuñı̄ xaan yu nyehe yu tsi un inga tsaha tan cusı̄ iñi yu.

<sup>5</sup> Tan nducuhún xaan iñi yu tyin tsinú ñi vaha iñi un tsi Nyoo. Tumaa tsa tsinú iñi ña Loida tsitan un tan ña Eunice sihi un. Ñi ı̄can vaha xaan tsinú iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

<sup>6</sup> Yacan cuenda tsahá cuenda yu tsi un jandu iin ca iñi un tan cı̄atyı̄nu ndatu tsa tsahá Nyoo tsi un tsa cahan un tuhun ra. Yacan cuvı̄ ndatu tsa tsahá ra tsi un quı̄vi tyiso ndaha yu jiñi un.

<sup>7</sup> Nyoo ña tsahá ra tatyı̄ ña vaha tsa jayuhvi tsi yo. Tsahá ra Tatyı̄ Ii ra tsi yo tyin coo tunyee iñi cahnu tsi yo, tan cuñı̄ tahan yu tsi yo. Tan tsahá ra tunyee iñi tsi yo tyin tacan tan cundaca ñaha vaha yu tsi yo.

<sup>8</sup> Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyı̄ yu vehe caa tsa cuenda ra. Cı̄atyı̄nu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsı̄ siquı̄ yo tsa cuenda tuhun Nyoo.

<sup>9</sup> Tyin juvin ra jacacu tsi yo. Tan cana ra tsi yo tyin coo yo ñayı̄vi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaq maa ra cuhva javaha ra nda ndi cumañi ca tsinú ñuhu

ñayı̄vi. Tyin nda quı̄vi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús.

<sup>10</sup> Tan vityin tsitó yo tsa vaha can tyin tsa quitsı̄ ra Jesucristo jacacu ra tsi yo. Tan quihin nyaa ra tandihı̄ tunyee iñi tuhun tsihi. Cahán ra tuhun vaha, tan tava nditsin ra tuhun tsa coo yo ñayı̄vi nyito tsa ña cua naa maa.

<sup>11</sup> Nyoo tava tyiñu ra tsi yu tsa cahan yu tuhun can tsihin nyı̄vi. Tava tyiñu ra tsi yu tsa caca yu tyiñu ra, tan jacuaaha yu tuhun can tsi nyı̄vi tsa ñavin nyı̄vi Israel cuvı̄.

<sup>12</sup> Yacan cuenda nyehé yu tandihı̄ tundoho. Maa tyin ña nducahán nuu yu tsa tacan nyehé yu tundoho, tyin tsitó yu yóo tsinú iñi yu. Tyin nacuhva cuenda yu tsi yu tsi ra, tan tsitó vaha yu tyin cuvı̄ jaha cuenda ra tsi yu nda cuenda quı̄vi quitsı̄ ra inga tsaha.

<sup>13</sup> Cı̄anyı̄cun tuhun vaha tsa tsahá cuenda yu tsi un. Tan cı̄o tsihin tsa tsinú vaha iñi un tsi Nyoo. Cı̄ñi tsi ra, tan tsi nyı̄vi. Tyin tacan taahán tsi coo yoo tsa iyó iin caa ñi tsihin ra Cristo Jesús.

<sup>14</sup> Tan na jatı̄nyee maa Tatyı̄ Ii tsa iyó añima yo tsi un tan jaha cuenda vaha un tsa vaha tsa tsahá Nyoo tsi un.

<sup>15</sup> Tsa tsitó un tyin nacoq ihñi ra Figelo tan ra Hermogenes tsi yu tan tandihı̄ ca maa ra iyó ityı̄ Asia.

<sup>16</sup> Maa tyin ra Onesı̄foro na cundaahvi iñi Jutu Mañi yo tsi ra tan tsi nyı̄vi ra tyin cuaha xaan tsaha quitsı̄ ra jatı̄nyee ra tsi yu. Tan ña cahán nuu ra tsa tyehen nyı̄ yu vehe caa.

<sup>17</sup> Tan quı̄vi tsinyı̄ ra ñuu Roma ihya, ña jandihı̄ maa ra tsa nanducú ra tsi yu nda cuenda tsa nañihı̄ ra tsi yu.

<sup>18</sup> Maa Jutu Mañi yo na cundaahvi iñi ra nyehe ra tsi ra quı̄vi cua jacutuñi ra tsi yo. Tsitó maa un nácaa jatı̄nyee xaan ra Onesı̄foro tsi yo quı̄vi tsı̄yucı̄ yo ñuu Éfeso.

## 2

*Iin andaru vaha ra Jesucristo*

<sup>1</sup> Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuvı̄ yo tsihin ra.

<sup>2</sup> Tuhun tsa tsiñı̄ un cahán yu nuu nyı̄vi cuaha, jacuaaha yacan tsi nyı̄vi tsa ñi iñi tsinú iñi tsi Nyoo, ñi tsa cuvı̄ jacuaaha tsi inga nyı̄vi.

<sup>3</sup> Tan cı̄nyee iñi nyehe tundoho tumaa iin andaru vaha ra Jesucristo.

<sup>4</sup> Ndi intuhun ra cuvı̄ andaru tan ña cuvı̄ jatyañu xaan ra tsi ra tsihin inga ca tyiñu. Tyin cuñı̄ tsi tsa javaha ra maa ñi maa tsa caahán ra cuvı̄ ityı̄ nuu tsihin ra.

<sup>5</sup> Tan tacan tucu ra jası̄quı̄ tsihin balón, ña cuvı̄ jaha canaa ra tatun ña cunyee iñi ra jası̄quı̄ ra tumaa taahán maa tsi.



<sup>6</sup> Iin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuví catsi jihna ca maa ra tsa quitá nu jahá tyiñu ra.

<sup>7</sup> Tyihi tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihi tsi.

<sup>8</sup> Nducuhun iñi tsi ra Jesucristo, ra tsa nandoto tsa yahá nyehé ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacá Nyoo tsi yo tsa tsaahá cuenda ra tsi yo tyin cahan yu tsihin nyivi.

<sup>9</sup> Tan tsa cuenda tuhun can cunyeé iñi yu nyehé yu tandihi tundoho nda cuanda nuuhñi yu tsihin cadena vityin tumaa tsatyiñu cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi.

<sup>10</sup> Yacan cuenda cunyeé iñi yu nyehé yu tandihi tundoho tsa cuenda tsa vaha tsi tandihi ca nyivi tsa nacatsi maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu sii caá tsa ña cua ndihi maa coo yo.

<sup>11</sup> Tuhun ihya tuhun nditsa cuví tsi tan cua cundaa tsi:

Tatun tsihi yo cuenda cuñu ñuhu yo, coo nyito tucu yo tsihin ra.

<sup>12</sup> Tatun nyehé yo tundoho tsa cuenda ra, cua cundaca ñaha ndihi yo tsihin ra.

Tatun catyi yo tyin ñavin cuenda ra yihí yo, cua catyi tucu maa ra tyin ñavin nyivi yihí cuenda ra cuví yo.

<sup>13</sup> Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

*Tatun jahá tyiñu vaha yo, cua quita vaha yo*

<sup>14</sup> Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jativi ra naha tsi nyivi tyaá soho tsa caahán ra naha.

<sup>15</sup> Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un.

<sup>16-17</sup> Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tivi ñi jahá can. Yacan cuví tsa tahan ra Himeneo tan ra Fileto.

<sup>18</sup> Tyin quita tsiyo ra naha ityi vaha tan catyi ra naha tyin tsa yahá nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinu iñi tsi Nyoo.

<sup>19</sup> Vasu yihí juhva ñi tacan quita tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyi: “Jutu Mañi yo nacoto ra tsi nyivi yihí cuenda ra tsa nditsa.” Tan catyi tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

<sup>20</sup> Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñu nyivi. Tyin tsatyíñu tucu ñi tsa tsinu tsihin vitu tan tsihin ñuhu quisi. Yihí can tsatyíñu ñi can cuenda tyiñu nahnu, tan yihí can ndáa tahan ñi maa tsi tsatyíñu ñi can.

<sup>21</sup> Tacan tucu maa yo tatun jahá vaha yo cuenda tsi yo, cuví yo iin nyivi tsa tsatyíñu Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyíñu ra tsi yo tsa cuenda tandihí tyiñu vaha.

<sup>22</sup> Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yoocho coo iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyivi. Coo vaha tsihin tandihí nyivi yihí cuenda Nyoo, tandihí ñi tsa tsicán tahvi tsi Jutu Mañi yo, ñi iyó añima vaha.

<sup>23</sup> Tan ña tyaa soho un tsa nduve yahvi nyaá tsa caahán yuhu tahan nyivi. Tyin tsitó un tyin tsihin yacan nducuaaha ca tsihi.

<sup>24</sup> Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyivi cuví ra tsihin tandihí nyivi. Tan cuñi tsi tsa ñihi vaha ra cuhva jacuaaha ra tuhun Nyoo tsi nyivi. Tan cuñi tucu tsi tsa cunyeé iñi ra tsihi tshá nyivi.

<sup>25</sup> Tan tsihin tsa vita iñi ra cuñi tsi janaha vaha ra cuhva coo nyivi ndava iñi. Tan cuatu ra tatun ndu uvi iñi ñi tan coto ñi tsa nditsa.

<sup>26</sup> Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

### 3

*Nacaa cua coo nyivi nu cua ndihi quivi*

<sup>1</sup> Tan cuñi tucu tsi coo un tyin nu cua ndihi tyembu cua coo quivi tsa yí xaan cua coo yo.

<sup>2</sup> Tyin cua coo nyivi nyiyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sibi ñi. Ña cua nacuhva ñi tyahvi nyoo tsi Nyoo, tan ndi tsi nyivi ñi. Ña cua tyaa yahvi ñi tsi Nyoo.

<sup>3</sup> Ña cua cuñi ñi tsi nyivi ñi. Ña cua cuhva maa ñi coo taxin nyivi. Cua cahan ñi cuendu. Ña cua cuví cundaca ñaha ñi cuñu

ñuhu ñi. Xaan xaan ñi cua cuvi. Tan ña cua cuñi ñi nyehe ñi tsa vaha.

<sup>4</sup> Cua xico ñi tsi nyivi ñi. Tan cua cana iñi ñi javaha ñi náa ndihi tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo.

<sup>5</sup> Cua cunyicun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra.

Ña cutahan un tsihin nyivi javahá tacan.

<sup>6</sup> Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñi ñi.

<sup>7</sup> Cuahán ñi cua tyaa soho ñi tuhun tsa, maa tyin ña cuví maa cutuñi iñi ñi tsa cuví tsa nditsa.

<sup>8</sup> Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoq tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua coo nu cuahán ca tsi ityi nuu. Cua cahán ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinú iñi ñi.

<sup>9</sup> Maa tyin tsa cua janaha ñi, ña cua cuví nducuaaha can tyin ña xeehe caa tyin iin tsa nduve yahvi nyaá cua cuví can, tumaa tsa javahá tucu ra Janes tan ra Jambres.

*Nu ndihí tavá tyiñu ra Pablo tsi ra Timoteo*

<sup>10</sup> Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyeé iñi yu tsa cuxaán nyivi tsi yu, tan nácaa cuñi yu tsi ñi.

<sup>11</sup> Tan tsitó un nácaa cunyeé iñi yu nyehé yu tundoho tsa tsinyaq ndaha nyivi tsi yu. Tsitó un tsa tahán yu, tandihí tundoho tsa nyehé yu tsacatyí tuhun Nyoo nda ñuu Antioquia, tan ñuu Iconio, tan ñuu Listra. Maa tyin Jutu Mañi yo jacacú ra tsi yu tsitsi tandihí tundoho can.

<sup>12</sup> Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehe nyivi tundoho tsi yo.

<sup>13</sup> Maa tyin nyivi caquiñi tan nyivi jandaví ñaha, quiñi xaan ca cua coo ñi. Tyin cua jandaví ñaha ñi tsi nyivi tan cua jandaví ñaha tucu maa nyivi tsi ñi.

<sup>14</sup> Maa tyin yooho jañiñi tsi un tan coo un tsihin tsa cutuhvá un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhvá un.

<sup>15</sup> Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá

tsa cutuñi iñi un tan cacu un tsa cuenda tsa tsinú iñi un tsi ra Cristo Jesús.

<sup>16</sup> Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú iñi yu. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo.

<sup>17</sup> Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuví yo iin ra cuiti yihí cuenda Nyoo tan javaha yo tandihí tsa vaha.

## 4

<sup>1</sup> Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyivi nyito tan nyivi tsiñi quivi cua quitsi ra cundaca ñaha ra tsihin tunyee iñi tsa iyó tsi ra.

<sup>2</sup> Cahán tuhun Nyoo tsihin nyivi. Tan ña jandihí un tsa jañiñi un javaha un tacan. Cahán tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, cahán tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyee iñi cuatu nda nasama ñi cuhva iyó ñi. Tan jacuaaha tsi ñi nácaa taahán tsi coo ñi.

<sup>3</sup> Tyin coo quivi ña cua cunyee ca iñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi.

<sup>4</sup> Tan cua tyaa tsiyo ñi tsa nditsa. Tan cua tyaa soho ñi tsa ña nditsa.

<sup>5</sup> Maa tyin yooho jaha cuenda tsi un tsihin tsa vaha tsicá iñi un. Cunyee iñi nyehe tundoho. Cahán tuhun Nyoo tsihin nyivi. Vaha javaha un tyiñu tsa tsahá Nyoo tsi un.

<sup>6</sup> Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu.

<sup>7</sup> Tsa yahá cañi tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iin ra tsinú suuhva, tun tsa tsaa ra nu taahán tsi cucuñi ra. Tan tacan ñi maa tsinú iñi yu tsi Nyoo.

<sup>8</sup> Tan vityin nu cuahán ca quivi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoq yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyivi tsa ndatú tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

*Inga tyiñu tavá ra Pablo tsi ra Timoteo*

<sup>9</sup> Janumi tan quitsi ñi un, quitsi nyehe un nu nyii yu.

<sup>10</sup> Tyin ra Demas nacoq ihñi ra tsi yu tyin cuñi ca ra tsa iyó ñuu ñayivi ihya. Tan

cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia.

<sup>11</sup> Intuhun ña ra Lucas nyii tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuvi jatyinyee ra tsi yu tsihin tyiñu Nyoo.

<sup>12</sup> Jacuhun yu tsi ra Tíquico ñuu éfeso.

<sup>13</sup> Quivi quitsi un yaha un naquihin un jahma vixin yu tsa nacoq yu ñuu Troas vehe ra Carpo. Tan naquihin un tandihi libru yu, cundaha un quitsi tsihin un. Tsa ñiñi ca cuñi tsi cundaha un, yacan cuvi tandihi tutu yu.

<sup>14</sup> Ra Alejandro, ra cañi caa, cuaha xaan tsa ña vaha javahā ra tsi yu. Maa Jutu Mañi yo cua natyahvi tsi ra tsa cuenda tandihi tsa javahā ra.

<sup>15</sup> Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

<sup>16</sup> Tsa jihna ñi jacacu yu tsi yu nuu ra cumi tyiñu naha ra, yofi maa jatyinyee tsi yu. Tandihi ra naha nacoq ihñi ra naha tsi yu. Na jaha Nyoo tucahnu iñi tsi ra naha tsa cuenda yacan.

<sup>17</sup> Vasu ndi maa tandihi ra naha nacoq ihñi tsi yu, maa tyin Jutu Mañi yo jatyinyee xaan ra tsi yu. Tan tsahā ra tunyee iñi tsi yu tan cuvi cahan catsi yu tuhun ra nuu nyivi. Tan tsiñi tandihi nyivi tsa ñavin ñi Israel cuvi tsa cahan yu. Tan jacacu Nyoo tsi yu tan ña tsatsj ndicaha can tsi yu.

<sup>18</sup> Tan maa Nyoo cua jacacu tsi yu ndaha tandihi tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihi ñi tyembu. Tan na cuvi tsi tacan.

*Nu ndihi cahan ra Pablo tan tsahā ra nacumi tsi nyivi*

<sup>19</sup> Cuhva nacumi tsi ña Prisca tan tsi ra Aquila tan tsi nyivi ra Onesiforo.

<sup>20</sup> Tan jacotó ndihi yu tsi un tyin ndooq ra Erasto ñuu Corinto. Tan ndooq ra Tróximo ñuu Mileto tyin cuuhvi ra.

<sup>21</sup> Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyi ra Eubulo tan ra Pudente tsihin ra Lino tsihin ña Claudia tan tandihi ca nyivi yihí cuenda Nyoo tsihin yo.

<sup>22</sup> Na quihí ndaha Jutu Mañi yo Jesucristo tsi un. Tan Nyoo nasoco tsi tandihi ndo.

Tan na cuvi tsi tacan ñi.

## Carta Tsa Jacuhun Ra Pablo Tsi Ra Tito

*Nu tyaa ra Pablo carta tsa cuenda ra Tito*

<sup>1</sup> Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsj Nyoo, na tsinu iñi ñi tsi ra, tan nacoto ñi tsa nditsa, tan coto ñi náca taahán tsi coo yo cuhva cuñi Nyoo.

<sup>2</sup> Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandaví ñaha ra.

<sup>3</sup> Tan vityin tsa tahañ tsi quivi tsa tyaa Nyoo cuhva tyin coto yo tuhun ra. Maa ra cuví ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi.

<sup>4</sup> Jaquitsí yu carta ihya tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

*Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta*

<sup>5</sup> Nacog yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuví ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un.

<sup>6</sup> Tyin ra tsahnu cuví ityi nuu tsihin nyivi vehe ñuhu, cuñi tsi cuví ra iin ra iyó intuhun ñi ñasihi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaa cuatyí siquí sehe ra. Tun tacan iyó ra, cuví cuví ra ityi nuu tsihin nyivi vehe ñuhu.

<sup>7</sup> Tyin ra cuví ityi nuu tsihin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuví ra iin ra cuiti iyó nuu Nyoo. Iin ra cahnu jahá tsi ña cuví cuví ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa kuhun tsihin iin cuhva ña vaha.

<sup>8</sup> Maa tyin cuñi tsi cuví ra iin ra sii cuñi tatun tsaa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuví ra iin ra javahá tsa vaha, iin ra tsicá iñi tsa vaha, iin ra tsa nacuhvá cuenda vaha tsi ra tsi Nyoo, iin ra tsitó cundaca ñaha tsi maa ra.

<sup>9</sup> Cuñi tsi cunyicun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan

ñihi ra cuhva jacuahá ra tsi nyivi caahán tyin ña nditsa tuhun caahán yo.

<sup>10</sup> Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra.

<sup>11</sup> Cuñi tsi tsa casí yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun.

<sup>12</sup> Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyeheñ: “Nyivi Creta, vatya xaan ñi. Cuví ñi tumaa cuví quiti. Cuaha xaan tsatsi ñi tan jutsan xaan ñi”, catyi ra.

<sup>13</sup> Tan nditsa tsa cahan ra. Yacan cuenda cuñi tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo.

<sup>14</sup> Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñi coto tsa nditsa.

<sup>15</sup> Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñi ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñi ñi, tyin nda cuenda cuhva tsicá iñi ñi tan tsa tsíñi tuñi iñi ñi tan ña vaha.

<sup>16</sup> Catyi ñi tyin tsitó ñi tsi Nyoo, maa tyin tsihin tsa ña vaha javahá ñi, nyehe yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

## 2

*Tuhun vaha tsa tsaha Nyoo tyin jacuahá yo*

<sup>1</sup> Maa tyin yoocho, jacuahá tsa vaha tsa nacatsi tahan tsihin tsa jacuahá Nyoo tsi yo.

<sup>2</sup> Jacuahá tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñi tsi tsa cuñi ra naha tsi Nyoo tan tsi nyivi. Tan cunyehe iñi ra naha tandihi náa tundoho nyehe ra naha.

<sup>3</sup> Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi.

<sup>4</sup> Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi.

<sup>5</sup> Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yí ñi tsi ñi, tyin

tacan tan ña cuvi cahan nyivi ndavaha ñi siqui tuhun Nyoo tsa cuenda cuhva iyó ñi.

<sup>6</sup> Tacan tucu ra cuatyí naha ra. Cuhva cuenda tsi ra naha na catsi coo ra naha.

<sup>7</sup> Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuaha tsi ra naha tsihin tsa vii tan tsihin tsa vaha.

<sup>8</sup> Maa ñi tuhun vaha cahan un tyin tacan tan yoñi cuvi tyaa cuatyí siqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

<sup>9</sup> Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsi-toho ra naha. Na javaha ra naha tandihi tsa caahán tsi-toho ra naha. Tan na ña nacahan ra naha nu caahán tsi-toho ra naha.

<sup>10</sup> Tan na ña suhu ra naha tsa tsii tsi-toho ra naha. Na jaha vaha ra naha cuenda tandihi ndaha tyiñu tsi-toho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

<sup>11</sup> Tyin Nyoo janahá ra tsa vaha tsa iyó tsi ra tsi nyivi tan cuñí ra jacacu ra tsi tandihi ñi.

<sup>12</sup> Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñí ñi can. Tan cuiñi coo yo nu ñuhu ñayivi ihya, na cundaca ñaha vaha yo tsi yo tumaa cuñí maa Nyoo.

<sup>13</sup> Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuvi Nyoo yo, ra cahnu cuvi, ra jacacú tsi yo.

<sup>14</sup> Tсахá ra ñayivi ra tsa cuenda yo tyin tacan tan jacacu ra tsi yo ndaha tandihi tsa caquiñi. Tan nacatya ra tsi yo na cuvi yo nyivi vaha, tan cuvi yo tsii maa ra, tan javaha yo maa ñi maa tsa vaha.

<sup>15</sup> Yacan cuñí tsi jacuaha un tsi nyivi. Jandu iin iñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

### 3

*Cuhva taahán tsi javaha nyiviyihí cuenda Nyoo*

<sup>1</sup> Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyi ra cumí tyiñu tyin javaha ñi tsihin tsa nñi iñi ñi.

<sup>2</sup> Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuvi ñi nyivi vaha. Na masu jaha ñi añima ñi tsihin tandihi nyivi.

<sup>3</sup> Tyin nda cuanda maa yo tan ña vaha javahá yo nu quitsi tsi. Soho xaan tsicoo yo. Ndava xaan iñi yo. Ña tsicá yo ityi vaha tyin jandavi ñaha xaan nu ña vaha tsi yo. Tan tsindaca ñaha tandihi tsa ña vaha tsa cuñi cuñu ñuhu yo tsi yo. Tan javahá yo tandihi cuhva cuñi maa yo. Tan cuñi yo coo tandihi tsa iyó tsi inga nyivi tsi yo. Ndasí tsicá iñi yo nyehe yo tsi nyivi yo. Tan tacan tucu maa nyivi ndasi cuñi ñi nyehe ñi tsi yo.

<sup>4</sup> Maa tyin Nyoo vaha xaan iñi ra tan jacacu ra tsi yo. Tsihin yacan janahá ra tsi yo tyin cuñi ra tsi tandihi nyivi.

<sup>5</sup> Ñavin tsa cuenda tsa vaha javahá yo tan jacacu ra tsi yo, tyin jacacu ra tsi yo tsa cuenda tsa cundaahvi iñi ra nyehe ra tsi yo. Tan tsihin niñi ra Jesús nacatya ra cuatyí yo, tan nacacu tsa ya jahá Tatyí lí ra, tan tsahá ra ñayivi nyito coo yo.

<sup>6</sup> Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí lí ra añima yo.

<sup>7</sup> Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo.

<sup>8</sup> Tandihi tuhun ihya tuhun nditsa cuvi tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihi nyivi tatun tyaa yahvi ñi itsi.

<sup>9</sup> Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyivi. Ña tyihí un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsiñi tuñi tsahá can.

<sup>10</sup> Tatun iyó nyivi cuñi natahvi sava tsi nyivi tsicá vehe ñuhu, çana tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaa yahvi ñi tsa caahán un, çasi nu caca ñi vehe ñuhu.

<sup>11</sup> Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

*Tyiñu tavá ra Pablo tsi ra Tito*

<sup>12</sup> Cua jaquitsi yu tsi ra Artemas, a ra Tíquico nu nyii un. Tan quivi tsa ra, nducu cuhva tan cahun un nda ñuu Nicópolis tyin ndacan cua ñihi tahan yo. Tyin tyaa yu cuhva tsa ndoo yu ndacan yoo tsitin.

<sup>13</sup> Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cuhva tsa tsiñi ñuhu tsi ra naha nu tsicá ra naha caahán ra naha tuhun

Nyoo. Tacan tan ña cumañi tsa cumañi tsi ra naha.

<sup>14</sup> Na cutuhva nyivi yihí cuenda Nyoo javaha ñi tsa vaha tan jatinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

*Nu ndihi cahan ra Pablo*

<sup>15</sup> Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñi tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandihí ndo.

Tan na cuví tsi tacan ñi.

## Carta Tsa Jacuhun Ra Pablo Tsi Ra Filemón

*Nu quitsahā tyaá ra Pablo carta cuenda ra Filemón*

<sup>1</sup> Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihí ra nacumi tsi un. Cuñí xaan ndí tsi un tsa cuenda tsa iin ñi tyiñu ra Cristo jahá tyiñu yo.

*Nu quitsahā tyaá ra Pablo carta cuenda ra Filemón*

<sup>2</sup> Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihí nyívi ndu iin yuvehe un.

<sup>3</sup> Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo añima ndo.

*Ra Filemón tsinú xaan iñi ra tsi ra Jesús tan cuñí xaan ra tsi nyívi*

<sup>4</sup> Tandihí ñi tsaha tsa tsicán tahvi yu tsi Nyoo tan nducuhún iñi yu tsi un,

<sup>5</sup> tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandihí nyívi yihí cuenda ra.

<sup>6</sup> Tan tsicán yu tsi Nyoo tsa cuenda tandihí nyívi tsa natsinu iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo.

<sup>7</sup> Tan sñi xaan cuñí yu tan iin xaan cuñí yu tsa cuenda tsa cuñí xaan un tsi nyívi tsa yihí cuenda ra Cristo tan jandu iin xaan un iñi ñi.

*Nu tsicán ra Pablo tumañi iñi tsi ra Filemón tsa cuenda ra Onésimo*

<sup>8</sup> Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu.

<sup>9</sup> Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyíi yu vehe caa ihya tsa cuenda ra Cristo.

<sup>10</sup> Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyíi yu vehe caa ihya.

<sup>11</sup> Tahan tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu.

<sup>12</sup> Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra.

<sup>13</sup> Tsicá tucu iñi yu tsa ndoo ra nu nyíi yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un.

<sup>14</sup> Maa tyin ña cuñí yu jandoo yu tsi ra tyin ña tsitó yu nácaa cua cahan un. Tan ña cuñí yu jañiñi yu tsi un tun ña cuhva un tsa cunyii ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu.

<sup>15</sup> Vasiqú maa Nyoo cuñí tsa cunu ra nuu un juhva quivi tan vityin cua tsa nyico ra yuvehe un tan coo cuvi ra tsihin un.

<sup>16</sup> Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñí xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ñi un cua cuví tsi ra tyin cuví tucu ra yañi un tsa cuenda ra Cristo.

<sup>17</sup> Tun nditsa un tsa cuñí un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un.

<sup>18</sup> Tatun javaha ra iin tsa ña vaha tsi un o nyaá cuenda ra tsi un, tyahvi maa yu can.

<sup>19</sup> Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayívi iyó un tsi yu.

<sup>20</sup> Yañi, javaha tumañi iñi ihya tsi yu, tumaa ra yihí cuenda ra Cristo; na cusñi iñi yu tan na ndu iin iñi añima yu tsihin tsa cua javaha un.

<sup>21</sup> Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un.

<sup>22</sup> Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

*Nu ndihí tyaq ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra*

<sup>23</sup> Ra Epafras tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un.

<sup>24</sup> Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu.

<sup>25</sup> Na nasoco xaan Jutu Mañi yo Jesucristo tsi ndo.

Tan na cuvi tsi tacan ñi.

## Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

*Caahán Nyoo tsihin yo tsihin yuhu Sehe ra*

<sup>1</sup> Tahān tsanaha cuaha xaan tsaha, tan cuaha xaan cuhva caḥan Nyoo tsihin tsii tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsaḥa cuenda tsi nyivi tuhun caahán Nyoo.

<sup>2</sup> Tan vityín, nu cua ndihi tyembu ihya tsatyíñu ra tsi Sehe ra tsa caahán ra tsihin yo. Iín ñi cuví ra tsihin Sehe ra tan javahā ra tandihí tsa iyó. Tan nacuhvā cuenda ra tandihí can tsi Sehe ra.

<sup>3</sup> Tan maa Sehe ra janahá ra tsa sii caá ra, tyín juvín ra Sehe ra cuví tixahñu ra tyín juvín ñi cuhva caá maa ra caá ra Sehe ra. Tan tsihin tunyee iñi tuhun caahán ra, yihí ndaha ra tandihí tsa iyó. Tsa yahā tsa nacatyā ra cuatyí yo, tan tsinyaa ra xiín cuaha Nyoo nda gloria.

*Cahnu ca cuví Sehe Nyoo tan ñavin ca ángel*

<sup>4</sup> Sehe Nyoo cahnu xaan ca cuví ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel.

<sup>5</sup> Tyín Nyoo ña catyí ra ndí iín tsaha tsihin ndí intuhun ángel tyehen:

Yooho cuví Sehe yu.  
Tan tsahá yu ñayivi coo un vityín.  
Tan ndí ña caḥan ra tuhun ndí intuhun ángel tyehen:

Yuhu cua cuví Jutu ra.  
Tan maa ra cua cuví Sehe yu.

<sup>6</sup> Maa tyín quivi jaquitsí Nyoo tsi Sehe mañi ra nu ñuhu ñayivi, catyí ra:  
Tyín tandihí ángel ra taahán tsi jacahnu ra naha tsi Sehe ra.

<sup>7</sup> Tan caḥan tucu ra tuhun ángel tan catyí ra: Ángel yu cuví ra naha tumaa iín tatyí jahá yu,

jahá tyiñu ra naha tyiñu yu, tan cuví tucu ra naha tumaa ñuhu, catyí Nyoo.

<sup>8</sup> Maa tyín tuhun Sehe ra catyí ra tyehen: Nyoo cuví un, tan ña cua cundihí maa tsandacá ñaha un. Tan tsa ndacá ñaha un ndaa tsi tan nditsa tsi.

<sup>9</sup> Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sii cuñí un, tan ñavin ca tsi ra cutahán tsihin un naha ra.

<sup>10</sup> Tan catyí tucu Nyoo tsihin Sehe ra tyehen: Yooho cuví Jutu Mañi tandihí nyivi. Quivi jihna ñi juvín un javahā ñuhu ñayivi,

tan tsihin ndaha un javahā un andivi.

<sup>11</sup> Ñuhu ñayivi tan andivi tan tandihí maa tsa iyó cua cundihí tsi, maa tyín yooho, ña cua cundihí un, tyín tacan ñi iyó maa un.

Tandihí maa can cua ndutsahnu can tumaa ndutsahnú jahma.

<sup>12</sup> Tan cua quihí tahnu can tumaa tyihí tahnu yo iín jahma.

Tan cua nasama can tumaa nasamá nyivi jahma ñi.

Maa tyín yooho iín ñi maa ra cuví un tan ña cua nasama un.

Tan ña cua cundihí maa ñayivi un tyín tacan ñi iyó maa un, catyí Nyoo tsihin Sehe ra.

<sup>13</sup> Nyoo ndí iín tsaha ña caḥan ra tsihin ndí intuhun ángel tumaa caḥan ra tsihin Sehe ra tyehen:

Cunyaa xiín cuaha yu ihya tsitsi tsa nacuhva cuenda yu tsi nu xaan iñi tsi un nahnu tsi un.

<sup>14</sup> Tandihí ángel, tatyí cuví ra naha. Tava tyiñu Nyoo tsi ra naha tsa cacá ra naha tyiñu ra tan jatyinyee ra naha tsi nyivi tsa cua cacu.

## 2

*Cahnu xaan cuví tsa jacacú Nyoo tsi yo*

<sup>1</sup> Yacan cuenda cuñí tsi tyaa yahvi xaan ca yo tuhun nditsa tsa tsiñí yo, coto nacoo ihñi yo itsi.

<sup>2</sup> Tahān tsanaha tsaḥa cuenda ángel ley Nyoo tsi ra Moisés. Tan janahā Nyoo tyín nditsa tan taahán tsi tyaa yahvi nyivi itsi. Tan nyivi tsa tsicoo cuatyí tan ña tyaa yahvi ley can, tatsí tuñi ra tsi ñi tumaa catyí maa ley can.

<sup>3</sup> Tun tacan tahān ñi can quivi can znácaa cua javaha yoo vityín, tan cuví cacu yo tatun ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya. Juvín ñi maa Jutu Mañi yo Jesucristo cuví ra tsa caḥan jihna tyín cuví cacu yo. Yahā can tan caḥan nyivi tsa tsiñí tsa caḥan ra. Nyehe ñi tyín nditsa tan nacatyí tuhun ñi itsi tsihin yo.

<sup>4</sup> Tan siín tyín Nyoo janahā catsi ra tsi yo tyín nditsa tsa jacacú ra tsi yo. Janahá ra can tsi yo tsihin tsa javahā ra cuaha tsa iyo. Tan tsaḥa tucu ra Tatyí lí ra tsi yo tyín jatyinyee tsi tsi yo tsa javaha yo tyiñu tsa cuñí ra javaha yo. Tan tsihin tandihí yacan janahá ra tsi yo tyín nditsa tsa jacacú ra tsi yo.

*Ra Jesucristo quitsí ra cuví ra rayi nu ñuhu ñayivi ihya*

<sup>5</sup> Nyoo ña tsaḥa ra tsa cundaca ñaha ángel ñuhu ñayivi tsa tsa cua coo tsa caahán yo tuhun vityín.



<sup>6</sup> Tyin iyó iin nu tyaa iin ra nu tutu Nyoo tyehen:

Nyoo Jutu yu zyóo ra cuví rayi nu ñuhu ñayivi ihya tyin ñuhú iñi un tsi ra?

¿Tan yóo ra cuví ra tyin cutuñu iñi un tsa cuenda ra?

<sup>7</sup> Tyin ndaahvi ca jahá un tsi ra juhva tyembu, tan ñavin ca ra ángel naha ra. Maa tyin jacahnú un tsi ra. Tan jahá un tsa ñayivi tsi ra.

Tan tsaha un tsa quihí ndaha ra tandihí tsa javaha un.

<sup>8</sup> Tandihí can tyaa cuenda un ndaha ra.

Tan nduve maa náa ña tsaha cuenda Nyoo quihí ndaha ra. Tan ñaha ca nyehé yo tyaa yahvi tandihí yacan tsi ra.

<sup>9</sup> Maa tyin nyehé yo tsi ra Jesús tyin nduluhlu ra jahá Nyoo juhva tyembu tan ñavin ca ra ángel naha ra. Tan janduluhlu Nyoo tsi ra tsa cuenda tsa cuñi xaan ra tsi yo. Tan tsaha ra tsi ra Jesús quitsi ra quitsi cúu ra tsa cuenda tandihí yo. Tan vityin jahá xaan Nyoo tsa cahnu tsi ra tan jacahnú xaan ra tsi ra tsa cuenda tundoho tsa nyehé ra quivi can.

<sup>10</sup> Tandihí maa tsa iyó, tsa cuenda maa Nyoo cuví tsi. Maa ra javaha itsi. Tan cuñi ra kuhva ra tandihí tsa sii caá tsa iyó andivi tsi tandihí sehe ra. Yacan cuenda janyehé ra tundoho tsi ra Jesucristo, ra tsa jacacú tsi yo, tan tsihin yacan janduvaha ra tsi ra.

<sup>11</sup> Ra Cristo tsa jacacú tsi yo, Sehe Nyoo tsi ra. Tan juvin ñi sehe Nyoo nanduvj yoo tsa tsinú iñi tsi ra. Yacan cuenda ña cahán nuu ra Cristo tsa caahán ra tyin yañi ra tan kuhva ra cuví tsi yo, tyin iin ñi Jutu yo tsihin ra.

<sup>12</sup> Tyin catyí ra Cristo nu tutu Nyoo tyehen:

Cua cahan yu tuhun un tsihin yañi yu.

Tan cua jacahnu yu tsi un tsihin yaa nu ndu iin yo.

<sup>13</sup> Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaha ra tsi yu, catyí ra.

<sup>14</sup> Yoo tsa cuví yo nyivi ñuhu ñayivi, iyó cuñu ñuhu yo tan ñiñi yo. Tacan cuví ra Cristo, tyin tun tsa ña tsicoo cuñu ñuhu ra tan ñiñi ra, ña cua cuví cúu ra tan janaa ra tsi nu ña vaha, nu tsa tsahñi tsi nyivi.

<sup>15</sup> Tacan javaha ra tan jacacú ra tsi nyivi tsa tsicoo yuuhví jahá tuhun tsihi. Cuví ñi tumaa muu nu ña vaha tyin tandihí ñi quivi tsicoo yuuhví ñi.

<sup>16</sup> Tan tsa nditsa vaha tyin ña quitsi ra quitsi jatyinyee ra tsi ángel. Tyin quitsi ra quitsi jatyinyee ra tsi nyivi tata ra Abraham.

<sup>17</sup> Yacan cuenda ñiñi cuñi tsi tsa cuví ra tumaa yoo tsa cuví yo yañi ra tan kuhva ra tyin tacan tan cuví ra iin ra cundaahvi iñi tsi yo, tan cuví ra jutu tsahnu cuví ityi

nuu tsa cuenda yo nuu Nyoo tyin jandaá ra tandihí maa tan quihin nyaa ra cuatyí yo tsihin tundoho tsa nyehé ra.

<sup>18</sup> Tan tsa cuenda tsa nyehé ra tundoho quivi nducú kuhva nu ña vaha tsi ra, tsitó ra nácaa cuñi yo tun nyehé yo tundoho. Yacan vityin nyaá ra tsa jatyinyee ra tsi yo tun nyehé yo tundoho tsa nducú kuhva nu ña vaha tsi yo.

### 3

*Cahnu ca cuví ra Jesús tan ñavin ca ra Moisés*

<sup>1</sup> Nyooho, yañi, tsa jandu ii Nyoo, tan tsa nacatsj ra tyin coo ndo tsihin ra nda gloria, nyehé vaha ndo kuhva iyó ra Cristo Jesús, juvin ra jaquitsi Nyoo tyin caca ra tyiñu ra tan cuví ra jutu tsahnu cuví ityi nuu tsa cuenda yoo tsa tsinú iñi tuhun ra.

<sup>2</sup> Ra Cristo javaha ra tandihí tsa cahan Nyoo tyin javaha ra, tumaa javaha tucu ra Moisés tyiñu tsa tsaha Nyoo tsi ra tsa jaha cuenda ra vehe Nyoo tsa cuví nyivi Israel.

<sup>3</sup> Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra.

<sup>4</sup> Tyin maa ñi iyó ra javahá intuhun intuhun vehe, maa tyin Nyoo cuví ra tsa javaha tandihí maa tsa iyó.

<sup>5</sup> Ra Moisés tyaa yahvi ra tsi Nyoo tan javaha ra tyiñu tsa tsaha Nyoo tsi ra tyin jahá cuenda vaha ra vehe Nyoo tsa cuví nyivi Israel, tan juvin ñi jacotó tucu ra tsi nyivi tsa cua javaha Nyoo nu cuahán ca tsi.

<sup>6</sup> Maa tyin ra Cristo, Sehe Nyoo, tyaa yahvi tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñi yo nyicún yo tsi Nyoo tan nyitá vaha iñi yo tsi ra nda cuenda nu ndihi, tan tacan ñi sii cuñi yo ndatú yo tsa cua ñihi yo.

*Nyivi tsinú iñi tsi Nyoo, quitatú ñi tsihin ra*

<sup>7</sup> Yacan cuenda cuñi tsi jaha cuenda vaha yo tsi yo tumaa catyí Tatyí Ii Nyoo tyehen: Tatun tsiñi ndo tsa caahán Nyoo tsihin ndo vityin,

<sup>8</sup> ña jandava ndo aña ndo, tumaa javaha nyivi tsa ña tyaa yahvi tsi Nyoo quivi nducú kuhva ñi tsi ra nu tsicá ñi nuu tsiqui.

<sup>9</sup> Tyehen catyí Nyoo:

Tsii tsahnu ndo nducú kuhva ñi tsi yu, vasu ndi maa nyehé ñi tsa javaha yu tsitsi tsa uvi xico cuiya.

<sup>10</sup> Yacan cuenda cuxaan yu tsihin nyivi can, tan catyí yu tyehen: “Ña iin maa cuñi nyivi ihya

tan ña cuñí ñi cunyicun ñi ityi janahá yu tsi ñi.”

11 Yacan cuenda cuxaąn yu tsihin ñi, tan caąan catsi yu tsihin ñi,

tyin ña cua quitatu ñi tsihin yu, catyí Nyoo.

12 Yacan cuenda yañi, jaąa ndo cuenda tsi ndo tan ña cacu uvi iñi ndo tsitsi añima ndo coto jandihi ndo tsa tsinu iñi ndo tsi Nyoo nyito tan coto nacoo ndo tsi ra.

13 Maa tyin jandu iin tahan ndo iñi ndo tandihi ñi quivi, tsitsi tsa tsahá tsi cuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa caquĩni tsi ndo.

14 Tyin tun ña jandihi yo tsa nyitá iñi yo tsi Nyoo nda cuanda naa ñuhu ñayivi tumaa javahá yo nda quivi quitsaha yo, cua ñihi yo tsa vaha iin caa ñi tsihin ra Cristo tyin cunyeé iñi yo ndatú yo tsi ra.

15 Yacan tacan cuñí tsi jaha yo cuenda tsi yo tumaa catyí tutu Nyoo:

Tatun tsiñi ndo tsa caahán Nyoo tsihin ndo vityin

Ña jandava ndo añima ndo, tumaa javaha nyivi tsa ña tyaą yahvi tsi Nyoo —catyí tutu Nyoo.

16 ¿Yóo nyivi cuví ñi tsiñi tsa caąan Nyoo tan ña tyaą soho ñi? Nyivi ihya cuví cuvi Israel tsa tava ra Moisés Egipto tahań tsanaha. Juvín ñi can ña tyaą soho.

17 Tan ¿yóo nyivi cuxaąn Nyoo tsitsi tsa uvi xico cuiya? Juvín ñi maa ñi tyin tsicoo cuatyí ñi. Tan tsihi ñi nu tsiqui, juvín ñi maa nu tsicá ñi.

18 ¿Tan yóo tsihin caąan catsi Nyoo tye-hen?:

—Ña cua quitatu ndo tsihin yu.

Juvín ñi tsihin ñi tsa ña tyaą soho can.

19 Ihya nyehé yo tyin ña cuví ñihí ñi qui-tatu ñi tsihin Nyoo tyin ña tsinu iñi ñi tsi ra.

#### 4

1 Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndi intuhun ndo tan ña cua ndoo ihñi ndo.

2 Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ña tsinu iñi ñi itsi.

3 Yoo tsa tsinu iñi tsi Nyoo, quitatú yo tsihin ra. [Maa tyin ña quitatu nyivi tsa ña tsinu iñi tsi ra] tyin catyí ra:

Yuhu cuxaąn yu tsihin ñi tan caąan catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan caąan Nyoo tsihin ñi ican], maa tyin [tsa iyó tuhun tsa cuvi quitatu yo tsihin Nyoo nda quivi] ndihí jaąa tyiñu ra javaha ra ñuhu ñayivi.

4 Tyin yihí nu tutu Nyoo caahán tsi tyeheh tuhun tsa tsinu utsa quivi nu ndihi vitya:

Tsa ndihí jaąa tyiñu Nyoo, quitatú ra tsa tsinu utsa quivi.

5 Tan catyí tucu tsi tyeheh:

Ña cua quitatu ñi tsihin yu, catyí Nyoo.

6 Nyivi tsa tsiñi jihna tuhun tsa jacacú Nyoo tsi yo ña cuví quitatú ñi tsihin ra, tsa cuenda tsa ña tyaą yahvi ñi tsa caąan ra tsihin ñi. Maa tyin vityin ndi iyó ndatu tsa quitatu inga nyivi tsihin ra.

7 Tsa yaha tsa ña tyaą yahvi nyivi Israel tsa caąan Nyoo, tan tyaą ra inga quivi cuvi quitatu yo tsihin ra, tan quivi can cuvi tyembu vityin. Tacan caahán Nyoo nu tutu ra nu tyaą ra David tyeheh:

Vityin tatun nyooho tan tsiñi ndo tsa caahán yu,

Ña jandava xaan ndo añima ndo, catyí Nyoo.

8 Tun tsatyn tsaha ra Josué nu quitatu nyivi Israel, ña cua cahan Nyoo tsa cuenda inga quivi.

9 Yacan cuenda cuví quitatu nyivi yihí cuenda ra tsihin ra.

10 Tyin nyivi quitatú tsihin Nyoo, ña tsicá iñi ñi tsa cuenda tyiñu jahá ñi tyin quitatú añima ñi tumaa quitatú Nyoo quivi ndihí jaąa tyiñu ra.

11 Cuñi tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javaha nyivi tsicoo tsanaha tsa ña cuñi tsinu iñi tsi ra.

12 Tyin tuhun Nyoo, nyito tsi, tan iyó tun-yeé iñi itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiń tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo.

13 Nduve maa tsa javaha Nyoo tan cuví cunu xeehe can nuu ra, tyin tandihi maa tan nyehé ra. Tan juvín tsi ra cua cuhva cuenda yo tsa javahá yo.

*Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo*

14 Ra Jesús Sehe Nyoo, juvín ra cuví jutu tsaahnu cuví ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihi yo tsa tsinu iñi yo tsi ra.

15 Tyin ra tsa cuví jutu tsa cuenda yo cuví naquihin ndaahvi ra tsi yo tatun cuiihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehe tucu maa ra tandihi nu tundoho quivi nducu cuhva nu ña vaha tsi ra, maa tyin ña tsicoo cuatyí ra.

16 Yacan cuenda cuñi tsi nanducu yo tsi Nyoo tan ndacan yo tsi ra tsihin tsa ña yu-uhví yo na cundaahvi iñi ra nyehe ra tsi

yo tan cuhva ra tunyee iñi tsa iyó tsi ra tsi yo, tan jatinyee ra tsi yo quivi nyehé yo tundoho.

## 5

<sup>1</sup> Tandihí ñi jutu tsaahnu tsa cuví ityi nuu tsa nacatsj Nyoo tsitsi tsa tandihí nyívi Israel, nacatsj ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quiti tsa cuenda cuatyí ñi.

<sup>2</sup> Tan vatsi tsaha juvin ñi ndaahvi cuñi ra cuví jutu quívi nducu cuhva nu ña vaha tsi ra, yacan cuenda cuví cundaahvi iñi ra nyehé ra tsi nyívi ña cutuñi vaha iñi tuhun Nyoo tan nyívi ña nyicún vaha tsi Nyoo.

<sup>3</sup> Tan yacan cuenda tsaahñi ra quiti tan jamañi ra can nuu Nyoo tsa cuenda cuatyí maa ra tan tsa cuenda cuatyí nyívi.

<sup>4</sup> Ndi intuhun maa nyívi tan ña cuví cuví ñi jutu tun ñavin maa Nyoo nacatsi tsi ñi. Tyin maa Nyoo cuví ra nacatsi tsi ra cua cuví jutu, tan tsahá ra ndatu tsi ra tsa cuví ra jutu, tumaa javahá ra tsihin ra Aarón tahan tsanaha.

<sup>5</sup> Tan tacan tucu ra Cristo, ñavin maa ra tyaá tyiñu can tsi ra, tyin maa Nyoo tsahá tsa cuví ra jutu tsaahnu tsa cuví ityi nuu, tumaa catyí ra:

Yooho cuví Sehe yu.

Yuhu tsahá yu ñayívi coo un vityin, catyí Nyoo tsihin ra Cristo.

<sup>6</sup> Tumaa catyí tucu ra tsihin ra nu inga nu caahán tsi tyehen:

Ña cua cundihi maa tsa cuví yooho jutu, tumaa cuví ra Melquisedec.

<sup>7</sup> Quívi tsicoq ra Cristo nu ñuhu ñayívi ihya, tsican tahvi ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsihi tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihí tsa catyí Nyoo tyin javaha ra.

<sup>8</sup> Yacan cuenda vasu ndi maa Sehe Nyoo tsi ra Cristo, cutuhva ra tyaá yahvi ra tsi Nyoo tsihin tsa nyehé ra tundoho.

<sup>9</sup> Tsa yahá tsa javahá ra tandihí cuhva cuñi Nyoo tyin javaha ra, tacan tan tsahá Nyoo tsi ra tsa jacacú ra tsi tandihí nyívi tsa tyaá yahvi tsa caahán ra tyin tacan tan coo cuíi ñi tsihin Nyoo.

<sup>10</sup> Tyin maa Nyoo tavá tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

*Na ña jandihí yo tsa tsinú iñi yo tsi Nyoo*

<sup>11</sup> Cuví cahan cuaha yo síqui tuhun ihya, maa tyin yíi xaan nacatyí tuhun yu nácaa cuahán tsi, tyin nyoooho ña cuñi ndo cutuñi iñi ndo.

<sup>12</sup> Tsa naha xaan yihí ndo cuenda ra Cristo, yacan tsa taahán tsi jacuaha ndo tsi

inga nyívi. Maa tyin nyoooho cuví ndo tumaa cuví lee tsa tyaxín tsa ñaha ca cuví catsi tyin cuñi tsi tsa tyaá soho nyico ndo tuhun tsa tsiñi ndo tsa jihna ñi.

<sup>13</sup> Tyin nyívi cuñi tyaá soho tuhun tsa ña yíi cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo.

<sup>14</sup> Maa tyin nyívi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyívi tsa tsatsi nyayu tyin nacotó ñi ndáa tsa vaha tan ndáa tsa ña vaha.

## 6

<sup>1</sup> Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cahun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yahá cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra.

<sup>2</sup> Tan na ña ndoo yo vaha tsihin tuhun tsa cutuhva yo cuenda tsa tsicoondutyá yo, tan tsa tyisó ndaha yo síqui nyívi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihí nyívi tsa yaha cúu ñi, tan tsa cuenda tucu tsa cua cutuñi tandihí nyívi nuu Nyoo tan yihí ñi cua cahun cuíi ñi anyaya. Na ña ndoo yo vaha tsihin yacan ñi.

<sup>3</sup> Nacuhun ca yo ityi nuu tatun Nyoo tsaha ra ndatu.

<sup>4</sup> Tyin nyívi tsa tsa yahá naquihjin cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí Ii Nyoo añima ñi.

<sup>5</sup> Tan tsitó ñi tyin vaha tuhun Nyoo. Tan tsa nyehé ñi juhva nácaa cua cuví tsa cua coo yo nu ñuhu ñayívi tsa, tyin ñihí ñi tunyee iñi tsa iyó tsi Nyoo.

<sup>6</sup> Tatun tsa naquihjin cuenda ñi tandihí yacan, yaha can tan jandihí ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyívi.

<sup>7</sup> Añima nyívi cuví tsi tumaa ñuhu nu jahá tyiñu nyívi, tyin tandihí ñi tsaha tsa cuún savi, nacohó ñuhu can ndutyá savi can. Tatun vaha ñuhu can, vaha tsicoó tsa tatsi nyívi, tan nasocó Nyoo ñuhu can.

<sup>8</sup> Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyívi tsa jandihí tsa tsinú iñi tsi Nyoo.

<sup>9</sup> Yañi, vasu ndi maa caahán ndi tacan, maa tyin tsitó vaha ndi tyin nyoooho nasocó Nyoo tsi ndo tyin jacacú ra Cristo tsi ndo.

<sup>10</sup> Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyívi yihí cuenda ra, tan nyehé

tucu ra tyin tsa yaha xaan jatyinyeé ndo tsi ñi, tan ndi jatyinyeé ca ndo tsi ñi vityin.

<sup>11</sup> Cuñí ndi tsa jañihi ca ndo ndu iin ñi ndo nda cuanda quítsi Jutu Mañi yo, tyin tacan tan ñihi ndo tandihi tsa ndatú ndo.

<sup>12</sup> Ña cuñí ndi tsa jutsan xaan jaha ndo tsi ndo, maa tyin cuñí ndi tsa coo ndo tumaa iyó nyívi tsa tsinú vaha ñi tsi Nyoo tan javaha ndo tumaa javahá ñi. Tyin ñi ican cunyeé xaan ñi ñi ndatú ñi, tan ñihí ñi tsa catyí Nyoo tyin cuhva ra tsi yo.

<sup>13</sup> Tyin quívi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu ra juvin ñi sívi maa ra, tyin ña cuví cuatyíñu ra náa inga ca sívi tyin nduve nyívi cahnu ca cuví tan ñavin ca maa ra.

<sup>14</sup> Tan catyí ra tsihin ra Abraham tyehen: “Tsa ndítsa tyin cua nasoco xaan yu tsi un tan cuaha xaan tata un cua cuví jaha yu”, catyí ra tsihin ra.

<sup>15</sup> Ra Abraham ñihí ra tsa catyí Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé ñi ra ndatú ra can.

<sup>16</sup> Iin nyívi tun tyihí ñi cuhva tsa cuhva ñi tsa cua cuhva ñi tsi yo, tsatyíñu ñi sívi iin nyívi cahnu ca cuví tan ñavin ca maa ñi. Tsihin yacan ndoó ñi tuhun tsihin yo.

<sup>17</sup> Nyoo tsatyíñu ra juvin ñi sívi maa ra quívi catyí ra tyin cuhva ra tsa cuhva ra tsi nyívi ra. Javahá ra tacan tyin cuñí ra tsa coto ñi tyin cua jandaa ra tsa cahán ra tsihin ñi tan ña cua nasamá tuhun cahán ra.

<sup>18</sup> Tan iyó uvi taahan tsa ña cuví nasama. Iin tsi cuví tsa cuhva Nyoo tsa catyí ra tyin cuhva ra tsi yo, tan inga tsi cuví tsa tsatyíñu ra juvin ñi sívi maa ra. Nyoo ña vatya ra. Yacan cuenda tandihi yoo tsa nyanaá tsi ra, ñi cuñí yo nyitá ñi yo tsi ra, tan ndatú yo tsa ñihi yo tsa catyí ra tyin cuhva ra tsi yo.

<sup>19</sup> Tumaa iin yutun ndoo tsa tsicá nuu ndutya ñuhu nuuhñi tsi tsihin iin caa vee coto cahun tsi tsihin tatyí, tacan nyitá ñi yo tsa jacacú ra Cristo tsi yo. Tan tsa nyitá ñi yo tsi ra, cuví tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahví sava jahá jama.

<sup>20</sup> Ican quíhví ra Jesús tyin tacan tan nuñá ra ityí cahun yo nu nyaá Nyoo. Tan ña cua cundihi maa tsa cuví ra Jesús jutu tsaahnu cuví ityí nuu, tumaa cuví ra Melquisedec.

## 7

*Ra Jesús cuví ra jutu tumaa cuví ra Melquisedec*

<sup>1</sup> Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihi tsa iyó. Quívi tsa vatsí nuhu ra Abraham naha ra tsa yahá tsahan ra naha tsicañi tahan ra naha tsihin ra cuví rey naha ra, tan jahá canaa ra naha,

ra Melquisedec jatahan ra tsi ra naha tan nasoco ra tsi ra Abraham.

<sup>2</sup> Tan cuaha tsa ñihí ra Abraham nu tsahan ra tsicañi tahan ra. Tsitsi tsa utsi utsi nuu tsa ñihí ra, tsahá ra intuhun intuhun can tsi ra Melquisedec. Melquisedec cuñí tsi catyí: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñí tsi catyí “tsa taxin”. Yacan cuenda cuví ra: “Rey tsahá tsa taxin.”

<sup>3</sup> Ra Melquisedec nduve jutu ra tan síhi ra. Ña caahán tsi tun iyó nyívi ra, tan ndi ña caahán tsi ama cacú ra, tan ama tsihí ra. Yacan cuenda cuví jandu inducu yo tsi ra tsihin Sehe Nyoo, tyin ña tsindihí maa tsa cuví ra jutu.

<sup>4</sup> Nyehé yo ihya vityin tyin cahnu xaan cuví ra Melquisedec, tyin tsahá ra Abraham juhva tsa ñihí ra nu tsicañi tahan ra tsi ra.

<sup>5</sup> Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsahá ra Abraham juhva tsa ñihí ra tsi ra, tyin tsa yahá cuaha cuiya tan tsahá Nyoo ley tsi nyívi tata ra Abraham. Tan catyí ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyívi cuví ñi tsihin ra naha tyin juvin ñi tata ra Abraham cuví ra naha.

<sup>6</sup> Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihín cuenda ra juhva tsa ñihí ra Abraham. Tan nasoco ra Melquisedec tsi ra Abraham, ra tsa catyí Nyoo tsihin tyin cua cuhva ra tsa cuhva ra.

<sup>7</sup> Tan tsitó catsi yo tyin cahnu ca cuví ra tsa nasoco, tan ñavin ca ra tsa nasoco ra.

<sup>8</sup> Nyehé yo tyin cahnu ca cuví ra Melquisedec tan ñavin ca tandihi ra tsa quihín cuenda intuhun intuhun tsitsi tsa utsi utsi tsa ñihí nyívi, tyin rayí ñuhu ñayívi ihya ñi cuví ra naha, tan tuhvá ra naha tsihí. Maa tyin caahán tsi nu tutu Nyoo tan catyí tsi tyin ra Melquisedec nyito ra.

<sup>9</sup> Ra Leví tsihin sehe ra, tata ra Abraham cuví ra naha. Juvin ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyívi. Cuví catyí yo tyin tandihi ra can naha ra tyahví ndihi ra naha tsi ra Melquisedec quívi tyahví ra Abraham tsi ra.

<sup>10</sup> Cuví catyí yo tyin tyahví ndihi tata ra Leví tsi ra Melquisedec quívi ñihí tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quívi can.

<sup>11</sup> Ra jutu tata ra Leví tsa cuví tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuví janduvahá ra jutu can naha ra tsi nyívi nyicún ley can, ña ñiñi cuñí tsi quítsi inga jutu,

ñavin jutu tumaa ra Aarón maa tyin jutu tumaa ra Melquisedec.

<sup>12</sup> Tyin tun nasamá Nyoo tsi ra cuví jutu, nasamá tucu ra ley ra.

<sup>13</sup> Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu.

<sup>14</sup> Tsitó vaha yo tyin Jutu Mañi yo tata ra Judá tsi ra, tan ra Moisés ña cahan ra tuhun tata ra Judá quivi cahan ra tuhun ra cuví jutu naha ra.

<sup>15</sup> Nditisa tsa nasamá Nyoo tsi ra jutu tyin jaquitsj ra iin jutu tumaa ra Melquisedec.

<sup>16</sup> Ra jutu ihya ña quitsj ra tumaa catyí ley tsahnu, tyin ley can catyí tsi tyin maa ñi tata ra Leví taahán tsi cuví jutu, tan ra can ñavin tata ra Leví cuví ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsj Nyoo.

<sup>17</sup> Tyin tyehen caahán Nyoo tuhun ra:

Yooho ña cua ndihi maa tsa cuví un jutu, tyin cuví un jutu tumaa ra Melquisedec.

<sup>18</sup> Yacan cuenda nacoq Nyoo ley tsahnu can tyin ña cuví jatyinyeé tsi tsi nyívi, tan ña cuví cacu nyívi jahá tsi.

<sup>19</sup> Ley can ña cuví janduvahá tsi tsi nyívi nu Nyoo. Yacan cuenda tsahá ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun can, tan tuhun can cuví ra Cristo.

<sup>20</sup> Nyoo cahan catsi ra tyin tacan cua cuví, tan tacan cuví.

<sup>21</sup> Tandihí ca maa ra jutu tsa iyó vityin naha ra nduve náa cahan Nyoo tuhun ra naha. Maa tyin quivi tsahá Nyoo tsi ra Cristo tsa cuví ra jutu, cahan catsi ra tsihin ra tumaa caahán nu tutu ra tyehen:

Cahan catsi Jutu Mañi yo, tan ña nasama ra tsa cahan ra nu catyí ra tyehen:

“Yooho ña cua ndihi maa tsa cuví un jutu, tyin cuví un jutu tumaa ra Melquisedec”, catyí Nyoo.

<sup>22</sup> Tsa cuenda tsa javahá ra Cristo, tan tsitó yo tyin vaha ca tyiñu ndoq Nyoo tsihin yo tan ñavin ca tsa jihna ñi can.

<sup>23</sup> Jutu tsa cuví tata ra Leví cuaha xaan ra naha tsa cuenda tyin tun tsihi iin ra, nacosó inga ra.

<sup>24</sup> Maa tyin ra Jesús nduve tuhun tsihi iyó tsi ra, yacan cuenda ña tsindihí tsa cuví ra jutu.

<sup>25</sup> Tan tsa cuenda yacan cuví jacacu ra tsi nyívi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

<sup>26</sup> Ra Jesús cuví jutu tsahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan

quitá tsiyo ra nu iyó nyívi iyó cuatyí tan nandaq ra ityi siqui andívi.

<sup>27</sup> Ra Jesús ñavin tumaa inga ra jutu tsaahnu can naha ra cuví ra, tyin ra ícan naha ra cuñí tsi cahñi ra naha quití tan jamañi ra naha nuu Nyoo tandihí ñi quivi. Jihna ca jamañi ra naha quití tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyívi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo.

<sup>28</sup> Ley Nyoo tsa naquihin cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsj ley can, cahan catsi Nyoo tan ndoq ra iin tuhun tsa tsihin yo. Tan tsahá ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha ra.

## 8

*Quivi tsihi ra Jesús tsa cuenda yo tan ndoq Nyoo tuhun tsa tsihin yo*

<sup>1</sup> Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaq nu tyayu tsa nyaá xiin cuaha Nyoo nda gloria.

<sup>2</sup> Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahá tan ñavin vehe ñuhu tsa javahá nyívi. Tyin vehe ñuhu tsa javahá nyívi cuví tsi tixahñu tsa vaha tsa iyó nda gloria.

<sup>3</sup> Tandihí ra jutu naha ra, cuñí tsi cahñi ra naha quití tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyívi. Yacan cuenda cuñí tsi jamañi ra Jesucristo tsa jamañi ra nuu Nyoo.

<sup>4</sup> Tun tsatyin nyí ra nu ñuhu ñayivi ihya, ndi ña cuví cuví ra jutu. Tyin nu ñuhu ñayivi ihya, iyó ra jutu tsa jamañi nuu Nyoo tsa catyí ley tsa tyaq ra Moisés tyin jamañi ra naha.

<sup>5</sup> Ra jutu tsa iyó nu ñuhu ñayivi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahañ tsanaha quivi tsa cua javaha ra Moisés vehe ñuhu jahma, catyí Nyoo tsihin ra tyehen: “Jaha cuenda vaha, tan javaha tandihí tumaa janaha yu tsi un quivi tsahan un yucu Sinaí”, catyí Nyoo tsihin ra.

<sup>6</sup> Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoq Nyoo tuhun vaha xaan ca tsihin yo, tan vaha ca tsa tsahá ra tsi yo.

7 Tun tsatyin cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsa tsihin yo.

8 Maa tyin Nyoo nyehe ra tyin ña vaha javahá nyívi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsa quívi  
cua ndoo yu tuhun tsa tsihin nyívi Israel tan nyívi Judá.

9 Maa tyin ñavin tumaa tuhun tsa ndoo yu tsihin tsií tsaahnu ñi, quívi tñin yu ndaha ñi tan tava yu tsi ñi ñuhu Egipto.

Ña javahá ñi tuhun ndoo yu tsihin ñi, yacan nacoó ihñi yu tsi ñi, catyí Nyoo Jutu yo.

10 Tuhun tsa tsa cua ndoo yu tsihin nyívi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jñi ñi, tan cua tyaa tucu yu itsi añima ñi. Tacan tan cua cuví yu Nyoo ñi, tan maa ñi cua cuví nyívi yu.

11 Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandíhi ñi tan cua nacoto ñi tsi yu, ñi nyihi tan nda cuanda ñi tsahnu.

12 Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

13 Quívi tsa cahán Nyoo tyin cua ndoo ra tuhun tsa tsihin yo, tsa jandutsahnú ra tuhun tsa jihna ñi can. Tan tuhun tsa ndut-sahnú tsa cua cundihi tsi.

9

*Nu janahá tsi nácaa iyó vehe ñuhu tsa iyó nu ñuhu ñayívi tan vehe ñuhu nu cuví nda gloria*

1 Quívi ndoo Nyoo tuhun tsa jihna ñi tsihin nyívi, tsahá ra cuhva nácaa jacahnu ñi tsi ra, tsitsi vehe ñuhu tsa tsicoó nu ñuhu ñayívi ihya tahán tsanaha.

2 Tyehen tsicoó vehe ñuhu can: Tsitsi vehe tsa jihna ñi nyaá candileru, tan nyaá mesa nu yucú paan ii. Tan yacan tsinañi Vehe Ii.

3 Tan vehe tsa tsinu uvi tsinañi Vehe Ii Xaan.

4 Tsitsi vehe can tsinyaá altar xuhun cuaan nu tsahmj ra jutu cutu. Tan tsinyij tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyij yatsin xuhun cuaan nu yihí maná. Tan tsinyij yutun tsa tsindahá ra Aarón tsa quitá ita nuu. Tan tsiyucú tucu yuu nu nyaá tsa utsi ley Nyoo.

5 Tan siquí tsatun can tsinyaá tsa caá tu-maa caá ángel, tan cuñí tsi catyí tyin nyaá

Nyoo ican. Nditsin ángel can tyasi nu tuhvá Nyoo jahá tucahnu iñi tsi nyívi. Tsa vityin ña cuví nacatyí tuhun ca ndi siquí tuhun ihya.

6 Tacan tsicoó vehe ñuhu can. Tandíhi ñi quívi quihví ra jutu naha ra tsitsi Vehe Ii, tan jacahnú ra naha tsi Nyoo.

7 Maa tyin Vehe nu Ii Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñí tsi cundaha ra ñiñi quiti tyin jamañi ra itsi tsi Nyoo tsa cuenda cuatyí maa ra tan cuenda cuatyí nyívi, ñi tsa javahá soho ñi maa cu-atyí.

8 Tan tsa tacan tsicoó yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñí tsi catyí tyin ñaha ca nuña ityi quihví ndáa nyívi tahan ñi maa tsi tsitsi Vehe nu Ii Xaan.

9 Tandíhi yacan cuví can tumaa tixahñu tuhun tsa tsa ndoo Nyoo tsihin yo vityin. Tahán tsanaha jamañi nyívi tsa jamañi ñi nu Nyoo maa tyin ña jatyinyee can, tsa cava vaha iñi ñi.

10 Tyin tandíhi tsa javahá nyívi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsahá ra tsa javahá ñi tacan tsa numi ñi, nda tahan maa tsi quívi cuhva ra tsa vaha ca.

11 Vityin tsa yaha quitsj ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyívi. Yacan cuñí tsi catyí tyin ñavin vehe ñuhu iyó nu ñuhu ñayívi ihya cuví nu quihví ra.

12 Ra Cristo quihví ra tsitsi Vehe Ii Xaan. Maa tyin ña quihví ra tsihin tsa jamañi ra ñiñi mbee lee, o ñiñi indiqui lee. Quihví ra tsihin ñiñi maa ra, tan iin tsaha ñi quihví ra tan ña cuñí ca tsi tsa cuenda quihví ñi ra tyin jamañi ra ñiñi maa ra. Tsihin yacan jacacú cuíi ra tsi yo.

13 Ra jutu naha ra tuhvá ra naha quití ñiñi toro, ñiñi mbee, tan nyaa nu cayú indiqui lee tsi nyívi. Tsihin yacan nduvahá ñi nuu Nyoo, maa tyin maa ñi cuñu ñuhu ñi ndu-vaha, tan ña nduvahá añima ñi.

14 Tun tacan jatyinyee ñiñi quiti can tsi nyívi, cuñí tsi catyí tyin jñiñi ra Cristo cahnú ca tunyee iñi iyó itsi! Tyin nduve cuatyí ra tsicoó tan jamañi ra juven ñi tsi maa ra nuu Nyoo jahá Tatyí Ii tsa ña cua cúu maa. Tan ñiñi ra quihñi nyaá tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsiilhi tsi yo, tan cuví jaha tyiñu yo tyiñu Nyoo nyito.

15 Yacan cuenda ra Jesucristo cuví ra caahán ndaahvi tsaha yo tsa cuenda tuhun

tsaa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quivi yihí ndaha tuhun jihna ñi can tsi yo. Tyin tacan tan yoo, tsa caná Nyoo cuvi naquihin cuenda yo ñayivi tsa ña cua naa maa coo yo, tsa catyí ra tyin cuhva ra tsi yo.

<sup>16</sup> Tun iin nyivi tsihi tan nacoq ñi iin tutu nu tsahá cuenda ñi yóo nyivi cua naquihin tsa iyó tsi ñi, nyivi tsa cua naquihin ndaha tyiñu can cuvi naquihin ñi can, maa tyin cuñí tsi janaha ñi iin tutu cuvi tsandaa tyin nditsa tsa tsa tsihi ra tsa javahá tutu can.

<sup>17</sup> Maa tyin tun ndi nyito ra jatsii ndaha tyiñu can, ña cuvi naha naquihin ñi ndaha tyiñu ra.

<sup>18</sup> Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quiti tan tsatí niñi ti naha ti.

<sup>19</sup> Tsa ndihi tsahá cuenda ra Moisés ley Nyoo tsi tandihi nyivi, tan quihin ra jahma cuaaha tsa tsinu tsihin ixi mbee ticatyí tan iin socio yutun luhlu tsa nañi hisopo, jatyií ra can tsitsi nu yihí niñi indiqui lee tan niñi mbee luhlu tsa sacá nuu tsihin ndutya. Tacan tan quití ra niñi can nu libru nu nyaá ley Nyoo tan quití ndihi tucu ra can tsi nyivi.

<sup>20</sup> Tacan tan catyí ra tsihin ñi tyehen: “Niñi ihya cuvi tsandaa tsa cuenda tsa ndoo Nyoo tuhun tsihin yo”, catyí ra.

<sup>21</sup> Tan juvin ñi quití tucu ra Moisés niñi can vehe ñuhu jahma can tan tandihi ndaha tyiñu tsa tsatyíñu ra jutu naha ra tsa jacahnú ra naha tsi Nyoo.

<sup>22</sup> Tacan javahá ra naha tyin catyí ley Nyoo tyin tsa yatyin tandihi tsa iyó tan cuñí tsi nduvaha can nuu Nyoo tsihin niñi. Juvín ñi catyí tucu tsi tyin tun ña cati niñi ña cua jaha Nyoo tucahnu iñi tsi nyivi.

*Niñi ra Cristo nacatyá cuatyí yo*

<sup>23</sup> Javahá ra jutu naha ra tacan tyin cuñí tsi tsa nduvaha tandihi ndaha tyiñu tsa cuvi tixahñu tsa iyó nda gloria tsihin niñi quiti. Maa tyin tandihi tsa iyó nda gloria, cuñí tsi nduvaha can tsihin niñi vaha ca, ñavin tsihin niñi quiti ñi.

<sup>24</sup> Ra Cristo ña quihví ra tsitsi vehe ñuhu tsa javahá nyivi tsa cuvi tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuvi gloria. Tan vityin nyaá ra caahán ndaahví ra tsihin Nyoo tsa cuenda yo.

<sup>25</sup> Ra jutu tsaahnu cuvi ityi nuu cuenda nyivi Israel quihví ra naha tsitsi Vehe Ii Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuvi. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo.

<sup>26</sup> Tun tsatyin tacan, cuñí tsi tsa cuenda quitsi ñi ra nyehe ra tundoho tan cúu ra nda tsa tsinu ñuhu ñayivi tan nda cuanda

vityin. Maa tyin vityin tsa tsa cuyatyin cundihí ñuhu ñayivi ihya, iin tsaha ñi quitsi ra Cristo, tan jamañi ra tsi ra tyin tacan tan cuvi quihin nyaa ra cuatyí yo.

<sup>27</sup> Tumaa cua tahan yo: iin tsaha ñi cua cúu yo. Yaha can tan cua cutuñi yo.

<sup>28</sup> Tacan iin tsaha ñi tsihi ra Cristo, tan quihin nyaa ra cuatyí cuaha xaan nyivi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyivi ndatú tsi ra.

**10**

<sup>1</sup> Ley Nyoo tsa tyaa ra Moisés cuvi tsi tumaa iin tixahñu tsa vaha ca tsa cua quitsi. Tsa catyí ley can, ña cuvi janduvaha tsi tsi nyivi nanducú tsi Nyoo tyin maa ñi maa niñi quiti jamañi ra jutu tsaahnu cuvi ityi nuu naha ra tan iin tan iin cuiya. Tan ña cuvi cacu yo tsihin yacan.

<sup>2</sup> Tun tsatyin cuvi janduvaha ley can tsi nyivi, cua cundihí tsa jamañi ra jutu naha ra niñi quiti tandihi ñi cuiya. Tyin tun tsa nduvahá nyivi tsa tsahá quiti can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñí ca tsi tsa jamañi ra jutu niñi quiti tsa cuenda ñi inga tsaha.

<sup>3</sup> Maa tyin tsa jamañi ra jutu naha ra niñi quiti tan iin tan iin cuiya, janducuhún iñi tsi tsi nyivi tyin iyó cuatyí ñi.

<sup>4</sup> Tyin niñi indiqui tan niñi mbee lee, ña cuvi nacatya can cuatyí nyivi.

<sup>5</sup> Yacan cuenda catyí tutu Nyoo tyin ra Cristo cahán ra tyehen tsihin Nyoo:

Ña cuñí un tsa jamañi nyivi quiti nuu un, yacan cuenda tsahá un tsa coo cuñu ñuhu yu.

<sup>6</sup> Tyin ña taahán iñi un tsa cahmi ñi quiti tan jamañi ñi nuu cun tan quihin nyaa un cuatyí ñi.

<sup>7</sup> Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñí maa un

tumaa nyaá tuhun yu nu libru ley maa un”, catyí ra Jesucristo.

<sup>8</sup> Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quiti nuu ra. Ndi tsa cahmi ñi quiti tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyivi quiti nuu ra, catyí ra.

<sup>9</sup> Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñí maa un.” Tuhun ihya cuñí tsi catyí tyin quitsi ra jatsiyó cuii ra tsa jamañi nyivi tan jamañi ra tsa vaha ca.

<sup>10</sup> Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuvi tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

11 Tandihí ñi quivi tan jamañi ra jutu cuenda nyivi Israel naha ra quiti nuu Nyoo, tan cuaha xaan tsaha jamañi ra naha iin ñi maa nuu quiti maa tyin ña cuvi quihin nyaa can cuatyí nyivi.

12 Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaá ra nu tyayu nyaá xiin cuaha Nyoo.

13 Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu.

14 Tyin tsihin tsa jamañi ra tsi ra iin tsaha ñi tan janduvaha ra tsi nyivi yihí cuenda ra yoso cuahán quivi.

15 Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

16 Tuhun tsaá tsa cua ndoo yu tsihin nyivi quivi can, tyehen cua cuvi tsi, catyí Jutu Mañi yo:

Cua tyihi yu ley yu tsitsi añima ñi, tan cua tyaa yu itsi tsitsi tsa tsiñi tuñi iñi ñi, catyí ra.

17 Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

18 Yacan cuñi tsi catyí tyin tsa yaha jahá Nyoo tucahnu iñi tsi yo. Yacan cuenda ña cuñi ca tsi cahñi yo quiti, tan jamañi yo nuu Nyoo tsa cuenda cuatyí yo.

*Cuñi tsi nanducu yo tsi Nyoo*

19 Yacan cuenda yañi, vityin cuvi quihvi yo tsitsi Vehe Ii Xaan nu nyaá Nyoo, tsa cuenda niñi ra Jesucristo tsa tsati. Tsihin niñi can nacatyá ra cuatyí yo.

20 Tan nuñá ra ityi tsaá, tan iin ityi cuhun yo nu coo nyito yo. Tyin cuhva tsa tsihi ra tan ndatá jahma tsa tyasi tsa ña cuvi quihvi yo nu nyaá Nyoo. Tsa ndatá jahma can, cuvi tsa tsihi ra Cristo, tyin tacan tan cuvi cuhun yo nu nyaá Nyoo.

21 Ra Jesús cuvi jutu tsaahnu cuvi ityi nuu tsa ndacá ñaha tsi nyivi yihí cuenda Nyoo.

22 Yacan cuenda cuñi tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa ra janduvaha añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatyá ra cuñi ñuhu yo tsihin ndutya cuii, tan nduvaha yo nuu Nyoo.

23 Na ndu iin ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo.

24 Tan cuñi tsi nanducu yo cuhva jatinyee tahan yo tsi yo, na cuñi tahan ca yo tsi yo tan javaha yo tsa vaha.

25 Ña taahán tsi jandihí ndo tsa tsicá ndo tuhun Nyoo tumaa javahá inga nyivi tsa ña

tsicá vaha. Tyin cuñi tsi jandu iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandihí nyivi, cuñi tsi tsa jatinyee tahan ca yo tsi yo.

26 Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuvi jaha Nyoo tucahnu iñi tsi yo.

27 Cua tatsi tuñi Nyoo tsi yo. Tan cua tyihi ra tsi yo nu yucú nyivi xaan iñi tsi ra. Tan ican cua cayu yo iin caa ñi tsihin ñi.

28 Tatun iin nyivi tsa nyitá iñi ley Nyoo tsa tyaa ra Moisés tan ña tyaa yahvi ñi tsa catyí ley can, tan tatun iyó uvi o uñi ra cuvi tsandaa tsa cuenda tsa javahá ñi, cua cúu ñi tsa cuenda cuatyí ñi, tan yofñi maa cua cundaahví iñi tsi ñi.

29 Tan yaha ca cua tatsi tuñi Nyoo tsi nyivi caahán ndavaha ñi siqui Tatyí Ii ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá niñi Sehe ra tsa janduvaha añima ñi. Tan tsihin niñi can ndoo Nyoo tuhun tsihin yo.

30 Tsitó yo tyin catyí Jutu Mañi yo tyehen: “Maa yu taahán tsi tatsi tuñi tsi nyivi; tan juvin yu cua cahan náa taahán tsi tahan ñi.” Juvin ñi catyí tucu ra tyin maa ra taahán tsi jacutuñi tsi nyivi ra.

31 ¡Cahnu xaan tundoho cua nyehe nyivi yosó ica tsi Nyoo nyito tsa cuenda cuatyí ñi!

32 Maa tyin nyooho nducuhun iñi ndo nácaa cunyeé xaan iñi ndo nyehe ndo tundoho tsa yaha naquihin cuenda ndo tsa nditsin Nyoo tsitsi añima ndo.

33 Yihí nyooho cahan nyivi tsi ndo, tan janyehé ñi tundoho tsi ndo nu tuvi nyivi. Tan yihí ndo cundaahví iñi ndo nyehe ndo tsi nyivi vaha iñi tsi ndo tsa tahan juvin ñi tacan.

34 Tan cundaahví iñi ndo nyehe ndo tsi nyivi tsiyucu vehe caa. Cunyeé iñi ndo nyehe ndo tundoho tsihin tsa sii cuñi ndo quivi quihin nyaa nyivi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihi maa can.

35 Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra.

36 Cuñi tsi coo tsa taxin añima ndo tsitsi tsa cunyeé iñi ndo tyin tacan tan cuvi javaha ndo cuhva cuñi Nyoo, tan naquihin ndo tsa catyí ra tyin cuhva ra tsi yo.

37 Tyin nu tutu Nyoo catyí tsi tyehen:

Ña naha ca

tan quitsi ra tsa nyaá quitsi, tan ña cua cucuee ca ra.



<sup>38</sup> Tan catyí Jutu Mañi yo tyehen: “Nyívi naquihín cuenda yo tumaa tsatyin vaha ñi, tshin tsa tsinú ñi ñi tsi yu tan cua coo nyito ñi.

Maa tyin tatun jandihí ñi tsa tsinú ñi ñi, ña sii cua cuñi yo tshin ñi”, catyí Nyoo.

<sup>39</sup> Maa tyin yoo ña javahá yo tumaa javahá nyívi jandihí tsa tsinú ñi tsi Nyoo, tyin yoo tacan ñi maa tsinú ñi yo tsi ra tan tsa cuenda tsa tsinú ñi yo cua cacu añima yo.

## 11

### *Cuhva cuñi tsi tsa tsinu ñi yo tsi Nyoo*

<sup>1</sup> Tsa tsinú ñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú ñi yo tsi Nyoo.

<sup>2</sup> Juhva nyívi yo tsa tsicoq tahañ tsanaha quitá vaha ñi nuu Nyoo tyin tsinú ñi ñi tsi ra.

<sup>3</sup> Tsa cuenda tsa tsinú ñi yo tsi Nyoo, tan tsitó yo tyin javahá ra ñuhu ñayívi tshin tuhun caahán ra. Tan tsitó yo tyin tahañ tsanaha tsinú tandihí tsa nyehé yo vityin tshin tsa ña nyehé yo.

<sup>4</sup> Tsa cuenda tsa tsinú ñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihín cuenda Nyoo tsi ra tumaa tsatyin vaha ra, tan naquihín cuenda tucu ra tsa jamañi ra. Vasu ndi maa ña nyito ca ra Abel, maa tyin tsinú yo nácaa tsinú ñi ra.

<sup>5</sup> Tsa cuenda tsa tsinú ñi ra Enoc tsi Nyoo, tan naquihín Nyoo tsi ra tyin tacan tan ña nyehe ra tuhun tsihí. Tan ña nañihí ca nyívi tsi ra, tyin cuanuhú ra tshin Nyoo. Catyí tsi nu tutu Nyoo tyin tsa ndi cumañi ca naquihín Nyoo tsi ra, maa ñi maa cuhva taahán ñi Nyoo javahá ra.

<sup>6</sup> Maa tyin ña cuví javaha yo tsa taahán ñi Nyoo tatun ña tsinú ñi yo tsi ra. Tyin tatun cuñi yo nanducu yo tsi ra, cuñi tsi tsinu jihna ñi yo tyin iyó ra, tan tsahá ra tsa vaha tsi nyívi nanducú tsi ra.

<sup>7</sup> Tahañ tsanaha jacotó Nyoo tsi ra Noé náa cua cuví ityi nuu. Vasu ndi maa ñaha ca coo can nyehé ra Noé, tsinú ñi ra tan javahá ra yutun ndoo tan ican cacú ra tshin nyívi vehe ra. Nyívi tsa ña tyaq yahvi tsa cahañ Nyoo, tatsj tuñi ra tsi ñi. Maa tyin jacacú ra tsi ra Noé tan nduvahá ra nuu ra tsa cuenda tsa tsinú ñi ra tsi ra.

<sup>8</sup> Ra Abraham tsinú ñi ra tan tyaq yahvi ra tsi Nyoo quívi caná Nyoo tsi ra. Quitá ra nu ñuhu ra tan cuahán ra nu ñuhu tsa cua cuhva cuí Nyoo tsi ra. Vasu ndi maa ña tsitó ra nu maa cuahán ra, maa tyin quitá ra nu ñuhu ra tan cuahán ra.

<sup>9</sup> Tsa cuenda tsa tsinú ñi ra Abraham tsi Nyoo, tsicoq ra nu ñuhu tsa ñaha ca nacuhva

cuenda Nyoo tsi ra. Tsicoq ra tsitsi vehe jahma ñi. Juvín ñi tacan tsicoq tucu ra Isaac, sehe ra, tan ra Jacob, sehe ra Isaac. Tyin juvín ñi catyí tucu Nyoo tshin nduvi taahan ra can naha ra tyin cua cuhva ra ñuhu can tsi ra naha.

<sup>10</sup> Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquín cuhva tsaha tsi tan samá itsi.

<sup>11</sup> Tan juvín ñi tsa cuenda tsa tsinú ñi ña Sara tsa cahañ Nyoo tshin ña, tsicoq iin sehe ña. Vasu ndi maa tsa tsahnu xaan ña, cuví tsicoq sehe ña tyin maa Nyoo tsahá tunyee ñi ra tsi ña. Tacan cuví tyin tsinú ñi ña tyin cua cundaa tsa cahañ Nyoo tshin ña.

<sup>12</sup> Yacan cuenda vasu ndi maa tsa cuñi cúu cuí ña ra Abraham, maa tyin tsicoq sehe ñasiihí ra. Yahá can tan tsicoq cuaha nyívi tata ra. Tan yoñi maa cuví nacahvi tsi ñi tyin cuaha xaan ñi, tumaa cuaha tiñuu iyó andívi tan tumaa cuaha nyívi iyó yuhu ndutyá ñuhu.

<sup>13</sup> Tandihí nyívi can tan nyívi tata ñi tsihí ñi tsa ndi cumañi ca naquihín cuenda ñi tsa catyí Nyoo tshin ñi tyin cuhva ra tsi ñi. Vasu ndi maa ña ñihí ñi can, tsinú ñi ñi tyin cua cuhva Nyoo can. Yacan cuenda sii cuñi ñi tyin tsitó ñi tyin coo quívi cua nyehe ñi can. Tan sii tucu cuñi ñi caahán ñi tyin yahá ñi maa ñi nu ñuhu ñayívi ihya.

<sup>14</sup> Tan tsa caahán ñi tacan, cuñi tsi catyí tyin ndi tsicá ñi nanducú ñi iin nu vaha ca coo ñi.

<sup>15</sup> Tun tsatyin ñuhú ñi ñi ñuu ñi nu quitá ñi, cuví cunuhu nyíco ñi iin yaha ñi.

<sup>16</sup> Maa tyin ña tsinuhú ñi ñuu ñi tyin cuñi ñi coo ñi ñuu vaha ca, tuhun ihya cuñi tsi catyí tyin cuñi ñi coo ñi nda andívi. Tan tsa tacan nducú ñi coo ñi nda gloria, ña cahañ nuu Nyoo tsa cuví ra Nyoo ñi tyin tsa janduvahá ra iin ñuu nu coo ñi.

<sup>17</sup> Tsa cuenda tsa tsinú ñi ra Abraham tsi Nyoo, tyaq yahvi ra tsa cahañ Nyoo tshin ra tan jamañi ra tsi ra Isaac, sehe mañi ra, quívi nducú cuhva Nyoo tsi ra tun nditsa tsa tsinú ñi ra tsi ra. Javahá ra tacan vasu ndi maa catyí Nyoo tyehen tshin ra:

<sup>18</sup> “Tsa cuenda ra Isaac tan cua coo nyívi tata un.”

<sup>19</sup> Vasu ndi maa cahañ ra tacan tshin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee ñi tsi Nyoo tsa janandoto ra ndívi. Quívi can tsa nyaá ra Abraham tsa cahañ ra tsi ra Isaac, sehe ra. Maa tyin Nyoo nacuhvá cuenda nyíco ra tsi ra Isaac tsi ra. Tan cuví can tumaa tsa janandotó Nyoo tsi ra.

<sup>20</sup> Juvín ñi tsa cuenda tsa tsinú tucu ñi ra Isaac tsi Nyoo, tan catyí ra tyin ra Jacob tan

ra Esaú, sehe ra, cua ñihi ra naha tsa vaha nu cuahán ca tsi.

<sup>21</sup> Tsa cuenda tsa tsinü iñi ra Jacob tsi Nyoo, tan catyi ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnü ra tsi Nyoo tyin tsa tsahnü xaan ra.

<sup>22</sup> Juvín ñi tsa cuenda tsa tsinü iñi ra José tsi Nyoo, catyi ra tsa tsa cuñi cúu ra tyin cua quita nyivi ra, ñi Israel, ñuhu Egipto. Tan tsahá cuenda tucu ra tsi nyivi tyin quivi quita ñi na quihin ñi yiqui ra cuhun tsihin ñi.

<sup>23</sup> Tsa cuenda tsa tsinü iñi jutu ra Moisés tan sihi ra tsi Nyoo, tyihü xeehe ñi tsi ra uñi yoo tyin nyehe ñi tyin sii xaan caá ra. Ña nayuhvi ñi tsa cahán ra rey tyin cuñi tsi cúu tandihi sehe yii nyivi [tsa cuenda tyin tsitó ñi tyin cua jacacu Nyoo tsi ra].

<sup>24</sup> Tsinü tucu iñi ra Moisés tsi Nyoo. Yacan cuenda quivi tsahnü ra, ña cuñi ca ra cuvi ra sehe ñaha cuvi sehe ra rey ñuhu Egipto.

<sup>25</sup> Tan nacoö ra ñuhu Egipto can tyin ña cuñi ra cusii iñi ra tsihin tsa javaha ra tsa caquiñi. Tan nacatsj ra tsa cua nyehe ra tundoho tsihin nyivi Nyoo tan ñavin ca tsa cusii iñi ra tsihin tsa tsindihí ñi maa.

<sup>26</sup> Tsa cuenda ra Moisés, vaha ca tsa cuca ra Cristo tan ñavin ca tandihi tsa cuca tsa iyó Egipto. Yacan cuenda sii cuñi ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua cuhva Nyoo tsi ra.

<sup>27</sup> Juvín ñi tsa cuenda tsa tsinü iñi ra Moisés tsi Nyoo, ña nayuhvi ra quita ra ñuhu Egipto, vasu ndi maa cuxaan ra rey tsi ra. Tan cunyeé xaan iñi ra tyin tumaa tsatyin nyehe ra tsi Nyoo tsa ña nyehé yo.

<sup>28</sup> Juvín ñi tsa cuenda tsa tsinü iñi ra tava tyiñu ra na jacahnü tandihi nyivi Israel vico tan cahñi ñi iin mbee ticatyí luhlu. Tan tava tyiñu tucu ra na cahyi ñi niñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi.

<sup>29</sup> Tsa cuenda tsa tsinü iñi ñi Israel tsi Nyoo tan yaha sava ñi nu Nduya Ñuhu Cuaaha tumaa nu ñuhu ityi. Ra Egipto naha ra cuñi ndihi tucu ra naha yaha ra naha, maa tyin ña cuvi yaha ra naha tyin nacasj Nyoo ndutya ñuhu can siqui ra naha tan tsihü ra naha jahá ndutya can.

<sup>30</sup> Juvín ñi tsa cuenda tsa tsinü iñi ñi tsico nduvi ñi utsa tsaha tsata ñuu Jericó, tan tandihi cuii maa nu sama tsaha ñuu can tanj.

<sup>31</sup> Juvín ñi tsa cuenda tsa tsinü iñi ña Rahab, ñaha sii iñi tsica nuu tsa tsicoö Jericó, tan ña tsihü ña quivi tsihü tandihi nyivi ñuu ña. Ña tsihü ña tyin jatyinyee ña tsi ra Israel ra tsa tsahán naha ra tsinyehé ñuu ña. Tandihí

ca ñi tsihü ñi tsa cuenda tsa ña tyaá yahvi ñi tsi Nyoo.

<sup>32</sup> ¿Náa ca cua cahan yu vityin? Tyin ña cuyatyí yu cahan yu tuhun tandihí ra naha, tumaa ra Gedeón, ra Barac, ra Sansón, ra Jeffé, ra David, tan ra Samuel, tan ra cuvi ndusu yuhu Nyoo naha ra tahán tsanaha.

<sup>33</sup> Tsa cuenda tsa tsinü iñi ra naha tsi Nyoo, tan yihí ra naha jahá canaa ra naha tsi inga ñuu nahnu. Tan yihí ra naha vaha xaan tsindaca ñaha ra naha nyivi cuenda Nyoo. Yihí ra naha ñihü ra naha tsa catyi Nyoo tyin cuhva ra tsi ra naha. Yihí ra naha jatyinyee Nyoo tsi ra naha quivi nducü cahñi ndicaha tsi ra naha.

<sup>34</sup> Yihí ra naha ña cayu ra naha jahá ñuhu tsitsi ono nu tyihü nyivi tsi ra naha. Yihí ra naha cacü ra naha tan ña tsahñi nyivi tsi ra naha tsihin mityi. Yihí ra naha tsahá Nyoo tunyee iñi tsi ra naha quivi nduve tunyee iñi tsicoö tsi ra naha, tan cuvi cañi tahan ra naha tsihin nyivi xaan iñi tsi ra naha tan jahá canaa ra naha tsi ñi.

<sup>35</sup> Tsicoö juhva ñiñaha, tsa nandoto nyivi.

Juhva nyivi tsinuhñi ñi tan ndoho ñi jahá nyivi, maa tyin vasu ndi maa tacan tahan ñi, cunyeé xaan iñi ñi tan ña cuñi ñi ndoo nuña ñi. Nyivi can catyi ñi tyin tun nacoö ñi tsi Nyoo ña cua nyehe ca ñi tundoho, maa tyin ñi ican ña cuñi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca.

<sup>36</sup> Inga ñi nyehe ñi tundoho jahá nyivi tyin caahán nyaa nyivi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa.

<sup>37</sup> Yihí ñi tsahñi nyivi tsi ñi tsihin yuu. Yihí ñi tsahnýa sava nyivi tsi ñi tsihin cierra. Yihí ñi nducü cuhva nyivi tsi ñi. Yihí ñi tsahñi nyivi tsi ñi tsihin mityi. Yihí ñi tsinditsj ñi ñi mbee ticatyí tan ñi mbee; nduve jahma vaha ñi tsicoö tan ndi nduve vehe ñi. Ndaahvi xaan tsicoö ñi, tan tsicoö xaan ñi tucuihya iñi, tan nyehe ñi tundoho jahá nyivi tsa ña tsitó tsi Nyoo.

<sup>38</sup> Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsica nuu ndaahvi ñi nu tsiqui tan nu iyó yucu. Tsicoö ñi tsitsi cava tan tsitsi ñuhu.

<sup>39</sup> Tandihí maa nyivi ndaahvi can vasu ndi maa vaha cahán Nyoo tuhun ñi tsa cuenda tsa tsinü iñi ñi tsi ra, maa tyin ña ñihü ñi tsa catyi ra tyin cuhva ra.

<sup>40</sup> Tyin cuñi ra tsa ñihi ndihi ñi tsa vaha ca tsa tyaá ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

**12**

*Na cuita iñi yo tsi intuhun ñi maa ra Jesús*

<sup>1</sup> Tandihí nyívi can quita vaha ñi nuu Nyoo tyin tsinú iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñí tsi nacoo yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeé iñi yo cuhun yo ityi nuu ca tsihin Nyoo tsihin tsa taxin iyó añima yo.

<sup>2</sup> Na nyehe yo tsi intuhun ñi maa ra Jesús tyin juvin ra jatyinyeé tsi yo tsa tsinú iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeé xaan iñi ra nyehe ra tundoho tan ña tyaá yahvi ra ticanuu tsa cua tahan ra tsa cúu ra nu cruu tumaa tsihí iin nyívi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin sii xaan cua cuñi ra tsa yaha cúu ra.

<sup>3</sup> Jaha ndo cuenda cuhva tsicoq ra Jesús, tyin ra Jesús nyehe xaan ra tundoho jaha nyívi iyó cuatyí, maa tyin cunyeé iñi ra. Tacan tucu nyooho, ña cundihí iñi ndo tan ña ndú uvi iñi ndo tsa nyicún ndo tsi ra.

<sup>4</sup> Tyin nyooho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi.

<sup>5</sup> ¿A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyehen:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

<sup>6</sup> Tyin yuhu jaquihín ityi yu tsi nyívi cuñi yu, tan tatsí tuñi yu tsi nyívi cuví sehe yu, catyí Nyoo.

<sup>7</sup> Janyee ndo iñi ndo tan nducu ndo cuhva cutuhva ndo tun jaquihín ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyívi iyó sehe, jaquihín ityi ñi tsi sehe ñi.

<sup>8</sup> Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juvin sehe vaha ra cuví yo.

<sup>9</sup> Tan inga tucu tuhun, tsa ndi nyihi yo, jutu yo nu ñuhu ñayívi ihya jaquihín ityi ra naha tsi yo, tan jaha yo tsa ñayívi tsi ra naha. Tan vihi ca cuñi tsi tyaá yahvi yo tsi Jutu yo Nyoo, tyin tacan tan cuví coo cuii yo.

<sup>10</sup> Jutu yo tsa iyó nu ñuhu ñayívi ihya, jaquihín ityi ra naha tsi yo tsa cuenda juhva ñi quívi, tan javahá ra naha can cuhva cuñi maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra.

<sup>11</sup> Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva

yo javaha yo tsa vaha tsihin tsa nyehe yo tundoho can, cua quita vaha yo.

*Ica xaan tun ña tyaá yahvi yo tsa caahán Nyoo tsihin yo*

<sup>12</sup> Yacan cuenda ña ndu uvi iñi ndo tsa javaha ndo tsa cuñi Nyoo javaha ndo, tan ña nducuihya iñi ndo.

<sup>13</sup> Nducu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuihya ca cua cuñi ndo.

<sup>14</sup> Jañiñi ndo tsi ndo tan coo vaha ndo tsihin tandihí nyívi. Nacoo ndo tandihí tsa ña vaha. Tyin nyívi tsa ña nacoo tsa ña vaha ña cuví nyehe ñi tsi Nyoo Jutu yo.

<sup>15</sup> Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihí ndo tunyee iñi tsa tsahá Nyoo, tan ña cua ndoo tsa xaan tsitsi añima ndo tan ña cua tiví ndo nuu Nyoo, tyin jahá cuenda vaha ndo tsi ndo.

<sup>16</sup> Nyooho rayíi ndi intuhun ndo tan ña caca nuu ndo tsihin ñaha. Tacan tucu nyooho ñaha, ña caca nuu ndo tsihin rayíi. Tan ña caca iñi ndo tyin nduve yahvi nyaá tuhun Nyoo, tumaa tsicá iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra.

<sup>17</sup> Tsitó ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuví. Tsacu xaan ra, maa tyin ña ñihí ca ra cuhva nasamā ra tsa tsa yaha javahā ra.

<sup>18</sup> Nyooho ña taahán tsi javaha ndo tacan tyin tsaq ndo nuu Nyoo, maa tyin ñavin tumaa tsaq nyívi Israel nuu Nyoo quívi tsahan ñi yucu Sinaí tsa cuví nyehe yo. Nyehe ñi cayú ñuhu, tan ñihí xaan yihí tatyí xaan, tan naa xaan cuví.

<sup>19</sup> Tan tsiñi ñi ndusu trompeta tan cahān Nyoo tsihin ñi. Tan cahān ndaahvi ñi tsihin ra na ña cahān ca ra tsihin ñi, tyin yuuhví xaan ñi

<sup>20</sup> tsa cuenda tyin ña cunyeé iñi ñi tsa tsahá cuenda ra tsi ñi Tyin catyí ra tyehen: “Nyívi natuhva tan cuañi tsaha yucu ihya cahñi ndo tsi ñi tsihin yuu o tsihin lanza, tahan ñi nyívi tan quiti”, catyí Nyoo tsihin ñi.

<sup>21</sup> Nayuhví xaan ñi tsa nyehe ñi yacan, nda cuanda ra Moisés tan catyí ra: “Ñihí xaan nihí yu jahá tsa yuuhví yu”, catyí ra.

<sup>22</sup> Maa tyin nyooho ña nyehe ndo tsa yuuhví can tyin tsaq ndo yucu nañi Sión tsa cuví ñuu Nyoo nyito. Tuhun ihya cuñi tsi catyí ñuu Jerusalén tsa canyíi nda gloria, nu iyó cuenda mil ángel.

<sup>23</sup> Ndu iin ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhvá ndo nuu Nyoo, ra cuví juee [tsa jandaa cuatyí] tandihí nyívi,

tan natuhvã ndo nuu tandihî añima nyivi vaha tsa janduvahã Nyoo.

<sup>24</sup> Natuhvã tucu ndo nuu ra Jesús, ra caahán ndaahvi tshin Nyoo tsa cuenda yo vityin tsa ndoo Nyoo tuhun tsa tshin yo. Tan niñi ra Jesús tsa tsatî tsahã tsa vaha ca tsi yo tan ñavin ca niñi ra Abel. [Tyin niñi ra Abel tsican tsi cuatyî tsaha ra yañi ra. Maa tyin niñi ra Jesús, jahã tucahnu iñi cuatyî yo.]

<sup>25</sup> Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tshin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahã Nyoo quivi cahã ra yucu Siná nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tshin yo vityin, ña cua cuvi maa cacu yo.

<sup>26</sup> Tahan tsanaha jacandã Nyoo ñuhu ñayivi tshin ndusu ra. Tan catyî ra tyehen vityin: “Cua jacanda yo iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihî yu nda cuanda andivi.”

<sup>27</sup> Tsa caahán ra tyin cua jacanda ra inga tsaha, cuvî cutuñi iñi yo tyin cua catsiyo tandihî tsa javahã ra tsa cuvî nacanda. Tan cua ndoo tsa ña cuvî nacanda.

<sup>28</sup> Nu ndacã ñaha Nyoo nu tsahã ra cunyecy yo tshin ra, ña cuvî nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tshin tsa niñi añima yo, tan tyaa yahvi yo tsi ra, tyin yacan cuvî tsa taahán iñi ra.

<sup>29</sup> Tyin Nyoo yo cuvî ra tumaa ñuhu tsa tsahmî, tan cua janaa ra tandihî maa tsa ña vaha.

### 13

*Na coo yo cuhva taahán iñi Nyoo*

<sup>1</sup> Ña jandihî ndo tsa cuñi ndo tsi tandihî nyivi yihî cuenda Nyoo tyin cuvî ñi tumaa nyivi ndo.

<sup>2</sup> Ña ña iñi ndo tyaa nuu vaha ndo tsi nyivi tsaã vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitô yo tun ángel cuvî ra naha tumaa javahã juhva nyivi.

<sup>3</sup> Ña ña iñi ndo tsi nyivi yucú vehe caa tumaa tsatyn yucú ndihî ndo tshin ñi. Nducuhun iñi ndo tsi nyivi nyehé tundoho jahã nyivi. Cundaahvi iñi ndo tsi ñi tan jatyinyee ndo tsi ñi. Tyin tsitô ndo nácaa cuñi yo tun nyehe yo tundoho.

<sup>4</sup> Nyooho nyivi tsa tsa tindaha, jaha tahan ndo tsa ñayivi tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayi tsicá nuu tshin naha tan rayi iyó ñasihî tun coo ra tshin inga ñaha. Tan juvin ñi cua tatsi tuñi tucu ra tsi ñaha tsicá nuu tshin rayi tan ñaha tsa iyó yî tun coo ña tshin inga rayi.

<sup>5</sup> Ña çaca iñi ndo nácaa javaha ndo tan cuvî coo cuaha ca xuhun tsi ndo. Ndo ndo vaha tshin tsa iyó tsi ndo, tyin catyî Nyoo tyehen: “Tandihî ñi tsaha nyaá yu tshin un, tan ña cua nacoo ihñi maa yu tsi un”, catyî ra.

<sup>6</sup> Tsa cuenda yacan cuvî caahán yo tyehen tshin tsa niñi añima yo:

Jutu Mañi yu juvin un jatyinyee tsi yu,

Yacan cuenda ña yuuhvi yu tun javahã nyivi náa javahã ñi tsi yu.

<sup>7</sup> Nducuhun iñi ndo tsi ra cuvî ityi nuu vehe ñuhu, ra tsa caahán tuhun Nyoo tshin ndo. Nyehé ndo tyin vaha iyó ra naha nuu Nyoo, tan cunayicun ndo cuhva vaha tsinú iñi ra naha tsi Nyoo.

<sup>8</sup> Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quivi.

<sup>9</sup> Ña cuhva ndo jandavi ñaha nyivi tsi ndo tshin tsa siin siin tsa jacuahã ñi. Vaha ca jandu iin ndo iñi ndo tshin tsa vaha tsa tsahã Nyoo coo añima yo, tyin vaha ca yacan tan ñavin ca tsa jacuahã ñi ican. Tyin ñi ican jacuahã ñi maa ñi maa tsa cuenda náa tsatsi yo. Tan ña jatyinyee can ndi tsi maa ñi.

<sup>10</sup> Tsatî niñi ra Cristo nu cruu tsa cuenda yo. Tan ra jutu tsa nyitã iñi ley tsahnu naha ra ña cuvî jatyinyee ra Cristo tsi ra naha.

<sup>11</sup> Ra jutu tsahnu cuvî ityi nuu cuenda nyivi Israel tsindacã ra naha niñi quiti tsitsi Vehe Ii Xaan tsa cuenda cuatyî nyivi, maa tyin cuñi ti tuhvã can cayú ityi tsata ñuu.

<sup>12</sup> Tacan tucu ra Jesús, tavã tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tshin niñi ra.

<sup>13</sup> Na cunycun yo tsi ra Cristo tan ña nducan nuu yo vasu ndi maa vacu nducu nyivi tsi yo.

<sup>14</sup> Tyin tsa cuenda yoo nduve ñuu tsa ña cua cundihî maa nu ñuhu ñayivi ihya. Yacan cuenda nanducú yo iin ñuu tsa cua quiti, tsa yaha naa ñuhu ñayivi ihya.

<sup>15</sup> Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacahnu yo tsi Nyoo tshin tsa cata yo yaa ra, tan tshin tsa caahán yo.

<sup>16</sup> Ña naa iñi ndo javaha ndo tsa vaha. Tan jatyinyee tahan ndo tsi ndo tshin tsa iyó tsi ndo, tyin yacan cuvî tsa taahán iñi Nyoo.

<sup>17</sup> Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahã cuenda añima ndo. Tan coo quivi cua cuhva cuenda ra naha tyiñu jahã ra naha tsi Nyoo. Nducú ndo cuhva javaha ndo tsa vaha, tyin tacan tan siî cua cuñi ra naha cuhva cuenda ra naha tsi ndo tsi Nyoo. Maa tyin tun ña javahã ndo tsa vaha, cua cuhva cuenda ra naha tsi ndo tsi Nyoo tshin tucuihya iñi, tan ña cua quita vaha ndo nuu ra.

<sup>18</sup> Ndācan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñí ndi javaha ndi.

<sup>19</sup> Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyii yu tsihin ndo.

*Nu ndihí cahān ra tan tsahá ra nacumi tsi ñi*

<sup>20</sup> Jutu Mañi yo Jesucristo tsa janandoto Nyoo, ra tsahá tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsatí, ndoq Nyoo tuhun tsaa tsa ña cua cundihi maa tsihin yo.

<sup>21</sup> Tandihí tsa cuñí Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñí ra javaha ra. ¡Na jacahnu yo tsi ra Cristo yoso cuahán quívi! ¡Na cuví tsi tacan ñi!

<sup>22</sup> Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaq yu tsa cuenda ndo.

<sup>23</sup> Cuñí yu tsa coto ndo tyin ra Timoteo, yañi yo, tsa quitā ra vehe caa. Tatun yatyi tsaa ra, cua quitsi ra tsihin yu na quitsi yu quitsi nyehe yu nu yucú ndo.

<sup>24</sup> Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyii yu, tsahá ñi nacumi tsi ndo.

<sup>25</sup> Tan na nasoco Nyoo tsi tandihí ndo. Na cuví tsi tacan ñi.

## Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

*Nu tsahá ra Santiago nacumi tsi nyivi*

<sup>1</sup> Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsi yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

*Tsa tsiñi tuñi tsa tsahá Nyoo tsi yo*

<sup>2</sup> Yañi, cusii iñi ndo tun cuaha tundoho nyehé ndo.

<sup>3</sup> Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cunyeé iñi ndo nyehe ndo náa ndihi ca tundoho vatsí siqui ndo.

<sup>4</sup> Jaña ndo na quitsi maa tundoho can siqui ndo, tyin tun tsa cunyeé iñi ndo yaha ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

<sup>5</sup> Ndáa nyooho cumañi tsa tsiñi tuñi tsi, ndacán ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra.

<sup>6</sup> Maa tyin cuñí tsi ndacán yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihi yo tsa tsicán yo, cuví yo tumaa ndutya ñuhu tsa tandahá tatyí ityí ihya tan ityí can.

<sup>7</sup> Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra.

<sup>8</sup> Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñí ra. Vityin cuñí ra tsa cuñí ra, tan inga tsa cuñí tucu ra tyaan.

<sup>9</sup> Tatun iyó iin ra yañi yo, ndaahvi ra, na cusii iñi ra tyin cahnu cuví ra jahá Nyoo.

<sup>10</sup> Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can.

<sup>11</sup> Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsihi tsi ra tan cua cundihí tsa cuca ra.

*Nacaa cunyeé iñi yo nyehé yo tundoho*

<sup>12</sup> Sii xaan cuví tsi ra tsa cua cunyeé iñi nyehe tundoho tyin tsa yaha nyehe ra tundoho cua ñihi ra ñayivi nyito tsa catyí Nyoo tyin cuhva ra tsi ñi tsa cuñí tsi ra.

<sup>13</sup> Tatun ndáa nyooho tsicá iñi ndo tsa javaha ndo tsa ña vaha, ña cuñi ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha.

<sup>14</sup> Maa tyin nyooho tsa javahá tsa ña vaha, javahá ndo can tyin cuñi ndo javaha ndo can. Tan yacan cuenda tsicoó cuatyí ndo.

<sup>15</sup> Tatun cua cuhva yo tsa caca iñi yo tuhun ña vaha, coo quivi cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

<sup>16</sup> Yañi, cuñi xaan yu tsi ndo. Ña jandavi ñaha ndo tsi ndo.

<sup>17</sup> Tandihí tsa vaha tan tsa vii tsa ñihí yo, queé tsi ityí siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama.

<sup>18</sup> Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñi maa ra.

*Ityí nditsa tsa taahán tsi cuhun yo*

<sup>19</sup> Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo.

<sup>20</sup> Tyin nyivi tsa cuxaán, ña javahá ñi tsa taahán iñi Nyoo.

<sup>21</sup> Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsi ra aña ndo. Tyin tuhun Nyoo can iyó tunyee iñi itsi tsa jacacú tsi tsi yo.

<sup>22</sup> Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juven ñi tsi maa ndo jandaví ñaha ndo.

<sup>23</sup> Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu.

<sup>24</sup> Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi.

<sup>25</sup> Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuví tsi ñi ican tan cua quita vaha tandihí tsa javahá ñi.

<sup>26</sup> Tan nyivi tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa

caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi.

<sup>27</sup> Tyin tsa cuenda Nyoo, nyivi tsa nditsa tsinú iñi tsi ra juvin ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihi yá, tan jahá cuenda ñi tsi tsa nyihi tsa nduve ca sihi tan jutu, tan jahá cuenda ndihi tucu ñi tsi maa ñi tsa ña javaha ñi tsa ña vaha.

## 2

*Na inducu ñi cuñi yo tsi nyivi tyin ña siin caá intuhun ñi tan inga ñi*

<sup>1</sup> Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi.

<sup>2-3</sup> Taton cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsi ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyaa nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsi ra jahma tyaahnyá, tan catyi ndo tsihin ra, “cunyaa nyityi juvin o cunyaa nu ñuhu ihya”.

<sup>4</sup> Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

<sup>5</sup> Yañi tsa cuñi xaan yu, tyaá soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyivi tsa cuñi tsi ra.

<sup>6</sup> Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumi tyiñu?

<sup>7</sup> Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

<sup>8</sup> Ley Nyoo tsa ñiñi ca catyi tsi: “Cuñi ndo tsi nyivi tumaa tsa cuñi ndo tsi maa ndo.” Taton javahá ndo tsa catyi ley can, vaha javahá ndo.

<sup>9</sup> Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyi ley Nyoo tyin iyó cuatyí nyivi javahá tacan.

<sup>10</sup> Tyin taton iin nyivi tsa tyaá yahvi tandihí ley, tan ña tyaá yahvi ñi intuhun tsi, cuví tsi tumaa tsa ña tyaá yahvi ñi tandihí ley.

<sup>11</sup> Tyin Nyoo catyi ra tyin ña coo inga ñaha tsi rayi, tun iyó ñasihi ra. Tacan tucu ñiñaha, tsa iyó yá, ña cuví coo inga rayi tsi ñi. Tan juvin ñi catyi tucu ra tyin ña cahñi yo nyivi. Yacan cuenda taton iin ra nduve inga ñaha

tsi ra, maa tyin tsahñi ra iin nyivi, juvin ñi ña tyaá yahvi ra tsa catyi ley.

<sup>12</sup> Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo.

<sup>13</sup> Tyin nyivi tsa ña cundaahvi iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahvi iñi tsi inga ñi, cua quita vaha ñi quivi cutuñi ñi.

*¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?*

<sup>14</sup> Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinú iñi yo tsi Nyoo ñi tsi yo?

<sup>15</sup> Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un,

<sup>16</sup> Maa tyin yooho ña tsaha un jahma ra tan ndi tsa catsi ra tan catyi un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyi un. Nduve nacatyí cahan un tacan tyin ña tsaha un tsa tsiñi ñuhu tsi ra.

<sup>17</sup> Tan tacan ñi cuñi tucu yo tsihin tsa tsinú iñi yo, tun catyi yo tyin tsinú iñi yo tsi Nyoo tan ña jatyinyee yo tsi nyivi, nduve yahvi nyaá catyi yo tyin tsinú iñi yo.

<sup>18</sup> Yihí ndo cua catyi ndo: “Yooho tsinú iñi un tsi Nyoo tan yuhu javahá yo tsa vaha. Tan catyi un tyin tsihin tsa tsinú iñi ñi yo tan cuví cacu yo.” Maa tyin yuhu catyi yo tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yo tun ña javaha un tsa vaha. Maa tyin yuhu cuví janahá yo tsa tsinú iñi yo tsi Nyoo tsi un tsihin tsa javahá yo tsa vaha.

<sup>19</sup> Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda ñihí nahnu tsihin tsa yuuhvi nahnu tyin ña cua cacu nahnu.

<sup>20</sup> Ña soho xaan çaca iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo.

<sup>21</sup> Ra Abraham, tsi tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyi maa Nyoo tsihin ra.

<sup>22</sup> Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyi ra tsihin ra tyin javaha ra. Tan tsa javahá ra yacan, quituví vaha tsa tsinú iñi ra tsi Nyoo.

<sup>23</sup> Tacan tan cundaq tsa catyi nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyi tsi: “Ra Abraham, cuví ra ra vaha iñi tsi Nyoo.”

<sup>24</sup>Tan ihya cuví nu cutuñí iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra.

<sup>25</sup>Tan tacan tucu ña Rahab tsa tsicá nuu tsihin rayi. Yaha tsa javahá ña cuatyí, javahá ña tsa vaha quivi tsaahá ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cahun ra naha inga ityi. Tan tsa cuenda yacan, catyi Nyoo tyin vaha ña.

<sup>26</sup>Tan tacan tucu cuví cuñu ñuhu nyivi. Tatun nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

### 3

#### *Nacaa jaha cuenda yo cuhva caahán yo*

<sup>1</sup>Nyooho yañi, ña yatyi xaan cuñi ndo cuví ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo.

<sup>2</sup>Tyin tandihi maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juven ra cuví ra vaha tyin cuví ndaca ñaha ra nani cahnú cuñu ñuhu ra.

<sup>3</sup>Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnú ti.

<sup>4</sup>Tan tacan tucu iin yutun ndoo tsa tsicá nu ndutya ñuhu, vasu cahnú tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñi maa ra, vasu ñihi xaan yihí tatyí.

<sup>5</sup>Tan tacan tucu yaa yo, luhlu xaan tsi. Maa tyin cuaha tsa caquiñi cuví cahan yo tsihin tsi. Tumaa nu natin iin ñuhu luhlu iin cuhu cahnú tan cayu tandihi maa yutun.

<sup>6</sup>Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnú tsa jativi tsi nani cahnú cuñu ñuhu yo tan tandihi cuhva iyó yo ñayivi ihya, tyin juven ñi maa nu ña vaha natyuhú itsi.

<sup>7</sup>Nyivi cuví jandumasa ñi tandihi maa nuu quiñi tsa iyó: saa, coo, tan quiñi tsa iyó tsitsi ndutya ñuhu.

<sup>8</sup>Maa tyin yoñi cuví jandumasa yaa yo tyin cuví tsi iin tsa ña vaha tan ña tsaahá tsi cundaca ñaha yo itsi. Tumaa iin coo tyihí ti venenu ti tsi nyivi, tan tsihiñi ñi. Tacan cuví yaa yo.

<sup>9</sup>Tyin juven ñi tsihin yaa yo jacahnú yo tsi Nyoo jutu yo. Tan juven ñi tsihin can caahán tucu yo ndavaha ñi siqui nyivi tsa javahá Nyoo tumaa caá maa ra.

<sup>10</sup>Juvin ñi tsihin yuhu yo jacahnú yo tsi Nyoo. Tan juven ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan.

<sup>11</sup>Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví.

<sup>12</sup>Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

#### *Tsa tsiñi tuñi tsa vaha ca*

<sup>13</sup>Tatun yihí ndo tsitó ndo tan iyó tsa tsiñi tuñi tsi ndo, ñanaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo.

<sup>14</sup>Maa tyin tatun nyiyo iñi ndo tsitsi añima ndo tan cuñi xaan ndo nduvaha ndo nu nyivi, ña cahnú jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnú jahá ndo tsi ndo, tyihí xeehe ndo tsa nditsa, cuví can.

<sup>15</sup>Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyivi ña tsitó tsi Nyoo tan cuhva tsicá iñi nu ña vaha cuví can.

<sup>16</sup>Tyin tatun nyiyo iñi ndo tan cuñi ndo nduvaha ndo nu nyivi, ticaña xaan tsicá iñi ndo. Tan iyó tucu tandihi inga nuu tsa ña vaha nu yucú ndo.

<sup>17</sup>Maa tyin tatun iyó tsa tsiñi tuñi Nyoo tsi ndo, cuiñi iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha tsicá iñi ndo, tan cundaahví iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo.

<sup>18</sup>Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuiñi.

### 4

#### *Ña taahán tsi javaha yo cuhva cuiñi cuñu ñuhu yo*

<sup>1</sup>¿Nacuenda iyó tsihiñi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha.

<sup>2</sup>Iyó tsaha nda cuanda tsañiñi ndo nyivi tyin cuiñi ndo tsa cuiñi ndo tan ña ñihi ndo can. Tatun nyehé ndo náa cuví can nyehé ndo, nyiyo iñi ndo can tan tsa ña ñihi ndo can quitsaha cañi tahan ndo. Ña ñihí ndo tsa cuiñi ndo tyin ña tsicán ndo can tsi Nyoo.

<sup>3</sup>Tatun tsicán ndo tsa tsicán ndo tsi ra tan ña ñihí ndo can, ña tsaahá ra can tsi ndo tyin tsitó ra tyin cua jativi ndo can tsihin tsa taahán iñi ndo.

<sup>4</sup>¿Nacuenda javahá ndo cuhva cuiñi nyivi, nyooho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuiñi nyivi, ñi xaan iñi tsi Nyoo cuví yo?

<sup>5</sup>Tan yacan iyó cuenda catyi nu tutu Nyoo tyin Tatyí Ii tsa tsaahá ra coo añima yo, cuiñi



xaan tsi tsi yo tan cuiñu xaan tsi tsi yo tyin cuñi tsi tsa jacahnu yo tsi intuhun ñi maa ra.

<sup>6</sup> Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyeé ca ra tsi nyívi ndaahvi tsa tsító tyin tsiñi ñuhu ra tsi ñi. Tan ña cuiñi ra nyehe ra tsi ra tsa cahnu jahá tsi.

<sup>7</sup> Yacan načuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo.

<sup>8</sup> Nducu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyooho, nyívi iyó cuatyí, jandundi ndo tsi ndo. Tan nyooho tsa tsicá iñi tyin cuví javaha ndo tsa iyó nu ñuhu ñayívi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo aña ndo jacutu Nyoo tsa vaha, tyin tacan tan ndundi ndo nuu ra.

<sup>9</sup> Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sii cuñi ndo, vacu ndo tsihin tsa cuiihya cuñi ndo. Tan tsa sii cuñi ndo na nanduví tsi tucuiihya iñi.

<sup>10</sup> Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

*Ña cahan nyaa ndo tsi nyívi*

<sup>11</sup> Yañi, ña cahan ndo ndavaha ñi siqui iin yañi yo. Tyin nyívi caahán ndavaha ñi siqui nyívi, o caahán nyaa ñi nyívi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can.

<sup>12</sup> Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan zyooho yóo ra cuví un tyin cahan nyaa un tsi inga nyívi, tan tatsi tuñi un tsi ñi tan jaha un tsi un tumaa juez?

*Ña tsító yo náa cua cuví tsi yo tyaan, yacan cuenda ña taahán tsi cahnu jaha yo tsi yo*

<sup>13</sup> Yihí ndo catyí ndo: “Vityin o tyaan cuhun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua cahan yu ihya:

<sup>14</sup> Ñayívi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsító ndo tsa cua cuví tyaan tan catyí ndo tyin cuhun ndo.

<sup>15</sup> Vaha ca cahan ndo tyehen: “Coo yo juhva ca quívi tan javaha yo tsehe o yacan, tun Jutu Mañi yo tan cuñi ra.”

<sup>16</sup> Maa tyin nyooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyívi javahá tacan.

<sup>17</sup> Tyin yoo tsa tsító javaha tsa vaha tan ña javahá yo can, tsicoo cuatyí yo.

## 5

*Nu tsahá cuenda ra Santiago náa cua tahan nyívi cuca*

<sup>1</sup> ¡Tyaa soho ndo tuhun caahán yu ihya, nyooho nyívi cuca! Vacu ndo tsihin tsa cuiihya cuñi ndo, caña tsa ndo tsa cuenda tundoho tsa cua nyehe ndo.

<sup>2</sup> Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsj tiquixin.

<sup>3</sup> Xuhun cuaan tan xuhun cuitsin ndo tsa ndihi can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuví tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihi quívi ihya?

<sup>4</sup> Tan ña tyahví ndo yahvi tsa taahán tsi tsi nyívi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihi ángel tsa cuví andaru cuenda ra. Tan maa Jutu Mañi yo tsiñi ra tuhun caahán ñi ndaahvi can.

<sup>5</sup> Iyó vaha xaan ndo nu ñuhu ñayívi ihya tyin cuca ndo. Tan javahá ndo cuhva cuñi maa ndo. Tumaa tuhvá nyívi janduxaahán quini tyin cuu ti, tacan javahá ndo tsihin ndo. Tan vityin tsa tsaj quívi tsa cua cuu ndo.

<sup>6</sup> Tyin tyaa ndo cuatyí tsaha nyívi vaha tan tsahñi ndo tsi ñi. Tan ndi ña cahan ñi cuatyí siqui ndo.

*Na cunyeé iñi yo cuatu yo tsi ra Cristo*

<sup>7</sup> Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihi cuun nyico tsi, tan naquihin ra tsa tatsj ra.

<sup>8</sup> Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

<sup>9</sup> Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñi quitsi ra.

<sup>10</sup> Yañi, quihin cuenda ndo cuhva tsicoo ra cuví ndusu yuhu Nyoo tahán tsanaha. Tyin ra ican naha ra cunyeé xaan iñi ra naha nyehe ra naha tundoho quívi tsahá cuenda ra naha tuhun Jutu Mañi yo.

<sup>11</sup> Tsító yo tyin sii xaan cuñi ra tsa cunyeé iñi nyehe tandihi nuu tundoho, tumaa tsa cunyeé xaan iñi ra Job nyehe ra tundoho. Tan nu ndihi ña, cuaha xaan tsa vaha tsahá Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehe ra tsi yo.

<sup>12</sup> Maa tyin yañi, ña cahan ndo: “Naha Nyoo maa”. Tan ña cahan ndo: “Tsító vaha

maa ra nyaá gloria”, tan ndi ña çahan ndo: “Tsitó vaha maa ra javaha ñuhu ñayivi”, tan ndi ña çahan ndo inga ca tuhun tahan can. Tatun nditsa tuhun caahan ndo, “nditsa” çatyí ndo. Maa tyin tatun tsitó ndo tyin ña nditsa, çatyí ndo tyin “ña nditsa”, coto tatsi tuñi Nyoo tsi ndo.

<sup>13</sup> Tun ndáa nyooho nyehé tundoho, ndaçan tahvi ndo tsi Nyoo. Tan nyooho tsa sii cuñí, çata ndo yaa Nyoo.

<sup>14</sup> Tan nyooho tsa cuuhví, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo.

<sup>15</sup> Tan tatun tsinú iñi ra naha tsi Nyoo cuhva tsa tsicán tahvi ra naha, nyivi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi.

<sup>16</sup> Yacan cuenda nahma ndo cuatyí ndo tsi iin ndo tan tsi inga ndo. Tan ndaçan tahvi ndo tsi Nyoo tsa cuenda inga ca nyivi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo.

<sup>17</sup> Tumaa ra Elías ra cuví ndusu yuhu Nyoo tahan tsanaha. Cuví ra iin rayíi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava.

<sup>18</sup> Yaha can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsí nyivi.

<sup>19</sup> Yañi, tatun iin nyivi tahan ndo nacoo ñi tuhun nditsa Jutu Mañi yo, tan cuanuhú ñi ñayivi inga tsaha, tan jatyinyeé ndo tsi ñi tsa nanducu nyico ñi ityi Nyoo,

<sup>20</sup> coto ndo tyin tsa javaha ndo tacan tsihin ñi, jacacu ndo añima ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

## Carta Tsa Jihna Ñi Tsa Jacuhun Ra Pedro Tsi Nyivi Yihi Cuenda Nyoo

*Nu quitsahq tyaá ra Pedro carta tsa cuenda nyivi yihi cuenda Nyoo*

<sup>1</sup>Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví.

<sup>2</sup>Tyin nda tsanaha tan nacatsj vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsj ra tsi ndo, jatyinyee Tatyí Ii ra tsi ndo tan nacuhva ndo tsi ndo tsi ra, tan tyaá yahvi ndo tsi ra Jesucristo vityin, tan ndundíi ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

*Cuita iñi ndo tyin cua ñihi yo ñayivi tsa coo yo*

<sup>3</sup>Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsaá yo inga tsaha tyin janandotó ra tsi ra Jesucristo. Yacan cuenda cuita iñi yo tyin cua ñihi yo ñayivi tsaá tsa ña cua naa maa.

<sup>4</sup>Tan tsa cuenda tsa nacacu tsaá yo, Nyoo cua cuhva ra tandihi tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita.

<sup>5</sup>Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñi tsi catyí tsa cacú yo nu cua ndihi tyembu tyin tsa ndatú vaha can tsi yo.

<sup>6</sup>Yacan cuenda sii cuñi ndo, vasu ndi maa nyehé ndo tandihi nuu tundoho juhva quivi vityin.

<sup>7</sup>Tyin tandihi maa tundoho can tan taahán tsi nyehé yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

<sup>8</sup>Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sii

xaan sii xaan cuñi ndo nda cuanda ña cuví ñihi ndo cuhva catyí ndo najava cuhva tsa sii cuñi ndo,

<sup>9</sup>tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

<sup>10</sup>Ra ndusu yuhu Nyoo tsa tsicoq tahan tsanaha nducu tuhun ra naha nácaá cua cacu yo. Tan nducu ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo.

<sup>11</sup>Tan Tatyí Ii ra Cristo tsa iyó tsihin ra naha jacotó tsi tsi ra naha náa ndihi tundoho cua nyehé ra Cristo, tan nácaá cua jacahnu Nyoo tsi ra. Tan nducu xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyí Ii tsihin ra naha.

<sup>12</sup>Maa tyin jacotó Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihi tsa cahán ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahán tuhun ihya naha ra, maa Tatyí Ii Nyoo jacahán tsi ra naha. Tan ra ángel naha ra cuñi xaan ra naha coto ra naha tuhun ihya.

*Nyoo caná ra tsi yo tyin coo yo ñayivi cuiti*

<sup>13</sup>Yacan cuenda jaha vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra.

<sup>14</sup>Coq ndo tumaa iyó tsa nyihi tsa tyaá yahvi tsi jutu. Ña coq ndo tumaa tsicoq ndo quivi tsa ndi cumañi ca nacoto ndo tsi Nyoo tyin tsanaha tsindacá ñaha tsa ña vaha tsa cuñi cuñu ñuhu ndo tsi ndo.

<sup>15</sup>Maa tyin vityin coo ndo ñayivi cuiti tyin maa Nyoo, ra tsa caná tsi ndo, cuiti iyó ra.

<sup>16</sup>Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

<sup>17</sup>Tatun tuhvá ndo tsicán tahví tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuví yo nyivi cuca, an nyivi ndaahvi.

<sup>18</sup>Nyoo nasama ra cuhva tsa ña vaha tsicoq ndo, cuhva tsa janahá tsii tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahví ra tan cacú yo,

<sup>19</sup>tyin tyahví ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra.

<sup>20</sup>Tsa ndi cumañi ca tsinu ñuhu ñayivi tsinyaq cuhva tyin tyehen cua tahan ra

Cristo. Maa tyin ña cuvɨ tsi tsa numi ñi. Nda cuanda vityin nu cua ndihi quivɨ, cuvɨ tandihɨ can tsa cuenda tsa vaha tsi maa yo.

<sup>21</sup>Tsa cuenda ra Cristo tan tsinú iní ndo tsi Nyoo tyin juvin ra janandotó tsi ra Cristo tsa yahá tshɨ ra tan jacahnu ra tsi ra. Tan yacan cuenda tsinú iní ndo tsi Nyoo tan nyítá iní ndo tyin cua naquihin ra tsi ndo.

<sup>22</sup>Tsihin tunyee iní Tatyɨ Iin Nyoo tyaá yahvi ndo tuhun nditsa. Tan tsa ndundiɨ ndo jahá Nyoo tsa cuenda tsa tyaá yahvi ndo tuhun nditsa can. Tyin tacan tan cuvɨ cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa nɨ iní ndo, tan tsihin tandihɨ tunyee iní tsa iyó tsi ndo.

<sup>23</sup>Tyin tsa nacacɨ tsa ndo, maa tyin ñavin tumaa cacú nyivɨ nu ñuhu ñayivɨ ihya, tyin jutu ndo cacú ra naha jahá sihi ra naha tan tshɨ ra naha. Tan nyooho vityin nacacɨ tsa ndo tsihin Nyoo tsa ña cua cundihi maa, tyin tacan ñi cua coo maa tsi.

<sup>24</sup>Tyin catyɨ tuhun Nyoo tyehen: Tandihɨ nyivɨ tsa iyó nu ñuhu ñayivɨ ihya cuvɨ ñi tumaa cuhu.

Tan tsa cahnu tsa javahá ñi cuvɨ tsi tumaa ita.

Tyin cuhu can na ityɨ can, tan cucoyó ita can. [Tacan cuvɨ nyivɨ, tyin iin yaha ñi tsihi ñi.]

<sup>25</sup>Maa tyin tuhun Jutu Mañi yo tacan ñi iyó maa tsi.

Tan tuhun ihya cuvɨ tuhun vaha tsa jacacú Nyoo tsi yo tsa caahán ndi tsihin ndo.

## 2

<sup>1</sup>Yacan cuenda nacoo ndo tandihɨ nuu tsa caquiñi. Ña jandavi ñaha ndo tan nyivɨ, ña jahá ndo tyin vaha ndo tan ña nditsa, ña nyiyo iní ndo nyehe ndo tsa iyó tsi inga nyivɨ, ña çahan ca ndo cuendu.

<sup>2</sup>Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuanda ndihɨ cacu ndo,

<sup>3</sup>tun nditsa tyin tsitó ndo tyin Jutu Mañi yo, vaha xaan ra cuvɨ ra.

*Ra Cristo cuvɨ yuu nyito*

<sup>4</sup>Çunyaa naa ndo tsi Jutu Mañi yo. Tyin juvin ra cuvɨ yuu nyito tsa ña cuñi nyivɨ cuatyíñu ñi. Maa tyin Nyoo nacatsɨ ra tsi Jutu Mañi yo tyin juvin ra cuvɨ yuu sɨ caá tsa yahvi nyaá tsa cuenda ra.

<sup>5</sup>Tatun nyaa naa vaha yo tsi ra Cristo, cua cuvɨ yo tumaa iin vehe tyin maa Nyoo cuvɨ ra tumaa ra javahá vehe. Çuhva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuvɨ ndo tumaa ra jutu tsa javahá maa ñi tyiñu

Nyoo. Cua jacahnu ndo tsi ra tan sɨ xaan cua cuñi ra.

<sup>6</sup>Tyin catyɨ tucu nu tutu ra tyehen:

Yuhu nacatsɨ yu iin yuu tsa tsiñi ñuhu ca tan sɨ ca caá, tan tsaquɨn yu yuu can nu cua javaha yu vehe yu nda Sión.

Tan nyivɨ tsa tsinú iní tsi ra tsa cuvɨ yuu can, ña cua tahan ñi ticanuu. Tacan catyɨ Nyoo tuhun ra Cristo nu tutu ra.

<sup>7</sup>Maa tyin tsa cuenda yoo tsa tsinú iní tsi ra Cristo, ra cuvɨ yuu can, tsiñi ñuhu xaan ra tsi yo. Tan tsa cuenda nyivɨ tsa ña tsinú iní tsi ra, cuvɨ ra tumaa iin yuu tsa caahán Nyoo tuhun nu tutu ra tan catyɨ tsi tyehen:

Yuu tsa ña cuñi ra javahá vehe cuatyíñu ra, yacan cuvɨ yuu tsa tsiñi ñuhu ca, catyɨ tsi.

<sup>8</sup>Tan catyɨ tucu tsi:

Ra ican cuvɨ yuu tsa cuaha xaan nyivɨ cua nañi tsaha tan nduva ñi.

Cuvɨ ra iin cava tsa janduvá tsi ñi, catyɨ tsi nu tutu Nyoo.

Nduva nyivɨ can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

*Nyivɨ yihí cuenda Nyoo*

<sup>9</sup>Maa tyin nyooho cuvɨ ndo nyivɨ nacatsɨ maa Nyoo. Tan cuvɨ ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuvɨ ndo nyivɨ ii ityɨ nuu ra tan cuvɨ ndo nyivɨ maa ra, tacan tan cahan ndo tuhun vaha tsa javahá ra. Tyin juvin ra tavá tsi yo nu naa tan tyihɨ ra tsi yo nu nditsin tan nu sɨ caá.

<sup>10</sup>Tsa ndi cumañi ca cuvɨ ndo nyivɨ Nyoo, nduve yahvi nyaá ndo. Maa tyin vityin nyivɨ Nyoo cuvɨ ndo. Quivɨ can yoñi cundaahvi iní tsi ndo, maa tyin vityin Nyoo cundaahvi iní ra tsi ndo.

*Nu catyɨ ra Pedro tyin coo yo, tan javaha yo tyiñu nuu Nyoo*

<sup>11</sup>Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivɨ cuvɨ ndo, tyin nda gloria cuvɨ ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo.

<sup>12</sup>Jaha cuenda ndo tsi ndo nu iyó ndo tyañu nyivɨ tsa ña tsitó tsi Nyoo. Tyin vasu caahán ñi ndavaha ñi siquɨ ndo, tan catyɨ ñi tyin ña vaha ndo, maa tyin quivɨ quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

<sup>13</sup>Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuvɨ ra rey cahnu ca,

<sup>14</sup>a iin ra jaquitsɨ ra rey tyin tatsi tuñi ra tsi ra iyó cuatyɨ naha ra tan naquihin ndaahvi ra tsi yoo tsa javahá tsa vaha.

<sup>15</sup> Tyin Nyoo cuñi ra tsa javaha yo maa ñi maa tsa vaha tyin tacan tan ña ñiñi ca nyivi soho tan nyivi ña tsitó náa cahan ñi siqui yo.

<sup>16</sup> Cqo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra.

<sup>17</sup> Jaha ndo tsa ñayivi tsi tandihi ñi nyivi. Cuñi ndo tsi ñi yihí cuenda Nyoo. Jaha ndo tsa ñayivi tsi ra ndacá ñaha, tyin Nyoo nyehé ra tandihi tsa javahá yo.

### *Uvi taahan cuhva nyehé yo tundoho*

<sup>18</sup> Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha.

<sup>19</sup> Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsa can nuu ra.

<sup>20</sup> Maa tyin tatun tatsí tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehe ndo tundoho, nduve náa catyi. Maa tyin tatun ña cundihi iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo.

<sup>21</sup> Tumaa tsa nyehé maa ra Cristo tundoho tsa cuenda yo, tacan taahán tsi cunyeé iñi yo nyehe yo tundoho tyin tsa cuenda yacan cana Nyoo tsi yo.

<sup>22</sup> Ra Cristo ndi intuhun cuatyí ña javahá ra. Tan ndi iin tsaha tan ña jandaví ñaha ra tsi nyivi.

<sup>23</sup> Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehé ñi tundoho tsi ra ña jayuhví ra tsi ñi. Tyin intuhun ñi maa Nyoo cuví ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo.

<sup>24</sup> Tyin cuhva tsa ticaá ra Cristo nu cruu can, tsicoso tandihi cuí maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayivi cuíti. Tyin tsihin tsa ñicuehe ra, tan nduvahá yo.

<sup>25</sup> Tyin quivi can tsicá nuu yo cuví yo tumaa mbee tsa ndog ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra añima yo. Cuví ra ityi nuu tsihin yo.

## 3

### *Nacaa taahán tsi coo nyivi tindaha*

<sup>1</sup> Tacan tucu nyooho, ñiñaha tsa iyó yii. Tyaa yahvi ndo tsi yii ndo tyin tatun ña tsinú iñi ra tsi ra Cristo, cua tsinu ndihi iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quíhi ndaha ra tsi ndo. Tan ña cuñi tsi cuaha xaan cahan ndo tsihin ra,

<sup>2</sup> tyin nyehé ra tyin catsi iyó ndo tan jahá ndo tsa ñayivi tsi ra.

<sup>3</sup> Ña caca xaan iñi ndo janduvaha ndo tsi ndo ityi tsata ñi, tyin ña ñiñi xaan cuñi tsi tsa iyo xaan janduvaha ndo jiñi ndo, tan cuatyíñu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandihi yacan.

<sup>4</sup> Maa tyin jandutyaqui ndo tsi ndo tsihin tsa quitá añima ndo tyin tun cuíti iyó yo tan vita iñi yo, tan taxin iyó yo, yacan cuví tsa sii ca caá nuu Nyoo. Tan ña cua tiví maa can.

<sup>5</sup> Tyin tsihin tsehe ndutyaqui ñiñaha tsa nacotó tsi Nyoo, ñi tsa tsicoq tañan tsanaha. Nyita iñi ñi tsi Nyoo tan tyaa yahvi ñi tsi yii ñi.

<sup>6</sup> Tumaa ña Sara, tyaa yahvi ña tsi ra Abraham yii ña. Tan catyi ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuví ndo tumaa maa ña.

<sup>7</sup> Tan tacan tucu nyooho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayivi iyó ndo. Javaha ndo tyehen tyin tacan tan tñn cuenda Nyoo tuhun caahán ndo tsihin ra.

### *Nu tsahá cuenda ra Pedro nácaa taahán tsi coo yo*

<sup>8</sup> Nu ndihi tuhun, iin ñi cuhva caca iñi tandihi ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñi ndo tsi yañi ndo tsa cacú tsihin ndo. Vita cahan ndo tsihin tahan ndo, tan ña cahunu jaha ndo tsi ndo; cuví ndo nyivi vaha.

<sup>9</sup> Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña cahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo.

<sup>10</sup> Tyin tuhun Nyoo catyi tsi tyehen: Nyivi tsa cuñi coo ñayivi tsihin tsa sii, cuñi tsi jaha ñi cuenda yaa ñi, tan ña cahan ñi tsa ndavaha ñi, tan ndi ña cahan ñi cuendu.

<sup>11</sup> Jandihí ndo tsa javahá ndo tsa ña vaha, tan javaha ndo tsa vaha.

Nducu ndo cuhva coo taxin ndo, tan cqo ndo tacan.

<sup>12</sup> Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñi ra nyehé ra tsi ñi.

<sup>13</sup> Ndi intuhun maa nyivi tan ña cuví javaha ñi tsa ña vaha tsihin ndo tatun nyooho tan maa ñi tsa vaha nanducú ndo.

<sup>14</sup> Cusiñi ñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo.

<sup>15</sup> Jachahnu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caca ñi ndo tuhun Nyoo tyin tatun ndaca tuhun nyivi tsi ndo nacuenda tsinú ñi ndo tsi ra, cuvi cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi.

<sup>16</sup> Catsi coo ndo tyin tun catsi iyó ndo ña can nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa cahán ñi siqui ndo.

<sup>17</sup> Vaha ca nyehé yo tundoho tsa cuenda tsa javahá yo tsa vaha tatun Nyoo cuñí, tan ñavin ca tsa nyehé yo tundoho cuenda tsa ña vaha.

<sup>18</sup> Tyin ra Cristo nyehé ra tundoho tan tsihi ra iin tsaha ñi tsa cuenda cuatyin tandihi yo. Ra vaha cuvi ra maa tyin nyehé ra tundoho tan tsihi ra tsa cuenda yo tsa cuvi yo nyivi caquiñi, tyin tacan tan cuvi tsaá yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí Ii ra.

<sup>19</sup> Tacan tan tsihin Tatyí Ii ra tsahán ra tsicahán ra tsihin añima nyivi tsa yucú anyaya.

<sup>20</sup> Tan ñi ican cuvi ñi tsa ña tyaá yahvi tsi Nyoo quivi tsicoo ra Noé tahañ tsanaha, tyin ñi tsinú yutun ndoo tacan tsa ndatu Nyoo tsa ndu uvi ñi ñi cuatyí ñi. Maa tyin ña cuaha ñi cacú quivi cuñu savi cahnu tsa tsaháñ ndutya ñuhu tsi ñi. Una taahan ñi ñi cacú tsitsi yutun ndoo tyin nandaá yutun ndoo can nu ndutya ñuhu.

<sup>21</sup> Tan tacan tucu maa yo tumaa tsa cacú ñi ican, tacan cacú yo quivi tsicoondutya yo. Maa tyin ñavin nyahyu yo nacatya ndutya can tsa tsicoondutya yo. Yacan cuñi tsi catyi tsa tsicán tahvi yo tsi Nyoo na nacatya ra añima yo tan cacú yo jahá tsa nandoto ra Jesucristo.

<sup>22</sup> Tan nandaá ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihi tatyí ña vaha tsa ndacá ñaha tsi nyivi.

## 4

*Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.*

<sup>1</sup> Yacan cuenda janyee ndo ñi ndo nyehé ndo tundoho tumaa nyehé ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñi cuñu ñuhu ñi.

<sup>2</sup> Tyin tacan tan tandihi quivi coo ñi cua javaha ñi cuhva cuñi Nyoo, tan ñavin cuhva cuñi cuñu ñuhu ñi.

<sup>3</sup> Vityin tsindihí tsa javahá ndo tsa caquiñi tsa taahán ñi nyivi tsa ña tsitó tsi Nyoo. Tsi-coo ndo cuhva cuñi ndo, cuaha tsa caquiñi javahá ndo, tan javahá ndo tsa caquiñi tsa cuñi cuñu ñuhu ndo. Javahá ndo vico tan tsiñi ndo. Tan jachahnu ndo tsitoho tsa ña taahán tsi jachahnu ndo.

<sup>4</sup> Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñi ñi. Tan caahán ñi ndavaha ñi siqui ndo.

<sup>5</sup> Maa tyin tandihi tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi.

<sup>6</sup> Yacan cuenda jacoto ra Cristo tuhun vaha tsi ndiyi. Tyin tacan tan cuvi coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsihi tandihi ca nyivi.

<sup>7</sup> Tsa yatyin cuii cundihi tandihi maa tsa iyó nu ñuhu ñayivi ihya. Yacan cuenda catsi coo ndo tan ña jandihí ndo tsa ndacan tahvi ndo tsi Nyoo.

<sup>8</sup> Tsa jhna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu ñi tsi ñi.

<sup>9</sup> Tatun tsaá iin nyivi vehe ndo, vaha tyañuu ndo tsi ñi tan ña caca ñi ndo tyin jatyañu ñi tsi ndo.

<sup>10</sup> Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo.

<sup>11</sup> Tatun tsahá Nyoo tuhun cahan un tsihin nyivi, cahan, maa tyin maa ñi tuhun tsa tsahá ra tsi un. Tatun tsahá ra tyin javaha un tyiñu nuu nyivi, javaha tsihin tunyee ñi tsa tsahá maa ra. Tandihí tsa catyi Nyoo tyin javaha ndo, javaha ndo can, tyin tacan tan jachahnu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jachahnu yo. Tan na cundaca ñaha ra tsihin tunyee ñi ra tacan ñi maa. Tan na cuvi tsi tacan.

*Sii cuñi ndo tun nyehé ndo tundoho tsa cuenda ra Cristo*

<sup>12</sup> Yañi tsa cuñi xaan yu, ña iyo xaan cuñi ndo tatun vatsi tundoho ñihi siqui ndo. Ña cuñi ndo tyin ña taahán tsi nyehé ndo tundoho.

<sup>13</sup> Cú sii ñi ndo tyin cuvi nyehé ndo tundoho tumaa nyehé ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehé ndo tsa cahnu cuvi ra.

<sup>14</sup> Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi

ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyooho jacahnú ndo tsi ra.

<sup>15</sup> Tatum nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javaha ndo tsa ña vaha, o tsa tyihñi ndo tsi ndo nu ña taahán tsi.

<sup>16</sup> Maa tyin tun nyehé ndo tundoho tsa cuenda tsa yihí ndo cuenda ra Cristo, ña nduçahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

<sup>17</sup> Tyin tsa tsaá quivi tsa quitsaha jacutuñi Nyoo tsi tandihí nyivi. Tan jihna ca yoo tsa yihí cuenda ra cua cutuñi. Tatum tyehen tatsí tuñi Nyoo luxu ñi tsi yoo, znáca ca tatsí tuñi ra tsi nyivi tsa ña tyaá yahvi tuhun caahán ra?

<sup>18</sup> Tatum yí cacú añima nyivi vaha, znáca ca cacú añima ñi quiñi iyó, ñi ña vaha?

<sup>19</sup> Yacan cuenda tatum nyehé ndo tundoho cuhva cuñi Nyoo, cuñi tsi tsa jañiñi ca ndo javaha ndo tsa vaha. Tan tyaa cuenda ndo añima ndo ndaha ra tyin maa ra javaha tsi yo, tan cua javaha ra tumaa caahán ra.

## 5

*Nu tsahá cuenda ra Pedro tsi yo náca coo yo*

<sup>1</sup> Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihí tundoho tsa tahan ra Cristo. Tan cua cutahan yu tsihin tandihí ca ra naha quivi quitsi ra Cristo inga tsaha tsihin tsa cahnu cuví ra.

<sup>2</sup> Jaha cuenda ndo tsi nyivi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa ñi ñi añima ndo tan ñavin tsihin tsa ñiñi, maa tyin cuhva cuñi Nyoo. Ña javaha ndo can tsa cuenda tsa cuñi ndo xuhun. Tandihí tyiñu javahá ndo, javaha ndo can tsihin tsa cacú ñi ndo.

<sup>3</sup> Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihi ndo tsi ñi.

<sup>4</sup> Tacan tan quivi cua quitsi ra cuví ityí nuu tsihin nyooho tsa jahá cuenda mbee jana Nyoo, cua cuhva ra tsa si caá tsa ña cua tiví maa tsi ndo.

<sup>5</sup> Tacan tucu nyooho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen:

Nyoo ña cuñi ra nyehe ra tsi nyivi tsa yaa xaan,

Maa tyin jatyinyeé ra tsi ñi tsa ña yaa.

<sup>6</sup> Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee ñi tsa iyó tsi ra, tyin tacan tan cuví jacahnu ra tsi ndo quivi cua tahan tsi.

<sup>7</sup> Tyaa cuenda ndo tandihí tsa tsicá xaan ñi ndo ndaha Nyoo tyin maa ra jahá cuenda tsi ndo.

<sup>8</sup> Catsi cuhun ñi ndo tan jaha vaha ndo cuenda ndaa tsa vaha tan ndaa tsa ña vaha, tyin nu ña vaha, nu xaan ñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú ti tsa catsi ti.

<sup>9</sup> Ñihi cunyecu ndo tsihin tsa tsinú ñi ndo tsi Nyoo tyin tacan tan cuví jaha ndo tsi nu ña vaha. Tyin juvin ñi tundoho tsa nyehé nyooho tan nyehé tucu tandihí ca nyivi yihí cuenda ra Cristo tani cahnu nu ñuhu ñayivi.

<sup>10</sup> Maa tyin Nyoo jatyinyeé ra tsi yo, tan tsa yaha nyehe ndo tundoho juhva quivi, Nyoo cua jacutsa ca ra tsi ndo, ñihi cunyecu ndo tsihin tsa tsinú ñi ndo, tan cua cuhva ca ra tunyee ñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra caná tsi yo tyin ndu iin yo tsihin ra Cristo tyin coo yo nu si caá tsihin ra tacan ñi maa.

<sup>11</sup> Na jacahnu yo tsi ra tan na cundaca ñaha maa ra tacan ñi maa. Tan na cuví tsi tacan.

*Nu tsahá ra Pedro nacumi tsi nyivi nu ndihí ña*

<sup>12</sup> Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin ñi xaan ñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñi xaan Nyoo tsi yo. Yacan cuenda ña nacoo ndo itsi.

<sup>13</sup> Nyivi yihí cuenda Nyoo ñuu Babilonia tsa nacatsí Nyoo tumaa nacatsí ra tsi nyooho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

<sup>14</sup> Cuñi tahan ndo tsi ndo tan cuhva tahan ndo nacumi tsi ndo.

Na coo ca tsa taxin añima tandihí nyooho tsa iin ñi cuví tsihin ra Jesucristo.

Tan na cuví tsi tacan ñi.

## Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

*Nu tyaá ra Pedro inga carta tsa cuenda  
nyivi yihí cuenda Nyoo*

<sup>1</sup> Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinü vaha iñi tsi Nyoo tumaa tsa tsinü iñi nyuhu. Inducu ñi tsinü iñi yu tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacü tsi yo.

<sup>2</sup> Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

*Nacaa taahán tsi coo nyivi yihí cuenda  
Nyoo*

<sup>3</sup> Nyoo, tsihin tunyee iñi tsa iyó tsi ra, tsahá ra tandihí tsa tsíñi ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra.

<sup>4</sup> Tan tsihin tandihí tsa vaha can, tsahá tucu ra tsa catyí ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacotó yo tandihí tsa caquiñi tsa javahá yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya.

<sup>5</sup> Yacan cuenda cuñi tsi tsinü ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cuiti yo. Tan cuñi tucu tsi nducu yo cuhva cutuñi vaha iñi yo cuhva cuñi Nyoo tsihin yo.

<sup>6</sup> Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihí iñi yo. Yaha can tan nducu yo cuhva coo yo ñayivi iyó Nyoo.

<sup>7</sup> Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihí yo.

<sup>8</sup> Tatun tacan iyó ndo tan tacan nducü ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan.

<sup>9</sup> Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahán tsanaha.

<sup>10</sup> Nyoo caná tsi ndo tan nacatsi ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi ndo.

<sup>11</sup> Tacan tan ña yíi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacü tsi yo. Tan cua coo cuíi ndo tsihin ra.

<sup>12</sup> Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñi ndo javahá ndo tuhun nditsa tsa cutuhva ndo.

<sup>13</sup> Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu.

<sup>14</sup> Tyin tsa jacotó Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya.

<sup>15</sup> Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

*Nu nacatyí tuhun ra Pedro nacaa nyehere ra  
naha tsa cahnu cuví ra Cristo*

<sup>16</sup> Ñavin tsa nandacü iñi ñi maa ndi tan cahán ndi tsihin ndo quivi jacotó ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehé ndi tsa cahnu cuví ra. Tan jacotó ndi tsi ndo tyin iyó xaan tunyee iñi tsi ra tan cua quitsi ra inga tsaha.

<sup>17</sup> Tyin nyehé ndi nu jacahnü Nyoo Jutu yo tsi ra tan nyehé ndi nu janduxiñü ra cuhva caá ra. Tan sñi xaan cuví nu cahán Nyoo tan catyí ra: “Ra ihya cuví Sehe yu, tan cuñi xaan yu tsi ra. Tan sñi xaan cuñi yu tsihin ra”, catyí Nyoo tuhun ra Jesús quivi can.

<sup>18</sup> Juvín nyuhu tsíñi ndusu Nyoo tsa quitsi ityi andivi quivi tsiyucü ndi yucu ii tsihin Jutu Mañi yo.

<sup>19</sup> Tuhun ihya janahá tyin nditsa tsa tyaá ra cuví ndusu yuhu Nyoo nu tutu tahán tsanaha. Tatun tyaá yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo.

<sup>20</sup> Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyí tsa tyaá ra ndusu yuhu Nyoo.

<sup>21</sup> Tyin ra cuví ndusu yuhu Nyoo tahán tsanaha ña cahán ra naha cuhva cuñi maa ra naha. Maa tyin cahán ra naha cuhva cuñi Nyoo tyin maa Tatyí li Nyoo jaquihín ityi tsi ra naha.

## 2

*Ra jacuahá tsa ña nditsa  
(Judas 4-13)*

<sup>1</sup> Maa tyin tsicoq tucu ra cahán cuendu naha ra nu tsicoq nyivi Israel tahán tsanaha.



Catyj ra naha tyin cuví ra naha ndusu yuhu Nyoo tan ña ndítsa. Tan tacan cua coo tucu ra vatya naha ra nu yucú ndo. Xeehe xaan cua jacuaha ra naha tsa ña ndítsa tsa cuví jativí tsi ndo. Tan cua catyí ra naha tyin ña ndítsa tuhun Jutu Mañi yo tan juven ra jatá tsi ra naha. Yacan cuenda numi ñi cua cunaa ra can naha ra.

<sup>2</sup>Tan cuaha xaan nyívi cua cunyicun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa ndítsa vaha ra Cristo.

<sup>3</sup>Tan tsa cuenda tsa cuñi ra naha xuhun, cua nducu ra naha cuñi jandaví ñaha ra naha tsi ndo tsihin tsa jacuaha ra naha maa ñi tsa ña ndítsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

<sup>4</sup>Tyin ndi ña jahá Nyoo tucahun iñi tsi ángel tsa tsicoo cuatyí tahan tsanaha. Jacuhun ra tsi nahnu anyaya. Tsahñi ra tsi nahnu tsihin cadena, tan nacoó ra tsi nahnu nu naa nda cuanda tahan tsi jacutuñi ra tsi nahnu.

<sup>5</sup>Tan ndi ña jahá ra tucahun iñi tsi nyívi ña vaha tsa tsicoo tsanaha. Jacuun ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyívi ra. Ra ican cahan ra tsihin nyívi na nducu ñi cuñi coo vaha ñi tsihin Nyoo.

<sup>6</sup>Tacan javahá tucu ra tsihin ñuu Sodoma tan ñuu Gomorra, janaq ra itsi. Tsahmj ra ñuu can tan nanduví tsi nyaa, tyin coto nyívi caquiñi tsa iyó vityin tan nyívi tsa cua coo náa cua tahan ñi.

<sup>7</sup>Maa tyin jacacu ra tsi ra Lot tyin vaha iyó ra nuu ra. Cuihya cuñi ra Lot nyehé ra cuñi iyó nyívi caquiñi can.

<sup>8</sup>Tandihí quivi tsa tsicoo ra Lot ñuu can, cuihya cuñi añima ra tsa cuenda tsa tsíni ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi.

<sup>9</sup>Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyívi caquiñi nda cuanda tahan tsi quivi cutuñi ñi.

<sup>10</sup>Yaha ca cua tatsi tuñi Nyoo tsi nyívi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha.

<sup>11</sup>Tan ángel, vasu ndi maa iyó ca tunyee iñi tsi ra naha tan ñavin ca nyívi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

<sup>12</sup>Maa tyin ra vatya can naha ra cuví ra naha tumaa quití tsa ña cutuñi iñi tan javahá ti naha ti tsa cuñi maa ti naha ti. Tyin

quití, ¿náa cuenda iyó ti? Iyó ti tyin tiin yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihi quití can naha ti.

<sup>13</sup>Cua nyehé ra naha tundoho tsa cuenda tsa janyehé ra naha tundoho tsi inga nyívi. Si xaan cuñi ra naha tsihin tsa caquiñi javahá ra naha nu tuvi. Tsahá ra naha ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusi iñi. Maa tyin juven ñi tsi maa ra naha jandaví ñaha ra naha.

<sup>14</sup>Tandihí ñaha tsa nyehé ra naha, cuñi ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyívi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha.

<sup>15</sup>Nacoó ra can naha ra ityí vaha tan naquihín ra naha ityí tsa caahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñi ra jaha canaa ra xuhun tsihin tsa ña vaha tsa javaha ra.

<sup>16</sup>Tacan tan nacahan burru jana ra tsihin ra, tumaa caahán nyívi, tan tsa nacahan ti ña tsahá ti cuhun ra javaha ra tsa ña vaha tsicá iñi ra.

<sup>17</sup>Tan tacan tucu maa ra can naha ra. Cuví ra naha tumaa iin soco ityí nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuñi ra naha.

<sup>18</sup>Yaa xaan caahán ra naha. Maa tyin tandihí tsa caahán ra naha nduve yahví nyaá can. Tan tsihin tandihí tsa ña vaha tsa javahá ra tan tsihin tsa ña vaha tsa cuñi cuñu ñuhu ra naha jandaví ñaha ra naha tsi nyívi tsa tsa yahá quitá mahñu nyívi tsa javahá tsa caquiñi.

<sup>19</sup>Catyí ra naha tsihin ñi tyin cua coo nuña ñi. Maa tyin juven ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo, musu can cuví yo.

<sup>20</sup>Tyin nyívi tsa nacotó tsi Jutu Mañi yo Jesucristo, ra jacacú tsi yo, tsa yahá nacoó ñi tsa caquiñi tsa iyó nu ñuhu ñayívi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo.

<sup>21</sup>Vaha ca tun tsatyin ña nacotó ñi ityí vaha, tan ñavin ca tsa nacoó ihñi ñi tsa tsahá Nyoo tsi ñi tsa tsa yahá nacotó ñi tsi ra.

<sup>22</sup>Maa tyin cundaca tsa tuhvá nyívi caahán: “Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu.” Tacan cuví ñi

can tyin javahá nyico ñi tsa javahá ñi nda jihna.

### 3

#### *Quivi cua quitsi nyico Jutu Mañi yo*

<sup>1</sup> Yañi, cuñi xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tsahá cuenda yu tsi ndo na caca vaha iñi ndo tan ña naa iñi ndo tsa cutuhva ndo.

<sup>2</sup> Ndūcuhun iñi ndo tsa cahan ra cuvī ndusu yuhu Nyoo tahañ tsanaha. Tan ndūcuhun tucu iñi ndo tsa jacuahá ndi tsi ndo. Tyin cuvī ndi ra tava tyiñu Jutu Mañi yo Jesucristo, ra jacacú tsi yo.

<sup>3</sup> Coto jihna ndo tyin nu cua ndihi quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi.

<sup>4</sup> Tan cua catyi ñi: “¿Náa ra Jesucristo tsa catyi tyin cua quitsi ra inga tsaha? ¿Numaa nyii ra? Tyin nda quivi tsa tsihi tsi tsaahnu yo tan nda cuanda tsa tsinu ñuhu ñayivi tan nda vityin caá ñi maa tahan ñi caá”, cua catyi ñi.

<sup>5</sup> Tyin maa ñi ña cuñi ñi coto ñi tyin nda tyembu tsahnu cahan Nyoo tan javahá ra andivi tan ñuhu ñayivi. Quita ñuhu ñayivi tsitsi ndutya, tan tsihin ndutya tsinu tsi.

<sup>6</sup> Tsa yaha javahá Nyoo ñuhu ñayivi juvin ñi maa tsihin ndutya naa ñuhu ñayivi quivi cuun savi xaan.

<sup>7</sup> Maa tyin andivi tan ñuhu ñayivi tsa iyó vityin ndatú tsi tsa cayu tsi tumaa catyi maa Nyoo. Cua cayu andivi tan ñuhu ñayivi tsihin ñuhu quivi cua cutuñi nyivi tan cua naa nyivi caquiñi.

<sup>8</sup> Maa tyin nyooho yañi yu tsa cuñi xaan yu, ña naa iñi ndo tyin tsa cuenda Jutu Mañi yo tsa iin quivi cuví tsi tumaa mil cuiya, tan tsa mil cuiya cuví tsi tumaa tsa iin quivi tsa cuenda ra.

<sup>9</sup> Vasiqui yihí ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uvj iñi tandihi nyivi tan nasama ñi cuhva iyó ñi tyin ña cuñi ra tsa cunaa ndi intuhun yo.

<sup>10</sup> Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihi cunahma tan cua naa andivi. Tan cua janaa ñuhu tandihi tsa iyó ityi siqui. Tan ñuhu ñayivi cua cayu tsi tsihin ñuhu tsihin tandihi tsa iyó nuu tsi.

<sup>11</sup> Tacan cua naa tandihi tsa iyó. Yacan cuenda cuñi tsi cuiti coo yo tumaa iyó maa Nyoo.

<sup>12</sup> Cuatu ndo quivi quitsi Nyoo. Ndūcu ndo cuhva quitsi ñi ra tyin quivi tsa cua quitsi ra cua naa andivi jaha ñuhu. Tan

tandihí tsa iyó cua naa tsi tsihin tsa ihñi ñuhu can.

<sup>13</sup> Maa tyin yoo ndatú yo andivi tsa tan ñuhu ñayivi tsa tsa catyi Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

<sup>14</sup> Yacan cuenda yañi, tsitsi tsa ndatú yo tsi Jutu Mañi yo, ndūcu ndo cuhva coo vaha ndo tsihin Nyoo, tyin tacan tan quivi quitsi ra, sii cua cuñi yo tan cua coo taxin añima yo tyin nduve ca cuatyí yo iyó.

<sup>15</sup> Coto ndo tyin Jutu Mañi yo ña cundiñi iñi ra ndatú ra tsi yo tyin cuñi ra tsa cacu cuaha nyivi. Juvin ñi tyehen caahán tucu ra Pablo yañi yo nu carta tsa jaquitsi ra tsi ndo. Tyaa ra itsi tsihin tsa tsiñi tuñi tsa tsaha Nyoo tsi ra.

<sup>16</sup> Tandihí ñi nu carta ra tan caahán ra tuhun ihya. Vasu yihí tsa yii xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, sin cuhva cutuñi iñi ñi itsi. Juvin ñi tacan javahá ñi tsihin tuhun Nyoo tsa tyaa inga ca ra naha. Tan tsa tacan javahá ñi, juvin ñi tsi maa ñi jacunaá ñi.

<sup>17</sup> Yacan cuenda yañi, vityin tsa tsitó ndo tuhun ihya tsa ndi cumañi ca cuvi tsi, jaha ndo cuenda tsi ndo tan cuñi yu tsa coto ndihi ndo cuhva jandaví ñaha ra caquiñi can naha ra, tyin tacan tan ña nacoo ndo cuhva vaha tsa cuahán ndo.

<sup>18</sup> Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuvi tsi tacan ñi.

## Carta Tsa Jihna Ñi Tsa Tyaa Ra Juan

*Cua coo yo ñayivi nyito*

<sup>1</sup> Ihya tyaá ndi tuhun ra tsa iyó nda ndi cumañi coo tandihi tsa iyó. Tsiñi ndi tsa cahān ra quivi tsicā ndi tsihin ra. Nyehe ndi tsi ra tsihin tinuu ndi tan cutuñi iñi ndi yóo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsahā ra ñayivi nyito iyó yo.

<sup>2</sup> Tan quivi tsaā ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaā tsi nu iyó yo.

<sup>3</sup> Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra.

<sup>4</sup> Tan tyaá ndi tuhun ihya tsa cuenda ndo tyin tacan tan coto ndo tandihi tsa tsahā Nyoo tsi ndo tan sii xaan cua cuví tsi ndo.

*Nyoo, ñuhū cuví ra*

<sup>5</sup> Vityin nacatyí tuhun ndi tsihin ndo tsa cahān ra Cristo tsihin ndi. Catyí ra tsihin ndi tyin Nyoo ñuhū cuví ra. Tan nduve tsa naa tsi ra, [nduve tsa ña vaha tsicā iñi ra cuví can].

<sup>6</sup> Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa.

<sup>7</sup> Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihi cuatyí yo tsihin niñi ra.

<sup>8</sup> Tatun catyí yo tyin nduve cuatyí yo, juven ñi maa yo jandaví ñaha yo, tan nduve tsa nditsa iyó añima yo.

<sup>9</sup> Maa tyin tatun naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihi cuatyí yo tyin maa ra vaha ra tan javahá ra cuhva catyí ra tyin ña vatya ra.

<sup>10</sup> [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

## 2

*Ra Cristo cuví ra caahán ndaahvi tsaha yo*

<sup>1</sup> Sehe nyihi yu, caahán yu tandihi tuhun ihya tsihin ndo, tyin tacan tan ña javahá ca

ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó.

<sup>2</sup> Juvín ra jahá tucahnu iñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihi cuiti nyivi iyó nu ñuhu ñayivi.

<sup>3</sup> Tatun tyaá yahvi yo tsa caahán Nyoo, nacotó yo tsi ra.

<sup>4</sup> Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra.

<sup>5</sup> Nyivi javahá tsa caahán Nyoo, ñi ican cuví ñi cuñi tsi ra tsihin tsa ñi iñi añima ñi. Tan tsihin yacan tsitó yo tyin iin ñi cuví ñi tsihin ra.

<sup>6</sup> Nyivi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quivi quitsi ra nu ñuhu ñayivi ihya.

*Taahán tsi tsa cuñi tahan yo tsi yo*

<sup>7</sup> Yañi, ñavin tuhun tsa jacotó yu tsi ndo, tyin cuví tsi tuhun tsahnu tsa tsa tsitó maa ndo nda quitsi ca tsi. Tan juven tsi cuví tsa tsa yahā tsiñi ndo.

<sup>8</sup> Maa tyin ña tsindihí tsa tsa tsi tyin tyaá yahvi yo itsi tan tsa tyaá yahvi yo itsi, cuñi tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsín ñuhū tsa nditsa.

<sup>9</sup> Nyooho tsa catyí tyin iyó ndo nu nditsin, tan ndasi cuñi ndo nyehe ndo tsi nyivi yihí tuhun Nyoo tsihin ndo, ndi iyó ndo nu naa.

<sup>10</sup> Maa tyin nyivi tsa cuñi tsi nyivi yihí tuhun Nyoo tsihin ñi, iyó ñi nu nditsin. Tan nduve maa cuatyí cuví janduva tsi ñi.

<sup>11</sup> Maa tyin nyivi ndasi cuñi nyehe tsi nyivi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaā ñi jahā tsa naa can.

<sup>12</sup> Jaquitsí yu tandihi tuhun ihya tsi nyooho tsa ndi nacuhvā cuenda tsi ndo tsi Nyoo. Tyin tsa yahā jahā Nyoo tucahnu iñi cuatyí ndo tsa cuenda tsa tsihi ra Jesucristo cuenda yo.

<sup>13</sup> Nyooho tsa tsa tsahnū tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayivi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahā canaa ndo tan ndi jahā canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhvā cuenda tsi ndo tsi Nyoo, tyin nacotó ndo tsi Nyoo Jutu yo.

<sup>14</sup> Jaquitsí yu carta ihya tsi nyooho tsa tsa tsahnū tsihin tuhun Nyoo, tyin nacotó

ndo tsi ra tsa iyó maa tan tsinü ñuhu ñayivi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

<sup>15</sup> Ña cuñi ndo tsa caquiñi tsa iyó nu ñuhu ñayivi ihya. Tyin nyivi cuñi tandihi yacan, ña cuñi ñi tsi Nyoo Jutu yo.

<sup>16</sup> Tyin tandihi tsa ña vaha tsa iyó nu ñuhu ñayivi ihya, tsa cuñi cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihi yacan tsahá ñuhu ñayivi ihya tsi yo, tan ñavin Nyoo Jutu yo tsahá can.

<sup>17</sup> Ñuhu ñayivi ihya cua cundihi can, tan cua cundihi ndihi tucu tandihi tsa caquiñi tsa cuñi nyivi javaha ñi. Maa tyin nyivi tsa javahá cuhva cuñi Nyoo, cua coo cuii ñi tsihin ra.

#### *Nu tsa ndasi cuñi nyehe tsi ra Cristo*

<sup>18</sup> Nyooho, tsa cuví ndo tumaa sehe yu, coto ndo tyin tsa cua ndihi quivi. Tan nyooho tsiñi ndo tyin vatsi nyivi tsa ña cuñi nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahan tsi cundihi quivi.

<sup>19</sup> Nyivi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyivi yihí tuhun Nyoo tsihin yo cuví ñi.

<sup>20</sup> Maa tyin nyooho tsa tsitó ndo tsa caahán Nyoo tyin tsahá ra Cristo Tatyí Ii Nyoo iyó añima ndo tan jacotó tsi tandihi tsi ndo.

<sup>21</sup> Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

<sup>22</sup> ¿Yóo cuví nyivi vatya? Nyivi vatya cuví ñi catyí tyin ra Jesús ñavin ra Cristo cuví ra. Tan juven ñi ican cuví ñi ndasi cuñi nyehé tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra.

<sup>23</sup> Tan tandihi nyivi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi iñi añima ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

<sup>24</sup> Yacan cuenda naquihin vaha ndo tsitsi añima ndo tandihi tsa tsiñi ndo nda quivi jhna ñi. Tyin tun naquihin vaha ndo itsi tsitsi añima ndo, cua coo ndo iin caa ñi tsihin Nyoo Jutu yo tan tsihin Sehe ra.

<sup>25</sup> Tan ñayivi nyito can cuví tsa catyí ra Jesucristo tyin cuhva ra tsi yo.

<sup>26</sup> Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandaví ñaha tsi ndo.

<sup>27</sup> Maa tyin ra Jesucristo tsahá ra Tatyí Ii Nyoo iyó añima ndo, yacan cuenda ña tsiñi ñuhu ca tsa jacuaha nyivi tsi ndo. Tyin juven ñi maa Tatyí Ii Nyoo jacuahá tandihi maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí Ii Nyoo tsi ndo.

<sup>28</sup> Tan vityin nyooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsaa ra.

<sup>29</sup> Vityin tsa tsa tsitó ndo tyin vaha ra Cristo, cuñi tsi coto ndihi ndo tyin tandihi nyivi javahá tsa vaha, sehe Nyoo tsi ñi.

### 3

#### *Nyivi cuví sehe Nyoo*

<sup>1</sup> Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra.

<sup>2</sup> Nyooho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quivi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo nácaa caá ra.

<sup>3</sup> Tandihi yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

<sup>4</sup> Tandihi nyivi tsa tsicoo cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyí tyin ña tyaá yahvi yo ley Nyoo.

<sup>5</sup> Nyooho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra.

<sup>6</sup> Tandihi yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra.

<sup>7</sup> Nyooho, tsa cuví tumaa sehe yu, coto jandaví ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo.

<sup>8</sup> Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jhna ñi. Yacan cuenda quitsi ra Jesucristo, Sehe Nyoo, tyin janaa ra tandihi tsa javahá nu.

<sup>9</sup>Tandihi yoo tsa tsa yaha nacacu tsa jahá Nyoo, ña taahán ca iñi yo javahá yo tsa ña vaha, tyin iyó yo ñayivi tsaahá Nyoo tsi yo. Yacan cuenda ña javahá ca yo tsa ña vaha, tyin tsa yaha nacacu tsa yo tan vityin cuvi yo sehe Nyoo.

<sup>10</sup>Cuvi nacotó yo ndáa nyivi cuvi sehe Nyoo, tan ndáa nyivi cuvi sehe nu ña vaha, tyin tandihi nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

*Na cuñi tahan yo tsi yo*

<sup>11</sup>Tyin tsa tsiñi ndo nda quivi jihna ñi cuvi: Tsa cuñi tahan yo tsi yo.

<sup>12</sup>Ña taahán tsi javaha yo tumaa javaha ra Caín, tyin ra Caín cuvi ra iin ra cuenda nu ña vaha. Tan tsañi ra tsi yañi ra. ¿Náa cuenda tsañi ra tsi yañi ra? Tsa cuenda tyin ra yañi ra javaha ra tsa vaha, tan maa ra javaha ra tsa ña vaha.

<sup>13</sup>Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo.

<sup>14</sup>Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuvi ca yo nyivi tsihí. Maa tyin nyivi ña cuñi tsi nyivi yihí tuhun Nyoo, cuvi ñi tumaa nyivi tsihí.

<sup>15</sup>Nyivi ndasi cuñi nyehé tsi nyivi, cuvi ñi tumaa nyivi tsañi nyivi. Tan tsitó ndo tyin ndi intuhun ñi tsañi nyivi, tan ña cua cuhva Nyoo ñayivi nyito coo ñi.

<sup>16</sup>Tsitó yo náa cuvi tsa cuñi tahan yo tsi yo tyin tsa yaha janaha ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuenda tsaahá ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuenda ñayivi iyó yo tsa cuenda nyivi yihí tuhun Nyoo.

<sup>17</sup>Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra.

<sup>18</sup>Nyooho tsa cuvi ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

*Nacaa javaha yo tan coo vaha yo tsihin Nyoo*

<sup>19</sup>Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo.

<sup>20</sup>Tatun tuví iñi tsitsi añima yo tyin iyó cuatyí yo, na ña cuita iñi yo yacan. Na cuita iñi yo tsi Nyoo tyin juvin ra tsitó tandihi tsa iyó añima yo tan cahnu ca cuvi ra tan ñavin ca añima yo.

<sup>21</sup>Yañi, tatun tuví iñi yo tyin nduve cuatyí yo, na ña nayuhvi yo nyehé yo tsi Nyoo.

<sup>22</sup>Tan tandihi tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra.

<sup>23</sup>Tyin tyiñu tsa tsaahá ra tsi yo yacan cuvi tsa tsinu iñi yo tyin ra Jesucristo cuvi Sehe ra, tan tsa cuñi tahan yo tsi yo, tumaa tava tyiñu ra tsi yo.

<sup>24</sup>Nyivi tyaá yahvi tyiñu tsaahá ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsaahá ra tsi yo.

## 4

*Tatyí Ii Nyoo tan tatyí nu ña vaha*

<sup>1</sup>Nyooho yañi tsa cuñi xaan yu, ña tsinu iñi ndo tsa caahán nyivi catyi tyin tuhun Nyoo caahán ñi. Nyehé jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyi ñi tyin Nyoo caahán tsa caahán ñi tan ña nditsa ñi.

<sup>2</sup>Cuvi nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyi ñi tyin quee ra Jesucristo nda gloria tan quitsí ra nu ñuhu ñayivi ihya, tan cuvi ra iin rayi tumaa maa yo.

<sup>3</sup>Maa tyin tandihi nyivi tsa catyi tyin ñavin tacan cuvi, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

<sup>4</sup>Nyooho tsa cuvi ndo tumaa sehe yu, nyivi cuenda Nyoo cuvi ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuvi ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya.

<sup>5</sup>Ñi ican, cuenda nu ñuhu ñayivi ihya cuvi ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican.

<sup>6</sup>Maa tyin yoo cuvi yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuvi nacoto yo ndáa nyivi iyó Tatyí Ii Nyoo tsihin, tan caahán ñi tsa nditsa tan ndáa nyivi yihí tatyí ña vaha tan jandaví ñaha ñi.

*Nyoo cuñi xaan ra tsi tandihi nyivi*

<sup>7</sup>Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihi yoo tsa cuñi tsi

nyivi, sehe Nyoo cuví tsi yo, tan nacotó yo tsi Nyoo.

<sup>8</sup> Nyívi ña cuñí tsi inga nyívi, ña nacotó ñi tsi Nyoo, tyin Nyoo cuñí xaan ra tsi yo tan tsi tandihí nyívi.

<sup>9</sup> Nyoo janahá ra tsi yo tsa cuñí ra tsi yo tsihin tsa tsahá ra Sehe mañi ra quítsj nu ñuhu ñayívi ihya, tyin cuhva ra ñayívi nyito coo yo.

<sup>10</sup> Nyehe ndo, nácaa tsa cuñí Nyoo tsi yo. Ñavin jihna ca maa yo cuñí tsi ra, tyin jihna ca maa ra cuñí tsi yo. Tan jaquítsj ra Sehe ra tyin tacan tan cúu ra tsa cuenda yo tan quinyaa ra cuatyí yo.

<sup>11</sup> Nyooho yañi, tatun tacan cuñí Nyoo tsi yo, juvin ñi tacan taahán tsi tsa cuñí tucu maa yo tsi nyívi tumaa tsa cuñí maa Nyoo tsi yo.

<sup>12</sup> Ndi intuhun maa nyívi, tan ñaha ca maa nyehe ñi tsi Nyoo, maa tyin tatun cuñí tahan yo tsi yo, iyó Nyoo añima yo. Tan nñi vaha iñi yo cuñí yo tsi ra tan tsi nyívi.

<sup>13</sup> Tan tsitó yo tyin iyó vaha yo tsihin ra tan maa ra iyó ra añima yo, tyin tsahá ra Tatyí Ii ra iyó añima yo.

<sup>14</sup> Nyuhu nyehe vaha ndi tan cuví ndi tsandaa tyin jaquítsj Nyoo Jutu yo tsi Sehe ra tyin jacacu ra tsi yo tsa cuví yo nyívi iyó nu ñuhu ñayívi ihya.

<sup>15</sup> Tandihí nyívi tsa tsinú iñi tan caahán tyin ra Jesús cuví Sehe Nyoo, iyó Nyoo añima ñi. Tan iyó ñi iin caa ñi tsihin ra.

<sup>16</sup> Yoo tsitó yo tan tsinú iñi yo tyin Nyoo cuñí ra tsi yo, tan cuñí ra tsi tandihí nyívi. Tan tandihí yoo tsa cuñí tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añima yo.

<sup>17</sup> Tyin tatun cuñí yo tsi Nyoo tsihin tsa nñi iñi añima yo, ña cua nayuhví yo nyehe yo tsi ra na tahan tsi quívi cutuñi tandihí nyívi nuu ra. Tyin tumaa iyó ra Jesucristo, tacan iyó yo nu ñuhu ñayívi ihya.

<sup>18</sup> Nyoo cuñí ra tsi yo, tan tatun cuñí yo tsi ra, nduve tsa nayuhví yo. Tatun nñi iñi yo cuñí yo tsi Nyoo ña nuña ca nu quihví tuhun yuuhví can añima yo, tyin Nyoo jatsiyó ra tandihí maa yacan. Tyin tatun yuuhví yo, yihí can tyin tuví iñi yo tyin iyó cuatyí yo. Tan yuuhví yo tsa cua tatsi tuñi Nyoo tsi yo. Tyin tatun yuuhví cuñí yo, yuuhví yo tyin ñaha ca cuñí yo tsi Nyoo tumaa taahán maa tsi cuñí yo tsi ra.

<sup>19</sup> Yoo cuñí yo tsi Nyoo tyin jihna ca maa ra cuñí tsi yo.

<sup>20</sup> Tatun iin nyívi tan catyí ñi: “Yuhu cuñí yu tsi Nyoo”, tan ndasi cuñí ñi nyehe ñi tsi nyívi tahan ñi, nyívi vatya cuví ñi. Tyin tatun ndasi cuñí yo nyehe yo tsi nyívi tahan yo tsa tuhvá yo nyehe, ¿nácaa cua cuñí yo tsi Nyoo tsa ña cuví nyehe yo? Ña cua cuví.

<sup>21</sup> Tava tyiñu Nyoo tsi yo tyin tun cuñí yo tsi ra, tacan cuñí tsi tsa cuñí tahan yo tsi yo.

## 5

*Tatun nñi iñi yo tsinú iñi yo tsi Nyoo cuví jaha canaa yo tsi tsa ña vaha*

<sup>1</sup> Tandihí nyívi tsa tsinú iñi tyin ra Jesús cuví ra Cristo ra quee nda gloria jahá Nyoo, juvin ñi cuví sehe Nyoo. Tyin tatun cuñí yo tsi iin ra iyó sehe, cuñí ndihí yo tsi sehe ra.

<sup>2</sup> Tatun cuñí yo tsi Nyoo tan javahá yo tsa caahán ra, cua cuñí ndihí yo tsi nyívi cuví sehe ra.

<sup>3</sup> Tyin tsa cuñí yo tsi Nyoo yacan cuví tsa tyaá yahví yo tsa tsahá cuenda ra tsi yo. Tan tandihí tsa tsahá cuenda ra tsi yo, ña yñi javaha yo can.

<sup>4</sup> Tyin tandihí yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayívi ñayívi ihya. Cuví jaha canaa yo can tyin tsinú iñi yo tsi Nyoo.

<sup>5</sup> Maa ñi maa nyívi tsa tsinú iñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayívi ihya.

*Tatyí Ii Nyoo cuví tsandaa cuenda ra Jestis Sehe Nyoo*

<sup>6</sup> Ra Jesucristo quítsj ra nu ñuhu ñayívi ihya. Tan tsa tsicoondutyá ra tsihin ndutya tan tsa tsatí nñi ra janahá tyin Sehe Nyoo cuví tsi ra. Ñavin tsa tsicoondutyá ñi ra. tyin nda cuenda tsa tsatí nñi ra. Tan juvin ñi maa Tatyí Ii Nyoo cuví tsandaa tyin tacan cuví. Tan Tatyí Ii Nyoo ña jandaví ñaha tsi.

<sup>7</sup> Nda andívi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuví ra naha.

<sup>8</sup> Tan nu ñuhu ñayívi ihya iyó tucu uñi tsandaa: Tatyí Ii Nyoo tsa iyó añima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyí Nyoo tyin juvin ra Jesús cuví Sehe ra. Tan tsa tsinu uñi cuví nu tsatí nñi ra Jesús. Tan tsa nduñi taahan yacan nacatsí tahan caahán can.

<sup>9</sup> Yoo naquihín yo tsa caahán ra cuví tsandaa nu ñuhu ñayívi ihya. Tan Nyoo cahnu ca cuví ra tan ñavin ca ra ñuu ñayívi ihya. Yacan cuenda taahán tsi naquihín yo tsa caahán ra, tan juvin ñi maa ra catyí tyin Sehe ra cuví tsi ra Jesús.

<sup>10</sup> Nyívi tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyívi tsa ña tsinú iñi tsi ra, jahá ñi tyin vatya Nyoo, tyin ña cuñí ñi tsinu iñi ñi tsa caahán Nyoo tsandaa cuenda Sehe ra.

<sup>11</sup> Tan tyehen caahán Nyoo tsihin yo: Catyí ra tyin tsahá ra ñayívi nyito coo yo tan ñihí yo itsi tatun tsinú iñi yo tyin ra Jesucristo cuví Sehe ra.

<sup>12</sup> Nyívi iyó Sehe Nyoo añima, iyó ñi ñayívi nyito. Tan nyívi nduve Sehe Nyoo iyó añima, ña iyó ñi ñayívi nyito.

*Nu ndíhi cahan ra Juan tan nu tsahá ra tyíñu tsi nyívi*

<sup>13</sup> Tyaá yu tuhun ihya tsa cuenda nyooho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayívi nyito tsa ña cua naa maa.

<sup>14</sup> Ndita iñi yo tsi Nyoo tyin tatun tsicán yo tsa tsicán yo tsi ra tan cuhva cuñí maa ra tsicán yo, tsitó yo tyin maa ra tsíñí ra tsa caahán yo.

<sup>15</sup> Tan tsa tsitó yo tyin tsíñí ra tsa tsicán yo, tsitó tucu yo tyin tsa ñihí yo tsa tsicán yo tsi ra.

<sup>16</sup> Tatun iin nyívi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tsihin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi.

<sup>17</sup> Tandíhi tsa caquiñi tsa javahá nyívi, cuatyí cuví can. Tan iyó tucu cuatyí tsa ña jaha Nyoo tucahnu iñi.

<sup>18</sup> Tsitó yo tyin nyívi tsa nacacu tsa jaha Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

<sup>19</sup> Yoo tsa tsitó yo tyin cuenda Nyoo yihí yo. Tan tandíhi nyívi tsa taahán iñi tsa iyó nu ñuhu ñayívi ihya, nu ña vaha ndacá ñaha tsi ñi.

<sup>20</sup> Tan tsitó tucu yo tyin quítsj Sehe Nyoo, tan tsahá ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juvin maa ra cuví Nyoo tsa nditsa. Tan iyó ra ñayívi nyito tsa ña cua naa maa.

<sup>21</sup> Nyooho tsa cuví tumaa sehe yu, jaha cuenda ndo tsi ndo tsihin tsitoho tsa jacahnú nyívi, tyin ñavin Nyoo cuví can.

Tan na cuví tsi tacan ñi.

## Carta Tsinu Uvi Tsa Tyaa Ra Juan

*Nu caahán ra Juan tyin cuñí xaan ra tsi nyivi yihí cuenda Nyoo*

<sup>1</sup> Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsi maa Nyoo. Cuñí xaan yu tsi ndo tsihin tsa nñi ññi añima yu. Tan cuñí ndihi tucu tandihi nyivi tsa tsitó tsa nditsa tsi ndo, yacan ñavin yuhu ñi cuñí tsi ndo.

<sup>2</sup> Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo.

<sup>3</sup> Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ññi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

<sup>4</sup> Sii xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tavá tyiñu maa Nyoo Jutu yo tsi yo.

<sup>5</sup> Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsaha Nyoo tsi yo cuví tsi. Tyin tsa iyó maa tsi nda nu quitsaha.

<sup>6</sup> Tsa cuñí yo tsi Nyoo, yacan cuví tsa javahá yo tandihi tsa tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyivi.

*Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha*

<sup>7</sup> Caahán yu tyehen tsihin un tyin cuaha xaan nyivi jandavi ñaha iyó nanií cahnu nu ñuhu ñayivi. Catyí ñi tyin ña nditsa tsa quitsi ra Jesucristo cacü ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandavi ñaha cuví ñi. Tan ñi ndasi cuñi nyehé tsi ra Cristo cuví ñi.

<sup>8</sup> Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandihi tsa cua cuhva Nyoo tsi ndo.

<sup>9</sup> Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi.

<sup>10</sup> Tatun tsaá nyivi yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi.

<sup>11</sup> Tyin tun cuhva yo nacumi tsi ñi, cuñí tsi catyi tyin javahá ndihi yo tsa ña vaha tsa javahá ñi.

*Nu ndihí cahan ra Juan*

<sup>12</sup> Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaá yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca ññi yo.

<sup>13</sup> Ihya vatsí nacumi tsi un jahá sehe ña tahan un tsa nacatsi ndihi maa Nyoo.

Tan na cuví tsi tacan ñi.



## Carta Tsinu Uñi Tsa Tyaa Ra Juan

*Nu caahán ra Juan tyin vaha cuahán ra Gayo tsihin Nyoo*

<sup>1</sup> Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha ñi tsi yu tan tsa tsitó maa un tyin cuñi xaan yu tsi un tyin iin caa ñi nyicún yo tsa nditsa.

<sup>2</sup> Yañi, tsicán tahví xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhví un.

<sup>3</sup> Yuhu sii xaan cuñi yu quívi quítsi juhva ra yañi yo naha ra nu nyí yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa.

<sup>4</sup> Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

<sup>5</sup> Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra.

<sup>6</sup> Tandihí ra naha, tan nacatyí tuhun ra naha nuu tandihí nyívi tsicá vehe ñuhu tyin cuñi xaan un tsi ra naha. Jaha tumañi ñi, jatyinyee ca tsi ra yañi yo naha ra, cuhva tsa tsíñi ñuhu tsi ra naha tumaa taahán ñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo.

<sup>7</sup> Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyívi tsa ña tsitó tsi Nyoo tsi ra naha.

<sup>8</sup> Yacan cuenda maa yo taahán tsi jatyinyee tsi ra naha tsihin tsa tsíñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

*Nu caahán ra Juan tyin ña vaha javahá ra Diótfes*

<sup>9</sup> Yuhu jacuhun yu iin carta tsi nyívi tsicá vehe ñuhu, maa tyin ra Diótfes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tsihin nyívi.

<sup>10</sup> Yacan cuenda tatun quítsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyívi tsicá vehe ñuhu naquihín vaha ñi tsi ra hermano can naha ra, tyasí ra Diótfes tsi ñi, tan tavá ra tsi ñi vehe ñuhu.

<sup>11</sup> Yooho yañi yu tsa cuñi xaan yu ña javaha un tsa ña vaha tumaa javahá ra can,

maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

*Nu caahán ra Juan tyin vaha xaan tsinú ñi ra Demetrio tsi Nyoo*

<sup>12</sup> Tandihí nyívi tan vaha caahán ñi tuhun ra Demetrio. Tan vaha xaan tyaá yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

*Nu ndihí cahan ra Juan*

<sup>13</sup> Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tsihin carta.

<sup>14</sup> Tyin tyihí yu cuhva tsa quítsi yu nu iyó un tsa numi ñi, tyin tacan tan natuhun vaha ca maa yo.

<sup>15</sup> Na coo tsa taxin añima un. Ra vaha ñi tsi yo tsa iyó ityi ihya jaquitsí xaan ra naha nacumi tsi un. Tan cuñi yu jaha un tumañi ñi cuhva un nacumi tsi tsa intuhun intuhun ra vaha ñi tsi yo.

## Carta Tsa Jacuhun Ra Judas Tsi Nyivi Yihí Cuenda Nyoo

*Nu tyaá ra Judas carta tsa cuenda nyivi cana Nyoo*

<sup>1</sup> Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñi xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo.

<sup>2</sup> Na nyehe ndaahvi Nyoo tsi ndo. Tan na cutuñi ca ifi ndo nácaa tsa cuñi ra tsi yo. Tan na naquihin ca ndo tsa taxin tsahá ra tsi yo coo añima ndo.

*Nu caahán ra Judas tuhun nyivi tsa jacuahá tsa ña nditsa*

*(2 Pedro 2.1-17)*

<sup>3</sup> Tyihí yu kuhva tyaa yu iin carta tsa cuenda ndo yañi, tyin cuñi yu cahun yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsaha Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi.

<sup>4</sup> Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yahá jahá Nyoo tucahnu iñi tsi yo, tan yacan cuenda cuví ñi javaha maa yo tsa cuñi yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahan tsanaha tyin ra tsa javahá tacan, cua cunaa ra naha.

<sup>5</sup> Vasu ndi maa tsa tsitó ndo tsa javahá Nyoo tahan tsanaha, maa tyin cuñi yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yahá can janaa ra tsi tandihí maa ñi tsa ña tsinú iñi tsi ra.

<sup>6</sup> Tan juvin ñi tacan javahá tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoó nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi.

<sup>7</sup> Tacan tucu nyivi ñuu Sodoma tan ñuu Gomorra, tan nyivi ñuu nyihí tsa tsicoó nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayi can naha ra tsicoó ra naha tsihin ñaha. Tan ñiñaha tsicoó ñi tsihin iin rayi tan inga ra. Tan cuaha ca tsa caquiñi javahá ñi tyin rayi

tsicoó ra naha tsihin ra ndusihi. Tan tsa cuenda yacan, nyehe ñi tundoho nu cayu ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayu ñi tsihin ñuhu tsa ña cua ndahva maa.

<sup>8</sup> Vasu ndi maa tacan cuví, vityin ndi iyó ra jandaví ñaha naha ra. Cuñi ra naha tyin vaha javahá ra naha. Maa tyin jatví ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha.

<sup>9</sup> Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi cañi tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahun ra ndavaha ñi siqui nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha.

<sup>10</sup> Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quiti, tyin quiti ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jatví ra naha juvin ñi tsi maa ra naha.

<sup>11</sup> Ndahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñi ra naha jaha canaa ra naha xuhun, nacoó ra naha ityí Nyoo tumaa javahá ra Balaam. Tan cua cunaa ra naha tumaa cunaa ra Coré, tyin tsihi ra can tsa cuenda tsa ña tyaá yahvi ra tsa cahun ra cuví ityí nuu tsihin ra.

<sup>12</sup> Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsí ra naha tan tsihi ra naha tsihin tsa si cuñi ra naha, tan ña caahán nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityí siqui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuví tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuii yoho tun.

<sup>13</sup> Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaa. Tsa nyaá maa tsa cua ndoo cuii ra naha nu naa. Tacan ñi maa tsa cua tahan ra naha.

<sup>14</sup> Tuhun ra can naha ra cahun ra Enoc tahan tsanaha. Ra Enoc tsa tsinu utsa tsa cuví tata ra Adán. Cahun ra tuhun tsa tsahá

maa Nyoo tsi ra, tan catyí ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra

<sup>15</sup> tyin vatsí ra vatsí tatsí tuñi ra tsi nyivi caquiñi tsa cuenda tandihi tsa ña vaha tsa javahá ñi, tan nyivi caahán ndavaha ñi siqui ra”, catyí ra Enoc tahañ tsanaha.

<sup>16</sup> Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyí ra naha: “Yií xaan, cahnu xaan tundoho nyehé yo.” Javahá ra naha tsa cuñí cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñí ra naha tsa cahan nyivi tyin vaha xaan iñi ra naha.

*Nu tsahá cuenda ra Judas tsi nyivi yihi cuenda Nyoo*

<sup>17</sup> Yañi, ña tyaá yahvi ndo tsi ra can naha ra. Maa tyin nducuhun iñi ndo tuhun tsa cahañ ra tsa tava tyiñu Jutu Mañi yo Jesucristo,

<sup>18</sup> tyin catyí ra naha tyehen: “Nu cua ndihi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.”

<sup>19</sup> Ra tsa cahañ ra naha tuhun cuví ra cuñí jasiñ tsi yo. Tyin tyaá yahvi ra naha cuhva cuñí cuñu ñuhu ra naha tan nduve Tatyí Ii Nyoo iyó tsihin ra naha.

<sup>20</sup> Maa tyin nyooho yañi, jandu iin ndo iñi ndo tsihin tsa tsinú iñi ndo tsi ra Cristo. Ndacan tahvi ndo tsi ra tsihin tunyee iñi Tatyí Ii maa ra.

<sup>21</sup> Nducu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñí xaan ra tsi yo. Tan cuatu ndo quivi cahun yo coo cuñi yo tsihin ra. Tyin yacan cuví tsa cua cuhva Jutu Mañi yo Jesucristo tsi yo tsa cuenda tsa cundaahví iñi ra tsi yo.

<sup>22</sup> Cahan yuhu ndo tsihin nyivi tsa ña tsinú iñi, na tsinu iñi ñi.

<sup>23</sup> Nducu ndo cuhva cacu ñi tsa cua cayu. Cundaahví tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

*Nu ndihi cahañ ra Judas tan jacahnu ra tsi Nyoo*

<sup>24-25</sup> Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuví ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cahun yo tsihin ra nu cahnu cuví nu nyaá ra. Tan sií xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsí tsi, tan vityin, juvin ra

ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

## Tsa Janaha Ra Jesucristo Tsi Ra Juan

### *Tsa nyehe ra Juan*

<sup>1</sup> Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuvi musu ra.

<sup>2</sup> Tan caahán yu tandihi tsa nyehe yu. Tan cuvi yu tsandaa tsa cuenda tuhun Nyoo tsa jacoto ra Jesucristo tsi yu.

<sup>3</sup> Sií xaan cuvi tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nu tutu ihya, tsa yatyin cuii cundaa tsi.

*Nu jacuhun ra Juan tutu tsi nyivi tsa utsa taahan vehe ñuhu*

<sup>4</sup> Yuhu ra Juan jaquitsi yu tutu ihya tsi nyooho, nyivi tsiá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ñi tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuvi Nyoo nda tsanaha, tan vityin, tan juvin ra cua quitsi.

<sup>5</sup> Tan naquihin tucu ndo tsa vaha jahá ra Jesucristo. Tyin ra ican cuvi ra tsandaa tan tsa nditsa. Juvin ra cuvi ra tsa nandoto tsa jihna ñi. Tan ndacá ñaha ra tsi ra cuvi rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatyá ra tsi yo tsihin niñi ra.

<sup>6</sup> Tan tsaha ra tsa cuvi yo rey tan cuvi yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

<sup>7</sup> ¡Nyehe jihna ndo! ¡Tsa vatsí ra Cristo nu vico andivi! Tandihí nyivi cua nyehe ñi tsi ra nda cuanda nyivi tsa jañicuehe tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuvi. Nditsa, tacan cua cuvi, tan na cuvi tsi tacan ñi.

<sup>8</sup> Catyí Jutu Mañi yo:

—Yuhu cuvi ra jihna ñi, tan yuhu cuvi ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvin ra cuvi Nyoo nda tsanaha, tan vityin, tan juvin ra cua quitsi.

*Nu nyehe ra Juan tsa iyo caá ra Cristo*

<sup>9</sup> Yuhu ra Juan cuvi yu yañi ndo. Tan iin caa ñi nyehe yu tundoho tsihin ndo, tan ndacá ñaha Nyoo tsi yo, tan iin caa ñi cunyee xaan iñi yo náa cuvi tsi yo tyin jatyinyee

ra Jesucristo tsi yo. Nyii yu vehe caa ñuhu Patmos tsa canyii mahñu ndutyá ñuhu. Nyii yu vehe caa tsa cuenda tsa caahán yu tuhun Nyoo tsa jacuaħa ra Jesucristo.

<sup>10</sup> Tan iin tumingu quivi jacahnú yo tsi Jutu Mañi yo, tuví iñi yu tsa nyaá Tatyí Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta.

<sup>11</sup> Tan catyí tsi tsihin yu tyehen:

—Yooho, Juan. Yuhu cuvi ra jihna ñi, tan yuhu cua coo nu cua ndihí quivi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

<sup>12</sup> Tacan tan nyico coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan.

<sup>13</sup> Tan mahñu tsa utsa taahan candileru can, nyehe yu nyaá iin ra tsa caá tumaa caá rayi ñuhu ñayivi ihya. Nditsí ra jahma cañi nda nu tsaha ra. Tan yihí iin cinturón xuhun cuaan yiqui nyica ra.

<sup>14</sup> Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyí. Tan tinuu ra caá tsi tumaa caá nu cayú ñuhu.

<sup>15</sup> Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutyá cuaha.

<sup>16</sup> Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehe ñicanyii.

<sup>17</sup> Cuhva tsa nyehe yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyí ra tsihin yu:

—Ña ngayuhvi un. Yuhu cuvi ra jihna ñi, tan yuhu cua coo nu cua ndihí quivi.

<sup>18</sup> Yuhu nyito yu vasu tsihi yu, maa tyin vityin ña cua cundihí maa tsa iyó yu. Tan iyó ndatu tsi yu tsa catyí yu ama taahán tsi cúu nyivi, tan tatun cuhun ñi anyaya o ña cuhun ñi.

<sup>19</sup> Tyaa nu libru tandihí tsa nyehe un, tan tsa iyó vityin, tan tsa cua coo nu cuahán ca tsi.

<sup>20</sup> Tuhun ihya cuvi tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyí tsa utsa vehe ñuhu.

## 2

*Nu quitsahq tsahá cuenda ra Cristo tsi nyivi tsicá tsa utsa vehe ñuhu: Tsa tsahq cuenda ra tsi nyivi tsicá vehe ñuhu ñuu Éfeso*

<sup>1</sup> J'acuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyehen: "Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan:

<sup>2</sup> Yuhu tsitó yu tandihí tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñí ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha.

<sup>3</sup> Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo.

<sup>4</sup> Maa tyin iyó iin tsa ña vaha javahá ndo, tyin ña cuñí ca ndo tsi yu vityin tumaa tsa cuñí ndo tsi yu quivi jihna ñi.

<sup>5</sup> Yacan cuenda nducuhun iñi ndo numaa nda nduvá ndo. Tan ñasama ndo cuhva iyó ndo, tan javaha nyico ndo tumaa javahá ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi.

<sup>6</sup> Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñí ndo nyehé ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan.

<sup>7</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyi ra tyehen: Tatun cuví jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó."

*Tsa tsahq cuenda ra Jesucristo tsi nyivi tsicá vehe ñuhu ñuu Esmirna*

<sup>8</sup> J'acuhun ndihí tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyehen: "Tyehen catyi ra cuví tsa jihna ñi, ra cua coo nu cua ndihí quivi, ra tsa tsihí tan nandotq:

<sup>9</sup> Yuhu nyehé yu tandihí tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi.

<sup>10</sup> Maa tyin ña ñayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehé ndo tundoho. Maa tyin cunyanicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo.

<sup>11</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyi ra tyehen: Tatun cuví jaha canaa ndo tsi nu ña vaha, ña cua cuhun ndo anyaya, quivi cúu nyivi tsa tsinu uvi tsaha."

*Tsa tsahq cuenda ra Jesucristo tsi nyivi tsicá vehe ñuhu ñuu Pérgamo*

<sup>12</sup> J'acuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyi tsihin ra tyehen: "Tyehen catyi ra tsa ndahá mityi tsa xaan nduvi tsiyo yuhu:

<sup>13</sup> Yuhu nyehé yu tandihí tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsa ra Antipas, ra tsa cuví tsandaa cuenda yu.

<sup>14</sup> Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñí jandihí cuhva tsa javahá ra Balaam, ra tsicoq tsanaha. Tyin ra Balaam natyuhq ra tsi ra Balac, na jacatsi ra cuñu quiti tsa jamañi nyivi nu tsitoho tsi nyivi Israel. Tan natyuhq ra tsi ra tsa catyi ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindahq ñi, tan tacan tucu ñi rayi.

<sup>15</sup> Tan juven ñi iyó tucu juhva nyivi tsa ña cuñí nacoo tsa jacuahá ra yihí cuenda ra Nicolás. Tan yuhu ndasi cuñí yu nyehé yu tsa jacuahá ra can naha ra.

<sup>16</sup> Yacan cuenda janumi ndo ñasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu.

<sup>17</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu: Tatun cuví jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyii xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa a yoñi tsitó; intuhun ñi nyivi tsa cua naquihin yuu can cua coto sivi can."

*Tsa tsahq cuenda ra Jesucristo tsi nyivi tsicá vehe ñuhu ñuu Tiatira*

<sup>18</sup> J'acuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyi tsihin ra tyehen: "Tyehen catyi Sehe Nyoo, ra tsa caá tinuu tumaa caá nu

cayú ñuhu. Tan tsaha ra caá tumaa caá caa bronce tsa xiñu xaan.

<sup>19</sup> Yuhu nyehé yu tandihí tsa javahá ndo. Tan tsitó yu tsa cuñí xaan ndo tsi nyívi. Tan tsitó yu tyin tsinú xaan íñi ndo tsi yu, tan jatyinyeé ndo tsi nyívi, tan cunyeé xaan íñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quítsi tsi.

<sup>20</sup> Maa tyin iyó juhva tsa cuñí yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahá] ña Jezabel [tsa tsicoq tahan tsanaha]. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyívi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayíi tsihin ñaha o iin ñaha tsihin rayíi tun ña tindahá ñi. Tan jacuahá ña tyin cuví catsi ñi nyayu tsa jamañi nyívi tsi tsitoho.

<sup>21</sup> Yuhu tsa ndatu xaan yu tsa nasama ña cuhva iyó ña, maa tyin ña cuñí ña javaha ña can. Ña cuñí ña jandihí ña tsa tsicá nuu ña tsihin rayíi.

<sup>22</sup> Tan vityin cua quihin cuehe tsi ña tan ña cua cuví nduvita ña. Tan nyívi javahá tsa caquiñi tsihin ña, cua cuhva yu tundoho nyehe ñi tatun ña ndu uvi íñi ñi tsa javahá ñi.

<sup>23</sup> Tan cua cahñi yu sehe ña. Tacan tan cua coto tandihí nyívi tsicá vehe ñuhu, tyin yuhu tsitó yu tandihí tsa tsicá íñi ñi, tan tandihí tsa iyó añima ñi. Tan tsa intuhun intuhun nyoocho cua cuhva yu tsa taahán tsi tsi ndo tsa cuenda tsa javahá ña.

<sup>24</sup> Maa tyin tandihí ca nyoocho tsa iyó ñuu Tiatira, nyoocho tsa ña naquihin cuenda cuhva jacuahá ña, ndi ña javahá ndo tsa catyí nyívi tyin cuví tuhun xeehe cuenda nu ña vaha, ña tyaá yu inga tsa yíi síqui ndo.

<sup>25</sup> Maa tyin jañihí ndo javaha ndo tsa vaha nda cuanda quítsi nyico yu.

<sup>26</sup> Tan nyoocho tsa jaha canaa tsi nu ña vaha, tan javahá ndo cuhva cuñí yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyívi iyó nu ñuhu ñayívi ihya.

<sup>27</sup> Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyívi. Tan cua tahví cuatyí ndo tsi ñi tumaa tsa tahví cuatyí yo quisi.

<sup>28</sup> Tan cua cuhva yu tiñuu cahnu tsa caná tsa naa ca coo tsihin ndo.

<sup>29</sup> Nyoocho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

### 3

*Tsa tsahá cuenda ra Jesucristo tsi nyívi tsicá vehe ñuhu ñuu Sardis*

<sup>1</sup> Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyívi tyin nyito ndo, maa tyin tsa cuenda yuhu, tsa tsihi ndo.

<sup>2</sup> Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo.

<sup>3</sup> Ndúchun íñi ndo tsa vaha tsa cutuhva ndo. Cúanyicun ndo can, tan nasama ndo cuhva iyó ndo. Tyin tun ña naquihin vaha ndo tsa vaha, sana íñi ndo tan cua quítsi yu nu yucú ndo, tumaa iin ñasuhu.

<sup>4</sup> Maa tyin iyó juhva nyoocho, nyívi Sardis, tsa ña janyahyu jahma; ña javahá ndo tsa caquiñi cuví can. Tan juvin nyoocho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo.

<sup>5</sup> Tan nyoocho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sívi ndo nu libru nu nyecú sívi tandihí nyívi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo.

<sup>6</sup> Nyoocho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

*Tsa tsahá cuenda ra Jesucristo tsi nyívi tsicá vehe ñuhu ñuu Filadelfia*

<sup>7</sup> Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra ña nuñá yuvehe tan ndi intuhun nyívi tan ña cuví nacasi. Tan tatun nacasi ra, ndi intuhun ñi tan ña cuví nuñá ñi. Tyehen catyí ra:

<sup>8</sup> Yuhu nyehé yu tandihí tsa javahá ndo. Tan nuñá yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyívi, tan yoñi cuví casi tsi ndo]. Tan iyó luxu tunyee íñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu.

<sup>9</sup> Tan nyívi yihí cuenda nu ña vaha, ñi vatya, ñi catyí tyin nyívi Israel cuví ñi, maa tyin ñavin nyívi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñí yu tsi ndo.

<sup>10</sup> Tyin cunyeé xaan íñi ndo tumaa catyí yu tsihin ndo tyin cunyeé íñi ndo. Tan yacac cuenda cua jaha cuenda yu tsi ndo tan nduve náa cua tahan ndo quívi cua jaquitsi yu tundoho cahnu síqui tandihí nyívi, tyin cua nducu cuhva yu tsi tandihí ñi iyó nu ñuhu ñayívi.

<sup>11</sup> Yatyí cua quítsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyívi tsa vaha tsa cua ñihi ndo.

<sup>12</sup> Nyooho tsa cua cuví jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsa tsa cua quee nda andívi, tan juvin ñi cua tyaa tucu yu sivi tsa yu tsi ndo.

<sup>13</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

*Tsa tsahá cuenda ra Jesucristo tsi nyívi tsicá vehe ñuhu ñuu Laodicea*

<sup>14</sup> Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javahá Nyoo tandíhi maa tsa iyó:

<sup>15</sup> Yuhu nyehé yu tandíhi tsa javahá ndo. Tan cuví ndo tumaa ndutya tsa ña vitsin tan ndí ña ihñi, tyin ndí ña tsinú vaha iñi ndo tsi yu, tan ndí ña jandíhi tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandíhi cuii ndo tsa tsinú iñi ndo tsi yu.

<sup>16</sup> Maa tyin tsa cuenda tsa cuví ndo tumaa ndutya vixin ñi ndí ña vitsin tan ndí ña ihñi ndo, cua ndutsan yu tsi ndo.

<sup>17</sup> Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuihya cuñi ndo nyehé ndo tundoho tsitsi añima ndo, ndaahví ndo, cuaa ndo, tan tandíhi ndo tsitsi añima ndo?

<sup>18</sup> Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayú tan naá tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandíhi ndo. Tan jata ndo numeri qihví tinuu ndo tyin tacan tan cuví nyehé ndo.

<sup>19</sup> Yuhu tsahá cuenda yu tan tatsí tuñi yu tsi tandíhi nyívi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha.

<sup>20</sup> ¡Nyehé jihna! Yuhu nyaá yu yuvehe tan cañi ndaha yu. Nyívi tsa cua cuñi ndusu yu, tan nuña ñi yuvehe, cua qihví yu tan cuxiñi yu tsihin ñi. Tan maa ñi cuxiñi ñi tsihin yu.

<sup>21</sup> Cua cuhva yu tsa cunyecu ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra.

<sup>22</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu” —catyí ra Jesucristo.

## 4

*Tsa cuví nda gloria*

<sup>1</sup> Tsa yaha can, tan nyehé yu ticoho iin yuvehe nda andívi. Tan tsíñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndaa nyehé tan janaha yu tsi un tsa cua cuví nu cuahán ca tsi —catyí ndusu can tsihin yu.

<sup>2</sup> Tan juvin ñi cuhva can tan tuví iñi yu tsa nyaá Tatyí Ii Nyoo tsihin yu. Tan nyehé yu nyaá iin tyayu nda gloria. Tan nu tyayu can nyaá iin ra nyaá.

<sup>3</sup> Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan taníi cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda.

<sup>4</sup> Tan nyehé yu nyecú oco cumi ca tyayu nu nyecú oco cumi ra tsahnu naha ra, tsinú nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jíñi intuhun intuhun ra naha.

<sup>5</sup> Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhú ityi nuu tyayu can, tan tsa utsa ñuhú can cuví tsa utsa tatyí ii Nyoo.

<sup>6</sup> Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyí.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can.

<sup>7</sup> Iin tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayíi caá nuu can. Tan tsa tsinu cumi tumaa caá tsa tsa cuahán ndavá.

<sup>8</sup> Tan iyó iñu nditsin tsa intuhun intuhun tsa nyito can. Tan taníi cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandíhi tsi tsa caahán tsi tyehen nduvi tan ñihu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandíhi tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quítsi.

<sup>9</sup> Tan jacahnú tsa cumi tsa nyito can tsi Nyoo, tan nacuhvá tsi naha tsi tyahví nyoo tsi ra nyaá nu tyayu can, ra tsa iyó tandíhi

tyembu. Tan tahan ñi tsaha tsa javahá tsi naha tsi tacan,

<sup>10</sup> tsa oco cumi ra tsahnu can naha ra tsicuiñi tsiti ra naha tan jacahnú ra naha tsi ra iyó tandihi tyembu. Tan tsaquín ra naha corona ra naha nu nyaá tyayu can. Tan catyí ra naha:

<sup>11</sup> Jutu Mañi ndi, Nyoo ndi cuví un. Yooho taahán tsi jacahnú ndi. Tan taahán tsi tsi un tsa cundaca ñaha un. Tyin maa un javahá tandihi tsa iyó. Tan tsa cuenda tsa iyó ñi maa un, tan tsicoo tandihi tsa iyó, catyí ra naha.

## 5

*Nu nyehe ra Juan iin tutu tan Mbee Ticatyí Luhlu tsa cuví ra Jesucristo*

<sup>1</sup> Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu.

<sup>2</sup> Tan nyehe yu iin ángel tsa nyee xaan. Tan caná tsaa ra tan catyí ra:  
—¿Yóo taahán tsi nacani tutu ihya tan jocon sellu ihya? —catyí ra.

<sup>3</sup> Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi.

<sup>4</sup> Tan tsacú xaan yu, tsa tsitq yu tyin yoñi maa cuví nacani tutu can tan cuví cahvi, tan cuví nyehe nuu tsi.

<sup>5</sup> Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñi tsi catyí, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

<sup>6</sup> Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyí Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tani cahnú nu ñuhu ñayivi.

<sup>7</sup> Tan ra Mbee Ticatyí Luhlu can tsahan ra nu nyaá ra nyaá nu tyayu can tan quihñ ra tutu tsa ndahá ra can nu ndaha cuaha ra.

<sup>8</sup> Cuhva tsa quihñ ra tutu can, tandihi tsa cumi tsa nyito can tan tandihi tsa oco cumi ra tsahnu can tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitq cutu tsitsi copa xuhun cuaan ndahá ra naha. Tan cutu can cuví tandihi tsa tsicán tahvi nyivi yihí cuenda Nyoo.

<sup>9</sup> Tan tsitá ra naha iin yaa tsaa, tan catyí ra naha:

Yooho cuví ra taahán tsi quihñ tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin ñiñi un jatá un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó tani cahnú nu ñuhu ñayivi, nyivi caahán siñ siñ yuhu, tan nyivi siñ siñ tata.

<sup>10</sup> Tsahá un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

<sup>11</sup> Yahá can tan tsiñ yu ndusu tan nyehe yu nyecú cuenda millón ángel tani canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can.

<sup>12</sup> Tan ñiñi caahán ángel can naha ra, tan catyí ra naha:

Ra Mbee Ticatyí Luhlu tsa tsahñi nyivi, juvin ra taahán tsi cundaca ñaha, tan naquihñ cuenda tsa cuca.

Tan juvin ñi ra taahán tsi naquihñ cuenda tsa tsiñi tuñi tan tandihi tunyee ñi.

Na jacahnú yo tsi ra tan na jacahnú tandihi nyivi tan tandihi tsa iyó tsi ra, tyin cahnú xaan cuví ra, catyí ángel can naha ra.

<sup>13</sup> Tan tsiñi tucu yu tsa caahán tandihi tsa javahá Nyoo; tandihi tsa iyó andivi, tan nu ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnú xaan cuví ra tsa nyaá nu tyayu. Cahnú xaan cuví ra Mbee Ticatyí Luhlu. Tan tunyee ñi tsa iyó tsi ra naha ña cua cundihi maa tsa iyó tsi.

Tan taahán tsi tsa jacahnú yo tan tyaa yahvi yo tsi ra naha tacan ñi maa —catyí tandihi tsa javahá Nyoo.

<sup>14</sup> Tan catyí tsa cumi tsa nyito can:

—¡Na cuví tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacahnú ra naha tsi ra tsa ña cua cundihi maa.

## 6

*Nu jocon ra Jesucristo tsa utsa sellu tsa ndasí tutu can*

<sup>1</sup> Tacan tan nyehe yu nu jocon ra Mbee Ticatyí Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Naha, tan nyehe un! —catyí tsi tsihin yu.

<sup>2</sup> Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihí ra iin corona yihí jiñi ra,



yacan jahā canaa ra, tan ndi nyaá ca cua jaha canaa ca ra.

<sup>3</sup> Tan tsa joçon ra Mbee Ticatyí Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

<sup>4</sup> Tan quitá iin cuayu cuaaha. Tan ra tsa yosó tsi ti ñihí ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihí ndihi ra iin mityi cahnu cundahá ra.

<sup>5</sup> Tan tsa joçon ra Mbee Ticatyí Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatya.

<sup>6</sup> Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyivi tsi iin musu tsa iin quivi, tacan yahví tsa intuhun ñi kilu nuñi. Tacan tucu ñi tsa uñi kilu cebada. Tan ña jatívi ndo acetye tan vinu —catyí ndusu can.

<sup>7</sup> Tan tsa joçon ra Mbee Ticatyí Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—¡Naha, tan nyehe un! —catyí tsi tsihin yu.

<sup>8</sup> Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsihí. Tan tsata ra can vatsí inga ra tsa nañi Nu Yucú Añima Ndiyí. Tan ñihí ra naha tunyee iñi tsa cahñi ra naha tsa cuaha nyivi iyó nu ñuhu ñayivi. Tyin tsitsi tsa sava nyivi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan tsihin quitá xaan iyó nu ñuhu ñayivi.

<sup>9</sup> Tan tsa joçon ra Mbee Ticatyí Luhlu can tsa tsinu uhun sellu can, nyehe yu xuu altar. Tan ícan yucú añima nyivi tsa tsihí tsa cuenda tsa jacotó ñi tuhun Nyoo.

<sup>10</sup> Tan caná tsaa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyivi tsa tshañi tsi ndi tsa cuenda un? —catyí ñi.

<sup>11</sup> Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quivi, nda cuanda cahñi nyivi tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihí tucu maa ñi.

<sup>12</sup> Tan tsa joçon ra Mbee Ticatyí Luhlu can tsa tsinu iñu sellu can, nyehe yu tyin ñihí xaan taán. Tan ndutuun ñicanyii tumaa tuun jahma nyivi iyó tucuiihya iñi. Tan yoo nducuaaha tsi tumaa cuaaha niñi.

<sup>13</sup> Tan tiñuu cucoyo tsi nu ñuhu ñayivi tumaa cucoyó tsiti yutya yutun tatun ñihí yahá tatyí.

<sup>14</sup> Tan andivi tsiquihí tuvi tsi tumaa tyihí tuví yo iin ndaha tutu. Tan tandihí yucu tan ñuhu nyihí tsa cayucú mahñu ndutya ñuhu nasamā nu cayucú tsi.

<sup>15</sup> Tan tandihí rey tsa iyó nu ñuhu ñayivi tsihin ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyivi tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnu.

<sup>16</sup> Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyí Luhlu can tsi ndi.

<sup>17</sup> Tyin tsa tsaa quivi cahnu tsa cua tatsi tuñi ra tsi ndi, tan yofñi cunyee iñi can —catyí ñi.

## 7

*Nu ñihí nyivi Israel tuñi cunyaq nutyaan ñi*

<sup>1</sup> Tsa yaha can tan nyehe yu nyecú cumi ángel tsa ndihi tsa cumi tutun ñuhu ñayivi ityi nu tuhvá tatyí queé tyin tacan tan ña yaha tatyí nu ñuhu ñayivi tan nu ndutya ñuhu tan nu yutun.

<sup>2</sup> Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan caná tsaa ra tsi tsa cumi ángel tsa ñihí ndatu tsa jatívi nu ñuhu ñayivi tan nu ndutya ñuhu. Tan catyí ra tsihin ra naha:

<sup>3</sup> —Ña jatívi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

<sup>4</sup> Tan catyí ra tsiñi yu tyin cientu uvi xico cumi mil cuví nyivi Israel tsa tsinyaq tuñi can.

<sup>5</sup> Utsi uvi mil nyivi tata ra Judá tsinyaq tuñi, tan utsi uvi mil nyivi tata ra Rubén, tan utsi uvi mil nyivi tata ra Gad,

<sup>6</sup> tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés,

<sup>7</sup> tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Ísacar,

<sup>8</sup> tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaq tuñi Nyoo tsi ñi.

*Nu nyehe ra Juan tsi nyivi nditsí jahma cuitsin*

<sup>9</sup> Tsa yaha can tan nyehe yu yucú cuaha nyivi. Tan yofñi maa cuví nacahvi tsi ñi, tyin

cuaaha xaan ñi. Yucú nyivi quee tandihi ñuu nyihi tan ñuu nahnu tsa iyó tanií cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Ndisí ñi jahma cuitsin. Tan ndahá ñi ndaha ndicaha.

<sup>10</sup>Tan tandihi ñi caná tsa ñi tan catyí ñi: Nyoo Jutu yo, ra nyaá nu tyayu, tan ra Mbee Ticatyí Luhlu, juvin ra naha jacacú tsi yo —catyí ñi caná tsa ñi.

<sup>11</sup>Tan tandihi ángel naha ra nyecú ra naha tanií canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsiti ra naha tan tsaqujn ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo.

<sup>12</sup>Tan catyí ra naha: Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahví nyoo tsi un. Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihi tyembu, catyí ra naha.

<sup>13</sup>Tacan tan tsicá tuhun iin ra tsahnu can tsi yu tan catyí ra:

—¿Yóo nyivi cuví ñi nditsi jahma cuitsin ihya? ¿Tan ndáa ityi quee ñi? —catyí ra.

<sup>14</sup>Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyivi ihya cuví ñi nyehe tundoho cahnu. Maa tyin nacatya ñi jahma ñi tsihin niñi ra Mbee Ticatyí Luhlu tan nducuitsin tsi.

<sup>15</sup>Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi.

<sup>16</sup>Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi.

<sup>17</sup>Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihi ndutya nuu ñi —catyí ra tsihin yu.

## 8

*Nujocon ra Jesucristo tsa tsinu utsa sellu tan nu quiñá iin ángel tsihin iin cuu xuhun cuaan*

<sup>1</sup>Tan tsa jocon ra Mbee Ticatyí Luhlu tsa tsinu utsa sellu tsa ndasí tutu can, ndutaxjn nda andivi tumaa sava hora.

<sup>2</sup>Yahá can tan nyehe yu nyecú utsa ángel ityi nuu Nyoo. Tan intuhun intuhun ra naha quiñin cuenda ra naha iin trompeta.

<sup>3</sup>Yahá can tan tsaá inga ángel tsa ndahá iin cuu xuhun cuaan. Tan tsinyaá nyityi ra ityi nuu altar can. Tan quiñin cuenda ra cuaaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo.

<sup>4</sup>Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuaahán yuhma can nu nyaá Nyoo.

<sup>5</sup>Tacan tan ángel can quiñin ra cuu can tan jacutu ra can tsihin tuun ñuhu tsa quiñá nu altar can. Tan tyoso ra can nu ñuhu ñayivi. Tan quitsahá caahán savi, tan iyo cuví. Tan ñihi tatsa, tan quitsahá taán.

### *Nu tiví ángel naha ra trompeta*

<sup>6</sup>Tacan tan tsa utsa ángel tsa ndahá trompeta can, ndatú ra naha tsa tiví ra naha can.

<sup>7</sup>Ta tiví iin ángel can trompeta tsa ndahá ra, quitsahá cuñ savi tan cucuoyó yuu savi, ñihi cayú ñuhu tan sacá nuu niñi tsihin can. Tan tsa yatyin cayú sava ñuhu ñayivi, tan tsa yatyin tucu sava cuhva nyaá cuhu tsitsa tan tandihi cuhva nyaá cuhu cuii.

<sup>8</sup>Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacava can mahñu ndutya ñuhu. Tan tsa yatyin sava ndutya ñuhu can nanduvj tsi niñi.

<sup>9</sup>Tan tsa tandihi quití iyó tsitsi ndutya ñuhu can tsiñi tsa yatyin sava ti naha ti. Tan tahvi cuatyí tucu tsa yatyin sava yutun ndoo cuaaha tsa iyó tsitsi ndutya ñuhu can.

<sup>10</sup>Tan tsa tiví tsa tsinu uñi ángel can trompeta tsa ndahá ra, nacava iin tiñuu cahnu. Cayú tsi tumaa cayú yiti. Tan nacava tsi siqui tsa yatyin ña sava yutya nahnu tan tsa yatyin ña sava nu ndohyo.

<sup>11</sup>Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvá tsi tumaa tsa uva xaan ajenjo can. Tan cuaaha xaan nyivi tsiñi tyin tsiñi ñi ndutya tsa ndu uvá can.

<sup>12</sup>Tan tsa tiví tsa tsinu cumi ángel can trompeta tsa ndahá ra, ndu naq tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaa tsi naha tsi. Tan tsa cuenda tsa ndunaa juhva ñicanyii, ndunaa nu ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

<sup>13</sup>Yahá can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyí ra:

—jNdahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

## 9

<sup>1</sup>Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacavá can nu ñuhu ñayivi. Tan quihin cuenda can ndaha tucu tsa cuenda yavi cunu tsa nduve maa nuu tsindihi.

<sup>2</sup>Tacan tan nuñá can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasí yuhma can nuu ñicanyii tan nasacá nuu can tsihin tatyí. Tan ndunaá nu ñuhu ñayivi.

<sup>3</sup>Tan tsitsi yuhma can quitá tica xama. Tan ndavá ti naha ti nu ñuhu ñayivi. Tan ñihí ti naha ti ndatu tsa tyaa ti naha ti tsi nyivi tumaa tyaa tujuhma tsa iyó nu ñuhu ñayivi.

<sup>4</sup>Quihín ti naha ti tuhun tyin na ña jativi ti naha ti cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa ti naha ti tsi nyivi tsa nduve tuñi Nyoo nyaá nutyaan.

<sup>5</sup>Ña ñihí ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihí xico ti tsi ñi uhun yoo. Tan xico uhvi can uhvi tsi tumaa uhvi nyivi tsa tyaa tujuhma.

<sup>6</sup>Quiví can nyivi cua nanducu ñi tuhun tsiihi. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsiihi cua cunu tsi nuu ñi tyin ñi cua cúu ñi.

<sup>7</sup>Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyivi.

<sup>8</sup>Tan ixi jiñi ti naha ti caá tumaa caá ixi jiñi ñaha. Tan nuhu ti naha ti caá can tumaa caá nuhu ndicaha.

<sup>9</sup>Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí.

<sup>10</sup>Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyivi tsitsi tsa uhun yoo.

<sup>11</sup>Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyí: Nu Janaá.

<sup>12</sup>Tsa yaha iin tundoho, tan cumañi uvi taahan ca.

<sup>13</sup>Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiquí tsa nyecú tutun altar xuhun cuaan tsa nyaá ityi nuu Nyoo.

<sup>14</sup>Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndatsi tsi tsa cumi ángel tsa nuuhñí yatyin yuhu yutya cahnu Eufrates —catyí ndusu can.

<sup>15</sup>Tacan tan ndatsí ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi.

<sup>16</sup>Tan tsiñi yu tyin uvi cientu millón andaru tsa yosó cuayu.

<sup>17</sup>Tacan nyehe yu cuayu jahá Nyoo. Tan ra yosó cuayu can naha ra nyaá caa cuaha, azu tan cuaan yiquí nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre.

<sup>18</sup>Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre.

<sup>19</sup>Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nuu juhma ti naha ti caá tumaa caá jiñi coo. Tan tsihin yacan jañicueehé ti naha ti tsi nyivi.

<sup>20</sup>Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñi, ndi ña cuví caca.

<sup>21</sup>Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayii, tan rayii ña jandihí ra naha tsa tsicá nuu ra naha tsihin ñaha vasu ndi maa ña tindahá ñi. Tan ña jandihí ñi tsa suhú ñi.

## 10

### Ángel tsa ndahá libru luhlu

<sup>1</sup>Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsí nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú.

<sup>2</sup>Tan ndahá ra iin libru luhlu nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi.

<sup>3</sup>Tacan tan caná tsa ra, tumaa taná ndicaha tsa cuxaán ti. Tan cuhva tsa caná tsa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi.

<sup>4</sup>Tsa yaha tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi

yu caahán iin ndusu nda andiví, tan catyí tsi tsihin yu:

—Naquihin xeehe tuhun tsa cahán tsa utsa ndusu can. Tan ña tyaa un can nu tutu —catyí ndusu can.

<sup>5</sup> Tacan tan ángel tsa nyehe yu tsa tsañí nu ndutya ñuhu tan nu ñuhu ñayivi, jandaq ra ndaha cuaha ra ityi andiví.

<sup>6</sup> Tan ángel can catyí ra:

—Na nyehe maa Nyoo ra ña cua cundihi maa, ra tsa javaha andiví tan ñuhu ñayivi tan ndutya ñuhu tan tandihi tsa iyó nuu tsi tyin nduve ca tsa cucuee.

<sup>7</sup> Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyí Nyoo tyin javaha ra, tumaa cahán ra tsihin ra jaha tyiñu tyiñu ra, ra cuví ndusu yuhu ra —catyí ángel can.

<sup>8</sup> Tan ndusu tsa quita andiví, tsa cahán jihna tsihin yu, juvin tsi caahán tsihin yu tyehen:

—Cuaahan cuaquihin libro luhlu tsa nandica tsa ndahá ra ángel tsa tsañí nu ndutya ñuhu tan nu ñuhu ñayivi —catyí tsi.

<sup>9</sup> Tacan tan sahan yu nu nyaá ángel can tan tsican yu libro luhlu can tsi ra, tan catyí ra tsihin yu:

—Juhun, çatsi itsi. Vixi xaan tsi cua cuví tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

<sup>10</sup> Tacan tan quihin yu libro luhlu tsa ndahá ra, tsatsi yu. Tsa ndí nyíí tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uvá tsi tsitsi yu.

<sup>11</sup> Tacan tan catyí ra naha tsihin yu:

—Cuñí tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihí tan ñuu nahnu, tan nyivi caahán siin siin yuhu, tan siqui ra cuví rey naha ra —catyí ra tsihin yu.

## 11

### *Nduvi ra tsa cuví tsandaa naha ra*

<sup>1</sup> Tacan tan saha ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tsihin. Tan catyí ra naha tsihin yu:

—Ndyvita tan tyihí cuhva un vehe ñuhu Nyoo tan altar ra, tan çahvi najava taahan nyivi jacahnú tsi ra tsitsi vehe can.

<sup>2</sup> Maa tyin ña tyihí cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava.

<sup>3</sup> Tan yuhu cua jacahun yu uvi ra tsa cua cuví tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuiihya ifi.

<sup>4</sup> Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi.

<sup>5</sup> Tan nyivi tsa cua cuñi jañicueehe tsi ra cuví tsandaa can naha ra, cua naa cuii nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihi nyivi xaan ifi tsi ra naha.

<sup>6</sup> Tan iyó ndatu tsi ra naha tsa casi ra naha nu cuun saví tandihi quivi tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra naha niñi ndutya. Tan iyó tucu ndatu tsi ra naha tsa janyehe ra naha tundoho tsi nyivi iyó nu ñuhu ñayivi tsihin tandihi nuu cuehe. Tan cuví javaha ra naha yacan najava tsaha cuñi maa ra naha.

<sup>7</sup> Maa tyin tsa cua ndihi cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tsihin tsa nduvi taahan ra cuví tsandaa can. Tan cua jaha canaa ti tsi ra naha. Tan cua cahñi ti tsi ra naha.

<sup>8</sup> Tan cua cava cuñu ñuhu ra naha tsitsi calle ñuu nu tsahñi nyivi tsi Jutu Mañi yo tan tyaq ñi tsi ra nuu cruu. Tan cua cuví ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can].

<sup>9</sup> Tan tsitsi tsa uñi quivi sasava, cua nyehe tandihi nyivi cuñu ñuhu ra naha; nyivi iyó tandihi ñuu nyihí, nyivi tandihi ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihí xeehe cuñu ñuhu ra naha tsitsi ñuhu.

<sup>10</sup> Tan sii xaan cua cuñí ñi tsa cuenda tsa cua cúu ra can naha ra. Tan nda cuanda cua jacahun ñi regalo tsi tahan ñi tsa cuenda tsa sii cuñí ñi tsa cua cúu nduvi taahan rayi tsa cahan tuhun Nyoo tsihin ñi. Tyin cuñi maa ñi tyin saha xaan ra naha tundoho tsi ñi.

<sup>11</sup> Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi.

<sup>12</sup> Tan tsa yaha tsa tsihí ra naha tan nyehe yu nandoto ra naha, tan catyí iin ndusu ityi andiví tsihin ra naha:

—Naha ndo nyehe

Tacan tan nandaq ra naha ityi andiví tsitsi vico. Tan nyehe nyivi xaan ifi tsi ra naha nu nandaq ra naha.

<sup>13</sup> Tan ñihí xaan taqn cuhva can. Tan tsitsi ñuu can taní cuaha xaan vehe. Tsitsi tsa utsi utsi vehe, taní intuhun intuhun tsi. Tan tsihí utsa mil nyivi jaha tsa taqn can. Tan nyivi tsa ña tsihí, jacahnú ñi tsi Nyoo, ra nyaá andiví, tsa cuenda tsa yuhví ñi.

<sup>14</sup> Yacan cuví tundoho tsa tsinu uvi tsa nyehe nyivi, maa tyin tsa vatsí tsa tsinu uñi.

*Nu tiví tsa tsinu utsa ángel trompeta tsa ndahá ra*

<sup>15</sup> Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandihí nu ndacá ñaha rey nu ñuhu ñayivi, tsa yahá nanduví tsi tsa tsii Nyoo Jutu yo tan ra Cristo.

Tan ña cua ndihí maa tsa ndacá ñaha ra naha, catyí ndusu can.

<sup>16</sup> Tacan tan tsa oco cumi ra tsahnu tsa nyecú nu nyaá Nyoo, tsicuiñi tsiti ra naha tan tsaquín ra naha nuu ra naha nda nu ñuhu. Tan jacahnú ra naha tsi Nyoo.

<sup>17</sup> Tan catyí ra naha: Jutu Mañi ndi Nyoo ndi. Ra iyó tandihí tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvín un cua quitsi.

Tsahá xaan ndi tyahví nyoo tsi un, Tyín tsa naquihín cuenda un tunyee iñi un. Tan tsa quitsahá ndacá ñaha un.

<sup>18</sup> Tan vasu ndi maa cuxaán nyivi iyó tandihí ñuu nahnu.

Maa tyín tsa tsaá quivi tatsi tuñi un tsi ñi.

Tan tsa tsaá quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jahá tyiñu tyiñu un, ñi tsahá cuenda tuhun caahán un,

ñi tsa nacuhvá cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsaá cuhva tsa janaa un tsi nyivi jatíví tsi nyivi iyó nu ñuhu ñayivi, catyí ra naha.

<sup>19</sup> Tacan tan nuñá yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoo ra tyiñu tsihin yo. Tan quihví tatsa. Tan ñihí cuvaá tan caahán savi. Tan tañ. Tan ñihí xaan cucoyo yuu savi.

## 12

*Nu nducú coo xaan tsa iyó ndaha tsi ñaha*

<sup>1</sup> Tacan tan quituví tsa iyo cahnu ityi andivi. Quitá iin ñaha tan nditsi ña ñicanyii tumaa nditsi yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña.

<sup>2</sup> Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyín nyehé xaan ña tundoho.

<sup>3</sup> Tacan tan quitá inga tsa iyo ityi andivi. Tan nyehé yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndiqui ti. Tan yihí corona intuhun intuhun jiñi ti.

<sup>4</sup> Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu

sehe, tyín cuñi ti catsi ti sehe ña náa cuhva cacu ñi maa tsi.

<sup>5</sup> Tan ñaha can jacacú ña iin rayii. Tan juvín ra cua cundaca ñaha tandihí nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yahá cacú ra, naquihín Nyoo tsi ra cuahán ra nu nyaá ra nu tyayu ra.

<sup>6</sup> Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyín ican cua cuhva ra tsa catsi ña tsitsi tsa mil uvi cientu uñi xico quivi.

<sup>7</sup> Yahá can tan tsicoq cuatyí nda andivi, cañi tahan ángel Miguel tan tandihí ángel tsa cutahán tsihin ra tsihin coo xaan can. Tan coo can tsihin tandihí tatyí ña vaha tsa cutahán tsihin ti, cañi tahan ti tsihin ángel Miguel.

<sup>8</sup> Maa tyín ña cuví jahá canaa ti tsa cañi tahan ti. Tan ña ñihí ca ti nu ndoo ti nda andivi tsihin tatyí ña vaha tsa cutahán tsihin ti.

<sup>9</sup> Tacan tan tavá Nyoo tsi nu coo xaan can, nu Coo Tsaahnu, tan juvín ñi nu cuví nu ña vaha tan Sathanás, juvín nu jandaví ñaha tsi tandihí nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

<sup>10</sup> Tacan tan tsiñi yu iin ndusu ñihi xaan ityi andivi, tan catyí tsi:

—Vityin tsa tsaá quivi tsa jacacú Nyoo tsi nyivi. Tsa jahá canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyín tsa tavá ra naha tsi nu tsa tyaá xaan cuatyí siqui ñi nuu ra naha nduvi tan ñiñu.

<sup>11</sup> Tan jaha canaá ñi tsi nu tsihin niñi ra cuví Mbee Ticatyí Luhlu, tan tsihin tuhun Nyoo tsa cahan ñi tsihin nyivi. Ña nayuhví ñi cúu ñi tan tsahá cuenda ñi ñayivi ñi.

<sup>12</sup> Yacan cuenda çusiñi iñi nyooho tsa iyó andivi. Maa tyín jndahvi nyivi tsa iyó nu ñuhu ñayivi tan nu ndutya ñuhu! Tyín nu ña vaha nacavá nu nu ñuhu ñayivi nu yucú ñi. Tan xaan xaan cuñi nu tyín tsitó nu tyín ña cuaha ca quivi tan cundihí tsa jandaví ñaha nu tsi ñi.

<sup>13</sup> Tan tsa nyehé nu coo xaan tsa iyó ndaha can tyín nacavá nu nu ñuhu ñayivi, quitsahá nyaá ndaha nu tsi ñaha tsa tsicoq sehe yii can.

<sup>14</sup> Maa tyín tsicoq uvi nditsin nahnu ñaha can tan caá can tumaa caá nditsin tasu. Tsicoq can tyín tacan tan cuví ndava ña tan cuhun ña cunu xeehe ña nu tsiqui nu ña cuví ñihí coo can tsi ña. Ican cuví nu cua ñihí ña tsa catsi ña tsitsi tsa uñi cuiya sasava.

<sup>15</sup> Tan nu coo can tavá nu ndutya tsihin yuhu nu, tyín coo yutya cahnu, tan tañi ñaha can tsitsi yutya can.

<sup>16</sup> Maa tyin ñuhu ñayivi jatyinyee tsi tsi ña, tyin ndata tsi tan nanyee yutya tsa javaha nu coo tsihin ndutya tsa quita yuhu nu.

<sup>17</sup> Tan tsa ña cuvī jaha canaa nu tsi ña, quitsaha cañi tahan nu tsihin nyivi cuvī tata ña, ñi nsa tyaá yahvi tuhun caahán Nyoo, tan nyicún ñi tsihin tsa nñi ñi añima ñi tsa nditsa tsa caahán ra Jesucristo.

## 13

*Nu nyehé ra Juan uvi quiti caquiñi*

<sup>1</sup> Tan tsinyaá nyityi yu nu nyiti yuhu ndutya ñuhu, nyehé yu quita iin quiti caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo.

<sup>2</sup> Quiti caquiñi can caá ti tumaa caá cuiñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsahá nu ndatu tsi quiti caquiñi can tsa cunyaa ti nu tyayu nu. Tan tsahá nu ndatu tsi ti tsa cundaca ñaha ti.

<sup>3</sup> Tan nyaá iin nu caahvi tsa cua cahñi tsi ti jiñi ti, maa tyin ndaha nu caahvi can. Tan tsa nyehé nyivi iyó nu ñuhu ñayivi ihya can, iyo xaan cuñi ñi. Tan quitsaha nyicún ñi tsi ti.

<sup>4</sup> Tan jacahnú ñi tsi nu coo xaan can, tyin tsaha nu ndatu tsi quiti can. Tan jacahnú tucu ñi tsi quiti can, tan catyí ñi:

—¿Yoñi maa cuvī tumaa cuvī quiti ihya? ¿Tan yoñi cuvī cañi tahan tsihin ti? —catyí ñi.

<sup>5</sup> Tan ñihj tucu quiti can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo.

<sup>6</sup> Tacan javaha ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andivi.

<sup>7</sup> Tan tsicoo tucu ndatu tsi ti tsa cañi tahan ti tsihin nyivi yihí cuenda Nyoo nda cuanda cuvī jaha canaa ti tsi ñi. Tan ñihj ndatu tucu ti tsa quihí ndaha ti tsi nyivi ndihí ñi tata, nyivi caahán siin siin yuhu, nyivi iyó tandihí ñi ñuu nyihí, tan ñuu nahnu.

<sup>8</sup> Tan nyivi tsa ña cua coo ñayivi tsa tsihin ra cuvī Mbee Ticatyí Luhlu, ra tsa tsihí, ña cua coo ñi ñayivi tsa can tsa cuenda tyin ña tsinyaá sivi ñi nu libru ra tsa ndi cumañi ca tsinú ñuhu ñayivi. Tandihí maa ñi can cua jacahnú ñi tsi quiti caquiñi can.

<sup>9</sup> Tatun yihí ndo iyó soho ndo, tyáa soho ndo tuhun ihya:

<sup>10</sup> Nyivi tyihí tsi inga nyivi vehe caa, cua cuhun tucu maa ñi vehe caa. Tan nyivi tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyeé iñi ndo tan tsjnu iñi ndo tsi ra.

<sup>11</sup> Yahá can tan nyehé yu quita inga quiti caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyí luhlu. Maa tyin caahán ti tumaa caahán coo xaan tsa iyó ndaha can.

<sup>12</sup> Tan ndacá ñaha ti tumaa ndacá ñaha inga quiti caquiñi can. Tan nyehé inga quiti can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnú ñi tsi inga quiti caquiñi tsa cuñi cúu jaha tsa caahvi tsa tsinyaá tsi ti.

<sup>13</sup> Tan cuaha xaan tsa iyo javaha ti nda cuanda quita ñuhu andivi tan janacava ti can nu ñuhu ñayivi tyin nyehé nyivi.

<sup>14</sup> Tan jandaví ñaha ti tsi nyivi iyó nu ñuhu ñayivi tsihin tsa iyo tsa cuvī javaha ti nuu quiti caquiñi tsa jihna ñi. Tava tyiñu ti na javaha ñi iin tsitoho quiti caquiñi tsa tyah-nya caahvi tsihin mityi, tan ña tsihí ti.

<sup>15</sup> Tan quiti caquiñi tsa tsinu uvi can tsicoo ndatu tsi ti tsa cuhva ti tsa coo nyito tsitoho quiti caquiñi tsa jihna can tyin tacan can cuvī cahan tsi tan cahñi tsi tsi tandihí nyivi tsa ña cua jacahnú itsi.

<sup>16</sup> Tan siin tyin catyí tsi tyin cunyaa tuñi tsi tandihí nyivi; nyivi nyihí, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi.

<sup>17</sup> Tan yoñi maa cuvī jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi.

<sup>18</sup> Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quiti caquiñi can. Tyin número rayii cuvī can. Tan número can cuvī iñu cientu uñi xico iñu.

## 14

*Nu tsitá cientu uvi xico cumi mil nyivi iin yaa tan jacahnú ñi tsi Nyoo*

<sup>1</sup> Yahá can tan nyehé yu tsi ra cuvī Mbee Ticatyí Luhlu, nyaá nyityi ra jiñi yucu Sión. Tan yucú cientu uvi xico cumi mil rayii tsihin ra. Ra ihya naha ra cuvī ra tsa nyaá sivi ra tan sivi Jutu ra nutyaan.

<sup>2</sup> Tacan tan tsiñi yu cucayú ityi andivi, tumaa cucayú yutya nahnu, tan tumaa caahán savi tsa ñihí xaan, o tumaa cuvī nu javacú ra naha guitarra cuaha.

<sup>3</sup> Tan tsitá ra naha iin yaa tsa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihí ra tsahnu naha ra. Tan yoñi maa cuvī cutuhva yaa can, maa ñi maa tsa cientu uvi xico cumi mil rayii tsa cacú nu ñuhu ñayivi cuvī tsitá can.

<sup>4</sup> Ra ihya naha ra cuvī ra tsa ña tsicá nuu tsihin ñaha, tyin ii ra naha. Tan nyicún ra naha tsi ra cuvī Mbee Ticatyí Luhlu tandihí ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuvī Mbee Ticatyí Luhlu tsa jihna ñi.

<sup>5</sup> Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

*Tuhun tsa jacotoŭ uñi ángel*

<sup>6</sup> Tacan tan nyeheŭ yu ndavá inga ángel ityi andivi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihi ñi ñuu nahnu, tan ñuu nyihi, nyivi tandihi ñi tata, tan nyivi caahán siin siin yuhu.

<sup>7</sup> Tan ñihi xaan cahān ra tan catyí ra:

—Nayuhvi ndo tsi Nyoo, tan jachanu ndo tsi ra. Tyin tsa tahaŭ tsi cuhva tsa cua cutuñi nyivi. Jachanu ndo tsi ra javahaŭ andivi tan ñuhu ñayivi, tan ndutya ñuhu tan ndohyo —catyí ángel can.

<sup>8</sup> Tan catyí inga ángel tsa vatsí nyicún tsi ra:

—Tsa nduvaŭ ñuu Babilonia tsa cuví ñuu cahnu, tsa taní tsi. Tyin nyivi iyó ñuu can jacuaŭ ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jahā ñi Babilonia cuví can —catyí ángel can.

<sup>9</sup> Tacan tan vatsí tsa tsinu uñi ángel, tan ñihi cahān ra tan catyí ra:

—Tatun ndáa nyivi jachanu tsi quití caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi,

<sup>10</sup> cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacoho ra vinu xaan tsi ñi nuu ángel tan nuu ra cuví Mbee Ticatyí Luhlu cuví can.

<sup>11</sup> Tan ña cua cundihi maa tsa quita yuhma nu nyeheŭ ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jachanu tsi quití caquiñi can tan tsi tsitoho ti, tan tsaŭ ñi tsi ñi cunyaa tuñi sivi ti.

<sup>12</sup> Yacan cuenda nyivi yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeŭ iñi ñi —catyí ángel tsa tsinu uñi can.

<sup>13</sup> Tacan tan tsiñi yu iin ndusu tsa quee nda andivi, tan catyí tsi tsihin yu:

—Tyaa tuhun ihya: “Vityin tan ityi nuu, sii xaan cua cuví tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, sii xaan cua cuví tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

*Nu cua tatsi tuñi Nyoo tsi nyivi*

<sup>14</sup> Tacan tan nyeheŭ yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

<sup>15</sup> Tan quitaŭ inga ángel tsitsi vehe ñuhu tan ñihi xaan canā tsa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaŭ cuhva, tan tsa iyó nu ñuhu ñayivi tsa tsityí tsi —catyí ra.

<sup>16</sup> Tacan tan ra tsa nyaá nu vico can jayahā ra mityi ra nu ñuhu ñayivi, tan naquihñin ra tsa iyó nuu tsi.

<sup>17</sup> Tacan tan quitaŭ inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan.

<sup>18</sup> Tan quitaŭ inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan canā tsa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixí tsa nañi uvas tsa iyó nu ñuhu ñayivi, tyin tsa tsityí tsi —catyí ra.

<sup>19</sup> Tan jayahā ángel can mityi ra nu ñuhu ñayivi tan tsahnyaŭ ra uvas can. Tan tyihñi ra itsi iin nu tyihñi ra tyin cua cuhñi ra itsi tan quita ndutya tsi. Tan yacan cuñi tsi catyí tsa cua tatsi tuñi Nyoo tsi nyivi.

<sup>20</sup> Tan nacuhñi ra uvas can ityi tsata ñuu, tan cuñi tsi catyí tyin cuaha xaan nyivi tsihi, tan nu cuví can, cuaha xaan cuaha xaan niñi ñi tsati. Tan tsaŭ tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

## 15

*Nu quitaŭ ndihi utsa taahan ña tundoho tsa cua nyeheŭ nyivi*

<sup>1</sup> Nyeheŭ yu inga tsa iyo cahnu andivi tan nayuhvi xaan yu, nyeheŭ yu utsa ángel tsa vatsí ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyeheŭ ra tsi nyivi tsa ña tyaá yahvi tuhun caahán ra.

<sup>2</sup> Tan nyeheŭ tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyivi tsa cunyeŭ jahā canaa tsi quití caquiñi can tan tsi tsitoho ti, tan ña tsinyaŭ número sivi ti tsi ñi, tandihi ñi tan yucú ñi yuhu tsa nyeheŭ yu can. Tan ndahá ñi tsa caá tumaa guitarra tsa tsaŭ Nyoo tsi ñi.

<sup>3</sup> Tan tsitá ñi yaa ra Moisés, ra jahā tyiñu tyiñu Nyoo, tan yaa ra cuví Mbee Ticatyí Luhlu. Tan catyí yaa can tyehen: Cahnu tan iyo xaan caá tandihi maa tsa javahā un, Nyoo, Jutu ndi, iyó tandihi tunyeŭ iñi tsi un. Ndox xaan tan nditsa xaan ityi un, Yooho Rey cuenda tandihi nyivi iyó nu ñuhu ñayivi.

<sup>4</sup> ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuví ra ii.

Tan cua quitsi nyívi quee tandihí maa ñuu,  
tan cua jacahnu ñi tsi un,  
tyin nyehe ñi tsa vaha tsa javahá un, catyí  
yaa tsítá ñi.

<sup>5</sup> Tacan tan nyehe yu nuñá yuvehe ñuhu  
tsa nyaá nda andívi nu yucú vaha nduvi  
tabla tsa nyaá ley Nyoo nuu.

<sup>6</sup> Tan quitá utsa ángel tsa vatsí ndacá  
tsa utsa tundoho can tsitsi vehe ñuhu can.  
Ndítsi ra naha jahma vaha, cuitsin tan xiñu.  
Tan yihí cinturón xuhun cuaan yiqui nyíca  
tsa intuhun intuhun ra naha.

<sup>7</sup> Tacan tan iin tsa nyito can, tsahá can  
intuhun intuhun coho xuhun cuaan tsi tsa  
intuhun intuhun tsa utsa ángel can. Tan  
tsitú maa can tsihin tsa xaan Nyoo tsa cua  
tatsi tuñi ra tsi nyívi. Ra ícan ña cua cundihi  
maa tsa iyó ra.

<sup>8</sup> Tan tsitú maa tsitsi vehe ñuhu can tsi-  
hin yuhma tsa cuenda tsa cahnu xaan cuví  
Nyoo tan tsa cuenda tuneeye iñi tsa iyó tsi  
ra. Tan yoñi maa cuví quihvi tsitsi vehe  
ñuhu can tsitsi tsa ndi cumañi ndihí tsa utsa  
tundoho tsa vatsí ndacá tsa utsa ángel can.

## 16

*Coho tsa yihí tundoho tsa cua jaquitsi tsa  
utsa ángel*

<sup>1</sup> Tacan tan tsiñi yu iin ndusu ñihí xaan tsa  
quitá tsitsi vehe ñuhu nu nyaá Nyoo. Tan  
catyí tsi tyehen tsihin tsa utsa ángel can:

—Cúacoyo ndo tsa yihí tsitsi coho ndahá  
ndo juvin síqui nyívi iyó nu ñuhu ñayívi, tyin  
Nyoo cua tatsi tuñi ra tsi ñi —catyí ndusu  
can.

<sup>2</sup> Tacan tan tsahán iin ángel can tsicoyo ra  
tsa yihí tsitsi coho ra síqui nyívi tsa nyaá tuñi  
quiti caquiñi can tan jacahnú ñi tsitoho ti.  
Tan quitá nu caahvi xaan tan uhvi xaan tsi  
ñi.

<sup>3</sup> Tacan tan coyo tsa tsinu uvi ángel can  
tsa yihí tsitsi coho ra nu ndutya ñuhu. Tan  
ndutya ñuhu can nanduví tsi niñi tumaa  
niñi ndiyi, tan tandihí tsa nyito tsa iyó tsitsi  
ndutya ñuhu can tsihí tsi.

<sup>4</sup> Tacan tan coyo tsa tsinu uñi ángel can  
tsa yihí tsitsi coho ra nu yutya nahnu tan nu  
ndohyo tan nanduví tsi niñi.

<sup>5</sup> Tacan tan tsiñi yu tsa caahán ángel  
cuenda ndutya tan catyí ra:

—Jutu Mañi yu, yooho vaha xaan un tyin  
tatsi tuñi un tsi nyívi tyehen. Jutu Mañi yu,  
Nyoo ii cuví un tyin nda nu quitsahá tandihí  
tan nda cuenda vityin tacan ñi iyó maa un.

<sup>6</sup> Tatsi tuñi un tsi ñi tyin maa ñi tsatú ñi niñi  
nyívi yihí cuenda un tan niñi ra cuví ndusu  
yuhu un. Tan vityin yooho tumaa tsa jacobó  
un niñi tsi ñi tyin tacan taahán maa tsi tsi ñi  
—catyí ángel can.

<sup>7</sup> Tan tsiñi tucu yu nacahan inga ndusu  
ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó  
tandihí tuneeye iñi tsi, vityin tsa tatsi tuñi un  
tsi nyívi tsihin tsa nditsa tan tsihin tsandaa  
—catyí ndusu can.

<sup>8</sup> Tan coyo tsa tsinu cumi ángel can tsa yihí  
tsitsi coho ra nu ñicanyii. Tacan tan tsicoo  
ndatu tsi ñicanyii can tsa cahmi tsi tsi nyívi  
tsihin ñuhu tsi.

<sup>9</sup> Tan tandihí nyívi ndasi xaan cayú ñi jaha  
ñicanyii can. Maa tyin vasu ndi maa tacan  
tahan ñi, ña nasama ñi cuhva tsicoo ñi, tan  
ndi ña jacahnú ñi tsi Nyoo. Tan cahán ñi  
ndavaha ñi síqui Nyoo, ra tsa jaquitsi tun-  
doho can síqui ñi.

<sup>10</sup> Tan coyo tsa tsinu uhun ángel can tsa  
yihí tsitsi coho ra síqui tyayu quiti caquiñi  
can. Tan ndunaq nu ndacá ñaha ti. Tan nyívi  
cuenda ti, nda cuanda tsatsi yihí ñi yaa ñi tsa  
cuenda tsa nyehe xaan ñi tsa uhvi.

<sup>11</sup> Maa tyin vasu ndi maa tacan cuví, ña  
jandihí ñi tsa javahá ñi tsa ña vaha. Tan  
cahán ñi ndavaha ñi síqui Nyoo, ra nyaá  
andívi, tsa cuenda tsa uhvi nu caahvi ñi.

<sup>12</sup> Tan coyo tsa tsinu iñu ángel can tsa yihí  
tsitsi coho ra nu yutya Eufrates cahnu. Tan  
ndoco ndutya can tyin tacan tan nuña ityi  
nu cua yaha ra rey tsa quee ityi nu caná  
ñicanyii naha ra.

<sup>13</sup> Tacan tan nyehe yu quitá tatyí ña vaha  
tsa caá tumaa caá sahva yuhu tsa intuhun  
intuhun quiti. Iin can quitá yuhu quiti  
caquiñi, inga can quitá yuhu coo xaan tsa  
iyó ndaha inga can quitá yuhu tsa cuví  
ndusu yuhu vatya.

<sup>14</sup> Tatyí ña vaha can cuví tatyí nu ña vaha,  
tan nahnu tsa nyityi javahá nahnu. Quitá  
nahnu, jandu iin nahnu tandihí rey tsa iyó  
nu ñuhu ñayívi, tyin cañi tahan ra naha quívi  
tsaa quívi janaha Nyoo tyin iyó tandihí tun-  
yee iñi tsi ra.

<sup>15</sup> Tan catyí ra Cristo:

—Nyehe ndo tyin tsa vatsí yu tumaa vatsí  
iin ñasuhu tyin iin ñasuhu sana iñi ndo tan  
quihvi ra tsitsi vehe ndo tacan yuhu. Sii  
xaan cua cuví tsi nyívi ndatú quívi quitsi yu  
tan tsa iyó vaha jahma ñi tyin quívi cua tsaa  
yu ña cua nducahan nuu ñi tyin ña tandiñi ñi  
—catyí ra Cristo.

<sup>16</sup> Tan cua ndu iin ra cuví rey naha ra nu  
nañi Armagedón tsihin yuhu hebreo.

<sup>17</sup> Tan coyo tsa tsinu utsa ángel can tsa yihí  
tsitsi coho ra nu tatyí, tacan tan quitá iin  
ndusu nu nyaá tyayu Nyoo tsitsi vehe ñuhu  
tsa nyaá nda andívi. Caná tsaa tsi tan catyí  
tsi:

—Tsa iyó vaha vityin.

<sup>18</sup> Tacan tan vaa ña maa cuví tan caahán  
savi tan cañi tatsa. Tan ñihí xaan taan nu



ñuhu ñayivi. Tan ña tuhvá maa taán tacan tsa ndi quitsaha iyó nyivi nu ñuhu ñayivi.

<sup>19</sup> Tan uñi nu ndata ñuu cahnu Babilonia can, jahá tsa taan. Tan tandihi ca ñuu tsa cayucu nu ñuhu ñayivi tani tsi. Nyoo ña naa maa iñi ra tsa javaha nyivi Babilonia. Yacan cuenda janyehé xaan ra tundoho tsi ñi.

<sup>20</sup> Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsi-naa.

<sup>21</sup> Tan cucoyo cuaha yuu savi nahnu xaan tsa quee andivi siqui nyivi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyivi cahán ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

## 17

*Nu cua tatsi tuñi Nyoo tsi ñuu ña vaha*

<sup>1</sup> Tacan tan quitá iin ángel tsitsi tsa utsa ra tsa ndahá coho can naha ra, natuhva ra nu nyaá yu, tan catyí ra tsihin yu:

—Naha tyin janaha yu tsi un nácaa cua cutuñi ñaha ña vaha tsa tsicá nuu tsihin rayii, ña tsa nyaá nu ndutya cuaha.

<sup>2</sup> Tyin ra cuví rey nu ñuhu ñayivi tsicoq ra naha tsihin ña, tan tsa cuenda ña tivj tandihí nyivi iyó nu ñuhu ñayivi —catyí ra tsihin yu.

<sup>3</sup> Tacan tan nyehe yu iin tsa janaha Tatyí li Nyoo tsi yu, tan tsindacá ángel can tsi yu nu tsiqui nu nduve maa nyivi iyó, tan juvin ñi ican nyehe yu iin ñaha yosó iin quití cuaaha caquiñi. Nycú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiqui ti.

<sup>4</sup> Tan ñaha can nditsi ña jahma tijinda tan cuaaha. Tan cuaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña.

<sup>5</sup> Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihí ñiñaha tsa tsicá nuu tsihin rayii tan sihi tandihí tsa ña vaha tsa iyó nu ñuhu ñayivi.”

<sup>6</sup> Tacan tan nyehe yu tyin tsiñi ñaha can jahá tsa tsihj ña niñi nyivi yihí cuenda Nyoo, ñi tsa tsihj tsa cuenda tsa cahán ñi tuhun ra Jesús. Tsa nyehe yu tsi ña, iyo xaan cuñi yu.

<sup>7</sup> Tacan tan catyí ángel can tsihin yu: —¿Nacuenta iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiqui.

<sup>8</sup> Quití caquiñi tsa nyehe un can, juvin ti cuví quití tsa tsicoq tan vityin nduve ca ti iyó. Maa tyin cua quita ti tsitsi yavi unu tsa nduve nu tsindihí. Ican nyii ti tsa ndi cumañi ca cuhun ti nu cua cundihí cuii ti.

Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quití can. Libru can catyí yóo nyivi cua coo cuii.

<sup>9</sup> Tuhun ihya cuñi tsi tsa cutuñi iñi yo tsi: Tsa utsa jiñi quití can cuñi tsi catyí tsa utsa yucu tsa nyaá ñaha can nuu.

<sup>10</sup> Tan juvin ñi cuñi tucu tsi catyí can utsa rey. Uhun ra naha tsa yaha tsindacá ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra.

<sup>11</sup> Tan quití caquiñi tsa tsicoq tan vityin nduve ca ti iyó, juvin ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cuhun ti nu cua cundihí cuii ti.

<sup>12</sup> Tan tsa utsi ndiqui tsa nyehe un can, cuñi tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quití caquiñi can.

<sup>13</sup> Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quití caquiñi can. Tan tandihí ndatu tsa iyó tsi ra naha cua nacuhva ra naha tsi ti.

<sup>14</sup> Tan cua cañi tahan ra naha tsihin ra Mbee Ticatyi Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihí ra ndacá ñaha. Tan yihí ndaha tucu ra tsi tandihí ra cuví rey naha ra. Tan nyivi yihí cuenda ra, maa Nyoo caná tsi ñi tan nacatsj ra tsi ñi. Tan nñi xaan cuñi ñi nyicún ñi tsi ra.

<sup>15</sup> Tan catyí tucu ángel can tsihin yu: —Ndutya cuaha tsa nyehe un can, nu nyaá ñaha tsicá nuu can, yacan cuví nyivi iyó tandihí ñuu nyihí tan ñuu nahnu, ñi caahán siin siin yuhu.

<sup>16</sup> Rey tsa cuví tsa utsi ndiqui quití caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo ihñi ra naha tsi ña. Tan cua jatandñi ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña.

<sup>17</sup> Tyin Nyoo tsañá ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha ndatu tsi quití caquiñi can tsa cundaca ñaha ti tumaa rey nda cuanda cundaa tuhun caahán maa Nyoo.

<sup>18</sup> Ñaha tsa nyehe un can, juvin ña cuví ñuu cahnu tsa ndacá ñaha tsi tandihí ra cuví rey nu ñuhu ñayivi.

## 18

*Nu naá ñuu Babilonia*

<sup>1</sup> Tsa yaha yacan tan nyehe yu quee inga ángel ityi andivi tan iyó xaan tunyee iñi tsi ra. Tan ndunditsin ñuhu ñayivi jahá tsa nditsin ra.

<sup>2</sup> Tan caná tsa ra tshih tsa ñihi ndusu ra, tan catyi ra:

—Tsa tsindihí nuu ñuu Babilonia cahnu. Nanduví tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán iñi nyívi.

<sup>3</sup> Tyin tandihí nyívi tiví ñi tsa cuenda cu-atyi javahá ñuu Babilonia can. Ra cuví rey nu ñuhu ñayivi naha ra tumaa tsa tsicoo ra naha tshih ñaha tsa cuví ñuu Babilonia can. Javahá ra naha cuatyí tshih ña. Tan nyívi ñuhu ñayivi nducuca ñi tshih tsa cuaha xaan tsa yahví tsa jatá nyívi ñuu can.

<sup>4</sup> Tacan tan tsiñi yu ndusu Nyoo ityi andivi, tan catyi tsi:

—Quíta ndo ñuu ihya, nyooho tsa cuví nyívi yu, ña cutahan ndo tshih nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi.

<sup>5</sup> Tyin tsa canyií tucúiti cuatyí nyívi iyó ñuu can, nda cuanda tsaá can nu nyaá yu. Tan ñuhú iñi yu tsa ña vaha javahá ñi.

<sup>6</sup> Cuhva ndo juvin ñi maa tsa tsaá ñi tsi inga nyívi tsi ñi; cuhva ndo uvi ca tsaha síqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsaá maa ñi tsi inga nyívi.

<sup>7</sup> Yacan cuenda cuhva ndo tsa iyo xaan tahan ñi tshih tundoho nyehe ñi jaha ndo. Tahan ñi cuhva tsa jacahnu xaan ñi tsi ñi tan cusí xaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahví cuví yo, tan ndi ña cua nyehe yo tundoho”, cuñí ñi, tsicá iñi ñi.

<sup>8</sup> Yacan cuenda iin quívi ñi cua quítsi tundoho síqui ñuu can, cua quítsi tuhun tsihi, tucuihya iñi, tama, tan cua cayu tsi tshih ñuhú. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyi Nyoo.

<sup>9</sup> Ra cuví rey nu ñuhu ñayivi ihya tumaa tsa tsicoo ra naha tshih ñaha tsa cuví ñuu can, cua vacu xaan ra naha, tan cuihya cua cuñi ra naha na nyehe ra naha yuhma tsa cayu ñuu can.

<sup>10</sup> Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyi ra naha:

—¡Ndahví yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaá tundoho nyehé un —cua catyi ra naha.

<sup>11</sup> Tan ra tsa xicó ndaha tyiñu naha ra, juvin ñi cua vacu xaan ra naha tan cuihya

cua cuñi ra naha tsa cuenda ñuu can. Tyin yoñi ca cua jata tsa xico ra naha.

<sup>12</sup> Tyin xicó ra naha xuhun cuaan, xuhun cuitsin, yuu sí caá, perla, jahma linu, jahma seda, tan jahma tijinda cuaha. Tan xicó tucu ra naha tandihí nuu vitu tami tan náa ndihí tsa tsinú tshih yiqui nuu landa, tan vitu sí caá, tan caa tsa cuví bronce, tan caa tsa cuví hierro, tan yuu tsa cuví mármol.

<sup>13</sup> Tan xicó tucu ra naha canela, náa ndihí ca yucu tsa quihví tshih tsa tsatsí yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, acetye, yutyí paan vaha, tan trigu. Tan juvin ñi xicó tucu ra naha quíti cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha.

<sup>14</sup> Tan catyi ra naha tshih nyívi ñuu can tyehen:

—Nduve ca tsa sí caá tsa tsicoo tsi un, tsa taahán xaan iñi un. Tan tsa tsindihí tandihí tsa cuca un. Tan ña cua ñihi ca maa un tandihí yacan —catyi ra naha.

<sup>15</sup> Ra tsa xicó tandihí can, nducuca ra naha tsa cuenda tsa jatá nyívi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuuhví ra naha tsa cua nyehe nyívi can tundoho. Tan cua vacu xaan ra naha tan cuihya cua cuñi ra naha.

<sup>16</sup> Tan cua catyi ra naha:

—¡Ndahví ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaha. Tan cucutú ña tshih xuhun cuaan, tan yuu sí caá tan perla.

<sup>17</sup> ¡Tan iin yaha ñi ndihí tsa cuca xaan can! —cua catyi ra xicó can naha ra.

Tan tandihí ra cuví capitán tsa jacacá yutun ndoo nu ndutya, tshih nyívi yucú tsitsi can tan tandihí ra jahá tyiñu nu ndutya ñuhu naha ra, nda sava cua ndoo ñi.

<sup>18</sup> Tan tsa cua nyehe ñi yuhma tsa cayú ñuu can, cua cana tsaá ñi, tan cua catyi ñi:

—¿Náa inga ñuu tsicoo tumaa ñuu cahnu ihya? Nduve —cua catyi ñi.

<sup>19</sup> Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsaá ñi, tan cua catyi ñi:

—¡Ndahví ñuu cahnu can! Tyin tshih tsa cuca tsi tan nducuca tandihí yoo tsa tsicá nuu nu ndutya ñuhu tshih yutun ndoo. ¡Tan vityin iin yaha ñi naq tsi! —cua catyi ñi.

<sup>20</sup> Maa tyin nyooho cusí iñi ndo nyehe ndo tsa taahán ñuu can, nyooho tsa iyó andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihí ca nyooho tsa yihí cuenda Nyoo. Cusí iñi ndo tyin tsa cuenda tsa javahá ñi tsa ña vaha tshih ndo tan tatsí tuñi Nyoo tsi ñi.

<sup>21</sup> Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin

yoso cahnu xaan, tan jacuhun ra can tsitsi ndutyá ñuhu, tan catyí ra:

—Tyehen cua cundihi nuu ñuu Babilonia cahnu. Tan ndi iin tsaha ca tan ña cua nyehe ca ndo itsi.

<sup>22</sup> Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihi ca tyiñu. Tan ndi ña cua cucayu ca molino.

<sup>23</sup> Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyívi nu iyó vico tindaha. Tacan cua cuvi vasu ndi maa ra xico tsa tsicoo ñuu can naha ra, cahnu xaan tunyee iñi tsicoo tsi ra naha, tan jandaví ñaha xaan nyívi iyó ñuu can tsi tandihi nyívi iyó nu ñuhu ñayívi tsihin tuhun tasi.

<sup>24</sup> Tyin cuaha xaan niñi ra cuví ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyívi yihí cuenda Nyoo, tan niñi tandihi nyívi tsa tsahñi nyívi nani cahnu nu ñuhu ñayívi.

## 19

<sup>1</sup> Tsa yaha yacan, tan tsifiñ yu ndusu nyívi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

<sup>2</sup> Tyin tsihin tsa vaha tan tsandaa tan tsa nditsa jacutuñi ra.

Tatsj tuñi ra tsi ñaha tsicá nuu tsa cuví ñuu Babilonia

tsa jatívi xaan tsi nyívi iyó nu ñuhu ñayívi tsihin tsa caquiñi tsa javahá ña tsihin ñi.

Tan tatsj tuñi ra tsi ña tsa cuenda tsa tsahñi ña tsi nyívi jahá tyiñu tyiñu ra.

<sup>3</sup> Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihi maa tsa ndaa tsi ityi siqui —catyí ñi.

<sup>4</sup> Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuví tsi tacan! —catyí ra naha.

<sup>5</sup> Tan nu nyaá tyayu Nyoo, nacahan iin ndusu, tan catyí tsi:

Jacahnu ndo tsi Nyoo Jutu yo tandihi nyooho tsa jahá tyiñu tyiñu ra, tan tyaá yahvi ndo tsi ra, nyooho nyívi nyihi tan nyívi tsahnu.

*Nu iyó vico tindaha ra Mbee Ticatyí Luhlu tan nyívi tsinú iñi tsi ra*

<sup>6</sup> Tan tsifiñ tucu yu ndusu tumaa cuví nu cuaha xaan nyívi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihi tunyee iñi tsi! Tyin tsa quitsahá ndacá ñaha ra.

<sup>7</sup> Na cusii iñi yo tan na cutu yo tsihin tsa sii. Na jacahnu yo tsi ra,

Tyin tsa tsaá cuhva tsa coo yo vico tindaha ra Mbee Ticatyí Luhlu.

Tan yoo cua cuví yo tumaa ñasiihi ra, tan ndatú yo quívi tindaha yo tsihin ra.

<sup>8</sup> Tyin tsa ñihí ndatu yo tsa cunditsi ra jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyí tsa vaha tsa javahá nyívi yihí cuenda ra.

<sup>9</sup> Tacan tan quitsahá catyí ángel can tsihin yu:

—Tyaa tyehen nu tutu: “¡Sii xaan cuví tsi nyívi tsa cua cuhnu nu tindaha ra Mbee Ticatyí Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

<sup>10</sup> Tacan tan tsicuiñi tsiti yu nuu ángel Nyoo can tsa cua jacahnu yu tsi ra. Maa tyin catyí ra tsihin yu:

—Ña jacahnu un tsi yuhu, tyin yuhu musu Nyoo ñi cuví tucu yu tumaa yooho, tan tumaa tandihi ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahán tsi jacahnu yo —catyí ra tsihin yu.

Tyin tsa cahan ra Jesús, yacan cuví tsa jandu iin iñi tsi ra cuví ndusu yuhu ra, ra tsahá cuenda tuhun caahán Nyoo tsihin yo.

*Nu nyehe ra Juan tsi ra tsa yosó cuayu cuitsin*

<sup>11</sup> Tacan tan nyehe yu ticohó andivi. Tacan tan quituví iin cuayu cuitsin. Tan ra yosó tsi ti nañi ra Ra Nditsa Tsa Niñi Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyívi, tan ndaa javahá ra tsa cañi tahan ra.

<sup>12</sup> Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra.

<sup>13</sup> Tan nditsí ra jahma cahyí tsihin niñi. Tan nañi ra Tuhun Nyoo.

<sup>14</sup> Tan nyicún andarú andívi tsi ra, nditsí ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin.

<sup>15</sup> Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyívi iyó nu ñuhu ñayívi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutyá yucu vixi tsa cuví uva

tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñí tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihi tyeeyee ñi tsi.

<sup>16</sup> Nu jahma ra tan nu sihin ra can nyaá letra tsa catyi tyehen: “Ra ihya cuví ityi nuu tsihin tandihi rey. Tan juvin ñi ra cuví ityi nuu tsihin tandihi ra ndacá ñaha naha ra.”

<sup>17</sup> Tacan tan nyehe yu nyaá nyityi inga ángel nu ñicanyii. Tan ñihi xaan caná tsaa ra tsi tandihi saa tsa ndavá ityi andivi, tan catyi ra tsihin ti naha ti:

—Nuu ndo tan ndú iin ndo tan cuxiñi ndo tsa tsahá Nyoo catsi ndo.

<sup>18</sup> Cua catsi ndo cuñu ra cuví rey naha ra tan ra cuví ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihi ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyi ra tsihin saa can naha ti.

<sup>19</sup> Tacan tan nyehe yu quití caquiñi can tsihin ra cuví rey tsa iyó nu ñuhu ñayivi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra.

<sup>20</sup> Tsiñ ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javahá ra vatya can tsa nyityi, tan tsihin yacan jandaví ñaha ra tsi nyivi tsa tsahá cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre.

<sup>21</sup> Tan tandihi ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandihi maa saa, tsatsj xaan ti naha ti cuñu ñi.

## 20

*Nu nyehe ra Juan tsa cuenda tsa mil cuiya*

<sup>1</sup> Tsa yaha can tan nyehe yu quee iin ángel ityi andivi, ndahá ra ndaha tucu yuvehe yavi cunu tsa nduve maa nu tsindihi. Tan ndahá tucu ra iin cadena cahnu.

<sup>2</sup> Tsiñ ángel can tsi nu coo xaan tsa iyó ndaha, tsa cuví Coo Tsahnu can, tan cuví tucu nu ña vaha, tan nañi nu Satanás. Tshañj ra tsi nu tsihin cadena iin mil cuiya.

<sup>3</sup> Tan jacuhun ra tsi nu tsitsi yavi cunu xaan can. Nacasj ra yuhu yavi can, tan tyaa ra iin sellu yuhu can tyin tacan tan ña jandaví ñaha ca nu tsi nyivi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

<sup>4</sup> Yaha can tan nyehe yu nyecú cuaha tyayu. Tan nuu can nyecú nyivi tsa ñihi

ndatu tyin tatsi tuñi ñi tsi nyivi. Tan nyehe tucu yu añima nyivi tsahnyá nyivi jiñi tsa cuenda tsa cahán ñi tuhun Nyoo tsa tsahá cuenda ra Jesús tsi ñi. Nyivi ihya ña jacahnú ñi tsi quití caquiñi can, ndi tsi tsitoho ti, tan ndi ña tsahá ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindaca ñaha ñi tsihin ra Cristo tsitsi tsa mil cuiya can.

<sup>5</sup> Ñi ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can.

<sup>6</sup> Sii xaan cuví tsi ñi tsa nandoto jihna tyin nacatsj Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tsihin ra Cristo mil cuiya.

<sup>7</sup> Tsa yaha mil cuiya can, cua ndatsi Satanás nu nyí nu nuuhñi nu.

<sup>8</sup> Cua quita nu, jandaví ñaha nu tsi nyivi Gog tan Magog, ñi xaan ñi tsi Nyoo tsa iyó nanii cahnu nu ñuhu ñayivi. Cua jandu iin nu tsi andaru ñi can tyin cuhun ra naha cuatyí. Cuaha xaan ra naha, tumaa cuaha nyiti yuhu ndutya ñuhu.

<sup>9</sup> Tacan tan nyehe yu quee ra naha nanii cahnu nu ñuhu ñayivi. Tan tyasj nduvi ra naha nu iyó nyivi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andivi tan tsahmj tsi tsi tandihi ra naha.

<sup>10</sup> Tan nu ña vaha tsa jandaví ñaha tsi ñi, jacuhun Nyoo tsi nu anyaya nu cayú ñuhu tsihin azufre, nu jacuhun ra tsi quití caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

*Nu cutuñi nyivi ityi nu nyaá tyayu cuitsin nu nyaá Nyoo*

<sup>11</sup> Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehe ra nu naa ñuhu ñayivi tan andivi. Tan ña ñiñi tsi numaa cava tsi.

<sup>12</sup> Tan nyehe yu tandihi añima nyivi tsihi, tahan ñi nyivi tsahnu tan nyivi nyihi, nyecú nyityi ñi ityi nuu Nyoo. Tacan tan nuñá libru tsa nyaá tandihi tsa javahá ñi quivi tsicoso ñi. Tan nuña tucu inga libru nu nyecú sivi nyivi tsa cua coo nyito tsihin Nyoo. Ndiyí can cua cutuñi ñi tsa cuenda náa ndihi ca tsa javahá ñi tsa nyaá nu libru can.

<sup>13</sup> Tan ndutya ñuhu nacuhvą cuenda tsi añima nyivi tsa tsihi tsa cumí tsi. Tan nu yucú añima nyivi tsihi tan Tuhun Tsihi, nacuhvą cuenda nahnu añima nyivi tsa yihí ndaha nahnu. Tan tandihi ñi cua tahan ñi nácaa javahá maa ñi.

<sup>14</sup> Tacan tan Tuhun Tsihi can tan nu yucú añima nyivi tsihi can cua jacuhun ndihi

Nyoo nduvi taahan can anyaya cahnu nu cayú ñuhu. Tan tsehe cuví tuhun tsihi tsa tsinu uvi.

<sup>15</sup> Juvín ñi ican jacuhun ra tsi nyivi tsa nduve sivi nyaá nu libru nu nyecú sivi nyivi cua coo nyito tsihin Nyoo tacan ñi maa.

## 21

*Nu nyehé ra Juan andivi tsa tan ñuhu ñayivi tsa*

<sup>1</sup> Yahá can tan nyehe yu iin andivi tsa tan iin ñuhu ñayivi tsa, tyin andivi tan ñuhu ñayivi tsa tsicoq jihna naq tsi. Tan tacan tucu ndutya ñuhu naq tsi.

<sup>2</sup> Yuhu ra Juan nyehe yu ñuu ii tsa cuví Jerusalén tsa quee nda nu nyaá Nyoo andivi, nyehe yu nuu tsi. Tan sii xaan caá cucutú tsi tumaa cucutú iin ñaha cua tindaha.

<sup>3</sup> Tan tsiñ yu iin ndusu ñihi tsa quitá nda andivi, tan catyí tsi:

—Nyehé jihna! Iyó Nyoo mahñu nyivi. Cua coo ra tsihin ñi. Maa ñi cua cuví ñi nyivi ra. Tan cua cunyaa ra tsihin ñi, tan cua cuví ra Nyoo cuenda ñi.

<sup>4</sup> Juvín ñi maa ra cua nacuhva ndutya nuu ñi. Ña cua coo ca tuhun tsihi tan ndi tucuihya iñi. Ña cua vacu ca nyivi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandi tsa tsicoq, tsa tsindihi tsi —catyí ndusu can.

<sup>5</sup> Tacan tan ra nyaá nu tyayu cahnu can, catyí ra:

—Nyehe jihna. Jandutsaq yu tandihi maa tsa tsicoq.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cujta iñi tuhun ihya tyin cua cundaa tsi —catyí ra tsihin yu.

<sup>6</sup> Tsa yahá cahan ra yacan tan catyí tucu ra:

—Tsa iyó vaha tandihi vityin. Yuhu cuví ra jihna ñi, tan yuhu cuví ra cua coo nu cua ndihi quivi: tumaa letra A cuví tsi letra jihna ñi tan tumaa letra Z cuví tsi letra nu ndihi ña. Nyivi tsa na ityi iñi cua cuhva yu ndutya coho ñi; tuhun ihya cuñí tsi catyi: Ñi cuñí tyaa soho tuhun yu, cua cuhva yu ñayivi tsa ña cua naa maa coo ñi, tan nduve yahvi tsi cua coo.

<sup>7</sup> Nyivi jahá canaa tsi nu ña vaha, cua ñihi ñi tandihi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu.

<sup>8</sup> Maa tyin nyivi yuhví xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayi, tan rayi tsicá nuu tsihin ñaha, ñi tasi, ñi jacahnú tsitoho, ñi vatya; tandihi maa nyivi ihya taahán tsi cuhun ñi anyaya cahnu nu cayú ñuhu tsihin azufre, nu cuví tsa tsinu uvi tuhun tsihi, nu tatsí tuñi Nyoo añima ña vaha.

*Nu nyehé ra Juan nácaa cua cuví ñuu Jerusalén tsa*

<sup>9</sup> Tacan tan tsitsi tsa utsa ángel tsa ndahá coho tsitú tsihin tundoho, quitá iin ra tan natuhva ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasihi ra Mbee Ticatyí Luhlu —catyí ra tsihin yu.

<sup>10</sup> Tan janaha Tatyí Ii Nyoo tsi yu tyin tsindaca ángel can tsi yu iin yucu sucun tan cahnu. Tan janaha ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andivi nu nyaá Nyoo.

<sup>11</sup> Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi.

<sup>12</sup> Nii canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsi tsaahnu yo naha ra.

<sup>13</sup> Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii.

<sup>14</sup> Utsi uvi yuu yihí nu cacú tsaha tsi. Tan nuu yuu can nyecú sivi tsa utsi uvi ra tsa tava tyiñu ra Mbee Ticatyí Luhlu.

<sup>15</sup> Tan ángel tsa cahan tsihin yu, ndahá ra iin metru tsa tsinu tsihin xuhun cuaan, tsihin yacan tyihí cuhva ra ñuu can, tan yuhu cora can tan nanii canduvi cora ñuu can.

<sup>16</sup> Iyó cumi taahan tutun ñuu can. Tan inducu ñi tsa quihin tan tsa cañi tsi. Tan tyihí cuhva ángel can ñuu can tsihin metru xuhun cuaan can. Tan quitá uvi mil uvi cientu kilómetro. Iin ñi cuhva tsa cañi tan tsa sucun tan tsa quihin.

<sup>17</sup> Tacan tan tyihí cuhva ra cora ñuu can. Tan quitá uñi xico cumi metru tsa quihin, tyihí cuhva ra tumaa tyihí cuhva nyivi.

<sup>18</sup> Tsihin yuu jaspe samá cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoo vaha tsi.

<sup>19</sup> Tan tsaha cora can samá tsi tsihin tandihi ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda;

<sup>20</sup> tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihi ña cuví amatista.

<sup>21</sup> Tsa utsi uvi yuhu cora can tsinú tsi tshin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tshin tsi, tacan caá tsi.

<sup>22</sup> Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee ñi tsi, tan ra Mbee Ticatyí Luhlu cuví vehe ñuhu ñuu can.

<sup>23</sup> Ña tsiñí ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin ñi maa tsa nditsin Nyoo tan tsa nditsin ra Mbee Ticatyí Luhlu jandunditsín tsitsi ñuu can.

<sup>24</sup> Tandihí nyívi tsa cacú añima, cua caca nuu ñi nu nditsin can. Tan ra cuví rey nu ñuhu ñayívi naha ra cua cundaca ra naha tsa cuca ra naha tan tandihí tsa cahnu cuví ra naha ñuu can.

<sup>25</sup> Ña cua cundasi yuhu cora tsa tsinu cahñi, tan ña cua coo tsacuaa ñuu can.

<sup>26</sup> Tan tandihí tsa cuca, tan tsa cahnu, tsa iyó nu ñuhu ñayívi cua tsa tsi ñuu can.

<sup>27</sup> Maa tyin ña cua cuví quihví tsa caquiñi, ndi intuhun nyívi javahá tsa caquiñi, tan ndi ñi vatya. Intuhun ñi maa nyívi iyó sívi nu libru ra Mbee Ticatyí Luhlu cua cuví quihví, tan cua coo nyito tshin ra tacan ñi maa.

## 22

<sup>1</sup> Tacan tan janahá ángel can iin yutya cuii xaan tyin yu. Nduya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyí Luhlu.

<sup>2</sup> Mahñu tsitsi ityi cahnu ñuu can tan nduvi tsiyo xiin yutya can, nycéy yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyívi iyó nu ñuhu ñayívi.

<sup>3</sup> Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tshin ra Mbee Ticatyí Luhlu. Tan cua jacahnu nyívi yihí cuenda ra tsi ra.

<sup>4</sup> Tan cua nyehe tshin nuu ñi tsi ra. Tan cua cunyaa sívi ra nutyaan ñi.

<sup>5</sup> Ña cua coo ca tsacuaa ican. Tan nyívi tsa cua coo ican ña tsiñi ñuhu ñuhú candili tsi ñi, ndi ñuhú ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tshin ra tacan ñi maa.

*Nu janahá tsi tyin tsa cuyatyin quitsi ra Cristo*

<sup>6</sup> Tacan tan catyí ángel can tshin yu:  
—Tuhun ihya cuví tuhun nditsa, tan cuví cuita ñi un itsi tyin cua cundaa tsi. Maa

Nyoo Jutu yo ra cahñ tshin ra cuví ndusu yuhu ra tahañ tsanaha, juvin ra jacuhun ángel ra, tyin janaha ra tsi nyívi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

<sup>7</sup> —¡Tsa cuyatyin quitsi yu! —catyí ra.

¡Sii xaan cuví tsi nyívi tsa javahá cuhva caahán tuhun Nyoo tsa nyaá nu libru ihya!

<sup>8</sup> Yuhu ra Juan, tsiñi yu tan nyehe yu tandihí tuhun ihya. Tsa yahá nyehe yu tan tsiñi yu itsi, tsicuiñi tsiyo yu tsaha ángel tsa janahá itsi tsi yu, tyin jacahnu yu tsi ra.

<sup>9</sup> Maa tyin catyí ra tshin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihí ca ra yañi un tsa cuví ndusu yuhu Nyoo, tan tumaa tandihí ca nyívi tyaá yahví tuhun nyaá nu libru ihya. Intuhun ñi Nyoo taahán tsi jacahnu yo —catyí ra tshin yu.

<sup>10</sup> Tan catyí tucu ra tshin yu:

—Ña tyihí xeehe un tuhun Nyoo tsa nyaá nu libru ihya, tyin tsa yatyin cuii cundaa tsi.

<sup>11</sup> Maa tyin jaña ndaha tsi nyívi caquiñi, na javaha maa ñi cuhva cuñi maa ñi. Tan nyívi iyó cuatyí, na coo ca cuatyí ñi. Maa tyin nyívi javahá tsa vaha, na jañihi ca ñi javaha ñi tsa vaha. Tan nyívi tsa jandu íi Nyoo, na cunyicun vaha ca ñi tsi ra —catyí ra tshin yu.

<sup>12</sup> Tan Jutu Mañi yo catyí ra:

—Nyehe ndo. Tsa cuyatyin quitsi yu. Tan tyahvi yu tsi intuhun intuhun nyívi tsa cuenda tsa javahá ñi, a javahá ñi tsa vaha o tsa ña vaha.

<sup>13</sup> Yuhu cuví ra jihna ñi, tan yuhu cuví ra cua coo nu cua ndihí quívi, tsa iyó maa yu nda nu quitsahá tandihí tan tacan ñi maa cua coo yu nu cua ndihí tumaa letra A cuví tsi letra jihna ñi tan letra Z cuví tsi letra nu ndihí ña —catyí Jutu Mañi yo.

<sup>14</sup> Sii xaan cuví tsi nyívi tsa nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quihví ñi yuhu cora ñuu can.

<sup>15</sup> Maa tyin nyívi javahá tsa caquiñi, tumaa ñi tasi, rayí tsa tsicá nuu tshin ñaha tan ñiñaha tsa tsicá nuu tshin rayí, tan ñi tsahñi, tan ñi jacahnú tsitoho, tan tandihí ñi vatya, tan ñi jandaví ñaha; tandihí maa ñi can, ña cua quihví ñi tsitsi ñuu can.

<sup>16</sup> Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya tsi nyívi tsicá vehe ñuhu. Yuhu cuví nyívi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

<sup>17</sup> Tatyí Ii Nyoo tan nyívi yihí cuenda ra, ñi tsa cuví tumaa ñasihi ra Mbee Ticatyí Luhlu, catyí ñi tyehen:

—Naha ñi, Jutu Mañi yu —catyí ñi.

Tan nyivi tsa tsiñi tuhun ihya, na catyi ndihi ñi:

—Naha.

Tan nyivi na ityi iñi tan tandihi nyivi cuñi quitsi, na quitsi ñi tan coho ñi ndutya tsa tsahá tsa coo nyito añima yo, tan nduve náa cua tyahvi ñi.

<sup>18</sup> Tan tandihi nyooho tsa tsiñi tuhun Nyoo tsa nyaá nu libru ihya, cuñi yu catyi yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqui ñi.

<sup>19</sup> Tan nyivi tsa cua quinyaa juhva tuhun Nyoo tsa nyaá nu libru ihya, Nyoo cua

quinyaa ra tsa taahán tsi tsi ñi tsa nyaá nu libru tsa caahán yoo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun.

<sup>20</sup> Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuvi tsi tacan. Naha ñi, Jutu Mañi yu, Jesús —catyí yu.

<sup>21</sup> Na naquihin tandihi ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñi.